


Luva'ana'i Namana
Makamakana



The New Testament in the Nara language of Papua New Guinea

Luva'ana'i Namana Makamakana
The New Testament in the Nara language of Papua New Guinea
Nupela Testamen long tokples Nara long Niugini

copyright © 2024 Global Bible Translators

Language: Nara (Lala)

Dialect: Nara

Translation by: GBT

Contributor: SIL Papua New Guinea and Namseul Presbyterian Church in South Korea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-08-29

PDF generated using Haiola and XeLaTeX on 3 Sep 2024 from source files dated 29 Aug 2024
f0f11a93-ea2f-5af2-b48b-3653b522a3fb

Contents

Luva'ana'i Namana Makamakana	1
Mataio	3
Maleko	59
Luka	93
Ioane	152
Veaneke Eta Vinala	194
Loma	249
1 Kolinto	274
2 Kolinto	299
Kalatia	315
Epeso	324
Pilipo	333
Kolose	339
1 Tesalonika	345
2 Tesalonika	350
1 Timoteo	353
2 Timoteo	361
Tito	366
Pilemona	370
'Ebelu	372
Iakobo	393
1 Petelo	400
2 Petelo	408
1 Ioane	413
2 Ioane	420
3 Ioane	422
Iuda	424
Ivala'asina	426
Luva Anita	457
Ikavuta 'Abuta	475

Luva'ana'i Namana Makamakana

This is the New Testament in the Nara Language, Central Province, PAPUA NEW GUINEA

The New Testament in the Nara Language (nrz)
Central Province, Papua New Guinea

Illustrations on pages ... by Birney Boyd. Used with permission.

Illustrations on pages ... by Louise Bass, © The British & Foreign Bible Society, 1994.

Illustrations on pages ... by Horace Knowles, © The British & Foreign Bible Society, 1954, 1967, 1972, 1995.

Illustrations on pages ... by Horace Knowles revised by Louise Bass, © The British & Foreign Bible Society, 1994.

Illustrations on pages ... © 1996 David C Cook. Used with permission.

Illustrations on pages ... by Gordon Thompson, © 2012 Wycliffe Bible Translators, Inc.

Illustrations on pages ... are UBS New Reader Series, © United Bible Society, 2002.

Illustrations on pages ... by Darwin Dunham, © United Bible Societies, 1989.

Illustrations on pages ... by Graham Wade, © United Bible Societies, 1989.

Colour photographs are used with the permission of the following individuals and organisations:

Puka kanania laloanai demimia davata Puka Vata Vata to'oto'ota Abuta Mataio Mt Maleko Mk Luka Lk Ioane Io Veauneke Eta Vinaula Vn Loma Lm 1 Kolinto 1Kl 2 Kolinto 2Kl Kalatia Kt Epeso Ep Pilipo Pp Kolose Ks 1 Tesalonika 1Ts 2 Tesalonika 2Ts 1 Timoteo 1Tm 2 Timoteo 2Tm Tito Tt Pilemona Pm 'Ebelu Eb Iakobo Ik 1 Petelo 1Pt 2 Petelo 2Pt 1 Ioane 1Io 2 Ioane 2Io 3 Ioane 3Io Iuda Id Ivala'asina Iv Luva Anita Luva Anita Ekakavu Abuta

Puka Vailana

Puka kanania 'Luva'ana'i Namana Makamakana' 'eva Dilava ena luva 'ani siako vaika Idume Kabukabuna Dilava ena kau evalalovaita inoku deleleia. Deleleia makava 'eva Elene malatai deleleia vakaia deabia keini mala edeata edeatai deleleia. Vali'u kanania'i 'eva 'ani iabikeyinina Lala malanai. Lala malanai deluvaluva mai devakua kauta boutai 'eva 5,000 boina, ia 'eva Bereina District ai demimia, Central Province laloanai.

2 Timoteo 3.16 ai Paulo eluva ediaka,

"Puka Kabukabuna luvata boutai 'eva Dilava Idumena ena viduluai deleleta, inoku eta vinaula 'eva namavaikata, kataua'i luva umauna eka vamalele vaia, bevalalovaita komolo, bevada'ata komolo, mai mauli komolona bevaikabasita kanaua'i ekamia. Kanaua 'ounai Puka kabukabuna luvana betata'u kau Dilava ena vinaula devavaia kauta eva'oluta kave'i vinaula nama'ita boutai bevavaita."

Lai a'ula Puka kanania ovakua laloanai, luva kanaua "Dilava ena vinaula devavaia kauta beva'oluta kave'i vinaula nama'ita boutai bevavai." 'eva oni emu ai be'ao.

Puka Kanania Laloanai

Puka kanania laloanai 'eva Iesu Keliso valina nama'ina. Bovakua 'eva boikabasi, kau 'eva Dilava ita bevaka'onamo 'udai. Kanania 'eva puka

ka'onamo, beiamo Iesu ena veauneke kauta voida mai abiveni kauta deta'u puka ka ka deleleta. Kanaua 'ouna puka kanania laloanai 'eva puka boutai lua navui kalakoika (27) demimia, inoku laloatai 'eva Dilava Nakuna Iesu Keliso lovana de'aku. Vikau davatai puka katania deleleta 'eva puka akatai sia demimia. Aoneka kauta delalovaia Iesu eda'a vutuvutu mulinai 'eva ena kau deta'u puka katania deleleta. Maleko ena lelelele 'eva easi makava vakaia muliai 'eva Ioane ena.

Makavanai kau kataua puka kanania luvata deleleta 'eva puka idouta vida mai elena vida 'eva sia deleleta, Maivaka puka 'olana luvata kikita 'eva sia deleleta. Vali'umo muliai 'eva kau deta'u idouta vida mai elena vida deleleta maivaka puka 'olana luvata kikita vaka deleleta 'olana vakuvaku ivaveaveana dainai.

Puka lava'ana'ita vani laloatai puka 'olata luvata kikita voida venutai 'eva puka voida vata maivaka idouta mai eleta vaka deleleta. Kanania anina 'eva sisiba vitaitana puka kataua laloatai bodavalita. Puka ka ka imakavatai 'eva 'Puka laloana ilelena luvana' deleleta, kataua 'eva puka lovata de'aku, mai venutai 'eva 'Puka iduvuna namata' deleleta.

Vali nama'ina deleleia kauta eta lelelele laloatai 'eva melala doutamo puka 'ana'ina luvata vaka deleleta. Kanaua 'ounai puka kanania laloanai luvuluva kataua boita 'eva kena lai availu dodo laloa duasi lai aleleta. Kanaua lai aleleta koma 'olana 'eva oi vakuvaku kaumui oi bo'ika koanai komolonai oi boikabasi, kataua 'eva puka 'ana'ina luvata. Vitaitana kau eta masi deleleta davata vaka kena lai availuta dodo laloa duasi lai aleleta.

Puka iduvuna luvata voida vaka maka [] katania boita laloatai lai aleleta, 'olana luva kataua 'eva lelelele 'ana'ita laloatai sia demia ia vali'umo muliai, vikau doutamo 'ani deole laloanai deleleta. Vaka luva voida maka () katania boita laloatai 'eva makavana umaunai Elene malatai sia deleleta luvata ia vali'u muliai lai sibomai lai aleleta 'olana luva anina oi kevamuiai lai bavala'asia kave'i 'ounai.

Puka kanania mulinai kabena laloanai 'eva puka kanania laloanai 'Luva anita' voida lai aleleta. Katania 'eva luda kauta eta koa mai kubuta 'ava'avata eta koa ua'i boikabasi kave'i ovota bo'ovo 'ounai lai aleleta.

Kanaua mulinai 'eva 'Luva eka davali abuta' boikala. Kanaua laloanai 'eva puka 'olana luvata voida, inoku 'olata luvata ka ka venutai 'eva puka voida vata maivaka koata mai eleta. Puka kataua laloata boikata 'eva vidulu luvata puka 'olana luvana lovana deakua.

Vali Nama'ina MATAIO Eleleia Kauna

Puka Laloana Ilehena Luvana

Vali nama'ina kanania laloanai 'eva Mataio ediaka, Iesu eta'u Dilava ena luva 'ana'i kanaua 'ani siako ena kau Isalaela kauta kevatai evavaia davana evamomo'aia kave'i, luva 'ana'i kanaua Dilava eta'u kau ka besinia be'asi kau bevamaulita. Vali nama'ina kanania 'eva sia Iuda kauta kataua viloatai Iesu emia kauta kevataimo, beia kanobata itoina eta vali nama'ina.

Mataio 'eva Iesu nia'i kanobatai emia laloanai, kevanai dava depulu davata eluvasi vai kave'i. Ena pulu melalanai eda'amo deakubala melalana, inoku bai eko'isi 'udai mai ena kau evikanita eda'a vutuvutu.

Mataio dava namana lovana eakua 'eva Dilava ena lovia vanuana, kanaua 'eva Iesu valina eluvaia kave'i.

Puka kanania ivaikabasi vaina ima laloanai, (1) Lolo akanai vamalele luvata, Dilava ena lovia vanuana laloanai kauta eta koakoa mai eta vavai (5 – 7); (2) Iesu ibanona kauta vinaula aboita bevavaita davata luvata (10); (3) Dilava ena lovia vanuana luvata ivavitaitata (13); (4) Ibanona kauta umauta demalele kauta kataua eta koakoa mai eta vavai abekoma (18); mai (5) Dava kataua kanobata dainai bepupulu davata. (24 – 25)

Puka Iduvuna Namata

- a. Iesu kanania ivaikabasi mai ena pulu. (1.1 – 2.23)
- b. Ioane vaidi'u kabukabu kauna ena vinaula. (3.1 – 12)
- c. Iesu ena idi'u kabukabu mai ivakovo. (3.13 – 4.11)
- d. Iesu ena vinaula kau kevatai Kalilea laloanai. (4.12 – 18.35)
- e. Kalileai eda'amo Ielusalema. (19.1 – 20.34)
- f. Masi to'onai Ielusalema kevanai mai laloanai. (21.1 – 27.66)
- g. Lovia namana ena ko'isi 'udai mai evaila. (28.1 – 20)

Iesu Keliso Ena Pulu Kubu Idolina.

(Lk 3.23-38)

¹ Iesu Keliso ena pulu kubu idolina, ia Abela'amo mai Davida 'ava'avatai easi.

² Abela'amo eta'u Isa'ako evapulua,

Isa'ako eta'u Iakobo evapulua,
Iakobo nakuna 'eva Iuda mai bo'akalana ita.

³ Iuda eta'u Pelese mai Sela evapuluta, sinata 'eva Tamala,
Pelese eta'u 'Esalona evapulua,
'Esalona eta'u Lama evapulua.

⁴ Lama eta'u Aminadaba evapulua,
Aminadaba eta'u Nasona evapulua,
Nasona eta'u Salamona evapulua.

⁵ Salamona eta'u Boasi evapulua, sinana 'eva La'aba pulu edea ateatena.
Boasi eta'u Obeda evapulua, sinana 'eva Luta pulu edea ateatena.
Obeda eta'u Iese evapulua.

⁶ Iese eta'u vanua Lovia 'olana Davida evapulua.
Davida eta'u Solomona evapulua,
ia sinana 'eva 'ana'inai Uli'a adana.

⁷ Solomona eta'u Le'oboama evapulua,
Le'oboama eta'u Abia evapulua,
Abia eta'u Asa evapulua.

⁸ Asa eta'u Ie'osabata evapulua,
Ie'osabata eta'u Iolama evapulua,
Iolama eta'u Usia evapulua.

⁹ Usia eta'u Iotama evapulua,
Iotama eta'u A'asa evapulua,
A'asa eta'u 'Esekia evapulua.

¹⁰ 'Esekia eta'u Manase evapulua,
Manase eta'u Amona evapulua,
Amona eta'u Iosia evapulua.

¹¹ Iosia eta'u Iekonia mai bo'akalana evapuluta,
melala kanaua'i Babulono kauta deta'u Isalaela kauta deabita devuata
deda'a eta kanobatai.

¹² Vaida devuata deda'a Babulono mulinai Iekonia eta'u Sealetiele evapulua,
Sealetiele eta'u Selubabele evapulua.

¹³ Selubabele eta'u Abiuda evapulua,
Abiuda eta'u Eliakima evapulua,
Eliakima eta'u Asolo evapulua.

¹⁴ Asolo eta'u Sadoka evapulua,
Sadoka eta'u Akimi evapulua,
Akimi eta'u 'Eliuda evapulua.

¹⁵ 'Eliuda eta'u Eleasala evapulua,
Eleasala eta'u Matana evapulua,
Matana eta'u Iakobo evapulua.

¹⁶ Iakobo eta'u Iosepa evapulua.

Iosepa adana Malia eta'u Iesu evapulua, kau vana de'aeia Keliso vamauli
kauna.

¹⁷ Kanaua'i Abela'amo enai eda'a Davida enai 'eva ulu 'ouka vani, Davida
enai eda'amo deda'a vaita Babulono melalanai vaka ulu 'ouka vani, mune'e
devuata deda'a Babulono mulinai eda'amo Keliso enai vaka 'eva ulu 'ouka
vani.

Iesu Keliso Ena Pulu.
(Lk 2.1-7)

¹⁸ Iesu Keliso a epulu koma valina 'eva kanania. Sinana Malia 'eva deluva
'ana'i vaia Iosepa beadavala, beia asido'o devaka'onamo laloanai eikabasi
Idume Kabukabuna siavunai melo ka beabia.

¹⁹ Iosepa 'eva komolo kauna, sia eula Malia bevamalalaia kau mato
vailatai 'ounai, eula luva 'ana'i kanaua vunivuniai bevavaia si'asi'a.

²⁰ Lalovai kanaua elalovaia laloanai, Lovia namana ena Anelu niviai
kevanai ela'asi e'ouia ediaka, "Iosepa Davida 'ava'avana e, Malia iadavana
sia bomakau, 'olana Idume Kabukabuna siavunai melo kanaua beabia.

²¹ Ia 'eva melo ka bevapulua, vana oi bo'aea Iesu, 'olana ia 'eva ena kau eta
si'avanai bevamaulita."

²² Koa kanania epulu 'eva Lovia namana ena enolea kauna e'ouia luvana
evamomo'aia.

²³ "Vato makamaka ka besivabu melo ka bevapulua,
vana be'aea 'Emanuela."

Anina 'eva 'Dilava ita kevatai'.

Isa 7.14

²⁴ Iosepa eibi mulinai, Lovia namana ena Anelu eluva vitaitana evavaia
Malia eadavala.

²⁵ Ia laluvana sia deno ka'ona kovo eda'amo Malia melo evapulua. Iosepa
melo vana e'aeia Iesu.

2

Aoneka Kauta Dae Duasi Deasi.

¹ 'Eloda Lovia 'olana Iuda eloviala melalanai, Iesu 'eva Iuda laloanai Betele'emai epulu. Boni kanaua'i aoneka kauta dae duasi kanobata edeana ai deasi deda'a Ielusalema

² inoku delavuai lavuai dediaka, "Iuda emui Lovia 'olana epulu melona 'eva a'i? Ia ena visiu dae duasi lai aikala 'ounai lai a'asi bakukudivo venia".

³ 'Eloda Lovia 'olana luva kanaua eika koanai nuana ebata, mai Ielusalema ai kau boutai vaka nuata debata.

⁴ 'Eloda eta'u Iuda eta kabukabu kauta namata mai talavatu 'ola kauta boutai e'aeta deasi dedo'u inoku elavuvaita ediaka, "Keliso 'eva a'i bepupulu?"

⁵ Ia ena luva devamuea dediaka, "Iuda, Betele'ema laloanai. Enolea kauna kanania eleleia koma.

⁶ 'Oni Betele'ema,

Iuda kanona laloanai,

Iuda deikala kao vanuata viloatai oni 'eva sia okiki vaika,

'olana oni emuai 'eva 'ola'ana'i kauna ka be'asi

ia 'eva e'u Isalaela kauta be'ana'ia vaita mamoe i'imata kauna boina.' "

Mik 5.2

⁷ Inoku 'Eloda aoneka kauta e'aeta vunivuniai dedo'u elavuvaita beikabasi kave'i melala davana umaunai 'eva visiu kanaua ela'asi.

⁸ Esinita beda'a Betele'ema inoku e'outa ediaka, "Oi boda'a melo 'oma'omana kanaua oi bokavua kave'i. Oi bodavalia koanai oi bovaikabasi'u, inoku lau vaka bada'a ia bakukudivo venia."

⁹ Aoneka kauta 'Eloda lovia 'olana lлена deika mulinai dalai deda'a laloanai visiu kanaua dae duasi deikaia davana e'ana'ia vaita eda'amo melo emia 'abunai evuakao.

¹⁰ Visiu kanaua deikaia koanai lalota denama keini.

¹¹ Luma kanaua laloanai dedodo koanai melo sinana Malia ita deikata inoku dekuidula melo dekukudivo venia. Mulinai eta lavo deluvuta inoku veniveni davata kolo, mulamula bonana mediana, mai mulamula kula'ilana kauani bedavua davana dedalata isi deainama venia.

¹² Inoku Dilava niviai e'outa kao sia bemumue 'Eloda kevana, inoku dala edeana deda'aia demue deda'a eta kanobata.

Iesu Devuaia Deveau Ovo Deda'a Aikupito.

¹³ Aoneka kauta deda'a mulitai Lovia namana ena Anelu niviai Iosepa kevanai ela'asi e'ouia ediaka, "Ko'isi melo sinana ita vada'ata oveauovo oda'a Aikupito. Ua'i oi bomimia beda'amo lau ba'oumu, 'olana 'Eloda 'eva 'ani melo bekavua beaku bala."

¹⁴ Inoku, Iosepa eko'isi melo sinana ita evada'ata boni kanaua'i deda'a Aikupito,

¹⁵ ua'i demia beda'amo 'Eloda bebaba. Kanaua 'eva Lovia namana ena enolea kauna nutunai eluvavaia luvana ivamomo'aina,

"Lau Aikupito ai Naku'u a'aeia la'asi."

Hos 11.1

¹⁶ 'Eloda eikabasi aoneka kauta delebaia mai sia bemumue kevana 'ounai, ia nuana e'ava la si'asi'a, aoneka kauta elavuvaita bonina elalovaia vitaitanai luva eveni ena kualai kauta Betele'ema mai vanua kele'enai davata laloatai melo boutai vikauta lua mai venuai kauta deakubata.

¹⁷ Melala kanaua'i enolea kauna Ielimaia eluvavaia luvana 'eva emomo'ai,

18 “Lele ka Lama ai deika kani mai vilalo nama vaikana, La'ela nakuna ekani diata, ia nuana bevakula'ilala 'eva sia eula 'olana boutai 'ani deba palu.”

*Aikupitoai Demue
Deda'a Nasaleta.*

Ier 31.15

19 'Eloda eba mulinai Aikupito ai Lovia namana ena anelu Iosepa kevanai niviai ela'asi,

20 e'ouia ediaka, “Ko'isi melo sinana ita vada'ata omue oda'a Isalaela kanonai, 'olana melo beaku bala kauta kataua 'eva 'ani deba”.

21 Inoku Iosepa eko'isi melo sinana ita evada'ata deda'a Isalaela.

22 Beia Akelao kamana 'Eloda 'abuna eabia Iuda eikaia kao valina eika koanai, beda'a Ielusalem 'eva emakau. Inoku niviai vaikabasi eabia 'ounai ekeini eda'a Kalilea.

23 Ia deda'a vanua ka vana Nasaleta ua'i demia, kanaua 'eva enolea kauta deluvaia luvana emomo'ai ia 'eva be'aea Nasaleta kauna.

3

*Vaidi'u Kabukabu Kauna
Ioane Eilolo.*

(Mk 1.28; Lk 3.1-18; Io 1.19-28)

1 Boni kataua'i Ioane Vaidi'u kabukabu kauna ela'asi Iuda kano'akunai ena ilolo emakavala ediaka,

2 “Emui si'avanai olalo 'udai, 'olana Dilava ena lovia vanuana 'eva 'ani ekevai.”

3 Kanania 'eva enolea kauna Isaia eta'u eluvavaia makava ediaka, “Kau ka kano'akunai evaoi ediaka, 'Lovia namana ena dala ova'olua, Ena da'a dalana ovakomoloa.”

Isa 41.3

4 Ioane ena tubu'a 'eva Kamela vuinai evavaia, mai kukuana 'apana 'eva bolomakau avana elioia, ena iani 'eva 'oasi'o mai metunu veina.

5 Ielusalem kauta mai Iuda laloanai vanua boutai, maivaka Iolidana nutu kele'enai vanua boutai kauta deasi kevana lelana be'ika.

6 Eta si'avana e'ou kao, mai Iolidana nutunai evaidi'uta kabukabu.

7 Ioane Palisea kauta mai Sadukea kauta doutamo deasi kevanai be-vaidi'uta kabukabu dekomu koanai e'outa ediaka, “Kau'asi nakuna kaumui e. Dai e'oumui anaana Dilava 'ani besinia kanaua kele'enai oi boveau tau?”

8 Lalo'udai vuavua ovala'asia.

9 Nuamui'ai sia oi bodiaka oi 'eva Abela'amo 'ava'avana 'ounai anaana kanaua kele'enai oi boveau tau. Lau oi a'oumui Dilava 'eva mai siavuna bika'a katania'i Abela'amo 'ava'avana bevavaita!

10 Ila 'eva 'ani e'olu au 'olanai, vuavua nama'ita sia devapulu auta boutai 'eva beuku'eko 'alova laloanai bekapota dodo.

11 Lau 'eva veiai mo avaidi'umu'i kabukabu emui lalo'udai koana, beia lau muli'uai e'asi kauna 'eva Idume Kabukabu'i mai 'alovai bevaidi'umu'i kabukabu. Ia ena siavu 'eva lau ekeini'u, lau sia anama'ina vaika ena tamaka bavuata.

12 Ena witi iaku mukamukata auna imanai eabia, ena witi 'abuna bevavaia kave'i, ena witi nama'ita 'eva idoubouta vakavakanai bedoubou, beia lu'ulu'uta 'eva sia ebo'o kovo 'alovanai betotou.”

*Ioane Iesu Evaidi'ua Kabukabu.**(Mk 1.9-11; Lk 3.21-22)*

¹³ Boni kanaua'i Iesu 'eva Kalilea ai easi Iolidana nutuna ai Ioane kevana bevaidi'ua kabukabu ekoma.

¹⁴ Beia Ioane eula Iesu nuana bevamuea 'ounai ediaka, "Oni lau bomavaidi'u'u kabukabu 'eva bemanama'ina. Beia dava 'ounai oasi lau keva'u."

¹⁵ Iesu Ioane ena luva evamuea ediaka, "Vali'u kanania 'eva oni bovavaia. Vinaula kanania'i Dilava ena komolo vinaulata boutai ekavamomo'aita." Inoku Ioane eta'u Iesu evaidi'ua kabukabu.

¹⁶ Iesu eidi'u kabukabu mulinai, veiai ele'au koanai komolonai vutuvutu eviluvu inoku Dilava Idumena e'ovu easi akanai itani boiomalo boina eikaia.

¹⁷ Inoku lele ka vutuvutuai e'aeasi ediaka, "Kanania 'eva lau Naku'u umauna, E'u lalo'au. Lau 'eva ia alalonama venia."

4*Diabolo Eta'u Iesu Evakovoa.**(Mk 1.12-13; Lk 4.1-13)*

¹ Inoku Idume Kabukabuna eta'u Iesu evada'ala deda'a kano'akunai diabolobetata'u bevakovoa.

² Iesu boni vaninavui mai lani vaninavui elove sia iani kena eania mulinai ia 'eva vikolo eaku si'ala.

³ Laloanai ivakovo kauna easi Iesu kevana e'ouia ediaka, "Bema oni Dilava nakuna koanai, bika'a katania outa palaoa be'ao."

⁴ Beia Iesu ediaka, "Puka kabukabunai 'ani ilelena 'Kau 'eva sia ianiai mo bemaui, Beia Dilava nutunai dela'asi luvata boutai ai bemaui."

⁵ Kanaua'i diabolo eta'u Iesu evada'ala Ielusalema vanua kabukabunai, Lo'e kabukabuna kubuanai evalavala 'au,

⁶ inoku diabolo Iesu e'ouia ediaka, "Bema oni Dilava nakuna koanai, sibomu kanana'i lovo asi. 'Olana Puka kabukabunai 'ani ilelena,

'Dilava ena anelu be'outa be'imamu imatai beabimu isi, kanaua'i aemu bika'ai sia boakua.' "

Sal 91.11,12

⁷ Iesu ia ena luva evamuea ediaka, "Puka kabukabunai vaka kanania ilelena koma,

'Lovia namana emu Dilava sia bovakovoa.' "

⁸ Inoku mune'e diabolo eta'u Iesu evada'ala lolo lakavaikana toilinai evalavala'au, inoku kanobata vanuata boutai nuavita evaikala.

⁹ Diabolo ediaka, "Bema bokuidula bokukudivo veni'u koanai, katania boutai oni bavenimu."

¹⁰ Iesu diabolo e'ouia ediaka, "Satani e, da'atau! Puka kabukabunai 'ani ilelena,

'Lovia namana emu Dilava sibonamo bokukudivo venia, mai da'alana bo'abi.' "

¹¹ Kanaua'i diabolo Iesu kele'enai eda'a ovo, inoku anelu deasi deduluia.

*Iesu Ena Vinaula**Kalileai Emakavala.**(Mk 1.14-15; Lk 4.14-15)*

¹² Iesu Ioane vabuto'o lumanai de'alavua valina eika koanai emue eda'a Kalilea kanonai.

¹³ Sia ua'i Nasaleta vanuanai emia, beia eda'a Sebulona mai Napatali kanotai Kalilea 'ovu 'aba'abanai vanua ka vana Kapelanauma ua'i emia.

¹⁴ Kanania epulu 'eva Isaia enolea kauna eluva luvana 'eva bemomo'ai,

¹⁵ “Sebulona kanonai mai
Napatali kanonai,
'ovu 'aba'abanai, Iolidana
nutu avekenai,
Kalilea pulu edea kauta
eta kanoai!

¹⁶ Kau vabuto'oai
demia kauta 'eva
'ailala nama vaikana 'ani deikaia.
Mai ba va'ava'ana kanonai demimia kauta akatai 'eva
'ailala 'ani ela'asi.”

Isa 9.1,2

¹⁷ Melala kanaua'i Iesu ena ilolo emakavala ediaka, “Emui si'avanai olalo 'udai, 'olana Dilava ena lovia vanuana 'eva 'ani ekevai!”

Iesu Va'eka Kauta Vani E'aeta.

(Mk 1.16-20; Lk 5.1-11)

¹⁸ Iesu Kalilea 'ovu 'aba'abana eda'aia eda'a koanai, a'a mai kadi lalua eikata, Simona vana ka 'eva Petelo, kadina Andelea ita eta vuo 'ovu laloanai denaia, 'olana ia 'eva va'eka kauta.

¹⁹ Iesu e'outa ediaka, “Muli'uai omai. Lau batata'u kau iva'eka venita kaumui'ai bavaaomui.”

²⁰ Komolonai mo eta vuo devikanita mulinai deda'a.

²¹ Eda'a ilulao 'eva a'a kadi lalua Iakobo mai Ioane kamata Sebedeo ita eta asi akana'i eta vuo delaumeta eikata inoku e'aeta.

²² Komolonai eta asi mai kamata devikania Iesu mulinai deda'a.

Iesu Eilolo Mai 'Olele

Evanama'inata.

(Lk 6.17-19)

²³ Iesu Kalilea kanona itoina laloana eda'aia, Iuda kauta eta lo'e laloatai evaikabasi, Dilava ena lovia vanuana valina nama'ina eilolo vaia, mai kau eta 'olele edeata edeata mai anana edeata edeata boutai evanama'inata.

²⁴ Sulia kanobatana itoina laloanai valina dekava odaoda, kanaua'i kau deta'u 'olele edeata edeata kauta, anaana edeata edeata kauta, nuatai ka'uba si'avata vaika kauta, lalamamalo kauta, mai 'eko kauta devuata deasi Iesu kevana, inoku ia eta'u boutai evanama'inata.

²⁵ Kau mato nama vaikana Kalileai mai Vanua Oukana kataua'i, Ielusalemai mai Iudai, mai Iolidana nutuna avekenai kanota kauta Iesu mulinai deda'a.

5

Iesu Loloai Eilolo.

(Lk 6.20-23)

¹ Iesu kau mato eikata koanai loloai ele'au emiadio. Ibanona kauta deasi kevana,

² inoku ena vaikabasi eabi lamala, ediaka,

³ “Idume enai detabu kauta 'eva denama'ina,
'olana Dilava ena lovia vanuana 'eva ia eta.

⁴ Dekakani kauta 'eva denama'ina,
'olana Dilava bevakula'ilata.

⁵ Sibota deva kikita kauta 'eva denama'ina,

'olana eluva'ana'i vaia kanona 'eva ia eta.

⁶ Vinaula komolona devikolo vaia mai deveiba vaia kauta 'eva denama'ina, 'olana Dilava betata'u bo'ata bevakubu.

⁷ Vilalo kauta 'eva denama'ina,

'olana Dilava vaka ia 'ani belalota.

⁸ Nuata demakamaka kauta 'eva denama'ina,

'olana ia 'eva Dilava beikala.

⁹ Nua'elu vinaulana devavaia kauta 'eva denama'ina,

'olana ia 'eva be'aeta Dilava nakuna.

¹⁰ Vinaula komolona devavaia 'ounai devavaita si'asi'a kauta 'eva denama'ina,

'olana Dilava ena lovia vanuana 'eva ia eta.

¹¹ Lau muli'uai oi odada'a 'ounai kau benunulaimui, bevaiviivimui mai dede luvata si'avata vaika edeata edeata be'oumui 'eva oi onama'ina.

¹² Lalomui benanama mai oi bolalonama, 'olana vutuvutu'ai 'eva tavamui namavaikana. 'Ana'inai enolea kauta demia koanai kanania devavaita koma.

Kanobata Damenana Mai Kanobata 'Ailalana.

(Mk 9.50; Lk 14.34-35)

¹³ Oi 'eva kanobata damenana. Bema damena dia'ana be'ole koanai, a bedia'a 'udai koma? Kevatai eta vinaula asi'i davata 'eva eka itota'au inoku kau akatai bemoi'au moi'au.

¹⁴ Oi 'eva kanobata kauta eta 'ailala. Lolo akanai vanua devavaia vanuana 'eva sia bevunia bedaia.

¹⁵ Kau ka lamepa betoua koanai olaka venunai sia bene'eadivo. Beia ikau'auna 'abunai bekaua'au, inoku kau boutai luma laloanai 'eva 'ailala bevenita.

¹⁶ Dala kanania vitaitanai, emui 'ailala kau vailatai ovala'asia beva'ailalata, kanaua'i vinaula nama'ita oi ovavai 'eva be'ika inoku Kamamui vutuvutu'ai bevanama'inala.

Iesu Mose Ena Talavatu Evamomo'aita.

¹⁷ Sia oi bolalovaia lau asi 'eva Mose ena Talavatu mai enolea kauta eta vaikabasi babiovo. Lau asi 'eva sia babiovo beia eta vaikabasi bavamomo'aita.

¹⁸ Lau oi luva umauna a'oumui, kanobata mai vutuvutu betaule, beia lelelele kikina ka 'o luva kikina vaika ka talavatu laloanai sia betaule bedada'a mo dava boutai anita bepulu palu.

¹⁹ Kanaua 'ounai kau ka talavatu kikina vaika eukua inoku kau vaidia vaikabasi kanaua vitaitana evaikata 'eva Dilava ena lovia vanuanai ia 'eva bekiki vaika. Beia dai talavatu 'olana e'aku mai vaikabasi kanaua vitaitana evaikata 'eva Dilava ena lovia vanuanai ia 'eva namana be'ao.

²⁰ Lau oi a'oumui, beia oi emui komolo vinalata ai Palisea kauta mai talavatu 'ola kauta eta komolo vinalata sia oi bokeinaita koanai Dilava ena lovia vanuanai sia oi boda'a dodo kovo.

Bo'akalamui Ita

Oi Boviluva Viveni.

(Lk 12.57-59)

²¹ Ana'inai 'ava'avamui kele'etai deluvaia luvana 'ani oi oika. "Sia Boakuaku, beia beakuaku kauna 'eva lavuai 'abunai belalava."

²² Beia vali'u lau a'oumui. Kau ka bo'akalana ebaduvenia 'eva bevuala beda'a lavuai 'abuna. Mune'e kau ka bo'akalana bo'ona be'oua 'eva bevuala beda'a lavuai namana de'imala kauta kevatai. Beia kau ka bo'akalana

be'oua bediaka, "Obo'o vaika." 'eva bevuala beda'a 'abu si'avana vaika, ua 'eva 'alova sia ebo'o kovo 'abuna.

²³ Kanaua 'ounai emu veniveni davana vala kabukabuna akanai oveveni laloanai bo'akalamu kele'enai emu va'eva ka emimia davana olaloaune koanai,

²⁴ emu veniveni davana ua'i vala kabukabuna vailanai bovikania. Boda'a makava bo'akalamu kele'ena laluaana oi boluvaluva mai oi bo'akalamu, inoku bomumue emu veniveni davana boveveni.

²⁵ Kau ka oni lavuai 'abunai bene'emu kauna vali'u oi laluaana lavuai 'abuna oi oda'ala koanai, bova'amea va'eva kanaua oi bovakomoloa kaokao, vakaia lavuai vailanai bolavadivo. Kanaua sia bo'akalamu koanai, oni emu 'ou kauna lavuai e'imala kauna imanai beudamu, lavuai e'imala kauna betata'u vabuto'o lumana e'imala kauna imanai beudamu, inoku oni 'eva vabuto'o lumanai be'ulemu.

²⁶ Lau luva umauna a'oumu, oni 'eva sia bola'asi kovo beda'amo emu va'eva tavana pene oleni boveveni.

Sia Bokulakula.

²⁷ Oi luva 'ani oika 'eva kanania eluva koma, 'Oni kau ka adana sia bokulala.'

²⁸ Beia lau oi a'oumui kau ka ateate eikala inoku elalovai si'asi'a 'eva nuanai 'ani kulakula koana ateate kanaua kevanai evavaia.

²⁹ Makamu idibana si'avanai ene'emu divo koanai, boia asi boitoa'au. Kauanimu le'ena ka betaule 'eva emediana 'olana kaumu itoina 'alova sia ebo'o kovo 'abuna laloanai asi'i emakapomu dodo.

³⁰ Mai imamu idibana si'avanai ene'emudivo koanai, botaua uku boitoa'au. Kauanimu le'ena ka betaule 'eva emediana 'olana kaumu itoina 'alova sia ebo'o kovo 'abuna laloanai asi'i emakapomu dodo.

Kau Ka Adana Sia Beva'ovua.

(Mt 19.9; Mk 10.11-12; Lk 16.18)

³¹ Maivaka kanania eluva koma, 'Kau ka adana eva'ovua koanai iva'ovu malelena ka belelea bevenia.'

³² Beia lau oi a'oumui, kau ka adana sia emaka si'a beia eva'ovua 'avaea ia 'eva eva'eva adana kulakula ai ene'eadivo, mai kau ka edeana betata'u deva'ovua ateatena kanaua beadavala koanai ia vaka kulakula koana evavaia.

Sia Boluva'ana'i 'Avaea.

³³ Mune'e 'ana'inai 'ava'avamui etai deluvaia luvana 'ani oi oika, 'Emui luva 'ana'i 'eva sia oi boluvala. Beia Lovia namana enai oi oluva 'ana'i davana 'eva oi bo'akalamu.'

³⁴ Beia lau oi a'oumui. Sia oi boluva 'ana'i. Sia luva 'ana'i ka vutuvutuai oi bo'akalamu, 'olana ua 'eva Dilava ena mia'au 'abuna.

³⁵ 'O kanobata ai luva 'ana'i sia ka oi boluvala, 'olana ia 'eva Dilava aena ivalavadivona 'abuna, 'o Ielusalema ai luva 'ana'i sia ka oi boluvala, 'olana ia 'eva lovia 'ola 'ou'ouna ena vanua.

³⁶ Mai oni 'olamu ai luva 'ana'i sia boluvala, 'olana oni vuimu ka'onamo bo'akalamu 'o bova'uma'umala 'eva sia oikabasia.

³⁷ Oni mo boluluva, "O' o 'Asi'i". Dava katanania vaida akatai oluvavai 'eva kau si'avana kele'enai de'asi.

Si'avana Tavana Sia Bovamuea.

(Lk 6.29-30)

³⁸ Oi luva kanania 'ani oi oika ediaka, 'Maka tavana 'eva maka, mai nika tavana 'eva nika.'

³⁹ Beia lau oi a'oumui, kau ka ena si'avana tavana 'eva sia bovamuea. Kau ka metemu idibana bepi'ala koanai, metemu 'ealina vaka bovenia bepi'ala.

⁴⁰ Kau ka e'ula emu ivadodo beabia 'ounai lavuai abunai bene'emu divo koanai, emu 'elutubu'a vaka bovenia.

⁴¹ Kau ka beva asiasimu maela ka'onamo boda'ala koanai, laluaana maela lua oi boda'ata.

⁴² Kau denoimu davana 'eva bovenita, mai kele'emuai dava ka eula venia beabia 'avaea 'eva 'ouna sia bovavaia.

'Ou Kauta Oi Bolalo'au Venita.

(Lk 6.27-28, 32-36)

⁴³ Oi luva kanania 'uluna 'ani oi oika ediaka, 'Kevamui kauta oi bolalo'au venita, inoku emui 'ou kauta 'eva oi bovaiviivita.'

⁴⁴ Beia lau oi a'oumui, emui 'ou kauta oi bolalo'au venita mai devavaimui si'asi'a kauta daitai oi bomeamea.

⁴⁵ Dala kanaua'i oi 'eva Kamamui vutuvutuai nakunai oi bo'ao. Ia 'eva si'avana kauta mai nama'ina kauta akatai ena melala evakalala, mai lamu evaakua komolo kauta mai va'eva kauta akatai.

⁴⁶ Oi kau delalo'au venimui kauta mo oi olalo'au venita koanai tavamui 'eva dava oi boabia? Moni visi kauta vaka kanaua devavai koma.

⁴⁷ Oi bo'akalamui mo ovanama'inata koanai, emui nama'ina 'eva dava kau vaida etai? Sia deabiveni kauta vaka kanaua devavai koma.

⁴⁸ Kanaua 'ounai Kamamui vutuvutuai emimia kauna ekomolo vaika vitaitanai oi vaka oi bokomolo vaika."

6

Kau Iduluta Koakoana.

¹ "Oi bo'imamui kave'i, emui komolo vinaulata kau vailatai sia oi bovavai be'ika. Kanaua oi bovavai koma koanai oi 'eva Kamamui vutuvutuai kauna kele'enai tavamui asi'i.

² Kanaua 'ounai ainama davana ta'ovala kauna bovenia koanai, kau vailatai sia bo'apa, vitaitana apa kauta lo'e laloatai mai vanua bo'adatai devavaia boina kau ia vanama'ina bevenita 'ounai. Lau oi luva umauna a'oumui, ia 'eva tavata itoina 'ani deabia.

³ Beia oi ta'ovala kauta oi oduluta koanai, imamu 'ealina sia beikabasi imamu idibana 'eva dava evavaia.

⁴ Kanaua'i emu ainama 'eva nuamuai bovonua. Inoku Kamamu dava vunivunia depupulu eikata kauna oni tavamu beveveni.

Meamea Dalana.

(Lk 11.2-4)

⁵ Oi bomeamea koanai sia apa kauta boitai oi bo'ao. Ia eta ula namana 'eva lo'e laloatai mai vanua bo'adatai belavadivo bemeamea kau beikata 'ounai. Lau oi luva umauna a'oumui, tavata itoinai 'ani deabia.

⁶ Beia bomeamea koanai, emu laloa laloanai bodododo inoku emu nutuala bo'alavua bomeamea Kamamu sia oikala kauna kele'enai. Kamamu dava vunivunia depupulu e'ika kauna tavamu beveveni.

⁷ Oi omeamea laloanai luva anita asi'i davata doutamo sia oi bo'oulai itani pulu edea kauta devavaia boina. Delalovaia eta meamea elaka'ina 'eva Dilava leleta 'ani eika.

⁸ Sia ia boitai oi bo'ao. Oi Kamamui asido'o oi onoia laloanai 'ani eikabasi oi dava oi oula venia.

Meamea Lovia Namana Evaikabasita Dalana.

⁹ Oi 'eva kanania oi bomeamea koma.

'Kamamai e, vutuvutuai omimia.

Oni vamu 'eva lai bavakabukabua.

¹⁰ Emu lovia vanuana emai,

boumaiai emu ula lai bavavaia kanobatai, vitaitana vutuvutuai devavaia boina.

¹¹ Vali'u melala kanania amai lai aulaveni davata bovenimai.

¹² Kau kataua kele'emaiai devavai si'asi'a kauta eta si'avana lai a'ou kao,

vitaitana emai si'avana lai avavai davata 'ou kao.

¹³ Sia bovada'amai ivakovo laloatai,

beia diabololo enai bovamaulimai.

(Lovia vanuana oni emu, Siavu oni emu, Nuavi oni emu, beda'amo bemia keinikeini. Amen.)'

¹⁴ Kau kataua kevamui devavai si'asi'a kauta eta si'avana oi bo'ou kao koanai, Kamamui vutuvutuai kauna emui si'avana vaka be'ou kao.

¹⁵ Beia, bema oi kau eta si'avana sia oi bo'ou kao koanai, Kamamui vutuvutuai emimia kauna vaka emui si'avana sia be'ou kao.

Love Koakoana.

¹⁶ Oi lolove koanai vailamui sia oi bovailalo itani apa kauta boita. Ikata koata devaadeanata kau boutai beikata beikabasi ia 'eva delolove. Lau oi luva umauna a'oumui, tavata itoina 'ani deabi.

¹⁷ Beia oni bololove koanai, vailamu bodeini mai deolo ai 'olamu bovavaia.

¹⁸ Kau sia beikabasi oni 'eva oani kabu, ia Kamata sia kaikala kauna mo beikabasi. Inoku Kamamu dava vunivuniai depupulu eikata kauna betata'u tavamu beveveni.

Lavo Vutuvutuai.

(Lk 12.33-34)

¹⁹ Emui lavo kanobatai sia oi bodoutabou, ua'i koekoe mai 'eme'eme betata'u bevasi'avanata, mai vinao kauta betata'u luma beaku papala bevinaota.

²⁰ Beia emui lavo 'eva vutuvutuai oi bodoubou, ua'i 'eva koekoe mai 'eme'eme sia bevavai si'asi'a, mai vinao kauta luma sia beaku papala inoku bevinaota.

²¹ Inoku oni emu lavo 'abu davanai 'eva nuamu vaka ua'i.

Kauani Ena Lamepa.

(Lk 11.34-36)

²² Maka 'eva kauani ena lamepa, oni makamu denama'ina koanai kauanimu itoinai 'eva 'ailala laloanai.

²³ Beia, bema makamu besi'avana koanai kauanimu itoinai 'eva vabuto'o laloanai. Inoku, bema oni nuamu 'ailalana evabula koanai vabula kanaua 'eva bevabulaavu.

'Ola Kauta Lalua Da'alata

Sia Bo'abi.

(Lk 16.13)

²⁴ Kau ka 'ola kauta lalua melala ka'onamoai da'alata sia be'abi. Ka ulana sia be'ula ia ka belalo'au venia, 'o ka lelana be'ika ia ka 'eva beva si'avanala. Oi Dilava mai lavo lalua melala ka'onamoai da'alata sia oi bo'abi.

Nuamui Sia Bevavunu.

(Lk 12.22-31)

²⁵ Kanaua 'ounai lau oi a'oumui. Nuamui sia bevavunu, emui mauili 'ounai dava oi boma ani 'o dava oi bomainu, 'o kauanimuiaidava oi bomavadodo davata sia oi bolalovaita. Mauili 'eva bokama ekeinia, mai kauani 'eva tubu'a ekeinia.

26 Akai delolovo manumanuta oikata. Ia kea sia devavado, sia de'ua'ua mai iani doubou doubou abutai sia de'ule, beia Kamamui vutuvutuai kauna 'eva e'imata kave'i. Beia oi emui nama'ina 'eva manumanu ekeineta.

27 Oi ka kena boma maui dau'a lalovaina onua mekau vaia?

28 Mai dava 'ounai tubu'a enai nuamui ebavunu? La'uka vela a dekubu koma oi boikata. Ia sia debavunu 'o sibota tubu'ata sia devavai.

29 Beia lau oi a'oumui, Solomona ena nuaviai tubu'a nama'ina evadodoa, ia vela katania 'eva denama'ina vaika.

30 Kanaua'i la'uka divuta vali'u develavela mala 'ani belamoda 'alova laloanai bekapota dodo belo'olo'o davata tubu'ata Dilava etata'u kanania evadodota koma koanai, oi emui tubu'a kanaua sia bevavadodomui koma, una? Emui abiveni dekiki kaumui.

31 Kanaua 'ounai nuamui sia bevavunu, sia oi bodiaka, "Ita dava eka ani?" 'o "Ita dava ekainu?" 'o "Ita dava ekavadodoa?"

32 Pulu edea kauta dava katania boita boutai dekaavu, beia oi Kamamui vutuvutuai 'ani eikabasi dava katania 'eva oi oula venita.

33 Oi 'eva Dilava ena lovia vanuana mai ena ula vinaulana komolona oi bokavua makava, vakaia dava katania boita boutai 'eva oi bevenimui.

34 Kanaua 'ounai nuamu sia bevavunu mala enai. Mala 'eva sibona ena nua mekau. Boni ka ka eta mekau 'eva sibota eta."

7

Vaida Va'eva 'Abunai

Sia Oi Bone'etadivo.

(Lk 6.37-38, 41-42)

1 "Vaida va'eva 'abunai sia oi bone'etadivo 'olana Dilava oi vaka va'eva 'abunai asi'i emane'emuidivo.

2 'Olana oi vaida va'evai oi one'etadivo koanai dalana vitaitanai Dilava betata'u oi va'evai bene'emuidivo. Mai oi emui koakoa vaida kele'etai vitaitatai Dilava betata'u kevamuii vaka bevavai.

3 Dava 'ounai bo'akalamu makana laloanai au na'ina'ina oikala, beia oni sibomu makamu laloanai au ubana lalovaina sia olalovaia?

4 Dava 'ounai oni bo'akalamu o'oua, "Makamu laloanai au na'ina'ina babia ovo"? Ia oni 'eva makamu laloanai au ubana emimia.

5 Oni apa kaumu! Sibomu makamu laloanai au ubana boabia asi makava, vakaia boikaika kave'i inoku bo'akalamu makana laloanai au na'ina'ina boabia asi.

6 Kabukabu davana 'oveka sia oi bovenita, beka'udai asi'i dema alamui 'ounai. Emui maili sia oi bokapota asi boloma vailatai. Aetai asi'i demamoikai moikaita 'ounai.

Oi Bonoinoi, Oi Bokavua, Oi Boakuaku.

(Lk 11.9-13)

7 Oi bonoinoi 'eva bevenimui, oi bokavua 'eva oi bodavalia, oi boakuaku 'eva nutualamui 'ani beluvu.

8 Kau ka ka benoinoi kauta 'eva bevenita, kavu kavu kauta 'eva bedavalia, mai beakuaku kauta 'eva nutualata beluvua.

9 Oni kau davamu, nakumu bokama bemanoinoi koanai bika'a bomavenia, una?

10 'O sisi bemanoinoi koanai kau'asi bomavenia, una?

11 Oi si'avana kaumui, beia nakumui dava nama'ita oi bovenita 'eva oi oikabasi. Kanaua 'ounai Kamamui vutuvutuai kauna betata'u benoinoi kauta dava nama'ita vida umauta bevenita, una?

¹² Kau vaida kevamui ai dava oi oula venia bevavaia davana 'eva oi vaka kele'etai vitaitana oi bovavaia. Kanania 'eva Mose ena Talavatu mai enolea kauta eta vaikabasi luvana anina umauna.

Nutuala Omoomona Laloanai

Oi Boda'adodo.

(Lk 13.24)

¹³ Oi 'eva nutuala omoomona laloanai oi boda'a dodo. 'Olana ba keinikeini eda'ala nutualana 'eva epalapala mai dalana namana, kau doutamo 'eva ua'i deda'adodo.

¹⁴ Beia maui keinikeini eda'ala nutualana 'eva eomoomo, mai dalana ida'ana 'eva epasisi, kau vavidamo dedavalia.

Au Mai Au Vuana.

(Lk 6.43-44)

¹⁵ Enolea dedeta kauta oi boikata kave'i, be'asi kele'emui ikata itani mamoe boita, beia nuata 'eva 'oveka 'asita aivalata boita.

¹⁶ Oi 'eva kau kataua vuavuatai oi boikata une. Kavakava 'eva veivei vuana sia bevapulua, 'o 'ini auma 'eva moika vuana sia bevapulua.

¹⁷ Vitaitana au nama'ita boutai 'eva vuata nama'ita devapulu, beia au si'avata 'eva vuata si'avata devapuluta.

¹⁸ 'A au nama'ina 'eva vuavua si'avana sia bevapulua maivaka au si'avana 'eva vuavua nama'ina sia bevapulua.

¹⁹ Au kataua boutai vuavua nama'ita sia devapuluta davata 'eva be'uku 'alova laloanai bekapota dodo.

²⁰ Kanaua 'ounai vuavua kataua boita 'eva enolea kauta dedeta 'ani oi boikabasita.

Lau Oi Sia Aikabasimui.

(Lk 13.25-27)

²¹ Kau boutai de'ae'u, 'Lovia namana e, Lovia namana e,' kau kataua boutai 'eva Dilava ena lovia vanuana laloanai sia beda'adodo, beia dai Kama'u vutuvutu ai emimia kauna ena ula vinalana bevavaia kauna 'eva beda'adodo.

²² Melala kanaua'i doutamo be'ou'u bediaka, "Lovia namana e, Lovia namana e, oni vamuai lai aenolea, vamuai ka'uba si'avata lai alo'ota asi, maivaka vamuai vatabulovo koata edeata edeata lai avavai!"

²³ Inoku lau 'eva vailatai ba'outa kave'i badiaka, "Lau oi sia aikabasimui. Keva'uai oda'atau, oi si'avana ivavaina kaumui!"

Luma Ivalavata Kauta Lalua.

(Lk 6.47-49)

²⁴ Kanaua 'ounai kau ka e'u luva kanania 'uluna e'ika maivaka vinalata evavai 'eva itani aoneka kauna boina ena luma bika'a akanai evalavala.

²⁵ Lamu eaku abaka ela'asi maivaka lani namana eunu luma euteia, beia sia e'eko, 'olana luma 'eva bika'a akanai evalavala 'au.

²⁶ Beia kau ka e'u luva kanania 'uluna e'ika, inoku vinalana sia evavaia 'eva itani bo'o kauna boina ena luma kano akanai evalavala.

²⁷ Lamu eaku abaka ela'asi, mai lani eunu luma euteia inoku e'eko eakuia mukamuka."

²⁸ Iesu luva kanaua evapuala koanai kau mato boutai ena vaikabasai detabulovo si'asi'a.

²⁹ 'Olana ia ena vaikabasi 'eva sia talavatu 'ola kauta eta vaikabasi boita, ena luva 'eva mai siavuna.

8

*Iesu Loki Kauna Evanama'inala.**(Mk 1.40-44; Lk 5.12-14)*

¹ Iesu loloai e'ovu koanai kau mato nama vaikana mulinai deda'a.

² Loki kauna ka easi Iesu vilanai ekuidula e'ouia ediaka, "Lovia namana e, bo'ula koanai bovanama'ina'u."

³ Iesu imana eisia lao eabia kovo inoku ediaka, "Lau a'ula kaumu benama'ina." Komolonaimo loki kauna enama'ina.

⁴ Inoku Iesu kau kanaua e'ouia ediaka, "Sia kau ka makanai boluluva, beia sibomu boda'a kabukabu kauna kele'enai kaumu bovaikala, maivaka ainama Mose eluvavaia davana bovenia inoku bevamomo'aimu oni 'eva 'ani onama'ina."

*Iesu Loma Kuali 'Olana Kauna Ena Da'ala Abi Kauna Evanama'inala.**(Lk 7.1-10)*

⁵ Iesu Kapelanauma vanuanai eda'adodo koanai, Loma kuali 'olana kauna ka easi kevana enoia bedulua.

⁶ Ia Iesu e'ouia ediaka, "Lovia namana e, e'u da'ala abi kauna e'eko lumai e'eno, kauna eanana vaika."

⁷ Iesu ia e'ouia ediaka, "Bavasi bavanama'inala."

⁸ Kuali 'olana kauna Iesu e'ouia ediaka, "Lovia namana e, lau sia anama'ina oni bo'asi e'u luma, beia boluluva mo ua'i e'u da'ala abi kauna benama'ina.

⁹ 'Olana lau 'eva siavu kauna ka venunai amimia maivaka kuali kauta vaida lau venu'uai demimia. Lau kau kanania a'oua, 'Da'a' 'eva edada'a, mai kau kanaua a'oua, 'Oni mai.' 'eva e'asi. Maivaka e'u da'ala abi kauna a'oua, 'Kania vavaia.' 'eva ia evavaia."

¹⁰ Iesu luvu kanaua eika koanai etabulovo si'asi'a, inoku mulinai deda'a kauta e'outa ediaka, "Lau oi luvu umaana a'oumui, Isalaela laloanai kau ka kele'enai abiveni kanania boina sia ka adavalia kovo.

¹¹ Lau oi a'oumui kau doutamo vaika daeai maivaka divoai be'asi Dilava ena lovia vanuana laloanai nadu 'abunai Abela'amo, Isa'ako mai Iakobo ita bemiadivo ka'ona.

¹² Beia kau kataua Dilava ena lovia vanuana eva'olua ia eta kauta 'eva mulimuliai bekapota asi vabulaai ua'i bekakani mai 'asi'asita beala'oi ala'oi."

¹³ Iesu kuali 'olana kauna e'ouia ediaka, "Da'a emu luma, oabiveni vitaitanai kevamuai 'ani bepupulu." Ena da'ala abi kauna melala ka'onamoai komolonai enama'ina.

*Iesu Petelo Lavana Ateatena**Ena 'Olele Evanama'inala.**(Mk 1.29-31; Lk 4.38-39)*

¹⁴ Iesu Petelo ena lumai eda'adodo koanai, Petelo lavana ateatena eikaia e'olele kauna desiavu eno.

¹⁵ Iesu eta'u ateate imana eabi kovo, inoku 'olele evikania, ateate eko'isi Iesu ana iani evavai.

*Iesu Eta'u 'Olele Edeata Edeata Evanama'inata.**(Mk 1.32-34; Lk 4.40-41)*

¹⁶ Lavilavi eda'avenia koanai kau doutamo ka'uba si'avata vaika nuatai demia kauta devuata deasi Iesu kevana. Iesu ena luvai ka'uba si'avata vaika elo'ota asi maivaka 'olele kauta boutai evanama'inata.

¹⁷ Nia 'eva Isaia enolea kauna ena luvu ivamomo'aina kanania eluva koma,

'Ia sibona eta badebade beabi tau

maivaka eta 'olele evanama'inata.'

Iesu Bebanoa Deko Kauta.

(Lk 9.57-60)

¹⁸ Iesu kau mato namavaikana delavaia kaiukaiu eikata koanai ibanona kauta e'outa bekeini 'ovu avekena beda'ala.

¹⁹ Talavatu 'ola kauna ka easi Iesu e'ouia ediaka, "Vaikabasi kaumu e, 'abu davana boda'ala beia lau 'eva oni mulimuai badada'a."

²⁰ Iesu ia ena luva evamuea ediaka, "Oveka 'asita 'eva mai eta va'ala, mai aka manumanuta 'eva mai eta ni'i, beia lau kau nakuna 'eva 'ola'u bane'eadivo la'u ba'ani 'abuna asi'i."

²¹ Ibanona kauna ka Iesu e'ouia ediaka, "Lovia namana e, bamada'a kama'u bamakolea 'ana'i."

²² Beia Iesu ia e'ouia ediaka, "Muli'uai mai, ba kauta 'eva vikanita sibota eta ba de koleia."

Iesu Lani Mai Ka'uda Eva'olota.

(Mk 4.36-41; Lk 8.22-25)

²³ Kanaua'i Iesu asiai ele'au inoku ibanona kauta ita deda'a.

²⁴ 'Ovuai lani nama vaikana eunu, ka'uda namata deko'isi asi komanimo devaukua, beia Iesu 'eva emuinai tabu.

²⁵ Ibanona kauta deda'a dekuia inoku de'ouia dediaka, "Lovia namana e, vamaulita! 'Ani eka ba."

²⁶ Beia eta luva evamuea ediaka, "Emui abiveni ekiki kaumui, dava 'ounai oi omakau?" Inoku Iesu eko'isi lani mai ka'uda e'ovenita, kanaua'i kolomonai de'olo.

²⁷ Kau asiai kataua detabulovo si'asi'a inoku dediaka, "Nia 'eva kau davana, lani mai ka'uda vaka lлена de'ika."

Iesu Kau Lalua Nuatai Ka'uba Si'avata Vaika Elo'ota Asi.

(Mk 5.1-17; Lk 8.26-37)

²⁸ Iesu 'ovu avekenai Kadalene kanonai ela'asi koanai, kau lalua nuatai ka'uba si'avata vaika demia kauta mitavai deasi kevana. Ia 'eva deaivala vaika 'ounai sia kau ka dala kanaua'i ekeini.

²⁹ Ia devaoi dediaka, "Dilava nakuna e, kevamai ai dava oula venia? Melala asido'o edaia beia oni o'asi 'eva lai bovaananamai, una?"

³⁰ 'Abu kanaua'i vilona sia edau'a 'eva boloma 'ito namavaikana ka deaniani.

³¹ Inoku ka'uba si'avata Iesu denoia dediaka, "Oni bovala'asimai koanai, bosinimai lai bada'a boloma 'itona kanaua laloatai lai badododo."

³² Inoku e'outa ediaka, "Oda'a." Inoku ia dela'asi deda'a boloma nuatai dedodo. Boloma 'itona deveau de'ovu ke'eke'eai delovo asi 'ovu laloanai delovo uku veiai dedono ba.

³³ Boloma i'imata kauta deveau ovo vanua namanai vali kanania mai ka'uba si'avata kau nuatai demia kauta valita vaka dekava.

³⁴ Inoku vanua namana kauta boutai deasi Iesu beikala. Deasi deikaia koanai denoia eta kano bevikania.

9

Iesu 'Eko Kauna Ka Evanama'inala.

(Mk 2.1-12; Lk 5.17-26)

¹ Iesu asi ai ele'au 'ovuai ekeini eda'a Kapelanauma, ena vanua umauna.

² Kau vaida 'eko kauna ka toto'ai devuaia deda'a kevana. Iesu eta abiveni eikaia koanai, 'eko kauna e'ouia ediaka, "Naku'u e, sia bomakau, emu si'avana 'ani i'ou kaota."

³ Kanaua'i talavatu 'ola kauta vaida sibota viloatai deluvaluva dediaka, "Kau kanania 'eva Dilava enai eluva si'asi'a."

⁴ Iesu 'eva eta lalovai eikabasi inoku ediaka, "Dava 'ounai lalovai si'avata nuamuiai oi olalovaita?"

⁵ Davana 'eva eveavea, badiaka 'Emu si'avana i'ou kaota.' 'o badiaka 'Ko'isi da'a.'

⁶ Beia oi boikabasi lau kau nakuna 'eva mai e'u siavu kanobata kauta eta si'avana ba'ou kao." Inoku Iesu 'eko kauna e'ouia ediaka, "Ko'isi, emu toto'a abia, inoku da'a emu luma."

⁷ Ia eko'isi, inoku eda'a ena luma.

⁸ Kau mato koa kanaua deikaia koanai detabulovo si'asi'a, inoku siavu kanaua boina kau evenita Dilavana devanama'inala.

Iesu Mataio E'aeia.

(Mk 2.13-17; Lk 5.27-32)

⁹ Iesu 'abu kanaua evikania inoku eda'a koanai kau ka eikaia, ia vana 'eva Mataio, moni visi 'abunai emiadio, e'ouia ediaka, "Muli'uai mai." Mataio eko'isi mulinai eda'a.

¹⁰ Iesu Mataio ena lumai eaniani laloanai, moni visi kauta doutamo mai si'avana kauta vaka deasi ia mai ibanona kauta ita deaniani ka'ona.

¹¹ Palisea kauta vaida koakoa kanaua deikaia koanai ibanona kauta delavuaia dediaka, "Dava 'ounai emui vaikabasi kauna moni visi kauta mai si'avana kauta katanania boita ita deaniani ka'ona?"

¹² Iesu 'ulu kanania eika koanai eta luva evamuea ediaka, "Sia de'olele kauta 'eva mulamula veni kauna sia deula venia, beia de'olele kauta mo deula venia.

¹³ Oi oda'a Puka kabukabuna luvana kanania anina dava 'eva oi bokavua, 'Lau vilalo aula venia ia sia veniveni davana.' Lau asi 'olana 'eva komolo kauta sia ba'aeta, beia si'avana kauta ba'aeta."

Love Lavuaina.

(Mk 2.18-22; Lk 5.33-39)

¹⁴ Inoku Ioane ibanona kauta deasi Iesu kevana delavuaia dediaka, "Dava 'ounai lai mai Palisea kauta ita lai alolove, beia oni ibanomu kauta 'eva sia delolove?"

¹⁵ Iesu eta luva evamuea ediaka, "Kamoane makamaka kauna ena da'a'au kauta kele'etai emimia koanai ia a bekani koma? 'A melalana be'asi kamoane makamaka kauna kele'etai beabia tau koanai ia belolove.

¹⁶ Kau ka tubu'a makamakana si'ana tubu'a 'ana'ina ita sia bekuli ka'ona, 'olana ikulina 'abuna be'idi ovo 'eva 'ile 'ani namana beao.

¹⁷ Kau vine veina makamakana pute 'ana'ina sia belaiauda, 'olana pute be'idi 'eva vine veina be'itabu maivaka pute asi'i bemasi'avana, 'a vine veina makamakana 'eva pute makamakatai belaiuda inoku luana benama'ina."

Vato Ka Eba Mai

'Olele Ateatena Ka.

(Mk 5.22-43; Lk 8.41-56)

¹⁸ Iesu luva kanania eluvaia koanai, lo'e 'ola kauna ka easi vilanai ekuidula e'ouia ediaka, "Naku'u vatona 'eva vali'u mo ebaba, beia mai imamu akanai bokao'au inoku bemaui."

¹⁹ Inoku Iesu eko'isi mulinai eda'a, ibanona kauta vaka deda'a.

²⁰ Ua'i 'a'ate eta 'olele edavalua vikau ouka lua ateatena ka Iesu mulinai eda'a easi ena tubu'a si'ana eabia kovo.

²¹ 'Olana sibona nuanai ediaka, "Ena tubu'a si'ana mo babia kovo 'eva banama'ina."

²² 'A Iesu ekai 'udai eikaia inoku e'ouia ediaka, "Naku'u e, bokula'ila, emu abiveni eta'u evanama'inamu." Ateate komolonai mo enama'ina.

²³ Inoku Iesu lo'e 'ola kauna ena lumai edodo, siau uvani kauta mai kanikani kauta 'uluta devua eikata,

²⁴ inoku e'outa ediaka, "Ola'asi, vato 'eva sia eba, ia 'eva emuinai." Beia ia 'eva Iesu deikaia demamai.

²⁵ Inoku ia eta'u kau mato evala'asita mulimuliai mulinai, eda'a dodo vato ena laloa laloanai, vato imanai eabi, evako'isia.

²⁶ Kano kanaua bounai laloanai valina kanania dekavaia odaoda.

Iesu Maka E'ede Kauta Lalua Mai Malana Elevo Kauna Ka Evanama'inata.

²⁷ Iesu 'abu kanaua'i ela'asi koanai maka 'ede kauta lalua mulinai deda'a devaoi dediaka, "Davida nakuna e, bomalalomai."

²⁸ Ia lumai edodo koanai maka 'ede kauta deasi kevana, inoku Iesu elavuaia ediaka, "Oi ovamomo'ai'u lau oi 'ani bavanama'inamui, una?" Ia dediaka, "O, Lovia namana, lai avamomo'aimu."

²⁹ Iesu ia makata eabita kovo inoku ediaka, "Emui abiveni vitaitana kevamui'ai epulu."

³⁰ Inoku makata deata. Iesu e'outa kao ediaka, "Sia kau ka oi bovaikabasia."

³¹ Beia ia 'eva dela'asi deda'a kano kanaua itoina laloanai Iesu valina dekava.

³² Ia dela'asi deda'a koanai, kau vaida deta'u nutububu kauna ka nuanai ka'uba si'avana emia 'ounai devuaia deda'a Iesu kevana.

³³ Ka'uba si'avana elo'oia asi mulinai nutububu kauna enama'ina inoku eluvaluva, kau boutai detabulovo inoku dediaka, "Isalaela laloanai koa kanania boina sia ka kaikaia kovo."

³⁴ Beia Palisea kauta dediaka, "Ia 'eva ka'uba si'avata eta 'ola kauna 'ounai ka'uba si'avata elo'ota asi."

Iesu Do'u Kauta Elalota.

³⁵ Inoku Iesu eda'a vanua namata mai kikita boutai laloatai eda'a to'ato'a, eta lo'e laloatai evaikabasi, Dilava ena lovia vanuana valina nama'ina eilolo vaia, 'olele mai anana edeata edeata boutai evanama'inata.

³⁶ Iesu kau mato kanaua eikaia koanai elalota 'olana ia 'eva delalo to'ato'a mai sia mai iduluta, itani mamoe sia mai i'imata kauta boita.

³⁷ Inoku ia ibanona kauta e'outa ediaka, "Lobai iani doutamo 'ani de'olu, beia vinaula kauta 'eva sia douta.

³⁸ Kanaua 'ounai loba 'uala kauna oi bonoia vinaula kauta besinita ena lobai be'ua'ua."

10

Iesu Veaneke Kauta

'Ouka Lua Edilata.

(Mk 3.13-19; Lk 6.12-16)

¹ Iesu ibanona kauta 'ouka lua e'aeta deasi kevana, siavu evenita ka'uba si'avata belo'ota asi maivaka 'olele mai anaana edeata edeata boutai bevanama'inata.

² Veaneke kauta 'ouka lua vata 'eva katania, lava'ana'ia 'eva Simona, de'aeia vaka Petelo, mai kadina Andelea, Sebedeo nakuna Iakobo mai kadina Ioane.

³ Pilipo, Batolomeo, Toma mai moni visi kauna Mataio, Alepeo nakuna Iakobo, mai Tadeo.

⁴ Selote kauna Simona, mai Isakaliote kauna Iuda, Iesu venina eveni mai kouna ekou kauna.

Iesu Ena Veauneke 'Ouka Lua Esinita La'asi.

(Mk 6.7-13; Lk 9.1-5)

⁵ Iesu kau 'ouka lua katania esinita mai e'outa ediaka, "Sia oi boda'a pulu edea kauta eta kanoai maivaka Samalia vanuata sia ka laloanai oi boda'a dodo.

⁶ Beia oi boda'a Isalaela iduvuna ena mamoe detaule kauta kele'etai.

⁷ Oi bodada'a koanai oi boilolo bodiaka, 'Dilava ena lovia vanuana 'eva 'ani ekevai.'

⁸ 'Olele kauta oi bovanama'inata, ba kauta oi bovamaulita, loki deabia kauta kauanita oi bovanama'inata, mai ka'uba si'avata oi bolo'ota asi. Oi oabi 'avaea 'ounai oi boveni 'avaea.

⁹ Emui idavala laloatai moni namata 'o kikita sia oi bo'uda.

¹⁰ Emui da'a to'ato'a 'ounai voina, tubu'a ivadodo ivaluana, tamaka, mai ikoko'a sia oi bo'abi, 'olana vinaula kauna 'eva mai inana'ana.

¹¹ Vanua davanai oi oda'a dodo koanai beabimui dae kauna oi bokavua kele'enai oi bomimia beda'amo 'abu kanaua oi bovikania.

¹² Luma kanaua'i oi oda'a dodo koanai vanama'ina oi boveni.

¹³ Luma kauta beabimui dae koanai emui vanama'ina akatai bemimia, beia sia beabimui dae koanai emui vanama'ina 'eva oi boabia 'udai.

¹⁴ Mai vaida sia beabimui dae 'o lelemui sia be'ika koanai vanua 'o luma kanaua oi bovikania laloanai aemui apulolota oi bodavudavu ovo.

¹⁵ Lau oi luva umauna a'oumui, lavuai olena melalanai Sodom mai Gomola vanuata eta mekau kena bekiki, beia vanua kanaua ena mekau 'eva namavaikana.

Baduviveni Be'asi.

(Mk 13.9-13; Lk 21.12-17)

¹⁶ Lau oi asinimui 'eva vitaitana itani mamoe boita oi oda'a 'oveka 'asita viloatai. Kanaua 'ounai oi boaoneka itani kau'asi boita mai boiomalo boita oi bo'ao nuamui ai si'avana sia oi bolalovaia.

¹⁷ Kau kevetai oi bo'imamui kave'i, 'olana ia beabimui beda'a lavuai 'abunai bene'emuidivo maivaka lo'e laloatai be'odimui.

¹⁸ Lau dai'uai oi bevuumui beda'a 'ola kauta namata mai lovia kauta namata vailatai belavuaimui, beia ia mai puluedea kauta kele'etai vali namata'ina oi bo'outa.

¹⁹ Bevuumui beda'a lavuai 'abuna koanai luva davana oi boluvala 'o a oi boluva koma 'eva nuamui sia bebavunu. Melala kanaua'i Dilava betata'u luva dava oi boluvala luvana 'eva bevenimui.

²⁰ 'Olana iluvana 'eva sia oi, beia Kamamui Dilava Idumena nuamui ai kauna beluluva.

²¹ Bo'akalana ka betata'u bo'akalana venina beveveni mai kouna bekokou beaku bala, kama betata'u nakuna kanaua bekomala, naku betata'u kamata mai sinata bevaiviivita ba 'abunai be'uleta.

²² Kau boutai lau dai'uai bevaiviivimui, beia dai lau dai'uai belava 'ini kauna beda'a to'onai ia 'eva bemaui.

²³ Vanua kai bevaiviivimui koanai, oi bo'ulu oi boda'a vanua edeana ka. Lau oi luva umauna a'oumui, Isalaela vanuata boutai sia oi boda'a dodo palu laloanai lau kau nakuna 'eva ba'asi.

²⁴ Malele melona ena vaikabasi kauna sia bekeinina 'o da'ala abi kauna ena 'ola kauna sia bekeinina.

²⁵ Malele melona ena vaikabasi kauna ita bevitaita 'eva enama'ina, mai da'ala abi kauna ena 'ola kauna ita bevitaita 'eva enama'ina. Bema luma 'olana kauna be'aea Belesebulo koanai luma kauta vaka va si'avata be'ae.

Dai Ekamakauvaia Kauna.

(Lk 12.2-7)

²⁶ Kanaua 'ounai sia oi bomakau venita. Dava devaakububu davata boutai 'eva bevala'asita mai devuni davata boutai 'eva beikabasita.

²⁷ Dava vabulai a'oumui davata 'eva 'ailala laloanai oi boluva vaita mai luva kaiamuiiai oi o'ika luvata 'eva luma 'uvinai oi boilolo vaita.

²⁸ Kauani beaku bala kauta kataua sia oi bomakau venita 'olana idume 'eva sia beaku bala. Beia Dilava oi bomakau venia ia 'eva kauani mai idume luana bevabata 'alova laloanai.

²⁹ Bisili lua 'eva pene ka'onamoai betavata. Beia Kamamui e'imata koanai sia ka be'eko asi kanoai.

³⁰ Inoku vuimui boutai 'olamuiiai 'eva 'ani evaku paluta.

³¹ Kanaua 'ounai sia oi bomakau, oi 'eva bisili doutamo vaika oi okeinita.

Iesu I'oudaena.

(Lk 12.8-9)

³² Kau ka kau vailatai bediaka ia lau ebano'u kauna 'eva lau vaka Kama'u vutuvutuiai emimia kauna vailanai badiaka ia 'eva lau ebano'u.

³³ Beia kau ka kau vailatai lau be'ou'u avuavu kauna 'eva lau vaka Kama'u vutuvutuiai emimia kauna vailanai ia ba'oua avuavu.

Kuali Lepona Abia Asi Kanobatai.

(Lk 12.51-53; 14.26-27)

³⁴ Sia oi bolalovaia lau asi 'eva nua'elu asi vaia kanobatai. Lau 'eva nua'elu sia asi vaia beia kuali lepona asi vaia.

³⁵ Lau asi 'olana 'eva kanania, melo betata'u kamana bevaiviivia, vato betata'u sinana bevaiviivia, melo adana betata'u lavana ateatena bevaiviivia.

³⁶ Kau ka ena luma kauta 'eva ena 'ou kautai be'ao.

³⁷ Kau ka kamana 'o sinana elalo'au venita vaika vakaia lau, ia 'eva kele'e'uai sia bedaia. Kau ka nakuna oleolena 'o vatona elalo'au venia vaika vakaia lau, ia 'eva kele'e'uai sia bedaia.

³⁸ Kau ka ena au ido'o valaukuna sia evuala muli'uai edada'a kauna, ia 'eva kele'e'uai sia bedaia.

³⁹ Kau ka ena maui beabi 'inia kauna 'eva ena maui bevatauleia, kau ka ena maui bevatauleia lau dai'uai kauna 'eva ena maui bedavalia.

Tava Nama'inana Bevenita.

(Mk 9.41)

⁴⁰ Kau davana oi eabimuidae kauna 'eva lau eabi'udae mai lau eabi'udae kauna 'eva esini'u Dilavana vaka eabiadae.

⁴¹ Kau ka enolea kauna ka eabiadae 'olana ia enolea kauna 'ounai, ia 'eva enolea tavana vitaitana beabia, mai kau ka komolo kauna ka eabiadae 'olana ia komolo kauna 'ounai, ia 'eva komolo kauna tavana vitaitana beabia.

⁴² Kau ka vei 'eluna 'ouai melo kikita katania ka bevenia 'olana ia lau ibano'u kauta 'ounai, lau oi luva umauna a'oumui, tava iabina laloanai ia sia betatabu."

11

Iesu Vaidi'u Kabukabu Kauna Ioane Lovana Eakuia.

(Lk 7.18-35)

¹ Iesu ibanona kauta 'ouka lua luva katania'i evaidibata mulinai, 'abu kanaua evikania eda'a Kalilea vanuata laloatai ua'i bevaikabasi mai beilolo.

² Ioane vabuto'o lumana laloanai Keliso ena vinaula valita eika koanai ibanona kauta esinita deda'a kevana,

³ Iesu delavuaia dediaka, boma 'oumai "Be'asi kauna 'eva oni? 'O edeana ka lai ba'imala?"

⁴ Iesu eta luva evamuea ediaka, "Omue oda'a, dava oi o'asi makamuiiai oi o'ika mai kaiamuiiai uluta oi o'ika 'eva Ioane vailanai oi boluvavai.

⁵ 'Ede kauta 'ani deikaika 'udai, 'ome'ome kauta dedada'a, loki kauta 'ani denama'ina, kaia bubu kauta lele de'ika, ba kauta deko'isi demauli 'udai, mai ta'ovala kauta kevatai vali nama'ina deilolo vaia.

⁶ Kau ka kele'e'uai nuana sia elalo to'ato'a kauna Dilava bevanama'inala."

⁷ Ioane ibanona kauta deda'a mulili laloanai, Iesu kau mato vailatai Ioane luvana eluva ediaka. "Oi dava boikala 'ounai oi oda'a kano'akunai? Lani 'ebavala eva'iuvai 'iuvaita oi boikata, una?"

⁸ Asi'i koanai, oi oda'a 'eva dava oi boikala? Kau ka tubu'a pudalo pudalota evadodota kauna, una? Kau kataua tubu'a pudalo pudalota devadodo kauta 'eva lovia 'olana ena lumai demimia.

⁹ Inoku dava oi boikala 'ounai oi oda'a? Enolea kauna ka? 'O, lau oi a'oumui, Ioane 'eva enolea kauta boutai ekeinita.

¹⁰ Ia valina Puka kabukabunai kanania deleleia koma, 'Lau e'u veauneke kauna basinia 'ana'i vailamuai, ia betata'u emu dala beva'olua kave'i.'

Mal 3.1

¹¹ Lau oi luva umauna a'oumui, 'ate devapuluta kauta viloatai ka vaidi'u kabukabu kauna Ioane sia bekeinina, beia ua'i Dilava ena lovia vanuanai ekiki kauna 'eva Ioane bekeinina.

¹² Vaidi'u kabukabu kauna Ioane ena melalai easimo vali'u, Dilava ena lovia vanuana 'eva deadedua vaia, vavai 'avaea kauta 'eva dekoivoa bebuku vaia.

¹³ 'Olana enolea kauta mai Mose ena talavatu boutai laloatai Dilava ena lovia vanuana valina deluvavaia 'eva easimo Ioane ena melalai.

¹⁴ Oi oabia dae koanai oi boikabasi Ioane 'eva Elia be'asi kauna.

¹⁵ Mai kaiana kauna 'eva lele be'ika.

¹⁶ Ulu kanania kauta dawai bavavitaitata? Ia 'eva itani melo kikita tavatava 'abunai demiadivo banota de'aeta dediaka,

¹⁷ 'Oi daimuiai siau lai auvani, beia oi sia oneneva. Ba masita lai a'abi, beia sia oi okakani.'

¹⁸ Ioane easi 'eva elove, inoku ia dediaka, 'Ka'uba si'avana ka ia nuana.'

¹⁹ Lau Kau nakuna asi aniani mai ainuinu 'eva ia dediaka, 'Ia 'eva aniani si'asi'ana mai inuinu si'asi'ana, moni visi mai si'avana kauta eta kau.' Beia aoneka 'eva vuavuaana etata'u ena komolo evamomo'ia."

Sia Delalo 'Udai Vanuata Kevatai Besi'avana Vaika.

(Lk 10.13-15)

²⁰ Tesu vanua laloatai vatabulovo koata doutamo evavai vanuata kataua kauta e'ovenita, 'olana ia eta si'avana sia delalo 'udai 'ounai.

²¹ "Kolasina e, kele'emuai besi'avana vaika! Betesaida e, oni vaka kele'emuai besi'avana vaika! Vatabulovo koata kevamuiavavai davata Tulo mai Sidono kauta kevatai bamavavai koanai, ia 'eva 'ani siako vaikai bemalalo 'udai, tubu'a maputa bemavadodo mai 'olatai lavu bemane'edivo.

²² Beia lau oi a'oumui, Dilava ena lavuai namana melalanai Tulo mai Sidono kauta eta mekau 'eva kena bekiki beia oi 'eva besi'avana vaika.

²³ Kapelanauma e, oni beabimu isi boda'a vutuvutu akanai, una? Asi'i, oni 'eva beitemu 'ovu 'alova laloanai. Vatabulovo koata kataua kele'emuai avavai davata Sodoma kele'enai bamavavai koanai, ia 'eva bemamia mo bema asi vali'u melala kanania.

²⁴ Beia lau oi a'oumui, Dilava ena lavuai namana melalanai Sodoma ena mekau 'eva kena bekiki ia oi emui 'eva besi'avana vaika.

*Omai Kele'e'uai Lamui
Oi Bo'ani.*

(Lk 10.21-22)

²⁵ Melala kanaua'i Iesu ena meameai ediaka, "Kama'u e, vutuvutu mai kanobata Loviana. Lau oni avanama'inamu 'olana dava katania ovunita ikabasi mai idiba kauta kevatai, beia melo kikita kevatai ovala'asita.

²⁶ Kama'u e, luva umauna, 'olana kanania 'eva oni emu ula vitaitanai 'ani epulu.

²⁷ Dava boutai 'eva Kama'u 'ani eveni'u. Sia kau ka Nakuna eikabasia beia Kamana mo sibona, mai kau ka Kamana sia eikabasia Nakuna mo sibona mai Nakuna edilata kauta kataua mo sibota kele'etai Kamana bevala'asia."

²⁸ "Bavunu kaumui mai mekau oi ovuala kaumui, boumuiai keva'u omaia, lau oi laani bavenimui.

²⁹ E'u eveve oabia voumuiai ovuaia mai kele'e'uai ikabasi oi boabia 'olana lau 'eva a'eluovo mai 'ulu'u asi'i. Inoku idumemui lata be'ani.

³⁰ 'Olana e'u eveve 'eva eveavea mai tamu 'eva sia emekau."

12

Melala Kabukabuna Lavuaina.

(Mk 2.23-28; Lk 6.1-6)

¹ Melala kanaua'i Iesu 'eva melala kabukabunai witi lobana laloanai eda'a keini. Ibanona kauta vikolo deakuta 'ounai witi vuata debuku deani.

² Palisea kauta koakoa kanaua deikaia koanai Iesu de'ouia dediaka, "Ikala, oni ibanomu kauta 'eva melala kabukabunai dava sia bevavaia davana 'eva devavaia."

³ Iesu eta luva evamuea ediaka, "Oi 'eva Davida debanoia kauta ita vikolo deakuta laloanai dava evavaia davana sia oi ovakua?"

⁴ Ia Dilava ena lumai edodo, ua'i palaoa kabukabuna eabia, palaoa kanaua 'eva ekabukabu, kabukabu kauta sibota mo beania davana, ia mai debanoia kauta ita deania.

⁵ Mai kabukabu kauta lo'e kabukabuna laloanai melala kabukabuna vinaulana sia devavaia kave'i beia sia deva'eva, talavatuna kanaua 'eva sia oi ovakua?"

⁶ Lau oi a'oumui, nia'i kau ka 'eva lo'e kabukabuna ekeinia.

⁷ 'Lau a'ula vilalo,

ia sia a'ula veniveni davata.'

Hos 6.6

Puka kabukabunai luva katania anita oi bomaikabasi koanai kau sia deva'eva kauta va'evai sia oi bomane'etadivo.

⁸ 'Olana lau Kau nakuna 'eva melala kabukabuna loviana."

Iesu Eta'u Ima Bade Kauna

Imana Evanama'inala.

(Mk 3.1-6; Lk 6.6-11)

⁹ Iesu 'abu kanaua evikania eda'a Iuda eta lo'e laloanai edodo,

¹⁰ kau ka imana badena vaka ua'i, kau vaida deula Iesu va'eva 'abunai bene'eadivo, inoku Iesu delavuaia dediaka, "Melala kabukabunai 'olele ekavanama'inala 'eva mai va'evana 'o asi'i?"

¹¹ Iesu e'outa ediaka, "Oni ka emu mamoe melala kabukabunai 'uliai bema'ekouda koanai sia bomaabiiasi, una?"

¹² Kau 'eva mamoe ekeinia. Kanaua 'ounai melala kabukabunai nama'ina ekavavai 'eva ekomolo."

¹³ Inoku Iesu kau kanaua e'ouia ediaka, "Imamu isia komolo." Inoku imana eisia komolo 'eva itoinai enama'ina vitaitana imana avekena boina.

¹⁴ Beia Palisea kauta dela'asi deda'a lova deaku aboina Iesu beakubala.

Dilava Edilaia Kauna.

15 Iesu 'ani eikabasi 'ounai 'abu kanaua'i eda'atau. Kau doutamo vaika mulinai deda'a, eta 'olele boutai evanama'inata,

16 e'outa kao kau ka vailanai sia beluluva ia 'eva dai.

17 Kanania 'eva Isaia enolea kauna eluvavaia luvana ivamomo'aina.

18 'Oikaia ia 'eva adilaia

e'u da'ala abi kauna,

alalo'au venia maivaka

alalonama venia.

Lau Idume'u Kabukabuna

basinia ia akanai,

kanobata kauta kele'etai

komolo beilolovaia.

19 Ia 'eva sia bevina 'o sia bevaoui

maivaka lelana vanua dalatai

sia be'ika.

20 Ia sia beba'iuku itani

silibo 'ani emoku davana

badebade kauta boita,

maivaka 'ita 'ani ebo'o davana itani eta nuabata ekiki kauta boita ena nuabata sia bevabo'oa beda'amo komolo vinaulana bevala'asia.

21 Kanobata kauta boutai

eta nuabata ia vana akanai

bene'etadivo.'

Isa 42.1-4

Iesu Mai Belesebulo.

(Mk 3.20; Lk 11.14-23; 12.10)

22 Kau ka nuanai ka'uba si'avana emia kauna devuaia deda'a Iesu kevana ia 'eva makana de'ede mai malana esi'avana, Iesu eta'u evanama'inala, ua'i ia eluva luva mai eikaika 'udai.

23 Kau boutai detabulovo si'asi'a dediaka, "Ama'i kau kanania 'eva Davida Nakuna."

24 Beia Palisea kauta vali kanania de'ika koanai dediaka, "Kanania 'eva ka'uba si'avata eta 'ola kauna Belesebulo ena siavuai ka'uba si'avata katana elo'ota asi."

25 Iesu eta lalovai eikabasi 'ounai e'outa ediaka, "Kanobata ka sibona beva'alamaia inoku beviaku 'eva sia bemiadau'a, mai vanua ka sibona 'o iduvu ka sibona beva'alamaia beviaku koanai sia belava'ini bedaia.

26 Inoku Diabolo betata'u Diabolo belo'oa asi koanai ia 'eva sibona eva'alamaia, kanaua'i ena kanobata 'eva abelava 'ini koma?

27 Lau Belesebulo siavunai ka'uba si'avata alo'ota asi koanai dai ena siavuai oi emui kau ka'uba si'avata vaika delo'ota asi? Kanaua 'ounai emui kau betata'u va'evai bene'emuidivo.

28 Beia lau Dilava idumena siavunai ka'uba si'avata alo'ota asi koanai Dilava ena lovia vanuana 'eva 'ani easi oi akamuiai.

29 Kau ka kula'ila kauna ena luma sia beva'alamaia ena dava beabi tau beda'amo ia kula'ila kauna beabia bedo'oa makava, inoku ena dava bevinaota.

30 Kau ka lau dai'uai sia edadai kauna 'eva lau ebaduveni'u, mai kau ka lai laluvana sia avalalo ka'ona kauna 'eva ekapo odaoda.

31 Kanaua 'ounai lau oi a'oumui, kau eta si'avana mai eta luva si'avata boutai 'eva be'ou kao bedaia, beia Idume Kabukabuna kele'enai eluva si'asi'a kauna 'eva ena si'avana sia be'oukao diba.

32 Kau ka beluva si'asi'a Kau nakuna kele'enai 'eva ena si'avana be'oukao bedaia, beia kau ka Idume Kabukabuna kele'enai beluva si'asi'a kauna 'eva

ena si'avana sia be'oukao diba vali'u mauli kanania'i maivaka mauli vailai be'asi maulina.

Au 'Eva Vuavuatani Ekaikabasita.

(Lk 6.43-45)

³³ Au nama'ina 'eva vuavua nama'ita bevapulu, au si'avanai 'eva vuavua si'avata bevapulu, 'olana au aboita 'eva vuavuatani ekaikabasi.

³⁴ Kau'asi nakuta e, emui lalovai 'eva desi'avana aboina luva nama'ita oi bo'oulai? 'Olana nutu 'eva nuai evonu davana luvana eluvala.

³⁵ Kau nama'ina nuanai dava nama'ita e'uda davata nama'ita evala'asi, kau si'avana nuanai dava si'avata e'uda davata si'avata evala'asi.

³⁶ Lau oi a'oumui, kau luva 'avaeata deluluva kauta boutai Dilava ena lavuai melalanai tavata beveni dokadoka.

³⁷ Kanaua 'ounai emu luva betata'u komolo bevenimu maivaka emu luva betata'u mekauta bevenimu."

Deula Siavu Koana Beikala.

(Mk 8.11-12; Lk 11.29-32)

³⁸ Inoku Palisea kauta mai talavatu 'ola kauta vaidu Iesu de'ouia dediaka, "Vaikabasi kaumu e, lai a'ula oni kele'emuai siavu koana ka bomavavaia lai bamaikala."

³⁹ Iesu eta luva evamuea ediaka, "Ulu kanania si'avana maivaka sia maiemui abiveni kaumu, dava 'ounai siavu koana oi olavuai vaia? Beia koa bavenimui davana 'eva enolea kauna Iona mo ena koa.

⁴⁰ Iona melala koi mai boni koi sisi namana bo'ana laloanai emia, vitaitana mo lau kau nakuna vaka melala koi mai boni koi kano laloanai bamimia.

⁴¹ Lavuai melalana be'asi Nineva kauta ulu kanania kaumu va'eva 'abunai bene'emuidivo, 'olana Iona ena iloloai delalo 'udai. Beia vali'u Iona ekeinia kauna 'eva nia'i.

⁴² Divo kanobatana loviana ateatena lavuai 'abunai beko'isi ulu kanania kaumu va'eva 'abunai bene'emuidivo, 'olana ia kanobata to'onai easi Solomona ena aoneka luvata e'ika. Beia vali'u Solomona ekeinia kauna 'eva nia'i."

Ka'uba Si'avana Ena Mue.

(Lk 11.24-26)

⁴³ "Ka'uba si'avana ka kau ka nuanai ela'asi koanai eda'a kano'akunai eda'a to'ato'a laani 'abuta ekavu, beia sia 'abu ka edavalua,

⁴⁴ inoku sibona ediaka, 'Lau 'eva bamumue bada'a e'u luma avikania lumana', Inoku emue eda'a luma 'avaeana 'ani dedaloia kave'i mai e'olu edavalua.

⁴⁵ Inoku ela'asi eda'a banona kalakoi ka desi'avana vaika kauta evuata deasi dedodo ua'i demia. Kau kanaua 'ana'inai ena mia esi'avana, beia vali'u 'eva esi'avana vaika. Kanaua 'eva ulu si'avana kanania kauta kele'etai kanaua bepulu koma."

Iesu Sinana Mai Bo'akalana.

(Mk 3.31-35; Lk 8.19-21)

⁴⁶ Iesu kau eluva venita do'o laloanai sinana mai bo'akalana deasi dela'asi. Mulimuliai delava deula Iesu ita beluvaluva.

⁴⁷ Kau ka ia e'ouia ediaka, "Sinamu mai bo'akalamu 'eva mulimuliai delalava, deula venimu oi boluvaluva."

⁴⁸ Iesu ia ena luva evamuea ediaka, "Lau sina'u 'eva dai, mai lau bo'akala'u 'eva dai?"

⁴⁹ Imana ibanona kauta eisivenita inoku ediaka, "Katania kauta 'eva lau sina'u mai lau bo'akala'u.

⁵⁰ 'Olana kau ka lau Kama'u vutuvutu'ai emimia kauna ena ula evavaia kauna 'eva lau bo'akala'u, lovu'u mai sina'u."

13

Luva Ivavitaitana Kau Ka

Kea Evadota.

(Mk 4.1-9; Lk 8.4-8)

¹ Melala ka'onamo kanaua'i Iesu lumai ela'asi eda'a 'ovu nabuanai emia divo.

² Kau mato namavaikana delavaia kaiukaiu 'ounai eko'isi asi kai ele'au emia 'au, kau boutai 'eva nabuai delava.

³ Inoku ia eta'u dava doutamo luva ivavitaitatai e'outa ediaka, "Loba vavai kauna ka ela'asi eda'a ena lobai kea bevavado.

⁴ Ena witi keata ekapo odaoda koanai, vaida 'eva dalai de'ekoasi, ua'i manumau deasi deani paluta.

⁵ Vaida kano bika'a bika'anai de'ekoasi, dekubu molaumolau 'olana kano ekevekeve.

⁶ Inoku melala ele'au koanai kopita delamoda maivaka de'ibu 'olana lamuta asi'i.

⁷ Kea vaida 'iniauma laloatai de'ekoasi, beia 'iniauma dekubu inoku devavilita kaiukaiu.

⁸ Beia kea vaida 'eva kano nama'inai de'ekoasi. Inoku devua vaida vuata 'eva sinavu ka (100), vaida kalakoinavui (60), mai vaida koinavui (30).

⁹ Maikaiana kauna 'eva lele be'ika."

Luva Ivavitaitana 'Olana.

(Mk 4.10-12; Lk 8.9-10)

¹⁰ Inoku ibanona kauta deasi Iesu kevana delavuaia dediaka, "Dava 'ounai kau luva ivavitaitata o'outa?"

¹¹ Iesu eta luva evamuea ediaka, "Dilava ena lovia vanuana ikabasina vunita 'eva 'ani avenimui, beia ia kele'etai 'eva asi'i.

¹² 'Olana kau ka maiena dava kauna, doutamo bevenia, inoku ia ena dava 'eva bedoutamo vaika. Kau ka kevanai asi'i kauna kele'enai kava'ina emimia davana 'eva beabia ovo.

¹³ Luva ivavitaitata a'oumui 'olana 'eva kanania, beikala beia sia beikala une, lele be'ika beia sia beika une mai sia beikabasi.

¹⁴ Kanaua 'ounai Isaia ena enolea luvana 'eva easi emomo'ai, 'Kaiamui'ai lele oi oika beia nuamui sia de'eko'ovi, oi boikata 'udai'udai beia sia oi boikata une.

¹⁵ 'Olana kau katania nuata

'eva devabula,

kaiata 'eva de'ou bubu mai

makata 'eva de'alavu,

makatai asi'i demaikaika,

kaiatai lele asi'i demaika,

nuata asi'i dema'eko'ovi,

kanaua 'ounai asi'idemalalo 'udai keva'uai, amavamaulita 'ounai."

Isa 6.9,10

¹⁶ "Oi 'eva Dilava evanama'inamui, 'olana makamui'ai oi oika mai kaiamui'ai lele oi o'ika 'ounai.

¹⁷ Lau luva umauna a'oumui, enolea kauta mai komolo kauta doutamo deula vaika dava oi oikala davana bemaikala, beia sia deikala, maivaka kaiamui'ai lele oi o'ika davana bemaika, beia sia de'ika."

*Luva Anina Ivavitaitana.**(Mk 4.13-20; Lk 8.11-15)*

18“ Lele oika, luva ivavitaitatai vadovado anina 'eva dava.

19 Kau Dilava ena lovia vanuana valina de'ika beia nuata sia de'eko'ovi koanai diabololo e'asi dava nuatai devadota davata eabi tau. Kanania 'eva kea kataua dalai de'ekoasi boita.

20 Kano bika'a bika'ana akanai kea de'ekoasi 'eva itani kau ka Dilava ena luva 'uluna e'ika inoku mailalonamana alimo eabia dae.

21 Beia lamuna sia de'ovu kave'i 'ounai sia emia dau'a. Dilava ena luva 'ounai adedua 'o vaivivi de'asi koanai komolonai mo e'ekoasi.

22 Mai kea 'iniauma vilootai de'ekoasi 'eva itani kau ka Dilava ena luva 'uluna e'ika beia kanobata nua anina mai lavona lalovaita detata'u luva kanaua de'alavua inoku sia evuvua.

23 Beia kea kano medianai de'ekoasi 'eva itani kau ka Dilava ena luva 'uluna e'ika mai nuana e'eko'ovi. Ia 'eva evuvua vuavuvua sinavu ka (100), vaida kalakoinavui (60), mai vaida koinavui (30).”

*Luva Ivavitaitana**Witi Mai Ava.*

24 Iesu luva ivavitaitana ka vaka e'outa. “Dilava ena lovia vanuana 'eva itani kau ka kea nama'ita ena lobai evadota.

25 Beia kau boutai demuina tabu laloanai, ena 'ou kauna easi witi vilootai ava evadota inoku eda'a.

26 Witi dekubu vuata devua koanai, ava vaka dekubu.

27 Loba 'uala kauna ena da'ala abi kauta deasi kevana de'ouia dediaka, “Ola kaumu e, oni emu lobai 'eva kea nama'ita ovadota, beia ava kataua 'eva a'i deasi?”

28 Ia eta luva evamuea ediaka, “Ou kauna ka kanana evavaia.' Ena da'ala abi kauta dediaka, 'O'ula lai bada'a ava lai babukuisi?”

29 Ia e'outa ediaka, 'Asi'i, 'olana ava oi bobukuta isi koanai witi vaka ava ita asi'i oi omabukuta isi ka'ona.

30 Ovikanita lalua dekubu ka'ona beda'amo witi i'alita melalana. Melala kanaua'i 'eva i'alina kauta ba'outa, “Makavana 'eva ava oi bodoutabou oi bodo'o 'inita botouta be'ani, inoku witi oi bodoutabou oi boabita bo'asi e'u aile'e laloanai.” ’ ’ ”

*Luva Ivavitaitana Tuava Keana.**(Mk 4.30-32; Lk 13.18-19)*

31 Iesu luva ivavitaitana ka vaka e'outa. “Dilava ena lovia vanuana 'eva itani tuava keana boina. Kau ka eabia inoku ena lobai evadoia.

32 Kea boutai vilootai ia 'eva ekiki vaika, beia ekubu koanai ia lobai 'eva namavaikana vadovado davata boutai eavele kanita, au ai eao aka manumanuta deasi ua'i le'enai lata de'ani.”

*Luva Ivavitaitana**Vakubu Mulamulana.**(Lk 13.20-21)*

33 Iesu luva ivavitaitana ka mune'e e'outa. “Dilava ena lovia vanuana 'eva itani vakubu mulamulana boina. Ateate ka vakubu mulamulana eabia vodu namana laloanai palaoa doutamo ita eiuia lavo'i eda'amo palaoa itoina ekubu.”

*Luva Ivavitaitata Eta Vinaula.**(Mk 4.33-34)*

34 Iesu dava katania boutai kau mato e'outa 'eva sia luva umautai, beia luva ivavitaitatai mo e'outa.

35 Kanania 'eva enolea kauna eluvavaia luvana evamomo'aia.

“Baluva venita koanai luva ivavitaitanai baluva venita,
kanobata epulu easi mo vali'u
'eva dava vunita davata lau batata'u ba'outa dae.”

Sal 78.2

Luva Ivavitaitana Anina

Witi Mai Ava.

³⁶ Inoku Iesu kau mato evikanita eda'a luma laloanai edodo, ibanona kauta deasi kevana de'ouia dediaka, “Luva ivavitaitana kanania loba laloanai ava anina 'eva dava 'oumai kave'i.”

³⁷ Iesu enu'ovi ediaka, “Kau kea nama'ina evadoia kauna 'eva lau kau nakuna.

³⁸ Loba 'eva kanobata, kea nama'ita 'eva Dilava ena lovia vanuana kauta, ava 'eva kau si'avana ena kau.

³⁹ Ou kauna kanaua ava evadota kauna 'eva diabololo. I'alina melalana 'eva kanobata to'ona, i'alina kauta 'eva anelu.

⁴⁰ Ava ibukuta isi mai idoubouta 'alovai be'ani 'eva kanobata to'onai bepupulu.

⁴¹ Lau kau nakuna e'u anelu basinita la'asi e'u vanua laloanai va'eva devavai kauta mai si'avana devavai kauta boutai bevalalota.

⁴² Ia betata'u 'alova sia ebo'o kovo 'abuna laloanai bekapota dodo, ua'i bekapani mai 'asi'asita beala'o'i ala'o'i.

⁴³ Inoku komolo kauta 'eva Kamata ena lovia vanuana laloanai be'ailala itani melala boina. Mai kaiiana kauna lele be'ika.

Dilava Ena Lovia Vanuana Luvata Koi Ivavitaitata.

⁴⁴ “Dilava ena lovia vanuana 'eva itani lavo nama'ina loba laloanai ikolena boina. Kau ka edavalia koanai ekoleia 'udai, mailalonamana eda'a ena dava boutai etavatava vaita moninai kano kanaua mailobana etavaia.

⁴⁵ Mai Dilava ena lovia vanuana 'eva itani tavatava kauna ka 'emo'alu nama'ita ekavuta boina.

⁴⁶ Inoku 'emo'alu nama'ina vaika ka edavalia koanai, eda'a ena dava boutai etavatava vaita moninai 'emo'alu kanaua etavaia.

⁴⁷ Mai'vaka Dilava ena lovia vanuana 'eva itani vuo 'ovuai denaia inoku sisi edeata edeata dekoa boina.

⁴⁸ Va'eka kauta vuo evonu koanai nabuai develia 'au, inoku demiadivo sisi nama'ita alavu laloanai deudata, beia si'avata 'eva deitota'au.

⁴⁹ Kanobata ena oleai 'eva kanaua bepulu koma. Anelu be'asi komolo kauta mai si'avana kauta beva'alamata.

⁵⁰ Si'avana kauta 'eva 'alova sia ebo'o kovo 'abuna laloanai bekapota dodo, ua'i bekapani mai 'asi'asita beala'o'i ala'o'i.”

Lavo Makamakata Mai 'Ana'ita.

⁵¹ Inoku Iesu elavuaite ediaka, “Luva katania boutai nuamuiai 'ani de'eko'ovi?” Ena luva devamuea dediaka, “O, nuamai 'ani de'eko'ovi.”

⁵² Ia e'outa ediaka, “Kanaua 'ounai talavatu 'ola kauta kataua Dilava ena lovia vanuana valina 'ani deikabasi kauta ka ka 'eva itani luma 'uala kauna boina, ena doubou doubou laloanai lavo makamakata mai 'ana'ita bedalata isi.”

Iesu Ena Vanua Kauta Devaivivia.

(Mk 6.1-6; Lk 4.16-30)

⁵³ Iesu luva ivavitaitata katania e'outa mulinai 'abu kanaua evikania,

⁵⁴ easi ena vanuai Iuda eta lo'e laloanai kau evaikabasita 'eva detabulovo si'asi'a. Delavuai lavuai dediaka, “Kau kanania aoneka mai vatabulovo vinaulata katania a'i eabita?”

⁵⁵ Ia 'eva kamuta kauna nakuna umauna, ia sinana vana Malia, bo'akalana 'eva Iakobo, Iosepa, Simona mai Iuda.

⁵⁶ Lovuna boutai 'eva nia'i ita kamimia. Inoku kau kanania 'eva dava katania boutai a'i eabita?"

⁵⁷ Inoku ia deta'u Iesu devaivivia. Beia Iesu ia e'outa ediaka, "Enolea kauna 'eva 'abu boutai ai 'olana be'aku, ena vanuai mai ena luma kauta 'eva 'olana sia be'aku."

⁵⁸ 'Olana eta abiveni asi'i 'ounai vatabulovo vinalata doutamo ua'i sia evavai.

14

Vaidi'u Kabukabu Kauna

Ioane Ena Ba.

(Mk 6.14-29; Lk 3.19-20; 9.7-9)

¹ Melala kanaua'i lovia 'olana 'Eloda 'eva Kalilea e'ola vaia koanai Iesu valina eika.

² Inoku ena vinala kauta e'outa ediaka, "Ioane vaidi'u kabukabu kauna akubala 'eva ba ai eko'isi 'udai, kanaua 'ounai vatabulovo vinalata siavuna katania ia nuanai devinala."

³⁻⁴ Ana'inai Eloda 'eva bo'akalana Pilipo adana Elodia eadavala. Inoku Ioane vaidi'u kabukabu kauna Eloda e'ouia ediaka, "Ateate kanania oadavala 'eva sia ekomolo." Kanaua 'ounai Eloda luva eveni Ioane delioia vabuto'o lumanai de'alavua.

⁵ Eloda ena ula Ioane beaku bala, beia kau makauta emakau, 'olana Ioane 'eva enolea kaunai devaao.

⁶ Eloda ena pulu melalana nadunai Elodia nakuna vatona kau mato vailatai eneva, inoku Eloda evalalonamala keini.

⁷ Kanaua'i Eloda vato eluva 'ana'i venia ediaka, ena luva 'ana'i kula'ilana vato e'ouia 'eva dava benoinoi vaia davana 'eva bevenia mo.

⁸ Sinana ena luvai vato Eloda enoia ediaka, "Vali'u mo Ioane vaidi'u kabukabu kauna 'olana nauai boudala boveni'u."

⁹ Eloda lovia 'olana nuana evilalo. Beia ena luva 'ana'i e'aeta kauta vailatai eluvavaia 'ounai, luva eveni vato ena noinoi vinalana bevavaia.

¹⁰ Kanaua 'ounai esinita vabuto'o lumana laloanai Ioane 'atona detauia uku.

¹¹ Ioane 'olana nau nuanai deudaia deabia deasi vato devenia, inoku vato evuaia eda'a sinana venia.

¹² Ioane ibanona kauta deasi kauanina deabia devuaia deda'a dekolieia. Inoku deda'a Iesu de'ouia.

Iesu Kau Sinavu Imanavui Evananita.

(Mk 6.31-44; Lk 9.10-17; Io 6.1-13)

¹³ Iesu vali kanaua eika koanai asiai ele'au sibona eda'a 'abu 'avaeana ka, kau doutamo 'ulu kanania deika koanai eta vanuai aetai Iesu mulinai deda'a.

¹⁴ Iesu asiai e'ovu kau mato namana eikaia koanai elalota mai eta 'olele evanama'inata.

¹⁵ Ani elavilavi 'ounai ibanona kauta deda'a Iesu kevana de'ouia dediaka, "Kania 'eva 'abu 'avaeana maivaka 'ani eboboni. Do'u kauta sinita deda'a, vanua vaida laloatai sibota eta iani betatava 'eva benama'ina."

¹⁶ Iesu e'outa ediaka, "Ia 'eva sia basinita, oi dava kena oi bovenita beania."

¹⁷ Ibanona kauta de'ouia dediaka, "Lai kele'emaiai 'eva palaoa ima mai sisi lua mo."

¹⁸ Iesu e'outa ediaka, "Oabi omai kele'e'u."

¹⁹ Inoku kau e'outa ava akanai bemiadivo, palaoa ima mai sisi luana eabita e'a'adae vutuvutu eikaia Dilava evanama'inala inoku palaoa ekovita, ibanona kauta evenita deda'a kau devenita.

²⁰ Ia boutai deaniani deani vunu, ibanona kauta iani kalita dedoubou aleka boutai 'ouka lua devavonuta.

²¹ Kau deaniani kauta 'eva sinavu imanavui (5,000) boina, kau mo 'avaena devakuta ia 'a'ate mai melo 'eva sia devakuta.

Iesu Vei Akanai Eda'a.

(Mk 6.45-52; Io 6.16-21)

²² Kanaua mulinai Iesu komolonai ibanona kauta asiai evaeleta 'au be'ana'ia beda'a 'ovu avekenai, laloanai ia 'eva kau esinita bedada'a.

²³ Kau esinita deda'a mulinai, ia sibona lolo ka ai ele'au bemeamea. Eboni koanai ia 'eva sibona ua'i.

²⁴ Beia asi kano evikania 'ani ela'asi vaika 'ovuai laloanai, ka'uda eko'isi asi eakua ua eda'aia nia easia 'olana lani 'eva vailatai easi.

²⁵ 'Avu'avu vabulanai 'o'oloko ivakoina e'alala vitaitanai Iesu vei akanai eda'a kele'eta.

²⁶ Ibanona kauta Iesu vei akanai eda'a deikaia koanai demakau si'asi'a, inoku devilavila dediaka, "Ei, ka'uba."

²⁷ Iesu komolonai mo e'outa ediaka, "Ovapasisi, nia lau, sia oi bomakau."

²⁸ Petelo eko'isi e'ouia ediaka, "Lovia namana e, oni umaumu koanai luva inoku vei akanai bavasi kele'emu."

²⁹ Iesu e'ouia ediaka, "Mai." Inoku Petelo asiai e'ovu vei akanai eda'a keke Iesu kevana eda'aia.

³⁰ Beia ka'uda namana eikaia koanai emakau, veiai ebulubulu laloanai eva'oi ediaka, "Lovia namana e, bomavamauli'u!"

³¹ Komolonaimo Iesu imana eisialao Petelo eabia e'ouia ediaka, "Emu abiveni ekiki, dava 'ounai nuamu elalo to'ato'a?"

³² Inoku lalua asi akanai dele'au 'eva lani eto'o.

³³ Ibanona kauta ua'i asi nuanai Iesu dekukudivo venia dediaka, "Momo'ai dokadoka oni 'eva Dilava Nakuna."

Iesu Kenesaleta Ai

'Olele Kauta Evamaulita.

(Mk 6.53-56)

³⁴ 'Ovuai dekeini deasi Kenesaleta kanonai dela'asi.

³⁵ 'Abu kanaua kauta Iesu deikaia une 'eva luva desinia eda'a vanua kele'etai kauta kevata, inoku kau kataua eta 'olele kauta boutai devuata deasi Iesu kevana.

³⁶ Kau Iesu denoia 'olele kauta ena tubu'a tolina mo bema abia kovo. Inoku Iesu ena tubu'a tolina deabia kovo kauta boutai 'eva denama'ina.

15

Kau Eta Talavatu Mo Devaikasita.

(Mk 7.1-13)

¹ Inoku Palisea kauta mai talavatu 'ola kauta vaidia Ielusalemia deasi Iesu kevana delavuaia dediaka,

² "Dava 'ounai ibanomu kauta koakoa 'ai'a'ita talavatuta deukuta? Imata sia dedeini makava ia deaniani."

³ Iesu eta luva evamuea ediaka, "Dava 'ounai oi Dilava ena talavatu luvana ouka, beia emui koakoa 'ana'ita oabi dae?"

⁴ 'Olana Dilava ediaka, 'Kamamu mai sinamu 'olata bo'aku,' maivaka ediaka 'Kau ka kamana 'o sinana besivada venia kauna 'eva beaku bala.'

⁵ Beia oi 'eva emui vaikasiasia oi odiaka, 'Kau ka kamana 'o sinana be'outa bediaka, "Lavo katania'i bamadulumui davata 'eva baveveni Dilava ena."

⁶ Inoku kau kanaua 'eva kamana mai sinana 'eva dava kanaua'i 'olata sia be'aku.' Dala kanaua boinai Dilava ena luva 'eva sia oi oabia dae, ia koakoa 'ana'ita mo oabi dae.

⁷ Dede kaumui e, Isaia 'eva ekomolo ena enolea luvatai oi akamui'ai 'eva ediaka,

⁸ "Kau katania 'eva nututa bibi'atai mo va'u devanama'inala, beia nuata 'eva dau'ai vaikai.

⁹ Dekukudivo veni'u 'avaea, 'olana devaikasiasia talavatuta 'eva kau eta talavatut luvata mo."

Isa 29.13

Luva Kau Eva'obua.

(Mk 7.14-23)

¹⁰ Iesu kau mato e'aeta deda'a kevana inoku e'outa ediaka, "Lele oika maivaka ovona oi bo'ovo.

¹¹ Dava nutuai edodo edada'a nuai davana 'eva Dilava vailanai kau sia eva'obua, beia dava nutuai ela'asi davana 'eva kau eva'obua."

¹² Inoku ibanona kauta deasi kevana delavuaia dediaka, "Palisea kauta lelemu deika koanai nuata de'ovala 'eva oikasiasia?"

¹³ Eta luva evamuea ediaka, "Kama'u vutuvutuai emimia kauna sia evadota auta boutai 'eva mailamuta bebuluta isi.

¹⁴ Ovikanita. Ia makata de'ede 'ounai 'ede kauta devada'ata. Bema 'ede kauna ka betata'u 'ede kauna ka bevada'ala koanai lalua'ua 'uliai be'ekouda."

¹⁵ Inoku Petelo ediaka, "Luva ivavitaitana kanania anina 'oumai kave'i."

¹⁶ Iesu ia e'outa ediaka, "Oi vaka nuamui sia de'eko'ovi?"

¹⁷ Dava boutai nutuai dedododo deda'a bo'ai davata 'eva bo'ai dela'asi de'asi mulimuliai 'eva sia oi oikasiasia?"

¹⁸ Beia dava nutuai dela'asi davata 'eva nuai de'asi dela'asi, inoku davata kataua detata'u kau deva'obuta.

¹⁹ Inoku nuai ela'asi davana 'eva lalovai si'avata kau evada'ata beakuaku, bekulakula, bemaka si'a, bevinao, bededede mai be'oukeinikeini.

²⁰ Koakoa kataua 'eva Dilava vailanai kau deva'obuta, beia imata sia kadeini kaniani 'eva kau sia eva'obua."

Kanana Ateatena Ena Abiveni.

(Mk 7.24-30)

²¹ Iesu 'abu kanaua evikania eda'a Tulo mai Sidono kanotai.

²² 'Abu kanaua'i Kanaana ateatena ka easi kevana inoku e'aeia ediaka, "Lovia namana Davida Nakuna e, lalo'u, ka'uba si'avana naku'u vatona nuantai 'eva evaana anala vaika."

²³ Beia Iesu ateate ena luva sia evamuea, inoku ibanona kauta Iesu denoia 'udai 'udai dediaka, "Lo'oa eda'a tau, 'olana mulitai e'asi e'aeta basibasiasia."

²⁴ Iesu ediaka, "Dilava lau esini'u 'eva Isalaela mamota detaule mo daitai."

²⁵ Ateate easi Iesu vailanai ekuidula, ediaka, "Lovia namana e, dulu'u."

²⁶ Iesu ateate ena luva evamuea ediaka, "Melo eta iani ekaito'au 'oveka be'ani 'eva sia enama'ina."

²⁷ Ateate ediaka, "Luva umauna Lovia namana, beia lovia kauna ena vakai, iani 'ika'ikata de'ekoasi venuai 'eva 'oveka vaka de'ani."

²⁸ Inoku Iesu e'ouia ediaka. "Ateate e, emu abiveni 'eva namavaikana, emu ula davana 'eva bepupulu." Melala kanaua'i mo nakuna vatona emauli.

Iesu 'Olele Edeata Edeata Evamaulita.

²⁹ Iesu 'abu kanaua evikania eda'a Kalilea 'ovu nabuana eda'aia, inoku loloi ele'au emiadiivo.

³⁰ Kau mato namavaikana deasi kevana, devuata deasi kauta 'eva 'ome'ome, maka 'ede, ima bade, malata desi'avana, maivaka 'olele kauta edeata edeata Iesu aena 'olanai dene'etadiivo, inoku ia eta'u evamaulita.

³¹ Malata desi'avana kauta deluvaluva, ima bade kauta imata dekomolo, 'ome'ome kauta dedada'a, makata de'ede kauta deikaika. Kau koa katania deikata koanai detabulovo si'asi'a, inoku Isalaela eta Dilava devanama'inala.

Iesu Kau Sinavu Vaninavui Evananita.

(Mk 8.1-10)

³² Iesu ibanona kauta e'aeta deasi kevana, e'outa ediaka, "Lau kau katania 'eva alalota, 'olana ia 'eva 'ani melala koi lau kele'euai demimia mai sia dava ka deania, maivikolota basinita bedada'a 'eva sia a'ula, 'olana ka dalai asi'i ema'eko."

³³ Ibanona kauta dediaka, "Nia 'eva kano'akuna, iani a'i eka abita kau mato kanania boina ekavananita?"

³⁴ Iesu elavuita ediaka, "Iani kevamuii vida?" Ia dediaka, "Palaoa kalakoi ka mai sisi kikita vitalua mo."

³⁵ Inoku Iesu eta'u kau mato e'outa kanoai bemiadiivo.

³⁶ Inoku palaoa kalakoi ka mai sisi eabita Dilava evanama'inala, mulinai ekovita mukamuka, ibanona kauta evenita inoku ibanona kauta kau devenita.

³⁷ Kau boutai deaniani deani vunu, ibanona kauta iani kalita aleka kalakoi ka devavonuta.

³⁸ Ua'i deaniani kauta devakuta 'eva sinavu vani navui (4,000), beia 'a'ate mai melo 'eva sia devakuta.

³⁹ Iesu kau mato esinita deda'a mulinai asiai ele'au ekeini Makadana kanona eda'aia.

16

Palisea Kauta Deula

Koa Ka Beikala.

(Mk 8.11-13; Lk 12.54-56)

¹ Palisea mai Sadukea kauta vaidia deasi Iesu kevana dekoivoia, denoia koa ka bevaikata 'eva bevamomo'aia ia vutuvutuai easi.

² Beia Iesu eta luva evamuea ediaka, "Lavilavi melala ena ulu eda'a venia koanai, oi odiaka, 'Mala melala benama'ina 'olana vutuvutu ebailua.'

³ Belani 'avu'avu oi bodiaka, 'Vali'u melala kanania'i 'eva lamu mai lani be'asi 'olana vutuvutu e'aola mai oli e'alavua.' Koa davata vutuvutuai bepupulu 'eva oi oikabasi, beia dava 'ounai melala katania'i koa dava bepupulu davata 'eva sia oi oikabasita'

⁴ Abiveni asi'i mai si'avana uluna kaumui, koa oi okakavu, beia koa sia ka bavaikamui, enolea kauna Iona ena koa mo bavaikamui." Inoku Iesu evikanita kele'etai eda'atau.

Palisea Eta Vakubu Mulamulana.

(Mk 8.14-21)

⁵ Inoku ibanona kauta dekeini 'ovu avekenai koanai palaoa debolabolata sia deabi.

⁶ Inoku Iesu e'outa ediaka, "Makamui oi bovaata, Palisea mai Sadukea kauta eta vakubu mulamulana kele'enai oi bo'imamui kave'i."

⁷ Ibanona kauta sibota deluvaluva dediaka, “Luva kanania eluvala 'olana palaoa ka sia kabia ka'asi.”

⁸ Iesu eta lalovai eikabasia 'ounai e'outa ediaka, “Abiveni kiki kaumui e, dava 'ounai sibomui palaoa sia ka oi oabia 'ounai oi oluvaluva?”

⁹ Nuamui sia de'ailala maivaka palaoa ima kau sinavu imanavuiwai (5,000) deani vunuu mai kalita aleka vida oi ovavonu 'eva sia oi olalovai 'ini, una?

¹⁰ Maivaka palaoa kalakoi ka kau sinavu vaninavuiwai (4,000) deani vunuu, kalita aleka vida oi ovavonuta 'eva sia oi olalovai 'ini, una?

¹¹ Dava 'ounai nuamui sia de'ailala? Lau 'eva palaoa lovana sia akua, beia Palisea mai Sadukea kauta eta vakubu mulamulanai oi bo'imamui kave'i.”

¹² Inoku luva kanaua'i nuata de'ailala, deikabasi ia 'eva palaoa ivakubuna mulamulana lovana sia eakuia beia ia 'eva Palisea mai Sadukea kauta eta vaikabasi luvatai be'imata kave'i lovata eakuia.

Petelo Iesu E'ouia Dae Keliso.

(Mk 8.27-30; Lk 9.18-21)

¹³ Iesu Kaisalea Pilipi kanotai ela'asi koanai, ibanona kauta elavuita ediaka, “Kau dava dekoma, lau kau nakuna 'eva dai?”

¹⁴ Ena luva devamuea dediaka, “Vaida dediaka Ioane vaidi'u kabukabu kauna, vaida dediaka Elia, maivaka vaida dediaka Ielemia 'o enolea kauna ka.”

¹⁵ Iesu mune'e elavuita 'udai ediaka, “Beia oi 'eva dava oi okoma, lau 'eva dai?”

¹⁶ Simona Petelo e'ouia ediaka, “Oni 'eva Keliso, maui Dilavana Nakuna.”

¹⁷ Iesu ediaka, “Simona Ioane nakuna e, Dilava evanama'inamu, 'olana sia kau ka luva kanania oni evaikabasimu beia Kama'u vutuvutuai emimia kauna evaikabasimu.

¹⁸ A'oumu, oni 'eva Petelo, Bika'a kanania akanai e'u lo'e bavalavala, ba ena siavu 'eva e'u lo'e kanania sia beva'iuwai 'iuvaia.

¹⁹ Lau batata'u Dilava ena lovia vanuana iluvuna siavuna bavenimu, inoku kanobata ai boliota davata 'eva vutuvutuai beliota, kanobatai bolu-vuta davata 'eva vutuvutuai beluvuta.”

²⁰ Inoku Iesu ibanona kauta e'outa kao, sia kau ka vailanai bediaka ia 'eva Keliso.

Iesu Beanana Mai Bebaba Luvata Eluvavai.

(Mk 8.31–9.1; Lk 9.22-27)

²¹ Melala kanaua'i Iesu ibanona kauta evaikabasita makava ia 'eva beda'a dokadoka Ielusalema ai ua'i Iuda eta kau namata, kabukabu kauta namata maivaka talavatu 'ola kauta beva anaanala vaika inoku beaku bala, beia melala ivakoinai Dilava betata'u ia bevako'isia 'udai.

²² Petelo eta'u Iesu evuaia eda'a 'aba'abai inoku e'ovenia ediaka, “Lovia namana e, kanaua sia bekoma, oni 'eva kanaua sia bekomamu.”

²³ Iesu elava 'udai Petelo e'ovenia ediaka, “Satani e, kele'euai da'atau, oni lau e'u dala o'alavua, 'olana emu lalovai lalovai 'eva sia Dilava enai beia kau etai deasi.”

²⁴ Inoku Iesu ibanona kauta e'outa ediaka, “Kau ka be'ula lau muli'uai bedada'a koanai ia sibona ena maui bevikania, ena au ido'o valaukuna bevuala lau muli'uai bedada'a.

²⁵ Kau ka sibona ena maui sia e'ula bevikania kauna 'eva bevatauleia, beia kau ka lau dai'uai sibona ena maui bevikania kauna 'eva beabi 'udai.

²⁶ Kau ka kanobata itoinai iabinai ena maui bevatauleia 'eva ena nama'ina dava? 'O kau ka ena maui davai betavala 'udai?

²⁷ Lau Kau Nakuna 'eva Kama'u nuavinai e'u anelu ita lai ba'asi, melala kanaua'i kau ka ka eta vinaula vitaitatai tavata baveveni.

28 Lau oi luva umauna a'oumui, vaida nia'i delalava kauta sia bebaba beda'amo Lau Kau Nakuna vutuvutu vanuana lovia siavunai ba'asi kau vilootai 'eva beika'u."

17

Iesu Ikana Edeana.

(Mk 9.2-13; Lk 9.28-36)

1 Melala kalakoi mulitai Iesu eta'u Petelo, Iakobo mai kadina Ioane ita mo sibota evada'ata deda'a lolo namana ka ai dele'au.

2 Inoku ua'i ia vailatai Iesu ikana edeana, vailana e'ailala ovo itani melala boina maivaka ena tubu'a dedeva'i si'asi'a de'amale 'amale.

3 Komolonaimo Mose mai Elia dela'asi ia vailatai, Iesu ita deluvaluva.

4 Inoku Petelo Iesu e'ouia ediaka, "Lovia namana e, ita nia'i kamimia 'eva emanama'ina, oni bo'ula koanai lau aiole koi bavavaita ka oni emu ka Mose ena ka Elia ena."

5 Petelo eluva do'o laloanai, oli deva'i ovona easi e'alavuta, inoku lele ka oli laloanai easi ediaka, "Kania 'eva lau naku'u, e'u lalo'au, lau ia alalonamavenia, lelana oi boika."

6 Ibanona kauta lele kanaua deika koanai de'eko kanoai depakadivo, demakau si'asi'a.

7 Beia Iesu eda'a easi kele'etai, eabita kovo e'outa ediaka, "Sia oi bomakau, oko'isi."

8 Inoku ia de'a'a dae 'eva sia kau ka deikaia beia Iesu mo sibona.

9 Loloai de'ovu koanai Iesu e'outa kao ediaka, "Dava oi oikala davana 'eva sia kau ka vailanai oi boluvala beda'amo lau kau nakuna ba ai bako'isi 'udai."

10 Inoku ibanona kauta delavuaia dediaka, "Dava 'ounai talavatu 'ola kauta dediaka Elia 'eva beasi 'ana'i?"

11 Iesu eta luva evamuea ediaka, "Luva umauna, Elia 'eva be'asi inoku dava boutai beva'oluta kave'i.

12 Beia lau oi a'oumui, Elia 'eva 'ani easi, kau ia sia deikala une beia kele'enai eta ula vinaulata 'eva devavaita, vitaitana kanaua boina lau kau nakuna vaka kanaua bevaanaana'u koma."

13 Inoku ibanona kauta deikabasi, ia 'eva Ioane va'idiu kabukabu kauna lovana eakuia.

Iesu Melo Ka Nuanai Ka'uba Si'avana Vaika Elo'oa Asi.

(Mk 9.14-29; Lk 9.37-42)

14 Inoku demue deda'a kau mato kele'etai dela'asi koanai, kau ka easi Iesu vailanai ekuidula e'ouia ediaka,

15 "Lovia namana e, Naku'u lalao 'olana ia 'eva 'olana ebo'obo'o mai evaanaanaia vaika, melala vaida sibona e'eko 'alova akanai 'o veiai edodovu.

16 Avuaia ada'a ibanomu kauta kele'etai, beia bevanama'inala 'eva ia sia edaita."

17 Iesu e'outa ediaka, "Oi sia maiemui abiveni mai kaia bo'o uluna kaumui, lau kevamui abamia dau'a koma? Melo oabia omai keva'u."

18 Iesu ka'uba si'avana e'ovenia, inoku ka'uba si'avana melo nuanai ela'asi, melo komolonai enama'ina.

19 Kanaua mulinai ibanona kauta vunivuniai deda'a Iesu delavuaia dediaka, "Dava 'ounai ka'uba si'avata vaika lai balo'ota asi ako 'eva sia edaimai?"

20 Iesu eta luva evamuea ediaka, "Olana emui abiveni dekiki vaika. Lau oi luva umauna a'oumui, emui abiveni 'eva itani tuava keana boina koanai, lolo kania oi boma'oua, 'Ilu da'amo ua'i' 'eva komolonai bemailu bemada'a, sia dava ka kele'emui bemapasisi vaika.

²¹ Beia dava katania boita 'eva sibota sia bela'asi kovo, ia meamea ai mai loveai 'eva bela'asi."

Iesu Ena Ba Valina Ekava 'Udai.

(Mk 9.30-32; Lk 9.43-45)

²² Ibanona kauta boutai deasi Kalileai devaka'onamo, inoku Iesu e'outa ediaka, "Lau kau Nakuna 'eva kou'u bekokou mai veni'u beveveni inoku beaku ba'u,

²³ beia melala ivakoinai Dilava bevako'isi'u 'udai bamauli." Kanaua deika koanai ibanona kauta devilalo.

Iesu Petelo Ita Lo'e Kabukabuna Monina Deveni.

²⁴ Iesu mai ibanona kauta deda'a Kapelanaumai dela'asi koanai, lo'e kabukabuna monina devisia kauta deasi Petelo kevana delavuaia dediaka, "Emui vaikabasi kauna Lo'e Kabukabuna monina eveneni?"

²⁵ Petelo ediaka, "O, eveneni." Inoku Petelo eda'a luma laloanai edodo asido'omo eluva laloanai, Iesu Petelo elavuaia ediaka, "Simona e, oni dava oko? Kanobata loviata 'eva nakuta kele'etai moni de'abi 'o kau edeata kele'etai de'abi?"

²⁶ Petelo ediaka, "Kau edeata kele'etai deabi." Iesu ediaka, "Oluva kave'i, kanaua 'ounai melo 'eva moni sia bene'edivo.

²⁷ Beia kau katania nuata asi'i kamavabaduta 'ounai, da'a 'ovuai emu ki-mai valona boitua, sisi makavana bovelia'au sisina nutuna boluvua laloanai moni bodavalia, boabia bovenita lalua eta moni tavana."

18

Dai 'Eva Namana Be'ao?

(Mk 9.33-37; Lk 9.46-48)

¹ Melala kanaua'i ibanona kauta deasi Iesu kevana delavuaia dediaka, "Dilava ena lovia vanuana laloanai dai 'eva namana be'ao?"

² Inoku Iesu melo kikina ka e'aeia easi viloatai evalavadivo.

³ Inoku Iesu e'outa ediaka, "Lau oi luva umauna a'oumui, bema emui koakoa sia oi bovaedeana inoku melo kikita boitai sia oi bo'ao koanai oi 'eva Dilava ena lovia vanuanai sia oi boda'a dodo.

⁴ Kanaua 'ounai kau ka 'uluna asi'i melo kikina kanania boinai be'ao kauna, ia 'eva Dilava ena lovia vanuanai namana be'ao.

⁵ Kau ka lau vau'ai melo kikina kanania boina eabia dae kauna 'eva lau vaka 'ani eabi'u dae.

Vikovo Bevavaia Kauna Kele'enai 'Eva Besi'avana Vaika.

(Mk 9.42-48; Lk 17.1-2)

⁶ Beia lau deabiveni'u melona kanania boina ka va'eva ai bene'eadivo kauna 'eva bika'a namana 'atonai bedo'oa 'au inoku 'atubatai bekapoa uku bedono ba 'eva benama'ina.

⁷ Kanobata kanania 'eva besi'avana vaika, 'olana ia betata'u kau bevada'ata si'avanai bene'etadivo. Vikovo kataua boita 'eva bepupulu, beia vikovo bevavaia kauna enai besi'avana vaika.

⁸ Imamu 'o aemu si'avanai bene'emudivo koanai botaua uku boitua 'au. Inoku imamu ka'onamo 'o aemu ka'onamo ai mauili keinikeini 'abunai boda'adodo 'eva enama'ina, ia sia enama'ina imamu luata 'o aemu luata bevada'amu sia ebo'o kovo mai eani keinikeini 'alovanai bekapomu dodo.

⁹ Makamu ka si'avanai bene'emudivo koanai boia asi boitua 'au. Makamu ka'onamoai mauili keinikeini 'abunai boda'adodo 'eva enama'ina, ia makamu luata nama'itai sia ebo'o kovo 'alovanai bekapomu dodo 'eva sia enama'ina.

Luva Ivavitaitana Mamoe Etaule.

(Lk 15.3-7)

¹⁰ Oi bo'imamui kave'i melo kikita katania sia ka oi boikala 'iu'iu, 'olana ia eta anelu vutuvutuai 'eva melala boutai Kama'u vutuvutuai emimia kauna deluvavenia.

¹¹ Lau kau Nakuna 'eva detaule kauta bavamaulita 'ounai asi.

¹² Oi a olalovai koma? Kau ka ena mamoe sinavu ka, inoku ka'onamo bemataule koanai, kalavani ka navui kalavani ka (99) loloai bemavikanita inoku bemada'a etaule davana bemakavua.

¹³ Lau oi luva umauna a'oumui, bema edavalua koanai, kalavani ka navui kalavani ka daita sia bemalalonama ia edavalua davana dainai 'eva bemalalonama si'asi'a.

¹⁴ Vitaitanai Kamamui vutuvutuai e'ula melo kikita katania sia ka betaule.

Bo'akalamu Kele'emuai Va'eva Evavaia Kauna Bovakomoloa.

¹⁵ Bo'akalamu si'avana evavai kele'emuai koanai boda'a kevana lalua mo oi boluvalua vaia ena si'avana vailanai boluvala kave'i, inoku lelemu bebidae koanai oni 'eva bo'akalamu ita 'ani oi ovaka'onamo 'udai.

¹⁶ Beia lelemu sia be'ika koanai kau ka 'o lua bovuata boda'a kevana, inoku kau kataua lua 'o koi luva oi boluva vaia davata boutai bevamomo'aita.

¹⁷ Beia sia be'ula lelemui be'ika koanai, lo'eai boluvala asi, inoku sia be'ula leleta be'ika koanai pulu edeana kaunai 'o si'avana kaunai oi bova aoa.

Ilio 'Ini, Mai Iluvu Dadai.

¹⁸ Lau oi luva umauna a'oumui, dava kanobatai oi oliota 'eva vutuvutuai vaka beliota mai dava kanobatai oi boluvuta 'eva vutuvutuai vaka beluvuta.

¹⁹ Mai a'oumui 'udai, kanobatai lalua dava ka nuamui ka'onamoai oi bonoinoi vaia davana 'eva Kama'u vutuvutuai emimia kauna bevavaia oi emui.

²⁰ Kau lua 'o koi lau vau'ai devaka'onamo, lau 'eva ua'i ia ita."

Luva Ivavitaitana Da'alabi Kauna Ena Si'avana Sia E'oukao.

²¹ Inoku Petelo eda'a Iesu kevana elavuaia ediaka, "Lovia namana e, bo'akala'u bevavai si'asi'a kele'e'uai 'eva melala vida ena si'avana ba'ou kao? Melala kalakoi ka, una?"

²² Iesu ediaka, "Melala sia kalakoi ka, beia melala kalakoi ka navui kalakoi ka (77).

²³ 'Olana Dilava ena lovia vanuana 'eva itani lovia 'olana ka boina, ena da'alabi kauta kele'enai dava vida deabi kauta 'eva bevakomolota.

²⁴ Kanaua 'ounai ena vinaula emakavala laloanai kau ka ia kevanai sinavu boutai sinavu (10,000) eabi kauna devuaia deasi kevana.

²⁵ Ia 'ola kauna ena moni tavana beveni 'eva imanai sia edaia, 'ounai 'ola kauna ia e'ouia ediaka, 'Oni mai adamu ita, nakumu mai emu dava boutai betavamui monitai moni oabia monina tavana boveni.'

²⁶ Inoku da'alabi kauna ena 'ola kauna vailanai ekuidula enoia ediaka, 'Lalo'u melala kava'inamo boveni'u, inoku abia monina tavana itoina baveveni.'

²⁷ 'Ola kauna da'alabi kauna elaloia, inoku moni eabia davana e'ouia kao inoku esinia eda'a.

²⁸ Inoku da'alabi kauna kanaua ela'asi eda'a koanai banona ka edavalua kau kanaua 'eva ia kele'enai kolo monina sinavu ka eabia, eko'isi kau kanaua eabi 'inia 'atona eveveia e'ouia ediaka, 'E'u moni oabi monina tavana veni.'

²⁹ Inoku ia banona ekuidula enoia, 'Lalo'u melala kava'inamo vi'ima tavana 'ani baveni.'

³⁰ Beia ia sia eula, kau kanaua evuaia eda'a vabuto'o 'abunai ene'eiadivo ua'i bemimia beda'amo moni tavata beveni palu.

³¹ Da'alabi kauta vaidā koa kanāua deikaia koanai nuata deanana, deda'a eta 'ola kauna kevana dava epulu davana de'ouia.

³² Inoku 'ola kauna da'alabi kauna kanāua e'aeia easi, e'ouia ediaka, 'Oni da'alabi kaumu si'avamu vaika, onoi'u 'ounai moni oabia monina itoinai a'ouia kao.

³³ Beia dava 'ounai banomu sia olaloia vitaitana lau alalomu boina?'

³⁴ 'Ola kauna ebadu si'asi'a da'alabi kauna evavabuto'oa anaana bevenia beda'amo moni kanāua eabia monina tavana itoinai beveni palu.

³⁵ Kanāua 'ounai oi ka ka bo'akalamui nuamui umautai eta si'avana sia oi bo'outa kao koanai Kama'u vutuvutuai emimia kauna vaka kanāua bekomamui."

19

Kau Ka Adana Eva'ovua. (Mk 10.1-12; Lk 16.18)

¹ Iesu luva kataua eluva koa mulinai, Kalilea evikania eda'a Iuda kanonai Iolidana nutu avekena duasi.

² Kau mato namavaikana ia mulinai deda'a u'ai eta 'olele evanama'inata.

³ Inoku Palisea kauta vaidā deasi Iesu kevana devakovoa delavuaia dediaka, "Kau ka ena lalovai vaidā daitai adana beva'ovua 'eva mai ena komolo ka 'o asi'i?'"

⁴ Iesu eta luva evamuea ediaka, "Oi Puka Kabukabuna sia oi ovakua, una? Makavana umaunai dava boutai ivavaita Dilavana eta'u kau evavaita 'eva moluane mai ateate evavaita.

⁵ Inoku ediaka, 'Kanāua 'ounai kau betata'u kamana mai sinana be-vikanita, ia adana ita bevaka'onamo, laluana 'eva kauani ka'onamo.'

⁶ Kanāua 'ounai ia 'eva sia lua ia ka'onamo. 'Ounai Dilava eta'u evaka'onamota kauta 'eva sia kau ka beva'alamata kovo."

⁷ Palisea kauta delavuaia 'udai dediaka, "Dava 'ounai Mose e'oumai ediaka, kau be'ula koanai iva'ovu malelena belelea adana bevenia inoku beva'ovua?'"

⁸ Iesu eta luva evamuea ediaka, "Oi emui nuā pasisi 'outai Mose komolo evenimui adamui oi bova'ovuta, beia makavanai 'eva sia kanāua boina.

⁹ Lau oi a'oumui, kau ka adana sia ekulakula beia eva'ovua 'avaea inoku ia mune'e ateate makamakana ka eadavala, kau kanāua 'eva kulakula koana evavaia."

¹⁰ Ibanona kauta Iesu de'ouia dediaka, "Moluane mai ateate vilotai kanāua eko koanai, kau sia bemakamoane 'eva bemanama'ina."

¹¹ Iesu eta luva evamuea ediaka, "Luva kanana kau boutai kevatai 'eva sia beabia dae, beia Dilava evenita kautamo kele'etai 'eva bedaia.

¹² Kau vaidā 'eva sia bekamoane, kau vaidā 'eva kanāua boinai depulua sia bekamoane, kau vaidā 'eva kau deta'u deivata sia bekamoane, kau vaidā 'eva Dilava ena lovia vanuana 'ounai kamoane sia delalovaia. Dai kele'enai edaia kauna luva kanania beabia dae."

Iesu Melo Kikita Evanama'inata. (Mk 10.13-16; Lk 18.15-17)

¹³ Melala kanāua'i kau vaidā nakuta devuata deasi Iesu kevana akatai beka'au bemeamea, beia ibanona kauta deta'u kau kataua de'ovenita,

¹⁴ Iesu ediaka, "Melo kikita ovikanita, demai kele'e'u sia oi bo'alavuta, 'olana Dilava ena lovia vanuana 'eva katana boita kauta eta."

¹⁵ Iesu imana melo kikita akatai ekao'au evanama'inata, mulinai Iesu 'abu kanāua evikania.

Iesu Lavo Kauna 'Alu'aluna Ita Deluvaluva.

(Mk 10.17-31; Lk 18.18-30)

¹⁶ Inoku kau ka easi Iesu kevana elavuaia ediaka, “Vaikabasi kaumu e, vinaula nama'ina davana bavavaia 'eva mauli keinikeini babia?”

¹⁷ Iesu ena luva evamuea ediaka, “Dava 'ounai lau kele'e'uai vinaula nama'ina olavuai lavuai vaia? Dilava mo sibona enama'ina, oni bo'ula mauli keinikeini bo'abia koanai, talavatu luvata bo'ima kave'i.”

¹⁸ Ia ediaka, “Talavatu luvata davata?” Iesu ediaka, “Talavatuta katania, sia boakuaku, sia bokulakula, sia bovinao, sia bodede.

¹⁹ Kamamu mai sinamu 'olata bo'aku, maivaka kevamu kauna bolalo'au venia itani oni sibomu olalo'au venimu vitaitana.”

²⁰ Kau alu'aluna ediaka, “Katania boutai 'ani a'ima kave'i, inoku davai 'eva atabu?”

²¹ Iesu ia e'ouia ediaka, “Bo'ula bonama'ina kave'i kave'i koanai da'a emu dava boutai tavatava vaita monita ta'ovala kauta bovenita, inoku emu lavo 'eva 'ani ua'i vutuvutuai boabia, inoku bo'asi muli'uai bodada'a.”

²² Kau 'alu'aluna lele kanaua eika koanai nuana ebavunu eda'a tau, 'olana ia kevana lavo doutamo.

Lavo Kauta Vutuvutuai Beda'adodo 'Eva Bepasisi.

²³ Inoku Iesu ibanona kauta e'outa ediaka, “Lau oi luva umauna a'oumui. Lavo kauna Dilava ena lovia vanuanai beda'adodo 'eva bepasisi vaika.

²⁴ Mai a'oumui 'udai. Sisi vana Kamela nila ilenai bedodo 'eva edaia, beia lavo kauna Dilava ena lovia vanuanai beda'adodo 'eva bepasisi vaika.”

²⁵ Ibanona kauta luva kanaua deika koanai detabulovo si'asi'a delavuai lavuai dediaka, “Inoku dai 'eva mauli beabia?”

²⁶ Iesu eika 'inita ediaka, “Kau etai kanania bevavaia 'eva sia bedaia, beia Dilava enai 'eva dava boutai bevavai bedaia.”

²⁷ Petelo Iesu elavuaia ediaka, “Lai dava boutai avikanita inoku oni mo mulimuai lai adada'a, mulimuai lai adada'a 'eva dava lai babia?”

²⁸ Iesu e'outa ediaka, “Lau oi luva umauna a'oumui. Dava boutai eta makamaka melalanai, lau Kau Nakuna e'u mia'au davana nuavina akanai bamia'au koanai, oi kaumui 'ouka lua muli'uai oi odada'a vaka mia'au davata 'ouka lua akatai oi bomia'au, Isalaela iduvuta 'ouka lua kauta oi bolavuaia.”

²⁹ Kau ka lau dai'uai ena luma 'o bo'akalana 'o lovuna 'o kamana 'o sinana 'o nakuna 'o ena kano bevikanita kauna 'eva sinavu sinavu akatai bedavalita 'udai, maivaka mauli keinikeini beabia.

³⁰ Beia doutamo de'ana'ia kauta 'eva bemulikai, inoku doutamo demulikai kauta 'eva be'ana'ia.”

20

Luva Ivavitaitana Vinaula Kauta Vine Kulanai.

¹ “Dilava ena lovia vanuana 'eva kanania boina. Kano 'ula kauna 'avu'avu avulanai ela'asi eda'a vinaula kauta ekavuta ena vine kulanai bevinaula.

² Kano 'uala kauna ita luva devaka'onamo tavata melala kaonamo laloanai kina 'ouka be'abi, inoku esinita deda'a ena kula.

³ Melala koana kalavani ka (9) boina 'eva ela'asi eda'a tavatava 'abunai ua'i kau vaida delava 'avaea eikata.

⁴ Inoku e'outa ediaka, ‘O'i vaka oda'a e'u kulai ovinaula, tavamui haveveni.’

⁵ Inoku ia vaka deda'a bevinaula. Ado'alavuni ela'asi eda'a mai vaka melala avekenai koana koi (3) boina ela'asi 'udai eda'a koa ka'onamo kanaua evavaia.

⁶ Mai lavilavi melala koana ima (5) boina ela'asi eda'a 'eva vaidā mo delava 'avaea eikata, elavuaitea ediaka, 'Dava 'ounai nia'i oi olava boni 'avaea sia dava ka oi ovavaia?'

⁷ Ena luva devamuea dediaka, "Olana sia kau ka vinaula ka evenimai.' Inoku e'outa ediaka, 'Oi vaka oda'a e'u kulai ovinaula.'

⁸ Melala eulu koanai, kula 'uala kauna kula i'imana kauna e'ouia ediaka, 'Devinaula kauta bo'aeta tavata bovenita, muliai vaika deasi devinaula kauta etai bomakavala beda'amo deasi makava kauta etai bovapuala.'

⁹ Lavilavi melala koana ima (5) boina dedodo devinaula kauta deasi ka ka kina 'ouka 'ouka evenita de'abi.

¹⁰ Inoku devinaula 'ana'i kauta deasi, eta lalovai 'eva tavata namata be'ao, beia ia vaka ka ka kina 'ouka 'ouka deabita.

¹¹ Eta moni deabita koanai kula 'uala kauna denunulaia,

¹² dediaka, 'Muliai deasi kauta 'eva melala koana ka'onamo devinaula, lai 'eva melala kanania itoina ena mekau mai siavuna lai akoala, beia ia ita tavamai 'eva ovavitaita.'

¹³ Kula 'ola kauna vinaula kauna ka ena luva evamuea ediaka, 'E'u kau e, kele'emuai sia ava'eva. Ita laluvana luva 'ani kavamomo'aia bovinaula melala ka'onamo koanai kina 'ouka bavenimu.

¹⁴ Oni tavamu abi inoku da'a. Lau a'ula muliai e'asi evinaula kauna ena bavenia oni emu avenimu vitaitanai.

¹⁵ Lau sibo'u e'u dava e'u ulai sibo'u sia bavavaia, una? 'O lau e'u nama'ina vaidā etai 'ounai omamama, una?'

¹⁶ Dala vitaitanai demulikāi kauta be'ana'ia, ia de'ana'ia kauta bemulikāi.' "

Iesu Melala Ivakoina Ena Ba Luvana Eluva.

(Mk 10.32-34; Lk 18.31-33)

¹⁷ Iesu dalai eda'a Ielusalema koanai ibanona kauta 'ouka lua evalavatatau 'aba'abai e'outa ediaka,

¹⁸ "Vali'u ita 'eva Ielusalema ai eka la'asi, lau Kau Nakuna 'eva kabukabu kauta namata mai talavatu 'ola kauta imatai beuda'u va'evai bene'e'udivo beaku ba'u.

¹⁹ Lau 'eva pulu edeana kauta imatai beuda'u bemediamedia vai'u be'odi'u mai au ido'o valaukuna akanai beaku ba'u, beia melala ivakoinai bako'isi 'udai."

Ateate Nakuna Daitai Iesu Enoia.

(Mk 10.35-45)

²⁰ Inoku Sebedeo nakuna lua sinata ita deasi Iesu kevana, sinata Iesu vailanai ekuidula ena 'ula davana ka enoinoi vaia.

²¹ Iesu ia elavuaia ediaka, "Dava 'oula?" Ia ediaka, "Naku'u katania luana komolo bovenita ka idibamu avekenai ka 'ealimu avekenai bemimia emu vutuvutu vanuana laloanai."

²² Iesu ediaka, "Oi sia oikabasi dava oi onoinoi vaia? Anaana 'ouna bainua davana oi boinua bedaia, una?" Luvana dediaka, "Lai bainua bedaia."

²³ Iesu ia e'outa ediaka, "Luva umauna e'u 'ou 'eva oi boinua, beia idiba'u mai 'eali'u avekenai bemimia kauta 'eva lau sia badilata, ia 'abu kanaua 'eva 'ani Kama'u eva'olua edilata kauta mo bevenita."

²⁴ Ibanona kauta 'ouka luva kanaua deika koanai banota kataua luvana debadu venita.

²⁵ Kanaua 'ounai Iesu ibanona kauta boutai e'aeta deasi kevana e'outa ediaka, "Oi oikabasi pulu edea kauta eta lovia kauta 'eva eta ulai kau de'olavaita eta kau namata maivaka eta siavuai devaeleta 'au kau devasiavuta.

²⁶ Beia oi emuai 'eva sia kanaua bekoma, kau ka viloomuai e'ula namana be'ao kauna kanaua 'eva boumuiai emui da'alabi kaunai be'ao.

²⁷ Maivaka kau ka viloamuiiai e'ula be'ana'ia kauna kanaua 'eva boumuiiai emui da'ala abi kaunai be'ao.

²⁸ Vitaitana lau Kau Nakuna asi 'eva da'ala'u sia be'abi beia kau da'alata ba'abi, maivaka e'u mauli baveveni kau eta si'avanai bavamaulita 'ounai."

Iesu Maka Ede Kauta Lalue Makata Evanama'inata.

(Mk 10.46-52; Lk 18.35-43)

²⁹ Iesu ibanona kauta ita Ieliko devikania laloanai kau mato namavaikana ia mulinai deda'a.

³⁰ Maka 'ede kauta lua dala 'aba'abanai demiadivo inoku Iesu kele'etai ekeini 'uluna deika koanai, de'ae'ae 'unu'unu dediaka, "Lovia namana, Davida Nakuna e! Lalomai!"

³¹ Beia kau mato ia de'ovenita lele bevuvunu. Ia lalua de'ae 'udai 'ae 'udai, "Lovia namana, Davida Nakuna e! Lalomai!"

³² Iesu elavadivo e'aeta deasi kevana, inoku elavuaite ediaka, "Oi o'ula dava emuiiai bavavaia?"

³³ Ia dediaka, "Lovia namana e, lai a'ula makamai beluluvu."

³⁴ Iesu elalota, makata eabi kovo. Komolonai makata deluvu inoku deikaika, inoku Iesu mulinai deda'a.

21

Iesu Ieluselema Ai Eda'adodo Itani Lovia 'Olana Boina.

(Mk 11.1-11; Lk 19.28-40; Io 12.12-19)

¹ Iesu ibanona kauta ita 'ani Ieluselema dekevaia laloanai Olive lolonai Betepake ai dela'asi, ua'i Iesu eta'u ibanona kauta lua esinita de'ana'ia,

² e'outa ediaka, "Oi boda'a vanua vailamuiiai kanaua'i doniki ka mai nakuna ita dedo'ota oi bodavalita, oi boluvuta oi bovuata bo'asi keva'u.

³ Kau ka luva ka beluvala koanai oi bodiaka, 'Lovia namana eula venita,' inoku komolonai bevenimui."

⁴ Kanania 'eva Enolea kauna ena luva ivamomo'aina ediaka,

⁵ "Siona vanua kauta bo'outa,

Oikaia, emui lovia 'olana
e'asi kevamui.

Ia maimanauna

doniki kabenai emia'au,

doniki nakuna akanai

emia'au."

Sek 9.9

⁶ Ibanona kauta deda'a Iesu e'outa vinalata vitaitana devavaita.

⁷ Doniki nakuna ita devuata deasi, eta tubu'a akatai delavalita 'au inoku Iesu emia'au.

⁸ Kau mato eta tubu'a dalai delavalita, mai vaidia au le'eta dekalata ovo dalai delavalita.

⁹ Iesu vailanai mai mulinai deda'a kauta devaoi dediaka,

"Osana, Davida Nakuna ena!

Lovia namana vanai e'asi kauna Dilava betata'u bevanama'inala!

'Osana aka umau umaunai!"

¹⁰ Iesu Ieluselema eda'adodo koanai vanua kauta 'ulu namavaikana devavaia inoku delavuai lavuai dediaka, "Nia 'eva kau davana?"

¹¹ Kau mato dediaka, "Nia 'eva Iesu enolea kauna Kalilea Nasaleta ai easi."

Iesu Lo'e Kabukabunai Tavatava Kauta Elo'ota Asi.

(Mk 11.15-19; Lk 19.45-48; Io 2.13-22)

¹² Iesu lo'e kabukabuna laloanai eda'adodo ua'i detavatava kauta boutai elo'ota asi, moni abi keini kauta eta vaka mai boiomalo detavatavavai kauta eta mia'au davata eva'i'itolita.

¹³ E'outa ediaka, "Puka kabukabunai 'ani ilelena, 'E'u luma 'eva be'aea meamea lumana,' beia oi 'eva vinaovinao kauta eta vunivuni 'abunai oi ovaaoa."

¹⁴ Makata desi'avana kauta mai 'ome'ome kauta deda'a Iesu kevana lo'e kabukabuna laloanai, inoku ia eta'u evanama'inata.

¹⁵ Kabukabu kauta namata mai talavatu 'ola kauta Iesu vamauli koata evavai deikaia maivaka melo lo'e laloanai devaoi dediaka, "Osana Davida Nakuna ena!' ia 'eva debadu,

¹⁶ dediaka, "Oni melo dava deko leleta o'ika?" Iesu eta luva evamuea ediaka, "'O, leleta 'ani aika. Luva kanania 'ani oi ovakua?"

'Melo kikita mai
'oma'omata debabae do'o bibi'atai
vamu devanama'inala.' "

Sal 8.2

¹⁷ Inoku Iesu evikanita vanua namanai ela'asi eda'a Betani ai eboni ua'i emia.

Iesu Au Esivadala.

(Mk 11.12-14; 11.20-24)

¹⁸ Elani 'avu'avu vabulanai Iesu emue eda'a vanua namana laloanai vikolo eakuia.

¹⁹ Suke auna ka dala 'aba'abanai eikaia eda'a kevana. Beia vuana sia ka eikaia uauana mo eikata, inoku e'ouia ediaka, "Oni sia bovua 'udai!" Au kanaua komolonai uauana delamoda inoku de'ibu.

²⁰ Ibanona kauta koa kanaua deikaia koanai detabulovo si'asi'a inoku dediaka, "Dava 'ounai alimo au kanaua 'ani e'ibu?"

²¹ Iesu e'outa ediaka, "Lau oi luva umauna a'oumui, oi boma abiveni nuamui sia bemalalo to'ato'a koanai, Sia suke auna sibona kele'enai mo epupulu, ia lolo oi boma'oua, 'Da'a 'atuai eno uku,' inoku kanaua vaka bepupulu.

²² Dava boutai 'eva meamea ai oi bonoinovaita inoku maiemui abiveni koanai 'ani oi boabita."

Iesu Ena Siavu

Delavuui Lavuui Vaia.

(Mk 11.27-33; Lk 20.1-8)

²³ Iesu mune'e Lo'e Kabukabunai eda'adodo evaikabasi laloanai, kabukabu kauta namata mai Iuda eta kau namata deasi kevana delavuuaia dediaka, "Siavu davanai vinaula katania ovavai, maivaka dai siavu evenimu?"

²⁴ Iesu eta luva evamuea ediaka, "Lau vaka oi lavuui ka'onamo bavenimui, e'u lavuui oi bovamuea koanai lau siavu davanai vinaula katania avavai davana 'eva ba'oumui.

²⁵ Ioane ena vaidi'u kabukabu siavuna 'eva a'ia'i easi? Vutuvutuui easi 'o kau etai easi?"

Ia sibota vilootai deluvaluva dediaka, "Ekadiaka, 'Vutuvutuui easi.' ia belavuvaita bediaka, 'Dava 'ounai sia oi oabia dae?"

²⁶ Beia Ekadiaka, 'Kau etai easi koanai,' kau katania 'eva kamakauvaita, 'olana ia boutai devamomo'ai Ioane 'eva enolea kauna."

²⁷ Kanaua 'ounai ia Iesu ena luva devamuea dediaka, "Lai sia aikabasi." Inoku Iesu e'outa ediaka, "Lau vaka siavu davanai vinaula katania avavai 'eva sia ba'oumui."

Luva Ivavitaitana Melo Lua.

28 “Oi dava olalovaia? Kau ka nakuna 'eva lua, inoku eda'a 'aida'aidana kevana e'ouia ediaka, 'Naku'u e, vali'u melala kanania boda'a e'u vine kulanai bovinaula.’

29 Melo kamana ena luva evamuea ediaka, 'Sia badada'a.' Beia muliai elalovai lalovai kave'i inoku eda'a evinaula.

30 Kamata mune'e eda'a nakuna ivaluana kevana inoku luva vitaitana eluvavaia, inoku melo ediaka, "O, kama'u, badada'a.' Beia sia eda'a.

31 Ia lalua vilootai davana kauna 'eva kamata ena ula vinalana evavaia?" Ia dediaka, "Aida'aidana kauna."

Iesu ia e'outa ediaka, "Lau oi luva umauna a'oumui, moni visi kauta mai maka si'a 'a'ateta 'eva Dilava ena lovia vanuanai beda'adodo makava vakaia oi.

32 "Olana vaidi'u kabukabu kauna Ioane easi kele'emui inoku komolo dalana evaikamui, beia oi sia ovamomo'aia ia moni visi kauta mai maka si'a 'a'ateta 'eva devamomo'aia. Oi vaka koakoa kanaua oi oikaia, beia sia oi olalo 'udai mai sia oi ovamomo'aia."

Luva Ivavitaitana Kula I'imana Kauta Si'avata Vaika.

(Mk 12.1-12; Lk 20.9-19)

33 "Kaiamui ovala luva ivavitaitana ka kanania. Kano kauna ka ena vine kulana evavaia, alana ekoia kaiukaiu, vine vuata bekali mukamuka 'ulina eoia mai vi'ima lumana edauia. Kula 'eva vinala kauta vaidia eva'imata, beia ia 'eva ekalima eda'a 'abu edeanai.

34 Vine vuana iabina melalana ekevai koanai, kula 'ula kauna eko'isi ena da'alabi kauta vaidia esinita vuata iabita deda'a.

35 Kula de'imaia kauta deta'u da'alabi kauta deabi 'inita ka deaku si'ala ka deaku bala ka 'eva bika'ai deakuia.

36 Kula 'uala kauna mune'e da'alabi kauta vaidia vaka esinita deda'a, makava 'eva vida mo vali'u 'eva doutamo deda'a, beia koa vitaitanamo ia kevatai devavaia.

37 To'ona umaunai 'eva kula 'uala kauna nakuna esinia eda'a kele'etai 'eva ediaka, 'Lau naku'u 'ounai 'olana 'ani beaku.'

38 Kula de'imaia kauta kula 'ula kauna nakuna deikaia koanai sibota deluvaluva dediaka, 'Be'olavai kauna kanania. Omai kakubala, inoku kula 'eva ita eta be'ao.'

39 Inoku ua'i deabia kula laloanai dedo'oa devuaia deda'a deitoia asi maku mulinai deakubala.

40 Inoku oi olalovaia, kula 'uala kauna be'asi koanai kula de'imala kauta kevatai dava bevavaia?"

41 Ia ena luva devamuea dediaka, "Ola kauna betata'u kula de'imaia kauta si'avata vaika boutai beakubata, ia kula 'eva kula 'ima kauta edeata bevenita be'imala, vine vuata be'abi melalanai ia ena vaka be'abi beda'a bevenia."

42 Iesu ia e'outa ediaka, "Oi puka kabukabuna sia oi ovakua kovo, una? Kanania deleleia koma,

'luma vavai kauta devavaia si'asi'a bika'ana 'eva 'ani bika'a namana umaunai eao.

Kanania 'eva Lovia namana evavaia davana, ekaikala 'eva 'ani eta tabulovo!'

Sal 118.22

43 Kanaua 'ounai lau oi a'oumui, Dilava ena lovia vanuana kevamui ai beabia tau, vuavua evapuluta iduvuna kauta bevenita.

44 Kau ka be'eko bika'a kanania akanai 'eva kauanina be'alama, beia bika'a be'eko kau ka akanai kauna 'eva bemukamuka apuloloai be'ao."

⁴⁵ Kabukabu kauta namata mai Palisea kauta Iesu ena luva ivavitaitana kanaua eluvavaia 'uluna de'ika koanai deikabasi ia lovata eakuia.

⁴⁶ Ia deula beabia belioa, beia kau mato makauta demakau 'olana kau delalovaia Iesu 'eva enolea kauna ka.

22

Luva Ivavitaitana Kamoane Makamaka Naduna. (Lk 14.16-24)

¹ Iesu mune'e luva ivavitaitana e'outa 'udai ediaka,

² "Dilava ena lovia vanuana 'eva itani lovia kauna ka nakuna ena kamoane naduna evavaia boina.

³ Ia ena da'alabi kauta esinita deveau veau eula venita kauta de'outa, beia eula venita kauta deba'oa sia deasi.

⁴ Inoku ia mune'e ena da'alabi kauta edeata vaidia esinita ediaka, 'Aveauta kauta oi bo'outa 'udai bodiaka, E'u bolomakau mai e'u sisi nama'ita akuta 'ani deivata mukamuka dava boutai 'ani de'olu, kamoane naduna oi bo'asi.'

⁵ Beia eveauta kauta kataua 'eva ia lovana sia deakuia deda'a mulili, ka eda'a ena loba ka eda'a ena vinaula 'abuna.

⁶ Kalina 'eva da'alabi kauta deabi 'inita de'odita inoku deakubata.

⁷ Lovia kauna ebadu si'asi'a, inoku eko'isi ena kualia kauta esinita, akuaku kauta kataua deakubata eta vanua vaka detouia.

⁸ Inoku ia ena da'alabi kauta e'outa ediaka, 'Kamoane ianina 'ani e'olu, beia aveauta kauta be'asi 'eva sia bedaia.

⁹ Oda'a vanua bo'adanai daidai oi bodavalita kauta oi boveauta be'asi kamoane naduna kanania'i.'

¹⁰ Kanaua 'ounai da'alabi kauta deda'a vanua bo'adanai dedavalita kauta nama'ina kauta mai si'avana kauta boutai devuata deasi, da'a'au kauta kamoane lumana devavonua 'au.

¹¹ Beia lovia kauna eda'a da'a'au kauta eikata koanai kau ka eikaia une kamoane naduna tubu'ana sia evadodoa.

¹² Elavuaia ediaka, 'E'u kau e! Kamoane naduna tubu'ana sia ka ovadodoa ia aboina odododo?' Kau kanaua beluluva 'eva sia edaia.

¹³ Lovia kauna ena da'alabi kauta e'outa ediaka, 'Aena imana oliota mulimuli vabulanai oi bokapoasi, ua'i bekakani mai 'asi'asina beala'o'i ala'o'i.' "

¹⁴ Iesu ena luva to'onai ediaka, "Dounamo e'aeta beia vida mo edilata."

Monivisi Lavuai Lavuaina. (Mk 12.13-17; Lk 20.20-26)

¹⁵ Palisea kauta dedo'u lova deaku aboina Iesu ena luvai bemavaviua.

¹⁶ Eta kau vaidia mai 'Eloda mulinai deda'a kauta ita desinita deda'a Iesu kevana de'ouia dediaka, "Vaikabasi kaumu e, lai aikabasi oni 'eva luva momo'ai kaumu, Dilava ena dala umauna ovaikabasi vaita maivaka kau daitai sia odadai 'olana ia kau aboita 'eva lovata sia o'aku.

¹⁷ Kanaua 'ounai emu lalovai dava 'eva vaikabasimai, moni devisia davana Kaisala bevenia 'eva ekomolo 'o asi'i?"

¹⁸ Eta lalovai si'avana vaika kanaua Iesu 'ani eikabasia 'ounai ediaka, "Oi dede kaumu, dava 'ounai oi ovakovo'u oi bovaviu'u oko?"

¹⁹ Takisi oi oveveni monina ka ovaika'u." Inoku siliva monina ka deabia deasi devenia.

²⁰ Iesu ia elavuita ediaka, "Kania 'eva dai va'ava'ana maivaka dai vana?"

²¹ Ia dediaka, "Kaisala ena." Inoku Iesu ia e'outa ediaka, "Kaisala ena Kaisala oi bovenia, Dilava ena Dilava oi bovenia."

²² Luva kanania 'uluna de'ika koanai detabulovo si'asi'a inoku devikania deda'a.

Bai Ko'isi 'Udai Lavuai Lavuaina.

(Mk 12.18-27; Lk 20.27-40)

²³ Melala ka'onamo kanaua'i Sadukea kauta deasi Iesu kevana, ia 'eva bai ko'isi 'udai sia devamomo'aia kauta, Iesu delavuaia,

²⁴ dediaka, "Vaikabasi kaumu e, Mose kanania e'oumai koma. Kau ka ekamoane beia nakuna sia ka evapulua eba koanai bo'akalana betata'u obu kanaua beadavala melo ka bevapulua bo'akalana eba kauna nakunai be'ao.

²⁵ Vali'u a'a kadi kauta boutai kalakoi ka vilomaiiai demimia. 'Aida'aidana ekamoane, sia melo ka evapulua laloanai eba inoku obu bo'akalana ivaluana kele'enai evikania, inoku eadavala.

²⁶ Mune'e bo'akalana ivaluana vaka nakuna asi'i eba, dala vitaitanai mo bo'akalana ivakoina kele'enai eda'amo bo'akalana ivakalakoi kana enai epua.

²⁷ To'ona umaunai ateate vaka eba.

²⁸ Vali'u ko'isi 'udai melalanai ateate kanaua 'eva dai adanai be'ao, 'olana kauta kalakoi kana ateate kanaua deadavala?"

²⁹ Iesu eta luva evamuea ediaka, "Oi 'ani ova'eva 'olana Puka kabukabunai delele luvata mai Dilava ena siavu sia oi oikabasita 'ounai.

³⁰ Ko'isi 'udai ai kau 'eva sia bekamoane. Ia 'eva vutuvutu aneluta boitai be'ao.

³¹ Ba kauta beko'isi 'udai luvana Dilava e'oumui 'eva sia oi ovakua, una? Ia ediaka,

³² 'Lau 'eva Abela'amo ena Dilava, Isa'ako ena Dilava, Iakobo ena Dilava.' Ia 'eva sia ba kauta eta Dilava, ia 'eva mauili kauta eta Dilava."

³³ Kau moato luva kanania deika koanai ia ena vaikabasi luvanai detabulovo si'asi'a.

Talavatu Namana Umauna.

(Mk 12.28-31; Lk 10.25-28)

³⁴ Iesu Sadukea kauta e'outa inoku lele devunu vaika valina Palisea kauta deika koanai ia vaka dedo'u.

³⁵ Banota ka talavatu kauna Iesu ekovoia elavuaia ediaka,

³⁶ "Vaikabasi kaumu e, talavatu luvana davana 'eva nama vaikana?"

³⁷ Iesu ediaka, "Lovia namana emu Dilava bolalo'au venia mainuamu bounai mai idumemu bounai maiemu lalovai bounai ita.

³⁸ Kanania 'eva talavatu luvana namana maivaka lava'ana'ina.

³⁹ Talavatu luvana namana ivaluana 'eva kanania, kevamu kauna bolalo'au venia sibomu olalo'au venimu boina.

⁴⁰ Talavatu luvata boutai mai enolea luvata boutai 'eva talavatu katanua lua akatai delava 'au."

Iesu Palisea Kauta Elavuaia.

(Mk 12.35-37; Lk 20.41-44)

⁴¹ Palisea kauta dedodo'u mo laloanai Iesu ia elavuaia ediaka,

⁴² "Oi 'eva Keliso a oi olalovaia koma? Maivaka ia 'eva dai nakuna?" Ia de'ouia dediaka, "Davida nakuna."

⁴³ Inoku Iesu elavuaia ediaka, "Dava 'ounai Idume Kabukabuna Davida nuana evavonu 'eva ia Keliso e'aeia Lovia namana? 'Olana Davida ediaka,

⁴⁴ 'Lovia namana 'eva e'u Lovia

e'ouia ediaka,

"Idiba'u avekenai

bomimia beda'amo

emu 'ou kauta aemu palapalata venutai bane'eta divo."

Sal 110.1

⁴⁵ Davida Keliso e'aeia e'u Lovia koanai, a boina Keliso 'eva Davida nakunai be'ao?"

⁴⁶ Kau ka Iesu ena luva bevamuea 'eva sia edaia, maivaka melala kanaua'i sia kau ka eula lavu'ai ka Iesu belavuaia.

23

Talavatu 'Ola Kauta Kevatai

Oi Bo'imamui Kave'i.

(Mk 12.38-39; Lk 11.43, 46; 20.45-46)

¹ Inoku Iesu eta'u kau mato mai ia ibanona kauta e'outa ediaka,

² "Talavatu 'ola kauta mai Palisea kauta 'eva Mose ena mia'au davanai demia'au kau de'ola vaita.

³ Kanaua 'ounai leleta oi bo'ika, de'oumui vinaulata boutai oi bovavai, beia devavai koakoata 'eva sia oi bovavai, 'olana ia deilolovai vinaulata 'eva sia devavaia.

⁴ Eeveveai mekau namata dedo'o 'au inoku kau voutai dene'eta 'au, beia ia sibota 'eva sia de'ula imata li'uli'una kai beabia isi beduluta.

⁵ Eta dava devavai boutai 'eva kau beikata davata, puka kabukabuna luvata deleleta eta 'ola davatai meamea laloanai ba'ufai dedo'o 'au 'eva devanamata maivaka eta meamea tubu'ata valota 'eva lakavaikata.

⁶ Nadu 'abutai 'eva mia'au davata nama'ita ulata de'ula, maivaka lo'e laloatai mia'au davata mediata umauta deula veni.

⁷ Eta ula 'eva tavatava 'abutai kau betata'u bevanama'inata mai 'olata be'aku mai bediaka ia 'eva vaikabasi kauta.

⁸ Beia oi 'eva kau sia be'aemui vaikabasi kaumui, 'olana oi emui vaikabasi kauna 'eva ka'onamo maivaka oi boumuiai 'eva a'a mai kadi.

⁹ Kanobatai sia kau ka oi bo'aea kamamui, 'olana oi kamamui 'eva ka'onamo vutuvutuai emimia.

¹⁰ Maivaka sia bediaka, oi 'eva 'ola kaumui, 'olana oi emui 'ola kauna 'eva ka'onamo, Keliso.

¹¹ Viloamuiai kau ka namana be'ao kauna kanaua 'eva oi emui da'ala abi kaunai be'ao.

¹² Kau ka sibona evanamala kauna 'eva Dilava betata'u ia bevakikia, ia sibona evakikia kauna Dilava betata'u ia bevanamala."

Iesu Palisea Eta Dede Koakoata Daitai E'ovenita.

(Mk 12.40; Lk 11.39-42, 44, 52; 20.47)

¹³ Talavatu 'ola kaumui mai Palisea kaumui oi dede kaumui, kevamuiai besi'avana vaika, Dilava ena lovia vanuana nutualana kau vailatai oi o'alavua, oi sibomui sia oi odododo maivaka kau de'ula bedododo kauta oi o'alavuta.

¹⁴ Talavatu 'ola kaumui mai Palisea kaumui, dede kaumui, kevamuiai besi'avana vaika, obu eta luma oi ovadoeta, emui meamea oiova laka'ina inoku kau oiova akuleata. Kanaua 'ounai mekau namana oi boabia.

¹⁵ Talavatu 'ola kaumui mai Palisea kaumui oi dede kaumui, kevamuiai besi'avana vaika, kanobata itoinai oi oda'aia kau ibanomui kautai oi ovaoota, inoku kanaua oi ovavaia 'eva kau ena si'avana melala lua oi ovanamala ia beda'a 'alova sia ebo'o kovo 'abuna oi boimui.

¹⁶ Maka 'ede ivada'ata kaumui, kevamuiai besi'avana vaika, oi odiaka kau ka lo'e kabukabuna vanai beluva 'ana'i 'eva lovana sia oi boakua, beia kolo lo'e kabukabuna laloanai davana vanai beluva 'ana'i 'eva oi boabi 'inia.

¹⁷ Oi obo'o maivaka makamui de'ede, davana 'eva namana? Kolo 'o lo'e kabukabuna kolo evakabukabua davana?

¹⁸ Mai oi odiaka, kau ka vala kabukabuna vanai beluva 'ana'i 'eva lovana sia oi boakua, beia ainama davana vala kabukabuna akanai vanai beluva 'ana'i 'eva oi boabi 'inia.

¹⁹ Oi a o'ede koma, davana 'eva namana? Ainama davana vala kabukabuna akanai 'o vala kabukabuna ainama davana evakabukabua davana?

²⁰ Kanaua 'ounai vala kabukabuna vanai eluva 'ana'i kauna 'eva vala kabukabuna mai akanai demimia davata boutai vatai eluva 'ana'i.

²¹ Maivaka lo'e kabukabuna vanai eluva 'ana'i kauna 'eva lo'e kabukabuna mai laloanai emimia kauna vanai eluva 'ana'i.

²² Maivaka vutuvutu vanai eluva 'ana'i kauna 'eva Dilava ena mia'au davana mai emia'au kauna vanai eluva 'ana'i.

²³ Talavatu 'ola kaumui mai Palisea kaumui oi dede kaumui, kevamuiiai besi'avana vaika, loba ianita iani devadia'a davata 'eva oi ova'oukata ka'o ka'o oi oveveni Lovia namana ena valalo ai, beia talavatu vinalata namata, komolo, vilalo mai abiveni oi obolabolata, inoku katania oi bomavavai 'eva bomanama'ina, kataua vaka sia oi bomabolabolata.

²⁴ Maka 'ede ivada'ata kaumui, diudiu vaeavaea ai oi o'adoa isi ia sisi vana kamela 'eva oi odonoa.

²⁵ Talavatu 'ola kaumui mai Palisea kaumui oi dede kaumui, kevamuiiai besi'avana vaika, 'ou mai nau mulita oi odeinita beia nuata 'eva vinoa mai idonoai oi oabi davatai devonu.

²⁶ Palisea kaumui makamui de'ede, 'ou mai nau nuata odeinita makava inoku mulita vaka 'ani bemakamaka.

²⁷ Talavatu 'ola kaumui mai Palisea kaumui oi dede kaumui, kevamuiiai besi'avana vaika, oi 'eva mitava deva'ideva'ita boita, mulita 'eva demakamaka beia laloata 'eva ba kauta kuliata mai pedata boutai ai devonu.

²⁸ Dala vitaitanai kau oi kauanumui de'ika 'eva komolo kaumui boina, beia nuamui 'eva dede mai si'avanai devonu.

Iesu Palisea Eta Mekau Eluva Vaia Makava.

(Lk 11.47-51)

²⁹ Talavatu 'ola kaumui mai Palisea kaumui oi dede kaumui, kevamuiiai besi'avana vaika, enolea kauta eta mitava oi ovavai kave'i mai komolo kauta eta mitava oi ovavelavelata kave'i.

³⁰ Oi odiaka, 'Kubumui eta melalai lai amapulu koanai enolea kauta deakubata laloanai lai 'eva sia bamaduluta.'

³¹ Kanaua'i 'eva oi sibomui oi o'umuidae, oi 'eva enolea kauta deakubata kauta 'ava'avata.

³² Kubumui kamamui eta si'avana demakavala davana oi bovaolea kave'i.

³³ Oi 'eva kau'asi mai kau'asi nakuta kaumui, Dilava e'oumui 'abu oi boda'ala 'abuna 'alova sia ebo'o kovo kanaua enai a oi boveau 'akauma koma?

³⁴ Enolea kauta, aoneka kauta mai vaikabasi kauta basinita bevasi kevamui, vaida oi boakubata, vaida au ido'o valaunai oi bokokota 'au, vaida lo'e laloatai oi bo'odita, maivaka vanua ka ai oi bolo'ota beda'a vanua ka.

³⁵ Kanaua 'ounai komolo kauta lalata boutai kanobata akanai de'itabu mekauna 'eva oi akamuiiai be'ovu, vinala komolo kauna Abela lalanai bemakavala beda'amo Belekia nakuna Sekalaia, ia 'eva lo'e kabukabuna mai vala kabukabuna viloaatai oi oaku bala kauna enai bepupua.

³⁶ Lau oi luva umauna a'oumui, akuaku katania boutai eta mekau 'eva ulu kanania kauta akatai be'ovu.

Iesu Ielusalemia Ekanidiala. (Lk 13.34-35; 19.41-44)

³⁷ Ielusalema e, Ielusalema e, enolea kauta oakubata maivaka Dilava veauneke kauta esinita devasi kevamu kauta bika'ai oakuta, melala vaida a'ula nakumu bavavalalota itani 'o'oloko ka vanina venunai nakuna epakakaita boina, beia sia 'o'ula.

³⁸ Kanaua 'ounai emu lo'e kabukabuna 'eva bavikania 'avaea maivaka be'aku.

³⁹ Lau oni a'oumu, sia boika'u 'udai beda'amo oni bodiaka, "Dilava betata'u Lovia namana vanai easi kauna bevanama'inala!"

24

Iesu Lo'e Kabukabuna

Be'eko Valina Ekava.

(Mk 13.1-2; Lk 21.5-6)

¹ Iesu lo'e kabukabunai ela'asi dalai eda'a laloanai ibanona kauta deda'a ilulao kevana inoku lo'e kabukabuna lumana lovana deaku.

² Iesu ia e'outa ediaka, "Dava katania boutai oi oikata? Lau oi luva umauna a'oumui, bika'a ka bika'a ka akanai sia beno'au bemimia, boutai 'eva be'ekoasi be'ovu."

Iesu Ediaka, Mekau Dounamo Bepupulu.

(Mk 13.3-13; Lk 21.7-19)

³ Iesu olive lolonai emia divo laloanai ibanona kauta vunivunia deda'a kevana delavuaia dediaka, "'Oumai, dava katania aida bepupulu? Emu mue'udai maivaka kanobata to'ona koana 'eva a boina?"

⁴ Iesu eta luva evamuea ediaka, "Oi bo'imamui kave'i, kau ka asi'i emalebamui.

⁵ 'Olana lau vau'ai kau doutamo be'asi beluluva bediaka, 'Lau 'eva Keliso kanania,' inoku kau doutamo belebata.

⁶ Kualii 'uluta mai valita oi bo'ika koanai nuamui sia bebabata, dava kataua boita bepupulu beia to'ona 'eva vailai.

⁷ Kanobata ka betata'u kanobata ka bekualivenia, iduvu ka betata'u iduvu ka bevaiviivia. 'Abu edeata edeatai vikolo bepupulu mai 'abu dounamoai kanokau bepupulu.

⁸ Katania boutai 'eva melo epupulu anaanana makavana boina.

⁹ Inoku oi 'eva bevuamui beda'a beva anaanamui, beakubamui, lau dai'uai kanobata boutai oi bevaiviivimui.

¹⁰ Melala kanaua'i kau doutamo eta abiveni be'ekoasi kaka sibota venita beveni kouta bekokou, maivaka bevaiviivita.

¹¹ Inoku enolea kauta dedeta doutamo bela'asi kau doutamo belebata.

¹² Si'avana vinaulana 'eva namana be'ao 'ounai kau doutamo eta lalo'au bebadebade.

¹³ Beia belava 'ini beda'a to'onai kauna 'eva maui beabia.

¹⁴ Dilava ena lovia vanuana valina nama'ina kanania 'eva kanobata itoina laloanai beilolo vaia, iduvu boutai beikabasi, inoku mulinai kanobata to'ona be'asi.

Melala Si'avana Vaika.

(Mk 13.14-23; Lk 21.20-24)

¹⁵ Kanaua 'ounai kaivakuku si'avana vaika kanaua enolea kauna Daniela luvana eluva davana 'abu kabukabunai belavadivo oi boikala koanai, (vaku vaku kauna emaikabasi.)

¹⁶ Iudai demimia kauta kataua 'eva beveau lolo beda'ala.

¹⁷ Kau luma 'uvinai kauna 'eva sia be'ovu luma laloanai ena dava be'abi.

¹⁸ Mai kau lobai kauna 'eva sia bemumue ena lumai ena tubu'a iabina bedada'a.

¹⁹ Melala kataua laloatai 'a'ate maibo'ata mai melo 'oma'omata devabaeta 'a'ateta etai 'eva besi'avana vaika.

²⁰ Oi bomeamea Dilava kele'enai, asi'i oi oma veau ovo 'elu melalanai 'o melala kabukabunai.

²¹ 'Olana adedua nama vaikana bepupulu, kanobata emakavala easi mo vali'u kanaua boina sia ka epulu, muliai vaka vitaitana sia ka bepupulu.

²² Dilava melala kataua sia bemavato'oto'ota koanai sia kau ka bema-mauli, beia ia edilata kauta daitai melala kataua 'eva bevato'oto'ota.

²³ Melala kanaua'i kau ka be'oumui bediaka, 'Oikaia, Keliso kanania', 'o 'Ia kanaua,' koanai sia oi bovamomo'aia.

²⁴ 'Olana Keliso dedeta mai enolea dedeta 'eva bela'asi vatabulovo vin-aulata mai koa namata bevavai, Dilava edilata kauta vaka belebata bedaia.

²⁵ Oi bolalovai 'inia Lau 'ani avaikabasimui makava.

²⁶ Kanaua 'ounai ia be'oumui bediaka, 'Keliso ua'i kano'akunai' koanai sia oi bodada'a, 'o 'Ia laloai nia', koanai sia oi bovamomo'aia.

²⁷ 'Olana Lau Kau Nakuna e'u asi koana 'eva itani vutuvutu daeai e'amalea edada'amo divoai boina.

²⁸ Ba kauanina a'i e'eno 'abunai, 'e'ekavala vaka ua'i bevaboua.

Lau Kau Nakuna E'u Asi.

(Mk 13.24-27; Lk 21.25-28)

²⁹ 'Melala kataua adeduata be'ole mulitai komolonai melala bevabula, vuia sia bekakala, visiu vutuvutuai be'ekoasi, mai vutuvutuai siavu davata boutai be'iuvai 'iuvai.

Isa 13.10, 34.4

³⁰ Inoku Lau Kau Nakuna e'u asi koana 'eva vutuvutuai bela'asi, inoku kanobata kauta boutai 'eva bekakani, Lau Kau Nakuna siavu mai nuavi namana laloanai oli akatai ba'asi beika'u.

³¹ Bisi beuvanita 'uluta namata laloanai e'u anelu basinita vutuvutu to'onai beda'a vutuvutu to'ona vanina vani laloatai adilata kauta bevalalota.

'Ovai Ikabasi Eka'abia.

(Mk 13.28-31; Lk 21.29-33)

³² 'Ova auna enai ikabasi oi boabia. Bosi betutua 'au koanai, oi 'ani boikabasi avala 'ani ekevai.

³³ Dala vitaitanai dava katanai oi boikata koanai, oi 'ani boikabasi melala 'eva 'ani ekevai lau 'eva 'ani nutuala kele'enai.

³⁴ Lau oi luva umauna a'oumui, ulu kanania sia bebapalu beda'a mo dava katanai boutai bepupulu.

³⁵ Vutuvutu mai kanobata 'eva betaule, beia lau e'u luva 'eva sia betaule.

Sia Kau Ka Eikabasi

Melala Davanai.

(Mk 13.32-37; Lk 17.26-30, 34-36)

³⁶ E'u asi melalana maivaka melala koana sia kau ka eikabasi, vutuvutu aneluta sia deikabasi Nakuna vaka sia eikabasi, ia Kama'u sibona mo eikabasi.

³⁷ Noa ena melalai boina, lau kau nakuna e'u asi melalana vaka kanaua bekoma.

³⁸ Abaka namana asido'omo ela'asi laloanai kau 'eva deaniani, deinuinu mai dekamooane eda'a mo melala kanaua'i Noa aunakoi ai edodo.

³⁹ Sia deikabasi kovo dava bepupulu eda'a mo abaka namana ela'asi, inoku boutai dedono ba. Lau kau nakuna e'u asi melalanai vaka kanaua bekoma.

⁴⁰ Melala kanaua'i kau lua lobai bevinaula, Dilava betata'u ka'onamo beabia isi banona bevikania.

⁴¹ Ateate lua witi iuduna bika'ana be'iloa laloanai, Dilava betata'u ka'onamo beabia isi banona bevikania.

⁴² Kanaua 'ounai makamui be'ata 'olana emui Lovia namana ena asi melalana 'eva sia oi oikabasia.

⁴³ Beia kanania oi bolalovai 'inia, luma 'uala kauna bemaikabasi melala koana davanai vinoa kauna be'asi koanai ia 'ani makana bemaata, inoku ena luma sia bemava'alamaia bemaadodo.

⁴⁴ Kanaua 'ounai melala boutai oi vaka bova'olu, 'olana lau kau nakuna 'eva melala kanaua'i oi sia oabiva'ai laloanai ba'asi.

Da'alabi Kauna Nama'ina Mai Da'alabi Kauna Dedena.

(Lk 12.42-46)

⁴⁵ Dai 'eva da'alabi kauna nama'ina mai eidiba ia ena 'ola kauna betata'u bedilala ena luma i'imanai be'ao, da'alabi melota eta iani bevenita aniani melalana umaunai?

⁴⁶ Ia vinaula kanaua evavaia laloanai ena 'ola kauna bemumue beikala koanai ia bevanama'inala.

⁴⁷ Lau oi luva umauna a'oumui, 'ola kauna betata'u ia bedilala ena dava boutai i'imata kaunai bevaao.

⁴⁸ Beia da'alabi kauna si'avana vaika 'eva bediaka, 'E'u 'ola kauna asido'o easi.'

⁴⁹ Inoku ia betata'u banona da'alabi kauta beakuta maivaka inuina kauta ita beaniani mai beinuina ka'ona.

⁵⁰ Melala ka da'alabi kauna kanaua ena 'ola kauna sia elalovaia maivaka melala koana sia eikabasia laloanai ia be'asi.

⁵¹ 'Ola kauna betata'u ia beaku si'ala belo'oa la'asi dede kauta ita 'abu ka'onamoai, ua'i ia bekakani mai 'asi'asina beala'oi ala'oi."

25

Luva Ivavitaitana Vato 'Ouka.

¹ "Melala kanaua'i Dilava ena lovia vanuana 'eva itani vato 'ouka boita, eta lamepa deabi deda'a kamoane makamaka kauna ita bevidavali.

² Ima 'eva debo'o ia ima 'eva deidiba.

³ Inoku bo'o vavatota eta lamepa deabita, beia kelesini kalita sia vaida deabi.

⁴ Idiba vavatota eta lamepai kelesini delai inoku kelesini kalita deabi.

⁵ Kamoane makamaka kauna 'eva sia ali easi, inoku vavato makata demuinai delatolao delatomai inoku denodivo demuinai.

⁶ Malolua umaunai vaoui 'uluna de'ika ediaka, 'Kamoane makamaka kauna 'ani e'asi, ola'asi ita oi bovidavali.'

⁷ Inoku vavatota boutai deibi deko'isi, eta lamepa devavai kave'i.

⁸ Inoku bo'o vavatota deta'u aoneka vavatota denoita dediaka, 'Emui kelesini vitalua ovenimai ke emai lamepa 'ani debobo'o.'

⁹ Ia eta luva devamuea dediaka, 'Asi'i. Oi mai lai ita ekalai 'eva sia bedaia. Nama'ina 'eva oda'a detatava 'abunai emui vitalua otava.'

¹⁰ Inoku vavatota deda'a tavatava 'abuna laloanai kamoane makamaka kauna ela'asi, deva'olu vavatota ima sibota deda'a kamoane naduna laloanai dedodo inoku nutuala de'alavua.

¹¹ Mulinai bo'o vavatota deasi inoku de'ae'ae dediaka, "Ola kaumu e, 'Ola kaumu e, nutuala luvua laibadodo.'

¹² Beia ia eta luva evamuea ediaka, 'Lau oi luva umauna a'oumui, lau oi sia aikabasimui.'

13 Kanaua 'ounai makamui be'ata, melalana mai melala koana 'eva sia oi oikabasia.

Luva Ivavitaitana Da'alabi Kauta Koi Moni De'ima.
(Lk 19.11-27)

14 Inoku Dilava ena lovia vanuana 'eva kanania boina. Itani kau ka kalima bedada'a 'abu dau'anai boina, ena da'alabi kauta e'aeta, e'outa ena dava boutai be'imata.

15 'Ola kauna kanaua eta'u ena da'alabi kauta ka ka eta kula'ila vitaitatai kolo monina evenita, ka kolo monina ima evenia, ka kolo monina lua, ka 'eva kolo monina ka'onamo evenia inoku ia kalima eda'a.

16 Kolo monina ima eabiata kauna 'eva komolonai eda'a vinalana evavaia inoku akanai kolo monina ima evavai.

17 Kolo monina lua eabita kauna vaka kanaua ekoma, inoku akanai kolo monina lua evavai.

18 Beia kolo monina ka'onamo eabia kauna eda'a 'uli e'uaia inoku 'ola kauna ena moni ekoleia.

19 Melala edau'a mulinai da'alabi kauta kataua eta 'ola kauna emue easi ena moni lavuaita elavuai.

20 Kolo monina ima eabi kauna kolo monina ima akatai ita eabita easi ediaka, "Ola kaumu e, kolo monina ima oveni'u. Inoku ikala, akanai kolo monina ima katania avavaita.'

21 'Ola kauna ediaka, 'Da'alabi kaumu mediamu vinala komolo kaumu, vinala ovavai kave'i, dava kikita o'ima kave'i 'ounai vali'u dava namata i'imatai bavaaomu. Mai e'u lalonama laloonai dodo.'

22 Kolo monina lua eabi kauna vaka easi ediaka, "Ola kaumu e, kolo monina lua oveniu. Inoku ikala, akanai kolo monina lua katania avavaita.'

23 'Ola kauna ediaka, 'Da'alabi kaumu nama'imu vinala komolo kaumu, vinala ovavai kave'i, dava kikita o'imata kave'i 'ounai vali'u dava namata i'imatai bavaaomu. Mai e'u lalonama laloonai dodo.'

24 Beia kolo monina ka'onamo eabia kauna easi ediaka, "Ola kaumu e, lau aikabasi oni 'eva kau pasisimu, kau edeata devadovado 'abutai o'ua'ua mai kau edeata kea dekapo odaoda 'abutai ovalalovalalo.

25 Kanaua 'ounai lau amakau ada'a emu kolo monina ka'onamo kano laloonai akoleia inoku abia a'asi. Ikala oni emu kolo moni 'abunai mo kanania.'

26 'Ola kauna ediaka, 'Da'alabi kaumu si'avamu vaika maivaka balea kaumu, oni olaloavaia lau kau vaida devadovado 'abutai a'ua'ua mai kau dekapo odaoda 'abutai avalalovalalo, una?

27 Kanaua boina koanai moni i'uleta 'abunai homane'edivo inoku amue'udai asi koanai akanai kikina ka bemapulu ita bamaabi ka'ona.

28 Vali'u kele'enai kolo monina ka'onamo 'eva obuku vaia, kolo monina 'ouka eabi kauna ovenia.

29 'Olana maiena kauna 'eva doutamo bavenia, ena dava bedoutamo vaika, beia etabu kauna 'eva kikina kele'enai emimia davana vaka babuku vaia.

30 Da'alabi kauna kanania ena nama'ina asi'i oioia asi eda'a 'abu vabulanai ua'i bekakani mai 'asi'asina beala'oi ala'oi'.

Lavuaita Namana To'ona Umauna.

31 Lau kau nakuna mainuavi'u e'u anelu boutai ita lai ba'asi koanai e'u mia'au davana nuavina akanai bamia'au.

32 Kanobatai iduvu boutai lau vaila'uai bevaboua, inoku lau batata'u kau bava'alamata, mamoe 'ima kauna mamoe mai nani eva'alamata boina.

³³ Lau batata'u mamoe 'eva idiba'u avekenai bane'etadivo, nani 'eva 'eali'u avekenai bane'etadivo.

³⁴ Inoku lau Lovia 'olana batata'u idiba'u avekenai kauta ba'outa badiaka, 'Kama'u evanama'namui kaumui, omai kanobata evavaia koanai vutuvutu vanuana kanania eva'olua oi emui oabia avumui ai be'ao.

³⁵ 'Olana lau avikolo 'eva oi iani oveni'u ani, vei ba'u aba 'eva oi vei oveni'u ainu. Lau kau edea'u 'eva oi oabi'u dae emui lumai.

³⁶ Kele'e'u tubu asi'i 'eva oi tubu'a ovavadodo'u. Lau a'olele 'eva oi lau o'ima'u. Lau vabuto'o lumanai 'eva oi oasi oika'u.'

³⁷ Inoku komolo kauta ena luva bevamuea bediaka, 'Lovia namana e, aida melalanai ovikolo inoku lai avanimu, 'o aida melalanai vei bamu oba inoku vei lai avenimu oinu?

³⁸ Aida melalanai lai aikamu kau edeana inoku lai abimu dae emai lumai, 'o aida melalanai kele'emuai tubu'a asi'i inoku tubu'a lai avenimu ovadodo?

³⁹ Aida melalanai o'olele lai a'imamu 'o ovabuto'o inoku lai avasi aikamu?'

⁴⁰ Inoku lau Lovia 'olana ia ba'outa badiaka, 'Lau oi luva umauna a'oumui. Bo'akala'u ulaluta katania ka kele'enai kanaua oi ovavaia koma koanai 'eva lau kele'e'uai vaka 'ani kanaua oi ovavaia koma.'

⁴¹ Inoku lau Lovia 'olana batata'u 'eali'u avekenai kauta ba'outa badiaka, 'Dilava evaiviivimui kaumui, kele'e'uai oda'atau oda'a eani keinikeini 'alovana deva'olua diabololo maiena melo ita eta davana kanaua laloanai ododo.

⁴² 'Olana lau vikolo eaku'u 'eva sia oi ovanani'u, maivaka vei ba'u aba 'eva vei sia oi oveni'u ainu.

⁴³ Lau kau edea'u 'eva emui lumai sia oabi'u dae, kele'e'uai tubu'a asi'i 'eva tubu'a sia ka oi ovavadodo'u. Lau a'olele 'eva sia oi o'ima'u maivaka vabuto'o lumanai 'eva sia oi oasi oika'u.'

⁴⁴ Ia vaka ena luva bevamuea bediaka, 'Lovia 'olana e, aida melalanai lai aikamu, vikolo eakumu, 'o vei bamu oba, 'o kau edeamu, 'o tubu'a kele'emuai asi'i, 'o o'olele maivaka vabuto'o lumai, inoku sia lai adulumu?'

⁴⁵ Inoku lau ia ba'outa badiaka, 'Lau oi luva umauna a'oumui, bo'akala'u ulaluta katania ka kele'enai kanaua sia oi ovavaia koma 'eva lau vaka kele'e'uai kanaua sia oi ovavaia koma.'

⁴⁶ Inoku kau kataua 'eva basinita anaana keinikeini 'abuna beda'ala, ia komolo kauta 'eva basinita mauli keinikeini 'abuna beda'ala.'

26

Iesu Iakubana Dalana Dekavuia.

(Mk 14.1-2; Lk 22.1-2; Io 11.45-53)

¹ Inoku Iesu luva katania boutai eluva vai koa mulinai ibanona kauta e'outa ediaka,

² "O'i oikabasi La'au keini naduna 'eva melala luamo vailai. Inoku lau kau nakuna 'eva veni'u beveveni kou bekokou au ido'o valaukunai akanai bekoko'u 'au bababa."

³ Melala kanaua'i kabukabu kauta namata mai Iuda eta kau namata ita kabukabu kauta 'olatai kauna vana Kaiapa ena lumai dedo'u.

⁴ Ia vunivuniai eta luva devaka'onamo aboina Iesu beabia beaku bala.

⁵ Beia ia sibota dediaka, "Nadu laloanai sia ekavavaia kau asi'i bemaviala."

Ateate Ka Deoloi

Iesu 'Olana Esisia.

(Mk 14.3-9; Io 12.1-8)

⁶ Iesu Betani ai loki kauna Simona ena lumai emia laloanai,

⁷ Ateate ka kavapu maideolona tavana namana bematavala davana eabia easi Iesu aniani 'abunai emia divo 'eva 'olanai esisia.

8 Ibanona kauta deikaia koanai debadu dediaka, “Dava 'ounai deolo kanania eitoa'au 'avaea?

9 Deolo kanania tavana namanai bematavatava vaia inoku monina ta'ovala kauta bemaivenita.”

10 Beia Iesu eikabasi dava luvana deluva 'ounai e'outa ediaka, “Dava 'ounai ateate nuana oi ovabavunua? Ia 'eva vinaula nama'ina vaika lau e'uai evavaia.

11 Ta'ovala kauta 'eva melala boutai oi kevamuiai bemimia, beia lau 'eva sia melala boutai kevamuiai bamimia.

12 Deolo kanania ia esisia lau kau'uai 'eva ikole'u vinalana eva'olua vaika.

13 Lau oi luva umauna a'oumui, kanobata itoinai laloanai vali nama'ina kanania beilolo vaia 'eva ateate vinala kanania evavaia vinalana 'eva be'oua ia ilalovainai be'ao.”

Juda Eda'a Veni Beveveni

Mai Kou Bekokou.

(Mk 14.10-11; Lk 22.3-6)

14 Melala kanaua'i ibanona kauta 'ouka lua (12) banota ka vana Iuda Isakaliote kauna 'eva eda'a kabukabu kauta namata kele'etai,

15 elavuaita ediaka, “Iesu imamuiai baudala koanai dava oi boveni'u?” Inoku siliva monita 'ouka koi (30) devaku devenia.

16 Melala kanaua easi laloanai Iuda dala ekavu melala mediana davanai Iesu ia imatai beudala.

Iesu La'au Keini Ianina

Ibanona Kauta Ita Deani.

(Mk 14.12-21; Lk 22.7-14, 21-23; Io 13.21-30)

17 Palaoa 'avaeana naduna melalana lava'ana'inai, ibanona kauta deasi Iesu kevana delavuaia dediaka, “La'au keini naduna ianina a'i lai bava'olua boania?”

18 Ia eta luva evamuea ediaka, “Oda'a vanuai kau kanaua kele'enai oi bo'oua bodiaka, 'Emai vaikabasi kauna ediaka, “E'u melala 'ani ekevai, lau mai ibano'u kauta ita emu lumai La'au keini naduna lai bavavaia.”

19 Kanaua 'ounai ibanona kauta Iesu e'outa vinalana vitaitanai devavaia, La'au keini naduna ianina deva'olua.

20 Elavilavi koanai Iesu mai ibanona kauta 'ouka lua ita aniani 'abunai demiadivo deaniani.

21 Deaniani laloanai ia ediaka, “Lau oi luva umauna a'oumui, oi ka 'eva lau veni'u boveveni mai kou'u bokokou.”

22 Ibanona kauta devilalo si'asi'a ka ka delavuaia dediaka, “Lovia namana e, olalovaia lau, una?”

23 Ia ediaka, “Kau kanaua imana mai lau ima'u nau ka'onamoai lai auda ka'ona kauna veni'u beveveni mai kou'u bekokou.

24 Lau Kau Nakuna 'eva Puka kabukabunai deleleia vitaitanai bababa, beia kau nakuna venina beveveni mai kouna bekokou kauna enai 'eva besi'avana vaika, ia sia bemapulu 'eva bemanama'ina.”

25 E'ouia kauna Iuda ediaka, “Vaikabasi kaumu e, olalovaia lau, una?” Iesu ediaka, “Ani oluva mo kanana.”

Lovia Namana Ena Anibou.

(Mk 14.22-26; Lk 22.15-20; 1Kl 11.23-25)

26 Ia deaniani laloanai Iesu palaoa eabia evanama'inala inoku ekovia, ibanona kauta evenita inoku ediaka, “Oabia oania, kanania 'eva lau kauani'u.”

27 Inoku 'ou ka eabia evanama'inala evenita ediaka, “Boumuiai kanania oinuia.

²⁸ Kanania 'eva lau lala'u, luva 'ana'i lalana kau mato daitai be'itabu si'avana i'ou kaona.

²⁹ Lau oi a'oumui, vine veina kanania lau sia bainua 'udai beda'a mo Kama'u ena vanuai vine veina makamakana oi ita ekainua ka'ona."

³⁰ Kanaua'i masi ka deabia mulinai dela'asi, deda'a Olive lolona.

Iesu Eluva 'Ana'i Petelo

Ia Be'oua Avuavu.

(Mk 14.27-31; Lk 22.31-34; Io 13.36-38)

³¹ Inoku Iesu e'outa ediaka, "Vali'u boni kanania'i emui abiveni be'ekoasi inoku oi bovikani'u, 'olana Puka kabukabunai 'ani ilelena, 'Lau mamoe i'imana kauna baku bala inoku mamoe 'itona 'eva beveau siusiu."

³² Beia lau bako'isi 'udai mulinai lau 'eva ba'ana'ia bada'a Kalilea vakaia oi bodada'a."

³³ Petelo eko'isi ediaka, "Ama'i boutai oni bevikanimu inoku beveau ovo, lau 'eva oni sia bavikanimu kovo."

³⁴ Iesu Petelo ena luva evamuea ediaka, "Lau oni luva umauna a'oumu, vali'u boni kanania'i o'oloko asido'omo be'alala laloanai, oni melala koi lau bo'ou'u avuavu. Bodiaka oni lau sia oikabasi'u."

³⁵ Petelo mune'e ediaka, "Luvana asi'i, laluaana kamaba ka'ona, beia lau 'eva oni sia ba'oumu avuavu." Inoku ibanona kauta vaka luva ka'onamo kanaua deluvaia.

Iesu Ketesemaneai Emeamea.

(Mk 14.32-42; Lk 22.39-46)

³⁶ Iesu ibanona kauta ita deda'a 'abu vana Ketesemane, inoku e'outa ediaka, "Lau bada'a ua'ia'i bameamea laloanai oi 'eva nia'i oi bomimia."

³⁷ Ia Petelo mai Sebedeo nakuna luana evada'ata deda'a. Inoku ia 'eva evilalo vaika mai nuana eanana,

³⁸ inoku e'outa ediaka, "Lau nua'u 'eva eanana vaika itani bamaba. Nia'i oi bomimia makata be'ata inoku ekavi'ima."

³⁹ Eda'a ilulao laloanai kanoai epakadivo emeamea ediaka, "Kama'u e, kele'emuai bedaia koanai anaana 'ouna kanania e'uai bomabia ovo. Beia ousa venia davana bovavaia, ia sia lau e'u ula bovavaia."

⁴⁰ Inoku emue 'udai easi ibanona kauta kele'etai 'eva demuina eikata, ia eta'u Petelo e'ouia ediaka, "Dava 'ounai oi kakoina mai lau melala koana ka'onamo sia kavi'ima?"

⁴¹ Oi bovi'ima oi bomeamea ivakovo laloanai asi'i oi omadodo 'ounai. Idumemui 'eva de'ula beia kauanimumi 'eva debadebade."

⁴² Emue eda'a melala ivaluana emeamea 'udai ediaka, "Kama'u e, anaana 'ouna kanania iabi ovona dalana asi'i koanai banana. Inoku emu ula vinalana bepupulu."

⁴³ Emue easi koanai demuina eikata 'udai 'olana makata demuina vaika.

⁴⁴ Kanaua 'ounai evikanita emue melala ivakoina emeamea, luva ka'o ka'o mo kataua eluva 'udai.

⁴⁵ Inoku emue 'udai easi ibanona kauta kele'etai e'outa ediaka, "Oi omuina mai lamui oi o'ani do'o mo? Oikaia, melalana 'ani eabia, lau Kau Nakuna 'eva 'ani si'avana kauta imatai beuda'u.

⁴⁶ Oko'isi, kada'a. Oikaia veni'u eveveni kou'u ekokou kauna 'ani e'asi."

Iesu De'abia Delioia.

(Mk 14.43-50; Lk 22.47-53; Io 18.3-12)

⁴⁷ Iesu eluva do'omo laloanai ibanona kauta 'ouka lua banota ka Iuda ela'asi, kau doutamo ita lepo mai uku deabita deasi. Ia 'eva kabukabu kauta namata mai Iuda eta kau namata desinita kauta.

48 Veni mai kou ekou kauna koa ka evaikabasita ediaka, “Baba'ua kauna 'eva kauna mo kanaua oi boabia.”

49 Iuda komolonai eda'a Iesu kevana ediaka, “Vaikabasi kaumu e, oni onama'ina?” Inoku eba'ua.

50 Iesu Iuda ena luva evamuea ediaka, “E'u kau e, oasi vaia vinalana vavaia.” Inoku deda'a deilulao kau deasi dela'asi Iesu deabi 'inia delioia.

51 Inoku Iesu debanoia kauta ka ena lepo evelia asi kabukabu kauta akatai kauna ena da'alabi kauna ka kaiana epaia ovo.

52 Iesu ia e'ouia ediaka, “Emu lepo 'abunai 'ulea, 'olana lepoai deviaku kauta boutai lepoai bebaba.

53 Lau kama'u bamanoia koanai ia komolonai anelu iduvuna 'ouka lua kuali aneluta sinavu boutai kalakoi navui (6,000) bemasinita bemaasi keva'u 'eva sia oi oikabasi, una?

54 Kanaua bemapulu koma koanai, Puka kabukabunai deleleia lau e'uai bepulu dokadoka davana 'eva a bemomo'ai koma?”

55 Melala ka'onamo kanaua'i Iesu eta'u do'u kauta e'outa ediaka, “Lau vinaovinao kau'u 'ounai oi imamui mai lepota mai maiukuta oi o'asi oi boabi'u, una? Melala bounai lau 'eva oi ita lo'e kabukabuna laloanai kambia avaikabasi, beia sia oi oabi'u olio'u.

56 Beia enolea kauta eta lelelele bemomo'ai 'ounai katania boutai kanania depulu koma.”

Inoku ibanona kauta boutai Iesu devikania deveau 'akauma.

Iesu Lavuai 'Abunai Elavadivo.

(Mk 14.53-65; Lk 22.54-55, 63-71; Io 18.13-14, 19-24)

57 Kau kataua Iesu deabia 'eva devuaia deda'a kabukabu kauta akatai kauna Kaiapa kevana, talavatu 'ola kauta mai Iuda eta kau namata 'eva ua'i deakubou ka'ona.

58 Beia Petelo mulitai dau'ai eda'a, deda'amo kabukabu kauta akatai kauna ena ala laloanai deda'adodo. Ia edodo 'abu de'imala kauta ita demia dava bepupulu 'eva beikala.

59 Kabukabu kauta namata mai talavatu 'ola kauta dede luvata dekadu Iesu va'eva 'abunai bene'eadivo bevabala.

60 Kau doutamo dela'asi dede luvata enai deluva, sia dava ka dedavalia inoku to'onai 'eva kau lua dela'asi,

61 dediaka, “Kau kanania ediaka Dilava ena lo'e kabukabuna 'eva bevelia'ovu inoku melala koi laloatai bevalavala 'udai.”

62 Kabukabu kauta akatai kauna eko'isi Iesu elavuaia ediaka, “Mai emu luva ka? Kau katania ivava'evamu luvana deluvala 'eva eta luva tavana bovamuea 'o asi'i?”

63 Beia Iesu sia luva ka eluvavaia. Kabukabu kauta akatai kauna e'ouia 'udai ediaka, “Mauli Dilavana vanai alavuaimu luva umauna boluvala. Oni 'eva Keliso Dilava nakuna koanai, luva!”

64 Tesu ediaka, “Ani oluva mo kanana. Boumuiai a'oumui, vali'u melala kanania'i mai vaila eda'ala laloanai lau Kau Nakuna 'eva siavu Dilavana idibanai bamimia mai vutuvutu vanuanai oli akanai ba'asi oi boika'u.”

65 Inoku kabukabu kauta akatai kauna sibona ena tubu'a e'idia ediaka, “Ia 'eva Dilava vana evavaia si'asi'a. Dava 'ounai vamomo'ai luvata kakakavu? Vali'u sibomui kaimuiai Dilava vana evavaia si'asi'a lalena 'ani oi oika.

66 Oi dava oi oko?” Kau ena luva devamuea dediaka, “Ia 'eva eva'eva 'ounai bebaba.”

67 Inoku Iesu vailana de'anodia mai deakuia, mai vaidi depi'aia,

68 dediaka, “Oni Keliso, 'oumai dai epi'amu kauna 'oua dae.”

*Petelo Iesu E'ouia Avuavu.**(Mk 14.66-72; Lk 22.56-62; Io 18.15-18, 25-27)*

⁶⁹ Boni kanaua'i Petelo 'eva ala laloanai luma vailanai emia, inoku da'alabi vatona ka easi kevana e'ouia ediaka, "Oni vaka Iesu Kalilea kauna obanoia."

⁷⁰ Petelo kau boutai vailatai e'ou avuavu ediaka, "Lau sia aikabasi oni dava luvana oluluva."

⁷¹ Inoku Petelo ela'asi eda'a nutuala aunai, ua'i da'alabi vatona edeana ka ia eikaia inoku kau e'outa ediaka, "Kau kanania 'eva Iesu Nasaleta kauna ebanoia."

⁷² Petelo mune'e e'ou avuavu 'udai eluva pasisi ediaka, "Aka kauna eikabasi, lau kau kanaua sia aikabasia."

⁷³ Melala sia edau'a mulinai ua'i delava kauta deda'a Petelo kevana dediaka, "Luva umauna oni vaka banota ka, 'olana oni emu luvaluva 'ulunai lai aikabasi."

⁷⁴ Inoku ia eluva pasisi ediaka, "Aka kauna eikabasi luva umauna a'oumui. Asi'i koanai Dilava beva anaana'u. Kau kanana lau sia aikabasia." Komolonai o'oloko e'alala.

⁷⁵ Inoku Petelo Iesu ena luva eluvaia luvana elaloia une, "O'oloko asi do'omo be'alala laloanai oni melala koi bo'ou'u avuavu." Kanaua'i ela'asi eda'a mulimuliai ekani si'asi'a.

27*Iesu Devuaia Deda'a**Pilato Kevana.**(Mk 15.1; Lk 23.1-2; Io 18.28-32)*

¹ 'Avu'avuni vabulanai kabukabu kauta namata mai Iuda eta kau namata boutai lova deaku luva devaka'onamoa Iesu bevabala.

Inoku Iesu delioia devada'ala deda'a Kavana kauna Pilato imanai deudai.

*Iuda Ena Ba.**(Vn 1.18-19)*

³ Beia Iuda veni mai kou ekou kauna Iesu eikaia va'eva ai de'uileia mai bebaba koanai elalo vunu, Siliva monina koi navui eabita eda'a kabukabu kauta namata mai Iuda eta kau namata bevenita,

⁴ ediaka, "Lau 'ani si'avana avavaia, 'olana ena va'eva asi'i kauna venina aveni kouna akou." beia ena luva devamuea dediaka, "Kanaua 'eva sia lai ia oni sibomu emu mekau."

⁵ Kanaua 'ounai Iuda moni kataua lo'e kabukabuna laloanai ekapota dodo inoku ia ela'asi eda'a sibona edo'o ba.

⁶ Kabukabu kauta namata moni deabi isi inoku dediaka, "Kanania 'eva ita eta talavatu, moni kanania lo'e kabukabuna mauanai sia ekaudala 'olana ba tavanai eao."

⁷ Moni kanaua lovana deaku mulinai 'eva vodu vavai kauna kele'enai kano detavaia, kano kanaua 'eva kau edeata eta mitavai be'ao.

⁸ Kanaua 'ounai kano vana de'aeia 'Lala Kanona' easi mo vali'u.

⁹ Telemia enolea kauna eluvavaia luvana 'eva easi emomo'ai ediaka, 'Isalaela kauta tava de'ouia ia tavanai be'ao davana Siliva monina koinavui deabia,

¹⁰ inoku moni kanaua vodu vavai kauna ena kano detavaia Lovia namana e'ou'u vitaitana.'

*Pilato Iesu Elavuaia.**(Mk 15.2-5; Lk 23.3-5; Io 18.33-38)*

11 Melala kanaua'i Iesu Kavana vailanai elavadiwo, Kavana kauna eta'u Iesu elavuaia ediaka, "Oni 'eva Iuda kauta eta lovia 'olana, una?" Iesu ia ena luva evamuea ediaka, "O, 'ani oluvalamo kanana."

12 Beia kabukabu kauta namata mai Iuda eta kau namata vuvua devakoala koanai Iesu sia luva ka eluvaia.

13 Inoku Pilato eta'u Iesu e'ouia ediaka, "Luva edeata edeatai vuvua devakoamu 'eva leleta sia o'ika?"

14 Beia Iesu sia luva ka eluvaia kovo, 'ounai Kavana kauna etabulovo si'asi'a.

Pilato Ediaka Iesu Beakubala.

(Mk 15.6-15; Lk 23.13-25; Io 18.38–19.16)

15 La'au keini naduta melalatai Kavana kauna ena koakoa dainai vabuto'o kauna ka deula venia kauna 'eva bevala'asia 'avaea.

16 Melala kanaua'i vabuto'o kauna ka vana Balaba kau boutai deikabasia kave'i kauna vabuto'o lumanai emia.

17 Kau mato ua'i dedo'u laloanai Pilato elavuaia ediaka, "Oi o'ula dai bavala'asia 'avaea, Balaba 'o Iesu oi o'aea Keliso?"

18 'Olana Pilato eikabasi kave'i Iuda eta kau namata 'eva Iesu demama venia 'ounai imanai deudaia.

19 Ia lavuai mia'aunai emia laloanai adana luva esinia eda'a kevana, "Kau kanana sia maiena va'eva kevanai sia dava ka bovavaia, 'olana boniai ia anivia 'eva nua'u ebavunu si'asi'a."

20 Beia kabukabu kauta namata mai Iuda eta kau namata kau mato devaasiasita Balaba denoinoi vaia bevala'asia ia Iesu 'eva ba ai bene'eadiwo.

21 Inoku mune'e Pilato kau mato elavuaia ediaka, "Laluana katania dai oi oula venia kauna bavala'asia?" Ia ena luva devamuea dediaka, "Balaba."

22 Pilato ediaka, "Inoku Iesu oi o'aea Keliso kele'enai dava bavavaia?" Boutai dediaka, "Au ido'o valaukuna akanai bokokoa 'au!"

23 Beia Pilato elavuaia 'udai ediaka, "Dava 'ounai, va'eva dava evavaia?" Beia ia devaoi 'unu'unu dediaka, "Au ido'o valaukuna akanai bokokoa 'au!"

24 Pilato eikabasi ena siavu 'ani asi'i, inoku 'ulu namana 'ani evua. 'Ounai vei eveliamai kau mato vailatai imana edeinita ediaka, "Lau kau kanania ena ba vuona sia bakoala, nia 'eva oi sibomui emui ula."

25 Kau boutai dediaka, "Ia ena ba mekauna lai mai nakumai ita lai bakoala."

26 Inoku Pilato Balaba evala'asia eda'a kele'etai, ia Iesu evenita be'odia au ido'o valaukuna akanai bekoko 'au.

Kuali Kauta Iesu Devabo'oa.

(Mk 15.16-20; Io 19.2-3)

27 Kavana kauna ena kuali kauta Iesu deabia devuaia deda'a Kavamani lumanai, inoku kuali kauta boutai deasi delavaia kaiukaiu.

28 Ia deta'u Iesu ena tubu'a devadada ovo ia tubu'a 'aolana devavadodoia.

29 'Olanai be'ulea davana 'iniauma devavilia inoku 'olanai dene'eia 'au. Olo ka imana idibanai devaabia, vailanai dekuidula devabo'oa dediaka, "Iuda kauta eta lovia 'olana e, oni 'eva onama'ina?"

30 Inoku de'anodia olo debuku vaia, 'olanai deaku 'udai 'udai.

31 Devabo'oa mulinai tubu'a 'aolana kanaua devadadala asi, ena tubu'a umauta devavadodoia. Devada'ala au ido'o valaukuna akanai bekokoa 'au.

Iesu Au Ido'o Valaukuna Akanai Dekokoia'au.

(Mk 1.21-32; Lk 23.26-43; Io 19.17-27)

32 Kuali kauta Iesu devada'ala laloanai Kulene kauna vana Simona devavalia devasiasia Iesu ena au ido'o valaukuna bevuala.

33 'Abu kai dela'asi vana Kolokota. (Anina 'eva "Ola kuliata 'abuna'.)

³⁴ Ua'i vine veina mulamula vaimana ka ita delai ka'ona Iesu devenia beinua, edemalia kovo mo beia sia einuia.

³⁵ Kuali kauta Iesu au ido'o valaukuna akanai dekokoaia 'au mulinai sibota ena tubu'a punipunia decole.

³⁶ Kanaua mulinai demiadivo makata 'eva ia deika 'inia.

³⁷ Iesu 'olana akanai ia ivava'evana luvana deleleia 'au dediaka, 'Nia 'eva Iesu, Iuda Kauta Eta Lovia 'Olana.'

³⁸ Melala kanaua'i vinaovinao kauta lua Iesu ita ka ka eta au idau valaukuta akatai dekokota 'au, ka idibana avekenai mai ka 'ealina avekenai.

³⁹ Kau ua'i dekeini kauta 'olata deka'eka'e mai vabo'obo'o luvata Iesu de'ouia,

⁴⁰ dediaka, "Oni odiaka lo'e kabukabuna boakua mukamuka inoku melala koi laloanai bovalavala 'udai kaumu, oni Dilava nakuna koanai sibomu vamaulimu, au ido'o valaukuna akanai ovu mai."

⁴¹ Kabukabu kauta namata talavatu 'ola kauta mai Iuda eta kau namata vaka devabo'oa dediaka,

⁴² "Ia kau vaida evamaulita, beia dava 'ounai sibona sia evamaulia? Ia 'eva Isalaela eta lovia 'olana, vali'u au ido'o valaukuna akanai e'ovu emai 'eva ekabivenia.

⁴³ Ia Dilava eabivenia inoku Dilava ia eulavenia koanai vali'u evamaulia, 'olana ediaka ia 'eva Dilava nakuna."

⁴⁴ Vinaovinao kauta luana au ido'o valaukuna akanai dekokota 'au kauta vaka ia deluva pasisi venia.

Iesu Ena Ba.

(Mk 15.33-41; Lk 23.44-49; Io 19.28-30)

⁴⁵ Ado'alavuni laloanai vabuto'o namavaikana kanobata itoina e'alavua eda'amo melala elava keini koana koi.

⁴⁶ Melala koana koi laloanai Iesu evaoi ediaka, "Eloi eloi lama sabakatani!" Anina 'eva 'E'u Dilava e, E'u Dilava e, dava 'ounai 'ani ovikani'u!"

⁴⁷ Kau vaida ua'i delava lлена deika kauta dediaka, "Kau kanania 'eva Elia e'aea."

⁴⁸ Komolonai banota ka eveau eda'a dapulu ka eabia vine veina vamaianai eudaiauku, inoku auai eisia 'au Iesu beinua.

⁴⁹ Beia vaida dediaka, "Vikania, Elia be'asi bevamaulia koanai ekaikala."

⁵⁰ Iesu evaoi 'unu'unu 'udai mulinai eba.

⁵¹ Melala kanaua'i lo'e kabukabuna laloanai bo'adai ikekebili tubu'ana kanaua bo'adanai e'idi lua akai e'ovu eda'a mo venuai. Kanokau eko'isi bika'a de'alama.

⁵² Mitava 'ulita dela Dilava ena kabukabu kauta doutamo deba kauta demauli deko'isi.

⁵³ Iesu eko'isi 'udai mulinai eta mitavai dela'asi Ielusalema ai dedadodo inoku kau doutamo etai devaila.

⁵⁴ Kuali 'ola kauna ena kuali kauta ita Iesu de'imaia, kanokau eko'isi mai dava depulu davata boutai deikata koanai demakau si'asi'a dediaka, "Luva umauna kau kanania 'eva Dilava nakuna."

⁵⁵ 'Aate doutamo vaka ua'i dau'ai delava deikaia, Ia 'eva Kalilea ai Iesu mulinai deda'a mai da'alana deabi 'a'ateta.

⁵⁶ Viloatai 'eva Malia Makadala ateatena mai Malia ka Iakobo mai Iosepa sinata mai Sebedeo nakuna lalua sinata.

Iesu Dekoleia.

⁵⁷ Lavilavi kanaua'i lavo kauna ka easi vana Iosepa Alimatea kauna ia vaka Iesu debanoia kauna ka.

⁵⁸ Ia eda'a Pilato kevana inoku Iesu kauanina enoinoi vaia, Pilato luva eveni 'eva Iesu kauanina Iosepa bevenia.

⁵⁹ Inoku Iosepa Iesu kauanina eabia ovo, tubu'a makamakana medianai e'umia.

⁶⁰ Ia sibona ena mitava makamakana bika'a abunai e'uaia mitavana laloanai ekoleia, bika'a namana ka eva'ulea eda'a nutuala evaakububua inoku eda'a.

⁶¹ Malia Makadala ateatena banona Malia ka ita 'eva ua'i mitava avekenai demia deikaia.

Kuali Kauta Mitava De'imaia.

⁶² Elani 'avu'avuni melala kabukabunai kabukabu kauta namata mai Palisea kauta deda'a Pilato kevana,

⁶³ dediaka, "Kau namana e, lai dede kauna kanaua maulinai emia laloanai ena luva eluvavaia luvana lai alalovai 'inia ediaka, 'Melala ivakoinai bako'isi 'udai.'

⁶⁴ Kanaua 'ounai bo'outa mitava be'imala kave'i beda'a mo melala ivakoinai. 'Olana sia enama'ina, ibanona kauta beda'a Iesu kauanina bevinao inoku kau vailatai bediaka 'Ia 'eva ba kauta viloatai 'ani eko'isi 'udai.' Dede kanania muliai adeduana besi'avana vaika vakaia 'ana'inai davana."

⁶⁵ Pilato e'outa ediaka, "'Ima'ima kauta ovuata oda'a, mitava be'imala kave'i."

⁶⁶ Kanaua 'ounai deda'a mitava i'alavuna bika'ana de'alavua kave'i akanai talavatu koana dene'e'iadivo, inoku 'ima'ima kauta ua'i devikanita beikala kao.

28

Iesu Bai Eko'isi 'Udai.

(Mk 16.1-10; Lk 24.1-10; Io 20.1-18)

¹ Melala kabukabuna eole mulinai masi melalana lava'ana'iana 'avu'avu vabulanai, Malia Makadala ateatena mai Malia ka ita deda'a mitava beikala.

² Melala kanaua'i kanokau nama vaikana eko'isi laloanai Lovia namana ena anelu ka vutuvutuai e'ovu easi mitava nutualana bika'ana eva'uleatau akanai emia'au.

³ Ia vailana e'ailala ovo itani e'amalea boina mai ena tubu'a dedeva'i ovo itani oli deva'ina boina.

⁴ Mitava de'imaia kauta anelu deikaia koanai demakau si'asi'a de'ululu nuata detaule de'eko kanoai deno itani deba boina.

⁵ Beia anelu 'eva 'a'ate e'outa ediaka, "Sia omakau, lau aikabasi oi Iesu au ido'o valaukuna akanai dekokoa 'au kauna oi okavua.

⁶ Ia 'eva sia nia'i. Ia 'eva 'ani eko'isi makavanai e'oumui vitaitana. Omai eno 'abuna oikaia.

⁷ Inoku oda'a kaokao ibanona kauta oi bovaikabasita, Ia 'eva ba kauta viloatai 'ani eko'isi 'udai inoku 'ani e'ana'ia eda'a Kalilea, ua'i oi boikala. Luva kanania ba'oumui ako 'ounai asi."

⁸ Kanaua 'ounai 'a'ate mitavai dela'asi molau maimakauta mai mailalona-mata deveau deda'a ibanona kauta bevaikabasita.

⁹ Dalai deda'a laloanai Iesu ita devidavali. E'outa ediaka, "Mediamui!" Inoku deda'a kevana depakadivo aena deabi 'ini inoku dekukudivo venia.

¹⁰ Inoku Iesu e'outa ediaka, "Sia omakau, oi boda'a bo'akala'u oi bovaikabasita beda'a Kalilea ua'i beika'u."

Mitava De'imaia Kauta Eta Vaikabasi Luvata.

¹¹ 'A'ate dalaiai deda'a koanai, kuali kauta mitava de'imaia kauta vaidia demue deda'a vanua namanai makatai dava depulu davata boutai kabukabu kauta namata vailatai deluvavaita.

¹² Kabukabu kauta namata 'eva Iuda eta kau namata ita dedo'u deluvaluva eta lalovai devalavala kualo kauta kataua 'eva moni namana ka bevenita,

¹³ inoku de'outa dediaka, "Oi bodiaka, 'Boniai lai amuinai tabu laloanai ibanona kauta deasi Iesu kauanina devinaoa.'

¹⁴ Vali kanania Kavana kauna be'ika koanai lai ba'oua, oi 'eva kau 'avaea-mui, maivaka nuamui sia bebavunu sia dava ka oibolalovaia."

¹⁵ Kualo kauta moni deabia inoku de'outa vitaitana devavaia. Kanaua 'ounai luva kanania Iuda kauta viloatai deluvaia odaoda melala kanaua'i easi mo vali'u.

Iesu Ibanona Kauta Kevatai Evailaasi Vinala Evenita.

(Mk 16.14-18; Lk 24.36-49; Io 20.19-23; Vn 1.6-8)

¹⁶ Inoku ibanona kauta 'ouka ka deda'a Kalileai Iesu e'outa lolona deda'a venia.

¹⁷ Ibanona kauta ia deikaia koanai dekukudivo venia, beia vaidia 'eva nuata delaloto'ato'a.

¹⁸ Iesu eda'a ilulao kele'etai inoku e'outa ediaka, "Dilava siavu davata boutai vutuvutuai mai kanobatai 'ani eveni'u.

¹⁹ Kanaua 'ounai oi boda'a kanobata boutai kauta ibano'u kautai oi bovaota, Kamana Nakuna mai Idume Kabukabuna vatai oi bovaide'uta kabukabu,

²⁰ a'oumui luvata boutai oi bovaikabasita vinalata bevavai. Kaiamui ovala, lau 'eva melala bounai oi kevamuiai beda'a mo kanobata to'ona."

Vali Nama'ina **MALEKO** Eleleia Kauna

Puka Laloana Ilena Luvana

Vali nama'ina kanania Maleko eleleia, ena luva makavata laloatai kanania eluva koma, “Iesu Keliso Dilava Nakuna Valina Nama'ina.” Puka kanania laloanai 'eva ekaikabasi Iesu 'eva maiena siavu dava boutai bevavai. Kau evamaleleta melalatai, ka'uba si'avata vaika elo'ota asi melalatai, mai kau eta si'avana e'ou kao melalatai ena siavu 'eva ekaikala. Iesu sibona e'aeia Kau Nakuna, ia easi sibona evenia kau boutai betavata 'udai si'avana enai beluvuta ovo 'ounai.

Maleko sibona ena ula luvata 'eva doutamo sia eluvata, beia komolonai Iesu ena vinaula valina eluvaia. Lava'ana'ina Maleko eta'u Ioane vadi'u kabukabu kauna lovana eaku, mai Iesu aeidi'u kabukabu koma mai Satani ia evakovo kauna lovana eakuia. Inoku Iesu eta'u kau mekau doutamo devuata kauta elalota, inoku evamaulita mai evamaleleta. Makavana 'eva mulinai deda'a kauta Iesu dava evavai ovota sia deovo, beiamo 'uluta asi'i ia ita dea'a ka'ona eda'amo deikabasia kave'i. Ia de'ovenia kauta kataua eta badu 'eva namanamo eao eda'a. Puka kanania to'onai 'eva Iesu ena ba mai ena ko'isi 'udai lovata eaku.

Puka Iduvuna Namata

- a. Vali imakavana. (1.1 - 13)
- b. Iesu ena vinaula kau kevatai Kalilea laloanai. (1.14 - 9.50)
- c. Kalilea eda'amo Ielusalema. (10.1 - 52)
- d. Masi to'ona Ielusalema enai mai laloanai. (11.1 – 15.47)
- e. Iesu ena ko'isi 'udai. (16.1 - 8)
- f. Lovia namana ena la'asi mai ena ele'au vutuvutu. (16.9 - 20)

Vaidi'u Kabukabu Kauna

Ioane Eilolo.

(Mt 3.1-12; Lk 3.1-18; Io 1.19-28)

¹ Dilava Nakuna Iesu Keliso valina nama'ina lava ana'ina 'eva kanania.

² Enolea kauna Isaia eleleia ediaka,

“Dilava ediaka, ‘ E'u veauneke kauna asinia 'ana'i evavasi,
emu dala beva'olua kave'i.’

Mal 3.1

³ Lele ka kano'akunai e'ae'ae ediaka,
‘Lovia namana ena dala ova'olua.
Ena da'a dalana ovakomoloa.’”

Isa 40.3

⁴ Kanaua 'ounai Vaidi'u kabukabu kauna Ioane kano'akunai evailaasi, evaidi'u kabukabu mai eilolo ediaka, “Emui si'avanai olalo 'udai, oi boidi'u kabukabu, Dilava emui si'avana be'ou kao.”

⁵ Kau doutamo Iudea kanonai mai Ielusalemai deda'a Vaidi'u kabukabu kauna Ioane Ielena deika, eta si'avana de'ou dae, mai Iolidana nutunai evaidi'uta kabukabu.

⁶ Ioane evadodoa tubu'ana 'eva Kamela vuina. Kukuana 'apana 'eva Bolomakau avana, ena iani 'eva 'oasi'o mai metunu veina.

⁷ Kau vailatai kanania eilolo koma. “Kau ka lau muli'uai be'asi kauna 'eva lau e'u siavu bekeinia. Lau 'eva sia anama'ina vaika batoludivo ena tamaka valonata baluluvu.

⁸ Lau 'eva oi veiai avaidi'umui kabukabu, beia ia 'eva Idume Kabukabunai bevaidi'umui kabukabu.”

Iesu Eidi'u Kabukabu

Mai Satani Ekovoia.

(Mt 3.13; 4.11; Lk 3.21-22; 4.1-13)

⁹ Melala kanaua'i Iesu 'eva Kalilea kanona ka Nasaletai easi. Ioane eta'u evaidi'ua kabukabu Iolidana nutunai.

¹⁰ Iesu veiai ele'au koanai, vutuvutu eviluvu eikaia mai Idume Kabukabuna e'ovu easi ia akanai ikana vitaitana boiomalo boina.

¹¹ Maivaka lele ka vutuvutuai easi, ediaka, “Oni 'eva Lau Naku'u, e'u lalo'au. Lau oni alalonama venimu vaika.”

¹² Komolonai Idume Kabukabuna Iesu evada'ala deda'a kano'akunai.

¹³ Iesu ua'i emia melala vaninavui, Satani ia evakovoia, 'asi davata ita demia, beia anelu deasi inoku deduluia.

Iesu Va'eka Kauta Vani E'aeta.

(Mt 4.12-22; Lk 4.14-15; 5.1-11)

¹⁴ Vaidi'u kabukabu kauna Ioane vabuto'o lumanai de'alavua mulinai, Iesu 'eva eda'a Kalileaai Dilava valina nama'ina eilolo vaia.

¹⁵ Ediaka, “Luva 'ana'i bonina 'ani ele'au, Dilava ena lovia vanuana 'ani ekevai, emui si'avana'i olalo 'udai, Vali Nama'ina ovamomo'aia.”

¹⁶ Iesu Kalilea 'ovu nabuanai eda'a laloanai, Simona mai kadina Andelea ita eikata, vuo 'ovuai denaia, 'olana lalua'na 'eva va'eka kauta.

¹⁷ Iesu e'outa ediaka, “Muli'uai omai, lau batata'u oi kau iva'ekata bavaik-abasimui.”

¹⁸ Alimo eta vuo devikanita mulinai deda'a.

¹⁹ Ia eda'a ilulao Sebedaio nakuna Iakobo mai kadina Ioane ita eikata asiai eta vuo delamea.

²⁰ Inoku Iesu komolonai lalua'na e'aeta, kamata Sebedaio mai vinaula melota asiai devikanita ia mulinai deda'a.

Iesu Kau Ka Nuanai ka'uba Si'avana Vaika Elo'oia Asi.

(Lk 4.31-37)

²¹ Iesu mai ibanona kauta ita deda'a Kapelanauma vanuanai. Melala Kabukabunai Iesu 'eva Iuda kauta eta lo'e laloanai eda'adodo inoku evaik-abasi.

²² Kau kataua ena vaikabasi 'uluta deika koanai detabulovo si'asi'a, 'olana ena vaikabasi 'eva maisiavuta, mai sia talavatu de'olavaia kauta boita.

²³ Kau ka nuanai ka'uba si'avana emia kauna edodo lo'e laloanai inoku eva'oi ediaka,

²⁴ “Iesu Nasaleta kaumu e! O'ula dava kevamaiai? Oni lai bovasi'avanamai 'ounai oasi, una? Aikabasi oni 'eva dai, oni 'eva Kabukabu kaumu Dilava edilamu.”

²⁵ Iesu ka'uba si'avana e'ovenia ediaka, “Lele vunuu, kau kanana nuanai la'asi!”

²⁶ Ka'uba si'avana kau kanaua eva'ululu si'ala, evilavila si'asi'a inoku kau kanaua nuanai ela'asi.

²⁷ Kau ua'i boutai detabulovo si'asi'a, ka ka sibota devilavu'ai viveni dediaka, “Kania 'eva dava? Vaikabasimo makamakata vaidai mai siavuta. Ka'uba si'avata vaika e'outa koanai lelana de'ika.”

²⁸ Kanaua 'ounai Iesu valina alimo Kalilea kanona itoina laloanai dekavaia odaoda.

Iesu Kau Dounamo

Evanama'inata.

(Mt 8.14-17; Lk 4.38-41)

²⁹ Iesu ibanona kauta Ioane mai Iakobo ita lo'e devikania komolotai deda'a Simona mai Andelea eta lumai.

³⁰ Simona lavana ateatena 'eva e'olele, kauna desiavu ena lumai eno. Iesu easi koanai, ena 'olele luvana de'ouia.

³¹ Iesu eda'a ia kevana, imanai eabi eduluia evelia kole. Kauna siavuta deole, ateate eko'isi inoku eta iani evavai.

³² Melala eulu lavilavinai 'olele kauta mai kau nuatai ka'uba si'avata vaika demia kauta devada'ata deda'a Iesu kevana.

³³ Vanua kauta boutai deasi luma kanaua vailanai dedo'u.

³⁴ 'Olele edeata edeata kauta doutamo Iesu evanama'inata, maivaka ka'uba si'avata vaika doutamo elo'ota asi, beia ka'uba si'avata vaika 'eva Iesu deikabasia 'ounai e'alavuta sia beluluva.

Iesu Kalileai Eilolo.

(Lk 4.42-44)

³⁵ 'Avu'avuni vabulanai, sia elani kave'i koanai Iesu eko'isi luma evikania, eda'a 'abu 'akuna kai, ua'i emeamea.

³⁶ Beia Simona banona ita dela'asi ikavuna deda'a.

³⁷ Inoku dedavalia koanai de'ouia dediaka, "Kau boutai 'eva oni dekavumu."

³⁸ Beia Iesu eta luva evamuea ediaka, "Ita kada'a vanua kevatai kataua, laloatai vaka bailolo, vinaula kanania dainai asi."

³⁹ Iesu 'eva Kalilea laloana itoinai eda'aia, Iuda kauta eta lo'e laloatai eilolo mai ka'uba si'avata vaika kau nuatai kataua elo'olo'ota asi.

Iesu Loki Kauna Evanama'inala.

(Mt 8.1-4; Lk 5.12-16)

⁴⁰ Loki kauna ka easi Iesu vailanai ekuidula, enoia ediaka, "Bema bo'ula koanai, bomavanama'ina'u."

⁴¹ Iesu eikaia elaloia, 'ounai imana eisia lao eabia kovo, e'ouia ediaka, "'O. Lau a'ula bonama'ina. Kaumu enama'ina!"

⁴² Alimo loki kau kanaua evikania, kauna enama'ina.

⁴³ Iesu kau kanaua esinia koanai e'ouia kao ediaka,

⁴⁴ "Lele'u o'ika, kau ka vailanai sia boluva kovo. Komolomuai boda'a Kabukabu kauna kevanai, kaumu beikala. Mose ena talavatu vitaitana, onama'ina 'ounai ainama Dilava bovenia oni emu nama'ina ivamomo'aina."

⁴⁵ Beia kau kanaua eda'a 'abu bounai ena nama'ina valina ekavaia odaoda. Ena valikava kanaua 'ounai Iesu 'eva vanua laloatai sia eda'adodo. Ia 'abu 'avaeatai mo emia, 'abu edeata edeata kauta 'eva deda'a kevana.

2

Iesu 'Eko Kauna Evanama'inala.

(Mt 9.1-8; Lk 5.17-26)

¹ Melala vaid deole mulitai Iesu mune'e emue eda'a Kapelanauma vanuana, kau luvana deika ia 'eva lumai.

² Kau doutamo vaika deasi dedo'u luma evonu vaika, mia 'abuta 'eva asi'i vaika eda'a mo nutuala aunai eole Iesu eilolo helena deika.

³ Kau vani 'eko kauna ka devuaia deasi.

⁴ 'Olana kau dounamo vaika 'ounai, kau kanaua bevuala beda'a Iesu kevanai 'eva sia edaia. Kanaua 'ounai Iesu 'olana akanai luma 'uvina'i 'ile ka devavaia. 'Eko kauna mai 'etana ua'i deva'ovua eda'a Iesu vailanai.

⁵ Iesu ia eta abiveni nama vaikana eikaia 'ounai, 'eko kauna e'ouia ediaka, "Naku'u e! Emu si'avana 'ani i'ou kaota."

⁶ Talavatu de'olavaia kauta vaid ua'i demia, sibota delalovai lalovai.

⁷“Dava 'ounai kau kanania kanaua eluva koma? Ia Dilava 'olana sia e'aku. Dilava mo sibona si'avana be'ou kao.”

⁸Iesu alimo nuata lalovaita eikabasi, 'ounai e'outa, ediaka, “Dava 'ounai kanania oi olalovai koma?”

⁹'Eko kauna i'ounai, davana 'eva eveavea, 'Emu si'avana 'ani i'oukaota, 'o, 'Ko'isi emu 'eta abia da'a’?

¹⁰Beia lau a'ula oi boikabasi, Kau nakuna 'eva mai siavuna kanobatai si'avana be'ou kaota.” Inoku 'eko kauna e'ouia ediaka,

¹¹“Lau oni a'oumu. Ko'isi, emu 'eta abia isi, da'a emu luma!”

¹²Kau vailatai eko'isi, ena 'eta elo'uia eabiais i eda'a. Boutai detabulovo si'asi'a, Dilava devanama'inala dediaka, “Ita koa kanania boina ka sia kaikaia kovo.”

Iesu Levi E'aeia.

(Mt 9.9-13; Lk 5.27-32)

¹³Iesu mune'e emue eda'a Kalilea 'ovu nabuanai. Kau doutamo vaika deasi kevana inoku evaikabasita.

¹⁴Ia eda'a ilulao koanai, takisi abi kauna Levi Alepeo ena vinaula 'abunai emia divo eikaia, Iesu ia e'ouia ediaka, “Muli'uai mai!” Levi komolonai mo eko'isi mulinai eda'a.

¹⁵Mulinai ia 'eva Levi ena lumai deaniani, takisi abi kauta mai si'avana kauta doutamo Iesu mai ibanona kauta ita deaniani, 'olana kau douta Iesu mulinai deda'a.

¹⁶Talavatu de'olavaia kauta Palisea iduvunai deasi Iesu si'avana kauta mai takisi abi kauta ita deaniani ka'ona deikata koanai, ibanona kauta delavuaia dediaka, “Dava 'ounai Iesu takisi abi kauta mai si'avana kauta ita deaniani ka'ona?”

¹⁷Iesu leleta eika koanai, eta luva evamuea ediaka, “Kau sia de'olele kauta 'eva mulamula veni kauna sia deula venia, beia 'olele kauta mo deula venia. Lau komolo kauta daitai sia asi, ia lau 'eva si'avana kauta daitai asi.”

Love Lavuai Lavuaina.

(Mt 9.14-17; Lk 5.33-39)

¹⁸Vaidi'u kabukabu kauna Ioane ibanona kauta mai Palisea kauta 'eva delove. Kanaua 'ounai kau vaida deasi Iesu delavuaia dediaka, “Vaidi'u kabukabu kauna Ioane ibanona kauta mai Palisea kauta ibanota kauta 'eva delolove, ia oni ibanomu kauta dava 'ounai sia delolove?”

¹⁹Iesu eta luva evamuea, ediaka, “Olalovai kave'i! Kamoane makamaka kauna ena ula kauta lalonama kanaua laloanai koanai a belove koma? Asi'i vaika! Boutai ita demia ka'ona koanai sia belolove.

²⁰Beia melalana be'asi koanai kamoane makamaka kauna kevatai beabia tau. Kanaua melalanai ia vaka belolove.

²¹Tubu'a makamakana si'asi'ana ka tubu'a ana'ina 'idina sia bekuli avua, 'olana tubu'a makamakana si'asi'ana beveli bou tubu'a ana'ina be'idia. 'Idi namana bepupulu.

²²Mai sia kauka vine makamakana vine veina ilaiudana putena ana'inai belaiauda, 'olana vine makamakana betata'u vine veina ilaiudana putena ana'ina bevamukamukala, vine mai putena besi'avana. Kanaua 'ounai vine makamakana 'eva vine veina putena makamakanai mo belaiauda.”

Melala Kabukabuna Loviana.

(Mt 12.1-8; Lk 6.1-5)

²³Melala Kabukabunai Iesu Witi lobanai ekeini, ibanona kauta da'atai Witi vuata debubulu deani.

²⁴Palisea kauta 'eva Iesu de'ouia dediaka, “Ikala! Dava 'ounai oni ibanomu kauta 'eva Melala Kabukabunai talavatu deva'alamaia?”

²⁵ Iesu eta luva evamuea ediaka, “Davida ena kau ita melala kanaua'i vikolo deakuta, eko'isi dava evavaia davana valina sia oi ovakua kovo?”

²⁶ Kabukabu kauna namana Abiata ena melalai, Davida eko'isi eda'a Lo'e Kabukabunai palaoa kabukabuna ua'i kabukabu kauta mo be'ani davata eani, vaida ena kau evenita deani.”

²⁷ Iesu mune'e e'outa 'udai ediaka, “Dilava eta'u Melala Kabukabuna evavaia 'eva kau eta nama'ina 'ounai, ia kau 'eva Melala Kabukabuna 'ounai sia evavaia.

²⁸ Kanaua 'ounai Kau Nakuna 'eva Melala Kabukabuna vaka belovia vaia.”

3

Kau Ka Imana Ebade.

(Mt 12.9-14; Lk 6.6-11)

¹ Iesu mune'e emue eda'a Iuda kauta eta lo'eai eda'adodo, ua'i 'eva kau ka imana badena eikaia.

² Kau vaida ua'i Iesu de'idimala va'eva ka bevavaia koanai beikala, bema kau kanaua bevamaulia Melala Kabukabunai koanai va'evai bene'ea divo.

³ Iesu ima bade kauna e'ouia ediaka, “Ko'isi, mai nia'i kau vailatai.”

⁴ Inoku Iesu eta'u kau elavuaita ediaka, “Eta Talavatu dava eluva vaia ekavavai Melala Kabukabunai? Nama'ina ekavavaia 'o si'avana ekavavaia? Kau ekavamaulia 'o ekavabaia?” Beia sia luva ka deluvaia, leleleleta asi'i.

⁵ Iesu mai badunaita ete'eta, mai elalota vaika, 'olana eta nua pasisi 'ounai. Ima bade kauna e'ouia ediaka, “Imamu isia pailolo!” Imana eisia pailolo koanai komolonai enama'ina.

⁶ Kanaua 'ounai Palisea kauta lo'eai dela'asi, komolonai deda'a 'Eloda enai de'au kauta ita dedo'u, Iesu iaku bana dalana deluvaluva vaia.

Kau Mato Iesu Mulinai Deda'a.

⁷ Iesu ibanona kauta ita dela'asi deda'a Kalilea 'ovunai koanai, mato nama vaikana Kalileai mai Iudeai mulinai deda'a.

⁸ Maivaka kau Iudeai, Ielusalemai, Idumeai, Iolidana nutu avekena daenai kauta, Tulo mai Sidono kauta vaka deasi, 'olana 'eva Iesu koa kataua evavai valita deika 'outai.

⁹ Mato nama vaikana 'ounai, Iesu ibanona kauta e'outa asi ka beva'olua, kau dala asi'i dema lavalavua makauna.

¹⁰ Iesu kau doutamo vaika evamaulita 'ounai, 'olele kauta dala dekavu koanai devidoliviveni, eta lua Iesu beabia kovo.

¹¹ Maivaka nuatai ka'uba si'avata vaika demia kauta Iesu deikaia koanai, deasi vailanai de'eko devaoi dediaka, “Oni 'eva Dilava Nakuna!”

¹² Beia Iesu 'eva ka'uba si'avata vaika e'outa kao, valina sia bekakava ia 'eva dai.

Iesu Veaneke Kauta

'Ouka Lua Edilata.

(Mt 10.1-4; Lk 6.12-16)

¹³ Iesu loloai ele'au eula venita kauta e'aeta, deda'a kevana.

¹⁴ Kauta 'ouka lua edilata, vata e'oulai Veaneke kauta, ia bebanoa, besinita la'asi beilolo,

¹⁵ maivaka siavu bevenita ka'uba si'avata vaika belo'ota asi.

¹⁶ 'Ouka luana kauta katania. Simona (Iesu va ivaluana evenia Petelo),

¹⁷ Sebedeo nakuna Iakobo, kadina Ioane ita (Iesu va evenita 'eva Boanele, anina 'eva 'Vutuvutu e'ulua nakuna.)

¹⁸ Andelea, Pilipo, Batolomeo, Mataio, Toma, Alepeo nakuna Iakobo, Tadeo, Kanana kauna Simona,

¹⁹ mai Kaliote kauna Iuda Iesu venina eveni kouna ekou kauna.

*Iesu Mai Belesebulo.**(Mt 12.22-32; Lk 11.14-23; 12.10)*

²⁰ Iesu lumai edodo, kau mune'e dedo'u 'udai, ibanona kauta ita beaniani 'eva sia edaia.

²¹ Kadi' a'ana valina deika koanai deda'a bevua muea, 'olana kau dediaka ia 'eva 'olana esi'avana.

²² Talavatu de'olavaia kauta vaida Ielusalemai deasi deluva dediaka, "Ka'uba si'avata vaika e'olavaita ka'ubana Belesebulo Iesu nuanai edodo, siavu evenia, ka'uba si'avata vaika elo'ota asi."

²³ Kanaua 'ounai Iesu e'aeta deasi kevana luva ivavitaitatai e'outa ediaka, "A boina Satani 'eva Satani belo'oa asi?"

²⁴ Kanobata ka sibona beva'alamaia inoku lalua bekuai koanai, kanobata kanaua 'eva sia belava 'ini.

²⁵ Iduvu ka vaka sibona beva'alamaia inoku beviaku koanai, iduvu kanaua vaka sia belava 'ini.

²⁶ Satani vaka ena iduvu beva'alamaia inoku sibota bekuaita koanai, ena iduvu sia belava 'ini, ia bepupua.

²⁷ Kau ka sia betata'u kula'ila kauna ena luma bedodoa kovo ena luma lavota be'abi, beda'a mo ia belioa 'ana'i vakaia ena luma davata bevinaota.

²⁸ Luva umauna mo lau oi a'oumui, Dilava 'eva kau eta si'avana boutai mai eta luva si'avata vaika boutai be'ou kao mai dalana.

²⁹ Ia kau ka Idume Kabukabuna kevanai beluva si'asi'a kauna 'eva ena si'avana sia be'ou kao kovo bemimia beda'a mo bemia keinikeini."

³⁰ Iesu kanaua eluva koma, 'olana vaida dediaka, "Ia nuanai 'eva ka'uba si'avana vaika emimia."

*Iesu Sinana Mai Kadina.**(Mt 13.1-9; Lk 8.4-8)*

³¹ Inoku Iesu sinana mai kadina deasi mulimuliai delava, luva mo desinia eda'a Iesu kevana.

³² Do'u nama vaikana Iesu demiaia kaiukaiu kauta de'ouia dediaka, "Oni sinamu mai kadimu 'eva mulimuliai, deula venimu."

³³ Iesu eta luva evamuea ediaka, "Dai 'eva lau sina'u mai kadi'u?"

³⁴ Iesu kau demiaia kaiukaiu kauta eikata inoku e'outa ediaka, "Katania 'eva lau sina'u mai bo'akala'u.

³⁵ Dilava ena ula vinalata devavai kauta 'eva lau bo'akala'u, lovu'u mai sina'u."

4*Luva Ivavitaitana**Vadovado Kauna.**(Mt 13.1-9; Lk 8.4-8)*

¹ Iesu mune'e eda'a Kalilea 'ovu nabuanai evaikabasi 'udai. Mato nama vaikana deda'a kevana delava bubua 'ounai, Iesu asi ka akanai ele'au emiadio. Asi kena eiluasi 'oulai, kau boutai 'eva nabuai delavaia.

² Iesu 'eva dava doutamo luva ivavitaitatai kau evaikabasita.

Ena vaikabasi laloanai kanania eluva koma.

³ "Kaiamui ovala. Vinala kauna ka eda'a ena kea bevavado.

⁴ Ia kea lobai ekapo odaoda koanai, vaida 'eva dalai de'eko asi, inoku manumanu deasi deani paluta.

⁵ Vaida 'eva kano bika'a bika'anai de'ekoasi, dekubu molau, 'olana kano ekevekeve vaika.

⁶ Beia melala edae ekalata koanai delamoda, 'olana lamuta sia de'ovu kave'i.

⁷ Vaida 'eva ava 'ini'inita laloatai de'eko asi. Debudi'au, ia ava 'ini'inita depaka bubuta 'ounai, sia devua.

⁸ Mune'e vaidia 'eva kano medianai de'eko asi, inoku debudi kave'i devua, vaidia vuata koinavui, vaidia kalakoinavui, mai vaidia sinavu ka."

⁹ Luva to'onai Iesu e'outa ediaka, "Mai kaiiana kauna 'eva lele be'ika."

*Iesu Luva Ivavitaitata
'Olata Eluvavai.*

(Mt 13.10-17; Lk 8.9-10)

¹⁰ Iesu sibonamo koanai, ibanona kauta 'ouka lua mai kau vaidia mulinai deda'a kauta sibota deda'a kevana delavuaia luva ivavitaitata anita be'oulai kave'i.

¹¹ Iesu e'outa ediaka, "Dilava ena lovia vanuana luvata vuniata 'eva oi a'oumui kave'i, beia muliai demimia kauta 'eva dava boutai luva ivavitaitatai mo a'outa.

¹² Kanaua 'ounai kau katania,
'Beikala beikala beia

sia beikala une,

mai lele be'ika be'ika beia

sia beikabasi.

Bema beikala une mai beikabasi

koanai, asi'i dema lalo'udai

Dilava enai inoku eta si'avana

ema 'ou kao 'ounai.' "

Isa 6.9, 10

Luva Ivavitaitata Anita.

(Mt 13.18-23; Lk 8.11-15)

¹³ Iesu mune'e elavuaita ediaka, "Luva ivavitaitana kanania sia oi oikabasia, una? Aboina 'eva luva ivavitaitata vaidia a oi boikabasi koma?"

¹⁴ Vinaula kauna kea kataua ekapo odaoda 'eva Dilava ena luva ekapoia odaoda.

¹⁵ Kea kataua dalai de'eko asi 'eva kau vaidia Dilava ena luva 'uluna de'ika, beia Satani e'asi koanai eabita tau.

¹⁶ Kau vaidia 'eva itani kea kano bika'abika'anai de'ekoasi boita, Dilava ena luva 'uluna de'ika koanai, mailalonamata ita alimo deabia dae.

¹⁷ Beia lamuta asi'i, mai sia demia dau'a, inoku Dilava ena luva 'ounai bebadu venita 'o beva ananata koanai, 'ani be'eko.

¹⁸ Kea kataua ava 'ini'inita laloatai de'eko asi davata 'eva kau vaidia boita Dilava ena luva 'uluna deika.

¹⁹ Beia kanobata ena nuanana mai ena lavo ilalo'vaita mai dava vaidia iula venita detata'u Dilava ena luva nuatai kataua eabi tau. Kanaua 'ounai vuata 'eva asi'i.

²⁰ Beia kau vaidia 'eva itani kea kano medianai de'ekoasi boita, Dilava ena luva 'uluna de'ika deabia dae, mai devuvua 'eva vuata vaidia koinavui, vaidia kalakoinavui, vaidia sinavu ka."

Lamepa Ikau 'Auna 'Abunai Bekaua 'Au.

(Lk 8.16-18)

²¹ Iesu mune'e e'outa ediaka, "Kau ka lamepa betoua koanai, vodu laloanai sia beudala 'o maua laloanai sia beudala, Ia lamepa ikau 'auna 'abuna dokadokai bekaua 'au.

²² 'Olana dava devuni davata boutai bela'asi, mai de'alavu davata boutai vaka bela'asi, dava ka sia bevunia kovo.

²³ Bema mai kaiamu, 'eva lele ika."

²⁴ E'outa vaka ediaka, "Oi oika luvata 'eva olalo vaita kave'i. Emui veniveni vitaitatai mo Dilava bevenimui, mai vaka kataua akatai doutamo bene'e 'au.

²⁵ 'Olana mai ena dava kauna akatai bene'e 'au bevenia, ia kevanai dava asi'i kauna 'eva enai ai kava'ina emimia davana vaka beabi ovo."

Luva Ivavitaitana Kea Ekubu.

²⁶ Iesu e'outa 'udai ediaka, "Dilava ena lovia vanuana 'eva kau ka kea ena lobai ekapo odaoda boina.

²⁷ Kau kanaua boni eomuina i lani ai eomia, ia kea 'eva debudi dekubu, sia ikabasi a dekubu koma.

²⁸ Kano sibona anina evapulua, kea evabudia, kubuna eva elea'au, vakaia mulina i vuana evapulua.

²⁹ Vuana e'aiva iukuna melalanai koanai, vinaula kauna ena lepo eabia eda'a, eukuia."

Luva Ivavitaitana Tuava Keana.

(Mt 13.31-32; Lk 13.18-19)

³⁰ Iesu mune'e eluva 'udai ediaka, "Dilava ena lovia vanuana 'eva davai ekavavitaitala? Luva ivavitaitana davanai ekavavitaitala?"

³¹ Dilava ena lovia vanuana 'eva itani tuava keana boina, kea boutai vilotai 'eva ia mo kikina vaika, kanoai evadoia,

³² muliai ia ekukubu koanai, aniani auta boutai evele kanita, mai vaka nama vaikana, le'ena namata 'elu'elutai aka manumanuta boutai de'asi ni'ita devavai."

³³ Iesu 'eva kau kataua eta ikabasi vitaitana i luva ivavitaitatai doutamo evaikabasita.

³⁴ Beia ia luva ivavitaitatai mo eluva venita, ibanona kauta ita demiatu koanai luva anita e'oulai kave'i.

Iesu Lani Mai Ka'uda Eva'olota.

(Mt 8.23-27; Lk 8.22-25)

³⁵ Melala kanaua'i makani 'eali'ealinai Iesu ibanona kauta e'outa ediaka, "Kakeini kada'a 'ovu avekenai."

³⁶ Ibanona kauta ita mato devikania deda'a, Iesu emia'au vaia asinai dele'au inoku ita deda'a. Asi vaida vaka mulitai deda'a.

³⁷ Lani nama vaikana eunu, ka'uda eko'isi vei asi laloanai edodo, kevai mo deuku.

³⁸ Iesu 'eva ena i'uina e'uinaia asi mulina eno emuinai. Ibanona kauta deda'a kevana, dekuia dediaka, "Vaikabasi kaumu e, ita ekadono 'eva sia olalovaia?"

³⁹ Iesu eko'isi lani mai ka'uda eluva pasisi venita ediaka, "O'olo!" Lani e'olo, ka'uda vaka eno kave'ikave'i.

⁴⁰ Inoku Iesu ibanona kauta e'outa ediaka, "Dava 'ounai oi omakau? Mai emui abiveni 'o asi'i?"

⁴¹ Beia ia boutai demakau si'asi'a, devika viveni dediaka, "Nia 'eva dai? Lani mai ka'uda vaka lelana deika!"

5

Iesu Kau Ka Nuanai Idume Si'ava Vaikata Elo'ota Asi.

(Mt 8.28-34; Lk 8.26-39)

¹ Iesu mai ibanona kauta ita dekeini Kalilea 'ovu avekenai, Kelasa kanonai dela'asi.

² Iesu asiai e'ovu koanai, kau ka ka'uba si'avata vaika nuanai demia kauna mitavai ela'asi easi Iesu ita devidavali.

³ Ena mia 'abuna 'eva mitava, sia kauka bedo'o 'inia bedaia mai seiniai vaka bedo'oa 'eva sia bedaia.

4 'Olana melala doutamo 'eva seini mai 'onauai delioia, beia 'onau eva-mokuta mai seini eva'alamata, ia ivamadanana 'eva kau ka sia eikabasi.

5 Boni mai lani ia 'eva mitavai mai loloi melala boutai eovaoi, mai ia sibona kauna telaleai eoivala pau'apau'a.

6 Kau kanaua Iesu dau' ai easi eikaia koanai, eveau eda'a vailanai ekuidula.

7-8 Iesu ka'uba si'avana vaika e'ouia ediaka, "Ka'uba si'avana vaika! Kau kanana nuanai la'asi." Kau kanaua evaoi 'unu'unu ediaka, "Iesu Akai vaika Dilavana Nakuna e! Keva'uai dava bovavaia? Dilava vanai anoimu, sia bovanana'u."

9 Iesu eta'u elavuaia ediaka, "Oni vamu 'eva dai?" Ia ena luva evamuea ediaka, "Va'u 'eva Mato, 'olana lai 'eva doumai vaika."

10 Ia Iesu enoia 'udai 'udai 'abu kanaua'i sia belo'ota asi.

11 Boloma 'itona nama vaikana lolo 'aba'abanai deaniani.

12 Ka'uba si'avata vaika kataua deta'u Iesu denoia dediaka, "Bosinimai, boloma kataua kevatai inoku laloatai lai badododo."

13 Kanaua 'ounai Iesu ena luvai ka'uba si'avata vaika kau kanaua nuanai dela'asi deda'a boloma nuatai dedodo, boloma 'itona 'eva sinavu boutai luanavui (2,000) deveau deda'a ke'eke'eai delovoasi 'ovuai dedovu, dedona ba.

14 Boloma 'ima kauta deveau deda'a vanua kauta mai lobai devanua kauta kevatai vali dekava, kanaua 'ounai kau develi deda'a dava epulu davana beikala.

15 Deda'a Iesu kevanai dela'asi koanai, 'ana'inai kau kanaua nuanai Ka'uba si'avata vaika demia kauna ena lalovai 'ani dekomolo, ena tubu'a evadodota emia divo deikaia, demakau si'asi'a.

16 Kau kataua Iesu dava evavaia deikaia davata kau vaida vailatai kau kanaua ka'uba si'avata vaika nuanai demia kauna luvana mai boloma luvata deluva.

17 Vanua kauta deta'u Iesu denoia eta kano bevikanai.

18 Iesu asiai ele'au koanai ka'uba si'avata vaika nuanai demia kauna eta'u Iesu enoia bebanoa ita bedada'a.

19 Beia ia e'ouia kao ediaka, "Bomumue boda'a emu luma kauta kevata, Dilava a elalomu koma maivaka evamaulimu luvana kadi'a'amu bovaikab-asita."

20 Kanaua 'ounai kau kanaua eda'a Dekapoli vanuata 'ouka laloatai Iesu dava kevanai evavaia davana valina eilolo vaia, kau boutai detabulovo si'asi'a.

Iailo Nakuna Vatona, Mai Iesu Ena Tubu'a Eabi Kovo Ateatena.

(Mt 9.18-26; Lk 8.40-56)

21 Iesu mune'e asiai ele'au inoku dekeini 'ovu avekenai, devadai'au koanai, mato namana 'eva ua'i nabuai maivaka dedo'u 'udai.

22 Lo'e 'ola kauna ka vana Iailo, eda'a ua'i Iesu eikaia koanai aena 'olanai ekuidula,

23 mai nuana itoinai enoia ediaka, "Naku'u vatovatona 'eva 'ani bebaba, kamada'a kaunai bomakao'au bemamauli."

24 Iesu eko'isi Iailo ita deda'a, ia mato namana vaka Iesu dedabubua deda'a.

25 Ateate ka vaka ua'i 'a'ate eta 'olele eanana vaia vikau boutai 'ouka lua.

26 Mulamula veni kauta doutamo ia ena 'olele bevanama'inala beia sia edaita, ena moni mai lavo boutai evaoleta, beia ena 'olele sia enama'ina, 'olele 'eva namana eao.

27 Ia Iesu valina eika koanai, mato viloatai ia mulinai eda'a inoku ena tubu'a eabiakovo.

28 'Olana ia elalovaia, 'Bema ena tubu'a mo babiakovu koanai bamauli.'

²⁹ Ena tubu'a eabiakovo komolonai lala eto'o, kauna eonovaia ena 'olele 'eva 'ani enama'ina.

³⁰ Iesu komolonai eonovaia vamauli siavuna nuanai davana ela'asi 'ounai elava 'udai inoku elavuai lavuai ediaka, "Dai e'u tubu'a eabiakovo?"

³¹ Ibanona kauta deluva dediaka, "Mato nama vaikana devi'avi vi'avi kele'emuai, dava 'ounai olavuai lavuai, dai eabimu kovo."

³² Beia Iesu 'eva ekai to'ato'a dai ia eabiakovo.

³³ Ateate kevanai epulu koakoana 'ani eikabasi 'ounai, emakau si'asi'a mai 'ululu 'ululuna eda'a Iesu vailanai ekuidula, ena 'olele luvana bounai eluvavaia.

³⁴ Iesu ia e'ouia ediaka, "Naku'u e, 'olana emu abiveni 'ounai 'ani omauli. Mai mainomu da'a. Emu anana boutai 'ani deole."

³⁵ Iesu eluvaluva do'o laloanai, Iailo ena lumai kau vaidadeasi kevana inoku de'ouia dediaka, "Nakumu 'eva 'ani eba. Vaikabasi kauna sia vabavunua."

³⁶ Beia Iesu luvana kanaua eika koanai sia eabia dae, lo'e 'ola kauna e'ouia ediaka, "Sia makau, ia abiveni mo."

³⁷ Ia eta'u boutai e'outa kao ka sia bebanoa, ia Petelo, Iakobo mai bo'akalana Ioane kauta kakoina bebanoa.

³⁸ Deda'a lo'e 'ola kauna ena lumai dele'au, kau eikata dekani vilalo mai dekani si'asi'a.

³⁹ Iesu luma laloanai eda'adodo, kau e'outa ediaka, "Dava 'ounai oi okakani, 'ulu nama vaikana oi ovavaia, vato kanania sia eba, ia 'eva emuinai."

⁴⁰ Beia ia 'eva Iesu deikaia demamai. Kau boutai e'outa dela'asi, mulinai vatovato kamana mai sinana ia mai ibanona kauta koina ita deda'a vatovato eno 'abunai dedodo.

⁴¹ Iesu vatovato imanai eabi inoku e'ouia ediaka, "Dalita Kumi!" (Anina 'eva 'Vatovato e, a'oumu, ko'isi.)

⁴² Vatovato kanaua komolonai mo eko'isi inoku eda'a to'ato'a. Deikaia kauta boutai detabulovo si'asi'a. Vatovato vikauna 'eva 'ouka lua.

⁴³ Iesu e'outa kao dava epulu davana 'eva sia kau ka be'oua. Mune'e e'outa vatovato ana iani kena bevenia beania.

6

Iesu Nasaletai Devaivivia. (Mt 13.53-58; Lk 4.16-30)

¹ Iesu 'abu kanaua evikania, ibanona kauta ita deda'a ia ena vanua umauna Nasaleta.

² Melala kabukabunai ia ena vaikabasi eabi sinala. Lo'eai lelana deika kauta boutai detabulovo si'asi'a, dediaka, "Aoneka kanania dai evenia? Siavu a'ia'i easi koa katania evavai."

³ Ia delavuaia dediaka, "Ia 'eva kamuta kauna, Malia nakuna, Iakobo, Iosepa, Iuda mai Simona 'a'ata, lovuna vaka nia'i kevatai?"

⁴ Iesu e'outa ediaka, "Enolea kauna 'eva 'abu boutai laloatai beabia dae, beia ena vanua umaunai mai dona mai kadi'a'ana umauta 'eva sia beabia dae."

⁵ Ua'i 'eva koa doutamo sia evavai, ia 'olele kauta vida mo akatai ekao'au, evamaulita.

⁶ Eda'unai si'asi'a 'olana eta abiveni asi'i 'ounai. Inoku ia eda'a vanua edeata vaidalaloatai evaikabasi.

Iesu Ibanona Kauta 'Ouka Lua Esinita Asi. (Mt 10.5-15; Lk 9.1-6)

⁷ Mune'e Iesu ibanona kauta 'ouka lua e'aeta deasi kevana, siavu evenita, lalua lalua esinita idume si'avata vaika belo'ota asi.

⁸ Evaidibata ediaka, "Emui da'a to'ato'a laloatai dava ka sia oi boabia, ikoka mo ka'onamo oi boabia. Voina, iani maivaka moni ka sia oi boabia.

⁹ Emui tamaka oi bolavauda, beia ivadodo ivaluata sia oi bo'abi.

¹⁰ Oi boele'au lumana kanaua'i mo oi bomimia beda'a mo vanua kanaua oi bovikania.

¹¹ Bema sia beabimui dae 'o lelemui sia beika koanai oi bovikanita, aemui apulolota oi bodavu davu ovo eta va'evai be'ao eta si'avana ivamomo'aina."

¹² Inoku ibanona kauta deda'a, deilolo kau bevalalota 'udai,

¹³ maivaka ka'uba si'avata vaika doutamo delo'ota asi, 'olele kauta doutamo deoloai kauta deuku devamaulita.

Vaidi'u Kabukabu Kauna Ioane Ena Ba.

(Mt 14.1-12; Lk 9.7-9)

¹⁴ Lovia 'olana kauna 'Eloda vali kanaua eika, 'olana Iesu vana 'eva 'ani 'abu bounai deluva vaia. Vaida dediaka, "Vaidi'u kabukabu kauna Ioane bai 'ani eko'isi 'udai, mai kanaua 'ounai siavu vinaluata katania evavaita."

¹⁵ Vaida dediaka, "Ia 'eva Elia." Vaida mune'e dediaka, "Ia 'eva enolea kauna ka, itani enolea kauta ana'ita boita."

¹⁶ Beia 'Eloda 'ulu kanaua eika koanai, ediaka, "Ioane, 'atona atauia uku kauna bai 'ani eko'isi 'udai."

¹⁷ 'Ana'inai Ioane sia eba koanai, 'Eloda 'eva 'ani luva esini, Ioane deabia delioia vabuto'o lumanai de'alavua, kanaua evavaia 'olana 'eva 'Elodia dainai. 'Eloda eta'u kadina Pilipo adana 'Elodia eadavala.

¹⁸ Inoku Ioane eta'u 'Eloda e'ouia ediaka, "Oni kadimu adana oadavala 'eva ova'eva."

¹⁹ 'Ounai 'Elodia 'eva Vaidi'u kabukabu kauna Ioane ebadu venia, iaku bana dalana ekavua, beia sia mai dalana.

²⁰ 'Olana 'Eloda 'eva Ioane makauna emakau, eikabasi ia 'eva vinalu kave'i maivaka kabukabu kauna, kanaua 'ounai ia e'imaia kave'i. Melala doutamo 'Eloda Ioane ena luva 'uluta eika koanai, nuana ebavunu beia eula lenea be'ika.

²¹ 'Eloda ena pulu melalana edaia 'ounai nadu namana ka devavaia, vanua loviata, kualo 'ola kauta, maivaka Kalilea kauta namata deveata deasi.

²² 'Elodia nakuna vatona easi do'u kauta vailatai eneva. 'Eloda mai ena ula kauta boutai lalota denama, inoku 'Eloda eta'u vato kanaua e'ouia ediaka, "Oula venia davana bo'oua koanai bavenimu."

²³ Mai eluva ana'i ediaka, "Dava boula venia 'eva bavenimu, itani e'u kanobata avekena bonoinoi vaia vaka bavenimu."

²⁴ Vato ela'asi eda'a sinana elavuaia ediaka, "Lau dava banoinoi vaia?" Sinana e'ouia ediaka, "Vaidi'u kabukabu kauna Ioane 'olana bonoinoi vaia.

²⁵ Vato emue edodo molau eda'a 'Eloda lovia 'olana kauna e'ouia ediaka, "Lau a'ula, vali'unai mo Vaidi'u kabukabu kauna Ioane 'olana nau ai boudala, boveni'u."

²⁶ Lovia 'olana kauna 'Eloda ena lalovai sia ekomolo, beia 'olana 'ani eluva ana'i vato dava beula venia davana 'eva beveveni mo, mai ena vosi kauta ua'i deaniani ka'ona kauta vaka ena luva ana'i 'uluna deika 'ounai sia be'ula 'eva dalana asi'i.

²⁷ Kanaua 'ounai lovia 'olana kauna 'Eloda kualo kauna ka esinia bedada'a Vaidi'u kabukabu kauna Ioane 'olana beabia be'asi. Kualo kauna kanaua eda'a vabuto'o lumanai Vaidi'u kabukabu kauna Ioane 'atona etauia 'uku.

²⁸ 'Olana nau ai eudaia eabia eda'a vato evenia, vato eta'u eabia eda'a sinana evenia.

29 Vaidi'u kabukabu kauna Ioane ibanona kauta valina deika koanai deda'a kauanina deabia deda'a mitavai dekoieia.

Iesu Sinavu Imanavui (5,000) Evananita.

(Mt 14.13-21; Lk 9.10-17; Io 6.1-14)

30 Iesu ena veauneke kauta demue deda'a kevanai dedo'u 'udai, devavai davata mai devaikabasi luvata boutai vailanai deluvavai.

31 Mato namana deda'a de'asi 'ounai Iesu mai ibanona kauta ita eta aniani 'abuna asi'i, ia eko'isi e'outa ediaka, "Kada'a 'abu 'avaeana kai, ua'i lamui oi bo'ani."

32 Kanaua 'ounai asiai dele'au, deveau keini 'abu 'avaeana ka deda'aia.

33 Beia kau doutamo deikata mai deikabasi ia 'eva adeda'aia, 'ounai vanua kauta boutai deveau laia de'ana'ia deda'a 'abu kanaua'i dela'asi.

34 Devadai 'au koanai Iesu mato namavaikana eikaia 'eva elalota vaika itani mamoe sia mai i'imata kauna ka boina. Kanaua 'ounai dava doutamo evaikabasita.

35 Lavilavi melala 'ani be'ulu 'eva ibanona kauta deasi kevana, de'ouia dediaka, "Nia 'eva kano'akuna maivaka melala 'ani beboboni.

36 'Ounai kau katania bomasinita demada'a lobai maivaka vanua kevatai u'ai eta iani dematava dema ani."

37 Iesu e'outa ediaka, "Oi sibomui iani kena ovenita, deania." Ia ibanona kauta ia deluva venia dediaka, "Lai batata'u moni sinavu lua (200 denali) ianina lai batavala bavenita be'ani, una?"

38 Iesu e'outa ediaka, "Iani vida kevamuiai? Oda'a, oika." Deda'a deika kave'i demue deasi, de'ouia dediaka, "Palaoa i'abuta ima mai sisi lua."

39 Iesu ibanona kauta e'outa, kau okoleta iduvu kikita ka ka duvu akatai bemudivo.

40 Kanaua 'ounai kau boutai sinavu ka ka mai imanavui ka ka devamiata.

41 Inoku ia eko'isi palaoa ima mai sisi lua eabita e'a'a dae vutuvutu eikaia iani evanama'inata. Palaoa ekovita ibanona kauta evenita dekoie mato boutai devenita. Sisi luana vaka kanaua ekoleta koma.

42 Boutai deaniani, deani vunu.

43 Iesu ibanona kauta palaoa mai sisi kalita dedoubou, aleka boutai 'ouka lua devonu.

44 Deaniani kauta viloatai momoluane 'avaeana 'eva sinavu imanavui (5,000).

Iesu Vei Akanai Eda'a.

(Mt 14.22-33; Io 6.15-21)

45 Iesu alimo ibanona kauta esinita asiai bele'au be'ana'ia beda'a Betesaida avekena. 'A ia 'eva do'u kauta esinita.

46 Kau deda'a mulitai ia ele'au eda'a loloi bemeamea.

47 Lavilavi evabula vabula koanai asi 'eva 'ovu bo'adanai, 'a Iesu sibona 'eva kanoai.

48 Ia eikata 'eva debala debavunu 'olana lani vailatai easi 'ounai. O'oloko eta alala vitaitanai Iesu 'atu akanai eda'a kevata itani asi kevanai bemada'a keinimo boina.

49 Ia 'atu akanai eda'a deikaia delalovaia ka'uba, demakau devaoi.

50 'Olana ia boutai deikaia nuata debata. Ia alimo e'outa ediaka, "Sia omakau, nuamui ovapasisi. Nia Lau."

51 Asiai elava'au kevatai inoku lani eto'o 'eva detabulovo si'asi'a.

52 'Olana Iesu kau palaoa evenita deani, ibanona kauta koa kanaua ovonai sia deovo, nuata depasisi vaika.

Iesu Kenesaletai 'Olele Kauta Evanama'inata.

(Mt 14.34-36)

⁵³ Iesu ibanona kauta ita asiai deveau keini Kensesaleta nabuanai do'o dene'eia.

⁵⁴ Asiai de'ovu koanai kau alimo Iesu deikaiaune.

⁵⁵ Deda'a odaoda kano kanaua laloanai, eta 'olele kauta toto'ai deovuata deoda'a Iesu a'i eomia valina deoika 'abuta.

⁵⁶ Iesu eda'a 'abuta boutai vanua kikita mai vanua namata. Kau 'olele kauta devuata deda'a tavatava 'abutai dene'eta divo, denoia ena tubu'a tolina mo bemabia kovo. Ena tubu'a deabia kovo kauta boutai 'eva demauli.

7

Kubuta Eta Vaikabasi.

(Mt 15.1-9)

¹ Palisea mai talavatu 'ola kauta vaida Ielusalemai deasi Iesu kevanai dedo'u.

² Iesu ibanona kauta vaida imata sia dedeini mai 'obuta deaniani, kanaua 'eva Iuda eta koakoai sia dekomolo Palisea kauta vailatai.

³ Palisea mai Iuda kauta boutai 'eva sia deaniani 'avaea, ia eta vaikabasi vitaitanai imata dedeini ana'ia vakaia deaniani kubutai 'ava'avata eta koakoa vitaitana.

⁴ Tavatava 'abutai de'asi koanai eta tavatava davata sia deanita, ia dedeini makava mai ia vaka deidi'u inoku deaniani. Kubuta eta talavatu doutamo vaka de'ima kave'i, itani 'ou, olaka mai iuduta davata vaka dedeini.

⁵ Kanaua 'ounai Palisea mai talavatu 'ola kauta Iesu delavuaia dediaka, "Ibanomu kauta kubuta 'ava'avata devavai vinalata sia devavai, dava 'ounai imata mai 'obuta deaniani?"

⁶ Iesu eta luva evamuea ediaka, "Isaia ena enoleai oi dede kaumui lovamui eakua. Kanania eleleia koma.

'Kau katania 'eva nututai mo

Lau devanama'ina'u.

'Beia nuata umauta 'eva

dau'ai vaika.

⁷ Dekukudivo veni'u 'avaea mo,

'olana talavatu katania kau devaikabasita 'eva

kau devavai talavatuta.'

Isa 29.13

⁸ Oi 'eva Dilava ena talavatu 'ani oi ovikanita, beia kau eta talavatu mo oi oabi 'inita."

⁹ Mai vaka e'outa ediaka, "Oi Dilava ena talavatu ivuninai 'eva oi oidiba vaika, kanaua 'ounai sibomui emui vaikabasi koakoata oi oabi 'inita.

¹⁰ 'Olana Mose eluva ediaka, 'Kamamu sinamu 'olata bo'aku', 'kau ka kamana 'o sinana enai beluva si'asi'a kauna 'eva oi bo'aku bala.'

¹¹ Beia oi odiaka, 'Kau ka kamana 'o sinana be'oua, vidulu davata bamenimui ia 'ani Koban.' (Koban anina 'eva 'Ainama davata Dilava ena'.)

¹² Kanaua 'ounai kau oi o'alavuta kamata, sinata sia beduluta.

¹³ Koakoa kanania oi ovavai 'eva oi sibomui emui ikabasi kau oi ovaikabasita, Dilava ena luva oi ovunia. Mai kataua boita doutamo vaka oi ovavai."

Kau Eva'obua Davata.

(Mt 5.10-20)

¹⁴ Mune'e Iesu mato e'aeta deda'a kevana, e'outa ediaka, "Boumuiai kaiamui ovala, oi boikabasi kave'i.

¹⁵ Dava ka mulumulai edododo kau nuanai davana kau sia eva'obua, beia dava ka kau nuanai ela'asi davana kau eva'obua.

¹⁶ Mai kaiana kauna lele be'ika."

¹⁷ Iesu do'u kauta evikanita lumai edodo koanai ibanona kauta deda'a kevana, luva ivavitaitana kanaua anina delavuai lavuui vaia.

¹⁸ Iesu e'outa ediaka, "Oi nuamui sia de'ailala, una? Sia oi oikabasia? Iani edododo kau nuanai davana kau sia eva'obua.

¹⁹ 'Olana kanaua 'eva nuanai sia edododo, ia bo'a laloanai edododo vakaia bela'asi." (Iesu luva kanania eluvavaia 'olana 'eva iani boutai denama'ina eka ani, sia beva'obuta.)

²⁰ Eluva 'udai ediaka, "Dava kau nuanai bela'asi davana betata'u kau beva'obuta.

²¹ Lalovai si'avata vaika kau nuanai dela'asi davata 'eva katania, kulakula, vinoa, akuaku,

²² demali, lalovai va'eva, dede, bo'o, kani, apa, 'oukeinikeini, mai vavai 'avaea.

²³ Dava si'avata vaika boutai nuai dela'asi davata detata'u kau deva'obuta."

Sulofenise Ateatena Ena Abiveni.

(Mt 15.21-28)

²⁴ Iesu 'abu kanaua evikania eda'a Tulo kanonai, ia ena ula sia kau ka beikabasi ia 'eva ua'i, kanaua 'ounai luma ka laloanai eda'a dodo, beia ena pode dalana asi'i.

²⁵ Ateate ka nakuna vatona nuanai ka'uba si'avana vaika emia, Iesu valina eika koanai, komolonai easi inoku aena 'olanai ekuidula.

²⁶ Ateate kanaua 'eva sia Iuda ateatena, beia ia 'eva 'Elene ateatena Sulofenise ai epulu. Iesu enoia ka'uba si'avana vaika nakuna nuanai belo'oa 'asi.

²⁷ Beia Iesu ia e'ouia ediaka, "Melo demaniani makava, 'olana melo eta iani ekabi ekaitoasi oveka be'ani 'eva sia enama'ina."

²⁸ Ateate ediaka, "Lovia namana e, luva umauna, beia oveka vaka melo deaniani 'ika'ikata vakavaka venunai davata deani."

²⁹ Iesu ia e'ouia ediaka, "Kanaua oluva koma 'ounai, mue mo da'a emu luma, ka'uba si'avana vaika nakumu nuanai davana 'ani ela'asi."

³⁰ Ateate emue eda'a ena luma koanai nakuna 'ani enama'ina edavalia ena muinai 'abunai, ka'uba si'avana vaika 'ani ela'asi.

Iesu Kaia Bubu Mai Mala Levo Kauna Evanama'inala.

³¹ Mune'e Iesu Tulo evikania Sidono mai Dekapoli kanotai ekeini eda'a Kalilea 'ovunai ela'asi.

³² Kau vaida deta'u kau ka kaiana debubu maivaka malana elevo kauna devuaia deasi Iesu kevana, denoia akanai bekao'au bevanama'inala.

³³ Iesu kau kanaua do'u vilootai evamiala tau, inoku imana li'uli'una kaiana laloanai eisia dodo, mune'e imana e'anodia kau kanaua malana eabia kovo.

³⁴ Iesu ea'adae vutuvutu eikaia elavodi, inoku kau kanaua e'ouia ediaka, "Efata!" (Anina 'eva, "Luvu!")

³⁵ Alimo kau kanaua kaiana ileta deluvu mai malana enama'ina eluvaluva kave'i.

³⁶ Iesu e'outa kao vali kanania sia kau ka vailanai beluva vaia. E'outa kao beia ia lelana sia deika, ia valina dekava.

³⁷ Kau boutai detabulovo si'asi'a deluva dediaka, "Ia dava boutai evavai kave'i! Kaiata debubu kauta lele deika vaka mala levo kauta deluvaluva kave'i."

8

Iesu Sinavu Vaninavui (4,000) Evananita.

(Mt 15.32-39)

¹ Melala kanaua'i kau doutamo mune'e deda'a Iesu kevanai dedo'u 'udai. Ia iani asi'i 'ounai, Iesu ibanona kauta e'aeta deasi kevanai e'outa ediaka,

² "Kau katania 'eva alalota vaika, 'olana melala 'ani koi kele'e'uai demimia eta iani 'eva 'ani eole.

³ Bema mai vikolota basinita dalai 'eva vaidia asi'i dema'eko, 'olana vaidia 'eva 'abu dau'anai deasi."

⁴ Ibanona kauta de'ouia dediaka, "Ita 'eva kano'akunai. Iani a'ia'i ekabi, kau katania ekavananita?"

⁵ Iesu elavuaita ediaka, "Emui iani boutai vida?" Ia dediaka, "Palaoa kalakoi ka."

⁶ Iesu kau e'outa kanoai bemiadivo. Inoku palaoa kalakoi ka kataua eabi isi vanama'ina luvana Dilava evenia, inoku ekovita mukamuka ibanona kauta evenita bekokole, kau bevenita. Eluva vitaitana devavaia.

⁷ Eta sisi kikita vaka vitalua, evanama'inata, inoku ibanona kauta evenita bekokole.

⁸ Boutai deaniani, deani vunu. Ibanona kauta iani kalita dedoubou 'eva aleka kalakoi ka.

⁹ Kauta 'eva boutai sinavu vani navui (4,000) boita.

Inoku kaka esinita deda'a eta 'abu.

¹⁰ Inoku ibanona kauta ita asiai dele'au deda'a Dalmanuta kanona.

Palisea Kauta De'ula

Koa Ka Beikala.

(Mt 16.1-4)

¹¹ Palisea kauta deasi Iesu delavuaia bevakovoa, koa ka bevavaia beikala, bevamomo'aia ena siavu 'eva Dilava kevanai easi.

¹² Iesu elavodi mai nua'avalana, eluva ediaka, "Dava 'ounai ulu kanania kaumui koa oi okakavu? Luva umauna lau oi a'oumui, ulu kanania kaumui koa ka sia bavaikamui."

¹³ Inoku ia evikanita asiai ele'au 'udai ekeini eda'a 'ovu avekena.

Palisea Kauta Mai 'Eloda Eta Vakubu Mulamulana.

(Mt 16.5-12)

¹⁴ Ibanona kauta palaoa boutai debolabolata, palaoa ka'onamo mo asiai emia.

¹⁵ Iesu ia evaidibata ediaka, "Makamui oi bovata, Palisea kauta mai 'Eloda eta vakubu mai eta nuani koakoata asi'i oi omavavai makauna."

¹⁶ Ibanona kauta sibota vilootai deluvaluva dediaka, "Iani sia ka kabiakasi 'ounai kanania eluva koma."

¹⁷ Iesu eikabasi davai deluva, e'ovenita ediaka, "Dava 'ounai iani kele'emui asi'i davana luvana oi oluluva? Oi sia oi oikabasi 'o ovonai sia oi o'ovo? Nuamui depasisi vaika?"

¹⁸ Mai makamui, beia sia oi oikala? Mai kaiamui, beia lele sia oi oika? Dava sia oi olalovai 'ini?

¹⁹ Lau palaoa ima akovi mukamuka kau sinavu ima navui (5,000) deani vunu koanai kalita aleka vida oi ovavonu?" Ia deluva dediaka, "Aleka 'ouka lua."

²⁰ Ia e'outa ediaka, "Maivaka palaoa kalakoi ka akovi mukamuka kau sinavu vaninavui (4,000) deani vunu, kalita aleka vida oi ovavonu?" Ia dediaka, "Aleka kalakoi ka."

²¹ Ia e'outa ediaka, "Oi dava 'ounai nuamui sia de'ailala?"

Iesu Betesaidai Maka Ede Kauna Makana Evanama'inata.

²² Deasi Betesaida vanuanai dela'asi koanai, kau vaidia maka ede kauna ka devada'ala deasi Iesu kevana denoia akanai bekao'au makana bevanama'inata.

²³ Iesu maka ede kauna imanai eabi evada'ala dela'asi vanua mulinai, makana e'anodi mai imana akanai ekao'au inoku elavuaia ediaka, "Dava 'ani oika?"

²⁴ Maka ede kauna ea'adae, eluva ediaka, "Kau aikata deda'a to'ato'a itani au boita."

²⁵ Mune'e makanai ekao'au 'udai, ia eika to'ato'a koanai ena ikaika 'ani enama'ina, dava boutai eikata kave'i.

²⁶ Esinia beda'a ena luma, e'ouia ediaka, "Vanua laloanai sia boda'a dodo."

Petelo Iesu E'ouia Dae Keliso.

(Mt 16.13-20; Lk 9.18-21)

²⁷ Iesu ibanona kauta ita deda'a Kaisalea Pilipo vanuata, dalai ibanona kauta elavuaia ediaka, "Kau 'eva dava dekoma, lau 'eva dai?"

²⁸ Ena luva devamuea dediaka, "Vaida dediaka, oni 'eva Vaidi'u kabukabu kauna Ioane, 'a vaida dediaka, oni 'eva Elia, maivaka vaida dediaka, oni 'eva enolea kauna ka."

²⁹ Beia ia elavuaia ediaka, "Ia oi odiaka, lau 'eva dai?" Petelo ia e'ouia ediaka, "Oni 'eva Keliso, Dilava edilamu kaumu."

³⁰ Iesu e'outa kao ia luvana kau ka sia be'oua.

Iesu Beanana Mai Bebaba Luvata Eluvavai.

(Mt 16.21-28; Lk 9.22-29)

³¹ Ia ibanona kauta evaikabasita makava, Kau Nakuna 'eva anana doutamo beananavaita, vanua 'ola kauta, kabukabu kauta namata, mai talavatu 'ola kauta bevaivivia maivaka beaku bala, beia boni ivakoinai 'eva beko'isi 'udai.

³² Luva kanania e'ouia dae kave'i koanai, Petelo Iesu evamiala tau 'aba'abai eluva pasisi venia.

³³ Beia Iesu 'eva elava 'udai, ibanona kauta eikata, Petelo e'ovenia ediaka, "Satani, Da'atau, muli'u da'ala! 'Olana emu lalovai 'eva sia Dilava enai, ia kau eta."

³⁴ Inoku Iesu mato e'aeta maivaka ibanona kauta ita e'outa ediaka, "Kau ka be'ula lau bebano'u koanai, ia sibona ena mauili bevikaniana, ena au ido'o valaukuna beabia 'isi bevuala, lau muli'uai bedada'a.

³⁵ Bema ena mauili beabi 'inia kauna ena mauili bevataulea, beia lau 'ou'uai mai vali nama'ina 'ounai ena mauili beitoa'au kauna 'eva ena mauili beabia.

³⁶ Kau ka kanobata itoina bema abia ia ena mauili bemavataulea 'eva enai ena nama'ina dava?

³⁷ O kau ka dava beveveni ena mauili beabia 'udai?

³⁸ Lau dai'uai 'o e'u luva daitai kau ka kulakula maivaka ulu sia'avana kanania vailatai bemalalai veni'u kauna, Kama'u ena nuavi ena anelu kabukabuta ita be'asi koanai Lau Kau Nakuna vaka ia bamalalai venia."

9

¹ Maivaka Iesu e'outa ediaka, "Luva umauna mo lau oi a'oumui, vaida nia'i delalava kauta sia bebaba beda'a mo Dilava ena lovia vanuana mai siavuna be'asi 'eva beikala."

Iesu Ikana Evaedeia.

(Mt 17.1-13; Lk 9.28-36)

² Melala kalakoi de'ole mulinai, Iesu 'eva Petelo, Iakobo mai Ioane mo evada'ata lolo namana kai dele'au, ua'i demiaatau koanai vailatai ikana evaedeia,

³ ena tubu'a e'amale 'amale edeva'i ovo, edeva'i si'asi'a kanobatai tubu'a deini kauna ka kanaua sia bemavadeva'ia koma.

4 Inoku Elia mai Mose devaila divo ia vailatai dela'asi, lalua Iesu ita deluvaluva.

5 Petelo eta'u Iesu e'ouia ediaka, "Vaikabasi kaumu e, ita nia'ia'i 'eva enama'ina vaika, aiole koi lai bavavai, ka oni emu, ka Mose ena, ka Elia ena."

6 Beia demakau si'asi'a 'ounai, Petelo a beluva koma 'eva sia eikabasi.

7 Oli ka easi e'alavuta, maivaka lele ka oli laloanai easi, ediaka, "Kanania 'eva lau naku'u, e'u lalo'au kauna, lalena oi bo'ika."

8 Alimo dekaillao dekaimai beia ia sia kau ka deikaia, Iesu sibona mo ia vilootai.

9 Loloai de'ovu koanai, Iesu e'outa kao deika davata 'eva kau ka vilanai sia beluluva, beda'a mo Kau Nakuna bai beko'isi 'udai.

10 Ena luva delalovai 'inia, ia sibota mo deluvaluva vaia, bai ko'isi 'udai anina 'eva dava.

11 Ia deta'u Iesu delavuaia dediaka, "Dava 'ounai talavatu 'ola kauta deluva Elia 'eva beasi makava?"

12 Iesu e'outa ediaka, "Luva umauna. Elia 'eva beasi makava, dava boutai bevavai kave'i. Ia dava 'ounai Kau Nakuna luvana Puka Kabukabunai deleleia beanana si'asi'a vaika maivaka bevaivivia?"

13 Lau oi a'oumui, Elia 'eva 'ani easi, maivaka kau eta ula vinaulata boutai kevanai devavai, ia luvana deleleia vitaitanai."

Iesu Melo Ka Nuanai Ka'uba Si'ava Vaikana Melona Evamaulia.

(Mt 17.14-21; Lk 9.37-43)

14 Deasi ibanona kauta vaida kevatai koanai, kau doutamo vaika delavata kaiukaiu, talavatu 'ola kauta mai ibanona kauta ita devina deikata.

15 Do'u kauta Iesu deikaia koanai, detabu lovo si'asi'a deveau deda'a kevana devanama'inala.

16 Iesu ibanona kauta elavuaia ediaka, "Dava vinana oi ovina vaia?"

17 Do'u laloanai kau ka eluva ediaka, "Vaikabasi kaumu e! Lau naku'u abia a'asi oni kevamu, 'olana nuanai mala si'avana ka'ubana emimia 'ounai sia eluvaluva.

18 Melala vaida ka'uba si'ava vaikana e'iuvai 'iuvai 'eva eva'ekoa kanoai enodivo nutunai budo budo mai nikena eala'ini kauna epasisi ovo. Ibanomu kauta anoita ka'uba si'avana vaika belo'oa asi, beia sia edaita."

19 Iesu e'outa ediaka, "Ulu kanania kaumu emui abiveni asi'i, kevamui ai bamimia beda'a mo melala davanai? Bakau anana kevamui ai beda'a mo melala davanai? Melo oabia omai keva'u."

20 Melo deabia deda'a Iesu kevana, ka'uba si'avana vaika Iesu eikaia koanai, melo evatakutaku si'ala, e'eko kanoai e'ule keini 'ule keini, nutunai budo budo dela'asi.

21 Iesu melo kamana elavuaia ediaka, "Aida koanai kanania boina eabi sinala?" Ia ediaka, "Ani 'oma'omanai melalanai.

22 Melala doutamo ka'uba si'avana vaika etata'u 'alova akanai ekapoa 'au mai veiai ekapoa uku bevabala ekoma. Beia 'ani bovavaia koanai, lalomai, mai dulumai."

23 Iesu e'ouia ediaka, "Dava 'ounai 'ani bavavaia bedaia okoma! Dilava eabivenia kauna kevanai dava boutai bevavai 'eva bedaia."

24 Alimo melo kamana eva'oi ediaka, "Lau 'eva 'ani abiveni, bomadulu'u e'u abiveni kikina abivenina vanamaia."

25 Iesu do'u kauta eikata, develi molau deda'a kevana koanai, ia ka'uba si'avana vaika e'ovenia ediaka, "Mala levo mai kaia bo'o ka'ubana, lau oni a'oumu. Melo nuanai la'asi, kanana'i sia bododo 'udai."

26 Ka'uba si'avana vaika eva'oi, melo evatakutaku si'ala, inoku ia ela'asi, melo eno itanimo eba, kau dediaka melo 'ani eba vaika.

27 Beia Iesu melo imanai eabi evelia isi, alimo eko'isi elavadivo.

²⁸ Iesu luma laloanai eda'a dodo, ibanona kauta vunivuniaia delavuaia dediaka, "Dava 'ounai lai ka'uba si'avana lai balo'oa asi 'eva sia edaia?"

²⁹ Ia e'outa ediaka, "Dava katania boita ilo'o asita dalana ka asi'i, meamea mo sibona."

Iesu Ena Ba Valina E'ouia 'Udai.

(Mt 17.22-23; Lk 9.43-45)

³⁰ Iesu ibanona kauta ita 'abu kanaua devikania, Kalilea kanonai dekeini. Iesu sia eula kau ka beikabasi ia 'eva a'ia'i,

³¹ 'olana ibanona kauta evaikabasita, e'outa ediaka, "Kau ka lau Kau Nakuna veni'u beveveni kou'u bekokou kau imatai beuda'u, beaku ba'u. Beia melala ivakoinai lau 'eva bako'isi 'udai."

³² Beia ia 'eva sia deikabasi dava eluvavaia maivaka belavuaivaia 'eva demakau.

Dai 'Eva Namana?

(Mt 18.1-5; Lk 9.46-48)

³³ Kapelanauma vanuanai dela'asi, luma laloanai Iesu ibanona kauta elavuaia ediaka, "Vali'u dalai ka'asi 'eva dava oi oviadedua vaia?"

³⁴ Beia sia deluva, 'olana dalai deasi 'eva dai vana namana be'ao deviatedua vaia.

³⁵ Iesu emia divo, ibanona kauta 'ouka lua e'aeta, e'outa ediaka, "Dai e'ula be'ana'ia kauna, ia sibona muliai vaika bene'ea divo maivaka kau boutai eta da'alabi kaunai be'ao."

³⁶ Inoku Iesu melo kikina ka eabia vailatai evalavala divo kukuanai eabi vakaia e'outa ediaka,

³⁷ "Kau ka lau va'uai melo kikina kanania boina eabia dae kauna lau vaka eabi'u dae, lau eabi'u dae kauna 'eva sia lau mo sibo'u, beia esini'u Dilavana vaka eabia dae."

Sia Evaivivita Kauna 'Eva

Ita Banota.

(Lk 9.49-50)

³⁸ Ioane eta'u e'ouia ediaka, "Vaikabasi kaumu e, kau ka lai aikaia, vamuai ka'uba si'avata vaika elo'ota asi, lai ata'u a'ouia bevapuala, 'olana ia 'eva sia ita banota."

³⁹ Iesu e'outa ediaka, "Sia oi boma'alavuaia, 'olana lau va'uai siavu vinulata evavai kauna, muliai lau va'u sia bevasi'avanala.

⁴⁰ 'Olana sia evaivivita kauna 'eva ita banota.

⁴¹ Luva umauna lau oi a'oumui. Va'uai kau ka vei 'ou ka bevenimui oi boinua 'olana oi 'eva Keliso ena, kau kanaua 'eva mai tavana."

Vikovo Bevavaia Kauna Kevanai Besi'avana Vaika.

(Mt 18.6-9; Lk 17.1-2)

⁴² " Bema dai lau keva'uai deabiveni melota ka si'avanai bene'eadivo kauna 'eva bika'a nama vaikana ka 'atonai bedo'oa 'au bekapoa uku 'atuai 'eva bemanama'ina.

⁴³ Imamu ka bevava'evamu koanai, botaua uku, imamu ka'onamoai maui nama'ina laloanai bodododo, inoku sia enama'ina imamu luai boda'a 'alova sia ebobo'o kovo 'abuna.

⁴⁴ 'Abu kanaua 'imolo 'imolota kau deanita davata 'eva sia deba kovo, maivaka 'alovana sia ebo'o kovo.

⁴⁵ Aemu ka bevava'evamu koanai, botaua uku, aemu ka'onamoai maui nama'ina laloanai bodododo, inoku sia enama'ina aemu luana nama'itai 'alova 'abunai bekapomu dodo.

⁴⁶ 'Abu kanaua 'imolo'imolota kau deanita davata 'eva sia deba kovo, maivaka 'alovana sia ebo'o kovo.

⁴⁷ Makamu ka bevava'evamu koanai, boiasi, makamu ka'onamoai Dilava ena lovia vanuanai bodododo maivaka sia enama'ina makamu luana nama'itai 'alova 'abunai bekapomu dodo.

⁴⁸ 'Abu kanaua 'imolo 'imolota kau deani davata 'eva sia deba kovo, maivaka 'alovana sia ebo'o kovo.

⁴⁹ Inoku mekau 'alova boina betata'u kau boutai bevaananata vaika itani dedamenata boina."

⁵⁰ "Damena 'eva dava nama'ina, beia bema damena sia bedia'a koanai ivadia'a 'udai dalana asi'i. Oi 'eva sia kanaua boina oi bo'ao, ia damena oi boabia vilomuia, oi bovaka'onamo."

10

Ka Adana Sia Beva'ovua.

(Mt 19.1-12; Lk 16.18)

¹ Iesu 'abu kanaua evikania eda'a Iuda kanonai ekeini eda'a Iolidana duasi. Kau doutamo deasi Iesu kevanai dedo'u 'udai, mune'e evaikabasita melala boutai evavai vitaitata.

² Palisea kauta vaida deda'a kevana devakovoa dediaka, "Eta talavatuai kau ka adana bema eva'ovua koanai mai ena komolo, 'o?"

³ Iesu e'outa ediaka, "Mose ena talavatu laloanai dava ekoma?"

⁴ Ia ena luva devamuea dediaka, "Mose ena talavatu ediaka, kau ka adana beva'ovua koanai malelena belelea beda'a ateate kevana, inoku ateate beva'ovua."

⁵ Iesu e'outa ediaka, "Olana emui nua pasisi 'ounai Mose talavatu kanania evenimui.

⁶ Beia Dilava kanobata evavaia melalanai, kau evavaita moluane mai ateate.

⁷ Kanaua 'ounai kau 'eva kamana sinana bevikanita, ia adana ita bemia ka'ona.

⁸ Ia lalua kauanita 'eva ka'onamo boina. Kanaua 'ounai lalua kauanita 'eva ka'onamo, beia sia lua.

⁹ Dilava eta'u evaka'onamota davana kau sia beva'alamaia."

¹⁰ Deda'a luma ka laloanai, ibanona kauta 'eva Iesu kevanai luva kanaua anina delavuui lavuai vaia 'udai.

¹¹ Iesu e'outa ediaka, "Kau ka adana eva'ovua mune'e ateate ka eadavala 'udai ia 'eva mo'a kauna.

¹² Ateate vaka adana bevikania kau ka beadavala ia vaka 'eva mo'a ateatena."

Iesu Melo Kikita Evanama'inata.

(Mt 19.13-15; Lk 18.15-17)

¹³ Kau vaida nakuta devada'ata deda'a Iesu kevana akatai bekao'au bevanama'inata, beia ibanona kauta deta'u de'ovenita.

¹⁴ Iesu koa kanaua eikaia koanai ebadu, ediaka, "Melo kikita ovikanita, demai lau keva'u, sia olo'ota, 'olana katania boita 'eva Dilava ena lovia vanuana kauta.

¹⁵ Luva umauna lau oi a'oumui, Dilava ena lovia vanuana iabinai kau ka melo kikina boina sia be'ao koanai, ia 'eva sia beda'adodo kovo."

¹⁶ Inoku Iesu melo eabita, imana akatai ekao'au evanama'inata.

Lavo Kauna.

(Mt 19.16-30; Lk 18.18-30)

¹⁷ Iesu dalai eda'a laloanai, kau ka eveaua nanadi eda'a vailanai ekuidula elavuaia ediaka, "Vaikabasi kaumu nama'imui e, lau dava bavavaia maui keinikeini babia?"

¹⁸ Iesu eta'u e'ouia ediaka, “Dava 'ounai lau nama'i'u o'oua? Kau ka sia enama'ina, ia Dilava sibona mo enama'ina.

¹⁹ Talavatu 'ani oikabasia. Sia Boakuaku, sia bokulakula, sia bovinao, sia bo'ou keinikeini, sia bodedede, kamamu sinamu 'olata bo'aku.”

²⁰ Kau kanaua eluva ediaka, “Vaikabasi kaumu e, talavatu katana 'eva kiki'u koanai a'imata kave'i easi mo vali'u.”

²¹ Iesu ia eika 'inia mai lalo'auna inoku eluva ediaka, “Dava ka'onamo otabu vaia 'eva kanania, emu lavo botavatava vaita, monita ulalu kauta bovenita koanai vutuvutuai tavamu boabia, inoku bo'asi muli'uai bodada'a.”

²² Luva kanaua eika koanai, vailana maivilalona eda'a ovo mainua ananana, 'olana ia 'eva lavo kauna.

Lavo Kauta Vutuvutuai Bedododo 'Eva Bepasisi.

²³ Iesu ekai to'ato'a, ibanona kauta e'outa ediaka, “Lavo kauta Dilava ena lovia vanuana laloanai bedododo 'eva epasisi vaika”

²⁴ Ibanona kauta luva kanaua deika 'eva detabu lovo si'asi'a, beia mune'e e'outa 'udai ediaka, “Naku'u e, Dilava ena lovia vanuana ida'a dodona 'eva epasisi vaika.

²⁵ Kamela nila 'ilenai bekeini 'eva bedaia, beia lavo kauna Dilava ena lovia vanuanai bedododo 'eva epasisi vaika.”

²⁶ Ibanona kauta detabu lovo si'asi'a, sibota viloatai deluvaluva dediaka, “Dai 'eva mauili beabia?”

²⁷ Iesu eika 'inita, inoku ediaka, “Dava ivavaita kau kevatai sia bedaia, beia Dilava kevanai 'eva edaia. 'Olana dava boutai ivavaita Dilava kevanai 'eva edaia.”

²⁸ Petelo eta'u Iesu e'ouia ediaka, “Lai emai dava boutai lai avikanita, oni mulimuai lai adada'a.”

²⁹ Iesu e'outa ediaka, “Luva umauna lau oi a'oumui, kau ka betata'u lau dai'uai mai vali nama'ina dainai ena luma, 'o bo'akalana, 'o lovuna, 'o sinana, 'o kamana, 'o nakuna, 'o ena kano bevikanita,

³⁰ vali'u melala kanania'i ia 'eva dava doutamo be'abi, ena luma, bo'akalana, lovuna, sinana, nakuna mai ena kano boutai sinavu sinavu be'abi, maivaka beva ananala, inoku melalana be'asi koanai ia 'eva mauili keinikeini beabia.

³¹ Beia doutamo de'ana'ia kauta 'eva bemulikai, maivaka demulikai kauta 'eva be'ana'ia.”

Iesu Melala Ivakoinai Ena Ba Valina Eluvavaia.

(Mt 20.17-19; Lk 18.31-34)

³² Dalai Ielusalema kokona deda'a koanai Iesu 'eva e'ana'ia ibanona kauta nuata ebavunu si'asi'a, maivaka mulinai deda'a kauta 'eva demakau, kanaua Iesu eta'u ibanona kauta e'aeta tau, kevanai dava bepupulu davana valina 'eva vailatai eluvavaia.

³³ Ediaka, “Ita vali'u kaele'au Ielusalemai ua'i kau ka lau Kau Nakuna veni'u beveveni kou'u bekokou kabukabu kauta mai talavatu de'olavaia kauta kevatai, iaku ba'u lovuna bevamomo'aia, pulu edea kauta bevenita.

³⁴ Kau kataua lau bemedia media vai'u, be'anodi'u, be'odi'u inoku beaku ba'u, beia melala ivakoinai 'ani bako'isi 'udai.”

Iakobo Mai Ioane Eta Ula Ka

Iesu Kevanai.

(Mt 20.20-28)

³⁵ Sebedeo nakuna lalua Iakobo mai Ioane deasi Iesu kevana, de'ouia dediaka, “Vaikabasi kaumu e, emai ula davana ka kevamuai lai banoinoi vaia 'eva bovavaia.”

³⁶ Iesu e'outa ediaka, "Oi o'ula dava kevamuiavai bavavaia?"

³⁷ Ia deluva dediaka, "Emu nuavi oabia koanai, lai laluaana ka oni idibamuai ka 'ealimuai lai bamamia."

³⁸ Beia Iesu ia e'outa ediaka, "Oi onoinoi vaia davana 'eva sia oi oikabasia. Lau bainua 'ouna oi boinua bedaimui? Maivaka lau bevaidi'u kabukabu'u idi'u kabukabuna oi bevaidi'u kabukabumui bedaia?"

³⁹ Laluana deluva dediaka, "O, Bedaimai."

Inoku Iesu e'outa ediaka, "Lau bainua 'ouna 'eva oi vaka oi boinua, maivaka lau bevaidi'u kabukabu'u idi'u kabukabuna oi vaka bevaidi'u kabukabumui."

⁴⁰ Beia idibauai mai 'eali'uai bemimia kauta 'eva lau sia badilata. Mia 'abuta kataua 'eva Dilava 'ani eva'oluta, ia ena ula kauta mo eta."

⁴¹ Ibanona kauta 'ouka 'ulu kanaua deika koanai Iakobo mai Ioane itana debadu venita.

⁴² Iesu e'aeta deasi kevana e'outa ediaka, "Oi oikabasi Pulu edeana kauta eta kau delovia vaita, ia 'eva kula'ilai kau de'ana'ia vaita, maivaka eta siavuui kau de'imata."

⁴³ Beia oi vilouamuiavai 'eva sia kanaua boina, dai namana belalovaia kauna 'eva da'alamui iabinai be'ao.

⁴⁴ Maivaka bema dai e'ula be'ana'ia kauna 'eva oi boumuiavai da'alamui iabina kaunai be'ao.

⁴⁵ Lau Kau Nakuna asi 'eva da'ala'u sia be'abi, beia da'ala ba'abi 'ounai asi, maivaka e'u maui baveveni kau doutamo batavata bemaui."

Iesu Batimeo Makana 'Edeta Evanama'inata.

(Mt 20.29-34; Lk 18.35-43)

⁴⁶ Ia Ielikoai dela'asi. Iesu mune'e ibanona kauta mai kau doutamo ita Ieliko devikania, dala 'aba'abanai maka'ede kauna vana Batimeo (ua 'eva Timeo nakuna) emia divo ua'i enoi va'ame.

⁴⁷ Kau kanaua Iesu Nasaleta kauna vana de'ouia 'uluna eika koanai, alimo e'ae ediaka, "Iesu Davida nakuna e! Lalo'u."

⁴⁸ Kau deta'u depilaia lele bevuvunu, beia ia 'eva e'ae 'udai 'ae 'udai e'ae 'unu'unu ediaka, "Davida nakuna e! Lalo'u."

⁴⁹ Iesu elavadivo, e'outa ediaka, "O'aeia." Kanaua 'ounai ia deta'u maka ede kauna de'ouia, "Lalomu denama, ko'isi, ia 'eva oni e'aemu."

⁵⁰ Komolonai ena ikalu eitoia 'au, eko'isi eda'a Iesu kevana.

⁵¹ Iesu ia elavuaia ediaka, "O'ula dava bavavaia kele'emuai?" Maka ede kauna eluva ediaka, "Vaikabasi kaumu e. A'ula maka'u bomavanama'inata."

⁵² Iesu e'ouia ediaka, "Da'a, emu abiveni eta'u 'ani evamaulimu." Makana 'ani deata, kanaua'i Iesu mulinai eda'a.

11

Iesu Ielusalemai Eda'adodo.

(Mt 21.1-11; Lk 19.28-40; Io 12.12-19)

¹ Ielusalema deka'vuia deda'a, deasi Olive lolonai, Betefage Betani kevatai, ua'i Iesu ibanona kauta lalua esinita 'ana'i,

² e'outa ediaka, "Oi boda'a vanua kanaua vailatai vanuana laloanai oi boda'a dodo, doniki nakuna ka oi bodavalia kau ka sia emia'au kovo donikina ua'i 'ani dedo'ouia 'au, oi boluvua oi boabia bo'asi."

³ Bema kau ka belavua'imui, bediaka, 'Dava 'ounai kanana oi ovavaia?' koanai, oi bo'oua bodiaka, 'Lovia namana eula venia, melala kikinamo vakaia bevamuea.'"

⁴ Laluana deda'a doniki nakuna ka dedavalia vanua bo'adanai luma ka nutualana aunai ido'o 'auna deikaia. Deluvuia laloanai,

⁵ kau vaida ua'i delava kauta delavuaita, dediaka, "Dava 'ounai doniki nakuna oi oluvua?"

⁶ Iesu eluvavaia vitaitanai mo kau kataua de'outa 'eva devikanita.

⁷ Doniki nakuna deabi deasi Iesu kevana koanai, kabenai eta tubu'a delavalita, inoku Iesu emia'au.

⁸ Kau doutamo eta tubu'a dalai delavali, vaida 'eva dala 'aba'abanai au uauata detauku delavalita.

⁹ Vailanai mai mulinai deda'a kauta deva'oi dediaka,

"Osana! Lovia namana vanai

e'asi kauna kavanama'inala.

¹⁰ 'Ava'avata Davida ena

lovia vanuana 'ani e'asi kauna

kavanama'inala.

'Osana, aka umaunai

Dilavana kavanama'inala."

¹¹ Iesu Ielusalemai ela'asi Lo'e Kabukabuna laloanai eda'a dodo, dava boutai eika, beia melala e'iu'iu 'ounai ibanona kauta 'ouka lua ita demue deda'a Betani.

Iesu Suke Auna Esivadala.

(Mt 21.18-19)

¹² Elani Betani devikania laloanai Iesu vikolo eakuia.

¹³ Suke mai uauana dau'ai eikaia, eda'a kevana beikala kave'i bema vuana ka itani, beia uauana 'avaeata mo sia dava ka edavalita, 'olana Suke sia eta vua melalana.

¹⁴ Iesu au kanaua e'ouia ediaka, "Oni vuamu kau ka sia beanita 'udai beda'a mo to'ona asi'i." Ibanona kauta lenea kanaua deika.

Iesu Lo'e Kabukabunai Edodo.

(Mt 21.12-17; Lk 19.45-48; Io 2.13-22)

¹⁵ Ielusalemai dela'asi, Iesu Lo'e Kabukabunai eda'adodo tavatava kauta elo'ota asi, moni deabi keini kauta eta vakavaka eva'i'itolita mune'e boiomalo detavatava vaita kauta eta mia'au davata edolita 'i'itolita.

¹⁶ Iesu eta dala e'alavuta ka ena tavatava davana sia bevuala keini Lo'e Kabukabuna ikekebilina laloanai.

¹⁷ Kau evaikabasita ediaka, "Puka Kabukabunai deleleia, Dilava ediaka, 'E'u luma 'eva kau boutai be'oua eta meamea lumana', beia oi 'ani abi'avaea kauta eta pode 'abuna oi ovaoo."

¹⁸ Kabukabu kauta namata mai talavatu de'olavaia kauta 'ulu kanania deika 'ounai, iakubana dalana dekavua, ia demakau vaia 'olana kau boutai 'eva ena vaikabasi luvata kataua delalonama vaita 'ounai.

¹⁹ Lavilavi 'eva vanua namana kanaua devikania.

Suke Auna 'Ani E'ibu.

(Mt 21.20-22)

²⁰ 'Avu'avuni deda'a keini koanai, Suke kanaua deikaia 'ani e'ibu eda'a mo lamunai.

²¹ Petelo elaloune inoku Iesu e'ouia ediaka, "Vaikabasi kaumu e! Ikala. Suke o'ovenia auna 'eva 'ani e'ibu."

²² Iesu e'outa ediaka, "Dilava oioboabivenia.

²³ Luva umauna lau oi a'oumui. Kau ka lolo kanania bema'oua, 'Sibomu ko'isi 'atu laloanai eno uku', bevamomo'aia nuana sia belalo to'ato'a koanai davana bepupulu. Ia eula vaia 'eva beabia.

²⁴ Kanaua 'ounai lau oi a'oumui, oi oula veni davata boutai meameai oi bonoinoi, inoku oi boobiveni 'eva oi bodavalita oi emui.

²⁵ Meamea laloatai oi bolalava koanai, devasi'avanamui kauta eta si'avana oi bo'ou kao, inoku Kamamui vutuvutuai kauna emui si'avana vaka be'ou kao.

²⁶ Beia eta si'avana sia oi bo'ou kao koanai, Kamamui vutuvutuai emimia kauna emui si'avana vaka sia be'ou kao."

Iesu Ena Siavu

Delavua'ilavuai Vaia.

(Mt 21.23-27; Lk 20.1-8)

²⁷ Mune'e Ielusalemai dela'asi, Iesu eda'a Lo'e Kabukabuna vilanai eda'a keini koanai, kabukabu kauta namata, talavatu de'olavaia kauta, maivaka vanua kauta namata deda'a Iesu kevana.

²⁸ Delavuaia dediaka, "Siavu davanai vinaula katania ovavaita, maivaka dai siavu katania evenimu?"

²⁹ Iesu ediaka, "Lau vaka lavuai ka bavenimui, bema anina oi bo'ou'u koanai dai ena siavuai vinaula katania avavai 'eva bavaikabasimui.

³⁰ Ioane ena vaidi'u kabukabu 'eva vutuvutuai easi 'o kau kevatai easi? Oluva."

³¹ Sibota viloatai delovaku vaia dediaka, " 'Ekadiaka vutuvutuai easi' koanai belavuaia 'Dava 'ounai sia oi ovamomo'aia?"

³² 'O ekadiaka 'Beia bema Kau kevatai easi." Beia kau mo demakau vaita, 'olana kau boutai deikabasi Ioane 'eva enolea kauna umauna.

³³ Ia Iesu de'ouia dediaka, "Sia lai aikabasi." Iesu mune'e e'outa ediaka, "Lau vaka siavu davanai vinaula katania avavai 'eva sia bavaikabasimui."

12

Luva Ivavitaitana

Kula I'imana Kauta.

(Mt 21.33-46; Lk 20.9-19)

¹ Iesu eta'u luva ivavitaitanai e'outa ediaka "Kau ka vine kulana evavaia, alana eko bubua, vine vuata ivakali mukamukata 'ulina eoia, mai ika kaona lumana evavaia. Kau vaida evenita be'imala, beia ia 'eva kalima eda'a.

² Vine de'aiva koanai kau kanaua ena da'ala iabina kauna ka esinia eda'a kula de'imala kauta kevata. Vine anita vitalua kevatai be'abi.

³ Beia kula i'imana kauta deta'u da'ala iabina kauna deabia kao, de'odia, desinia imana 'avaeana emue.

⁴ Mune'e 'ola kauna da'ala iabina kauna ka esinia eda'a kevata 'eva 'olana dekalalaia ulu maivaka devamalalalaia.

⁵ Mune'e ena da'ala iabina kauna ka esinia eda'a 'eva deaku bala. Doutamo esinita deda'a, vaida deaku si'ata, ia vaida 'eva deaku bata.

⁶ Ka'onamo emia besinia kauna 'eva nakuna elalo'au venia kauna. To'ona umaunai ia esinia, ediaka, 'Naku'u kanania basinia bedada'a 'eva 'ani 'olana be'aku.'

⁷ Beia kula i'imana kauta delovaku, dediaka, 'Omai, kanania 'eva kula 'ola kauna nakuna, kaku bala, ena kula kanania mai dava boutai 'eva ita etai be'ao.'

⁸ Kanaua 'ounai deabia kao, deaku bala, kauanina dekapoia keini kula mulinai."

⁹ Iesu ia elavuaia ediaka, "Oi olalovaia, kula 'ola kauna 'eva dava bevavaia? Ia be'asi kula i'imana kauta beaku bata, vine kulana beabia kau vaida bevenita be'imala.

¹⁰ Puka Kabukabunai deleleia davana sia oi ovakua? Kanania eluva koma, 'Luma ivavaina kauta devaivivia bika'ana 'eva luma ivua 'inina kubuana bika'ana medianai e'ao.

11 Kanania 'eva Lovia namana evavaia, kaikala katabulovo!' "

Sal 118.22, 23

12 Iuda kauta namata Iesu iliona delalovaia 'olana deikabasi luva ivavitaiana 'eva ia akatai eluvavaia. Beia kau demakau vaita 'ounai devikania deda'a.

Takisi Veni Lavuailavuaina.
(Mt 22.15-22; Lk 20.20-26)

13 Muliai ia deta'u Palisea kauta mai 'Eloda enai de'au kauta vaidia desinita deda'a Iesu kevana lavuailavuai ai bevaviua.

14 Inoku deda'a kevana delavuaia dediaka, "Vaikabasi kaumu e, lai aikabasi oni 'eva luva umauta oluluva, kau eta lalovai luvata sia omakau vaita, ia a boita lovata sia o'aku, beia Dilava ena dala umaunai mo ovaikabasi. Inoku tava ekaveni Kaisala kevanai 'eva ekomolo 'o asi'i?"

15 Tava ekaveni 'o asi'i?" Beia Iesu eta dede kanaua eikabasia, elavuita ediaka, "Dava 'ounai oi ovakovo'u! Moni ka oabia omai, baikaiia."

16 Moni ka deabia deasi devenia 'eva elavuita ediaka, "Kania 'eva dai va'ava'ana? Mai dai vana?" Ia dediaka, "Kaisala."

17 Iesu e'outa ediaka, "Kaisala ena Kaisala oi bovenia, Dilava ena Dilava oi bovenia." Kanaua deika 'eva detabu lovo si'asi'a.

Kamoane Lavuailavuaina Bai Ko'isi 'Udai Mulinai Luvana.
(Mt 22.23-33; Lk 20.27-40)

18 Sadukea kauta ko'isi 'udai sia devamomo'aia kauta vaidia eta lavuailavuai ka dainai deda'a Iesu kevana.

19 Delavuaia dediaka, "Vaikabasi kaumu e, Mose kanania eleleia koma, 'Kau ka nakuna asi'i bebaba obuna bemimia, ba kauna kadina betata'u obu kanaua beadavala nakuna bevapuluta ba kauna nakunai beva aota.'

20 Inoku vali'u 'a'a kadi boutaina kalakoi ka. Batani kauna ekamoane, nakuna asi'i eba.

21 Kadina ivaluana obu kanaua eadavala, nakuna asi'i eba. Kadita ivakoina vaka kanaua boina kevanai epulu.

22 Kalakoi ka kataua ateate kanaua ka'onamo deadavala, beia sia ka nakuna ka evapulua inoku ia deba. To'onai ateate vaka eba.

23 Kau kalakoi ka boutaina deadavala, inoku ko'isi 'udai 'eva dai adana umaunai be'ao?"

24 Iesu e'outa ediaka, "Oi 'eva ova'eva 'olana Puka Kabukabuna anina sia oi oikabasia maivaka Dilava ena siavu sia oi oikabasia.

25 Ba kauta beko'isi koanai ia 'eva anelu vutuvutuai kauta boita, sia bekamoane.

26 Bai beko'isi 'udai luvana sia oi oikabasia, Mose ena Pukai sia oi ovakua? La'uka eani 'abunai Dilava Mose eluva venia, 'Lau 'eva Abela'amo ena Dilava, Aisaka ena Dilava, Iakobo ena Dilava.'

27 Ia 'eva sia ba kauta eta Dilava, beia mauai kauta eta Dilava. Oi boumuiai 'eva oi ova'eva."

Talavatu Namavaikana Umauna.
(Mt 22.34-40; Lk 10.25-28)

28 Talavatu de'olavaia kauna ka ua'i eta viala 'uluna eika, eikabasi, Iesu kau kataua eta lavuai tavana evamuea kave'i. Inoku ia eta'u Iesu elavuaia ediaka, "Talavatu boutai davana 'eva talavatu kania boutai akatai emimia?"

29 Iesu e'ouia ediaka, "Boutai akatai 'eva kanania. 'Isalaela kaumu e, lele oika. Lovia namana eta Dilava 'eva Lovia namana ka'onamo mo.

³⁰ Lovia namana emu Dilava bolalo'au venia, mai nuamu bounai, mai idumemu bounai, mai emu lalovai bounai, mai kula'ilamu bounai.'

³¹ Ivaluana 'eva kanania. 'Kevamuai kauna vaka bolalo'au venia, sibomu olalo'au venimu boina.' Talavatu ua'i ka sia emimia katania luana akatai."

³² Kau kanaua eluva ediaka, "Vaikabasi kaumu e, oni 'eva okomolo. Oluva kave'i, Dilava 'eva ka'onamo mo, sia ka ua'i.

³³ Maivaka Dilava ekalalo'au venia mai nuata bounai, mai lalovaita bounai, mai kula'ilata bounai, kevata kauna ekalalo'au venia sibota kalalo'au venita boina, talavatu namavaikata 'eva veniveni i'abuta mai iakuba venivenita katania vinaulata boutai ekeinita."

³⁴ Iesu kau kanaua eikaia, eluva kave'i koanai e'ouia ediaka, "Oni mai Dilava ena lovia vanuana 'eva viloamui sia edau'a." Kanaua mulinai kau ia belavuaia 'eva demakau.

Keliso 'Eva Dai Nakuna.

(Mt 22.41-46; Lk 20.41-44)

³⁵ Iesu Lo'e Kabukabuna laloanai evaikabasi koanai kau elavuaia ediaka, "Aeko 'ounai talavatu de'olavaia kauta dediaka 'Keliso 'eva Davida Nakuna'?"

³⁶ Kanaua 'eva Idume Kabukabuna siavunai Davida nutunai eluva ediaka, 'Lovia namana e'u lovia e'ouia ediaka, Idiba'u duasi mia beda'a mo emu 'ou kauta boutai aemu'abuna venunai bane'eta divo.'

Sal 110.1

³⁷ Davida sibona eta'u Keliso e'aeia 'Lovia namana' koanai, a mo boina Keliso nakunai be'ao?" Mato kaiata devala kauta mai lalonamata ia lelana deika.

Talavatu De'olavaia Kauta Be'imata Kave'i.

(Mt 23.1-36; Lk 20.45-47)

³⁸ Iesu mune'e evaikabasita 'udai, ediaka, "Talavatu de'olavaia kauta kevatai oi bo'imamui kave'i, ia 'eva tubu'a laka'ita devadodota dekeinikeini dalai mai tavatava 'abutai, eta ula 'eva kau ia beikata 'olata be'aku.

³⁹ Mune'e lo'e laloatai eta ula mia'au nama'itai bemia'au, nadu laloatai maivaka 'abu namata nama'itai mo bemia'au.

⁴⁰ Obu eta luma devadoeta, eta meamea devalaka'i vaikata beikata 'ounai. Kau kataua boita 'eva mekau nama vaikana bedavalia."

Obu Ena Veniveni.

(Lk 21.1-4)

⁴¹ Iesu Lo'e Kabukabuna laloanai ainama mauana vailanai emia divo, do'u kauta eta moni mauai deuda eikata, lavo kauta doutamo 'eva eta moni doutamo deuda.

⁴² Beia obu ulaluna ka easi, ena moni kikita lua eabita easi eudata, eta vitaita 'eva pene ka'onamo boina.

⁴³ Iesu Ibanona kauta e'aeta deda'a kevana e'outa ediaka, "Luva umauna lau oi a'oumui, obu ulaluna kanaua eudala davana 'eva nama vaikana ia boutaina de'uda davata 'eva kikita.

⁴⁴ 'Olana lavo kauta eta moni doutamo beia kikita mo de'uda, obu ulaluna 'eva ena davali davana beaniani vaia davana itoinai eudala."

13

Iesu Lo'e Kabukabuna Be'eko Benodivo Valina Ekava.

(Mt 24.1-2; Lk 21.5-6)

¹ Iesu Lo'e Kabukabunai ela'asi laloanai, ibanona kauna ka eta'u e'ouia ediaka, "Vaikabasi kaumu e, Lo'e Kabukabuna bika'a nama'ina vaikai devavaia, ikala!"

² Iesu enu'ovi ediaka, "Luma nama vaikata katania o'ika? Boutai be'eko benodivo palu, be'ule tau, bika'a ka bika'a ka akanai sia beno'au sia bemimia."

Belebamui Mai Bevananamui.

(Mt 24.3-14; Lk 21.7-19)

³ Iesu Olive lolonai emia divo Lo'e Kabukabuna evailala, Petelo, Iakobo, Ioane mai Andelea vaka deda'a kevana vunivuniai delavuaia.

⁴ "Vaikabasimai, dava katania aida bepupulu? Maivaka bepupulu bonina koana 'eva a boina?"

⁵ Iesu e'outa ediaka, "Oi bo'imamui kave'i, kau ka asi'i emalebamui.

⁶ Kau doutamo lau va'uai beasi beluluva bediaka, 'Lau 'eva Keliso', kau doutamo belebata.

⁷ Kualii 'uluta mai valita oi bo'ika koanai, nuamui sia bebabata, dava katania bepupulu, beia to'ona 'eva vailai.

⁸ Iduvu ka beko'isi iduvu ka bekuailia, kanobata ka beko'isi kanobata ka bekuailia. Kanokau bedada'a 'abu edeata edeata, vikolo namata bepupulu. Katania 'eva itani melo epupulu anana lava'ana'ina boina.

⁹ "Sibomui oi bo'imamui kave'i. Beliomui valuva 'abutai bene'emuidivo, lo'e laloatai be'odimui. Lau dai'uai talavatu kauta mai kanobata loviata vailatai oi bolalava, kevatai vali'u oi bokakava.

¹⁰ To'ona 'eva sia be'asi beda'a mo vali nama'ina beilolo vaia iduvu boutai kevatai.

¹¹ Beliomui valuva 'abunai bene'emui divo koanai, dava oi bokoma luvana sia oi bolalovaia, melala bedaia bevenimui luvana mo oi boluvala, 'olana oi sia boluluva, beia Idume Kabukabuna beluluva.

¹² 'A'a kadi betata'u sibota venita beveveni kouta bekokou, kama betata'u nakuta venita beveveni kouta bekokou beaku bata. Naku betata'u sinata kamata bebo'o kaita beabita beda'a beaku bata.

¹³ Lau dai'uai kau boutai bebadu venimui, ia dai bevapasisi beda'a to'onai kauna 'eva bemaui.

To'onai Melala Si'avana Vaika.

(Mt 24.15-28; Lk 21.20-24)

¹⁴ "Vasi'avana mai vamakau kauna sia bemalava divo 'abunai belava divo oi boikala. (Vakuvaku kaumu, luva kanania anina boikabasia kave'i.) Melala kanaua'i Iudeai demimia kauta 'eva beveau lolo beda'ala.

¹⁵ Bema kau ka ena luma akanai ia 'eva sia be'ovu luma laloanai bedododo ena dava be'abi, ia beveau.

¹⁶ Lobai evinaula kauna vaka sia bemumue lumai ena tubu'a beabia.

¹⁷ Melala kataua laloatai ateate mai bo'ata maivaka vadudu 'a'ateta kevatai 'eva besi'avana vaika.

¹⁸ Oi bomeamea Dilava kevanai dava katania avala laloanai sia bepupulu.

¹⁹ 'Olana melala kataua eta si'avana 'eva besi'avana vaika 'a Dilava kanobata evavaia makava melalanai easi mo vali'u melala kanania ena si'avana ita sia bevaita, muliai vaka kataua boina ka sia bepulu 'udai.

²⁰ Bema Lovia namana melala kataua sia bemavato'ota 'eva ka sia bemaui kovo, beia ia edilata kauta 'outai melala kataua bevato'ota.

²¹ "Melala kanaua'i kau ka bema 'oumui, 'Oikaia, Keliso kanania' 'o 'Oikaia, Keliso kanaua' 'eva sia oi bovamomo'aia.

²² Keliso dedeta mai enolea dedeta kauta be'asi, koa edeata edeata mai siavu edeata edeata bevavai, eta ula 'eva Dilava edilata kauta belebata, beia sia bedaita.

²³ Kanaua 'ounai oi bo'imamui kave'i, vailai bepulu davata boutai 'ani avaikabasimui.

Lau Kau Nakuna Ba'asi.
(Mt 24.29-31; Lk 21.25-28)

²⁴ "Si'avana kataua be'ole mulinai, Melala 'eva bevabula avu, maivaka vuia sia bekakala.

²⁵ Visiu vutuvutuai be'ekoasi, maivaka vutuvutuai siavu davata edeata edeata be'iuvai'iuvai.

Isa 13.10, 34.4 ²⁶ Melala kanaua'i kau 'eva lau Kau Nakuna beika'u oli akanai ba'asi mai siavu'u maivaka mai nuavi'u.

²⁷ E'u anelu basinita beda'a 'unipuata vani lani de'asi 'abutai, adilata kauta bevado'uta kanobata si'ana beda'a si'ana.

'Ova Ekaikala.
(Mt 24.32-35; Lk 21.29-33)

²⁸ "Ova kevanai ikaika nama'ina oi boikala, 'Ova bedidimu uauana makamata oi boikata 'eva oi oikabasi vikau 'ani ekevai.

²⁹ Oi vaka dava katana boita oi boikata koanai oi oikabasi ia ena mue'udai 'ani ekevai nutuala aunai.

³⁰ Luva umauna lau oi a'oumui, ulu kanania sia be'ole beda'a mo dava katanania boutai bepupulu.

³¹ Vutuvutu mai kanobata betaule, beia lau e'u luva 'eva sia betaule.

Sia Kau Ka Eikabasi
Melala Davanai.

(Mt 24.36-44)

³² "Melala koana 'o bonina kau ka sia eikabasia, ena anelu vutuvutuai sia deikabasia, Nakuna vaka sia eikabasia, beia Kamana sibona mo eikabasia.

³³ "Makamui be'ata, oi bovi'ima, melalana be'asi 'eva oi sia oikabasia.

³⁴ Vitaitana kau ka kalima eda'a koanai, ena da'alabi kauta siavu evenita ena luma be'imala, ka ka eta vinaula bevavai maivaka nutuala i'imana kauna e'ouia makana be'ata bevi'ima.

³⁵ Kanaua 'ounai oi bovi'ima, 'olana luma kauna ena mue 'eva sia oi oikabasia, boniai, maloluai, 'o'oloko ena 'alalai, 'o 'avu'avu avekenai be'asi.

³⁶ Bema ia bevada'unai be'asi itani, muinai tabumuiai asi'i emadavalimui.

³⁷ Oi a'oumui luvana kau boutai vaka a'outa adiaka, 'Makamui be'ata!' "

14

Iesu Beaku Bala Dalana Dekavuia.
(Mt 26.1-5; Lk 22.1-2; Io 11.45-53)

¹ Melala luamo vailai demia La'au keini mai Palaoa 'avaeana naduna. Kabukabu kauta namata mai talavatu de'olavaia kauta vunivunia dala dekavu Iesu beabia beaku bala.

² Dediaka, "Ita nadu kanaua laloanai sia ekavavaia. Kau asi'i 'ulu namana demavavaia ounai."

Ateate Ka Iesu 'Olanai
Deolo Eisia.

(Mt 26.6-13; Io 12.1-8)

³ Iesu 'eva Betaniai, loki kauna Simona ena lumai, ua'i eaniani laloanai, ateate ka deolo vana Nado bonana mediana maivaka tavana nama vaikana

davana kavapuna nama'ina vaika eabia eda'a. Inoku kavapuna eaku papala Iesu 'olanai esisia.

⁴ Kau vaida ua'i 'eva debadu, sibota deluvaluva dediaka, "Dava 'ounai deolo kanania evaolea 'avaea?"

⁵ Bematavatava vaia ama'i denali sinavu koi bemadavali, monina kanaua 'eva ta'ovala kauta bemavenita." Ia ateate kanaua de'ovenia si'asi'a.

⁶ Beia Iesu e'outa ediaka, "Ovikania! Dava 'ounai oi obadu venia? Ia 'eva vinaula nama'ina lau keva'uai evavaia.

⁷ Ta'ovala kauta 'eva melala bounai kevamuiyai demimia, oi bo'ula koanai melala doutamo emui vanama'ina davata oi bovenita. Beia lau 'eva melala bounai kevamuiyai sia bamimia.

⁸ Ena kula'ila vitaitani keva'uai evavaia. Asido'o dekole'u, ia kau'u deoloai eukua, vailai bepupulu davana 'eva eva'olua vaika.

⁹ Luva umauna lau oi a'oumui, a'ia'i Vali Nama'ina beilolo vaia kanobata itoinai ateate kanania vaka vinaula evavaia vinaulana beluvavaia, ia ilalo-vaina."

Juda Eda'a Iesu Venina

Mai Kouna Ekou.

(Mt 26.14-16; Lk 22.3-6)

¹⁰ Kaliote kauna Iuda 'ouka lua kauta banota ka eda'a kabukabu kauta namata kevatai Iesu venina beveveni mai kouna bekokou.

¹¹ Kabukabu kauta namata Iuda kevanai 'ulu kanaua deika 'eva lalota denama si'asi'a, deluva 'ana'i moni bevenia, kanaua 'ounai Iuda dala ekavu, dala nama'ina davanai 'eva Iesu kabukabu kauta namata imatai beudala beabia.

Iesu Mai Ibanona Kauta Sibota Eta La'aukeini Nadunai Deaniani.

(Mt 26.17-25; Lk 22.7-14, 21-23; Io 13.21-30)

¹² Palaoa 'avaeana naduna melalana lava'ana'ina La'au keini ianina mamota iaku bata melalanai, Iesu ibanona kauta delavuaia dediaka, "Olalovaia La'au keini ianina a'i lai bava'olua boania?"

¹³ Iesu ibanona kauta lalua esinita, ediaka, "Oi boda'a vanua laloanai oi boda'a dodo, ua'i kau ka oi boikala vodu mai veina bevuala, mulinai oi bodada'a.

¹⁴ Bedodo lumanai luma biakuna oi bo'oua bodiaka, 'Vaikabasi kauna elavuai, da'a'au laloana a'ia'i? Ibanou kauta ita La'au keini naduna ianina lai bania.'

¹⁵ Inoku ia sibona laloa namana ka akai 'ani e'olu davana bevaikamui. Ua'i eta iani oi bova'olua."

¹⁶ Ibanona kauta lalua deda'a, vanua laloanai deda'adodo 'eva Iesu e'outa davata boutai dedavalita. La'au keini ianina deva'olua.

¹⁷ Lavilavi eda'a venia koanai, Iesu ibanona kauta 'ouka lua ita deasi.

¹⁸ Aniani 'abunai demiadivo deaniani laloanai, Iesu e'outa ediaka, "Luva umauna lau oi a'oumui, viloamuiyai lalua lai aniani ka'ona kauna lau veni'u beveveni kou'u bekokou."

¹⁹ Ibanona kauta nuata debavunu, ka ka delavuaia, "Olalovaia lau, 'o?"

²⁰ Iesu eta luva evamuea ediaka, "Oi 'ouka lua kaumui ka, lalua nau ka'onamoai lai akao uda kauna.

²¹ Lau Kau Nakuna 'eva bababa Puka Kabukabunai eleleia vitaitana, beia lau Kau Nakuna veni'u beveveni kou'u bekokou kauna 'eva ilalona mo, si'avana nama vaikana bedavalita, sia bemapulu 'eva bemanama'ina."

Lovia Namana Ena Anibou.

(Mt 26.26-30; Lk 22.14-20; 1Kl 11.23-25)

²² Deaniani laloanai, Iesu palaoa eabia, Dilava evanama'inala inoku ekovia, ibanona kauta evenita, ediaka, "Oabia, oania! Kanania 'eva lau kauani'u."

²³ Mune'e 'ou eabia, Dilava evanama'inala ibanona kauta evenita, boutai deiniuia.

²⁴ Iesu ediaka, "Kanania 'eva lau lala'u kau doutamo daitai be'itabu. Lau lala'u 'eva kau mai Dilava eta vaka'ona luva'ana'ina makamakana ivamomo'aina koana.

²⁵ Lau oi a'oumui, vine veina ka sia bainua 'udai beda'amo Dilava ena lovia vanuana laloanai makamakana bainua."

²⁶ Masi ka deabia eole mulinai, dela'asi deda'a Olive lolona.

Iesu Petelo Beluvala Luvana Eluvavaia 'Ana'i.

(Mt 26.31-35; Lk 22.31-34; Io 13.36-38)

²⁷ Iesu ibanona kauta e'outa ediaka, "Boumuiai oi bovikani'u oi boveau siusiu, 'olana Puka Kabukabunai deleleia,

'Lau mamoe i'imata kauna

bako bala,

kanaua'i mamoe bounai

beveau siusiu.'

Sek 13.7

²⁸ Beia lau bai bako'isi 'udai mulinai ba'ana'ia bada'a Kalilea."

²⁹ Petelo Iesu e'ouia ediaka, "Bema bano'u kania boutai oni bevikanimu, beia lau 'eva sia bavikanimu kovo."

³⁰ Iesu Petelo e'ouia ediaka, "Luva umauna lau oni a'oumu, vali'u boni kanania o'oloko ivaluana asido'o be'alala laloanai, oni melala koi lau bo'ou'u avuavu."

³¹ Beia Petelo eluva pasisi ediaka, "Bema ita lalua eka ba ka'ona, lau oni sia ba'oumu avuavu." Ibanona kauta boutai vaka kanaua deluva koma.

Iesu Ketesemaneai Emeamea.

(Mt 26.36-46; Lk 22.39-46)

³² 'Abu ka vana Ketesemaneai dela'asi. Kanaua'i Iesu ibanona kauta e'outa ediaka, "Oi nia'i omia, lau bada'a bameamea."

³³ Inoku Petelo, Iakobo, mai Ioane mo evada'ata, ia nuana eanana maivaka ebavunu.

³⁴ Kanaua 'ounai e'outa ediaka, "Lau 'eva idume'u eanana itani bamaba mo boina. Nia'i oi bomimia, makamui be'ata oi bovi'ima."

³⁵ Kava'ina mo eilulao eda'a, inoku kanoai epakadivo emeamea, bema mai dalana anana bonina kanaua ia kevanai bema da'a tau.

³⁶ Ia emeamea ediaka, "Kama'u e, Kama'u e, dava boutai kele'emuai 'eva dedaia. 'Ou kanania kele'e'uai bomabia tau. Sia lau e'u ula, beia oni emu ulai."

³⁷ Iesu emue easi ibanona kauta koi muinai tabutai edavalita, ia Petelo e'ouia ediaka, "Simona e, oni omuinai, una? Melala kikinamo makamu demata bomavi'ima bemadaia 'o asi'i?"

³⁸ Oi bomeamea oi bovi'ima, 'olana vikovoai asi'i oi omadodo. Nuamu 'eva eula vaika, beia kauanimu 'eva ebade bade."

³⁹ Mune'e emue eda'a emeamea, ena meamea luvata ka'oka'omo eluvata 'udai.

⁴⁰ Emue easi koanai, kauta koi muinai tabutai edavalita, 'olana makata demuinai 'ounai, luva dava be'oua 'eva sia deikabasi.

⁴¹ Melala ivakoina emue easi, e'outa ediaka, "Oi omuinai do'o mai lamui oi o'ani? 'Ani edaia, bonina 'ani ela'asi. Kau Nakuna 'eva si'avana kauta imatai 'ani enouda.

⁴² Oko'isi kada'a, veni'u eveni kou'u ekou kauna 'ani e'asi."

*Iesu Delioia.**(Mt 26.47-56; Lk 22.47-53; Io 18.3-12)*

⁴³ Iesu eluva do'o mo laloanai, Iuda 'ouka lua kauta banota ka ela'asi, mato namana imata mai ukuta maivaka mai kuali lepota mulinai deda'a, boutai 'eva kabukabu kauta namata mai talavatu de'olavaia kauta mai vanua kauta namata desinita deda'a.

⁴⁴ Venina eveni mai kouna ekou kauna mato kanaua 'ani e'outa ediaka, "Baba'ua kauna 'eva kauna kanaua oi bolioa oi boabia bodada'a."

⁴⁵ Iuda ela'asi komolonai eda'a Iesu kevana, ediaka, "Vaikabasi kaumu e." Inoku eba'uaia.

⁴⁶ Mulinai Iesu deabia inoku delioia.

⁴⁷ Inoku Iesu ita delava ka'ona kauna ka eko'isi lepo evelia asi kabukabu kauta 'olatai kauna ena da'alabi kauna kaiana ekalaia ovo.

⁴⁸ Iesu e'outa ediaka, "Oi imamui mai kuali lepota mai ukuta oi o'asi lau oi boabi'u vitaitana lau 'eva vinaovinao kau'u.

⁴⁹ Melala boutai lau 'eva oi ita Lo'e Kabukabuna laloanai avaikabasi, beia sia oi oabi'u. Kanania 'eva Puka Kabukabunai deleleia 'ana'i luvana bemomo'ai dainai."

⁵⁰ Kanaua'i ibanona kauta boutai Iesu devikania deveau siusiu.

⁵¹ Kau 'alu'aluna ka Iesu mulinai eda'a, tubu'a ka'onamo mo evadodoa. Kau kanaua delioia koanai,

⁵² ena tubu'a imatai evikania inoku kauna 'avaeana eveau ovo.

*Iesu Iuda Eta Lovia Kauta Vailatai Elava.**(Mt 26.57-68; Lk 22.54-55; Io 18.13-14, 19-24)*

⁵³ Ia Iesu devada'ala deda'a kabukabu kauta 'olatai kauna kevana, inoku kabukabu kauta namata, vanua kauta namata mai talavatu de'olavaia kauta boutai ua'i dedo'u.

⁵⁴ Petelo 'eva Iesu mulinai eda'a, beia mai viloata deda'amona kabukabu kauta 'olatai kauna ena ala laloanai, ua'i vi'ima kauta vaidia ita demia ka'ona, 'alova enanaia.

⁵⁵ Kanaua'i kabukabu kauta namata mai Iuda eta lovia kauta Iesu ivabana dalana dekavuia, beia va'eva ka sia dedavalia.

⁵⁶ Kau doutamo vaika oukeinikeini luvata dedeta deluva kevanai, beia eta oukeinikeini luvata 'eva ka sia emomo'ai.

⁵⁷ Kau vaidia mune'e deko'isi eta dede luvana deluvaia Iesu kevanai, dediaka,

⁵⁸ "Lai l Elena aika, ediaka, 'Lau Lo'e Kabukabuna kanania kau imatai devavaia davana 'eva baluvua, melala koi laloanai kau imatai sia bedaua Lo'ena Kabukabuna ka badaua.' "

⁵⁹ Beia eta dede luvata kania vaka sia demomo'ai.

⁶⁰ Inoku kabukabu kauta 'olatai kauna eko'isi kau vailatai elavadivo Iesu elavuia ediaka, "Oni emu luva ka 'o asi'i boluvala luva kania deluluva akatai?"

⁶¹ Beia Iesu sia luva ka eluvaia maivaka ena luva sia evamuea.

Kabukabu kauta 'olatai kauna mune'e elavuai 'udai ediaka, "Oni Keliso, devanama'inala Dilavana Nakuna, una?"

⁶² Iesu ediaka, "Lau mo kau'u kanania, boumuiai 'eva lau Kau Nakuna oi boika'u akaiai siavu boutai Dilavana imana idibanai bamiadivo inoku vutuvutu olinai ba'asi."

⁶³ Kabukabu kauta 'olatai kauna luva kanaua 'uluna eika koanai nuna e'avaia si'asi'a, sibona ena tubu'a e'idia, evaoi ediaka, "Luva davana kakavua?"

⁶⁴ Dilava evasi'avanala luvana 'ani oi oika, emui lalovai 'eva dava?" Ia boutai dediaka, bebaba.

⁶⁵ Inoku vaidia Iesu de'anodia mai makana de'apa avu maivaka deakuia, delavuai dediaka, "Luva, dai eakumu?" Vi'ima kauta vaka depi'aia.

Petelo Iesu E'ouia Avuavu.

(Mt 26.69-75; Lk 22.56-62; Io 18.15-18, 25-27)

⁶⁶ Petelo 'eva ala laloanai koanai, kabukabu kauta 'olatai kauna ena da'alabi vatona ka easi.

⁶⁷ Ia Petelo 'alova enanaia eikaia koanai, eikaia basibasi e'ouia ediaka, "Oni vaka Nasaleta kauna Iesu obanoia."

⁶⁸ Beia Petelo 'eva e'ou avuavu ediaka, "Dava luvana oluluva davana 'eva lau sia aikabasia." Inoku eda'atau eda'a nutuala aunai.

⁶⁹ Da'alabi vatona kanaua mune'e eikaia 'udai koanai, vialulu kauta e'outa ediaka, "Kau kanania 'eva ia banota ka."

⁷⁰ Ia mune'e e'ou avuavu.

Sia edau'a laloanai Petelo ita delava ka'ona kauta de'ouia dediaka, "Luva umauna, oni vaka ia banota ka. 'Olana oni vaka Kalilea kaumu."

⁷¹ Inoku Petelo ia eluva pasisi venita ediaka, "Oi dava o'oua davana 'eva lau sia aikabasi. Bema adedede koanai Dilava bevaanana'u."

⁷² Inoku 'o'oloko ivaluana e'alala. Kanaua'i Petelo Iesu e'ouia luvana elaloiaune, "O'oloko ivaluana asido'o be'alala laloanai, oni melala koi bo'ou'u avuavu." Inoku Petelo ekani.

15

Iesu Pilato Vailanai.

(Mt 27.1-2; 11-14; Lk 23.1-5; Io 18.28-38)

¹ 'Avu'avuni vabulanai kabukabu kauta namata, vanua kauta namata, talavatu de'olavaia kauta mai do'u kauta boutai dedo'u molau luva de-vaka'onamo. Iesu delioia deda'a Pilato devenia.

² Pilato Iesu elavuafia ediaka, "Oni Iuda kauta eta Lovia 'olana kaumu, una?" Iesu enu'ovi ediaka, "'Ani oluva mo kanaua."

³ Kabukabu kauta namata luva doutamo Iesu akanai deluvavai.

⁴ Pilato mune'e Iesu elavuafia 'udai ediaka, "Oni sia boluluva, una? Oni oikabasi luva edeata edeata oni akamuai deluvavai."

⁵ Beia Iesu sia luva ka evamuea, kanaua 'ounai Pilato elaloto'ato'a.

Pilato Eluva Iesu Beaku Bala.

(Mt 27.15-26; Lk 23.13-25; Io 18.39-19.16)

⁶ Pilato ena koakoa melala bounai nadu laloatai vabuto'o kauna ka deula venia kauna 'eva evala'asia.

⁷ Melala kanaua'i kau ka vana Balaba devavabuto'oa. Ia 'eva Loma kauta ita 'ou deviabi viveni, viaku laloanai kau vaidia eaku bata.

⁸ Inoku do'u kauta Pilato denoia melala bounai koakoa kanaua evavaia davana bevavaia.

⁹ Pilato elavuaia ediaka, "Oi o'ula Iuda Lovia 'olana kauna bavala'asia?"

¹⁰ 'Olana Pilato 'ani eikabasi kabukabu kauta namata 'eva Iesu demama venia 'ounai deabia ia imanai deudaia.

¹¹ Beia kabukabu kauta namata deko'isi do'u kauta devasiasita bediaka, Pilato Balaba bevala'asia ia Iesu 'eva bemimia.

¹² Pilato do'u kauta elavuaia 'udai ediaka, "Oi o'ula dava Iuda eta lovia 'olana oi okoma kauna kevanai bavavaia?"

¹³ Boutai devaoi, "Au ido'o valaukuna akanai vabaia!"

¹⁴ Pilato elavuaia 'udai ediaka, "Dava 'ounai, ena va'eva dava?" Beia ia devaoi 'unu'unu dediaka, "Au ido'o valaukuna akanai vabala!"

¹⁵ Pilato eula mato nuata bevanama'ina 'ounai Balaba eluvuaia. Iesu e'odia kualii kauta evenita au ido'o valaukuna akanai beaku bala.

*Kuali Kauta Iesu Devabo'oa.**(Mt 27.27-31; Io 19.2-3)*

¹⁶ Kuali kauta Iesu devada'ala deda'a talavatu lumana namana laloanai ua'i eta kau boutai devado'uta.

¹⁷ Tubu'a 'aolana devavadodoia maivaka 'ini auma deabia devakuia 'olanai dene'eia 'au.

¹⁸ Eta vabo'obo'o demakavala dediaka, "Iuda lovia 'olana e, bomia keinikeini."

¹⁹ Moloveai 'olana de'odia de'anodia, vailanai dekuidula dekudivo venia dededede.

²⁰ Devabo'oa mulinai, tubu'a 'aolana kaunai devadadala asi, ena tubu'a umauna devavadodoia devala'asia au ido'o valaukuna akanai beaku bala deka deda'a.

*Iesu Au Ido'o Valaukuna Akanai Dekokoia 'Au.**(Mt 27.32-44; Lk 23.26-43; Io 19.17-27)*

²¹ Kulene kauna ka vana Simona 'uniai easi Ielusalema kokona eda'a, ia 'eva Alesanda mai Lufo kamata. Kuali kauta Simona ita devidavali koanai devasiasia Iesu ena au ido'o valaukuna bevuala.

²² Iesu devada'ala deda'a 'abu ka vana Kolokota, anina 'eva, 'Ola Kuliana 'Abuna.

²³ Ia vine veina vamaia mai anana ivakikina mulamulana itana deiu lavo'i devenia beinua, beia Iesu 'eva sia einuia.

²⁴ Inoku Iesu au ido'o valaukuna akanai dekokoa au. Eole mulinai kuali kauta ena tubu'a punipuniai dekoleta deito dai 'eva davana beabia.

²⁵ 'Avu'avuni melala esiavu laloanai (9 a.m.) Iesu au ido'o valaukuna akanai dekokoa au.

²⁶ Ia 'olana akanai va'eva malelena kanania deleleia koma. 'Iuda kauta eta Lovia 'olana.'

²⁷ Vinaovinao kauta lalua Iesu ita melala ka'onamo au ido'o valaukuta akatai dekokota 'au, ka idibanai ka 'ealinai.

²⁸ Puka Kabukabuna luvana 'ani emomo'ai ediaka, 'Si'avana kauta ita devakuta ka'ona.'

²⁹ Dekeinikeini kauta luva si'avata vaika de'ouia, maivaka 'olata deka'eka'e dediaka, "Oni kaumu kanania odiaka Lo'e Kabukabuna boluvua inoku boni koi laloatai bodaua 'udai.

³⁰ Vali'u kanana'i au ido'o valaukuna akanai 'ovu, sibomu vamaulimu!"

³¹ Dala vitaitanai mo kabukabu kauta namata mai talavatu de'olavaia kauta Iesu demedia media vaia dediaka, "Kau vaida evamaulita, beia sibona bevamaulia 'eva sia edaia.

³² Keliso Isalaela eta Lovia 'olana, vali'u ua'i au ido'o valaukuna akanai e'ovu kaikaia maivaka ekavamomo'aia." Iesu ita au ido'o valaukuna akanai dekokota 'au kauta lalua vaka kevanai luva si'ava vaikata deluva.

*Iesu Ena Ba.**(Mt 27.45-56; Lk 23.44-49; Io 19.28-30)*

³³ Ado'alavuni umaunai kanobata itoinai evabula avu eda'a mo melala elava keini koana koi boina.

³⁴ Melala vitaitanaimo Iesu e'ae'ae 'unu'unu ediaka, "Eloi Eloi, lama sabakatani?" Anina 'eva 'E'u Dilava e, 'E'u Dilava e, dava 'ounai ovikani'u?"

³⁵ Kevanai delava kauta vaida Iesu lenea deika, dediaka, "Kaiamui ovala, ia 'eva Elia e'aea."

³⁶ Kau ka eveau eda'a dapulu eabia vine veina vamaia laloanai ekaioia uku, silibo ai ekoa 'au inoku eisia 'au Iesu evenia beinua inoku ediaka, "Kavi'ima kaikaia. Elia ama'i be'asi beabia ovo."

³⁷ Iesu evaoi 'unu'unu inoku eba.

³⁸ Melala kanaua'i Lo'e Kabukabuna laloana tubu'ana bo'adanai e'idi luala akai e'ovu eda'a venu.

³⁹ Kualo de'olavaia kauna ka Iesu kevanai vaika elavadivo eikaia ia evaoi lenea eika, kanaua eba koma eikaia koanai ediaka, "Kau kanania 'eva Dilava Nakuna umauna."

⁴⁰ 'A'ate vaido 'eva dau'ai delava devialulu, vilotai 'eva Makadala ateatena Malia Iakobo kikina Iosepa ita sinata Malia mai Salome.

⁴¹ 'A'ate katanania 'eva Kalileai Iesu mulinai deda'a deduluia. Iesu ita Ielusalemai dela'asi ka'ona 'a'ateta doutamo vaka 'eva ua'i.

Iesu Dekoleia.

(Mt 27.57-61; Lk 23.50-56; Io 19.38-42)

⁴² Melala kanaua 'eva va'olu melalana, belani 'eva Melala Kabukabuna. Melala 'ani be'ulu ekoma koanai,

⁴³ Alimatea kauna Iosepa nuana ebuviua eda'a Pilato vailanai enoia Iesu kauanina dainai. Ia 'eva Iuda eta lovia 'olana kauna ka kau vaka 'olana de'aku, Dilava ena lovia vanuana be'asi e'imala kauna ka.

⁴⁴ Pilato Iesu alimo eba valina eika koanai etabulovo si'asi'a. Ia eko'isi kualo e'olavaia kauna e'aeia Iesu ena ba melalana elavuai lavuai vaia.

⁴⁵ Pilato Iesu ena ba 'uluna kualo e'olavaia kauna kevanai eika koanai, ia Iosepa e'ouia Iesu kauanina beabia.

⁴⁶ Iosepa tubu'a nama'ina ka etavaia, Iesu kauanina eabia ovo tubu'a kanaua'i e'umia evuaia eda'a mitava bika'a ioi vaikana laloanai ene'eia divo, bika'a namana ka eva'ulea inoku e'alavua.

⁴⁷ Makadala ateatena Malia mai Iosepa sinana Malia lalua Iesu kauanina dene'eia divo 'abuna deikaia.

16

Iesu Bai Eko'isi 'Udai.

(Mt 28.1-8; Lk 24.1-12; Io 20.1-10)

¹ Melala Kabukabuna eole mulinai Makadala ateatena Malia Iakobo sinana Malia mai Salome deolo bonata mediata detava beda'a Iesu kauanina beukua.

² Masi melalana 'avu'avu vabulanai, melala edae laloanai, 'ate kataua dala ai deda'a mitava kokona deda'a koanai,

³ sibota deluvaluva dediaka, "Dai beduluta, mitava nutualana bika'ana bedolia tau."

⁴ Beia dekalao koanai, mitava nutualana bika'a nama vaikana 'ani idoli tauna deikaia.

⁵ Ia mitava laloanai deda'a dodo 'eva kau 'alu'aluna ka tubu'a deva'ita evadodo idiba duasi emia divo deikaia koanai demakau si'asi'a.

⁶ Kau kanaua ediaka, "Sia omakau. Oi Nasaleta kauna Iesu dekokoa 'au kauna oi okavua. Ia 'eva 'ani eko'isi. Sia nia'i. Dene'eia divo 'abuna oikaia.

⁷ Oda'a ibanona kauta mai Petelo oi bo'outa, oi bodiaka, 'Oi boda'a Kalileai, Iesu 'ani be'ana'ia ua'i, oi boikala eluva vitaitanai! "

⁸ Kanaua 'ounai 'ate kataua dela'asi mitava devikanania mai lalovailalo-vaia maivaka mai makauta. Demakau 'ounai sia kau ka de'ouia.

Iesu Malia Makadala Kevanai Mai Kau Lalua Kevatai Ela'asi.

(Mt 28.9-10; Io 20.11-18)

⁹ Masi melalana 'avu'avuni vabulanai, Iesu ba ai eko'isi mulinai, Makadala ateatena Malia kevanai ela'asi makava, ia 'eva 'ana'inai Iesu ka'uba si'avata vaika kalakoi ka nuantai elo'ota asi ateatena.

¹⁰ Makadala ateatena Malia eda'a Iesu debanoia kauta devilalo dekani kevatai Iesu valina ekava.

¹¹ Malia kevanai vali deika Iesu 'ani emauli, mune'e eikaia ekoma, beia ena luvā sia deabia dae.

¹² Muliāi kau lalua dalai deda'a 'uni laloanai Iesu ikana evaedeāia kevatai ela'asi.

¹³ Inoku lalua demue deda'a banota vailatai deluva. Beia ia vaka sia devamomo'aita.

Iesu 'Ouka Ka Kevatai Ela'asi.

(Mt 28.16-20; Lk 24.36-49; Io 20.19-23; Vn 1.6-8)

¹⁴ Kanaua mulinai kauta 'ouka ka deaniani laloanai, Iesu ela'asi kevatai. Eta abiveni asi'i maivaka eta nua pasisi 'ounai e'ovenita. 'Olana eko'isi 'udai mulinai deikaia kauta leleta sia devamomo'ai.

¹⁵ Inoku ia e'outa ediaka, "Oi boda'a kanobata itoinai Vali Nama'ina kau boutai kevatai oi boilolo vaia.

¹⁶ Eabiveni mai eidi'u kabukabu kauna 'eva mauli beabia, beia sia eabiveni kauna 'eva mekau bekoala.

¹⁷ Deabiveni'u kauta 'eva siavu vinalata katania boita bevavai. Lau va'uai ka'uba si'avata vaika belo'olo'ota asi, maivaka mala edeata edeatai beluluva,

¹⁸ imatai kau'asi beabita mai mulamula si'avata vaika be'inu, beia kevatai sia dava ka bepupulu, maivaka imata 'olele kauta akatai beka'o'au 'eva eta 'olele benama'ina."

Iesu Vutuvutuāi Ele'au

(Lk 24.50-53; Vn 1.9-11)

¹⁹ Lovia namana Iesu ia e'outa mulinai, ele'au eda'a vutuvutu, Dilava idibana duasi emia divo.

²⁰ Ibanona kauta boutai ua'i dela'asi 'abu boutai laloatai deilolo. Lovia namana 'eva ia kevatai 'ounai koa edeata edeata devavai, vinala kataua'i eta ilolo evamomo'aita.

Vali Nama'ina LUKA Eleleia Kauna

Puka Laloana Ielena Luvana

Vali nama'ina kanania Luka eleleia laloanai evaikata Iesu 'eva kau kanaua 'ani eluva'ana'i vaia be'asi Isalaela kauta mai kanobata kauta boutai be-
vamaulita kauna. Luka 'eva Iesu ena vinaula emakavala koanai, Idume
Kabukabuna ia nuana evavonua, inoku ia beda'a ulalu kauta kevatai Vali
Nama'ina beluvala (4.18), maivaka kau mai eta mekauai aeduluta koma
kauna lovana eaku kave'i. Dava kataua Iesu evavaita 'eva kau kania
evalalonamata keini inoku ia delalonama si'asi'a. Malia ia evapulua koanai
kau delalonama (1.42 - 48; 2.10), maivaka puka to'onai oli laloatai ele'au
laloanai eta lalonama eda'a namavaikana (24.52).

Puka kanania elena lua laloatai (1 – 2 mai 9 – 19) dava voida 'eva Luka
sibonamo eluva vaita, itani Anelu mai mamoe i'imata kauta sisibata, Iesu
kikinai lo'e kabukabuna laloanai, luva ivavitaitata Samalia kauna nama'ina
mai melo ka kamana evikania. Dava voida 'eva Luka eluvavai pasisi, melala
boutai eka meamea kula'ila dalana, Idume Kabukabuna ena vinaula, mai
Dilava ena nama'inai kau boutai eta si'avana e'ou kao. Luka eta'u 'ate'ate
devavaita davata doutamo eluvavaita.

Luka ena lelelele 'eva sia nia'imo epua, ia eta'u puka kanaua 'Veauneke
kauta eta vinaula' mai kanaua eleleia 'eva Iesu ele'au eda'a vutuvutu mulinai
dava evavai davata lovata eaku.

Puka Iduvuna Namata

- a. Lova aku. (1.1 - 4)
- b. Ioane mai Iesu ita eta pulu mai melotai laloanai. (1.5 – 2.52)
- d. Iesu eidi'u kabukabu mai ivakovo. (3.21 – 4.13)
- e. Iesu ena vinaula kau kevatai Kalilea laloanai. (4.14 – 9.50)
- f. Kalileai eda'amo Ielusalemai. (9.51 – 19.27)
- g. Masi to'ona Ielusalema laloanai mai kevanai. (19.28 – 23.56)
- h. Lovia namana ena ko'isi 'udai, ena la'asi, mai ena ele'au vutuvutu. (24.1 - 53)

¹ Lovia kaumu Teofilo e. Kau doutamo viloomaiai dava umauta 'ani
depulu davata deleleta,

² kau kataua makavanai vinaula kanania makata ai deikaia mai deilolo
vaia davata vitaitata de'oumai.

³ Lau vaka makavana umunai emakavalai depulu luvata boutai akavu
kave'i. Inoku alalovaia enama'ina 'ounai oni emu malele ka balelea.

⁴ Kanaua 'ounai oi boikabasi komolo dava devaikabasimu luvata 'eva
umauta.

Anelu Sakalia E'ouia

Nakuna Ioane Bepupulu.

⁵ 'Eloda Iuda eloviala melalanai kabukabu kauna ka ua'i vana Sakalia,
Abia ena iduvu kauna, adana Elisabeta 'eva Alona ena pulu ai easi ateatena.

⁶ Ia lalua ena vinaula komolo kauta Dilava vailanai, Lovia namana ena
talavatu mai vaidiba de'ima kave'i, si'avana sia ka devavaia.

⁷ Beia ia lalua ena 'eva nakuta asi'i 'olana Elisabeta 'eva e'opa'opa mai
lalua ena 'eva 'ani demotu.

⁸ Sakalia ena iduvu kauta eta vinaula melalanai, ia eta'u kabukabu vin-
aulata evavai Dilava vailanai.

⁹ Kabukabu kauta eta koakoa daitai, punipuniaia ia deabia isi Lovia namana ena lo'e kabukabuna laloanai bedododo mulamula bonana mediana be'abua.

¹⁰ I'abuna melalana edaia koanai, meamea kauta boutai mulimuliai deakubou demeamea.

¹¹ Lovia namana ena anelu ka Sakalia kevanai evailaasi mulamula bonana mediana i'abuna valana avekenai idibana duasi elava.

¹² Sakalia anelu eikaia koanai, nuana ebata maivaka emakau si'asi'a.

¹³ Beia anelu ia e'ouia ediaka, "Sakalia e, sia bomakau. Emu meamea 'uluna 'eva Dilava 'ani eika, oni adamu Elisabeta 'eva nakumu moluanena ka bevapulua, inoku oni ia vana bo'aea Ioane.

¹⁴ Lalomu 'eva benanama, mai bolalonama si'asi'a, kau mato vaka ena puluai belalonama.

¹⁵ 'Olana Lovia namana vailanai ia 'eva namana be'ao, vine 'o mulamula pasisita sia be'inu, maivaka sinana bo'anai asido'o bepupulu laloanai Idume Kabukabunai bevovonu.

¹⁶ Ia betata'u Isalaela kauta doutamo vaika bevalalota 'udai Lovia namana eta Dilava kevana beda'ala.

¹⁷ Be'ana'ia Lovia namana vailanai Elia idumena mai ena siavu vitaitanai, kama mai naku nuata bevaka'onamota, mai lele sia de'ika kauta komolo kauta eta aoneka dalanai bevada'ata, kau beva'oluta Lovia namana ena."

¹⁸ Sakalia anelu elavuia ediaka, "Kania 'eva a baikabasi kave'i koma? Lau 'eva 'ani amotu mai ada'u vaka 'ani emotu."

¹⁹ Anelu ena luva 'evamuea ediaka, "Lau 'eva Kabiela, Dilava vailanai alalava, esini'u vali nama'ina kanania abia a'asi kevamu bavaikamasimu.

²⁰ Vali'u oni 'eva malamun besivana mai sia boluvaluva beda'amo dava katania eta pulu melalana bedaia. 'Olana e'u luva melala kanaua'i be-momo'ai luvana 'eva sia ovamomo'ia 'ounai."

²¹ Kau 'eva Sakalia de'ima vunua maivaka nuata debavunu 'olana lo'e kabukabuna laloanai emia dau'a.

²² Ia ela'asi koanai, beluluva 'eva sia edaia. Kanaua 'ounai deikabasi ia 'eva lo'e kabukabuna laloanai dava ka eikaia. Koakoa mo imanai evavai beia sia eluvaluva.

²³ Ena vinaula melalana evaolea koanai, ia emue eda'a ena luma.

²⁴ Kanaua mulinai ia adana Elisabeta esivabu inoku vuia ima luma laloanai mo emia.

²⁵ Eluva ediaka, "Kania 'eva Lovia namana ena ula koana keva'uai, kau vilotai e'u malalai beabia tau."

Anelu Malia E'ouia Iesu Bevapulua.

²⁶ Elisabeta vuiana kalakoi laloanai Dilava eta'u anelu ka vana Kabiela esinia eda'a Kalilea laloanai vanua ka vana Nasaletai.

²⁷ Vato ka ua'i deluva'ana'i vaia kau ka beadavala, vana Iosepa Davida ena pulu ai easi, vato kanaua vana 'eva Malia.

²⁸ Anelu eda'a kevana e'ouia ediaka, "Lalomu benanama. Oni 'eva eula venimu vaika. Lovia namana 'eva oni kevamuai."

²⁹ Luva kanaua Malia nuana evabavunua, mai elalovai lalovai vanama'ina kanaua anina 'eva dava.

³⁰ Beia anelu ia e'ouia ediaka, "Malia e, sia bomakau, Dilava ena ula 'ani oabia.

³¹ Oni 'eva bosivabu inoku melo moluanena ka hovapulua, inoku vana bo'aea Iesu.

³² Ia 'eva beakai vaika mai be'aea Akai vaika Kauna Nakuna, Dilava Lovia namana betata'u 'ava'avana Davida ena lovia bevenia.

³³ Mai ia Iakobo ena iduvu beloviala keinikeini, ena lovia vanuana 'eva sia bepupua."

³⁴ Malia anelu e'ouia ediaka, "Lau kau ka sia aikabasia. Kanania 'eva a bepulu koma?"

³⁵ Anelu enu'ovi ediaka, "Idume Kabukabuna be'ovu oni akamuai, mai Akai vaika Kauna ena siavuai beva'elu'elumu. Kanaua 'ounai Kabukabu Kauna bepupulu vana be'aea Dilava Nakuna.

³⁶ Oni kadi'a'amu Elisabeta ena motu motuai 'eva melo ka beabia, mai dediaka ia 'eva e'opa'opa beia ia 'eva vali'u vuiana 'ani kalakoi.

³⁷ Dilava enai 'eva sia dava ka epasisi."

³⁸ Malia enu'ovi ediaka, "Lau 'eva Lovia namana ena da'alaabi ateate'u. Emu luva vitaitana keva'uai epulu." Inoku anelu Malia evikania.

Malia Eda'a Elisabeta Kevana.

³⁹ Melala kanaua'i Malia eva'olu inoku emolau eda'a vanua ka lolo ai Iudea kanobatanai.

⁴⁰ Ia Sakalia ena lumai edodo inoku Elisabeta evanama'inala.

⁴¹ Elisabeta Malia ena vanama'ina 'uluna eika koanai, bo'ana laloanai melo e'iuvai 'iuvai, mai Idume Kabukabuna Elisabeta nuana evavonua.

⁴² Inoku eluva 'unu'unu ediaka, "A'ate boutai viloatai oni 'eva evanama'inamu, melo bovapulua melona vaka evanama'inala.

⁴³ E'u nama'ina 'eva dava e'u Lovia namana sinana easi keva'u!

⁴⁴ Emu vanama'ina 'uluna a'ika koanai, komolonai melo bo'a'u laloanai mailalonamana e'iuvai 'iuvai.

⁴⁵ Ani evanama'inamu 'olana ovamomo'ai Lovia namana ena luva eluvaia kevamuai 'eva bemomo'ai."

Malia Ena Lalonama Masina.

⁴⁶ Malia ediaka,

"Lau nua'u Lovia namana evanama'inala.

⁴⁷ Mai idume'u vaka e'u vamauli

Dilavana enai elalonama,

⁴⁸ 'olana ena ulalu mai da'alaabi

ateate'u elalo'u une 'ounai.

Vali'u melala kanania'i beda'a

ulu boutai nama'i'u be'oua,

⁴⁹ 'olana siavu Dilavana
dava namata e'uai evavai.

Ia vana 'eva ekabukabu,

⁵⁰ ulu ka beda'a ulu ka

ena vilalo 'eva

eveveni kau

'olana de'aku kauta etai.

⁵¹ Ia imana siavunai ena

kula'ila evala'asia,

apa kauta kataua eta

lalovai si'avatai

elo'ota siusiu.

⁵² Ia eta'u lovia kauta kula'ilata

eta lovia imia'autai eva'ovuta,

mai ulalu kauta evaeleta'au.

⁵³ Vikolo deakuta kauta

dava nama'itai bo'ata evakubu,

inoku lavo kauta 'eva

imata 'avaeata

esinita tau.

⁵⁴ Ena luva 'ana'i elaloia une inoku ena da'alaabi iduvuna Isalaela kauta eduluta.

⁵⁵ Keketa kevatai ena vilalo eluva 'ana'i vaia davana 'eva evala'asia Abela'amo mai 'ava'avana kevatai bemia keinikeini."

⁵⁶ Malia Elisabeta ita demia vuia koi boina inoku emue eda'a ena vanua.

Elisabeta Nakuna Ioane Evapulua.

⁵⁷ Elisabeta ena mauili bonina edaia koanai nakuna moluanena evapulua.

⁵⁸ Lovia namana ena vilalo nama vaikana enai evala'asia 'eva kevanai demia kauta mai kadi'a'ana vali deika ita delalonama vaia ka'ona.

⁵⁹ Melala ivakalavaninai 'eva boutai deasi melo ivana do'una, mai kamana Sakalia vanai be'aea.

⁶⁰ Beia sinana eko'isi ediaka, "Asi'i, ia vana eka'aea Ioane."

⁶¹ Boutai de'ouia dediaka, "Kadi'a'amu sia ka vana kanaua boina."

⁶² Makata devailu kamana kevanai melo va dava be'aea.

⁶³ Sakalia lelelele bika'ana elavuai lavuai vaia, akanai kanania eleleia koma, "Vana 'eva Ioane," deikaia koanai boutai detabu lovo si'asi'a.

⁶⁴ Komolonai nutuna eluvuia, malana ekomolo eluva luva 'udai, Dilava evanama'inala.

⁶⁵ Kevatai demia kauta boutai demakau si'asi'a, mai Iudea lolo vanuana boutai vali kanania deluvaia odaoda.

⁶⁶ Vali deika kauta nuatai delalovai lalovai dediaka, "Melo kanania a boinai be'ao." 'Olana Dilava imana 'eva ia akanai.

Sakalia Ena Enolea Luvana.

⁶⁷ Melo kamana Sakalia Idume kabukabuna nuana evavonua, inoku enolea luvana eluvaia ediaka,

⁶⁸ "Lovia namana Isalaela eta Dilava ekavanama'inala, 'olana ia 'ani easi ena kau etavata 'udai.

⁶⁹ Ivamaulita kauna kula'ilana

evako'isia ita eta ena da'alaabi kauna Davida ena iduvuai.

⁷⁰ Ani siako melalanai ena luva enolea kabukabuta nututai deluvaia boina.

⁷¹ Eta 'ou kauta mai ulata sia de'ula kauta boutai imatai bevamaulita.

⁷² Ena vilalo kubuta bevaikata mai ena luva 'ana'i kabukabuna 'eva elalovai 'inia.

⁷³ Kubuta Abela'amo kevanai ena luva'ana'i eluvavaia ita daitai:

⁷⁴ Eta 'ou kauta imatai bevamaulita,

sia ekamakau ena vinaula ekavavaia

⁷⁵ eta mia melalata boutai laloatai

ia vailanai kabukabuai
mai komoloai ekamia.

⁷⁶“Mai naku'u e,

oni 'eva be'aemu

akai vaika kauna

ena enolea kaumu.

'Olana oni bo'ana'ia

Lovia namana vailanai

ena dala bovavaia kave'i,

⁷⁷ena kau vamauli luvana

bovaikabasita eta

si'avana be'oukao koanai.

⁷⁸Ita eta Dilava ena vilalo dainai.

Melala ele'au 'ailalana vutuvutuai

be'ovu be'asi kevata,

⁷⁹ba va'ava'anai mai

vabuto'oai demimia

kauta akatai bekakala,

aeta be'ima bevada'ata nua'elu

dalanai bevada'ata dodo.”

⁸⁰Ioane e'aيدا'aida mai idumeai ekula'ila. Ia kano'akunai emia eda'amo ia Isalaela kau mato kevatai evailaasi.

2

Iesu Epulu.

(Mt 1.18-25)

¹ Melala kanaua laloanai Kaisala Aukusto, Loma lovia 'olana talavatu luvana ka esinia eda'a Loma ena ikakao kanobatata boutai ai kau vata belelele.

² Nia 'eva va lele lava'ana'ina Kavana kauna Kulene Sulia kanobatana eikaia kao koanai.

³ Inoku kau boutai vata beveveni 'ounai demue deda'a itaumo eta vanua.

⁴ Iosepa vaka Nasaleta vanuana ai Kalilea kanonai eko'isi eda'a Davida ena Vanua Betele'ema Iudea ai, 'olana ia 'eva Davida ena iduvu mai ena pulu kauna.

⁵ Vata beveveni 'ounai de'ouia 'ana'i beadavala ateatena Malia ita deda'a, Malia 'eva maibo'ana.

⁶ Laluana ua'i Betele'emai demia laloanai bemaui melalana edaia.

⁷ Inoku emauli 'eva melo moluanena batani kauna evapulua, tubu'ai de'umia inoku bolomakau eta aniani asiasinai devaenoa uda, 'olana 'ima'ima lumanai 'abu asi'i.

Anelu Mamoe 'Ima Kauta

Deluva Venita.

⁸ Kano ka'onamo kanaua laloanai mamoe 'ima kauta vaidia 'eva duvuai demia, boniai eta mamoe de'imata.

⁹ Lovia namana ena anelu ka kevatai evailaasi, Lovia namana nuavinai eva'ailalata koanai demakau si'asi'a.

¹⁰ Anelu ia e'outa ediaka, “Sia omakau. Lau vali nama'ina abia a'asi kau boutai lalota bevanama si'asi'a.

¹¹ Vali'u melala kanania'i Davida ena vanuai emui Vamauli kauna 'eva 'ani epulu, ia 'eva Keliso Lovia namana.

¹² Koana 'eva kanania boina emuai, melo 'oma'omana ka oi bodavalia, tubu'ai de'umia inoku bolomakau eta aniani asiasinai devaenoa uda.”

13 Alimo vutuvutuai anelu doutamo vaika dela'asi anelu kanaua ita de-
vaka'onamo, Dilava devanama'inala dediaka,
14 “nuavi 'eva Dilava
akai vaika vutuvutuna laloanai,
kanobatai nua'elu 'eva
elalonama venita kauta etai.”

*Mamoe 'Ima Kauta
Deda'a Melo Beikala.*

15 Anelu boutai ia devikanita demue deda'a vutuvutu koanai mamoe 'ima
kauta sibota deluvaluva dediaka, “Ita kada'a Betele'ema, Lovia namana
e'outa dava epulu davana ekaikala.”

16 Deda'a molau deda'a Malia mai Iosepa dedavalita mai melo 'oma'omana
bolomakau eta aniani asiasinai enouda deikaia.

17 Deikaia koanai anelu melo lovana eakuia luvana kau de'outa,
18 mamoe 'ima kauta vali kanaua deluva vaia koanai lele deika kauta
boutai detabu lovo si'asi'a.

19 Malia 'eva luva kataua boutai nuanai elalovai 'inita mai elalovai lalovai
vaita.

20 Mamoe 'ima kauta demue Dilava devanama'inala mai deapa vaia 'olana
dava kataua 'uluta deika mai deika davata boutai e'outa vitaitana umauta
depulu.

Melo Vana De'aeia Iesu.

21 Melala ivakalavaninai beivala melalanai, melo vana de'aeia Iesu,
sinana bo'anai asido'o epulu laloanai anelu va kanania evenia.

Simeona Mai 'Ana Lo'e Kabukabuna Laloanai Iesu Dela'uia.

22 Mose ena talavatu vitaitana ivanama'inata bonina eole mulinai melo
devuaia deda'a Ielusalema Lovia namana vilanai bevalla'asia.

23 Lovia namana ena talavatuai ilelena vitaitana, “Batanikau melota molu-
aneta boutai 'eva beveveni Lovia namana ena.”

24 Maivaka Lovia namana ena talavatu eluva vitaitana vakabukabu da-
vata beveveni 'eva popouda lua 'o boiomalo nakuta lua.

25 Ua'i Ielusalemai kau ka vana Simeona, ia 'eva komolo kauna mai Dilava
'olana e'aku. Isalaela ena vamauli kauna e'imaia, Idume Kabukabuna 'eva
ia akanai.

26 Idume Kabukabuna ia e'ouia sia bebaba beda'amo Lovia namana ia ena
Keliso beikala makava.

27 Idume Kabukabu ia evada'aladodo Lo'e Kabukabuna laloanai. Mose
ena talavatu luvana vitaitana Malia mai Iosepa 'eva Iesu devuaia deda'a Lo'e
Kabukabuna ai.

28 Simeona imanai melo ela'uia inoku Dilava evanama'inala ediaka,

29 “Lovia namana e, emu luvana'i

vitaitana emu da'alaabi kauna
vali'u mainua'elu'u bovikani'u.

30 'Olana maka'u ai emu

Vamauli 'Olana 'ani aikaia,

31 oni 'ani ova'olua

kau boutai vilatai.

32 'Ailalana kanania 'eva

pulu edea kauta ivaikabasita

mai nuavi 'eva emu kau

Isalaela kauta eta.”

33 Melo kamana mai sinana luvana kataua deika 'eva detabulovo si'asi'a.

³⁴ Simeona eta'u lalua evanama'inata inoku sinana Malia e'ouia ediaka, "Melo kanania 'eva Dilava edilaia Isalaela kauta doutamo beva'ekota mai bevako'isita, maivaka ena koakoai bevaiviivia,

³⁵ kau doutamo eta lalovai vuniatu bevala'asita. Mai itani lepo 'ido'idona betata'u oni nuamu vaka bevaanaanala."

³⁶ Ua'i vaka enolea ateatena ka vana 'Ana, Panuela nakuna, ia ena iduvu 'eva Asele, ia 'ani emotu, adana ita dekamoane vikau kalakoika demia,

³⁷ inoku eobu emia vali'u vikauna kalavani navui vani (84). Ia lo'e kabukabuna sia evikania kovo ia Dilava ekukudivo venia boni mai lani eolove mai eomeamea.

³⁸ Melala ka'onamo kanaua laloanai 'Ana easi lo'e kabukabuna laloanai Dilava evanama'inata inoku kau boutai Ielusalema bevamaulia kauna de'imaia kauta kevatai melo valina ekava.

Iesu Nasaletai E'aida'aida.

³⁹ Iosepa mai Malia lalua Lovia namana ena talavatu eluva vitaitanai vinaula boutai devaoleta koanai demue deda'a Kalilea kanonai eta vanua umauna Nasaleta.

⁴⁰ Melo e'aida'aida mai ekula'ila, aonekai evonu, Dilava ena iulaveni ia akanai emia.

Iesu Melonai Lo'e Kabukabuna Laloanai.

⁴¹ Vikau boutai kamana mai sinana deoda'a Ielusalemai la'au keini naduna 'ounai.

⁴² Iesu vikauna ouka lua koanai, kauta kakoina deda'a Ielusalema ia eta nadu koakoana dainai.

⁴³ Nadu eole mulinai kamana mai sinana demue ia Iesu 'eva Ielusalemai emia, kamana mai sinana sia deikabasi.

⁴⁴ Ia delalovaia 'eva ia kau vilotai, melala itoina deda'avaia mulinai ia banota mai kadi'a'ata kevatai dekavua.

⁴⁵ Sia dedavalia 'ounai demue deda'a Ielusalemai ua'i bekavua.

⁴⁶ Melala koi de'ole mulitai lo'e kabukabuna laloanai dedavalia vamalele kauta vilotai emia divo luva leleta eika mai elavuaia.

⁴⁷ Ena ikabasi mai luva evamue lлена deika kauta boutai detabulovo si'asi'a.

⁴⁸ Kamana mai sinana deikaia koanai detabulovo si'asi'a. Sinana ia e'ouia ediaka, "Naku'u e, dava 'ounai kanania boina kevamaiai ovavaia? Lau oni kamamu ita nuamai maikanita lai akavu vunumu."

⁴⁹ Iesu e'outa ediaka, "Dava 'ounai lau oi okavu'u? Oi sia oikabasi lau 'eva kama'u ena luma laloanai amimia, una?"

⁵⁰ Beia ia dava eluvavaia luvana ovonai sia deovo.

⁵¹ Inoku e'ovu ita deda'a Nasaleta, ua'i leleta daitaimo edai, beia sinana 'eva depulu davata kataua boutai nuanai elalovai 'inita.

⁵² Iesu 'eva kauaniai mai idibai e'aida'aida, maivaka Dilava mai kau ia deula venia.

3

Vaidi'u Kabukabu Kauna Ioane Eilolo.

(Mt 3.1-12; Mk 1.1-8; Io 1.19-28)

¹ Tibelio lovia 'olana Loma kanobatana eloviala vikau 'ouka ima laloanai Pontio Pilato 'eva Iudea eta Kavana. 'Eloda 'eva Kalilea eloviala, maivaka kadina Pilipo 'eva Itulea mai Talakonito eloviata, Lusania 'eva Abilene vanuata elovia vaita.

² Kabukabu kauta 'olatai kauta 'Ana mai Kaiapa eta melalai, kano'akunai Dilava ena luva easi Sakalia nakuna Ioane kevana.

³ Ioane eda'a Iolidana nutu 'aba'abana kanota boutai laloatai lalo'udai mai vaidi'u kabukabu eilolo vaia eta si'avana i'ou kaota 'ounai.

⁴ Enolea kauna Isaia ena pukai eleleia luvana vitaitana:

"Lele ka kano'akunai e'ae'ae ediaka,

'Lovia namana ena dala

ova'olua, ena da'a

dalana ovakomoloa.

⁵ Lava boutai bebubuta,

lolololo mai lolo boutai

beva'ovuta venuai bevitaita.

Dala deva'eva 'eva bekomolo,

mai 'abu si'avata 'abuta

bevavai kave'i kave'i.

⁶ Kau boutai Dilava ena

vamauli siavuna beikala.' "

Isa 40.3-5

⁷ Kau mato dela'asi deasi Ioane kevana bevaiddi'uta kabukabu, eilolo venita ediaka, "Kau'asi nakuta e, dai e'oumui badu e'asi davana kevanai oiboveau tau?"

⁸ Lalo'udai laloanai oibomimia vuavuumui bepupulu, ia sia oi bodiaka 'Abela'amo 'eva ita 'ava'avata.' Sia oibolalo'vaia 'ani oibonama'ina. 'Olana lau oi a'oumui, Dilava maiena siavu bika'a katanai'i Abela'amo nakuna bevavaita.

⁹ Ila 'eva 'ani e'olu au 'olanai, au boutai vuavuata nama'ita sia devapulu auta 'eva beukuta, 'alovai bekapota dodo."

¹⁰ Inoku do'u kauta ia delavuaia dediaka, "Inoku lai 'eva dava lai bavavaia?"

¹¹ Ioane e'outa ediaka, "Maiena ivadodo lua kauna 'eva banona sia maiena kauna 'eva ka bevenia, maiena iani kauna vaka kanaua bevavai koma."

¹² Moni visi kauta vaka deasi bevaiddi'uta kabukabu deko koanai, delavuaia dediaka, "Vaikabasi kaumu e, lai dava bavavaia?"

¹³ Ioane e'outa ediaka, "Moni boabia koanai vitaitana mo boabia, sia boabi keini."

¹⁴ Kualai kauta vaidia vaka delavuaia dediaka, "Lai 'eva dava lai bavavaia?" Ioane e'outa ediaka, "Aivalai 'o luva dedetai kau sia oi bole'bata eta moni oi bo'abi. Nuamui mediat'ai tavamui uma'uta mo oi bo'abi."

¹⁵ Kau 'eva devi'ima 'ounai nuatai delalovai lalovai dediaka Ioane 'eva ama'i Keliso.

¹⁶ Ioane ia boutai e'outa ediaka, "Lau 'eva veiai oi avaidi'umui kabukabu, beia muli'uai e'asi kauna ena siavu 'eva lau e'u siavu ekeinia, ena tamaka valota vaka baluluvu 'eva keva'uai sia edaia. Ia 'eva Idume Kabukabuna mai 'alova ai bevaiddi'umui kabukabu.

¹⁷ Ena witi ivavai kave'ita auna 'eva imanai, witi iaku mukamukata 'abuna bevavaia kave'i, witi keata bevalalota makuai bedoubou, ia lu'ulu'uta 'eva sia ebo'o kovo 'alovanai betouta."

¹⁸ Ioane vaidiba luvata doutamoai kau e'outa mai kevatai vali nama'ina eilolo vaia.

'Eloda Ioane Vabuto'o Lumanai E'alavua.

¹⁹ Ioane eta'u Kalileia eta lovia 'olana 'Eloda e'ovenia, 'olana ia kadina adana 'Elodia eadavala mai vinala si'avata vaika doutamo evavai 'ounai.

²⁰ 'Eloda ena si'avana kataua boutai akatai si'avana umauna ka evavaia 'udai, Ioane vabuto'o lumanai e'alavua.

*Ioane Iesu Evaidi'ua Kabukabu.**(Mt 3.13-17; Mk 1.9-11)*

²¹ Kau boutai evaidi'uta kabukabu laloanai, Iesu vaka evaidi'ua kabukabu. Iesu ena meamea laloanai vutuvutu eluvu.

²² Idume Kabukabuna boiomalo ikaikana vitaitana e'ovu easi ia akanai. Inoku lele ka vutuvutuai easi eluva ediaka, "Oni 'eva Lau Naku'u. E'u Lalo'au, alalonama venimu."

*Iesu Ena Pulu Kubu Idolina.**(Mt 1.1-17)*

²³ Iesu vikauna koinavui koanai ena vinaula emakavala.

Kau delalovaia

Iesu 'eva Iosepa nakuna.

Iosepa kamana 'eva 'Eli,

²⁴ kamana Matata, kamana Levi,

kamana Meleki, kamana Ianai,

kamana Iosepa,

²⁵ kamana Matatia, kamana 'Amosa,

kamana Nauma, kamana 'Eseli,

kamana Nakai,

²⁶ kamana Mata, kamana Matatia,

kamana Semeina, kamana Ioseka,

kamana Ioda,

²⁷ kamana Ioanana, kamana Lesa,

kamana Solobabela,

kamana Salatiele, kamana Neli,

²⁸ kamana Meleki, kamana 'Adi,

kamana Kosama, kamana

'Elamadama, kamana 'Ele,

²⁹ kamana Iosua, kamana 'Eliesele,

kamana Iolima, kamana Matata,

kamana Levi,

³⁰ kamana Simeona, kamana Iuda,

kamana Iosepa, kamana Ionama,

kamana 'Eliakima,

³¹ kamana Melea, kamana Mena,

kamana Matata, kamana Natana,

kamana Davida,

³² kamana Iese, kamana 'Obeda,

kamana Boa, kamana Salamone,

kamana Nasona,

³³ kamana 'Aminadaba, kamana 'Adamina,

kamana 'Aleni, kamana 'Esalona,

kamana Pale, kamana Iuda,

³⁴ kamana Iakobo, kamana Isako,

kamana Abela'amo, kamana Tela,

kamana Na'olo,

³⁵ kamana Seluka, kamana Leu,

kamana Peleka, kamana 'Ebele,

kamana Sala,

³⁶ kamana Kainana,

kamana 'Apasada,

kamana Sema, kamana Noa,

kamana Lameka,

³⁷ kamana Metusala, kamana Enoka,

kamana Ialeta, kamana Ma'alale,
 kamana Kainana,
³⁸ kamana 'Eno, kamana Seta,
 kamana 'Adamu,
 kamana Dilava.

4

Diabolo Iesu Ekovoia.

(Mt 4.1-11; Mk 1.12, 13)

¹ Iesu Iolidana nutunai emue 'udai koanai Idume Kabukabuna ia nuana evavonua, inoku Idume Kabukabuna eta'u evada'ala deda'a kano'akunai,

² melala vani navui ua'i diabolo eta'u ekovoia.

Melala kataua'i iani sia ka eania kovo, to'onai ia vikolo eakuia.

³ Diabolo eta'u ia e'ouia ediaka, "Bema oni Dilava Nakuna koanai bika'a katania boma'outa ianiai bemaao."

⁴ Iesu ia e'ouia ediaka, "Ani puka kabukabunai ilelena, 'kau 'eva sia ianiai mo bemaui.' "

⁵ Diabolo eta'u Iesu evada'ala dele'au loloai inoku melala kava'inamo kanobata vanuata boutai evaikala.

⁶ Inoku Diabolo ia e'ouia ediaka, "Lau batata'u siavu mai nuavi katania boutai bavenimu, 'olana dava katania boutai 'eva lau ima'u ai eudata, Inoku lau dai aula venia kauna bavenia.

⁷ Bema oni lau bokukudivo veni'u koanai, dava katania boutai 'eva oni emu."

⁸ Iesu ena luva evamuea ediaka, "Ani puka kabukabunai ilelena, 'Lovia namana oni emu Dilava mo bokukudivo venia, ia mo sibona da'alana bo'abi.' "

⁹ Mune'e evada'ala deda'a Ielusalem lo'e kabukabuna uvinai evalavala 'au, e'ouia ediaka, "Bema oni Dilava Nakuna koanai nia'i sibomu lovo asi.

¹⁰ 'Olana 'ani puka kabukabunai ilelena,

'ia ena anelu be'outa
 be'imamu.

¹¹ Maivaka ia imatai

beabimu isi,

asi'i aemu bika'ai

omaakua 'ounai.' "

Sal 91.11, 12

¹² Iesu ia e'ouia ediaka, "Ani puka kabukabunai eluva, 'Lovia namana emu Dilava vikovo 'abunai sia bone'eadivo.' "

¹³ Diabolo ena vikovo boutai evaoleta koanai ia kevanai eda'atau beda'amo melala nama'ina ka be'asi vakaia.

Iesu Ena Vinaula Kalileai Emakavala.

(Mt 4.12-17; Mk 1.14, 15)

¹⁴ Idume Kabukabuna siavunai Iesu emue eda'a Kalileai ua'i kano kanaua vanuata boutai laloatai ia valina dekava odaoda.

¹⁵ Iuda kauta eta lo'e laloatai evaikabasi, kau boutai ia devanama'inala.

Nasaleta Kauta Iesu Devasi'avanala.

(Mt 13.53-58; Mk 6.1-6)

¹⁶ Iesu eda'a e'aida'aida vanuana Nasaleta ai, ena koakoa dainai Melala Kabukabunai Iuda kauta eta lo'e laloanai edodo, elavadivo Puka bevakua.

¹⁷ Isaia enolea kauna ena puka devenia, puka eluvuia, kanania eleleia koma 'abuna edavalua 'eva evakua ediaka,

¹⁸ "Lovia namana Idumena

'eva lau aka'uai,
 'olana edila'u
 vali nama'ina bailolo vaia
 ulalu kauta kevatai.
 Esini'u deliota kauta
 ivala'asita bailolo vaia
 mai maka 'ede kauta
 beikaika 'udai,
 anaana laloanai demimia kauta
 bavala'asita,
 19 Lovia namana ena kau
 bevamaulita
 vikauna 'ani edaia valina
 bailolo vaia."

Isa 61.1, 2

20 Iesu puka e'alavua i'imana kauna evenia inoku emia divo, lo'e laloanai kau boutai makata ia deika 'inia.

21 Ia 'ani e'outa makava ediaka, "Puka Kabukabunai luva oi o'ika luvana 'eva vali'u melala kanania'i 'ani emomo'ai."

22 Luva nama'ita e'outa 'ounai boutai ia devanama'inala mai detabulovo si'asi'a delavuai lavuai dediaka, "Nia 'eva Iosepa nakuna, una?"

23 Iesu ia e'outa ediaka, "Lau aikabasi dokadoka oi luva kanania 'ani oi bo'ou'u bodiaka, 'Mulamula veni kaumu e, sibomu vamaulimu.' maivaka oi bo'ou'u bodiaka, 'Dava dava ua'i Kapelanauma ai ovavai 'uluta lai aika davata, nia'i emu vanua umaunai vaka bovavaita.'"

24 Ia ediaka, "Luva umauna lau oi a'oumui, enolea kauna ena vanua umaunai 'eva sia beabiadae.

25 Luva umauna lau oi a'oumui, 'Elia ena melalai obu 'a'ateta doutamo Isalaelai demia, vikau koi mai vuia kalakoi vutuvutu e'alavua lamu sia eaku 'eva kanobata itoinai doe namavaikana epulu.

26 Inoku 'Elia sia esinia eda'a kataua ka kevana, beia eda'a Salepata vanuana Sidono kanonai obu ateatena ka kevana.

27 Maivaka enolea kauna Elisa ia ena melalai Isalaela laloanai ua'i 'eva loki kauta doutamo, sia ka enama'ina, ia Sulia kauna Na'amana sibona mo enama'ina."

28 Lo'e laloanai kau boutai luva kataua deika koanai debadu si'asi'a.

29 Deko'isi vanuai dedolia asi devada'ala deda'a devanua lolona akanai etaula 'eva ke'eke'eai bekapoa asi.

30 Beia ia 'eva kau mato viloata umaunai eda'a ovo.

Iesu Kau Ka Nuanai Ka'uba Si'avana Vaika Elo'oia La'asi.
 (Mk 1.21-28)

31 Inoku e'ovu eda'a Kalilea vanuana ka Kapelanauma ua'i melala kabukabunai Iuda kauta eta lo'eai kau evaikabasita makamaka.

32 Ena vaikabasi luvatai detabulovo si'asi'a 'olana ena luvaluva 'eva maisi-avuta.

33 Kau ka nuanai ka'uba si'avana vaika edodo kauna ua'i lo'e laloanai evaoi 'unu'unu,

34 ediaka, "'A! Iesu Nasaleta kauna e, lai dava kevamaiai bovavaia? Oni o'asi 'eva lai boakubamai, una? Lau aikabasi oni 'eva Dilava ena Kabukabu kauna."

35 Iesu ia e'ovenia ediaka, "'Uluumu. Ia nuanai la'asi." Boutai vailatai ka'uba si'avana vaika kau kanaua eva'eko'a si'asi'a inoku kauaninai ela'asi, sia dua ka evenia.

³⁶ Kau boutai detabulovo si'asi'a, deviluva viveni dediaka, "Nia 'eva vaik-abasi davana? Maisiavuna mai maikula'ilana ka'uba si'avata vaika e'outa 'eva kau nuatai dela'asi."

³⁷ Kano kanaua itoinai Iesu valina dekava odaoda.

Iesu Simona Lavana Ateatena Ena 'Olele Evanama'inala.

(Mt 8.14-17; Mk 1.29-34)

³⁸ Iesu lo'e evikania eda'a Simona ena luma. Simona lavana ateatena kauna desiavu si'asi'a e'olele, Iesu denoia bedulua.

³⁹ Iesu eda'a ateate kevanai elavadiovino 'olele kanaua epilaia be'ole, inoku 'olele eole, komolonai ateate eko'isi eta iani evavai.

Iesu 'Olele Edeata Edeata Evanama'inata.

⁴⁰ Melala ena ulu eda'a venia koanai kau boutai 'olele edeata edeata kauta boutai devuata deasi Iesu kevana, Iesu imana ka ka akatai ekao'au evamaulita.

⁴¹ Ka'uba si'avata vaika vaka kau doutamo nuatai dela'asi devaoi dediaka, "Oni 'eva Keliso Dilava Nakuna." Iesu epilata e'outa kao sia beluluva 'olana deikabasi ia 'eva Keliso.

Iesu Iudea Lo'eta Laloatai Eilolo.

(Mk 1.35-39)

⁴² Taba elele laloanai Iesu ela'asi eda'a 'abu 'akuna kai bemeamea. Kau mato namavaikana ia ikavuna deda'a, dedavalia koanai de'ouia ia kevatai sia bemada'a tau.

⁴³ Beia Iesu e'outa ediaka, "Lau 'eva Dilava ena lovia vanuana valina vanua edeata edeata kevatai bailolo vaia 'olana kanaua 'ounai lau esini'u."

⁴⁴ Inoku Iudea lo'eta laloatai eilolo.

5

Iesu Ibanona Kauta Vani E'aeta.

(Mt 4.18-22; Mk 1.16-20)

¹ Melala ka Iesu Kenesaleta 'ovuna 'aba'abanai elava eilolo laloanai kau mato delavaia kaiukaiu Dilava ena luva 'uluna be'ika.

² Ia asi lua 'ovu 'aba'abanai deda'au eikata, va'eka kauta devikanita nabuai eta vuo dedeinita.

³ Iesu 'eva Simona ena asiai ele'au, inoku e'ouia kava'inamo betoa asi, ia asiai emiadiovino inoku kau mato evaikabasita.

⁴ Iesu eluvaluva koa mulinai Simona e'ouia ediaka, "'Oula kada'aia, emu vuo ua'i bonana sisi vaida bovakota."

⁵ Simona ia ena luva evamuea ediaka, "'Ola kaumu e, lai boni itoinai lai abavunu lani ia sia dava ka lai abia, beia oluluva 'ounai vuo bava'ovuta."

⁶ Vuo dene'eta 'eva sisi doutamo vaika devakoata, eta vuo kevaimo bema'idi.

⁷ Banota vaida asi ka ai kauta dekapota be'asi beduluta, inoku deasi asita lua devavonuta kevaimo deuku.

⁸ Simona Petelo koa kanaua eikaia koanai Iesu aena 'olanai ekuidula inoku ediaka, "Lovia namana e, lau 'eva si'avana kau'u, keva'uai da'a tau."

⁹ Simona banona ita 'eva detabulovo si'asi'a 'olana sisi kataua boita doutamo vaika devakoata 'ounai,

¹⁰ Simona ita deva'eka ka'ona kauta Sebedeo nakuna Iakobo mai Ioane vaka detabulovo si'asi'a. Beia Iesu Simona e'ouia ediaka, "'Sia bomakau. Vali'u beda'amo vaila melalatai oni 'eva kau bova'ekata."

¹¹ Eta asi develi'au nabuai, dava boutai devikanita Iesu mulinai deda'a.

Iesu Loki Kauna Evanama'inala.

(Mt 8.1-4; Mk 1.40-45)

¹² Iesu vanua ka laloanai emia laloanai, ua'i kau ka kauna itoina 'eva eloki, inoku Iesu eikaia koanai e'eko aena 'olanai epakadivo inoku enoia ediaka, "Lovia namana e, bomaula koanai bomavanama'ina'u."

¹³ Iesu imana eisia lao eabia kovo, e'ouia ediaka, "A'ula, bonama'ina." Komolonai loki kau kanaua evikania.

¹⁴ Ia e'ouia kao ediaka, "Sia kau ka vailanai boluluva, beia boda'a kabuk-abu kauna kevanai beikamu, mai vanama'ina venivenina davana Mose eluva vitaitana boveveni, inoku kau bevamomo'aia oni 'ani onama'ina."

¹⁵ Beia Iesu valina dekada odaoda inoku kau mato namavaikana deasi lelenu be'ika mai eta 'olele bevanama'inata.

¹⁶ Beia Iesu eda'atau eda'a 'abu 'avaeana kai ua'i emeamea.

Iesu 'Eko Kauna Evanama'inala.

(Mt 9.1-8; Mk 2.1-12)

¹⁷ Melala ka Iesu evaikabasi laloanai Palisea kauta mai talavatu 'ola kauta vaidia ua'i demia, ia 'eva Kalilea vanuata boutai ai, Iudea mai Ieluselema laloatai deasi. Lovia namana siavuna 'eva Iesu akanai 'olele kauta evanama'inata.

¹⁸ Kau vaidia 'eko kauna ka toto'ai devuaia deda'a dalana dekadu bedodo vaia Iesu vailanai bene'eadivo.

¹⁹ Bedodo vaia deko beia sia dala ka dedavalua 'olana kau mato namavaikana 'ounai, inoku devuaia dele'au deda'a luma 'uvina, 'uvi deiuia isi inoku maitoto'ana deva'ovua eda'a Iesu vailanai kau mato bo'adatai.

²⁰ Iesu eta abiveni namavaikana kanaua boina eikaia koanai eluva ediaka, "E'u kau e, emu si'avana 'ani iou kaota."

²¹ Talavatu 'ola kauta mai Palisea kauta nuatai delalovai lalovai dediaka, "Nia 'eva kau davana Dilava evasi'avanala? Dai si'avana be'ou kao, Dilava mo sibona."

²² Beia Iesu eta lalovai eikabasia 'ounai e'outa ediaka, "Dava 'ounai lalovai katanua boita nuamuia oi olalovaita?"

²³ Davana ba'oua 'eva eveavea, emu si'avana 'ani i'ou kaota 'o ko'isi da'a.

²⁴ Beia oi boikabasi Lau Kau Nakuna 'eva kanobatai maisiavu'u si'avana ba'ou kao." Ia 'eko kauna e'ouia ediaka, "Lau oni a'oumu, ko'isi emu toto'a abia, da'a emu luma."

²⁵ Komolonai mo vailatai eko'isi ena enokai toto'ana eabia isi eda'a ena luma Dilava evanama'inala.

²⁶ Boutai detabulovo si'asi'a mai Dilava devanama'inala, maimakauta deluva dediaka, "Vali'u koa edeana umauna kaikala."

Iesu Levi Ena Vinaula 'Abunai E'aeia.

(Mt 9.9-13; Mk 2.13-17)

²⁷ Kanaua mulinai Iesu ela'asi eda'a moni visi kauna ka vana Levi moni visi 'abunai emiadvivo eikaia, e'aeia ediaka, "Muli'uai mai."

²⁸ Levi eko'isi dava boutai evikanita Iesu mulinai eda'a.

²⁹ Ua'i Levi ena lumai nadu namana ka evavaia Iesu dainai, moni visi kauta doutamo mai kau edeata vaidia vaka ia ita demia deaniani ka'ona.

³⁰ Palisea kauta mai talavatu 'ola kauta deta'u Iesu ibanona kauta kevatai denunuvai nunuvai dediaka, "Dava 'ounai oi moni visi kauta mai si'avana kauta ita oi oaniani mai oi oinuinu ka'ona?"

³¹ Iesu ia eta luva 'uluva eika inoku eta luva evamuea ediaka, "Kau nama'ita 'eva mulamula veni kauna sia dekadu, beia de'olele kauta mo 'eva mulamula veni kauna dekadu."

³² Lau asi 'eva sia komolo kauta ba'aeta, beia si'avana kauta belalo'udai 'ounai asi."

*Love Lavu'ai Lavuaina.**(Mt 9.14-17; Mk 2.18-22)*

³³ Kau vaida Iesu de'ouia dediaka, "Ioane ibanona kauta melala doutamo delove mai demeamea, Palisea ibanota kauta vaka vitaitana devavaia, beia oni ibanomu kauta deaniani mai deinuinu."

³⁴ Iesu e'outa ediaka, "Oi olalovaia kamoane makamaka kauna ena da'a'au kauta ita demia ka'ona laloanai belolove 'eva bedaia, una?"

³⁵ Beia melalana be'asi koanai kamoane makamaka kauna kevatai beabia tau, inoku melala kataua'i ia 'eva belolove."

³⁶ Iesu luva ivavitaitana kanania e'outa, "Kau ka tubu'a makamakana si'ana sia be'idia ovo tubu'a 'ana'ina 'idina bekuli bubua 'olana tubu'a makamakana be'idia ovo koanai tubu'a makamakana 'ani be'idi mai tubu'a 'ana'ina mai tubu'a makamakana luana 'eva ikata sia bevaita."

³⁷ Kau ka vine veina makamakana popo'o 'ana'inai sia belaiia uda, kanaua bevavaia koanai vine veina makamakana bekukubu popo'o 'ana'ina beva'alamala inoku be'itabu popo'o besi'avana."

³⁸ Beia vine veina makamakana 'eva popo'o makamakanai belaiia, inoku luana benama'ina."

³⁹ Kau ka vine veina 'ana'ina beinua mulinai vine veina makamakana sia beula venia 'olana bediaka vine veina 'ana'ina 'eva nama'ina."

6*Melala Kabukabuna Loviana.**(Mt 12.1-8; Mk 2.23-28)*

¹ Melala Kabukabunai Iesu mai ibanona kauta ita witi lobana ka laloanai dekeini, ibanona kauta witi vuata debukuta avata imata ai demuduta ovo deani."

² Palisea kauta vaida deluva dediaka, "Oi dava 'ounai Melala Kabukabunai sia oi bovavaia vinalana oi ovavaia?"

³ Iesu ia eta luva evamuea ediaka, "Oi ama'i Davida sisibana sia oi ovakua kovo. Ia mai banona ita vikolo de'akuta koanai dava evavaia?"

⁴ Ia Dilava ena lumai edodo devakabukabu palaoata kabukabu kauta sibota mo be'ani davata eabita eanita mai ibanona kauta evenita deani."

⁵ Maivaka e'outa ediaka, "Lau Kau Nakuna 'eva Melala Kabukabuna Loviana."

*Iesu Kau Ka Imana Badena Evanama'inala.**(Mt 12.9-14; Mk 3.1-6)*

⁶ Melala kabukabuna edeana kai Iesu Iuda kauta eta lo'eai edodo evaik-abasi. Kau ka ua'i imana idibana 'eva ebade."

⁷ Talavatu 'ola kauta mai Palisea kauta Iesu de'idimala Melala Kabukabunai bevanama'inala 'o asi'i, 'olana Iesu va'eva 'abunai bene'eadivo dalana dekavuia."

⁸ Beia Iesu ia eta lalovai eikabasi, kanaua 'ounai ima bade kauna e'ouia ediaka, "Ko'isi vailatai lavadivo." Inoku eko'isi elavadivo."

⁹ Iesu e'outa ediaka, "Lau oi alavuaimui, davana 'eva ekomolo Melala Kabukabunai, ekavanama'ina 'o ekavavai si'asi'a, ekavamauli 'o ekavaba?"

¹⁰ Iesu boutai eikata nekeneke mulinai ima bade kauna e'ouia ediaka, "Imamu isia komolo." Ia evavaia 'eva imana ekomolo 'udai."

¹¹ Ia 'eva nuata debadu si'asi'a, sibota deluvaluva Iesu kevanai dava bevavaia."

*Iesu Veaneke Kauta**'Ouka Lua Edilata.**(Mt 10.1-4; Mk 3.13-19)*

¹² Melala kanaua'i Iesu loloai ele 'au bemeamea, boni itoina Dilava kevanai emeamea.

¹³ Lani ekevai laloanai ia ibanona kauta e'aeta deasi kevana, viloatai ouka lua edilata mai e'aeta veauneke kauta.

¹⁴ Ia 'eva Simona vana e'aeia Petelo, mai kadina Andelea, Iakobo mai Ioane, Pilipo mai Batolomeo,

¹⁵ Mataio, Toma, Alepeo nakuna Iakobo, mai Simona de'aeia Selote kauna,

¹⁶ Iakobo nakuna Iuda mai Isakaliote kauna Iuda ia venina eveni kouna ekou kauna.

Iesu Kau Mato Kevatai Eilolo Mai 'Olele Kauta Evanama'inata.

(Mt 4.23-25)

¹⁷ Iesu ena veauneke kauta ita loloai de'ovu kano komolonai delavadivo. Ua'i 'eva ibanona kauta mato namavaikana mai kau doutamo vaika 'eva Iudea vanuatai boutai laloatai, Ielusalem a, Tulo mai Sidono 'atu kanota boutai laloatai deasi,

¹⁸ deasi 'eva leleni be'ika mai eta 'oleleai benama'ina. Ka'uba si'avata vaika devabavunuta kauta vaka deasi evanama'inata.

¹⁹ Inoku kau boutai eta ula 'eva ia beabia kovo 'olana siavu 'eva ia enai ela'asi inoku ia boutai evamaulita.

Kau Davata Kauta Denama'ina.

(Mt 5.1-12)

²⁰ Iesu ibanona kauta eikata inoku ena luva emakavala ediaka,

“O i oulalu kaumui 'eva oi onama'ina,
'olana Dilava ena lovia vanuana 'eva oi emui.

²¹ Vali'u oi ovikolo kaumui 'eva oi onama'ina,
'olana oi 'eva bo'amui bekukubu.

Vali'u oi okakani kaumui 'eva oi onama'ina,
'olana oi bomamai.

²² Lau Kau Nakuna 'ou'uai

bema kau devaiviivimui,

viloamui edau'a,

luva si'avata de'oumui,

vamui devavai si'asi'a

'eva oi onama'ina.

²³ Melala kanaua'i lalomui benanama mai oi bolalonama si'asi'a oi boneneva, 'Olana vutuvutuai tavamui nama vaikana. Ia 'ava'avata enolea kauta kevatai kanaua devavaita koma.

²⁴ “Beia vali'u oi lavo kaumui kevamui

'eva besi'avana vaika,

'olana emui mauili mediana itoinai

'ani oi oabia.

²⁵ Vali'u oi oani vunu kaumui kevamui

'eva besi'avana vaika,

'olana oi bovikolo.

Vali'u oi omamai kaumui kevamui

'eva besi'avana vaika,

'olana nuamui beanana

mai oi bokakani.

²⁶ Kau boutai vamui devanama'inata kaumui

kevamui 'eva besi'avana vaika,

'olana ia 'ava'avata koa kanania vitaitana devavaia

enolea kauta dedeta kevatai.

*Emui 'Ou Kauta
Oibolalo'au Venita.
(Mt 5.38-48; 7.12a)*

²⁷ “Beia lele'u oi oika kaumui a'oumui. Emui 'ou kauta oi bolalo'au venita, ulamui sia de'ula kauta kataua kevatai oi bovavai kave'i.

²⁸ Denunuvai nunuvaimui kauta kataua oi bovanama'inata, mai devavaimui si'asi'a kauta akatai oi bomeamea.

²⁹ Kau ka metemu avekena bepi'ala koanai, avekena vaka bovenia bepi'ala. Mai kau ka emu kouti beabia koanai, emu ivadodo 'ouna sia bovavaia.

³⁰ Kau dava kevamui denoinoi davata 'eva oi bovenita, mai kau ka emu dava ka eabia koanai sia bo'oua bevenimu 'udai.

³¹ Oi o'ula kau kevamui kanaua boina bemavavai koma vitaitana oi vaka kanaua boina kau kevatai oi bovavai.

³² “Kau delalo'au venimui kauta kataua mo oi bolalo'au venita koanai ena mediana 'eva dava oi kevamui? Si'avana kauta vaka delalo'au venita kauta kanaua delalo'au venita koma.

³³ Mai devavaimui kave'i kauta kataua mo oi ovavaita kave'i koanai ena mediana 'eva dava kevamui? Si'avana kauta vaka kanaua devavai koma.

³⁴ Kau dava devenimui kauta kataua mo oi ovenita koanai ena mediana 'eva dava oi kevamui? Si'avana kauta vaka si'avana kauta devenita inoku eta ula 'eva vitaitata tavata bevamue.

³⁵ Beia emui 'ou kauta oi bolalo'au venita, mai oi bovavaita kave'i, mai oi boveni davata tavata ivamueta sia oi bolalovai. Inoku tavamui 'eva namata vutuvutuai oi bo'abi, mai oi 'eva akai vaika Dilavana nakunai oi bo'ao, 'olana ia 'eva sia devanama'inala kauta mai si'avana kauta vaka elalota.

³⁶ Vilalo vinaulata oi bovavai itani Kamamui boina, ia 'eva mai ena vilalo.

*Oni Kau Ka Ena Si'avana
Lovana Sia Boakua.
(Mt 7.1-5)*

³⁷ “Banomui sia oi bovaluvata inoku Dilava vaka oi sia bevaluvamui, banomui sia oi bovasi'avanata inoku Dilava vaka oi sia bevasi'avanamui, banomui eta si'avana oi bo'ou kao inoku Dilava vaka oi emui si'avana be'ou kao.

³⁸ Banomui oi bovenita inoku Dilava vaka oi bevenimui, vitaitana dava ka bevonu vaika bekao 'inia, beaku 'inia, be'itabu 'itabu, kanaua boina bevenimui koma. 'Olana oi oveveni vitaitana Dilava vaka oi bevenimui 'udai.”

³⁹ Iesu luva ivavitaitana kanania e'outa ediaka, “Maka 'ede kauna ka betata'u maka 'ede kauna ka sia bevada'ala, kanaua bevavaia koanai laluanu 'uli laloanai be'ekouda.

⁴⁰ Malele melona ka ena vaikabasi kauna sia bekeinua, ia malele melota 'eva eta malele bevaole kave'i koanai eta vaikabasi kauna ita bevitaita.

⁴¹ “Dava 'ounai au na'ina banomu makana laloanai kanaua oikala beia au ubana namana oni makamu laloanai davana sia olalovaia?

⁴² Oni sibomu makamu laloanai au ubana namana kanaua sia oikala koanai, aboina bo'akalamu bo'oua bodiaka, 'Bo'akala'u e, makamu laloanai au na'ina'ina babia ovo.' Dede kaumui e, makamu laloanai au ubana namana abia ovo makava vakaia, mulinai makamu nama'itai bo'akalamu makana laloanai au na'ina'ina boikala kave'i boabia ovo.”

*Au Ka Ka Vuavuatai Ekaikabasita.
(Mt 7.16-20; 12.33-35)*

⁴³ “Au nama'ina vuavua si'avana vaika sia bevapulua, maivaka au si'avana vaika vuavua nama'ina sia bevapulua.

⁴⁴ 'Olana au ka ka vuavuatai ikabasi epupulu, kau 'eva 'ini aumai veivei sia debuku ovo, mai ava 'ini'iniave'alu sia deabia.

⁴⁵ Kau nama'ina etata'u dava namaita evala'asi 'olana nuanai 'eva dava nama'ita demimia, kau si'avana etata'u dava si'avata evala'asi 'olana nuanai 'eva dava si'avata demimia. 'Olana nutuai dela'asi luvata boutai 'eva nuai demimia.

Luma Idauta Kauta Lua.

(Mt 7.24-27)

⁴⁶ 'Oi dava 'ounai oi o'ae'u, 'Lovia namana e, Lovia namana e,' ia e'u luva sia oi oabia dae?

⁴⁷ Kau de'asi keva'u inoku e'u luva leleta de'ika mai vinalata devavai kauta 'eva aboita bavaikamui.

⁴⁸ Ia 'eva itani kau ka luma edauia boina, 'uli e'uia e'ovu vaika venuai inoku bika'a akanai kovolo evalavata'au, abaka ela'asi koanai luma edolia beia luma sia euteute, 'olana luma edauia kave'i 'ounai elava 'ini.

⁴⁹ Beia e'u luva e'ika inoku vinalata sia evavai kauna 'eva itani kau ka luma kano akanai evalavala kovolona asi'i boina, abaka ela'asi luma edolia koanai komolonai luma epalu, luma epalu 'eva abaka edaloia ovo.”

7

Iesu loma Kualii 'Ola Kauna Ena Vinala Kauna Ena 'Olele Evanama'inala.

(Mt 8.5-13)

¹ Iesu ena luva boutai kau kevatai eluvasi palu mulinai ia eda'a Kapelanau-mai edodo.

² Loma kualii 'ola kauna ka ua'i ena da'alaabi kauna elalo'au venia vaika kauna 'eva e'olele si'asi'a itani 'ani bebaba.

³ Ia Iesu valina e'ika koanai Iuda kauta namata vaidia esinita Iesu benoia be'asi ena da'alaabi kauna bevamaulia.

⁴ Ia deasi Iesu kevana koanai denoia 'udai 'udai dediaka, “Kau kanania bomadulua 'eva bemanama'ina.

⁵ 'Olana ia emai iduvu elalo'au venia, mai ia eta'u emai lo'e evalavala.”

⁶ Kanaua 'ounai Iesu ia ita deda'a, Iesu luma ekevaia koanai kualii 'olana kauna ena kau esinita Iesu de'ouia dediaka, “Lovia namana e, sia bov-abavunu, 'olana lau 'eva sia anama'ina bo'asi e'u lumai bodododo.

⁷ Kanaua 'ounai bavavasi kevamu 'eva sia edaia. Beia luvamo boluvala inoku e'u da'alaabi kauna benama'ina.

⁸ Lau 'eva kau ka ena siavu venunai, inoku kualii kauta 'eva lau venu'uai. Lau kau kanania ka a'oua da'a 'eva ia edada'a, banona a'oua mai 'eva ia e'asi. E'u da'alaabi kauna a'oua kanania vavaia 'eva ia evavaia.”

⁹ Iesu luva kanaua eika koanai etabulovo si'asi'a, ekai'udai kau mato mulinai deda'a kauta kataua e'outa, “Lau oi a'oumui, Isalaela laloanai abiveni kanania boina sia ka adavalia.”

¹⁰ 'Ola kauna esinita kauta kataua demue deda'a luma koanai, da'alaabi kauna 'ani enama'ina dedavalia.

Iesu Obu Nakuna Bai Evako'isia.

¹¹ Melala kava'inamo eole mulinai Iesu eda'a vanua ka vana Naina, ibanona kauta mai kau mato ia ita deda'a.

¹² Vanua nutualana 'ani dekevaia laloanai, ba kauna ka devuaia dela'asi, ua 'eva obu ka nakuna ka'oukukunamo, vanua kauta doutamo obu debanoia.

¹³ Lovia namana obu eikaia koanai elalo si'ala, inoku e'ouia ediaka, "Sia bokakani."

¹⁴ Ia eda'a ilulao eda'a to'o eabia kovo, inoku to'o devuaia kauta delavadio. Iesu eluva ediaka, "Kau 'alu'aluna e, lau a'oumu, ko'isi."

¹⁵ Ba kauna eko'isi emiadio inoku eluvaluva, Iesu melo eabia sinana evenia 'udai.

¹⁶ Boutai demakau si'asi'a, Dilava devanama'inala dediaka, "Enolea namana ka vilootai evailaasi." Maivaka dediaka, "Dilava 'eva 'ani easi ena kau kevata."

¹⁷ Iesu valina kanania Iudea kanona itoina mai kevanai 'abuta boutai laloatai deluvaia odaoda.

Ioane Ibanona Kauta Lua Esinita Deda'a Iesu Kevana.

(Mt 11.2-19)

¹⁸ Ioane ibanona kauta dava katanian boutai ia de'ouia.

¹⁹ Inoku ibanona kauta lua e'aeta esinita Lovia namana belavuaia bediaka, "Be'asi kauna 'eva oni, 'o kau edeana ka lai ba'imala?"

²⁰ Ia deasi Iesu kevana koanai de'ouia dediaka, "Vaidi'u Kabukabu kauna Ioane esinimai lai a'asi kevamui lai balavaimu, 'Be'asi kauna 'eva oni, 'o kau edeana ka lai ba'imala?"

²¹ Melala kanaua'i Iesu 'eva kau doutamo vaika eta 'olele, kauta deanana mai ka'uba si'avata vaika nuatai kauta evanama'inata, maivaka maka 'ede kauta doutamo makata evanama'ina deikaika 'udai.

²² Iesu ia laluaana eta luva evamuea ediaka, "Oda'a, dava makamui ai o'ika mai ka'amui ai 'uluta oi o'ika davata Ioane oi bo'oua. Maka 'ede kauta 'ani deikaika, 'ome'ome kauta 'ani dedada'a, loki kauta 'ani kauta denama'ina, kaia bubu kauta lele 'ani de'ika, ba kauta 'ani deko'isi demauli, maivaka ulalu kauta kevatai vali nama'ina ailolo vaia."

²³ Maivaka eluva ediaka, "Nuana sia elalo to'ato'a keva'uai kauna 'eva enama'ina."

Iesu Ioane Valina Ekava.

²⁴ Ioane esinita kauta demue 'udai mulinai, Iesu mune'e kau mato kevatai Ioane luvana eluva ediaka, "Oi oda'a kano 'akunai 'eva dava oi boikala oko? Lani eunu 'ebavala eva'ekota oi boikata, una?"

²⁵ Asi'i koanai, dava oiboikala oko 'ounai oi oda'a ua'i? Kau ka tubu'a tavana namana evadodoa oi boikala, una? Kau kataua tubu'a nama'ita vaika devadodota mai eta lovia davata doutamo kauta 'eva lovia 'olana kauna ena lumai oi bodavalita.

²⁶ Dava oi boikala oko 'ounai oi oda'a ua'i? Enolea kauna ka, una? Momo'ai dokadoka, luva umauna, lau oi a'oumui, kau kanania 'eva enolea kauta ekeinina.

²⁷ Kau kanania valina 'eva Puka Kabukabunai deleleia, 'E'u veauneke kauna basinia be'ana'ia, emu dala beva'olua makava.'

Mal 3.1

²⁸ Lau oi a'oumui. 'A'ate nuatai depupulu kauta boutai vilootai sia kau ka Ioane ekeinina. Beia Dilava ena lovia vanuana laloanai ekiki vaika kauna mo Ioane ekeinina."

²⁹ Kau boutai mai moni visi kauta 'eva Iesu ena luva 'uluna deika koanai devamomo'ai Dilava ena dala 'eva umauna 'olana Ioane eta'u ia evaidi'uta kabukabu.

³⁰ Beia Palisea kauta mai talavatu 'ola kauta sibota Ioane ena vaidi'u kabukabu sia deula venia 'ounai Dilava ena ula ia etai davana sia deabiadae.

³¹ Iesu mune'e eluva ediaka, "Ulu kanania kauta 'eva davai bavavitaitata? Ia 'eva aboita?"

³² Ia 'eva itani melo kikita vanua bo'adanai demimia boita banota de'aeta dediaka, 'Siau lai auvanita, beia oi sia oneneva, ba masita lai a'abi, beia oi sia okakani.'

³³ 'Olana vaidi'u kabukabu kauna Ioane easi koanai sia iani mediana ka eania mai sia vine veina mediana ka einuia, inoku oi odiaka, 'Ia nuanai ka'uba si'avana vaika ka emimia.'

³⁴ Kau Nakuna easi eaniani mai einuinu 'eva oi oluva odiaka, 'Kau kanania 'eva eaniani vaika mai einuinu vaika maivaka moni visi kauta mai si'avana kauta eta kau.'

³⁵ Beia Dilava ena aoneka 'eva beabia dae kauta eta'i bela'asi bemomo'ai."

Ateate Ka Deolo Bonana Medianai Iesu Esisia.

³⁶ Palisea kauna ka Iesu eula venia ena lumai ia ita beaniani ka'ona, inoku Iesu eda'a lumai edodo aniani 'abunai emiadio.

³⁷ Vanua kanaua laloanai si'avana ateatena ka, Iesu Palisea kauna ena lumai beaniani valina eika koanai, ia bika'a kavapuna laloanai mulamula bonana mediana davana eabia easi.

³⁸ Eda'a Iesu mulinai aena 'olanai esilidivo ekani inoku ilulu makanai aena evaveita, vuinai evaladata maivaka ebauta, mulamula bonana mediana esisia akatai.

³⁹ Palisea kauna Iesu e'aeia kauna kanaua ateate ena koakoa eikaia koanai, ia sibona nuanai elalovaia ediaka, "Bema kau kanania 'eva enolea kauna umauna koanai, ia 'ani beikabasi, ateate davana ia eabia kovo, 'olana ia 'eva si'avana ateatena."

⁴⁰ Iesu eta'u e'ouia ediaka, "Simona e, lau luva ka oni ba'oumu." Ia ediaka, "Vaikabasi kaumu e, luva."

⁴¹ Iesu ediaka, "Kau lua moni veni kauna ka kevanai moni deabita, ka 'eva siliva monina sinavu ima eabi, ka 'eva siliva monina imanavui eabi.

⁴² Tavata bevamue 'eva sia edaita 'ounai lalua moni bevamueta davata e'ouka, inoku kau davana ia ulana beula vaika?"

⁴³ Simona ediaka, "Alalovaia, ama'i ena abitole namana kauna e'ouia kao kauna kanaua." Iesu ia e'ouia ediaka, "Ani oluva kave'i."

⁴⁴ Iesu ekai 'udai ateate eikaia, inoku Simona e'ouia, "Ateate kanania oikala? Lau asi emu lumai adodo 'eva ae'u badeini veita sia oveni'u. Beia ia 'eva ilulu makanai ae'u edeinita maivaka vuinai evaladata.

⁴⁵ Oni sia oba'u'u, beia ateate kanania ada'adodo koanai ae'u iba'utai sia emia laloka kovo.

⁴⁶ Oni 'ola'u deoloai sia osisia, beia ia deolo bonana medianai ae'u esisita.

⁴⁷ Kanaua 'ounai lau oni a'oumu, ena si'avana doutamo vaika 'eva 'ani i'ou kaota 'olana ia ena lalo'au nama vaikana evala'asia beia dai ia ena si'avana kava'inamo e'oua kao kauna 'eva ena lalo'au kikinamo evala'asia."

⁴⁸ Inoku Iesu ateate e'ouia ediaka, "Emu si'avana 'ani i'ou kaota."

⁴⁹ Aniani 'abunai demiadio kauta sibota viloatai deluvaluva dediaka, "Nia 'eva dai, si'avana vaka e'ou kao."

⁵⁰ Iesu ateate e'ouia ediaka, "Emu abiveni eta'u evamaulimu, mai nua'elumu da'a."

8

'A'ate Vaida Iesu Mulinai Deda'a.

¹ Melala kava'inamo mulinai, Iesu vanua namata mai kikita laloatai eda'a keinikeini Dilava ena lovia vanuana valina nama'ina eilolo vaia. Ibanona kauta 'ouka lua 'eva ia ita deda'a,

² mai 'a'ate vaida vaka, ka'uba si'avata vaika nuatai elo'ota asi mai 'olele edeata edeatai evanama'inata 'a'ateta, ka 'eva Malia Makadala ateatena nuana ka'uba si'avata vaika kalakoi ka elo'ota asi ateatena,

³ ka 'eva Ioana, adana Kusa 'eva 'Eloda lovia 'olana ene luma davata e'ola vaita kauna, mai Susana, mai 'a'ate doutamo vaida. 'A'ate katania sibota eta davai Iesu mai ibanona kauta deduluta.

Luva Ivavitaitana Loba Vinaula Kauna Ena Kea Evadota.

(Mt 13.1-9; Mk 4.1-9)

⁴ Kau mato vanua ka ka ai deasi Iesu kevanai do'u namana devavaia laloanai, Iesu luva ivavitaitana kanania eluvavaia ediaka,

⁵ "Loba vinaula kauna ka eda'a ena kea bevavado. Eito kapokapo koanai vaida dalai de'ekoasi, inoku kau akatai deneke'au mai aka manumanuta deani paluta.

⁶ Kea vaida kano bika'a bika'ana akanai de'ekoasi, dekubu beia delamoda 'olana kano sia eveivei.

⁷ Kea vaida ava 'ini'inita laloatai de'ekoasi, ava 'ini'inita ita dekubu ka'ona inoku ava 'ini'inita de'alavuta.

⁸ Kea vaida kano medianai de'ekoasi, dekubu kave'i devua vuata sinavu ka ka boina." Iesu ene luva to'onai eluva 'unu'unu ediaka, "Mai kaiana kauna 'eva lele be'ika mai beikabasi."

Luva Ivavitaitana 'Olana.

(Mt 13.10-17; Mk 4.10-12)

⁹ Ibanona kauta Iesu delavuaia luva ivavitaitana kanania anina 'eva dava.

¹⁰ Ia ediaka, "Dilava ena lovia vanuana ikabasina vunita 'eva 'ani oi evenimui, beia vaida kevatai 'eva luva ivavitaitatai mo a'outa, kanaua 'ounai,

'beikala mo beia sia beikala une lele be'ika beia ovona sia be'ovo.'

Isa 6.9

Iesu Luva Ivavitaitana Anina E'ouia.

(Mt 13.18-23; Mk 4.13-20)

¹¹ "Luva ivavitaitana anina 'eva kanania. Kea 'eva Dilava ena luva.

¹² Kea dalai de'ekoasi davata 'eva kau kataua, luva de'ika ia Diabolo e'asi luva nuatai eabia ovo 'olana asi'i demaabiveni mai asi'i demamauli 'ounai.

¹³ Kea kano bika'a bika'ana akanai de'ekoasi davata 'eva kau kataua, luva de'ika koanai mailalonamata deabia, beia lamuta asi'i 'ounai melala kava'ina mo deabiveni inoku vikovo e'asi koanai de'eko.

¹⁴ Kea ava 'ini'inita laloatai de'ekoasi davata 'eva kau kataua, luva de'ika beia mauli kanania ena nua mekau, ena lovia davata, mai ena lalonama davatai nuata e'alavu 'ounai vuavuata delamoda.

¹⁵ Beia kea kano medianai de'ekoasi davata 'eva kau kataua, nuata komolotai mai mediatai luva 'uluna de'ika deabi 'inia, dekula'ila vaia edada'amo vuavuata devapulu."

Lamepa 'Abuna Umaunai Bokaua'au.

(Mk 4.21-25)

¹⁶ Iesu e'outa ediaka, "Kau ka lamepa etoua koanai olaka laloanai sia evaakububua 'o muinai vakana venunai sia evalavala divo ia lamepa ikau'auna 'abunai eka'ua 'au inoku kau bedododo kauta 'eva 'ailala beikala.

¹⁷ Dava devunita davata boutai 'eva bevala'asi makaanai, dava devaku avu davata boutai 'eva bevala'asi 'ailalai.

¹⁸ Luva aoika koma 'eva bo'imala kave'i, 'olana maiena dava kauna 'eva akanai vaida Dilava bene'e 'au bevenia, ia sia maiena dava kauna 'eva kevanai kava'inamo elalovaia emimia davana 'eva beabia ovo."

Iesu Sinana Mai Bo'akalana.

(Mt 12.46-50; Mk 3.31-35)

¹⁹ Inoku Iesu sinana mai kadina deasi beikala beia sia edaita 'olana kau mato namavaikana 'ounai.

²⁰ Kau ka Iesu e'ouia ediaka, "Oni sinamu mai kadimu 'eva mulimuliai delalava de'ula beikamu."

²¹ Inoku Iesu ia ena luva evamuea ediaka, "Dilava ena luva 'uluna de'ika mai vinaulana devavaia kauta katania 'eva lau sina'u mai lau kadi'u."

Iesu Lani Mai Ka'uda Eva'olota.

(Mt 8.23-27; Mk 4.35-41)

²² Melala ka Iesu ibanona kauta ita asiai dele'au inoku e'outa ediaka, "Ita ekada'a 'ovu avekena." Inoku deveau asi deda'a.

²³ Deveau do'o laloanai, Iesu 'eva enodivo inoku emuinai tabu. Inoku levo nama vaikana 'ovuai eunu, vei asi laloanai elaiia uda kevaimo deuku.

²⁴ Ibanona kauta deda'a Iesu dekuia dediaka, "Ola kaumu e, 'ola kaumu e, ita 'ani ekadono ba." Inoku ia eko'isi lani mai ka'uda namata e'ovenita, lani e'olo ka'uda enodivo.

²⁵ Inoku ibanona kauta e'outa ediaka, "Emui abiveni a'i?" Ia detabulovo si'asi'a maivaka demakau si'asi'a mai sibota vilootai delavuai lavu'ai dediaka, "Nia 'eva kau davana, lani mai ka'uda e'ovenita 'eva lelana de'ika."

Iesu Kau Ka Nuanai Ka'uba Si'avata Vaika Elo'ota Asi.

(Mt 8.28-34; Mk 5.1-20)

²⁶ Iesu ibanona kauta ita asiai deveau keini deda'a Kelasenesa kanonai, ua 'eva Kalilea 'ovu avekenai.

²⁷ Iesu ele'au nabuai koanai, vanua kauna ka nuanai ka'uba si'avata vaika demia kauna easi ita devidavali. 'Ani siako vaika kau kanania sia tubu'a ka evadodoa mai lumai sia eomia, ia 'eva mitavai eomia.

²⁸ Ia Iesu eikaia koanai ekani si'asi'a mai e'eko aena 'olanai evaoi 'unu'unu ediaka, "Iesu aka umaunai Dilavana Nakuna e, o'ula dava keva'uai bovavaia. Anoimu mekau sia boveni'u."

²⁹ 'Olana Iesu ka'uba si'avana 'ani e'ovenia kau kanaua nuanai bela'asi 'ounai. Melala doutamo ka'uba si'avana evada'ala, kau deta'u imana mai aena seiniai deliota de'imaia beia seini evamokuta inoku ka'uba si'avana evaasiasia eveau eda'a kano'akunai edodo.

³⁰ Iesu ia elavuaia ediaka, "Vamu dai?" Ia ediaka, "Va'u 'eva Mato." 'Olana ka'uba si'avata vaika doutamo vaika nuanai demia.

³¹ Beia ka'uba si'avata vaika Iesu denoia sia besinita beda'a 'uli to'ona asi'i laloanai bedododo.

³² Boloma 'itona ka ua'i devananita lolo 'aba'abanai deaniani, inoku ka'uba si'avata vaika Iesu denoia besinita beda'a boloma nuatai bedododo 'ounai esinita deda'a.

³³ Inoku ka'uba si'avata vaika kau kanaua nuanai dela'asi deda'a boloma nuatai dedodo, boloma 'itona deveau ke'eke'eai delovo asi, inoku 'ovu laloanai dedono ba.

³⁴ Boloma 'ima kauta dava kanaua epulu deikaia koanai deveau ovo vanuai mai lobai vali kanania dekaivaia.

³⁵ Kau deda'a dava epulu davana beikala deko inoku Iesu kevanai dela'asi koanai, kau kanaua nuanai ka'uba si'avata vaika dela'asi kauna Iesu aena 'olanai emiadivo tubua evadodoa maivaka nuana 'ani ekomolo deikaia inoku boutai demakau si'asi'a.

³⁶ Kau kataua dava epulu deikaia kauta kau kanaua nuanai ka'uba si'avata vaika demia kauna a enama'ina koma 'eva valina kau vailatai dekaiva.

³⁷ Kelasenesa kauta boutai demakau si'asi'a 'ounai Iesu denoia kano kanaua'i beda'atau. Kanaua 'ounai ia asiai ele'au bemumue.

³⁸ Ka'uba si'avata vaika kau nuanai dela'asi kauna kanaua Iesu enoia bemabanoa, beia Iesu eta'u evamuea e'ouia ediaka,

³⁹ “Bomumue emu vanua, Dilava dava evavaia kevamuai davana valina bokakava.” Kanaua 'ounai kau kanaua eda'a vanua itoina laloanai Iesu dava evavaia kevanai davana valina ekava.

Iailo Nakuna Mai Ateate Ka Iesu Ena Tubu'a Eabi Kovo Kauna.
(Mt 9.18-26; Mk 5.21-43)

⁴⁰ Iesu emue koanai, kau mato deta'u deabia dae 'olana boutai 'eva ia de'imaia.

⁴¹ Ua'i kau ka vana Iailo, ia 'eva lo'e e'ola vaia kauna, easi inoku Iesu aena 'olanai ekuidula 'eva enoia beda'a ena luma.

⁴² 'Olana nakuna vatona ka'oukukuna mo vikauna ouka lua 'eva 'ani bebaba.

Iesu eda'a do'o laloanai kau mato nama vaikana devidolidoli mulinai deda'a.

⁴³ Inoku ateate ka ua'i, ia 'eva 'a'ate eta 'olele eabia 'ani vikau ouka lua, mulamula veni kauta kevatai ena dava evaole, sia kau ka ia evanama'inala.

⁴⁴ Ia Iesu mulinai enanadia eda'a ena tubu'a si'ana eabia kovo, komolonai mo ena 'olele e'olo.

⁴⁵ Iesu elavuai lavuai ediaka, “Dai eabi'u kovo?” Boutai de'ouavuavu laloanai Petelo ediaka, “Ola kaumu e, kau delavamu kaiukaiu mai depedamu.”

⁴⁶ Beia Iesu ediaka, “Kau ka eabi'u kovo 'olana aikabasi 'eva siavu kau'uai davana 'ani ela'asi.”

⁴⁷ Ateate eikabasi bepopode 'eva dalana asi'i 'ounai mai 'ululu 'ululuna eda'a e'eko Iesu aena 'olanai, dava 'ounai eabia kovo maivaka alimo a enama'ina koma valina kau boutai vailatai ekava.

⁴⁸ Inoku Iesu ateate kanaua e'ouia ediaka, “Naku'u ateatena e, emu abiveni eta'u 'ani evanama'inamu 'ounai nua'elumu ita da'a.”

⁴⁹ Iesu eluva do'o laloanai kau ka Iailo ena lumai easi Iailo e'ouia ediaka, “Nakumu 'ani eba. Vaikabasi kauna sia vabavunua 'avaea.”

⁵⁰ Iesu lele kanaua e'ika inoku Iailo e'ouia ediaka, “Sia bomakau, boabiveni'u mo. Nakumu 'eva benama'ina.”

⁵¹ Iesu Iailo ena lumai ele'au koanai kau boutai evamueta sia ka ia mulinai bedododo, beia Petelo, Iakobo, mai Ioane mai vato kamana sinana mo debanoia dedodo.

⁵² Kau boutai ua'i 'eva vato dekani diala mai delaloia. Iesu ediaka, “Kani ovapuala, vato 'eva sia eba, ia emuinai.”

⁵³ Kau deikabasi vato 'eva 'ani eba dokadoka 'ounai Iesu deikaia demamai.

⁵⁴ Iesu vato imanai eabi inoku e'aeia ediaka, “Naku'u e, ko'isi.”

⁵⁵ Vato idumena emue 'eva komolonai eko'isi, inoku Iesu e'outa dava kena bevenia beanai.

⁵⁶ Vato kamana mai sinana detabulovo si'asi'a, beia Iesu e'alavuta dava epulu davana 'eva sia kau ka vailanai beluvala.

9

Iesu Ibanona Ouka Lua Esinita Beilolo.
(Mt 10.5-15; Mk 6.7-13)

¹ Iesu eta'u ibanona kauta 'ouka lua e'aeta, evado'uta, kula'ila mai siavu evenita ka'uba si'avata vaika boutai belo'ota asi mai 'olele edeata edeata bevanama'inata,

² inoku esinita Dilava ena lovia vanuana valina beilolo vaia maivaka 'olele kauta bevanama'inata.

³ E'outa ediaka “Emui kalima ai, ikoko'a, voina, iani mai moni sia ka oiboabia, maivaka emui ivadodo ivaluata sia oi bo'abi.

⁴ Luma davanai oi boele'au koanai kanaua'imo oi bomimia beda'amo vanua kanaua oi bovikania.

⁵ Inoku kau sia beabimui dae koanai eta vanua oi bovikania 'eva aemui apulolota oi boaku ovo ia eta va'evai be'ao maivaka ia eta si'avana ivamomo'aina koana.”

⁶ Inoku ibanona kauta deko'isi deda'a vanua kaka laloatai vali nama'ina deilolo vaia maivaka kau devanama'inata.

Eloda Eula Beikabasi Kave'i Iesu 'Eva Dai.

(Mt 14.1-12; Mk 6.14-29)

⁷ Eloda Lovia 'olana kauna 'eva Iesu dava boutai evavai valita e'ika koanai nuana ebavunu, 'olana vaida de'ouia vaidi'u kabukabu kauna Ioane 'ani bai eko'isi 'udai.

⁸ Vaida dediaka Elia 'ani evailaasi, mai vaida dediaka enolea kauna 'ana'ina ka vali'u eko'isi 'udai.

⁹ Beia 'Eloda ediaka, “Ioane 'atona 'eva 'ani atauia uku, beia 'ulu a'ika vinaula katania evavai kauna 'eva dai?” Inoku eula 'eva Iesu beikala.

Iesu Kau Sinavu Boutai Imanavui (5,000) Evananita.

(Mt 14.13-21; Mk 6.30-44; Io 6.1-14)

¹⁰ Veaneke kauta demue koanai, ia dava devavai davata boutai Iesu vailanai deluvavaita. Inoku ia eta'u evada'ata tau ia ita deda'a vanua ka vana Betesaida ai.

¹¹ Beia kau deikabasi Iesu 'eva 'ani ua'i 'ounai boutai ia mulinai deda'a. Iesu eabita dae, Dilava ena lovia vanuana luvana eluvavaia maivaka nama'ina deula kauta evanama'inata.

¹² Melala elavilavi laloanai ibanona kauta 'ouka lua deasi Iesu kevana inoku de'ouia dediaka, “Kau katania sinita deda'a vanua 'o loba kevai kauta kevatai bemimia inoku sibota eta iani bekakavu 'olana 'abu kanania 'eva kano'akuna.”

¹³ Iesu ia eta luva evamuea ediaka, “Oi dava kena ovenita deania.” Ia dediaka, “Lai kevamaiai demimia davata 'eva palaoa ima mai sisi lua mo, 'oula lai bada'a kau katania eta iani lai batatava, una?”

¹⁴ Momoluane 'avaeana 'eva sinavu boutai imanavui (5,000) boina.

Iesu ibanona kauta e'outa ediaka, “Kau katania kauta imanavui (50) imanavui (50) oi bovamiata.”

¹⁵ Eluva dalana vitaitanai ibanona kauta devavaia inoku kau boutai demiadivo.

¹⁶ Iesu eta'u palaoa ima mai sisi luana eabita inoku e'a'a dae vutuvutu eikaia 'eva evanama'inata, mulinai ekovita mukamuka. Inoku ibanona kauta evenita bekokole kau bevenita.

¹⁷ Kau boutai deaniani eda'amo deani vunu, ibanona kauta iani kalita alavu 'ouka lua devavonuta.

Petelo Iesu E'ouia Dae

Ia 'Eva Keliso.

(Mt 16.13-19; Mk 8.27-29)

¹⁸ Melala ka Iesu sibona emeamea, ibanona kauta 'eva ia kevanai demia inoku elavuvaita ediaka, “Kau 'eva dava dekoma lau 'eva dai?”

¹⁹ Ia ena luva devamuea dediaka, “Vaida dediaka vaidi'u kabukabu kauna Ioane, vaida dediaka Elia, vaida dediaka enolea kauna 'ana'inai ka vali'u eko'isi 'udai.”

²⁰ Iesu ia elavuvaita, “Beia oi 'eva dava oi okoma? Lau 'eva dai?” Petelo ia ena luva evamuea ediaka, “Oni 'eva Keliso Dilava esinimu kaumu.”

Iesu Ena Ba Valina Ekava.

(Mt 16.20-28; Mk 8.30–9.1)

²¹ Ia eta'u e'outa kao sia kau ka be'oua kovo.

²² Mai ediaka, “Lau Kau Nakuna 'eva banana vaika, vanua kauta namata, kabukabu kauta namata mai talavatu 'ola kauta bevaiviivi'u maivaka beaku ba'u, beia melala ivakoinai 'eva bako'isi 'udai.”

Iesu Dainai Mauli Beitoa'au Kauna Mauli Beabia.

²³ Inoku Iesu ia boutai e'outa ediaka, “Kau ka e'ula lau bebano'u koanai, ia sibona ena mauli bebolabolala melala bounai ena au ido'o valaukuna beabia 'isi bevuala lau muli'uai bedada'a.

²⁴ 'Olana dai ena mauli beabi 'inia kauna 'eva ena mauli bevataulea, beia dai lau dai'uai ena mauli beitoa'au kauna 'eva mauli beabia.

²⁵ Kau ka kanobata davata boutai bema abita inoku ena mauli bema vataulea 'o bema vasi'avanala koanai ena nama'ina 'eva dava?

²⁶ Kau ka lau dai'uai 'o e'u luva 'outai bemalalai koanai, Lau Kau Nakuna e'u nuaviai maivaka Kamana ena nuaviai mai anelu kabukabuta eta nuaviai ia ena mue melalanai bemalalai veni'u.

²⁷ Luva umauna lau oi a'oumui, nia'i delalava kauta vaidia 'eva sia bebaba beda'amo Dilava ena lovia vanuana beikala.”

Iesu Ikana Evaedeia.

(Mt 17.1-8; Mk 9.2-8)

²⁸ Luva katania eluvavai mulitai melala kalavani deole 'eva Iesu eta'u Petelo, Ioane mai Iakobo evuata ia ita deda'a loloai dele'au bemeamea 'ounai.

²⁹ Emeamea laloanai ia vailana edeana mai ena tubu'a edeva'i si'asi'a e'amale 'amale.

³⁰ Alimo kau lua ia ita deluvaluva, kauta 'eva Mose mai Elia.

³¹ Mainuvita dela'asi Iesu ita Dilava ena ula vitaitanai Ielusalemai Iesu ena ba luvana deluvaluva vaia.

³² Petelo banona ita 'eva demuina tabu inoku deibi kave'i laloanai, Iesu nuavina mai kau luana kevanai delava vaka deikata.

³³ Kau luana Iesu 'ani bevikania laloanai, Petelo eta'u Iesu e'ouia ediaka, “Ola kaumu e, ita nia'i kamimia 'eva emediana vaika! Lai airole koi lai bavavai, ka oni emu, ka Mose ena, ka Elia ena.” Ia sia eikabasi dava luvana eluva.

³⁴ Ia eluva do'o laloanai oli easi boutai e'alavuta, inoku ia oli laloanai 'eva demakau si'asi'a.

³⁵ Lele ka oli laloanai easi ediaka, “Nia 'eva Lau Naku'u, adilaia kauna, lelenai oi bo'ika.”

³⁶ Lele kanaua eole mulinai Iesu sibona mo deikaia. Ibanona kauta 'ulu 'uluta asi'i, maivaka melala kanaua'i dava deikata davata 'eva sia kau ka de'ouia.

Iesu Melo Nuanai Ka'uba Si'avana Vaika Elo'ouia Asi.

(Mt 17.14-18; Mk 9.14-27)

³⁷ Elani ia loloai de'ovu koanai Iesu kau doutamo ita devidavali.

³⁸ Kau ka kau viloutai evaoi ediaka, “Vaikabasi kaumu e, lau oni anoimu, naku'u kanania ikala, naku'u ka'oukukuna mo kanania.

³⁹ Melala vaidia ka'uba ka melo kanania eabia koanai komolonai evaoi, evatakutaku si'ala, nutunai budobudo dela'asi, sia evikania edada'amo kauna etatalo pa'apa'a.

⁴⁰ Lau debanomu kauta anoita ka'uba si'avana vaika belo'oa la'asi, beia ia sia edaita.”

⁴¹ Iesu e'outa ediaka, “Abiveni asi'i mai kaia bo'olunala kaumui, kevamuiaia ita ekamia ka'ona beda'amo melala davanai? Nakumu vuala mai keva'u.”

⁴² Melo eda'a ilulao koanai ka'uba si'avana vaikana eta'u melo kanoai ebalaia divo eva'ululu si'ala, Iesu eta'u ka'uba si'avana vaika e'ovenia inoku melo evamaulia, evuaia eda'a kamana evenia.

⁴³ Dilava ena siavu nama vaikanai kau boutai deda'unai si'asi'a. Ia Iesu dava evavaia davana deda'unai vaia do'o laloanai ibanona kauta e'outa,

Iesu Bebaba Luvana E'ouia Dae.

(Mt 17.22, 23; Mk 9.30-32)

⁴⁴ “Laua kevamuiaia 'ani baluva vaia luvana 'eva kaiamui ovaala kave'i. Lau Kau Nakuna 'eva veni'u beveveni mai kou'u bekokou kau kevatai.”

⁴⁵ Beia ena luva kanania anina sia deikabasia. Ia kevatai dava eluva vaia davana 'eva evuni 'ounai ovona sia deovo, inoku belavuaia 'eva demakau.

Dai 'Eva Namana Be'ao.

(Mt 18.1-5; Mk 9.33-37)

⁴⁶ Melala ka ibanona kauta sibotamo vilotai deviala dai 'eva namana be'ao.

⁴⁷ Iesu eta lalovai kanaua eikabasia 'ounai melo kikina ka evuaia easi kevanai evalavaladivo.

⁴⁸ Inoku e'outa ediaka, “Kau ka lau va'uai melo kikina kanania eabia dae kauna 'eva lau eabi'u dae, lau eabi'u dae kauna 'eva esini'u Dilavana vaka eabia dae. Oi boumuiaia viloaumuiaia ka ekiki vaika kauna ia 'eva namana be'ao.”

Sia Evaivivimui Kauna 'Eva

Emui Kau.

(Mk 9.38-40)

⁴⁹ Ioane Iesu e'ouia ediaka, “‘Ola kaumu e, lai kau ka lai aikaia oni vamuia ka'uba si'avata vaika elo'ota asi. Inoku lai a'ouia bevapuala 'olana ia 'eva sia ita banota.”

⁵⁰ Iesu e'outa ediaka, “Sia oi boma'alavuaia, 'olana sia evaivivimui kauna 'eva oi banomui.”

Samalia Kauta Iesu

Sia Deulavenia.

⁵¹ Iesu bemumue vutuvutu beda'ala melalana ekevai laloanai ia nuana evakula'ilala eko'isi eda'a Ielusalem.

⁵² Inoku ena veauneke kauta esinita makava deda'a Samalia vanuana ka laloanai ia dainai dava boutai beva'oluta.

⁵³ Beia kau ua'i kauta sia deabia dae, 'olana ia deikabasi Iesu 'eva edada'a Ielusalem.

⁵⁴ Ibanona kauta Iakobo mai Ioane koa kanaua deikaia koanai delavuaia dediaka, “Lovia namana e, o'ula 'alova vutuvutu'uai lai ba'aea, be'ovu be'abuta uku'uku, una?”

⁵⁵ Beia Iesu ekai 'udai laluanu e'ovenita.

⁵⁶ Inoku ia ibanona kauta ita deda'a vanua edeana ka.

Iesu Ibanona Koana Aboina.

(Mt 8.19-22)

⁵⁷ Ia dalai deda'a laloanai kau ka Iesu e'ouia ediaka, “Lau oni a oda'ala 'eva mulimuia badada'a.”

⁵⁸ Beia Iesu ia e'ouia ediaka, “‘Oveka 'asita 'eva mai eta 'uli, aka manumanuta vaka mai eta ni'i, beia Lau Kau Nakuna baenodivo la'u ba'ani 'abuna 'eva asi'i.”

⁵⁹ Mai Iesu kau ka e'ouia ediaka, "Muli'uai mai." Beia kau kanaua ediaka, "Lovia namana e, bada'a makava kama'u bakoleia 'ana'i."

⁶⁰ Iesu ia e'ouia ediaka, "Debaba kauta 'eva sibota eta ba bekolea, beia oni 'eva da'a Dilava ena lovia vanuana valina boilolo vaia."

⁶¹ Mune'e kaumo ka ediaka, "Lovia namana e, lau mulimuai badada'a, beia bada'a makava e'u pulu kauta ba'outa no'olo."

⁶² Iesu ena luva evamuea ediaka, "Kau ka voi isivana imanai eabia, ia bekai 'udai basibasi kauna 'eva Dilava ena lovia vanuana vinaulana bevavaia 'eva sia bedaia."

10

Iesu Kau Kalakoi Ka Navui Lua Esinita.

¹ Kanania mulinai Lovia namana eta'u vaida edeata kauta kalakoi ka navui lua edilata, boutai viloatai lua lua esinita be'ana'ia beda'a ia sibona bedada'a vanuata mai 'abuta boutai.

² E'outa ediaka, "Loba ianina 'eva edounamo vaika beia vinaula kauta 'eva sia dounamo, kanaua 'ounai loba 'ola kauna oi bonoia, ia betata'u vinaula kauta besinita ena lobai bevinaula.

³ Oda'a! Lau oi asinimui vitaitana mamoe nakuta boita 'oveka asita viloatai.

⁴ Idavala, 'o tamaka ka sia oi boabia. Dalai vaka sia kau ka ita oi boluvaluva.

⁵ Luma davanai oi boele'au koanai, oi boluvala makavana luvana 'eva kanania, 'Nua'elu 'eva luma kanania'!

⁶ Kau kanaua nuana nua'elu emimia koanai, oi emui nua'elu 'eva ia akanai bemimia. Bema asi'i koanai emui nua'elu 'eva bemumue kevamui.

⁷ Ita luma kanaua'i oi bomia ka'ona, dava deveveni davata oi bo'ani mai oibo'inu, 'olana vinaula kauna mai tavana 'eva enama'ina. Luma ka ka sia oi boda'a neke.

⁸ Vanua davana laloanai oi boda'a dodo inoku beabimui dae koanai, vailamui'ai dava devalavala davana oi boania,

⁹ vanua kanaua'i 'olele kauta oi bovamaulita, maivaka oi bo'outa, bodiaka, 'Dilava ena lovia vanuana 'eva 'ani e'asi kele'emui.'

¹⁰ Beia vanua ka laloanai oi boda'a dodo inoku sia beabimui dae koanai dalanai oi bola'asi oi bodiaka,

¹¹ 'Emui vanua 'apulolona aemaiai deavu 'au davana 'ani lai adavua ovo evavasi kele'emui. Inoku oi boikabasi Dilava ena lovia vanuana 'eva 'ani ekevai.'

¹² Lau oi a'oumui, lavuai melalanai Sodoma ena anaana 'eva kena benama'ina beia vanua kanaua ena anaana 'eva namana be'ao.

Vanua Kauta Sia Delalo 'Udai.

(Mt 11.20-24)

¹³ "Kolasina e! Kevamuai 'eva besi'avana vaika. Betesaida e! Oni vaka kevamuai 'eva besi'avana vaika. Inoku vatabulovo vinaulata katania kevamuai avavai davata ua'i Tulo mai Sidono laloatai bamavavai koanai, 'ani siako ia bemalalo 'udai, tubu'a si'avata bemavadodota lavuai bemato'ata bemamia.

¹⁴ Lavuai melalanai Tulo mai Sidono eta anaana kena benama'ina beia oi emui 'eva namana be'ao.

¹⁵ Kapelanauma e! Oni vaka. Sibomu bomaele'au bomada'a vutuvutu akanai okoma. Beia sia bedaia. Oni 'eva bedolimu 'ovo bo'ovu ba 'abuna."

¹⁶ Iesu ibanona kauta e'outa ediaka, "Oi lelemui e'ika kauna lau lele'u vaka 'ani e'ika, oi devaiivimui kauta lau vaka devaiivi'u, beia lau devaiivi'u kauna esini'u kauna vaka evaiiviiva."

Kauta Kalakoi Ka Navui Lua Demue Iesu Kevana.

17 Kauta kalakoi ka navui lua deda'a inoku mai lalomamata demue kevana de'ouia dediaka, "Lovia namana e, oni vamuai ka'uba si'avata vaika lai alo'ota 'asi 'eva lelemai deika."

18 Iesu ia e'outa ediaka, "Lau Satani vutuvutuai e'ekoasi aikaia 'eva itani e'amalea boina.

19 Lau siavu oi 'ani avenimui, kau'asi 'o 'a'ava oi bomoi kaita mai 'ou kauna vaka ena siavu bounai oi bokeinuta, dava sia ka beudupa'amui.

20 Ka'uba si'avata vaika lelemui de'ika 'ounai sia oi bolalomama, beia vamui vutuvutuai 'ani deleleta davata 'eva oi bolalomama vaita."

Iesu Elalomama.

(Mt 11.25-27; 13.16, 17)

21 Melala kanaua'i Iesu Idume Kabukabuna dainai lalona denama si'asi'a inoku ediaka, "Kama'u e, vutuvutu mai kanobata Loviana avanamainamu, 'olana dava katania aoneka mai nuakomolo kauta kevatai ovunita davata melo kikita kevatai ovala'asita. 'O, kama'u, 'olana kanania 'eva oni emu ula nama'ina.

22 Dava boutai 'eva Kama'u 'ani eveni'u keva'uai, Nakuna 'eva sia kau ka eikabasia beia Kamana sibonamo, Kamana vaka sia kau ka eikabasia Nakuna mo mai nakuna edilata kauta ia bevala'asia kauta mo sibota."

23 Inoku Iesu ekai 'udai ibanona kauta e'outa ediaka, "Dava katania oi o'ika kaumui 'eva oi onama'ina 'ounai oi oikata une.

24 'Olana lau oi a'oumui, enolea kauta mai vanua loviata doutamo de'ula oi o'ika davata bemaika beia sia deika, de'ula leleta oi o'ika davata vaka bemaika beia leleta sia deika."

Sisiba Ivavitaitana

Samalia Kauna Nama'ina.

25 Talavatu 'ola kauna ka eko'isi Iesu ekovoa ediaka, "Vaikabasi kaumu e, dava bavavaia 'eva mauili keinikeini babia?"

26 Iesu ia ena luva evamuea ediaka, "Talavatu pukana laloanai a deleleia koma? A oikabasi koma?"

27 Ia Iesu ena luva evamuea ediaka, "Lovia namana emu Dilava bolalo'au venia mainuamu bounai, mai idumemu bounai, mai kula'ilamu bounai, mai emu lalovai bounai, maivaka kevamu kauna bolalo'au venia oni sibomu olalo'au venimu boina."

28 Iesu ia ena luva evamuea ediaka, "Emu luva 'eva ekomolo, kanania bovavai koma koanai bomauli."

29 Talavatu 'ola kauna sibona eapavaia elavuai lavuai ediaka, "Inoku keva'u kauna 'eva dai?"

30 Iesu ia ena luva evamuea ediaka, "Kau ka Ielusalema ai e'ovu eda'a Ieliko laloanai vinaovinao kauta delavaia avu, ena tubu'a devadada ovo, deaku si'ala kevaimo bemaba inoku devikania.

31 Melala kanaua'i kabukabu kauna ka dala kanaua'i eda'a, eikaia koanai dala 'aba'abanai ekeini.

32 Vitaitana vaka Levi iduvuna kauna ka dala kanaua'i eda'a, eikaia koanai dala 'aba'abanai ekeini.

33 Beia Samalia kauna ka ena da'a to'ato'ai dala kanaua'i easi kau kanaua kevanai ela'asi, eikaia koanai elaloia vaika.

34 Eda'a kevana inoku kauna loita deolo mai vine veinai eukuta inoku e'apata. Inoku ena doniki akanai evamiala'au, evuaia eda'a ikakao lumanai ua'i e'imaia.

35 Elani kau kanaua eta'u siliva monita lua edala isi luma ikakaona kauna evenia inoku e'ouia ediaka, 'Bo'imala kave'i, kevanai vida bonene'e 'eva e'u mueai tavata bavenimu.' "

³⁶ Iesu ia elavuaia ediaka, “Oni dava okoma? Kau kataua kakoina laloatai davana 'eva vinaovinao kauta deakuia kauna kevana kaunai evaaoa?”

³⁷ Ia ediaka, “Elaloia vaika kauna kanaua.” Iesu ia e'ouia ediaka, “Da'a evavaia vitaitanamo bovavaia.”

Iesu Eda'a Maleta Mai Malia Kevata.

³⁸ Iesu ibanona kauta ita dalai deda'a vanua edeana kai dela'asi, ua'i ateate ka vana Maleta eta'u eabita dae ena lumai.

³⁹ Ia kadina vana Malia 'eva eda'a Lovia namana aena 'olanai emia divo ena vaikabasi luvata leleta eika.

⁴⁰ Beia Maleta iabi dae vinaulata evavaitai 'eva nuana ebavunu, inoku eko'isi eda'a Iesu e'ouia ediaka, “Lovia namana e, oni sia olalovaia kadi'u kanana evikani'u sibo'u vinaula boutai avavai. 'Oua edulu'u.”

⁴¹ Lovia namana ia ena luva evamuea ediaka, “Maleta e, Maleta e, oni 'eva dava doutamo ilalovaitai nuamu ovabavunu,

⁴² beia dava ka'onamo mo ka'ula davana 'eva Malia 'ani eula venia, ia kevanai sia beabia tau kovo.”

11

Iesu Meamea Evaikabasita.

(Mt 6.9-13; 7.7-11)

¹ Melala ka Iesu 'abu ka ai emeamea, emeamea koa mulinai ibanona kauta ka eta'u e'ouia ediaka, “Lovia namana e, meamea vaikabasimai Ioane ibanona kauta evaikabasita boina.”

² Inoku Iesu ia e'outa ediaka, “Oi bomeamea koanai kanania oi boluva koma.

'Kamamai e.

Oni vamu 'eva lai bavakabukabua.

Emu lovia vanuana emai.

³ Melala ka ka laloatai lai aula veni ianita bovenimai.

⁴ Devasi'avanamai kauta eta si'avana

lai a'outa kao vitaitanai

emai si'avana bo'ou kao.

Maivaka vikovo laloanai sia bovadodomai.”

⁵ Mai mune'e e'outa ediaka, “Oi kaumui ka malolua ai bemada'a ena kau ena lumai bemanoina bemadiaka, 'E'u kau e, palaoa koi mo veni'u.

⁶ 'Olana e'u kau ka ena da'a to'ato'a laloanai easi keva'u, bavanania beia keva'u iani asi'i.”

⁷ Inoku ua'i laloai bediaka, 'Sia bovabavunu'u, nutuala 'eva 'ani i'alavuna maivaka lau naku'u ita 'eva lai amuinai. Sia 'ani bako'isi dava ka bavenimu.’

⁸ Lau oi a'oumui, ena kau 'ounai ia sia beko'isi dava ka bevenia, beia ena noinovi 'udai'udai 'ounai beko'isi, ia e'ula davata boutai bevenia.

⁹ Mai lau oi a'oumui, oi bonoinoi 'eva oi boabia, oibokavua 'eva oi bo-davalia, oi boakuaku 'eva emui nutuala beluvua.

¹⁰ Kau kataua boutai denoinovai davata 'eva de'abi, ekakavu kauna 'eva edavali, ekuaku kauna 'eva nutualanana beluvua.

¹¹ Oi kama kaumui ka nakumu sisi bemanoinu koanai, kau'asi bomavenia, una?

¹² 'O akoi bemanoinu koanai 'a'ava bomavenia, una?

¹³ Oi si'avana kaumui beia, dava nama'ita nakumu ivenita oi oikabasi. Kamamui vutuvutuai emimia kauna nama'ina vida denoia kauta Idume Kabukabuna bevenita.”

Vaida Deluva Iesu Belesebulo Siavunai Evinaula.

(Mt 12.22-30; Mk 3.20-27)

¹⁴ Iesu eta'u nutububu mu'umu'una kau ka nuanai elo'oia asi, mu'umu'u kanaua ela'asi inoku nutububu kauna eluvaluva, deikaia kauta detabulovo si'asi'a.

¹⁵ Beia kau vaida dediaka, "Belesebulo mu'umu'u eta lovia 'olana ena siavuai ia mu'umu'u katania elo'ota asi."

¹⁶ Vaida Iesu devakovia eta ula vutuvutuai koa ka bevavaia beikala.

¹⁷ Beia Iesu 'eva eta lalovai eikabasi, 'ounai e'outa ediaka, "Kanobata ka sibona bekole luala inoku sibota bevaiviivita 'eva besi'avana, maivaka iduvu ka sibona bekole luala inoku bevaiviivita 'eva be'eko asi.

¹⁸ Satani sibona bekole luala inoku sibota bevaiviivita koanai, ena kanobata a belava 'ini koma? Luva kanania aluvala 'olana oi odiaka 'Belesebulo ena siavuai mu'umu'u alo'ota asi.'

¹⁹ Lau Belesebulo ena siavuai mu'umu'u alo'ota asi koanai, dai ena siavuai oi ibanomui kauta detata'u mu'umu'u delo'ota asi? Kanaua 'ounai ia betata'u oi bevakomolomui.

²⁰ Bema lau Dilava ena siavuai mu'umu'u alo'ota asi koanai, Dilava ena lovia vanuana 'eva 'ani easi kevamui.

²¹ Kula'ila kauna maiena uku inoku ena luma be'imala koanai ena dava boutai 'eva bemia kave'i.

²² Beia ekula'ila si'asi'a kauna ka ia bekuali venia inoku beakua koanai, ena uku imanai beabita ovo inoku ena dava boutai bekole siusiu.

²³ Dai'uai sia edadai kauna 'eva lau evaiviivi'u, lau ita sia lai adoubou doubou kauna 'eva ekapota odaoda.

Ka'uba Si'avana Vaika Emue

Ena 'Abu 'Ana'ina.

(Mt 12.43-45)

²⁴ "Ka'uba si'avana vaika kau ka nuanai ela'asi koanai, 'abu ladata ai eda'a to'ato'a, ena ula 'eva lana be'ani beia sia 'abu ka edavalia. Sibona ediaka, 'Bamumue bada'a avikania lumana.'

²⁵ Inoku emue eda'a luma koanai, luma 'eva 'ani idalona maivaka iva'olu kave'ina edavalia.

²⁶ Inoku ia eda'a ka'uba si'avata vaika umauta kalakoi ka evuata deasi, inoku deda'a dedodo ua'i demia, kau kanaua ena mauli 'ana'inai kena esi'avana, beia vali'u ena mauli 'eva 'ani esi'avana vaika."

²⁷ Iesu luva katania eluva laloanai ateate ka kau mato vilotai evaoi ediaka, "Oni evapulumu mai evabaemu ateatena 'eva enama'ina."

²⁸ Beia Iesu ena luva evamuea ediaka, "Sia kanaua bekoma, momo'ai dokadoka Dilava ena luva de'ika maivaka deabidae kauta 'eva denama'ina vaika."

Palisea Kauta Deula

Koa Ka Beikala.

(Mt 12.38-42)

²⁹ Kau mato Iesu delavaia kaiukaiu laloanai, ena luva emakavala ediaka, "Ulu kanania 'eva ulu si'avana vaika, vatabulovo koata ekakavu, beia sia ka bepupulu kevatai, Iona sibona mo 'eva vatabulovo koanai be'ao.

³⁰ Iona 'eva vatabulovo koanai eda'a Nineva kauta kevata vitaitanai Kau Nakuna 'eva ulu kanania kevanai.

³¹ Valuva melalana laloanai lovia ateatena Seba ai beko'isi ulu kanania kauta va'eva abunai bene'etadivo, 'olana ia 'eva kanobata to'onai easi Solomona ena aoneka luvata be'ika, beia vali'u nia'i ka 'eva Solomona ekeinia.

³² Valuva melalana laloanai Nineva kauta 'eva beko'isi ulu kanania kauta va'eva 'abunai bene'etadivo, 'olana Iona ena iloloai 'eva delalo 'udai, beia vali'u nia'i ka 'eva Iona ekeinai.

Lamepa Ikau'auna 'Abuna Umaunai Bokau'd'au.

(Mt 5.15; 6.22, 23)

³³ “Kau ka lamepa betoua koanai luma venunai 'o olaka laloanai sia bevalavala uda, beia lamepa ikau 'auna 'abuna umaunai bekaua 'au inoku ua'i dedododo kauta 'eva 'ailala kanaua beikala.

³⁴ Oni makamu 'eva kauanimu ena lamepa, inoku oni makamu enama'ina koanai kauanimu itoina vaka 'ailala laloanai, beia makamu besi'avana koanai kauanimu itoina 'eva vabuto'o laloanai.

³⁵ Kanaua 'ounai bo'imamu kave'i 'ailala nuamui'ai davana asi'i emavab-ula avu makauna.

³⁶ Oni kauanimu itoinai e'ailala ovo sia kava'ina kena vabuto'o laloanai koanai, itoina 'eva be'ailala ovo kave'i itani lamepa 'ailalana itoinai evenimu eva'ailalamu boina.”

Iesu Talavatu 'Ola Kauta E'ovenita.

(Mt 23.1-36; Mk 12.38-40)

³⁷ Iesu eluva koa koanai, Palisea kauna ka ia enoia laluanu beaniani ka'ona 'ounai edodo eda'a emia divo beaniani.

³⁸ Palisea kauna Iesu eikaia 'eva etabulovo si'asi'a, 'olana asido'o eaniani laloanai imana sia edeini.

³⁹ Inoku Lovia namana ia e'ouia ediaka, “Vali'u oi Palisea kaumui 'eva 'ou mai olaka mulita mo oi odeini kave'i, beia nuamui 'eva idono mai si'avanai devonu.

⁴⁰ Bo'o kaumui, ia mulina evavaia 'eva, laloana vaka sia evavaia, una?

⁴¹ Beia laloatai demimia davata ulalu kauta oi bovenita. Inoku dava boutai 'ani bemediana oi emui'ai.

⁴² “Palisea kaumui e, kevamui'ai 'eva besi'avana vaika! 'Olana emui iani ivanama'inata mai ivasiavu siavuta kikita oi ovakuta 'ouka laloanai ka'onamo Dilava oi ovenia, ia Dilava kevanai komolo mai lalo'au oi boma vavaia davata oi ovikani. Ia kanania vaka oibovavaia, ia kanaua vaka sia oibovikania.

⁴³ “Palisea kaumui e, kevamui'ai 'eva besi'avana vaika! 'Olana emui ula 'eva lo'e laloanai miadivo 'abuta nama'itai oi bomimia, maivaka tavatava 'abutai 'olamui be'aku mai bevanama'inamui.

⁴⁴ 'Kele'emui'ai besi'avana vaika! 'Olana oi 'eva vitaitana mitava 'ai'aita umauta, ia sia deikabasi kau akatai dedada'a de'asi inoku Dilava vailanai 'ani de'obu.’”

⁴⁵ Talavatu 'ola kauna ka ia e'ouia ediaka, “Vaikabasi kaumu e, oni kanania oluva koma 'eva lai vaka ovamalalaimai.”

⁴⁶ Iesu ediaka, “Talavatu 'ola kaumui e, kevamui'ai 'eva besi'avana vaika! Oi kau eveeve mekauta oi ovavua vaita, beia oi sibomui ka eveeve kanaua ena mekau aboina boma dulua 'eva imamui li'uli'una ka'onamo sia evalelea kovo.

⁴⁷ “Kele'emui'ai besi'avana vaika! Oi kamamui enolea kauta deaku bata, inoku oi otata'u eta mitava oi odadau.

⁴⁸ Kanaua 'ounai kamamui devavai vinalata oi ovamomo'ai oi ovavaita, 'olana ia deaku bata, oi 'eva eta mitava oi odadau.

⁴⁹ “Kanaua 'ounai Dilava ena aoneka luvana ediaka, 'Lau enolea kauta mai veauneke kauta basinita bedada'a, vaidai 'eva beaku bata, vaidai bevavaita si'asi'a.

⁵⁰ Kanaua 'ounai kanobata epulu easi mo vali'u enolea kauta boutai lalata de'itabu laloanai, mekauna 'eva ulu kanania kauta beko'ala.

⁵¹ Abela lalanai emakavala easi mo Sakalia lalanai, ia 'eva vanama'ina vakana mai lo'e kabukabuna viloatai deaku bala. 'O, lau oi a'oumui, mekauna 'eva ulu kanania kauta beko'ala.

⁵² "Talavatu 'ola kaumui e, kevamui'ai 'eva besi'avana vaika! 'Olana aoneka dalana 'ani oi o'alavua, oi sibomui sia oi bodododo, bedododo kauta eta dala vaka oi olavala avu."

⁵³ Iesu 'abu kanaua evikania koanai, talavatu 'ola kauta mai Palisea kauta devaiivivia, eta lavuai luvata edeata delavuaia.

⁵⁴ Ena luva de'idima, ka be'oua si'asi'a koanai bevakoala.

12

Dede Kauta Eta Koako Daitai Sia Oibodadai.

(Mt 10.26, 27)

¹ Melala kanaua'i kau doutamo vaika Iesu delavaia kaiukaiu mai sibota demoikai moikaita laloanai, Iesu ibanona kauta evaikabasita makava edi-aka, "Palisea kauta eta dede vinalana kevanai oibo'imamui kave'i, kanaua 'eva itani vakubu mulumulana boina.

² Ia devakubu davata boutai bela'asi maivaka devunita davata boutai beikabasi.

³ Vabuto'o laloanai luva dava oluvala luvana 'eva melala 'ailalanai lelana be'ika maivaka laloai kaianai oteteo luvana 'eva luma 'uvina'i beilolovaia.

Dilava Sibona Mo Ekamakauvenia.

(Mt 10.28-31)

⁴ "E'u kau e, lau oi a'oumui. Kauani iakubana mo deikabasi beia mulina'i sia dava ka 'ani akanai bevavai 'udai 'ounai sia oi bomakau venita.

⁵ Beia oi bomakau venia kauna lau batata'u bavaikabasimui. 'O, lau oi a'oumui, Dilava mo oi bomakau venia. Ia 'eva kauanimu beaku bala mulina'i maiena siavu eani keini keini 'alovana laloanai bekapomui dodo.

⁶ Bisili ima kamatavata tavata pene lua mo. Beia Dilava 'eva kataua sia ka bebolabolala.

⁷ Luva umauna, vui vida olamui'ai 'eva 'ani evaku palu. Sia oi bomakau, oi 'eva bisili doutamo 'ani oi okeinita.

Iesu Valina Ekakava

Ia Sia Ekamalalai.

(Mt 10.32, 33; 12.32; 10.19, 20)

⁸ "Lau oi a'oumui. Kau ka kau vailatai lau vali'u bekakava, Lau Kau Nakuna vaka Dilava ena anelu vailatai ia valina bakakava.

⁹ Beia kau vailatai lau bevuni'u kauna vaka Dilava ena anelu vailatai lau ia bavunia.

¹⁰ Kau ka Lau Kau Nakuna keva'uai luva si'avata beluluva 'eva ena si'avana 'ani ba'oua kao beia kau ka Idume Kabukabuna kevanai luva si'avata beluluva 'eva ena si'avana sia be'oua kao.

¹¹ "Bevuamui beda'a lo'eai, 'ana'iava kauta mai siavu kauta vailatai koanai, nuamu sia beba vunuu eta luva a oi bovamuea koma 'o a oi boluva koma.

¹² 'Olana melala kanaua'i Idume Kabukabuna betata'u oni luva dava boluvala luvana 'ani bevaikabasimu."

Luva Ivavitaitana

Lavo Kauna Bo'ona.

¹³ Kau mato laloatai kau ka Iesu e'ouia ediaka, "Vaikabasi kaumu e. 'A'u 'oua emai dava kamamai ebakanita davata lalua viloamaiai ekoleta."

¹⁴ Iesu ia ena luva evamuea ediaka, "E'u kau e, dai lau eabi'u isi bavaluva-mui maivaka emui dava bakoleta?"

15 Inoku kau e'outa ediaka, "Oi bo'ika dava sia oi boidonovai, 'olana kau ena maui umauna 'eva ena dava dounamoai sia easi."

16 Iesu luva ivavitaitana ka e'outa. "Kevanai lavo dounamo kauna ka ena kanoai loba anita doutamo edavalita.

17 Inoku sibona nuantai elalovai lalovai ediaka, 'Dava bavavaia? 'Abu asi'i, 'abu davanai e'u iani ba'ule.'

18 Inoku ediaka, 'Kania bavavai koma, iani doubou lumana a'ia'ina baluvua inoku namana makamakana ka bavavaia, inoku e'u vinaula ianita mai e'u dava boutai ua'i ba'ule.

19 Lau sibo'u badiaka, "Lau 'eva dava nama'ita keva'uai 'ani doutamo vaika adoubou vikau doutamo eta. Vali'u la'uba'ani, baniani, bainuinu mai balalonama vaika."

20 Beia Dilava eta'u e'ouia ediaka, 'Bo'o kaumu e! Vali'u boni kanania'i lau oni emu maui babia ovo koanai odoubou davata katana 'eva dai be'abi?'"

21 Inoku Iesu ena luva to'onai ediaka, "Kania 'eva kau ka sibona ena dava edoubou 'eva ia sibona ena, beia Dilava vailai ena doubou davata 'eva sia dounamo."

Nuamui Sia Beavunu.

(Mt 6.25-34)

22 Inoku Iesu ibanona kauta e'outa ediaka, "Kanaua 'ounai lau oi a'oumui. Emui maui'ai oi boma ani 'o kaumu'ai oi boma vadodo davata daitai 'eva nuamui sia beva bavunua.

23 'Olana maui 'eva namana vakaia iani mai kauani 'eva namana vakaia tubu'a.

24 'Alo oibolalovaita. Iani sia devavado 'o 'ua'ua melalanai iani sia de'ua maivaka eta doubou doubou lumana 'eva asi'i beia Dilava ia eta iani evenita. Inoku oi 'eva manumanu oi okeinita.

25 Oni dai emu nua bavunu betata'u emu maui kena bevalaka'inala koanai 'ani bedaia 'o?

26 Kanaua 'ounai dava kikita kania ivavaita sia oi oikabasi koanai dava 'ounai dava edeata edeata nuamui devabavunuta.

27 "Velavela dekukubu 'eva oi boikata. Sibota tubu'a vinaulana sia devavaia. Beia lau oi a'oumui. Solomona lovia 'olana ena tubu'a denuavi si'asi'a, beia vela kanania 'eva enama'ina vaika vakaia Solomona ena tubu'a.

28 Dilava sibona duvu evavela velata vali'u demauli mala belamoda 'alovai ekakapota dodo belo'olo'o. Dilava eta'u kanaua evavelata koma, ia oi tubu'a sia evadodomui, una? Oi abiveni 'iu'iu kaumu.

29 Nuamu'ai dava oi boma ani mai oi bomainu davata sia oi bokakavu, kataua sia oi bonua bavunuvai.

30 Kanobata kanania laloanai Dilava sia deabivenia kauta dava boutai kania dekakavu, Kamamui vutuvutu'ai oi oula venita davata kania 'eva 'ani eikabasi.

31 Beia Dilava ena lovia vanuana oi bokavua makava vakaia kania boutai oi bevenimui."

32 "Mato kikina kaumu e. Sia oi bomakau, 'olana Kamamui mai lalona ena vanua bevenimui.

33 Emui dava oi botava tavavaita monita ulalu kauta oi bovenita, sibomui emui idavala sia besi'avana kovo davana oi bova'olua, inoku vutuvutu lavona sia eole kovo 'abunai oi bo'ulea. Sia vinoa kauna ka edada'a ua'i maivaka koekoe sia davaka ua'i devasi'avanala.

34 'Olana emui lavo demimia 'abuna 'eva oi nuamui vaka ua'i."

Da'alaabi Kauna Nama'ina Evi'ima.

(Mt 24.45-51)

35 “Emui tubu'a oi bovadodo maivaka emui lamepa 'eva oi bototou bovi'ima.

36 Oi 'eva vitaitana vi'ima kauta boita, eta 'ola kauna kamoane makamaka 'abunai de'imala bemumue be'asi. Inoku be'asi nutuala beakuakua koanai nutuala komolonai mo beluvua.

37 Da'alaabi kauta devi'ima do'o laloanai eta 'ola kauna be'asi bedavalita 'eva enama'ina. Luva umauna lau oi a'oumui. 'Ola kauna sibona ena tubu'a beavadodoa aniani 'abunai bevamiata divo, bevananita eta vinaula bevavaia.

38 Boni malolua 'o o'oloko de'alala laloanai da'alaabi kauta devi'ima do'o laloanai eta 'ola kauna bedavalita 'eva enama'ina.

39 Kanania oi boikabasi kave'i. Luma 'ola kauna vinao kauna ena asi melalana beikabasia makava koanai ena luma be'imala inoku sia be'alama.

40 Oi vaka bova'olu, 'olana sia oi oikabasi melala davanai Lau Kau Nakuna ba'asi.”

Luva Ivavitaitana Vinaula Kauna Nama'ina Mai Vinaula Kauna Si'avana Vaika.

41 Petelo Iesu elavuuaia ediaka, “Lovia namana e, luva ivavitaitana kanania lai sibomai kevamaiai oluvala 'o kau boutai vaka?”

42 Lovia namana ediaka, “Dai lele eika mai e'ima'ima kauna, ia ena 'ola kauna siavu evenia ena luma davata beika kao, da'alaabi kauta eta iani 'eva aniani melalata umaui bevenita?”

43 Da'alaabi kauna ena 'ola kauna ena mueai kanaua evinaula kave'i koma bedavalita koanai enama'ina.

44 Luva umauna lau oi a'oumui. 'Ola kauna betata'u 'ima'ima kauna 'olai bevaia ena dava boutai be'imata.

45 Beia da'alaabi kauna sibona bediaka, “E'u 'ola kauna asido'o be'asi,” inoku ia betata'u da'alaabi kauta mai 'a'ateta be'odita beaniani beinuinu beinu ba.

46 Melala ka da'alaabi kauna sia elalovaia mai sia eva'olu laloanai ena 'ola kauna bela'asi koanai ia betaua ukuuku, bevaanaanala itani lele sia de'ika kauta boita.

47 “Da'alaabi kauna ena 'ola kauna ena ula vinalana eikabasia bevavaia beia sia eva'olu mai sia evavaita koanai, kau kanaua 'eva i'odi doutamo bevenia.

48 Beia ikabasi asi'i kauna ena vinaula si'avana 'ounai be'odia beia i'odi sia douta bevenia. Dava doutamo devenia kauna kevanai 'eva dava doutamo beula venita, dava doutamo be'imata kauna kevanai 'eva dava doutamo benonoi.”

Iesu Easi 'Eva Vaivivi Bevavaia. (Mt 10.34-36)

49 “Lau asi 'eva 'alova kanobata akanai batoua, e'u ula 'eva beani kaokao.

50 Lau 'eva vaidiu' kabukabu ka babia kanaua 'eva banua mekau vaia beda'amo bavaolea kave'i.

51 Oi olalovaia Lau asi 'eva lua'elu abia asi kanobata, una? Lau oi a'oumui, asi'i. Nua'elu 'eva asi'i ia vaivivi.

52 Vali'u vilata ekada'ala laloanai, luma ka laloanai kauta ima vilotai sibota bevaiviivita, koi betata'u lua bevaiviivita maivaka lua betata'u koi bevaiviivita.

53 Ia vilotai sibota bevaiviivita, kama betata'u nakuna bevaiviivia, nakuna betata'u kamana bevaiviivia, sina betata'u nakuna ateatena bevaiviivia, nakuna ateatena betata'u sinana bevaiviivia, melo sinana betata'u lavana ateatena bevaiviivia, lavana ateatena betata'u adana sinana bevaiviivia.”

Kau Melala Davana Ovona Sia Deovo.

⁵⁴ Iesu mune'e do'u kauta e'outa ediaka, "Divoduasi avekenai oli ka eko'isi oi oikala koanai komolonai oi odiaka, 'Lamu be'aku,' 'eva epupulu.

⁵⁵ Dae duasi valea lanina e'unu koanai oi odiaka, 'Melala bekakala,' 'eva epupulu.

⁵⁶ Dede kaumui e. Oi kanobatai mai vutuvutuai dava depupulu 'eva luvata anita oi oikabasi, beia dava 'ounai vali'u melala kanania'i epupulu davana luvana anina sia oi oikabasia?

Valuvai Ene'emudivo Kauna Ita Emui Adedua Bovakomoloa.
(Mt 5.25, 26)

⁵⁷ "Dava 'ounai oi sibomui ivakomolomui lalovaina sia oi ovavaia?

⁵⁸ Oni va'evai ene'emu divo kauna bevuamu beda'a valuva 'abuna koanai, asido'o evuamu edada'a valuva 'abuna laloanai dala nama'ina bokavua lalua emui vina bovakomoloa, asi'i koanai bevuamu beda'a valuva kauna kevanai, inoku valuva kauna betata'u bevuamu beda'a vabuto'o luma e'imala kauna kevana, inoku vabuto'o luma e'imala kauna vabuto'o lumanai bene'emu divo.

⁵⁹ Lau oi a'oumui, ua'i sia oibola'asi kovo beda'amo tava itoinai oi boveni palu."

13

Iesu Kau E'outa Belalo 'Udai.

¹ Melala kanaua'i kau vaida Iesu vailanai Kalilea kauta luvata deluva, eta veniveni devavaia Dilava enai koanai Pilato ena kual kauta esinita deaku bata lalata sisi lalata ita deuda ka'ona.

² Iesu eta luva evamuea ediaka, "'Olana Kalilea kauta kataua 'eva kanaua deakuta koma 'ounai, oi olalovaia deba kauta eta si'avana 'eva nama vaikata vakaia Kalileai demimia kauta eta si'avana dekeinaita, una?

³ Lau oi a'oumui. Asi'i. Sia oi bolalo 'udai koanai boumuiai 'eva kanaua bevaolemui koma.

⁴ Oi olalovaia kau 'ouka kalavani Siloama ai luma lakavaikana e'eko koanai eakubata kauta kataua eta si'avana 'eva nama vaikata vakaia Ieluselema ai demimia kauta, una?

⁵ Lau oi a'oumui. Asi'i. Sia oi bolalo 'udai koanai, boumuiai 'eva kanaua bevaolemui koma."

Luva Ivavitaitana Suke Auna
Sia Mai Vuana.

⁶ Iesu luva ivavitaitana ka eluvavaia ediaka, "Kau ka suke auna ka ena vine kulana laloanai evadoia, muliai eda'a vuana ekavuta beia sia ka edavalia.

⁷ 'Ounai kula e'imaia kauna e'ouia ediaka, 'Teko, vikau koi laloatai a'asi au kanania vuana akakavu, ia sia ka adavalia. Uku 'ekoa. Dava 'ounai kano nama'ina bevaolea 'avaea?"

⁸ Kula i'imana kauna ediaka, 'E'u 'ola kaumui e. Vikania 'avaea vikau ka'onamo kanania emia. Lau 'olana bavoia kaiu kaiu kano mediata ba'ule.

⁹ Bema vikau vailai vuana vaida bepupulu 'eva enama'ina, asi'i koanai ia 'eva bouku 'ekoa. "

Melala Kabukabunai Iesu Ateate Kabena Va'evana Evanama'inala.

¹⁰ Melala kabukabuna kai 'eva Iesu Iuda kauta eta lo'e ka laloanai evaikabasi,

¹¹ ateate ka ua'i ka'uba si'avana ka eta'u eva'oleleia vikau 'ouka kalavani kabena eva'eva, sibona bevakomoloa 'eva sia edaia.

¹² Iesu ateate kanaua eikaia koanai, e'aeia ediaka, "Ateate e! Emu 'olele ai 'ani onama'ina."

¹³ Inoku ia imana ateate akanai ekao 'au koanai, komolonai kabena ekomolo, inoku eko'isi Dilava evanama'inala.

¹⁴ Lo'e 'olavaina kauna 'eva ebadu, 'olana Iesu 'olele kauna melala kabukabunai evanama'inala 'ounai. Ia kau e'outa ediaka, "Melala kalakoi 'eva oi emui vinaula melalata. Melala kataua'i oi bo'asi bevanama'inamui, sia melala kabukabunai."

¹⁵ Lovia namana ia ena luva evamuea ediaka, "Oi dede kaumui! Oi ka ka Melala kabukabunai emu bolomakau 'o emu doniki 'abunai sia oluvua inoku sia oi ovuala oda'a vei 'ulina, una?"

¹⁶ Ateate kanania 'eva Abela'amo ena iduvu ateatena. Satani ia vikau 'ani 'ouka kalavani eva'oleleia. Inoku Melala kabukabunai ia mauhi sia beabia, una?"

¹⁷ Iesu ia ena luva kanaua evamuea koma 'eva devaviivia kauta boutai demalalai si'asi'a, beia do'u kauta boutai delalona ma dava nama'ita umauta kataua evavai 'outai.

Luva Ivavitaitana Tuava Keana.

(Mt 13.31, 32; Mk 4.30-32)

¹⁸ Iesu elavuai ediaka, "Dilava ena lovia vanuana 'eva aboina? Davai bavavitaitala?"

¹⁹ Ia 'eva vitaitana tuava keana kikina boina, kau ka eabia ena lobai evadoia. Ekubu inoku au namanai eao, le'enai manumanu ni'ita devavai."

Luva Ivavitaitana Vakubu Mulamulana.

(Mt 13.33)

²⁰ Maivaka elavuai 'udai ediaka, "Dilava ena lovia vanuana davai bavavitaitala?"

²¹ Ia 'eva vitaitana ateate ka vakubu mulamulana eabia palaoa doutamo vaika ita eiuta ka'ona, inoku palaoa kanaua itoinai ekubu inoku namana eao."

Dilava Ena Lovia Vanuana Dalana Eomomo.

(Mt 7.13, 14, 21-23)

²² Inoku Iesu Ielusalema eda'aia laloanai, dalai vanua namata mai kikita laloatai kau evaikabasita.

²³ Kau ka Iesu elavuai ediaka, "Lovia namana e! Kau vida 'ani bemaui, 'o?" Ia ena luva evamuea ediaka,

²⁴ "Oi bokovokovo kula'ila nutuala omoononai oi bodododo. Lau oi a'oumui, 'olana kau doutamo bekovokovo bedododo beia sia bedaita.

²⁵ Luma 'uala kauna beko'isi nutuala be'alavua koanai, oi mulimuliai oibolalava inoku nutualai oi boakuakua bodiaka, 'Loviamu e, nutuala luvua lai badodo.' Beia ia emui luva bevamuea bediaka, 'lau oi sia aikabasimui, a'ia'i oi o'asi.'

²⁶ Inoku oi bodiaka, 'Lai oni ita 'eva kiani mai kainuinu ka'ona, maivaka emai vanuai ovaikabasi.'

²⁷ Beia ia bediaka, 'lau oi sia aikabasimui, a'ia'i oi o'asi, si'avana ivavaina kaumui boumuia keva'uai oda'atau.'

²⁸ Inoku beitemui asi koanai, Abela'amo, Isa'ako, Iakobo mai enolea kauta boutai ua'i Dilava ena Lovia Vanuanai 'ani oi boikata inoku oi bokakani mai nikemui oi boala 'o'i alao'i.

²⁹ Kau 'eva melala daenai, melala 'ovunai, dodoai mai 'atuai be'asi, inoku Dilava ena Lovia Vanuanai nadu laloanai 'abuta be'abi.

³⁰ Inoku daidai demulikai kauta 'eva be'ana'ia, ia daidai de'ana'ia kauta 'eva bemulikai.”

Iesu Ielusalema Elaloia.
(Mt 23.37-39)

³¹ Melala kanaua'i Palisea kauta vaida deasi Iesu kevana de'ouia dediaka, “Abu kanania bovikania boda'a 'abu edeana, 'olana 'Eloda e'ula beaku bamu.”

³² Iesu eta luva evamuea ediaka, “Oda'a, 'oveka 'asina kanaua oi bo'oua. Lau vali'u mai mala 'eva ka'uba si'avata balo'ota asi mai 'olele kauta bavanama'inata, inoku melala ivakoinai e'u vinaula bavaolea.

³³ Beia lau vali'u, mala mai umalani 'eva e'u vinaula mo bavavaia bedada'a, 'olana enolea kauna 'eva 'abu edeanai sia beaku bala, Ielusalemai mo.”

³⁴ “Ielusalema e, Ielusalema e, oni ota'u enolea kauta oaku bata, maivaka Dilava esinita kauta bika'ai oaku bata. Melala vida lau aula nakumu boutai bapaka kaita itani 'o'oloko sinana nakuna vaninai epaka kaita boina, beia oni 'eva sia oula veni'u.

³⁵ Emu luma kabukabuna 'eva keva'uai ivikanina 'avaea i'imana asi'i. Lau oi a'oumui, sia oi boika'u 'udai beda'amo melalana be'asi koanai oi bodiaka, 'Lovia namana vanai e'asi kauna 'eva bevanama'inala.’ ”

14

Iesu Melala Kabukabunai Kau Ka Evanama'inala.

¹ Melala kabukabuna kai Iesu eda'a Palisea eta 'ola kauna ka ena lumai deaniani ka'ona koanai, kau 'eva ia deika 'inia kave'i.

² Ua'i Iesu vailanai 'eva kau ka imana mai aena 'aletia emia.

³ Iesu Palisea kauta mai talavatu 'ola kauta elavuaia ediaka, “Talavatu laloanai Melala Kabukabunai kau eka vanama'inata 'eva ekomolo 'o asi'i?”

⁴ Beia ia sia luva ka deluvaia. 'Ounai Iesu kau kanaua eabia evanama'inala inoku esinia eda'a.

⁵ Inoku e'outa ediaka, “Bema melala kabukabunai oi ka nakumu 'o emu bolomakau 'uliai e'ekouda koanai, sia 'ani bo'ileolo vaia bovelia 'au, una?”

⁶ Ena luva kanania bevamuea 'eva dalana asi'i.

Sibomu Sia Bovanamamu.

⁷ Iesu da'a 'au kauta eta miadivo 'abuta nama'ita dedilata eikata, 'ounai luva ivavitaitana kanania e'outa.

⁸ “Kau ka ena veauveau be'asi kevamu inoku boda'a ena kamoane naduna koanai, miadivo 'abuna nama'ina vaikai sia bomia'au, 'olana oni akamuai kauna ka vaka veauveau 'ani eabia.

⁹ Inoku nadu 'ola kauna, oi laluaana eveaumui kauna be'asi kevamu be'oumu bediaka, “Abumu kau kanania venia.’ Inoku oni 'eva mai malalaimu boda'a muliai demimia kauta kevatai ua'i oi bomimia.

¹⁰ Beia veauveau be'asi kevamu koanai, boda'a muliai bomiadivo, inoku eveaumui kauna be'asi kevamu koanai bediaka, 'E'u kau e, da'a akai 'abunai mia'au.’ Nadu kanaua laloanai dedododo kauta boutai oni 'olamu be'aku.

¹¹ Bema kau ka sibona bevanamala 'eva beva'ovua, ia sibona beva'ovua kauna 'eva bevanamala.”

Emu Nadu Laloanai
Uvalu Kauta Beveauta.

¹² Inoku Iesu ena nadu 'ola kauna e'ouia ediaka, “Ado'alavuni 'o lavilavi ianina bova'olua koanai, emu kau, bo'akalamu, kadi'a'amu 'o kevamuai lavo kauta sia beveauta, 'olana ia vaka oni beveaumui, inoku tavana bevamuea.

¹³ Beia oni nadu ka bovavaia koanai, ulalu kauta, daisi'a kauta, 'ome'ome kauta mai 'ede kauta boveauta.

¹⁴ Kanaua'i ia tavana sia bevamuea diba inoku komolo kauta ivako'isita 'udai ai oni tavamu vanama'inana 'eva Dilava bevenimu."

Luva Ivavitaitana

Nadu Namana Ka.

(Mt 22.1-10)

¹⁵ Ita deaniani ka'ona kauna ka lele kanania eika koanai, ia Iesu e'ouia ediaka, "Dilava ena lovia vanuana nadunai beaniani kauna 'eva benama'ina."

¹⁶ Beia ia boutai de'ou to'ato'a. Inoku lava'ana'ia kauna da'alaabi kauna e'ouia ediaka, 'Lau 'eva kano ka 'ani atavaia, kanaua 'ounai bada'a baikala. Loviamu, sia bonua anaana.'

¹⁷ Nadu ianita deva'oluta koanai, ena da'alaabi kauna esinia da'a 'au kauta be'outa bediaka, 'Omái, dava boutai 'ani de'olu.'

¹⁸ Beia ia boutai de'ou to'ato'a. Inoku lava'ana'ia kauna da'alaabi kauna e'ouia ediaka, 'Lau 'eva kano ka 'ani atavaia, kanaua 'ounai bada'a baikala. Loviamu, sia bonua anaana.'

¹⁹ Ka ediaka, 'Lau 'eva vali'u mo e'u bolomakau 'ouka atavata, inoku 'ani adada'a bavakovota, loviamu, sia bonua anaana.'

²⁰ Mune'e ka ediaka, 'Lau 'eva vali'u mo akamoane, 'ounai sia 'ani bavasi.'

²¹ "Da'alaabi kauna emue easi ena 'ola kauna evaikabasia, inoku 'ola kauna ebadu si'asi'a, ena da'alaabi kauna esinia ediaka, 'Da'a kaokao da'a vanua bo'adatai mai vanuai da'a keini dalatai, ulalu kauta, daisi'a kauta, 'ede kauta mai 'ome'ome kauta bovuata oi bo'asi.'

²² "Inoku da'alaabi kauna eda'a vinaula kanaua evavaia mulinai emue easi ia e'ouia ediaka, "Ola kaumu e, o'ou'u vinaulana 'ani avavaia, beia luma laloana 'eva asido'o evonu.'

²³ Inoku 'ola kauna mune'e ena da'alaabi kauna e'ouia ediaka, 'La'asi da'a mulimuli vanuata dalatai mai ala mulimulitai demimia kauta bo'outa mo bovuata oi bo'asi ia sia bemimia, kanaua'i 'eva e'u luma bevovonu.

²⁴ Lau oi a'oumui, aveauta makava kauta sia ka lau e'u nadu ianina kena beanina kovo.' "

Bolalovai Kave'i Makava Vakaia Iesu Mulinai Bodada'a.

(Mt 10.37, 38)

²⁵ Mato namana Iesu ita deda'a, ia elava 'udai inoku e'outa ediaka,

²⁶ "Bema kau ka keva'u beasia inoku ia kamana, sinana, adana, nakuna, bo'akalana, lovuna, maivaka ia sibona ena mauli lau dai'uai sia bebolabolala kauna 'eva sia lau ibano'u kaunai be'ao.

²⁷ Maivaka kau ka ena au ido'o valaukuna umauna sia bevuala muli'uai be'asi kauna 'eva sia lau ibano'u kauna be'ao.

²⁸ "Bema oi ka o'ula luma namana ka bovalavala koanai, oni bomiadiovo makava inoku tavana vida 'eva boduala, luma kanaua bovaolea monina 'ani bedaia o?

²⁹ Bema oni luma kanaua omakavala, kovolona ovalava inoku akana sia bovaolea koanai beikala kauta boutai bemamai vaimu,

³⁰ be'oumu bediaka, 'Kau kanania luma emakavala edaui, beia luma vinaulana sia evaolea.'

³¹ "O bema lovia 'olana ka bemako'isi lovia 'olana ka bemakuali venia koanai, bemamiadiovo makava bemalalovai lalovai ia ena kualii kauta sinavu boutai sinavu ka (10,000) ai betata'u kualii kauta kataua sinavu boutai sinavu lua (20,000) de'asi kauta bekuali venita 'eva 'ani bedaia 'o?

³² Bema sia bedaia koanai, ua'i dau'ai demimia do'o laloanai, ena veauneke kauna ka besinia bedada'a, nua'elu luvana belovaku vaia.

³³ Vitaitanaimo oi ka emu dava boutai sia bovikanita koanai, oni 'eva lau ibano'u kaumuai sia bo'ao.

Damena Ena Dia'a Asi'i Emataule.

(Mt 5.13; Mk 9.50)

³⁴ “Damena 'eva mediana, beia bema damena dia'ana betaule koanai a ekavadia'ala 'udai koma?”

³⁵ Ia 'eva sia kano 'o vadovado davata ivanama'inata davana, ia 'eva ekaitoa'au. Mai kaiana kauna 'eva lele be'ika mai beikabasi.”

15

Luva Ivavitaitana Mamoe Etaule.

(Mt 18.12-14)

¹ Moni visi kauta mai si'avana kauta boutai deasi Iesu kevana lлена be'ika.

² Beia Palisea kauta mai Talavatu 'ola kauta 'eva denunuvai nunuvai de-diaka, “Kau kanania 'eva si'avana kauta eabitadae mai ita 'abu ka'onamoai deaniani.”

³ Inoku Iesu luva ivavitaitana kanania e'outa ediaka,

⁴ “Kau ka oi viloamui'ai ena mamoe sinavu ka. Ia ka'onamo bemataule koanai, kalavani ka navui kalavani ka (99) 'abu 'avaeanai bemavikanita, ia etaule davana kanaua mulinai bemada'a bemakavua bemada'amo bemadavalia.

⁵ Bemadavalia koanai mai lalonamana ita bemaabia isi vounai bema'ulea,

⁶ bemavuala bemada'a ena luma. Ena kau mai kevanai demimia kauta bemaveauta, bemaasi kevana inoku bemaluva venita bemadiaka, 'Lau ita eka lalonama ka'ona, 'olana e'u mamoe etaule davana 'ani adavalia.’

⁷ Lau oi a'oumui. Vitaitanai mo ua'i vutuvutuai lalonama namana be'ao, 'olana nia'i si'avana kauna ka'onamo elalo 'udai 'ounai, vakaia komolo kauta kalavani ka navui kalavani ka kauta kataua sia de'ula belalo 'udai.

Luva Ivavitaitana Silini Etaule.

⁸ “Ateate ka ena silini 'ouka, inoku ka bemavataulea koanai, lamepa bematoua, ena luma laloana bemadaloa, 'abu itoina bemaikala kave'i bemada'amo bemadavalia.

⁹ Bemadavalia koanai, ena kau mai kevanai demimia kauta bemaveauta, bemaasi kevana, bema'outa bemadiaka, 'Lau ita eka lalonama ka'ona, 'olana e'u silini ka'onamo etaule davana 'ani adavalia.’

¹⁰ Lau oi a'oumui. Vitaitanai mo, Dilava ena anelu vailatai lalonama namana be'ao 'olana si'avana kauna ka elalo'udai 'ounai.”

Luva Ivavitaitana Melo Etaule.

¹¹ Iesu mune'e ediaka, “Kau ka nakuna lua.

¹² Melo i'inikauna kamana e'ouia ediaka, 'Kama'u e, emu dava bomakole, lau e'u 'eva boveni'u.’ Kanaua'i kamana eta'u ena dava ekoleta laluanu kevatai.

¹³ Boni vaido deole mulinai, melo i'inikauna ena dava boutai evalalota ka'ona, eko'isi eda'a kanobata edeana ka dau'ana, ua'i mau'i si'avana vaikai ena dava evaoleta 'avaea.

¹⁴ Ena dava boutai evaole mulinai, kano kanaua'i doe namana epulu, ia 'eva 'ani vidulu eula.

¹⁵ 'Ounai eko'isi eda'a kano kanaua kauna ka kevanai emia, kau kanaua eta'u esinia eda'a ena boloma 'ima 'abunai boloma e'imata.

¹⁶ Vikolo eakuia 'ounai boloma eta iani vitalua bemaani bo'ana bemakubu davana elalovaia, sia kau ka ia iani evenia.

¹⁷ “Kanaua'i ia ena lalovai demue 'udai koanai sibona e'ouia ediaka, 'Kama'u ena vinaula kauta 'eva doutamo, maieta iani kalita, ia lau nia'i vikolo bevaba'u.

18 Lau bako'isi bada'a kama'u kevana ba'oua badiaka, Kama'u e, Dilava vailanai mai oni vailamuai lau 'eva 'ani si'avana avavaia.

19 Lau 'eva sia anama'ina vaika bo'ae'u nakumuai ba'ao, beia emu vinaula kauna ka ai bovaao'u.'

20 Kanaua'i eko'isi beda'a kamana kevana. Dalai eda'a do'o laloanai, kamana ekailao dau'ai nakuna easi eikaia 'eva elaloia eveau eda'a nakuna 'atonai ela'u'au eba'uia.

21 Ia melo ediaka, 'Kama'u e, Dilava vailanai mai oni vailamuai lau 'eva 'ani si'avana avavaia. Lau 'eva sia anama'ina vaika bo'ae'u nakumuai ba'ao.'

22 Beia kamana 'eva ena da'alaabi kauta e'outa ediaka, 'Oda'a, tubu'a nama'ina vaika ka oabia omai kaokao oi boavadodoa, imana li'uli'unai lini ka oibone'ea divo, mai tamaka vaka ka aenai oi bovalavalauda.

23 Aniani bolomakauna nakuna nama'ina ka oi boabia bo'asi inoku oi boaku bala, ekanadu ekalalonama.

24 'Olana naku'u kanania 'eva eba beia emauli 'udai, etaule beia adavalia 'udai.' Inoku lalonama demakavala.

25 "Melala kanaua'i melo batanikauna 'eva ua'i lobai. Ena mueai, eda'a luma kevanai 'eva masi mai neva 'uluta eika.

26 Inoku eko'isi da'alaabi kauna ka e'aeia elavuaia, 'Kanaua 'eva dava epupulu?'

27 Da'alaabi kauna eluva ediaka, 'Oni kadimu 'ani emue easi vanua, kamamu eta'u aniani bolomakauna nakuna nama'ina ka eaku bala, 'olana ia 'eva maulina maivaka nama'ina emue edavalia.'

28 Melo batanikauna ebadu si'asi'a, evako sia eda'adodo. Inoku kamana ela'asi eda'a kevana eva'amea.

29 Beia ia kamana e'ouia ediaka, 'Ikala! Vikau katania boutai lau oni da'alamu abi mai lelemu daitai adai. Ia oni sia nani nakuna ka oveni'u, e'u kau ita sia lai alalonama.

30 Beia nakumu kanana 'eva maka lea 'a'ateta kevatai emu dava evaole kauna, easi luma koanai oko'isi aniani bolomakauna nakuna nama'ina oaku bala ia ena.'

31 "Kamana ediaka, 'Naku'u e, oni 'eva melala bounai lau keva'uai omimia, lau e'u dava katania boutai 'eva oni emu.

32 Beia ita 'eva ekalalonama, ekalalonama si'asi'a, 'olana oni kadimu kanania 'eva eba beia emauli, etaule beia kadavalia.' "

16

Luva Ivavitaitana Dava 'Ima Kauna Si'avana Vaika Ena Aoneka.

1 Iesu ibanona kauta e'outa ediaka, "Lavo kauna ka 'eva mai ena dava i'imana kauna ka, inoku ia 'eva kau vaida deta'u de'ouia dae dava i'imana kauna 'eva ena 'ola kauna ena dava eveni 'avaea veni 'avaea.

2 Inoku lavo kauna ia e'aeia easi 'eva e'ouia ediaka, 'Kania 'eva dava ovavaia lau valimu a'ika, emu dava i'imata vinaulata luvata bovaikabasi'u 'olana oni 'eva 'ani babimu ovo.'

3 "Dava 'ima kauna nuanai eluva ediaka, 'Lau vali'u dava bavavaia? E'u 'ola kauna vinaula kania'i 'ani bevato'o'u, lau sia mai kula'ila'u bavovoi mai noinoiai amalalai.

4 Lau aikabasi dava bavavaia. E'u vinaulai beabi'u ovo mulinai, e'u kau vaida betata'u beabi'u dae eta lumai.'

5 Kanaua'i ena 'ola kauna kevanai deabi 'avaea makava kauta ka ka e'aeta. E'ana'ia kauna elavuaia ediaka, 'Oni e'u 'ola kauna kevanai 'eva vida oabi 'avaea?'

⁶ Ia enu'ovi ediaka, 'Deolo voduta sinavu ka (100).' Inoku 'ima'ima kauna e'ouia ediaka, 'Oabi 'avaea makava pepana kanania, miadivo kaokao, pepa kanana'i ima navui bolelea.'

⁷ Mune'e kau ivaluana elavuia ediaka, 'Oni oabi 'avaea makava 'eva vida?' Ia ediaka, 'Witi puteta sinavu 'ouka.' Ia e'ouia ediaka, 'Oabi 'avaea makava pepana kanania, miadivo, pepai sinavu kalavani bolelea.'

⁸ "Ola kauna eta'u 'ima'ima kauna dedena ena vinaulana eabia dae, 'olana vinaula kanaua mai aonekana evavaia. Vali'u kanobata kanania kauta eta aonekai 'ailala kauta eta aoneka be'olavaia.

⁹ Iesu e'outa 'udai ediaka, "Lau oi a'oumui, kanobata ena lovia davatai kau ita oi bovikau, inoku oi kevamuii beda'aovo koanai, mia keinikeini lumanai beabimui dae."

¹⁰ "Vinaula kikina ka evavaia kave'i kauna betata'u vinaula namana vaka bevavaia kave'i, inoku vinaula kikina sia evavaia kave'i kauna betata'u vinaula namana vaka sia bevavaia kave'i.

¹¹ Bema kanobata ena dava si'avata vaika sia oi bo'imata kave'i koanai, dai betata'u vutuvutu davata nama'ita bevenimui oi bo'imata?

¹² Bema kau edeata eta dava sia oi bo'imata kave'i koanai, dai betata'u emui dava umauta bevenimui?

¹³ "Da'alaabi kauna ka 'ola kauta lua da'alata sia be'abi, 'olana ka bevaivi-ivia beia ka 'eva belalo'au venia, 'o ka bevadai venia beia ka belavala mulili. Dilava mai moni melala ka'onamoai da'alata sia oi bo'abi."

¹⁴ Palisea kauta lele kanaua deika koanai Iesu demedia media vaia, 'olana ia 'eva moni delalo'au venita 'ounai.

¹⁵ Iesu e'outa ediaka, "Oi 'eva kau vailatai sibomui oi okomolo okoma, beia Dilava 'eva oi nuamui eikabasita, kau dava tavata namata delalonama vai davata 'eva Dilava sia eula venita.

Talavatu Mai Dilava Ena Lovia Vanuana.

(Mt 11.12, 13; 5.31, 32; Mk 10.11, 12)

¹⁶ "Talavatu luvata mai enolea kauta eta luva 'eva deilolo vaita, easimo Ioane Vaidi'u kabukabu kauna ena melalai. Kanaua mulinai 'eva Dilava ena lovia vanuana valina nama'ina deilolo vaia, kau boutai 'eva kula'ilatai dala deka kavu bedododo.

¹⁷ Vutuvutu mai kanobata betaule 'eva eveavea beia talavatu vana kikina sia ka betaule kovo.

¹⁸ "Kau ka adana ebo'okaia inoku ateate edeana ka eadavala 'eva kulakula koana evavaia. Mai kau ka iva'ovu ateatena ka eadavala kauna vaka kulakula koana evavaia.

Luva Ivavitaitana Lavo Kauna Ka Mai Noi Va'ame Kauna Lasalo.

¹⁹ "Lavo kauna ka ua'i tubu'a nama'ita vaika evadodota maivaka melala boutai dava nama'itai emauli.

²⁰ Ena nutuala aunai 'eva va'ame kauna ka vana Lasalo ua'i eno, ia kauanina 'eva duadua evonu,

²¹ ena ula 'eva lavo kauna ena vaka ai iani 'ika'ikata de'ekoasi davata ka bemaania. 'Oveka deasi kauna duata dedemalita.

²² "Melalana easi laloanai va'ame kauna eba koanai anelu devuaia deda'a Abela'amo kevanai. Lavo kauna vaka eba dekoieia.

²³ Lavo kauna ba 'abunai ua'i anaana nama vaikana laloanai emia, e'a'a dae dau'ai vaika Abela'amo eikaia, Lasalo 'eva ia 'aba'abanai.

²⁴ Ia e'ae'ae ediaka, 'Kama'u Abela'amo e, bomalalo'u, Lasalo sinia imana li'uli'una veiai eisiauku emai mala'u mo bava'elua, 'olana lau 'eva anana si'asi'a 'alovana kanania laloanai.'

²⁵ “Beia Abela'amo ediaka, ‘Naku'u e, bolalovaia emu mauili melalatai oni 'eva dava nama'ita oabi ia Lasalo 'eva dava si'avata vaika eabi. Beia vali'u ia 'eva elalonama laloanai oni 'eva oanana.

²⁶ Maivaka ita viloatai 'eva 'uli 'oulana nama vaikana ka emimia, sia kau ka nia'i bekeini bevasi kanana'i, maivaka sia kau ka kanana'i bekeini be'asi nia'i.’

²⁷ “Lavo kauna ediaka, ‘Kama'u Abela'amo e, anoimu, bemanama'ina Lasalo sinia eda'a kama'u ena luma.

²⁸ ‘Olana lau bo'akala'u ima ua'i, bevaikabasita kanaua'i ia vaka sia be'asi anaana 'abuna kanania'i.’

²⁹ Abela'amo ediaka, ‘Mose mai enolea kauta 'eva ua'i ia kevatai leleta demaika.’

³⁰ Ia eluva ediaka, ‘Asi'i, kama'u Abela'amo e, beia bema kau ka ba ai beko'isi beda'a kevatai koanai 'ani belalo 'udai.’

³¹ “Beia Abela'amo eluva ediaka, ‘Bema Mose mai enolea kauta leleta sia de'ika koanai, nia'i ba ai kauna ka bedada'a 'eva lлена vaka sia be'ika.’ ”

17

Bevava'evata Kauna Besi'avana Vaika. (Mt 18.6, 7, 21, 22; Mk 9.42)

¹ Iesu ibanona kauta e'outa ediaka, “Dava kau bevava'evata davana 'eva 'ani deasi, beia kau kanaua kau va'evai ene'eta divo kauna 'eva besi'avana vaika.

² Bemanama'ina 'atonai bika'a namana bemado'oa 'au 'atuai bemakapoa 'uku, 'olana kikita katania ka asi'i emavasi'avanala.

³ Sibomui oi bo'imamui kave'i, bo'akalamu si'avana bevavaia koanai, boda'a kevana bovoidibala kave'i. Ia belalo 'udai koanai, ena si'avana bo'ou kao.

⁴ Bema melala ka'onamoai melala kalakoi ka kevamuai si'avana bevavaia, mune'e bemumue kevamuai melala kalakoi ka bediaka ‘Lau alalo 'udai' koanai, oni 'eva ia ena si'avana bo'outa kao.’”

Da'alaabi Kauna Ena Vinaula.

⁵ Veauneke kauta Lovia namana de'ouia dediaka, “Emai abiveni namana bomavaoa.”

⁶ Lovia namana eta luva evamuea ediaka, “Bema oi emui abiveni 'eva itani sinapi keana kikina boina koanai au namana kanania oi boma'oua, vali'u bulumu isi da'a 'atuai vadomu koanai lelemui bemaika.

⁷ “Oi olalovaia, oi ka emu da'alaabi kauna voi 'abunai 'o mamoe 'ima 'abunai bemaasi koanai, boma'oua bomadiaka, ‘Oni mai kaokao miadivo aniani?’

⁸ Asi'i, kanaua sia bomaluva koma, beia bomadiaka, ‘E'u iani bonanadu bova'olu, bovavai kave'i bo'ado, lau baniani e'u mami bainua bepupua mulinai, inoku oni boaniani emu mami boinua.’

⁹ E'oulai vinaulata evavaita 'ounai ena da'ala abi kauna vanama'ina luva bemavenia una? Asi'i.

¹⁰ Vitaitanai oi vaka e'oumuy vinaulata boutai oi ovaoleta koanai oi boluluva oi bodiaka, ‘Lai 'eva da'alaabi kaumai mo sia lai akomola, emai vinaula o'oumai davata mo lai avavai.’ ”

Iesu Loki Kauta 'Ouka Evanama'inata.

¹¹ Iesu dalai eda'a Ielusalema laloanai, Samalia mai Kalilea vaikoatai ekeini.

¹² Vanua kikina kai eda'adodo laloanai, loki kauta 'ouka ita devidavali. Ia dau'a duasi delava,

13 devaio 'unu'unu Iesu de'aeia dediaka, "Iesu 'ola kaumu e, lalomai."

14 Iesu eikata koanai e'outa ediaka, "Oda'a, kabukabu kauta kele'etai kaumu oi bovaikata." Inoku deda'a laloanai 'eva kauta denama'ina.

15 Viloatai kau ka'onamo kauna eikaia 'ani enama'ina 'eva emue easi lelana aka umaunai Dilava evanama'inala.

16 Kau kanaua Iesu vailanai ekuidula evanama'inala, ia 'eva Samalia kauna.

17 Inoku Iesu elavuaia ediaka, "Kaumui 'ouka oi onama'ina, una? Beia kalavani ka 'eva a'ia'i?"

18 Dava 'ounai pulu edeana kauna kanania mo emumue e'asi Dilava evanama'inala?"

19 Iesu Samalia kauna e'ouia ediaka, "Ko'isi da'a, emu abiveni eta'u 'ani evanama'inamu."

Dilava Ena Lovia Vanuana

Ena Asi Melalana.

(Mt 24.23-28, 37-41)

20 Palisea kauta vaida Iesu delavuaia dediaka, "Dilava ena lovia vanuana aida be'asi?" Ia eta luva evamuea ediaka, "Dilava ena lovia vanuana be'asi koanai itani sia dava ka kaikala boina.

21 Sia kau ka bediaka, 'Davana ena,' o 'Davana 'eva,' 'olana Dilava ena lovia vanuana 'eva oi nuamui ai."

22 Inoku Iesu ibanona kauta e'outa ediaka, "Melalana be'asi koanai, emui ula Lau Kau Nakuna e'u melala kataua ka oi bomaikala, beia sia oi boikala.

23 Kau be'oumui bediaka, 'Kauna 'eva, oikaia.' 'o 'Kauna nia, oikaia.' Beia sia oi bola'asi mulitai oi bodada'a.

24 Lau Kau Nakuna e'u melala ai 'eva itani e'amalea boina, vali'u mo vutuvutu avekenai e'amalea alimo edada'a vutuvutu itoina eva'ailalala.

25 Beia vali'u lava'ana'ina 'eva bevaanaana'u vaika, maivaka ulu kanania kauta bevaiviivi'u.

26 "Vitaitana Noa ena melalai epulu boina Lau Kau Nakuna e'u melalai vaka kanaua bekoma.

27 Kau 'eva deaniani, deinuinu, dekamooane mai 'a'ate momoluane devenita beadavata eda'amo Noa aunakoi ai edodo, inoku lamu eaku abaka ela'asi kau boutai dedono palu mai 'abu evavaia si'asi'a.

28 Lota ena melalai vaka kanaua boina, kau 'eva deaniani, deinuinu, detavatava, devadovado mai luma dedau.

29 Melala kanaua'i Lota Sodomu vanuana evikania ela'asi melalanai, 'alova mai bika'a mai'alovata vutuvutuai lamu boina deaku inoku kau boutai deaku bata.

30 Lau Kau Nakuna bavailaasi melalanai vaka kanaua bekoma.

31 "Melala kanaua'i, kau ka luma 'uvina'i koanai ia sia be'ovu luma laloanai ena dava ka beabi, vitaitana mo kau ka lobai koanai ia sia bemumue beda'a lumai ena dava ka beabia.

32 Lota adana oi bolalovaia!

33 Kau ka e'ula ena mau'i beabi 'inia 'eva ena mau'i bevataulea, ia ena mau'i beitoa'au 'eva ena mau'i beabia.

34 "Lau oi a'oumui, boni kanaua'i kau lua 'eta ka'onamoai bemuinai, ka beabia ia ka bevikania.

35 'A'ate lua witi ivamukamukata bika'ana be'iloa, ka beabia ia ka bevikania.

36 Kau lua lobai bevinaula, ka beabia ia ka bevikania."

37 Ibanona kauta delavuaia dediaka "Lovia namana e, a'i?" Lovia namana eta luva evamuea ediaka, "Ba davata a'i 'eva 'alo vaka ua'i deakubou."

18

*Luva Ivavitaitana
Valuva Kauna Mai Obu.*

¹ Iesu ibanona kauta luva ivavitaitana ka e'outa 'eva bevaikabasita melala bounai bemeamea mai meamea 'eva sia bevikania.

² Eluva ediaka, "Vanua ka laloanai valuva kauna ka emia, ia Dilava makauna sia emakau mai kau 'olata sia e'aku.

³ Vanua kanaua laloanai obu ka vaka emia, melala bounai eda'a valuva kauna kevanai enoia ediaka, 'Dulu'u, evaiivi'u kauna kevanai bomavakomoloa.'

⁴ Melala dounamo valuva kauna 'eva sia eula dava ka bevavaia, muliai 'eva sibona eluva ediaka, 'Lau 'eva Dilava makauna sia amakau maivaka kau 'olata sia a'aku.

⁵ Beia obu kanania evabavunu'u 'ounai ena valuva ivakomolona vinaulana bavavaia, asi'i emamue 'udai 'udai emaasi emavabavunu'u.' "

⁶ Lovia namana ediaka, "Valuva kauna si'ava vaikana ena luva 'uluna o'ika.

⁷ Dilava eabita dae kauta de'aea boni de'aea lani kauta eta ula sia bevakomolota, una? Oi olalovaia sia beduluta kaokao, una?

⁸ Lau oi a'oumui, Dilava eta ula bevakomolota kaokao. Beia Lau Kau Nakuna ba'asi koanai kanobatai abiveni kauta 'ani badavalita, una? Asi'i."

Palisea Kauna Mai Takisi Visi Kauna Demeamea.

⁹ Maivaka Iesu luva ivavitaitana kanania eluvavaia kau kataua kevatai sibota eta komolo vinaluta deapa vaita ia kau vaidata deikata 'iu'iu.

¹⁰ "Kau lua deda'a Lo'e Kabukabuna laloanai bemeamea, ka 'eva Palisea kauna ia ka moni visi kauna.

¹¹ Palisea kauna 'eva sibona elava tau inoku emeamea ediaka, 'Dilava e, lau 'eva oni avanama'inamu, 'olana lau 'eva sia kau vaidata boita, abi'avaea kauta, vavai 'avaea kauta, kulakula kauta 'o sia moni visi kauna kanania boina.

¹² Lau masi ka'onamo laloanai boni lua alolove, maivaka e'u davali davali davata boutai 'ouka laloatai dava ka'onamo aveveni oni emu.'

¹³ Beia moni visi kauna 'eva dau'ai elava, sia eula be'a'a dae vutuvutu beikala ia ekukudivo pedena epouia inoku ediaka, 'Dilava e, lau 'eva si'avana kau'u, lalo'u.' "

¹⁴ Inoku Iesu ediaka, "Lau oi a'oumui, kauta lalua deda'a eta luma koanai, moni visi kauna 'eva Dilava vailanai ekomolo, beia sia Palisea kauna. 'Olana sibona evanamala kauna kanaua Dilava betata'u bevakikia, inoku sibona evakikia kauna kanaua Dilava betata'u bevanamala."

Iesu Melo Kikita Evanama'inata.

(Mt 19.13-15; Mk 10.13-16)

¹⁵ Kau vaidata nakuta kikita devuata deda'a Iesu kevana akatai bekao'au, beia ibanona kauta deikata koanai de'ovenita.

¹⁶ Beia Iesu melo kikita e'aeta deasi kevana inoku ediaka, "Melo kikita 'eva be'asi lau keva'u, sia oi bo'outa kao, 'olana Dilava ena lovia vanuana 'eva kau katanania boita eta.

¹⁷ Lau oi luva umauna a'oumui, kau ka Dilava ena lovia vanuana sia eabia dae itani melo kikina boina koanai, ia 'eva sia beda'adodo kovo."

Lavo Kauna Iesu Ita Deluvaluva.

(Mt 19.16-30; Mk 10.17-31)

¹⁸ Iuda kauta eta 'ola kauna ka Iesu elavuaia ediaka, "Vaikabasi kauna mediana e, lau dava bavavaia 'eva mauli keinikeini babia?"

¹⁹ Iesu ediaka, “Dava 'ounai lau o'ae'u mediana? Sia kau ka 'eva mediana, Dilava mo sibona.

²⁰ Talavatu 'eva oikabasita, 'sia bokulakula, sia boakuaku, sia bovinao, sia bodedede, kamamu, sinamu 'olata bo'aku.’”

²¹ Ia ediaka, “Lau melo'u ai koanai talavatu katania boutai 'eva a'imata kave'i easimo vali'u.”

²² Iesu luva kanaua eika koanai e'ouia ediaka, “Dava ka'onamo kanania asido'o ovavaia. Emu dava boutai botavatava vaita monita ulalu kauta bovenita. Kanaua'i vutuvutu lavona boabia, inoku bo'asi muli'u ai bodada'a.”

²³ Kau luva kanaua eika koanai evilalo si'asi'a mai nuana ebavunu 'olana ia ena lavo doutamo vaika.

²⁴ Iesu kau ena nua mekau kanaua eikaia inoku ediaka, “Eta lavo doutamo vaika kauta Dilava ena lovia vanuanai beda'adodo 'eva epasisi vaika.

²⁵ Ena lavo doutamo vaika kauna Dilava ena lovia vanuanai beda'adodo 'eva epasisi vaika vakaia kamela nila 'ilenai beda'a keini.”

²⁶ Lelena deika kauta delavuaia dediaka, “Inoku dai 'eva maui beabia?”

²⁷ Iesu eta luva evamuea ediaka, “Dava vaidia kau sia bevavaita bedaita davata 'eva Dilava 'ani bevavaita bedaia.”

²⁸ Petelo Iesu e'ouia ediaka, “Lai emai dava boutai lai avikanita, oni mulimuai lai adada'a.”

²⁹ Iesu e'outa ediaka, “Lau luva umauna mo oi a'oumui, kau ka 'eva ena luma, adana, bo'akalana, kamana, sinana 'o nakuna evikanita Dilava ena lovia vanuana 'ounai,

³⁰ ia 'eva vali'u melala kanania'i dava doutamo be'abi maivaka melala vailai be'asi melalatai 'eva maui keinikeini beabia.”

Melala Ivakoina Iesu Ena Ba Valina Ekava.

(Mt 20.17-19; Mk 10.32-34)

³¹ Iesu ibanona kauta 'ouka lua evuata eda'a 'aba'abai inoku e'outa ediaka, “Ita 'eva vali'u ekaele'au ekada'a Ielusalema, enolea kauta deleleta davata boutai vali'u Lau Kau Nakuna keva'uai bemomo'ai.

³² Lau 'eva pulu edeana kauta imatai beuda'u, bemediamedia vaia'u, bevamalalaia'u, be'anodi laia'u, be'odi'u mai beaku ba'u.

³³ Beia Melala ivakoinai lau 'eva bako'isi 'udai.”

³⁴ Ibanona kauta dava katania ovota sia deovo kovo. Luva kataua anita ia kevatai 'eva devuni, maivaka sia deikabasi ia 'eva luva dava eluva vaia.

Iesu Maka 'Ede Kauna

Makana Evanama'inata.

(Mt 20.29-34; Mk 10.46-52)

³⁵ Iesu eda'a Ieliko vanuana ekevaia koanai, 'ede kauna ka dala 'aba'abanai emia eva'ame,

³⁶ kau mato deda'a keini da'a keini 'uluta eika, inoku elavuvailavuai dava epupulu.

³⁷ De'ouia dediaka, “Nasaleta kauna Iesu eda'a keini.”

³⁸ 'Ede kauna e'ae'ae, “Davida Nakuna Iesu e, lalo'u!”

³⁹ Vailai deda'a kauta depilaia inoku de'ouia lele bevuvunu, beia ia 'eva e'ae'ae 'unu'unu, “Davida Nakuna e, lalo'u!”

⁴⁰ Iesu elavakao inoku kau kanaua e'ouia 'eva bevuala be'asi kevana. Ia easi kevai koanai Iesu ia elavuaia,

⁴¹ “O'ula dava kevamuai bavavaia?” Ia enu'ovi ediaka, “Lovia namana e, lau a'ula baikaika.”

⁴² Iesu ia e'ouia ediaka, “Boikaika, emu abiveni eta'u evanama'inamu.”

⁴³ Komolonaimo eikaika, inoku Iesu mulinai eda'a, Dilava evanama'inala. Kau boutai deikaia koanai, ia vaka Dilava devanama'inala.

19

Iesu Mai Sakaio.

¹ Iesu Ieliko vanuanai eda'adodo inoku eda'a keini laloanai,

² kau ka ua'i vana 'eva Sakaio, ia 'eva moni visi kauta eta 'ola kauna ka mai ena lavo doutamo vaika.

³ Ia eula Iesu 'eva dai beikala, beia kau mato 'ounai sia edaia 'olana ia 'eva kau to'oto'ona.

⁴ Kanaua 'ounai eveau 'ana'i eda'a au ai edae Iesu dala kanaua'i be'asi 'eva beikala.

⁵ Iesu easi 'abu kanaua'i ela'asi koanai, e'a'a dae inoku e'ouia ediaka, "Sakaio e, 'ovu kaokao mai. Vali'u melala kanania'i lau 'eva oni emu lumai bamimia."

⁶ Komolonai e'ovu easi inoku mai lalonamana Iesu evuaia eda'a ena luma.

⁷ Kau boutai deikaia 'eva denunuvai nunuvai, "Ia 'eva eda'a si'avana kauna ena da'a'au kaunai e'ao."

⁸ Beia Sakaio elavadivo inoku Lovia namana e'ouia, "Lovia namana e. Vali'u e'u lavo avekena ulalu kauta bavenita, maivaka bema kau ka dava vaidai alebaia, melala vani tavata baveni muea."

⁹ Iesu ia e'ouia ediaka, "Vali'u melalana kanania'i vamauli luma kanania'i 'ani epulu, 'olana kau kanania, ia vaka Abela'amo nakuna.

¹⁰ Lau Kau Nakuna 'eva detaule kauta bakavuta mai bavamaulita dainai asi."

Luva Ivavitaitana Vinaula Kauta Kolo Monina Deabia.

(Mt 25.14-30)

¹¹ Kau luva kataua leleta deika laloanai 'eva ia luva ivavitaitana ka e'outa 'olana ia Ielusalema 'ani ekevaia inoku kau delalovaia Dilava ena lovia vanuana 'eva komolonaimo bevailaasi.

¹² Inoku Iesu ediaka, "Lovia kauna ka eda'a kanobata edeana ka ua'i ena lovia 'olana koana beabia, inoku bemumue be'asi.

¹³ Ena da'alaabi kauta 'ouka e'aeta inoku kolo monita ka ka evenita. E'outa ediaka, 'Moni katanania 'eva oi bovinaulavai beda'amo lau bamumue ba'asi.'

¹⁴ Beia ena vanua kauta 'eva ia devaiviivia inoku veauneke kauta vaidai ia mulinai desinita deda'a 'eva bediaka, 'Sia lai a'ula kau kanania emai lovia 'olanai be'ao.'

¹⁵ Kau kanaua lovia 'olanai eao inoku emue easi, luva esinia da'alaabi kauta moni evenita kauta kataua kevatai, ia eula beikabasi moni vida 'ani devavai.

¹⁶ Kau lava'ana'ina easi inoku ediaka, 'E'u 'ola kaumu e, emu kolo monina ka'onamo akanai kolo monina 'ouka adavalita.'

¹⁷ 'Ola kauna ia ena luva evamuea ediaka, 'E'u da'alaabi kaumu mediamu, ovavaia kave'i. Dava kikina vaika ia o'imaia kave'i 'ounai vanua 'ouka bo'olavaita.'

¹⁸ Kau ivaluana easi inoku ediaka, 'E'u 'ola kaumu e, emu kolo monina ka'onamo akanai kolo monina ima adavalita.'

¹⁹ Ena 'ola kauna enu'ovi ediaka, 'Oni 'eva vanua ima bo'olavaita.'

²⁰ Inoku da'alaabi kauna ka vaka easi inoku ediaka, 'E'u 'ola kaumu e, emu kolo monina ka'onamo 'eva 'ena, tubu'ai a'apaia inoku avunia kave'i.

²¹ Lau 'eva oni makaumu amakau, 'olana oni 'eva kau pasisimu, sia o'ulea divo davana oabia isi mune'e sia ovadoa davana otatau uku.'

²² 'Ola kauna ia e'ouia ediaka, 'Oni da'alaabi kaumu si'avamu, lau oni oluluva luvatai bavaluvamu. Oni oikabasi, lau 'eva kau pasisi'u, sia a'ulea divo davana abia isi mune'e sia avadoa davana ataua uku, una?

²³ Inoku dava 'ounai e'u kolo monina i'uleta lumanai sia one'edivo, kanaua'i amumue a'asi koanai, ne'e'au monina kena ita bamaabi 'udai.'

²⁴ Inoku kevanai delava kauta e'outa ediaka, 'Ena kolo monina oabia inoku kolo monina 'ouka evavaia kauna ovenia.'

²⁵ Ia dediaka, "Ola kaumu e, ia kolo monina 'ouka 'ani eabi.'

²⁶ Ia eta luvava evamuea ediaka, 'Lau oi a'oumui, kau ka mai ena dava kauna 'eva dava doutamo bevenia, beia kevana dava asi'i kauna, 'eva dava kikina emimia kevanai davana vaka beabia ovo.

²⁷ Maivaka e'u 'ou kauta sia de'ula lau ia eta lovia 'olanai ba'ao kauta kataua, ovuata omai nia'i inoku lau vaila'uai oi boaku bata.' "

Iesu Ielusalemai Eda'adodo

Lovia 'olana Boina.

(Mt 21.1-11; Mk 11.1-11; Io 12.12-19)

²⁸ Iesu luvava katania e'outa mulinai, ia e'ana'ia vaita dele'au deda'a Ielusalema.

²⁹ Ia eda'a Olive lolonai Betepake mai Betania vanuata ekevaita, ia ibanona kauta lua esinita, e'outa ediaka,

³⁰ "Oi bo'ana'ia boda'a vailamui ai vanuana kanaua, inoku oi boda'adodo ai, doniki nakuna ka ido'ona'au ua'i oi bodavalia, asido'o kau ka evaveaua kovo, oi boluvua inoku oi boabia bo'asi nia'i.

³¹ Bema kau ka belavumui bediaka, 'Dava 'ounai oi oluvua?' Oi bo'oua bodiaka, 'Lovia namana eula venia.' "

³² Esinita 'ana'i kauta kataua deda'a 'eva e'outa vitaitanai dedavalia.

³³ Doniki nakuna deluvua laloanai doniki biakuna deta'u delavuvaita, "Dava 'ounai doniki nakuna oi oluvua?"

³⁴ Ia eta luvava devamuea dediaka, "Lovia namana eula venia."

³⁵ Inoku devuaia deda'a Iesu kevana, eta tubu'a doniki nakuna kabenai delavalita 'au inoku Iesu deduluia emia 'au.

³⁶ Eda'a laloanai kau eta tubu'a dalai delavalita.

³⁷ Ia easi Olive lolonai dala e'ovu edada'a 'abuna kanaua ekevaia koanai, kau mato ia debanoia kauta boutai leleta akai vaikai mailalonamata ita Dilava devanama'inala vinala siavuta vaika boutai deika 'outai.

³⁸ Ia dediaka,

"Lovia namana vanai e'asi

Lovia 'olana kauna 'eva bevanama'inala.

Nua'elu vutuvutuai mai nuavi

'eva akai vaikai."

Sal 118.26

³⁹ Palisea kauta vaidamato vilotai Iesu de'ouia dediaka, "Vaikabasi kaumu e, debanomui kauta 'ovenita lele devunu."

⁴⁰ Iesu eta luvava evamuea ediaka, "Lau oi a'oumui, bema ia lele bevuvunu koanai bika'a bevaui."

Iesu Ielusalema Eikaia Ekani.

⁴¹ Iesu easi Ielusalema kevanai inoku vanuana eikaia 'eva ekani diala.

⁴² Ediaka, "O Ielusalema, vali'u melalana kanania emu nua'elu ena asi 'olana bomaikabasia, beia vali'u 'eva kevamuai 'ani evuni.

⁴³ Anaana melala be'asi kevamu koanai, oni emu 'ou kauta ikekebilimu beko kaiukai mai belavamu kaiu inoku 'aba'aba boutai ai be'ilu bedododo be'asi be'alavumu.

⁴⁴ Bevelimu 'ovu boda'a kuai bo'alama mukamuka mai nakumu maku laloanai demimia kauta 'eva beita asi beda'a kuai beaku bata. Bika'a ka

bika'a ka akanai sia bevikania, 'olana Dilava ena asi kevamuai melalana sia oi oikabasia."

Iesu Lo'e Kabukabunai Tavatava Kauta Elo'ota Asi.

(Mt 21.12-17; Mk 11.15-19; Io 2.13-22)

⁴⁵ Inoku Iesu Lo'e Kabukabuna laloanai eda'adodo, tavatava kauta elo'ota asi,

⁴⁶ E'outa ediaka, "Puka Kabukabunai 'ani ilelena, 'E'u luma 'eva meamea lumanai be'ao', beia oi 'eva abi'avaea kauta eta pode abunai oi ovaaoo."

⁴⁷ Melala bounai Iesu Lo'e Kabukabuna laloanai evaikabasi, beia kabukabu kauta namata, talavatu 'ola kauta mai vanua kauta namata 'eva dala dekavu ia beaku bala.

⁴⁸ Beia bevavaia dalana sia ka dedavalia, 'olana kau boutai deula vaika ia lelenu ikatai.

20

Iesu Delavuaia Siavu A'ia'i Eabia.

(Mt 21.23-27; Mk 11.27-33)

¹ Melala ka Iesu 'eva Lo'e Kabukabuna laloanai kau evaikabasita mai vali nama'ina eilolo vaia, inoku kabukabu kauta namata mai talavatu 'ola kauta, vanua kauta namata ita devaka'onamo dele'au deda'a ia kevana.

² De'ouia dediaka, "Oumai, siavu davanai vinaula katania ovavaita, siavu kanania dai evenimu?"

³ Iesu eta luva evamuea ediaka, "Lau vaka oi lavuai ka balavuaimui, oi bo'ou'u.

⁴ Ioane ena vaidi'u kabukabu 'eva vutuvutuai easi 'o kau kevatai easi?"

⁵ Sibota vilootai deluvaluva vaia dediaka, "Bema ekadiaka 'vutuvutuai easi,' koanai ia bediaka, 'Dava 'ounai sia oi ovamomo'aia?"

⁶ Beia bema ekadiaka, 'Kau kevatai easi,' koanai kau katania boutai ita bika'ai beakuta, 'olana ia devamomo'aia, 'Ioane 'eva enolea kauna.'"

⁷ Kanaua 'ounai Iesu ena luva devamuea dediaka, "Lai sia aikabasi a'i easi."

⁸ Iesu ediaka, "Lau vaka oi sia ba'oumui, dai ena siavuai dava katania avavaita."

Luva Ivavitaitana Vine Kulana I'imana Kauta Si'avata Vaika.

(Mt 21.33-46; Mk 12.1-12)

⁹ Iesu luva ivavitaitana kanania'i kau e'outa ediaka, "Kau ka vine kulana ka evadoia, vinaula kauta vaidia eabita be'imala inoku ia 'eva eda'aovo eda'a kanobata edeana kai ua'i emia dau'a.

¹⁰ Vine vuata eta maku'a melalanai, kula kauna vine vuata vaidia bevenia 'ounai ena da'alaabi kauna ka esinia eda'a kula i'imana kauta kevatai. Beia kula i'imana kauta deta'u da'alaabi kauna deakuia inoku imana 'avaeana desinia emue.

¹¹ Inoku ena da'alaabi kauna edeana ka esinia, beia ia vaka deakuia mai devamalalala inoku imana 'avaeana desinia emue.

¹² Da'alaabi kauna ivakoina esinia, deaku si'ala inoku deitoia asi.

¹³ Kanaua'i kula 'ola kauna ediaka, 'Dava bavavaia? Lau Naku'u, e'u lalo'au kauna basinia 'eva ama'i 'ani ia 'olana beaku.'

¹⁴ Beia kula i'imana kauta ia deikaia koanai sibota deluvaluva vaia dediaka, 'Kanania 'eva kula 'ola kauna nakuna ia 'abuna beabia, kaku bala, inoku kula 'eva ita etai be'ao.'

¹⁵ Kanaua 'ounai deko'isi deitoia asi kula mulinai inoku deaku bala.

Inoku kula 'ola kauna 'eva kula i'imana kauta kevatai dava bevavaia?"

16 Ia be'asi 'eva kula i'imana kauta kataua beaku bata inoku kula kau edeata bevenita." Kau luva kanaua deika koanai dediaka, "Kanania 'eva sia kanaua bekoma."

17 Iesu eika 'inita inoku elavuaia ediaka, "Puka Kabukabunai deleleia luvana anina 'eva dava?"

'Luma ivavaina kauta devaiviivia
bika'ana 'eva 'ani luma ivua'inina
bika'anai eao.'

Sal 118.22

18 Kau ka be'eko asi bika'a kanaua akanai 'eva beaku ba'ia, beia bika'a kanaua be'eko asi kau ka akanai kauna kanaua 'eva bevamukamukala."

19 Talavatu 'ola kauta mai kabukabu kauta namata 'eva deikabasi luva ivavaitana kanaua 'eva ia akatai eluvavaia, kanaua 'ounai melala kanaua'i dala dekavu deula Iesu belioa, beia ia kau makauta demakau.

Takisi Veni Lavuailavuaina.
(Mt 22.15-22; Mk 12.13-17)

20 Iesu deika 'inia, dede kauta vaida desinita belavuaia dededede itani komolo kauta boita. Eta ula Iesu luva ka beluvala 'eva beabia, kanaua'i bevenia keini siavu loviana imanai beudala.

21 Kanaua 'ounai dede kauta delavuaia dediaka, "Vaikabasi kaumu e, lai aikabasi oni luva dava oluvala mai ovaikabasi 'eva dekomolo, oni 'eva sia kau ka enai o'au mai Dilava ena dala luvana umauna ovaikabasi vaia.

22 Kaisala lovia 'olana kauna takisi monina eka venia 'eva ekomolo 'o asi'i?"

23 Beia Iesu eta dede kanaua 'ani eikabasia, inoku e'outa ediaka,

24 "Moni ka ovaika'u. Akanai 'eva dai va'ava'ana mai dai vana?"

25 Ia dediaka, "Kaisala," Iesu e'outa ediaka, "Inoku Kaisala ena 'eva Kaisala oi bovenia, mai Dilava ena 'eva Dilava oi bovenia."

26 Kau vailatai ena luvai bevaviua 'eva sia edaita, ia ena luvai mo 'eva detabulovo si'asi'a inoku lele devunu.

Ba Ai Ko'isi 'Udai Lavuailavuaina.
(Mt 22.23-33; Mk 12.18-27)

27 Sadukea kauta vaida, bai ko'isi 'udai sia devamomo'aia kauta, deasi Iesu kevanai delavuaia,

28 Dediaka "Vaikabasi kaumu e, Mose eta talavatu kanania eleleia koma, bema kau ka bo'akalana adana beba kania beia nakuna asi'i, inoku kau kanaua betata'u obu beadavala 'eva melo bevapulua eba kauna nakuna.

29 Melala kai kadi'a'a kalakoi ka demia, 'aida'aidana kauna ateate ka eadavala nakuna asi'i laloanai eba.

30 Ivaluana kauna obu kanaua eadavala inoku eba,

31 ivakoina kauna vaka obu kanaua eadavala, inoku dala ka'onamoaimo kauta kalakoi ka deadavala nakuta asi'i deba.

32 To'onai ateate kanaua vaka eba.

33 Inoku ko'isi 'udai koanai ateate kanaua 'eva dai ia adanai be'ao? 'Olana kauta kalakoi ka 'eva deadavala."

34 Iesu eta luva evamuea ediaka, "Kanobata kanania kauta dekamoane mai 'a'ate momoluane devenita beadavata.

35 Beia komolo kauta kanobata vailai kanaua'i mai bai ko'isi 'udai bemiala kauta 'eva sia bekamoane mai sia 'a'ate momoluane bevenita beadavata,

36 inoku ia sia beba 'udai, 'olana ia 'eva anelu vitaitata maivaka 'ani bai deko'isi 'udai melota 'eva Dilava nakuna.

37 Bai ko'isi 'udai 'eva Mose evaikala la'uka eani sisibana laloanai. Ia Lovia namana eluva vaia, Abela'amo ena Dilava, 'Isa'ako ena Dilava mai Iakobo ena Dilava.

³⁸ Ia 'eva sia ba kauta eta Dilava, beia mauli kauta eta Dilava, Ia dainai kau boutai 'eva demauli."

³⁹ Talavatu 'ola kauta vaidu deluva dediaka, "Vaikabasi kaumu e, luva mediana vaika oluvala."

⁴⁰ Inoku sia kau ka 'eva eaoneka vaika lavuai vaidai belavuaia.

Keliso Elavua'ilavuai Vaita.

(Mt 22.41-46; Mk 12.35-37)

⁴¹ Inoku Iesu ia elavuaia ediaka, "Dava 'ounai kau dediaka Keliso 'eva Davida Nakuna?"

⁴² Davida sibona Salamo pukanai eluva,

'Dilava e'u Lovia namana

'eva e'ouia ediaka,

Ima'u idibana duasi miadivo

⁴³ beda'amo emu 'ou kauta

oni aemu palapalata ine'e'auna

davanai bavaaota.'

Sal 110.1

⁴⁴ Davida ia e'aea Lovia namana. Inoku a boinai Keliso 'eva Davida nakuna?"

Talavatu 'Ola Kauta Be'imata Kave'i.

(Mt 23.1-36; Mk 12.38-40)

⁴⁵ Kau boutai lele deika laloanai, Iesu debanoia kauta e'outa ediaka,

⁴⁶ "Talavatu 'ola kauta kevatai oibo'imamui kave'i. Ia de'ula 'eva tubu'a laka'ita bevadodo inoku tavatava 'abutai beda'a to'ato'a 'eva kau ia bevanama'inata, mune'e lo'eai mai nadu 'abutai mia'au 'abuta nama'itai mo bemia'au.

⁴⁷ Obu eta lumai dava deabi paluta, mai kau ia beikata dainai eta meamea devalaka'ina. Kau kataua boita kauta 'eva mekau nama vaikana beabia."

21

Obu Ena Veniveni.

(Mk 12.41-44)

¹ Iesu ekailao 'eva lavo kauta eta veniveni lo'e monina iudana mauana laloanai deuda eikata.

² Maivaka obu ulaluna ka ena pene kikita lua euda eikaia.

³ Iesu eluva ediaka, "Lau oi luva umauna a'oumui, obu ulaluna kanania eudala davana 'eva namavaikana vakaia ia boutai.

⁴ Kau katania boutai eta lavoai veniveni monita kikita dene'edivo, beia obu kanania ena ulaluai bemiavaia davana itoina ene'eiadivo."

Iesu Lo'e Kabukabuna Be'eko Dainai Valina Ekava.

(Mt 24.1, 2; Mk 13.1, 2)

⁵ Ibanona kauta vaidu lo'e kabukabuna luvana deluva aboina bika'a si'amobalavenitai devavelala mai veniveni davata Dilava devenia. Beia Iesu ediaka,

⁶ "Vali'u oi o'ika davata katania, melala be'asi koanai sia bika'a ka bika'a ka akanai bemimia, itoinai belulu palu."

Oibo'imamui Kave'i, Ia Bevaiivimui.

(Mt 24.3-14; Mk 13.3-13)

⁷ Delavuaia dediaka, "Vaikabasi kaumu e, melala davanai dava katania bepupulu? Maivaka dava katania 'ani bepupulu melalanai koana 'eva aboina?"

8 Iesu ediaka, “Oi bo'imamui kave'i, asi'i demalebamui, 'olana kau doutamo lau va'uai be'asi, bededede bediaka, 'Lau 'eva Keliso,' mune'e 'Melala 'ani ekevai,' 'eva mulitai sia oibodada'a.

9 Kualai mai viaku 'uluta oi bo'ika koanai, sia oibomakau. Dava katania 'eva 'ani bepulu makava, beia to'ona 'eva asido'o.”

10 Mune'e e'outa ediaka, “Kanobata ka beko'isi kanobata ka bekuai venia, iduvu ka beko'isi iduvu ka bekuai venia.

11 'Abu edeata edeata laloatai kanokau namavaikata, doe mai 'olele si'avata vaika bepupulu, maivaka makau davata mai koa namata vutuvutuai bepupulu.

12 “Beia dava katania boutai asido'o bepupulu laloanai, lau dai'uai oi beliomui mai bevaanaanamui, bevuamui beda'a lo'eai inoku vabuto'o lumai bene'emui divo, maivaka bevuamui beda'a lovia 'olata mai 'olavai kauta vailatai.

13 Beia melala kanania 'eva Vali Nama'ina ia oi bo'outa.

14 Nuamui ovavai kave'i sia oibonua bavunu 'ana'i a oi boluva koma.

15 'Olana Lau batata'u nua'oula luvata bavenimui, kanaua'i emui 'ou kauta 'eva emui luva beva'ekotau 'o be'ou avuavu vaita 'eva sia bedaia.

16 “Kamamui, sinamui, bo'akalamui, kadi'a'amui mai emui kau venimui beveveni koumui bekokou, inoku oi vaida beaku bamui.

17 Kau boutai lau dai'uai bevaivivimui.

18 Beia 'olamuiai sia vuimui ka'onamo ka betaule.

19 Emui vapasisiai maui keinikeini oi boabi.

Iesu Ielusalema Beakua Mukamuka Valina Ekava.

(Mt 24.15-21; Mk 13.14-19)

20 Iesu ediaka, “Kualai kauta Ielusalema belavala kaiukaiua oi boikata koanai, oi boikabasi ivavaina si'asi'a melalana 'ani ekevai.

21 Inoku Iudeai kauta kataua 'eva lolo beveau venia, vanua namana laloanai kauta kataua 'eva bela'asi mulimuliai, mai mulimuliai kauta kataua 'eva vanua namanai sia beda'adodo.

22 'Olana anaana melalata 'eva katania, Puka Kabukabunai 'ani ileleta davata boutai bevamomo'aita.

23 Melala kataua laloatai sivabu 'a'ate mai vadudu 'a'ateta kevatai 'eva besi'avana vaika, anaana nama vaikata kano kanania'i bepupulu maivaka Dilava ena badu be'ovu kau katania akatai.

24 Vaida kualai leponai bekala bata mai vaida beabita vabuto'o kautai be'ao beda'a kanobata edeata edeata ai. Pulu edea kauta 'eva Ielusalema beda'ala'au beda'amo pulu edea kauta eta melala be'ole.

Kau Nakuna Be'asi Melalana.

(Mt 24.29-31; Mk 13.24-27)

25 “Koa edeata vaida melala, vuia mai visiu laloatai bepupulu. Ka'uda bepouta'au inoku 'atu 'uluna bevuvuai 'eva kanobata kauta boutai nuata bevavunu maivaka nuata bebabata.

26 Kanobatai dava bepupulu davana ilalovailalovainai kau makau ai bebamaui, 'olana vutuvutuai siavu davata 'eva be'iuvai'iuvai.

27 Melala kanaua'i kau 'eva Lau Kau Nakuna mai siavu'u mai nuavi'u namavaikana ita oli akanai ba'asi beika'u.

28 Dava katania depulu makava koanai, oi bolalava 'olamui oi boabi isi, 'olana ivamaulimui 'ani ekevai.”

'Ova Aunai Ekaikabasi.

(Mt 24.32-35; Mk 13.28-31)

29 Inoku Iesu luva ivavitaitana kanania e'outa, “'Ova auna mai au boutai oi boikata.

³⁰ Ia uauata debudi'au oi boikata koanai oi boikabasi diolo 'ani ekevai.

³¹ Vitaitanaimo, oi dava katania bepupulu oi boikata koanai, oi boikabasi Dilava ena lovia vanuana 'eva 'ani ekevai.

³² "Lau oi luva umauna a'oumuy, ulu kanania kauta asido'o debapalu laloanai dava katania boutai bepupulu.

³³ Vutuvutu mai kanobata 'eva betaule, beia e'u luva 'eva sia betaule kovo.

Iesu Ibanona Kauta E'outa Be'imata Kave'i.

³⁴ "Sibomui oi bo'imamui kave'i, asi'i naduai, inuinuai maivaka maui kanania ena nua mekau ai oi nuamui bemavamekauta, inoku melala kanaua be'asi eva vatabulovoai beabimui itani viu boina.

³⁵ "Olana melala kanaua 'eva kanobata akanai demimia kauta kataua boutai kevatai bela'asi.

³⁶ Melala bounai oi bo'imamui kave'i, maivaka oi bomeamea kanaua'i bepupulu davata boutai kevatai oi boveauovo, inoku Lau Kau Nakuna vaila'uai oi bolalava."

³⁷ Iesu melala bounai 'eva lo'e kabukabunai evaikabasi, ia lavilavitai 'eva ela'asi eda'a Olive lolonai boni itoina ua'i emia,

³⁸ kau boutai 'avu'avuni avulatai deda'a lo'e kabukabunai ia lelana be'ika.

22

Iesu Ena Ba Dalana Dekavuia.

(Mt 26.1-5, 14-16; Mk 14.1-2, 10-11; Io 11.45-53)

¹ Palaoa 'avaeana naduna, de'aeia La'au keini naduna, 'ani ekevai,

² inoku kabukabu kauta namata mai talavatu 'ola kauta 'eva Iesu iaku bana dalana vaida vunivuniai dekadu, 'olana ia kau makauta demakau.

³ Inoku Satani 'eva Iuda, Kaliote kauna, Iesu ibanona 'ouka lua kauta ka nuanai edodo.

⁴ Inoku Iuda eda'a kabukabu kauta namata mai lo'e kabukabuna de'imala kauta eta 'ola kauta ita delova aku aboina ia Iesu venina beveveni kouna bekoku.

⁵ Ia delalonama si'asi'a inoku deluva'ana'i moni bevenia.

⁶ Iuda eta luva eabia dae, inoku dala ekavu melala nama'ina davanai 'eva ua'i kau mato asi'i koanai Iesu imatai beudala.

Ibanona Kauta Lua La'au Keini Ianina Deva'olua.

(Mt 26.17-25; Mk 14.12-21; Io 13.21-30)

⁷ Inoku Palaoa 'avaeana naduna melalana easi kanaua'i La'au keini naduna mamoea 'eva beaku bata.

⁸ Iesu Petelo mai Ioane esinita ediaka, "Oda'a La'au keini naduna ianina eka ania dainai ova'olua."

⁹ Lualuana delavuai, "O'ula a'i lai bava'olua."

¹⁰ Ia e'outa ediaka, "Vanua namanai oi boda'adodo, kau ka vodu veina evuala kauna ita oi bovidavali, ia mulinai oi bodada'a edododo lumana kanaua'i oi bodododo.

¹¹ Inoku luma 'uala kauna oi bo'oua, 'Vaikabasi kauna elavuaimu. Da'a'au daiutuna 'eva a'i, kanaua'i lau ibano'u kauta ita La'au keini naduna ianina lai bania.'

¹² Ia akai daiutuna namana ka 'ani iva'oluna bevaikamui, ua'i iani oi bova'oluta."

¹³ Lualuana deda'a 'eva Iesu e'outa vitaitatai dedavalita, inoku La'au keini naduna ianina deva'olua.

Lovia Namana Ena Anibou.

(Mt 26.26-30; Mk 14.22-26; 1Kl 11.23-25)

14 Melala koana eabia koanai Iesu ena veauneke kauta ita aniani 'abunai demiadivo.

15 Inoku e'outa ediaka, "Lau e'u ula umauna 'eva La'au keini naduna ianina kanania oi ita eka ania ka'ona makava mulinai lau bevaanaana'u.

16 Lau oi a'oumui 'olana lau La'au keini naduna ianina sia bania 'udai beda'amo ia anina umauna Dilava ena lovia vanuanai bemomo'ai."

17 'Ou ka eabia, evanama'inala inoku ediaka, "Kania oabia inoku boumuiai oi boinu.

18 Lau oi a'oumui 'olana vine vuana veina sia bainua 'udai beda'amo Dilava ena lovia vanuana be'asi."

19 Inoku palaoa ka eabia, evanama'inala mune'e ekovia, evenita ediaka, "Kania 'eva lau kauani'u oi daimuiai aveveni. Kania oi bovavaia lau ilalovai'u."

20 Dala vitaitanaimo, deaniani mulinai ia 'ou ka eabia, ediaka, "'Ou kania 'eva vamomo'ai makamakana lau lala'uai, oi daimuiai be'itabu asi.

21 Beia lau veni'u beveveni kou'u bekokou kauna imana 'eva nia'i lau ima'u ita aniani 'abunai.

22 Lau Kau Nakuna 'eva badada'a Dilava nuana evadaia vitaitana, beia veni'u beveveni kou'u bekokou kauna kanaua kevanai 'eva si'avana namavaikana bepupulu."

23 Ia sibota vilootai devilavuai viveni, dai 'eva koakoa kanaua bevavaia.

Ibanona Kauta Deadedua Dai Namana.

24 Ibanona kauta vilootai ia ka namanai be'ao deko dainai vaka deadedua vaia.

25 Iesu e'outa ediaka, "Pulu edea kauta eta lovia 'olata 'eva eta siavuui kau delovia vaita, inoku 'olavai kauta eta ula eta 'olavai siavunai 'eva kau ia be'aeta kau nama'ita.

26 Beia oi 'eva sia kanaua boinai oi bo'ao. Viloamuiai namana be'ao kauna 'eva beva'iu'ua, maivaka 'ana'ia'vai kauna 'eva da'alaabi kauna boinai be'ao.

27 Dai 'eva namana, aniani 'abunai emimia kauna 'o da'alata e'abi kauna? Aniani 'abunai emimia kauna 'eva namana? Beia lau 'eva oi viloamuiai da'alamui a'abi boina.

28 "E'u vikovo boutai laloatai oi 'eva lau ita kamia ka'ona.

29 Kanaua 'ounai Kama'u siavu eveni'u balovia, vitaitanaimo vali'u Lau siavu bavenimui oi bolovia,

30 Kanaua'i e'u lovia vanuanai 'eva e'u aniani 'abunai oi boaniani mai boinuini mune'e lovia imia'aunai oi bomia'au, Isalaela iduvuna 'ouka lua ivaluvata kaumuiai oi bo'ao.

Iesu Eta'u Petelo Ia Be'oua Avuavua Luvana Eluvavaia Makava.

(Mt 26.31-35; Mk 14.27-31; Io 13.36-38)

31 "Simona e, Simona e, Satani 'ani enoinoi boumuiai bekovomui vitaitana witi bepoua lu'ulu'una bevalovota boina.

32 Beia Simona e, lau oni daimuai 'ani ameamea, emu abiveni sia be'ekoasi. Inoku oni bolalo 'udai koanai, bo'akalamu bovakula'ilata."

33 Beia Petelo Iesu e'ouia ediaka, "Lovia namana e, lau 'eva a'olu oni ita ekada'a vabuto'o luma mai ekada'a ekaba."

34 Iesu ena luva evamuea ediaka, "Petelo e, lau oni a'oumu, vali'u boni kanania'i 'o'oloko asido'o e'alala laloanai, oni melala koi lau bo'ou'u avuavu, lau sia oikabasi'u bokoma."

Iesu Eluva Imatai Dava Davana Beabia.

35 Iesu eta'u ibanona kauta elavuaite ediaka, "Makavana sia mai idavala-mui, voinamui 'o tamakamui asinimui oi oda'a koanai, dava kai oi otabu, una?" Ia dediaka, "Asi'i."

³⁶ Ia e'outa ediaka, "Beia vali'u bema dai mai ena idavala 'eva idavala beabia, mai voina vaka beabia, mai dai kevana kuali lepona asi'i kauna 'eva ena tubu'a betavatava vaia moninai kuali lepona ka betavala.

³⁷ 'Olana lau oi a'oumui, 'ani deleleia 'Abi'avaea kaunai devaaoo,' luvana kanania 'eva lau keva'uai bemomo'ai, dava deleleia lau aka'uai davana ivamomo'aina melalana 'ani e'asi."

³⁸ Ibanona kauta dediaka, "Lovia namana e, ikala, kuali lepota lua nia." Ia e'outa ediaka, "Na 'ani edaia."

Iesu Ketesemaneai Emeamea.

(Mt 26.36-46; Mk 14.32-42)

³⁹ Iesu melala dounamo evavaia vitaitanai ela'asi Olive lolona eda'aia, ibanona kauta ia mulinai deda'a.

⁴⁰ Deasi 'abu kanaua'i koanai ia e'outa ediaka, "Omeamea vikovo laloanai asi'i oi omadodo."

⁴¹ Kevatai eda'a ovo viloota ena dau'a 'eva itani bika'a ka kamaitoa bemada'a bema'ovu vitaitanai ua'i ekuidula inoku emeamea.

⁴² Ediaka, "Kama'u e, bo'ula koanai anaana 'ouna kanania e'uai boabia ovo, sia lau e'u ulai bovavaia, beia oni emu ula bovavaia."

⁴³ Inoku anelu ka vutuvutuai easi Iesu kevanai ela'asi, evakula'ilala.

⁴⁴ Nuana eanana vaika, emeamea mune'e emeamea kula'ila, inoku siavulina dedaidai de'ovu kanoai vitaitana lala dekokoko boina.

⁴⁵ Emeamea koa mulinai eko'isi eda'a ibanona kauta kevata, vilaloai 'ani demano si'asi'a 'ounai muinai tabutai edavalita.

⁴⁶ E'outa ediaka, "Oi dava 'ounai omuinai? Oko'isi omeamea, vikovo laloanai asi'i oi omadodo."

Iesu Deabiakao.

(Mt 26.47-56; Mk 14.43-50; Io 18.3-11)

⁴⁷ Iesu eluva do'o laloanai ibanona 'ouka lua kauta ka vana Iuda 'eva kau mato e'ana'ia vaita deasi, inoku easi eda'a Iesu kevanai beba'ua.

⁴⁸ Beia Iesu ia e'ouia ediaka, "Iuda e, oni 'eva viba'uai Lau Kau Nakuna veni'u oveni kou'u okokou, una?"

⁴⁹ Kevanai delava kauta kataua dava 'ani bepupulu kanaua deikaia une koanai, dediaka, "Lovia namana e, kuali leponai lai bakalata, una?"

⁵⁰ Inoku ibanona ka kabukabu kauta 'olatai kauna ena da'alaabi kauna kaiana idibana epaia ovo.

⁵¹ Beia Iesu eluva ediaka, "Kanana vapuaia." Inoku ia kau kanaua kaiana eabia kovo evanama'inala.

⁵² Inoku Iesu eta'u ia iabina deasi kauta kataua kabukabu kauta namata, lo'e kabukabuna de'imala kauta eta 'ola kauta mai vanua kauta namata e'outa ediaka, "Mai kuali lepomui mai ukumui oi o'asi itani vinao kauna oi boabia boina, una?"

⁵³ Melala boutai lau 'eva oi ita lo'e kabukabuna laloanai 'eva sia oi oabi'u kao. Beia vali'u 'eva oi emui melala, vabuto'o ena siavu melalana."

Petelo Iesu E'ouia Avuavu.

(Mt 26.57, 58, 69-75; Mk 14.53, 54, 66-72; Io 18.12-18, 25-27)

⁵⁴ Ia Iesu deabi devada'ala deda'a kabukabu kauta 'olatai kauna ena lumai. Petelo 'eva mulitai eda'a beia mai viloota.

⁵⁵ Vaida ala laloana bo'adanai 'alova detouia inoku demiaia kaiu, Petelo vaka ua'i ia vilootai emia.

⁵⁶ Inoku da'alaabi vatona ka 'alova 'ailalanai Petelo emia eikaia, ete 'inia 'eva ediaka, "Kau kanania 'eva Iesu banona ka."

⁵⁷ Beia Petelo e'ou avuavu ediaka, "Vato e, lau ia sia aikabasia."

⁵⁸ Sia edau'a laloanai, kau ka ia eikaia 'eva ediaka, "Oni vaka ia banota ka." Petelo ediaka, "Kau e, lau 'eva asi'i."

⁵⁹ Melala koana ka eda'a boina kau ka ia eikaia inoku eluva kula'ila ediaka, "Momo'ai dokadoka kau kanania 'eva ia banona ka, 'olana ia vaka Kalileia kauna."

⁶⁰ Inoku Petelo ediaka, "Kau e, lau sia aikabasi oni dava lovana oakua." Eluva do'o laloanai 'o'oloko e'alala.

⁶¹ Kanaua'i Lovia namana ekai 'udai Petelo eikaia. Inoku Petelo Lovia namana eluva luvana elaloia une, "Vali'u boni kanania'i 'o'oloko asido'o e'alala laloanai oni melala koi lau bo'ou'u avuavu."

⁶² Kanaua'i Petelo ela'asi eda'a mulimuliai ekani si'asi'a.

Iesu Devabo'oa.

(Mt 26.67, 68; Mk 14.65)

⁶³ Iesu deabia kao kauta kataua ia devabo'oa mai de'odia.

⁶⁴ Makana de'apa bubuta inoku deakuia 'eva delavuaia dediaka, "Oumai. Oni dai eakumu?"

⁶⁵ Maivaka luva si'avata vaika doutamo kevanai deluvata.

Iesu Valuva De'imala Kauta Vailatai Elava.

(Mt 26.59-66; Mk 14.55-64; Io 18.19-24)

⁶⁶ Elani laloanai vanua kauta namata, kabukabu kauta namata mai talavatu 'ola kauta dedo'u ka'ona inoku Iesu devuaia deasi do'u namana kauta vailatai.

⁶⁷ Do'u namana kauta delavuaia dediaka, "Oumai. Oni 'eva Keliso, una?" Iesu enu'ovi ediaka, "Bema lau oi ba'oumui, sia 'ani oi bovamomo'ai'u.

⁶⁸ Maivaka bema lavuai ka bavenimui, sia 'ani oi bonu'ovi.

⁶⁹ Beia vali'u melala kanania'i vailata eda'ala, Lau Kau Nakuna 'eva siavu Dilavana imana idibana duasi bamimia."

⁷⁰ Ia boutai delavuaia dediaka, "Inoku oni 'eva Dilava Nakuna, una?" Iesu ia e'outa ediaka, "'O, 'ani oi oluvamo kanaua 'eva lau."

⁷¹ Inoku ia dediaka, "Dava 'ounai 'ou dae luvata kakakavu? Ita sibota 'ani ia umauna nutunai eluluva lelenu ka'ika."

23

Iesu Pilato Vailanai.

(Mt 27.1, 2, 11-14; Mk 15.1-5; Io 18.28-38)

¹ Inoku do'u namana kauta boutai deko'isi Iesu devuaia deda'a Pilato kevana.

² Inoku demakavala vuvua devakoala dediaka, "Kau kanania lai adavalia emai kanobata kauta nuata eani vanua 'uluna devavuala mai lovia 'olana ena takisi lai haveveni davana e'oua kao, maivaka sibona eluva ia 'eva Keliso, lovia 'olana."

³ Inoku Pilato Iesu elavuaia, "Oni Iuda kauta eta lovia 'olana, una?" Iesu ena luva evamuea ediaka, "Ani oluvamo kanaua."

⁴ Pilato kabukabu kauta namata mai kau mato e'outa ediaka, "Lau kau kanania kevanai sia va'eva ka adavalia."

⁵ Ia deluva kula'ila dediaka, "Ena vaikabasi luvatai Iuda kauta boutai evaasiasita 'ulu devavua, ua'i Kalileiai emakavala easi mo 'ani 'abu kanania'i ela'asi."

⁶ Pilato luva kanaua 'uluna eika 'eva elavuai lavuai, kau kanania 'eva Kalileia kauna, una?

⁷ Pilato eikabasi Iesu 'eva 'Eloda ena ikakao kanona venunai 'ounai esinia devuaia deda'a 'Eloda kevana, melala kanaua'i 'Eloda vaka ua'i Ielusalem.

Iesu 'Eloda Vailanai.

⁸'Eloda Iesu eikaia koanai elalonama si'asi'a 'olana siako vaika Iesu valina eika, eula ia bemaikala maivaka enuabata Iesu koa vaida bevavai beikata.

⁹Kanaua 'ounai lavuai doutamo evenia, beia Iesu ia ena luva sia ka evamuea.

¹⁰Kabukabu kauta namata mai talavatu 'ola kauta ua'i delava deluva pasisi vuvua devakoala.

¹¹Inoku 'Eloda mai ena kualii kauta Iesu devabo'oa, luva si'avata edeata edeata deluva mulinai, lovia tubu'ana ka devavadodoia, mune'e esinia devuaia demue deda'a Pilato kevana.

¹²'Ana'inai 'Eloda mai Pilato 'eva vibodala, melala kanaua'i ia laluanu 'eva devikau.

Pilato E'outa Iesu Beaku Bala.

(Mt 27.15-26; Mk 15.6-15; Io 18.39–19.16)

¹³Pilato eta'u kabukabu kauta namata, vanua kauta namata mai vanua kauta e'aeta evado'uta.

¹⁴E'outa ediaka, "Kau kanania oi ovuaia oasi keva'uai oi odiaka, kau nuata e'ani vanua 'uluna evavuala, beia lau vailamuia oi oluva luvata kataua'i alavuaia 'eva sia ena va'eva ka adavalia.

¹⁵'Eloda vaka kanaua boina 'ounai esini muea easi kevata, oi boikala, ia sia dava ka evavaia si'asi'a kanaua'i ia ivaba be'ao.

¹⁶Kanaua 'ounai ba'odia inoku bavikania bedada'a."

¹⁷Melala bounai La'au keini nadunai Pilato ena koakoa 'eva vabuto'o kauna ka evala'asia 'avaea.

¹⁸Beia kau mato devaoi ka'ona dediaka, "Kau kanania aku bala! Balaba luvua venimai!"

¹⁹Balaba 'eva vabuto'o lumanai emia 'olana vanua namana laloanai viala evapulu mai eakuaku.

²⁰Pilato eula 'eva Iesu bevala'asia 'ounai kau mato e'outa 'udai.

²¹Beia kau mato devaoi 'udai 'udai dediaka, "Au ido'o valaukuna akanai bebaba! Au ido'o valaukuna akanai bebaba!"

²²Pilato melala ivakoina kau mato e'outa 'udai, "Kau kanania va'eva dava evavaia? Ia bebaba va'evana sia ka adavalia. Kanaua 'ounai ba'odia inoku bavikania bedada'a."

²³Beia kau mato devaoi basibasi leleta aka umaunai Iesu au ido'o valaukuna akanai bebaba. Eta vaoiai Pilato ekeinai.

²⁴Kanaua 'ounai Pilato eta ula evavaia Iesu va'evai ene'eiadivo.

²⁵Pilato eta'u viala mai akuaku 'ounai vabuto'o lumanai dene'eiadivo kauna kanaua evala'asia eta noinoi vitaitanai, inoku Iesu evenita eta ula vinaulana bevavaia.

Iesu Au Ido'ovalaukunai Dekokoia 'Au.

(Mt 27.32-44; Mk 15.21-32; Io 19.17-27)

²⁶Kualii kauta Iesu devada'ala dela'asi deda'a 'eva Kulene kauna ka vana Simona, ia 'eva 'uniai easi Ielusalema eda'a venia laloanai deabiakao inoku au ido'o valaukuna devavua vaia Iesu mulinai eda'a vaia.

²⁷Kau doutamo vaika Iesu mulinai deda'a vilotai 'a'ate vaida ia delaloia dekani.

²⁸Iesu ekai'udai e'outa ediaka, "Ielusalema nakuna 'a'atemui e, lau dai'uai sia okani, beia oi mai nakumui daimuia okani.

²⁹'Olana melala be'asi koanai kau bediaka, 'De'opa'opa 'a'ateta, melo sia devapulu 'a'ateta mai sia devabae vabae 'a'ateta 'eva denama'ina.'

³⁰Inoku

'lolo namata be'outa,

"O'eko akamaiai",

mai lolo kikita be'outa,
"Ovaakuavumai." "

Hos 10.8

³¹ Lau au maolina boina keva'uai kanaua devavaia koma koanai, oi au 'ibuna boina kevamuia a bemavavaia koma?"

³² Va'eva kauta lua vaka devuata deda'a Iesu ita beaku bata.

³³ Deasi 'abu vana "Ola kuliaana' ai dela'asi koanai, Iesu au ido'o valaukuna akanai dekokoa 'au, va'eva kauta lua vaka dekokota 'au, ka idibanai, ka 'ealinai.

³⁴ Inoku Iesu eluva ediaka, "Kama'u e, eta si'avana 'oukao 'olana ia sia deikabasi dava devavaia." Inoku kuali kauta punipunia ena tubu'a decole.

³⁵ Kau delava devialulu, vanua kauta namata Iesu devabo'oa dediaka, "Ia kau edeata evamaulita, bema ia 'eva Keliso Dilava ia edilaiia kauna koanai sibona evamaulia."

³⁶ Kuali kauta vaka devabo'oa, deasi kevanai vine vamaina devenia.

³⁷ Inoku dediaka, "Bema oni Iuda eta lovia 'olana koanai sibomu vamaulimu."

³⁸ Iesu 'olana akanai malele ka vaka ua'i, kanania deleleia koma,

KANANIA 'EVA

IUDA ETA LOVIA 'OLANA!

³⁹ Va'eva kauta ua'i detaba kauna ka Iesu evabo'oa ediaka, "Oni vamauli kaumu, una? Sibomu vamaulimu mai lai vaka vamaulimai."

⁴⁰ Beia banona eta'u e'ovenia ediaka, "Oni Dilava makauna sia omakau, una? Oni mekau oabia vitaitana ia vaka.

⁴¹ Ita laluaana ekaba 'eva ekomolo, 'olana mekau ka'abi davata 'eva eta vavai vitaitatai, beia kau kanania 'eva sia va'eva ka evavaia."

⁴² Mune'e ediaka, "Iesu e, emu lovia vanuanai boda'a dodo koanai lau bolalovai'u."

⁴³ Iesu ia e'ouia ediaka, "Lau oni luva umauna a'oumu, vali'u melala kanania'i oni mai lau ita laluaana 'eva paladaiso laloanai ekamia."

Iesu Eba.

(Mt 27.45-56; Mk 15.33-41; Io 19.28-30)

⁴⁴ Ado'alavuni lakalaka laloanai melala sia ekala, vabuto'o easi kanobata itoinai e'alavua eda'amo melala koana koi.

⁴⁵ Maivaka lo'e kabukabuna laloanai iveli keinina tubu'ana bo'adanai e'idi lua.

⁴⁶ Iesu e'ae 'unu'unu ediaka, "Kama'u e, idume'u imamuai audala." Kanaua eluva koma mulinai eba.

⁴⁷ Kuali kauta i'olavaita kauna dava depulu eikata koanai Dilava evanama'inala ediaka, "Momo'ai dokadoka kau kanania 'eva komolo kauna."

⁴⁸ Vialulu kauta ua'i delava bou makatai dava depulu deikata koanai, pedeta depoupouta mai vilalota demue deda'a vanua.

⁴⁹ Beia Iesu deikabasia kauta mai Kalileiai 'a'ate ia mulinai deda'a kauta kataua boutai dau'ai delava dava depulu davata deikata.

Iesu Dekoleia.

(Mt 27.57-61; Mk 15.42-47; Io 19.38-42)

⁵⁰ Do'u namana kauna ka vana Iosepa, ia kau nama'ina maivaka vinaula komolo kauna,

⁵¹ ena vanua 'eva Alimatea Iudea vanuana ka, ia Dilava ena lovia vanuana e'imala be'asi. Ia do'u namana kauta eta lalovai mai koakoa sia eabitadae.

⁵² Kau kanania eda'a Pilato kevana, Iesu kauanina enoinoivaia.

⁵³ Inoku ia Iesu kauanina eabia ovo, tubu'a imusinai e'apaia mitava kanaua bika'a ioina 'ulina laloanai ene'eia divo, 'uli kanaua'i 'eva asido'o kau ka dekolēia.

⁵⁴ Melala kanaua 'eva va'olu melalana maivaka melala kabukabuna 'ani bemakavala.

⁵⁵ Kalileiai Iesu mulinai deda'a 'a'ateta kataua 'eva Iosepa mulinai deda'a, mitava mai Iesu kauanina a devaenoa koma deikaia.

⁵⁶ Inoku demue deda'a vanua 'eva mulamula bonata nama'ita mai kauna bedavua deolota deva'olota. Beia talavatu luvana vitaitanai melala kabukabunai lata deani.

24

Iesu Bai Eko'isi.

(Mt 28.1-10; Mk 16.1-8; Io 20.1-10)

¹ Masi melalana 'avu'avu avulai 'a'ate mulamula bonata nama'ita deva'olota davata deabi deda'a mitava.

² Mitava i'alavuna bika'ana 'ani e'ule tau 'aba'abai deikaia.

³ Beia mitava laloanai dedodo koanai Lovia namana Iesu kauanina sia deikaia.

⁴ Kanaua 'ounai ia nuata debavunu laloanai kau lua eta tubu'a de'amale 'amale komolonai kevatai delavadivo.

⁵ 'A'ate demakau si'asi'a dekudivo vailata kano eda'aia, kau luana 'a'ate delavuaita dediaka, "Mauli kauna dava 'ounai ba kauta vilotaia oi okavua?"

⁶ Ia 'eva sia nia'i. Ia 'ani eko'isi 'udai! Kalileiai emia do'o laloanai oi e'oumui luvana olalovaia.

⁷ Ediaka, 'Lau Kau Nakuna 'eva si'avana kauta imatai beuda'u, au ido'o valakuna akana beaku ba'u inoku melala ivakoinai bako'isi 'udai.' "

⁸ Kanaua'i ia Iesu ena luv delalota une.

⁹ Mitavai demue deasi koanai dava katania boutai ibanona kauta 'ouka ka mai banona vaidā kevatai de'outa.

¹⁰ 'A'ate katania Makadala ateatena Malia, Dioana, Iakobo sinana Malia mai debanota 'a'ateta vaidā ita vali kanania veauneke kauta kevatai dekavaia.

¹¹ Beia veauneke kauta 'a'ate eta luvā 'eva sisiba 'avaeanai devaaoa 'ounai sia devamomo'aia.

¹² Beia Petelo eko'isi eveau eda'a mitava. Ekukudivo laloana enovoia, de'apaia tubu'ata mo ua'i sibota deno 'avaea eikata, emue eda'a ena luma laloanai sibona nuana ebavunu dava kanaua epulu davana 'ounai.

Iesu Emausa Dalanai Evilaasi.

(Mk 16.12, 13)

¹³ Melala ka'onamo kanaua laloanai Iesu ibanona kauta lua deda'a vanua ka vana Emausa, vanua kanaua mai Ielusema vilota ena dau'a 'eva kilomita 'ouka ka boina.

¹⁴ Dalai deda'a laloanai dava depulu davata katania boutai laluvana vilotaia deluvaluva vaita.

¹⁵ Inoku laluvana deluvaluva mai delovaaku laloanai Iesu sibona easi kevatai ita deda'a ka'ona.

¹⁶ Ia deikaia beia sia deikabasia ia 'eva Iesu.

¹⁷ Iesu ia elavuaia, "Oi laluvana da'a da'amuiāi dava lovana oi oakua?" Laluvana delava kao vailata mai vilalota.

¹⁸ Inoku ka vana Kaleopa ia elavuaia, "Ielusema laloanai ama'i oni mo sibomu melala mulitai dava depulu davata sia oikabasita?"

¹⁹ Ia elavuaia, "Dava epulu?"

Kau luana dediaka, “Nasaleta kauna Iesu valina. Ia 'eva enolea kauna, Dilava mai kau boutai vailatai ena luva mai vinaula desiavu si'asi'a.

²⁰ Kabukabu kauta namata mai emai vanua kauta namata ia deabia valuva 'abunai dene'eia inoku au ido'o valaukuna akanai deaku bala.

²¹ Beia lai alalovaia ia kauna 'eva ita Isalaela kauta bevamaulita.

Inoku dava katania depulu mulitai melala koi deole.

²² Emai 'a'ate vaidai lai devatabulovomai. Ia 'avu'avuni avulai deda'a mitava

²³ beia Iesu kauanina sia dedavalia, demue deasi dediaka anelu deikata maivaka anelu kataua ia de'outa, 'Iesu 'eva 'ani emauli 'udai.'

²⁴ Inoku banomai vaidai deda'a mitava deikaia 'eva 'a'ate deluva vitaitanai mo dedavalia, beia Iesu kauanina sia deikaia.”

²⁵ Iesu e'outa ediaka, “A oi obo'o koma, mai nuamui a demaka'i koma enolea kauta deluva davata boutai ivamomo'aita.

²⁶ Keliso kanaua beanana koma makava inoku ena nuavi laloanai bedododo, kanaua sia oi oikabasia, una?”

²⁷ Iesu 'eva Mose mai enolea eta leleleleai emakavala Puka Kabukabuna laloanai ia sibona luvana bounai kau luana evaikabasita.

²⁸ Vanua deda'a venia vanuana 'ani dekevaia inoku Iesu 'eva beda'a komolo ekoma.

²⁹ Beia laluna denoia dediaka, “Melala 'ani e'ulu maivaka 'ani eboboni 'ounai, ita kamamia.” Inoku ia eda'adodo ia ita bemimia.

³⁰ Iesu aniani 'abunai ia ita demia divo koanai palaoa eabia, evanama'inala, ekovia inoku laluna evenita.

³¹ Inoku makata deata nuata de'ailala ua'i deikabasi ia 'eva Iesu, mune'e vailatai etaule 'avaea.

³² Ia laluna sibota deviluva viveni dediaka, “Dalai eluva venita maivaka Puka Kabukabuna luvata evaikabasita koanai itani 'alova nuatai evuvule boina, una?”

³³ Laluna komolonai deko'isi demue deda'a Ielusalema, ua'i ibanona kauta 'ouka ka banota vaidai ita dedo'u dedavalita.

³⁴ Ia de'outa dediaka, “Lovia namana 'eva eko'isi dokadoka, Simona kevanai evailaasi.”

³⁵ Inoku ia laluna maivaka dalai dava epulu mai palaoa ekovia koanai nuata de'ailala Iesu deikabasia valina dekava.

Iesu Ibanona Kauta Kevatai Evailaasi.

(Mt 28.16-20; Mk 16.14-18; Io 20.19-23; Vn 1.6-8)

³⁶ Kau luana kataua deluva do'o mo laloanai Iesu sibona ia vilodatai elavavido inoku ediaka, “Nua'elu oi kevamuiai!”

³⁷ Ia boutai deda'unai 'eva demakau si'asi'a, delalovaia ka'uba deikaia.

³⁸ Beia Iesu e'outa ediaka, “Dava 'ounai oi omakau mai nuamui delaloto'ato'a?”

³⁹ Ima'u mai ae'u oikata, oabi'u kovo inoku oi boikabasi, nia 'eva lau umau'u, 'olana ka'uba 'eva sia mai vidiona mai sia mai kuliana, beia oi oika'u vitaitanai lau 'eva mai vidio'u mai maikulia'u.”

⁴⁰ Luva kanaua eluvaia mulinai imana mai aena evaikata.

⁴¹ Ia delalonama si'asi'a ia nuata lalovai lalovai evonu 'ounai Iesu asido'o devamomo'aia, inoku Iesu ia elavuaia, “Oi mai emui iani kena nia'i o asi'i?”

⁴² Sisi idalana kava'ina kena devenia.

⁴³ Inoku eabia vailatai eania.

⁴⁴ Inoku Iesu ia e'outa ediaka, “Lau oi kevamuiai amia do'o laloanai dava lovata aku davata katania, Mose ena talavatuai, enolea kauta eta leleleleai mai Salamo laloanai Lau vali'u deleleta davata boutai bemomo'ai.”

⁴⁵ Inoku nuata eva'ailalata Puka Kabukabuna ovona be'ovo.

⁴⁶ Mune'e Iesu ia e'outa ediaka, "Puka Kabukabunai kanania deleleia koma. Vamauli kauna 'eva bevaanaanala inoku melala ivakoinai bai beko'isi 'udai.

⁴⁷ Ielusalema ai bemakavala beda'amo kanobata boutai laloatai 'eva keliso vanai lalo'udai mai si'avana i'ou kaota beilolo vaita.

⁴⁸ Oi 'eva dava katania valita i'outa dae kaumui.

⁴⁹ Lele'u oika. Kama'u Idume Kabukabuna e'ouia'ana'i kauna basinia be'asi akamui'ai, beia oi 'eva Ielusalemai oi bomimia beda'amo siavu akai be'asi davana oi boabia."

Iesu Ele'au Eda'a Vutuvutu.

(Mk 16.19, 20; Vn 1.9-11)

⁵⁰ Iesu vanua namanai ia evuata ela'asi deda'a Betani kevanai, inoku imana eabi isi 'eva evanama'inata.

⁵¹ Evanama'inata laloanai 'eva evikanita inoku ele'au eda'a vutuvutu.

⁵² Dekukudivo venia inoku mai lalonamata namavaikana ita demue deda'a Ielusalema.

⁵³ Melala bounai deda'a Lo'e Kabukabuna laloanai demia Dilava devanama'inala.

Vali Nama'ina IOANE Eleleia Kauna

Puka Laloana Ilelena Luvana

Vali nama'ina kanania Ioane eleleia laloanai evaikata, Iesu 'eva Dilava ena luva keinikeini kauna, ia 'eva kau kauaninai easi maivaka kau vilootai emia (1.14). Ioane ena ula 'eva kau Iesu beabivenia ia 'eva Dilava Nakuna, bekabasi Iesu 'eva Dilava eluva'ana'i besinia be'asi bevamaulita kauna. Ioane 'eva eikabasi kau Iesu deabivenia kauta 'eva mauili keinikeini dedavalia, kanaua 'ounai kanania eleleia (20.31).

Lava'ana'ina 'eva Ioane e'outa Iesu 'eva Dilava ena Luva, inoku vatabulovo vinalata evavai lovana eaku. Luva umauna, kau vaida 'eva Iesu deabivenia mai mulinai deda'a, beiamo vaida 'eva ia iabivenina sia deula. Puka elena 13 – 17 laloanai ivaiviivina kauta dalana dekadu iabi'inina lovana eaku, Iesu 'eva ibanona kauta ita demia, ia eta'u vaikabasi mediata evenita. To'onai 'eva Iesu bai eko'isi 'udai mai ibanona kauta ia deikaia mai deabi venia.

Dava ka'onamo puka kanania laloanai eka ikala basibasi 'eva ena koakoa kanaua kau eta mauili laloanai davata eabita luva ivavitaitatai evaota abiveni kauta melala boutai bemaui vaita, itani vei, palaoa, 'ailala, vine vuana, mamoe mai i'imana kauna luvata.

Puka Iduvuna Namata

a. Luva lava'ana'ina. (1.1 - 18)

b. Ioane vaidi'u kabukabu kauna mai Iesu ibanona kauta lava'ana'ita. (1.19 - 51)

c. Iesu ena vinala kau kevatai. (2.1 – 12.50)

d. Melala to'otai Ielusalema laloanai mai kevanai. (13.1 – 19.42)

e. Lovia namamna ena ko'isi 'udai mai evaila. (20.1 - 31)

f. Luva to'onai ela'asi mo Kalilea laloanai. (21.1 - 25)

Luva 'Eva Kau Kauaninai Easi

¹ Makavana umaunai kanobata asido'o epulu laloanai Luva 'eva 'ani ua'i, Luva 'eva Keliso, Luva 'eva Dilava ita demia, mai Luva 'eva Dilava.

² Ia 'eva makavana umaunai Dilava ita demia.

³ Dilava evavaita davata boutai 'eva Luva kanaua'i depulu, depulu davata boutai 'eva sia ka sibona epulu.

⁴ Luva 'eva mauili 'olana, inoku mauili kanaua 'eva kau 'ailala evenita.

⁵ 'Ailala 'eva vabuto'o laloanai e'ani, beia vabuto'o 'eva 'ailala sia evabo'oa.

⁶ Dilava kau ka esinia easi, ia vana 'eva Ioane.

⁷ Ia enai kau boutai 'ailala valina be'ika inoku bevamomo'aia 'ounai ia easi kau kevatai 'ailala beluva vaia kanaua'i kau boutai ia enai bema abivenia.

⁸ Ia sibona 'eva sia 'ailala kanaua, beia 'ailala valina bekakava 'ounai easi.

⁹ 'Ailala umauna 'eva easi kanobatai kau boutai beva'ailalata.

¹⁰ Luva 'eva kanobatai, inoku kanobata 'eva ia enai ivavaina, beia kanobata kauta 'eva ia sia deikabasia.

¹¹ Ia easi ena kanobata umauna, beia ia ena kanobata kauta umauta 'eva ia sia deabia dae.

¹² Beia kau vaida ia deabia dae, mai vana deabivenia kauta kataua boutai 'eva ia komolo evenita Dilava nakunai be'ao.

¹³ Dilava nakunai deao kauta 'eva sia kau eta pulu dalanai, 'o sia kau ena ulai, 'o sia kau ka ena ulai, beia Dilava ena ulai depulu.

¹⁴ Luva kanaua 'eva kau kauaninai easi, viloamaiaia ita lai amia. Ena nuavi lai aikaia, nuavina kanaua 'eva Kamana kevanai easi Nakuna ka'onamo enai, iulaveni mai luva umaunai evonuvonu 'au.

¹⁵ Dilava eta'u ia valina ekava 'eva evaoi ediaka, "Lau valina akava kauna 'eva kanania, adiaka, 'Lau muli'uai e'asi kauna 'eva ekeini'u 'olana ia emia makava vakaia lau apulu.' "

¹⁶ Ia iulaveniai evonuvonu dae ai 'eva ita boutai melala ka ka laloatai vanama'ina kabi 'udai abi 'udai.

¹⁷ Dilava 'eva talavatu Mose enai evenita, beia iulaveni mai luva umauna 'eva Iesu Keliso enai deasi.

¹⁸ Sia kau ka Dilava eikaia kovo, beia Nakuna ka'onamo mo sibona, Dilava kevana umauna emimia mai ia sibona vaka Dilava, ia eta'u Dilava ita evaikata.

Vaidi'u Kabukabu Kauna

Ioane Eilolo.

(Mt 3.1-12; Mk 1.1-8; Lk 3.1-18)

¹⁹ Inoku Ielusalemai Iuda kauta namata deta'u kabukabu kauta mai Levi kauta desinita deda'a Ioane belavuaia ia 'eva dai.

²⁰ Ioane sia e'ou avuavu beia e'ou dae ediaka, "Lau 'eva sia Keliso."

²¹ Ia delavuaia dediaka, "Inoku oni 'eva dai? Oni Elia?" Ia ediaka, "Lau sia Elia." Ia delavuaia 'udai dediaka, "Oni enolea kaumu, una?" Ia eta luva evamuea ediaka, "Asi'i."

²² Kanaua 'ounai ia de'ouia dediaka, "Inoku 'oumai oni 'eva dai. Emu nu'ovi lai babi muea bada'a desinimai kauta lai ba'outa. Oni sibomu a oluva vaimu koma?"

²³ Ioane eta luva evamuea ediaka, "Lau 'eva enolea kauna Isaia ena lelelele luvana,

ia eluva ediaka, 'Lele ka kano'akunai evaoi ediaka,

Lovia namana ena dala ovakomoloa.' "

Isa 40.3

²⁴ Palisea kauta vaidia vaka desinita,

²⁵ delavuaia dediaka, "Bema oni sia Keliso, 'o sia Elia, 'o sia enolea kaumu koanai dava 'ounai ovaide'u kabukabu?"

²⁶ Ioane e'outa ediaka, "Lau veiai avaidi'u kabukabu, beia oi sia oikabasia kauna ka oi viloamui'ai elalava.

²⁷ Ia 'eva lau muli'uai e'asi, beia ia lau ekeini'u, lau 'eva sia anama'ina ia ena tamaka valota baluvuta."

²⁸ Katania boutai 'eva Betaniai, Iolidana nutu avekenai Ioane evaidi'u kabukabu laloanai depulu.

Iesu 'Eva Dilava Ena

Mamoe Nakuna.

²⁹ Elani Ioane 'eva Iesu eikaia ia kokona easi inoku e'outa ediaka, "Oikaia, Dilava ena mamoe nakuna kanobata ena si'avana iabina ovo kauna.

³⁰ Ualavi lau lovana aku kauna kanania, adiaka, 'Muli'uai e'asi kauna 'eva lau ekeini'u, 'olana ia emia makava vakaia lau apulu.'

³¹ Lau sibo'u ia sia aikabasia, beia lau asi veiai bavaidi'u kabukabu 'eva ia bavala'asia Isalaela kauta ia beikabasia 'ounai."

³² Inoku Ioane ia valina ekava ediaka, "Lau Idume Kabukabuna aikaia bojomalo boina vutuvutu'ai e'ovu ia akanai esili'au.

³³ Lau asido'o ia aikabasia, beia esini'u veiai bavaidi'u kabukabu kauna eta'u e'ou'u ediaka, 'Idume Kabukabuna be'ovu boikala inoku kau ka akanai besili'au kauna boikabasi ia 'eva Idume Kabukabunai bevaidi'u kabukabu.'

³⁴ Lau maka'uai 'ani aikaia inoku a'ou dae kanania 'eva Dilava Nakuna."

Iesu Ibanona Kauta Lava'ana'ita.

³⁵ Elani Ioane mune'e ua'i ibanona kauta lua ita delava.

³⁶ Ia Iesu eda'a keini eikaia koanai ediaka, "Oikaia, Dilava ena mamoe nakuna."

³⁷ Ioane ibanona kauta lua ia eluva lлена deika koanai deda'a Iesu mulinai deda'a.

³⁸ Iesu ekai 'udai mulinai deda'a eikata inoku elavuaite ediaka, "Oi o'ula dava?" Ia ena luva devamuea dediaka, "Labi e, oni a'i omimia?" (Leletai Labi anina 'eva Vaikabasi kauna.)

³⁹ Ia e'outa ediaka, "Omai oikaia." Inoku deda'a ena mia 'abuna deikaia, 'ani elavilavi melala koana vani 'ounai ia ita demia.

⁴⁰ Kau luana Ioane eluva lлена deika inoku Iesu mulinai deda'a kauta ka 'eva Andelea, ia 'eva Simona Petelo kadina.

⁴¹ Andelea komolonai 'a'ana Simona edavalia inoku e'ouia ediaka, "Lai Mesaia 'ani lai adavalia." (Mesaia anina 'eva Keliso, Vamauli kauna.)

⁴² Inoku ia Simona evuaia deda'a Iesu kevana. Iesu Simona eteia basibasi inoku ediaka, "Oni 'eva Simona, Ioane nakuna, vali'u oni vamu be'aea Kepa." (Kepa 'eva vitaitana Petelo, anina 'eva bika'a.)

Iesu Pilipo Mai Natanaela E'aeta.

⁴³ Elani Iesu eula beda'a Kalilea laloanai, Pilipo edavalia inoku e'ouia ediaka, "Muli'uai mai."

⁴⁴ Pilipo 'eva Betesaida kauna, Andelea mai Petelo eta vanua kauna.

⁴⁵ Pilipo eta'u Natanaela edavalia inoku e'ouia ediaka, "Mose talavatu laloanai valina ekava maivaka enolea kauta eta pukai deleleia kauna 'ani lai adavalia. Ia 'eva Nasaleta kauna Iesu, Iosepa nakuna."

⁴⁶ Natanaela elavuai ediaka, "Nasaleta ai dava nama'ina ka ua'i bepupulu bedaia, una?" Pilipo ediaka, "Oni mai ikala."

⁴⁷ Iesu Natanaela eikaia kokona easi koanai luvana eluva ediaka, "Ia 'eva Isalaela kauna umauna. Ia nuanai 'eva sia dede koana ka."

⁴⁸ Natanaela ia elavuaita, "Lau aboina oikabasi'u?" Iesu ia ena luva evamuea ediaka, "Oni suke auna venunai do'o laloanai aikamu vakaia mulinai Pilipo e'aemu."

⁴⁹ Inoku Natanaela enu'ovi ediaka, "Vaikabasi kaumu e, oni 'eva Dilava Nakuna. Oni 'eva Isalaela eta Lovia 'olana."

⁵⁰ Iesu ia e'ouia ediaka, "Oni ovamomo'ai 'olana adiaka suke auna venunai aikamu 'ounai, una? Sia kanania mo, vailai oni 'eva dava namata boikata."

⁵¹ Mune'e ediaka, "Lau oi luva umauna a'oumui, vutuvutu beluluvu, inoku Dilava ena anelu Lau Kau Nakuna aka'uai bele'au be'ovu oi boikata."

2

*Kana Vanuanai
Kamoane Naduna Ka.*

¹ Melala lua deole mulinai Kalilea laloanai Kana vanuanai kamoane naduna ka epulu. Iesu sinana 'eva ua'i,

² Iesu mai ibanona kauta ita vaka deveauta deda'a kamoane naduna kanaua'i.

³ Nadu laloanai vine veina bounai deinu palua koanai Iesu sinana eta'u Iesu e'ouia ediaka, "Ia eta vine veina 'ani eole."

⁴ Iesu ediaka, "Sina'u e, dava 'ounai eta bavunu davana lau oveni'u? Lau e'u melala asido'o edaia."

⁵ Ia sinana da'alaabi kauta e'outa ediaka, "Ia be'oumui davata boutai oi bovavai."

⁶ Ua'i bika'a voduta namata kalakoi delava, Iuda kauta eta koakoa daitai vodu kataua'i vei be'adoisi imata mai aeta bedeiini, vodu namata ka ka laloatai itani vodu kikitā luanavui 'o koinavui boita vakaia belai vonu.

⁷ Iesu da'alaabi kauta e'outa ediaka, "Vodu vei ai olai vonuta." Inoku delai vonuta eda'amo bibi'atai.

⁸ Inoku ia e'outa ediaka, "Vali'u vei vitalua o'adoisi, oabi oda'a nadu ikakaona kauna ovenia." Inoku vitalua de'ado deda'a ia devenia.

⁹ Nadu eikaiakao kauna vine veinai eao veina kanaua einuia kovo, ia sia eikabasi a'i easi, da'alaabi kauta vei de'ado kauta sibota mo deikabasi. Inoku nadu eikaiakao kauna kamoane makamaka kauna e'aeia tau,

¹⁰ e'ouia ediaka, "Kau boutai 'eva vine veina nama'ina devenita makava, inoku da'a'au kauta deinu ba mulinai vine veina veaveana devenita, beia oni 'eva vine veina nama'ina ovamaua easimo vali'u oveveni."

¹¹ Iesu vatabulovo koana lava'ana'ina kanania evavaia Kalilea laloanai Kana vanuanai. Ena nuavi evala'asia inoku ibanona kauta ia deabivenia.

¹² Nadu kanaua mulinai Iesu, ia sinana, kadina mai ibanona kauta ita deda'a Kapelanauma, boni vida mo ua'i demia.

Iesu Tavatava Kauta Lo'e Kabukabunai Elo'ota Asi.
(Mt 21.12, 13; Mk 11.15-17; Lk 19.45, 46)

¹³ Iuda kauta eta La'au keini naduna melalana ekevai 'ounai Iesu ele'au eda'a Ieluselema.

¹⁴ Lo'e kabukabuna laloanai 'eva bolomakau, mamoe mai boiomalo detavatava vaita kauta mai moni deabivai'ade kauta eta vakai demia eikata.

¹⁵ Kanaua 'ounai 'onau ai 'odi'odi davana ka evavaia, inoku lo'e kabukabuna laloanai kau boutai maibolomakauta mai maimamoeta ita elo'ota asi, moni deabivai'ade kauta eta moni epovuta siusiu inoku eta vaka evaakuta keini.

¹⁶ Boiomalo detavatava vaita kauta kataua e'outa ediaka, "Dava katania 'abu kanania'i oabita tau. Kama'u ena luma 'eva sia emui tavatava 'abunai oi bovaaoa!"

¹⁷ Inoku ibanona kauta Puka kabukabunai 'ani ilelena luvana delaloia une, "Oni emu luma ilalo'au venina 'eva 'alova boina lau nua'uai e'ani."

¹⁸ Inoku Iuda kauta namata deta'u Iesu delavuaia dediaka, "Vatabulovo koana davana lai bovaikamai 'eva lai bavamomo'aimu oni maiemu siavu dava katania boutai ovavai?"

¹⁹ Iesu eta luva evamuea ediaka, "Lo'e kabukabuna kanania oi bosiu, lau melala koi laloanai bavalavala 'udai."

²⁰ Iuda kauta namata deluva dediaka, "Lo'e kabukabuna kanania 'eva vikau vaninavui kalakoi (46) devavaia, beia oni melala koi laloanai bavalavala 'udai okoma, una?"

²¹ Beia Iesu lo'e kabukabuna lovana eakuia davana 'eva ia kauanina.

²² Iesu bai eko'isi 'udai mulinai, ia ibanona kauta ena luva eluvaia luvana delaloia une. Inoku Puka kabukabuna mai Iesu eluva luvata devamomo'aita.

Iesu Kau Eta Lalovai Eikabasita.

²³ Iesu La'au keini nadunai Ieluselemai emia laloanai, kau doutamo ia deikaia vatabulovo koata evavai inoku ia devamomo'aita.

²⁴ Beia Iesu sibona 'eva kau sia evamomo'aita 'olana ia kau boutai eikabasita.

²⁵ Ia sibona 'eva kau nuatai demimia davata 'ani eikabasita dainai, sia kau ka betata'u ia kevanai kau valita beakava.

3

Iesu Nikodemo Ita Deluvaluva.

¹ Palisea kauna ka vana Nikodemo, ia 'eva Iuda kauta eta kau namana ka.

² Boni ka ia eda'a Iesu kevana inoku e'ouia ediaka, "Vaikabasi kaumu e, lai aikabasi oni 'eva Dilava kevanai oasi. Olana sia kau ka 'eva vatabulovo koata oni ovapai katana bemavavaita diba bema Dilava eva sia ia ita."

³ Iesu ia ena luva evamuea ediaka, "Lau oni luva umauna a'oumu, kau ka sia bepulu 'udai koanai ia 'eva Dilava ena lovia vanuana sia beikala kovo."

⁴ Nikodemo elavuai ediaka, "Kau 'ani namana koanai ia aboina bepulu 'udai koma? Momo'ai dokadoka melala ivaluana ia sinana bo'ana'i sia bedodo 'udai mune'e sia bepupulu."

⁵ Iesu ia ena luva evamuea ediaka, "Lau oni luva umauna a'oumu, kau 'eva veiai mai Idume Kabukabunai sia bepulu 'udai koanai ia 'eva Dilava ena lovia vanuanai sia bedodo kovo."

⁶ Kauani etata'u kauani evapulua, beia Idume Kabukabuna etata'u idume evapulua.

⁷ Bopulu 'udai luvana aluvala 'eva sia botabulovo vaia.

⁸ Lani e'unu 'eva eula venia 'abuna eda'ala, ia oni 'eva 'uluna mo o'ika, beia a'i e'asi 'o a eda'ala 'eva sia oikabasi. Idume Kabukabunai depulu kauta boutai vaka kataua boita."

⁹ Nikodemo ia elavuai 'udai ediaka, "Dava katania aboina bepupulu?"

¹⁰ Iesu ia e'ouia ediaka, "Oni 'eva Isalaela ena vaikabasi kauna namana ka, ia dava 'ounai dava katania sia oikabasita?"

¹¹ Lau oni luva umauna a'oumu, lai aikabasi davatai lai aluva vaita, inoku lai aika davatai lai a'oulai, beia emai luva lai aluva vaita davata oi sia ka oi oabita dae.

¹² Lau atata'u kanobata davatai aluva venimui ia sia oi ovamomo'aita, bema vutuvutu davatai ba'oumui 'eva aboina oi bovamomo'aita?"

¹³ Lau Kau Nakuna sibo'u mo vutuvutuai a'ovu asi beia sia kau ka vutuvutuai ele'au kovo.

¹⁴ Kano'akunai Mose kau'asi va'ava'ana eisia 'au vitaitanai lau Kau Nakuna vaka beisi'u 'au.

¹⁵ Inoku deabiveni'u kauta boutai 'eva mauli keinikeini beabia.

¹⁶ "Olana Dilava kanobata elalo'au venia vaika 'ounai Nakuna ka'onamo mo eveni, beabivenia kauta boutai 'eva sia bebaba, beia mauli keinikeini beabia.

¹⁷ Dilava nakuna esinia kanobatai 'eva sia kanobata mekau bevenia, beia ia enai kanobata bevamaulua.

¹⁸ Ia deabivenia kauta boutai 'eva mekau sia bevuala, beia sia deabivenia kauta boutai 'eva 'ani mekau devuaia, 'olana Dilava Nakuna ka'onamo mo vanai sia deabivenia 'ounai.

¹⁹ Valuva 'eva kanania boina. 'Ailala 'ani easi kanobata laloanai, inoku kau vabuto'o ulana de'ula beia 'ailala sia deula venia, 'olana eta koakoa 'eva desi'avana.

²⁰ Si'avana devavai kauta boutai 'ailala devaiviivia inoku sia de'asi 'ailala laloanai 'olana ia eta koakoa si'avata vaika asi'i demavala'asita une makauna.

²¹ Beia momo'ai vinaulatai demauli kauta 'eva de'asi 'ailala laloanai, 'olana Dilava lelana daitai dedadai 'eva eta koakoi bevala'asi kau be'ika."

Ioane Iesu Valina Ekava.

²² Kanania mulinai, Iesu ibanona kauta ita dela'asi deda'a Iudea kanona, ua'i ia ita kena demia inoku kau evaidi'uta kabukabu.

²³ Vaidi'u kabukabu kauna Ioane vaka Salima avekenai Aenonai evaidi'u kabukabu, 'olana ua'i 'eva vei namana inoku kau dedada'a 'eva evaidi'uta kabukabu.

²⁴ Kanaua 'eva Ioane vabuto'o lumanai asido'o de'alavua koanai.

²⁵ Inoku Ioane ibanona kauta vaida 'eva Iuda kauna ka ita eta koakoa Dilava vailanai bevamakamakata 'udai idi'una deviala vaia.

²⁶ Kanaua 'ounai ia deasi Ioane kevanai inoku de'ouia dediaka, "Vaikabasi kaumu e, Iolidana nutuna avekenai kau kanaua ita oi omia, valina okava kauna 'eva vali'u ia kau evaidi'uta kabukabu, inoku kau boutai 'eva ia kevana deda'ala."

²⁷ Ioane eta luva evamuea ediaka, "Kau 'eva Dilava beveveni davana mo bedavalia.

²⁸ Oi sibomui vaka 'ani oi ovamomo'ai'u 'eva lau adiaka, 'lau 'eva sia Keliso, beia lau 'eva esini'u 'ana'i vakaia ia.'

²⁹ Kamoane makamaka ateatena kanaua 'eva ia eadavala kauna ena, inoku kamoane makamaka kauna ena kau ia kevanai elalava 'eva lelana e'ika koanai elalonama si'asi'a. Lalonamana kanania 'eva lau e'u, inoku vali'u nua'u lalonama 'ani evonu.

³⁰ Ia 'eva namana be'ao, beia lau 'eva kiki'u ba'ao."

³¹ "Akai easi kauna 'eva kau boutai akatai, kanobatai epulu kauna 'eva kanobata ena, inoku kanobata davata mo eluva vaita. Vutuvutuai easi kauna 'eva kau boutai akatai.

³² Ia eika mai e'ika davata valita ekakava, beia sia kau ka ia ena luva eabita dae.

³³ Beia ena luva eabi dae kauna 'eva evamomo'aia Dilava 'eva momo'ai Dilavana.

³⁴ Dilava esinia kauna 'eva Dilava ena luva eluvavai, 'olana Dilava etata'u Idume Kabukabuna ia nuanai evavonua.

³⁵ Kamana eta'u nakuna elalo'au venia inoku dava boutai ia imanai 'ani eudata.

³⁶ Nakuna evamomo'aia kauna 'eva mauli keinikeini 'ani eabia, beia nakuna lelana daitai sia edadai kauna 'eva mauli sia beikala kovo, inoku Dilava ena badu ia akanai bemimia."

4

Iesu Samalia Ateatena Ita Deluvalua.

¹ Palisea kauta vali deika 'eva Iesu kau doutamo eabita debanoia mai evaidi'uta kabukabu beia vaidi'u kabukabu kauna Ioane 'eva sia dounamo eabita.

² Beia umauna 'eva Iesu sibona sia evaidi'u kabukabu, ia ibanona kauta mo devaidi'u kabukabu.

³ Iesu eikabasi Palisea kauta 'eva vali kanania 'ani deika koanai ia Iudea evikania, emue mune'e beda'a Kalilea.

⁴ Vali'u ia 'eva Samalia kanonai 'ani beda'a keini bedada'a.

⁵ Ia easi Samalia vanuana ka vana Sukala ai ela'asi, vanua kanaua 'eva Iakobo eta'u nakuna Iosepa eva'oula venia kanona kevanai.

⁶ Iakobo ena vei 'ulina 'eva ua'i, inoku Iesu vei 'ulina 'aba'abanai emia divo 'olana 'ani ebavunu vaika dala laka'ina ida'anai. Melala 'eva 'ani eado'alavuni.

⁷ Samalia ateatena ka vei 'ado easi inoku Iesu ia enoia ediaka, "Vei vitalua veni'u bainu."

⁸ Ia ibanona kauta 'eva deda'a vanuai iani betatava.

⁹ Samalia ateatena ia ena luva evamuea ediaka, “Oni 'eva Juda kaumu ia lau 'eva Samalia ateate'u, inoku dava 'ounai keva'uai vei onoinoi?” (“Olana Juda kauta 'eva Samalia kauta ita sia devaka'onamo.)

¹⁰ Iesu enu'ovi ia e'ouia ediaka, “Bema Dilava ena ainama bomaikabasia mai dai kevamuai vei enoinoi kauna bomaikabasia koanai, ia bomanoia inoku ia mauli veina bemavenimu.”

¹¹ Ateate ediaka, “Kau namamu e, sia mai emu vei 'ado davana ka maivaka vei 'ulina kanania 'eva e'ovu vaika. Mauli veina kanaua 'eva a'i boabia?”

¹² Lai 'ava'avamai Iakobo 'eva vei 'ulina kanania evenimai, ia sibona einuia, nakuna deiniuia, ena mamoe mai bolomakau vaka deiniuia, inoku oni Iakobo okeinia, una?”

¹³ Iesu ena luva evamuea ediaka, “Vei kanania deiniuia kauta boutai 'eva vei bata beba 'udai.

¹⁴ Beia lau haveveni veina beinua kauna 'eva vei bana sia beba kovo. Momo'ai dokadoka, lau haveveni veina 'eva ia nuanai mauli veinai be'ao bebubudi be'itabu'itabu mauli keinikeini bevenia.”

¹⁵ Ateate Iesu e'ouia ediaka, “Kau namamu e, vei kanaua veni'u, inoku vei ba'u sia baba 'udai maivaka sia ba'asi nia'i vei ba'ado 'udai.”

¹⁶ Iesu ia e'ouia ediaka, “Da'a adamu 'aea inoku laluaana oi bo'asi.”

¹⁷ Ateate ediaka, “Lau sia mai ada'u.” Iesu ia e'ouia ediaka, “Oni sia mai adamu okoma 'eva okomolo.

¹⁸ Olana oni adamu boutai ima, inoku vali'u kevamuai emimia kauna 'eva sia oni adamu umauna. Vali'unai oluvala luvana 'eva luva umauna.”

¹⁹ Ateate ediaka, “Kau namamu e, vali'u nua'u 'ani e'aillala, oni 'eva enolea kaumu.

²⁰ Lai 'ava'avamai 'eva lolo kanania akanai Dilava dekukudivo venia, beia oi Juda kaumui oi odiaka kukudivo 'abuna 'eva ka'onamo Ielusalemi mo.”

²¹ Iesu ediaka, “Ateate e, e'u luva abia dae, bonina e'asi koanai sia lolo kanania akanai 'o sia Ielusalemi Kamata oi bokukudivo venia.

²² Oi Samalia kaumui sia oi oikabasia kauna oi okukudivo venia, lai Juda kaumai lai aikabasia kauna lai akukudivo venia, 'olana Dilava ena vamauli dalana 'eva Juda kauta kevatai e'asi.

²³ Beia melalana e'asi inoku vali'u 'ani ela'asi, bekukudivo venia dokadoka kauta 'eva idumeai mai luva umaunai Kamata bekukudivo venia. 'Olana Kamata 'eva kanaua boinai dekukudivo venia kauta ekavuta.

²⁴ Dilava 'eva Idume, kanaua 'ounai dekukudivo venia kauta 'eva idumeai mai luva umaunai bekukudivo venia.”

²⁵ Ateate ediaka, “Lau aikabasi Mesia, vamauli kauna vana Keliso be'asi, ia be'asi koanai dava boutai be'oulai kave'i kevamaiai.”

²⁶ Inoku Iesu ia e'ouia ediaka, “Kauna 'eva lau kau'u kanania vali'u aluva venimu.”

²⁷ Melala kanaua'i ia ibanona kauta demue deasi 'eva detabulovo si'asi'a, 'olana Iesu ateate ka ita deluvaluva deikaia. Beia sia kau ka elavuaia, “O'ula dava?” 'o “Ia ita dava 'ounai oi oluvaluva?”

²⁸ Inoku ateate ena vodu evikania, emue eda'a vanuai kau e'outa ediaka,

²⁹ “Omiai kada'a kau ka oikaia, 'ana'inai avavai koakoata kataua boutai eluva vaita, ama'i Keliso kanaua?”

³⁰ Inoku kau vanuai dela'asi Iesu kokona deda'a.

³¹ Kanaua laloanai ibanona kauta Iesu denoia dediaka, “Vaikabasi kaumu e, iani kena ania.”

³² Beia ia e'outa ediaka, “Lau mai e'u iani bania davana 'eva sia oi oikabasia.”

³³ Inoku ibanona kauta sibota viloatai devilavuui vai'ade dediaka, “Ama'i kau ka 'ani iani kena eabi easi evenia.”

³⁴ Iesu e'outa ediaka, "E'u iani 'eva esini'u kauna ena ula bavavaia maivaka ia eveni'u vinaulana bavaolea.

³⁵ Oi odiaka, 'Vuia vani mo demimia inoku iukuta bonina bedaia.' Beia lau a'oumui, Makamui ovaaku isi loba oikata kave'i, iani 'ani demaku'a beukuta.

³⁶ Ukuuku kauna tavana eabia inoku loba ianina edouabou maui keinikeini 'abunai, kanaua 'ounai ivadona kauna mai iukuna kauna 'eva belalonama ka'ona.

³⁷ Deluvaia luvana 'eva luva umauna, 'Vadovado kauna edeana ia eukuku kauna 'eva edeana.'

³⁸ Lau asinimui sia oi obavunu vaia lobanai iani oi bo'uku. Vaida loba kanaua bavununa 'ani devavaia inoku oi otata'u eta bavunu ianina oi oabia."

³⁹ Vanua kanaua laloanai Samalia kauta doutamo Iesu deabivenia 'olana ateate ena vali kava luvana 'ounai, ateate ediaka, "Ia eta'u avavai koakoata boutai eluva vaita."

⁴⁰ Kanaua 'ounai Samalia kauta deasi kevana koanai, ia denoia ia ita bemimia, inoku Iesu boni lua ua'i emia.

⁴¹ Iesu ena luva 'uluta deika laloanai kau doutamo vaka deabivenia.

⁴² Kau kataua ateate de'ouia dediaka, "Vali'u ia lai abivenia 'eva sia oni oluva luvana 'ounai, beia vali'u lai sibomai kaiamai ai lai a'ika, maivaka lai aikabasi kau kanania 'eva momo'ai dokadoka kanobata ivamaulina kauna."

Iesu Lovia Kauna Ka Nakuna Evanama'inala.

⁴³ Boni ivaluana eole mulinai Iesu eko'isi eda'a Kalilea.

⁴⁴ Iesu sibona eluva ediaka, "Enolea kauna ena vanua umauna kauta 'eva 'olana sia be'aku."

⁴⁵ Iesu Kalileai ela'asi koanai, Kalilea kauta ia deabia dae, 'olana Ielusalemai La'au keini naduna laloanai ia vaka deda'a ua'i inoku ia evavai davata boutai 'eva makatai deika 'ounai.

⁴⁶ Iesu mune'e emue eda'a Kalileai Kana vanuanai, ua'i vei evakeinia vine veinai eao. Ua'i Kapelanauma laloanai lovia 'olana kauna ka nakuna moluanena e'olele.

⁴⁷ Kau kanaua Iesu Iudeai easi Kalileai luvana eika koanai, ia eda'a Iesu kevana enoia beda'a nakuna bevanama'inala 'olana ia 'ani bebaba.

⁴⁸ Iesu ia e'ouia ediaka, "Oi koa mai vatabulovo koata sia oi bo'ika koanai sia oi boabiveni kovo."

⁴⁹ Lovia kauna ediaka, "Kau namana e, mai kada'a ke naku'u 'eva 'ani bebaba."

⁵⁰ Iesu ia e'ouia ediaka, "Da'a, nakumu 'eva 'ani bemaui." Lovia kauna Iesu ena luva evamomo'aia inoku eda'a.

⁵¹ Ia dala kanaua eda'aia laloanai ena da'alaabi kauta deasi dalai devadavali, nakuna emauli luvana de'ouia.

⁵² Ia elavuaita melala koana vida nakuna enama'ina, inoku ia dediaka, "Lavi ado'alavuni melala koana ka'onamo 'eva kauna 'oleleta deole."

⁵³ Kamana elaloune melala koana kanaua'i 'eva Iesu ia e'ouia ediaka, "Nakumu 'eva 'ani bemaui." Kanaua 'ounai ia mai ena luma kauta boutai Iesu deabivenia.

⁵⁴ Iesu Iuda evikania mulinai easi Kalileia laloanai 'eva vatabulovo koana ivaluana kanania evavaia.

5

Betesaida 'Ovuna 'Aba'abanai Iesu Kau Ka Evanama'inala.

¹ Boni vaida deole mulinai, Iuda kauta eta nadu dainai Iesu ele'au eda'a Ielusalema.

² Ua'i Ielusalemai nutuala ka vana 'Mamoe nutualana' kevanai 'ovu kikina ka 'Ebelu leletai vana de'aeia 'Betesaida', inoku kevanai 'eva laani aioleta ima delavaia kaiukaiu.

³ 'Abu kataua'i 'olele kauta doutamo deno, maka 'ede kauta, 'ome kauta, bade kauta, (devi'ima vei be'ilo'iloa.

⁴ 'Olana melala ka ka anelu e'ovu veina e'ilo'iloa, mulinai 'olele kauna ka 'ovuai be'ovu makava kauna 'eva ena 'olele dava beia benama'ina.)

⁵ 'Abu kanaua'i kau ka vikauna boutai koi navui kalavani (38) e'olele eno.

⁶ Iesu 'olele kauna kanaua'i eno eikaia koanai eikabasi ia 'eva siako mo kanaua boina eno, inoku Iesu ia elavuaia ediaka, "Oni o'ula bonama'ina, una?"

⁷ 'Olele kauna Iesu ena luva evamuea ediaka, "Kau namana e, vei e'ilo'iloa koanai lau sia mai idulu'u kauna ka 'ounai lau akovokovo ba'ovu laloanai kau ka 'ani e'ana'ia vaila'uai."

⁸ Inoku Iesu ia e'ouia ediaka, "Ko'isi, emu 'eta lo'ua abia da'a."

⁹ Komolonai kau kanaua enama'ina, inoku eko'isi ena 'eta elo'uia eabia eda'a.

Ua 'eva melala kabukabunai koa kanania epulu.

¹⁰ Kanaua 'ounai Iuda kauta namata kau kanaua 'oleleai enama'ina kauna de'ouia dediaka, "Vali'u 'eva melala kabukabuna, ia oni emu 'eta ovuala 'eva eta talavatu oukua."

¹¹ Beia ia eta luva evamuea ediaka, "Evanama'ina'u kauna e'ou'u ediaka, 'Emu 'eta abiaisi da'a.'"

¹² Inoku ia delavuaia dediaka, "Kau davana oni e'oumu, 'Emu 'eta abiaisi da'a.?' "

¹³ Enama'ina kauna sia eikabasi ia dai evanama'inala 'olana Iesu ua'i do'u laloanai eneke dodo eda'a ovo.

¹⁴ Muliai Iesu kau kanaua lo'e kabukabuna laloanai edavalia inoku e'ouia ediaka, "Lele'u ika, oni 'eva 'ani onama'ina, si'avana sia bovavai 'udai, dava si'avana vaika ka kevamuai asi'i emapulu 'udai makauna."

¹⁵ Inoku kau kanaua eda'a Iuda kauta namata kevatai e'outa ia evanama'inala kauna 'eva Iesu.

Dilava Nakuna Ena Siavu.

¹⁶ Kanaua 'ounai Iuda kauta namata 'eva Iesu devaiviivia 'olana ia melala kabukabunai dava katania evavai 'ounai.

¹⁷ Iesu e'outa ediaka, "Lau Kama'u 'eva melala bounai evinaula easimo vali'u melala kanania. Lau vaka avinaula."

¹⁸ Luva kanania 'ounai Iuda kauta namata 'eva deula Iesu beaku bala. Sia melala kabukabuna mo talavatuna eukuia 'ounai, beia ia Dilava e'aeia ia kamana umauna maivaka ia sibona Dilava ita evavitaitata.

¹⁹ Kanaua 'ounai Iesu eta luva kanania evamuea koma, "Lau oi luva umauna a'oumui. Nakuna 'eva sia dava ka sibona bevavaia bedaia. Ia 'eva Kamana evavai vinaulata kataua mo e'ika evavaita. Kamana dava evavai 'eva Nakuna vaka evavai.

²⁰ 'Olana Kamana 'eva Nakuna elalo'au venia 'ounai evavai davata boutai evaikala. 'O, sia katania mo, dava namata vaida vaka bevaikala, inoku oi bo'ika 'eva oi botabulovo si'asi'a.

²¹ Kamana etata'u ba kauta evako'isita 'udai inoku mauli evenita vitaitanai mo Nakuna etata'u eula venita kauta mauli evenita.

²² Mune'e Kamana sibona sia kau ka evaluvala, beia valuva siavuna itoinai 'ani Nakuna evenia,

23 kanaua'i Kamana 'olana de'aku vitaitanai kau boutai Nakuna 'olana be'aku, Nakuna 'olana sia e'aku kauna 'eva Kamana kanaua Nakuna esinia kauna vaka 'olana sia e'aku.

24 "Lau oi luvu umauna a'oumui, e'u luvu e'ika mai esini'u Dilavana eabivenia kauna 'eva mauli keinikeini 'ani eabia inoku mekau sia bevuala. Ia 'eva ba ai 'ani ekeini inoku 'ani mauli laloanai edodo.

25 "Lau oi luvu umauna a'oumui, bonina 'eva 'ani e'asi, inoku vali'u bonina 'ani ele'au, ba kauta 'eva Dilava Nakuna lelena be'ika, inoku lele ika kauta kataua 'eva bemaui.

26 Kamana sibona 'eva mauli 'olana, vitaitanai ia eta'u Nakuna mauli 'olanai evaaoa.

27 Maivaka Dilava eta'u Nakuna valuva siavuna 'ani evenia 'olana ia 'eva Kau Nakuna 'ounai.

28 E'u luvu kanania 'ounai sia oi botabulovo. Melalana 'ani e'asi, mitavai ba kauta kataua boutai Nakuna lelena be'ika,

29 inoku mitavatai bela'asi. Nama'ina devavai kauta kataua 'eva beko'isi mauli keinikeini beabia, inoku si'avana devavai kauta kataua 'eva beko'isi mekau bevuala.

30 "Lau sibo'u e'uai sia dava ka bavavaia. Lau a'ika luvana vitaitanai mo valuva vinalata avavai, kanaua 'ounai e'u valuva 'eva ekomolo, 'olana lau sibo'u e'u nama'ina sia akavua, beia esini'u kauna ena ula akavua.

Iesu Valina Dekava Kauta Vaida.

31 "Lau sibo'u vali'u bakakava koanai, e'u vali kava 'eva sia bevamomo'aia.

32 Lau 'ou'uai vali'u ekakava kauna 'eva edeana, inoku lau aikabasia ia eluvala luvana 'eva momo'ai.

33 "Oi 'ani ovisini Ioane kevana inoku ia eta'u luvu umauna luvana eluvavaia.

34 Lau vali'u ikavana 'eva sia kau kevatai e'asi, beia lau Ioane ena vali kava luvana aluvala kanaua'i oi vamauli oi bodavalia.

35 Ioane 'eva lamepa boina e'ani 'ailala eveni, ia oi 'eva melala kava'ina mo ena 'ailala oi olalonama vaia.

36 "Lau dai'uai vali'u ikavana kanaua 'eva Ioane ekeinina. Kama'u vinala eveni'u bavaoleta vinalata avavaita katania detata'u Kama'u esini'u valina deakava.

37 Inoku Kama'u esini'u kauna ia sibona eta'u lau vali'u ekava. Asido'o melala kai ia lelena oi oika kovo maivaka asido'o ia vailana oi oikaia,

38 'o ena luvu vaka nuamuiai sia emia, 'olana ia esinia kauna sia oi oabivenia 'ounai.

39 "Puka kabukabunai oi okavua kave'i 'olana oi olalovaia luvu kataua laloatai mauli keinikeini oi bodavalia. Puka kabukabuna kanania 'eva lau mo vali'u ekakava,

40 beia sia oi o'ula oibo'asi keva'uai mauli oiboabia.

41 "Lau 'eva kau etai vanama'ina luvata sia abitadae,

42 beia lau 'eva oi aikabasimui kave'i, oi nuamuiai Dilava ilalo'au venina sia emimia.

43 Lau 'ani Kama'u vanai asi, beia lau sia oi oabi'udae. Beia bema kau ka sibona vanai be'asi koanai 'ani oi boabiadae.

44 Oi ka ka sibomui vilouamuiai ivanama'inamui luvata oi okakavu, beia Dilava mo sibona kevana vanama'ina e'asi kanaua 'eva sia oi okavua, kanaua boina koanai a oi oabiveni'u koma?

45 "Beia nuamuiai sia oi bolalovaia lau Kama'u vailanai va'evai bane'emui divo. Asi'i, oi va'evai bene'emui divo kauna 'eva Mose, ia enai emui nuabata oi o'uleta.

⁴⁶ Bema oi Mose oabivenia dokadoka koanai lau vaka oi boabiveni'u, 'olana ia 'eva lau vali'u eleleia.

⁴⁷ Beia ia eleleia davana bema sia oi boabivenia koanai lau e'u luva aboina oi boabivenia?"

6

Iesu Kau Sinavu Boutai Imanavui

(5,000) Evananita.

(Mt 14.13-21; Mk 6.30-44; Lk 9.10-17)

¹ Boni vaida deole mulinai Iesu ekeini eda'a Kalilea 'ovu avekenai. ('Ovu kanaua vana ka 'eva Tibelia 'ovuna),

² inoku kau mato namavaikana Iesu mulinai develi deda'a 'olana ia 'olele kauta evanama'inata vatabulovota koata kataua deika 'ounai.

³ Inoku Iesu loloai ele'au eda'a inoku ibanona kauta ita demiadivo.

⁴ Iuda kauta eta La'au keini naduna 'eva 'ani ekevai.

⁵ Iesu ekailao kau mato namavaikana deasi venia eikata koanai, Ia Pilipo elavuuaia ediaka, "Iani a'i eka tava kau katania ekavananita?"

⁶ Ia siako eikabasi dava bevavaia, beia Pilipo bevakova 'ounai kanaua elavuuaia koma.

⁷ Pilipo ia ena luva evamuea ediaka, "Moni doutamo vaika iani kamatava beia sia bedaia, iani kava'ita mo 'ani beani."

⁸ Ibanona kauta ka vana Andelea, Simona Petelo kadina eko'isi ediaka,

⁹ "Melo kikina ka nia'i 'eva mai ena palaoa kikita ima mai sisi kikita lua. Beia kataua 'eva a eka komata 'olana kau 'eva doutamo vaika?"

¹⁰ Iesu ibanona kauta e'outa ediaka, "Kau ovamiata divo." Ua 'eva teleai, inoku kau boutai demiadivo, momoluane 'avaeana boutai 'eva sinavu boutai imanavui (5,000).

¹¹ Iesu palaoa eabita, Dilava evanama'inala, inoku demiadivo kauta kataua eta ula vitaitanai evenita, inoku sisi vaka kanaua boina evavaia.

¹² Boutai deani vunuu koanai Iesu ibanona kauta e'outa ediaka, "Iani kalita boutai oi bodoubou, sia kikina ka oi bovikania."

¹³ Kanaua 'ounai palaoa imai deani vunuu kalita kataua dedoubouta aleka 'ouka lua devavonuta.

¹⁴ Iesu vatabulovo koana kanaua evavaia kau deikaia mulinai deluva dediaka, "Momo'ai dokadoka, enolea kauna be'asi kanobatai kauna 'eva kanania."

¹⁵ Iesu eikabasi ia eta ulai be'asi beabia kao eta lovia 'olana kaunai bevaaoo, kanaua 'ounai ia sibona mune'e eda'a ovo eda'a loloai ele'au.

Iesu Vei Akanai Eda'a.

(Mt 14.22-33; Mk 6.45-52)

¹⁶ Elavilavi koanai ibanona kauta de'ovu deda'a 'ovuai,

¹⁷ asiai dele'au deveau keini Kapelanauma deda'aia 'eva 'ani evabulala divo, Iesu 'eva sia ia vilootai.

¹⁸ Lani namavaikana eunu 'eva 'ovu evaka'udaia.

¹⁹ Ia maela koi 'o vani boita debala ilulao koanai Iesu vei akanai eda'a, asi kokona easia, deikaia 'eva demakau si'asi'a.

²⁰ Beia Iesu e'outa ediaka, "Nia 'eva lau. Sia oi bomakau."

²¹ Inoku ia mailalonamata ita asiai devaelea'au, komolonaimo deula venia 'abuna nabuanai devada'au.

Kau Iesu Dekavuaia.

²² Iesu kau mato ua'i 'ovu avekenai demia kauta deikabasi asi ka'onamo mo ua'i, inoku Iesu 'eva ibanona kauta ita sia ele'au, ibanona kauta sibota mo deveauasi deda'a.

²³ Inoku asi vaida Tibeliai deasi deda'a Lovia namana palaoa evanama'inala kau evenita deani 'abuna kevanai dela'asi.

²⁴ Kau mato deikabasi Iesu mai ibanona kauta ita ua'i vailata asi'i, inoku asi kataua'i dele'au deda'a Kapelanauma Iesu deka'vuia.

Iesu 'Eva Mauli Bokamana.

²⁵ Ia 'ovu avekenai ua'i Iesu dedavalia koanai delavuaia dediaka, "Vaikabasi kaumu e, oni aida mo okeini oasi nia'i?"

²⁶ Iesu eta luva evamuea ediaka, "Lau oi luva umauna a'oumui, oi lau okavu'u 'olana 'eva sia vatabulovo koata oi oikata 'ounai beia palaoa oi oani bo'amui dekubu 'ounai.

²⁷ Iani besi'avana davana kanaua dainai sia oi bovinaula beia iani be-mimia beda'a mauli keinikeini dainai oi bovinaula, Lau Kau Nakuna 'eva iani kanania bavenimui. Kama'u Dilava ena siavu koana aka'uai 'ani e'uleia."

²⁸ Inoku ia delavuaia dediaka, "Lai dava bavavaia 'eva Dilava eulavai vinavulata lai bavavaita?"

²⁹ Iesu eta luva evamuea ediaka, "Dilava ena vinaula 'eva kanania. Esinia kauna mo oi boabivenia."

³⁰ Kanaua 'ounai ia delavuaia dediaka, "Vatabulovo koana davana bo-vavaia lai baikala inoku lai babivenimu? Davana bovavaia?"

³¹ Ita 'ava'avata kano'akunai mana deania, Puka kabukabunai ilelena vitaitana, 'Vutuvutuai easi manana Mose evenita deania.' "

³² Iesu e'outa ediaka, "Lau oi luva umauna a'oumui, sia Mose vutuvutu bokamana oi evenimui, beia lau Kama'u eta'u vutuvutu bokamana umauna oi evenimui.

³³ 'Olana Dilava ena bokama 'eva vutuvutuai e'ovu easi kauna inoku kanobatai mauli eveveni."

³⁴ Ia de'ouia dediaka, "Lovia namana e, bokama kanania 'eva melala boutai bovenimai."

³⁵ Inoku Iesu ia e'outa ediaka, "Lau 'eva mauli bokamana, beasi veni'u kauna 'eva sia bevikolo kovo, maivaka beabiveni'u kauna 'eva sia beveiba kovo.

³⁶ Beia lau 'ani oi a'oumui, 'ani oi oika'u inoku sia oi oabiveni'u.

³⁷ Kama'u eveni'u kauta boutai 'eva be'asi keva'u, inoku easi veni'u kauna 'eva lau sia 'ani balo'oa kovo.

³⁸ 'Olana lau vutuvutuai a'ovu asi 'eva sia sibo'u e'u ula bavavaia, beia esini'u kauna ena ula vinaulana bavavaia.

³⁹ Inoku esini'u Dilavana ena ula 'eva kanania, eveni'u kauta kataua boutai 'eva sia ka bavataulea, beia melala to'onai bavako'isita 'udai.

⁴⁰ 'Olana lau Kama'u ena ula 'eva kanania, Nakuna beikala mai beabivenia kauta boutai 'eva mauli keinikeini beabia, inoku melala to'onai 'eva bavako'isita 'udai."

⁴¹ Luva kanania 'ounai Iuda kauta Iesu denunu vaia, 'olana ia ediaka, "Lau 'eva vutuvutuai e'ovu easi bokamana."

⁴² Inoku ia dediaka, "Nia 'eva Iesu, Iosepa nakuna, ia kamana mai sinana kaikabasita. Vali'u ia aboina ediaka, 'Lau vutuvutuai a'ovu asi.'?"

⁴³ Iesu eta luva evamuea ediaka, "Sibomui vilomui ai nunuvai nunuvai kanana ovapuala.

⁴⁴ Sia kau ka 'ani beasi keva'u beia Kama'u esini'u kauna betata'u bevuala be'asi keva'u, inoku melala to'onai bavako'isia 'udai.

⁴⁵ Enolea kauta Puka kabukabunai 'ani deleleia, 'Dilava ia boutai 'ani bevaikabasita.' Kama'u lenea de'ika maivaka kevanai ikabasi deabia kauta boutai 'eva be'asi keva'u.

46 Sia kau ka Kamata eikaia kovo, beia Dilava kevanai easi kauna mo sibona Kamata eikaia.

47 Lau oi luva umauna a'oumui. Deabiveni'u kauta 'eva 'ani mauli keinikeini deabia.

48 Lau 'eva mauli bokamana.

49 Oi 'ava'avamui kano'akunai mana deania, beia deba.

50 Beia vutuvutuai e'ovu easi bokamana kanania, beania kauna 'eva sia bebaba.

51 Lau 'eva mauli bokamana, vutuvutuai a'ovu asi. Bema kau ka bokama kanania beania 'eva bemauli keinikeini. Bokama kanania 'eva lau vidio'u, kanobata kauta mauli beabia dainai haveveni."

52 Inoku Iuda kauta sibota viloatai deadedua dediaka, "Kau kanania aboina vidiona bevenita eka ania?"

53 Iesu e'outa ediaka, "Lau oi luva umauna a'oumui. Lau Kau Nakuna vidio'u sia oi boania mai lala'u sia oi boinua koanai oi nuamuiai mauli sia bemimia.

54 Lau vidio'u eania mai lala'u einua kauna 'eva mauli keinikeini 'ani eabia inoku melala to'onai 'eva bavako'isia 'udai.

55 'Olana lau vidio'u 'eva iani umauna maivaka lala'u 'eva inuina veina umauna.

56 Lau vidio'u eania mai lala'u einua kauna 'eva lau nua'uai emimia maivaka lau ia nuana amimia.

57 Kama'u emauli kauna eta'u esini'u, lau 'eva Kama'u 'ounai amauli vitaitanai lau kauani'u beania kauna 'eva lau 'ou'uai bemauli.

58 Vutuvutuai e'ovu easi bokamana 'eva kanania. Oi 'ava'avamui mana deania inoku deba, beia bokama kanania beania kauna 'eva bemauli keinikeini."

59 Iesu Kapelanaumai evaikabasi laloanai Iuda kauta eta lo'e ai luva katania eluvavaita.

Mauli Keinikeini Luvata.

60 Debanoia kauta doutamo lenea deika inoku dediaka, "Luva kanania 'eva epasisi, luva kanania dai betata'u beabiadae?"

61 Iesu 'ani eikabasi debanoia kauta luva kanaua denunuvai nunuvaia 'ounai e'outa ediaka, "Luva kanania nuamui evabavunua, una?"

62 Lau Kau Nakuna bamaele'au amia makava 'abuna bamada'ala oi bo-maika'u koanai a oi bomakoma?

63 Idume Kabukabuna 'eva mauli eveveni, kauani 'eva sia dava ka evapulu. Luva katania a'oumui 'eva idume luvata mai mauli luvata.

64 Beia oi vaida 'eva sia oi oabiveni'u." 'Olana siako Iesu 'ani eikabasi kau davata sia deabivenia mai dai ia venina beveni mai kouna bekokou.

65 Maivaka ia eluva ediaka, "Kanaua 'ounai 'ani a'oumui adiaka, 'Kama'u sia kau ka bevuala be'asi koanai sia kau ka 'ani beasi keva'u.' "

66 Melala kanaua'i Iesu debanoia kauta doutamo ia devikania maivaka mulinai sia deda'a 'udai.

67 Inoku Iesu ibanona kauta 'ouka lua elavuaita ediaka, "Oi vaka oi o'ula oi bovikani'u, una?"

68 Simona Petelo enu'ovi ediaka, "Lovia namana e, lai dai kevana lai bada'ala? Mauli keinikeini luvata 'eva oni kevamuai demimia.

69 Lai 'ani abivenimu mai lai aikabasi oni 'eva Dilava ena Kabukabu Kaumu."

70 Inoku Iesu e'outa ediaka, "Lau oi kaumu 'ouka lua adilamui. Beia oi ka 'eva diablo."

⁷¹ Ia eluvavaia kauna 'eva Iuda Isakaliote kauna, Simona nakuna, ia ibanona 'ouka lua kauta ka, muliai Iesu venina beveveni mai kouna bekokou kauna.

7

Iesu Bo'akalana Ia Sia Deabivenia.

¹ Kanaua mulinai Iesu Kalileia laloanai eda'a to'ato'a, ia sia eula beda'a Iudea 'olana Iuda kauta namata 'eva de'imaia beaku bala.

² Iuda kauta eta Airole naduna 'ani ekevai koanai,

³ Iesu kadina deta'u de'ouia dediaka, "Abu kanania bovikania boda'a Iudea inoku debanomou kauta ua'i vatabulovo koata bovavai be'ika.

⁴ 'Olana kau ka sibona e'ula bevala'asia koanai ia sia dava ka vunivuniai evavaia, dava katania 'ani ovavaita 'ounai sibomou vala'asimu kanobata itoinai deikabasimu."

⁵ Kanaua deluva koma 'olana ia kadina umauta vaka ia sia deabivenia.

⁶ Inoku Iesu e'outa ediaka, "Asido'o e'u melala umauna easi. Beia melala boutai oi kevamuiai 'eva dedaia.

⁷ Kanobata 'eva sia oi evaivivimui beia lau evaiviivi'u, 'olana ia evavaia davana kanaua lau aluva vaia 'eva si'avana.

⁸ Oi oda'a nadu 'abuna, lau 'eva sia 'ani bavasi nadu 'abuna kanana 'olana e'u melala umauna 'eva asido'o edaia."

⁹ Ia luva kanania eluvaia inoku Kalileiai emia.

Iesu Eda'a Ielusalema

Airole Naduna Laloanai.

¹⁰ Iesu kadina deda'a nadu 'abuna mulinai ia vaka eda'a nadu 'abuna beia vunivuniai eda'a, sia ela'asi do'u vailatai.

¹¹ Inoku nadu kanaua laloanai Iuda kauta namata 'eva Iesu dekavua delavuai lavuai vaia, "Kau kanaua 'eva ai'?"

¹² Ua'i do'u laloanai 'eva deteoteo vaia, vaida dediaka, "Ia 'eva kau nama'ina." Vaida mune'e dediaka, "Asi'i, ia 'eva kau e'ana'ia vaita va'eva."

¹³ Beia Iuda kauta namata makauta demakau dainai, sia kau ka do'u vailatai ia luvana eluva kovo.

¹⁴ Nadu kukuanai Iesu ele'au eda'a lo'e kabukabunai ena vaikabasi emakavala.

¹⁵ Inoku Iuda kauta namata 'eva detabulovo si'asi'a dediaka, "Kau kanania sia eda'a malele 'abuna ka, beia aboina ia eikabasi vaika?"

¹⁶ Iesu eta luva evamuea ediaka, "E'u vaikabasi luvata 'eva sia lau sibo'u e'u, beia esini'u Dilavana enai de'asi.

¹⁷ Kau ka Dilava ena ula vinalana bevavaia koanai ia 'ani beikabasi, lau e'u vaikabasi 'eva Dilava kevanai easi 'o lau sibo'u e'u luva.

¹⁸ Kau ka sibona ena ula luvana eluvala kauna 'eva sibona ena nama'ina ekavua beia esinia kauna ena nama'ina ekavua kauna 'eva momo'ai kauna, ia nuanai 'eva va'eva asi'i.

¹⁹ Mose talavatu 'ani evenimui, una? Beia sia kau ka talavatu kanania oabi'inia. Dava 'ounai oi o'ula boaku ba'u?"

²⁰ Do'u kauta ena luva devamuea dediaka, "Oni 'eva 'olamu esi'avana, dai e'ula beaku bamu?"

²¹ Iesu e'outa ediaka, "Lau melala kabukabunai vatabulovo koana ka'onamo avavaia, inoku oi boumuiai otapulovo si'asi'a.

²² Mose ivaiva vinalana evenimui 'ounai melala kabukabunai melo kikita oi oivata. (Ivaiva vinalana 'eva sia Mose kevanai easi, beia oi kubumui 'ava'avamui kevatai easi.)

²³ Vali'u melala kabukabuna laloanai melo oi oivata 'eva Mose ena tavalatu asi'i oi omaukua makauna. Dava 'ounai melala kabukabuna laloanai kau ka kauanina itoinai avanama'inala dainai oi obaduvani'u?

²⁴ Sia Dava ikata koatai oi bovaluvata, beia dava eta komolo umautai oi bovaluvata."

Ia 'Eva Keliso, Una?

²⁵ Boni kanaua'i Ielusalema kauta vaida delavuai lavuai dediaka, "De'ula beaku bala kauna 'eva kanania, una?"

²⁶ Kauna 'eva kanana do'u vailatai eilolo, inoku sia luva ka ia kevanai deluvata kovo, ama'i kau namata 'ani delalovaia dokadoka ia 'eva Keliso 'o?"

²⁷ Keliso be'asi koanai ena asi 'abuna 'eva sia kau ka beikabasia, beia kau kanania ena asi 'abuna 'eva ita kaikabasia."

²⁸ Inoku Iesu lo'e kabukabunai evaikabasi laloanai evaoi ediaka, "'O, oi lau oikabasi'u, a'i asi vaka oi oikabasia. Lau sia sibou e'u ulai asi, beia esini'u Dilavana 'eva momo'ai. Ia sia oi oikabasia,

²⁹ beia lau 'eva ia aikabasia 'olana lau ia kevanai asi maivaka ia lau esini'u."

³⁰ Luva kanania 'ounai ia deula belioa beia sia kau ka ia kaunai ekao'au 'olana ena melala 'eva asido'o edaia.

³¹ Do'u laloanai kau doutamo ia deabivenia inoku dediaka, "Keliso be'asi koanai, ia vatabulovo koata doutamo bevavai kau kanania bekeinia, una?"

Vaida Deula Iesu Belioa.

³² Palisea kauta 'eva mato Iesu deteoteo vaia leleta deika inoku kabukabu kauta namata mai Palisea kauta deta'u lo'e kabukabuna de'imala kauta desinita Iesu belioa.

³³ Inoku Iesu ediaka, "Lau 'eva melala kava'ina mo oi ita ekamia vakaia bamumue bada'a esini'u kauna kevana.

³⁴ Oi bokavu'u beia sia 'ani oi bodavali'u. Sia 'ani oi boasi lau bamimia 'abuna."

³⁵ Inoku Iuda kauta namata sibota devilavuai viveni dediaka, "Kau kanania 'eva a beda'ala kanaua'i ita ia sia ekadavalia? Beda'a ua'i Iuda kauta deda'aia odaoda 'Elene kauta viloatai demimia kauta kevatai inoku 'Elene kauta bevaikabasita, 'o?"

³⁶ Luva kanania anina 'eva dava, ia ediaka, 'Oi bokavu'u beia sia oi bodavali'u,' maivaka 'Sia 'ani oi boasi lau bamimia 'abuna.'"

Mauli Beveveni Veina.

³⁷ Nadu melalana to'onai 'eva melala namana, Iesu elavadio inoku eluva 'unu'unu ediaka, "Bema kau ka vei bana ebaba 'eva be'asi lau keva'u inoku vei be'inu.

³⁸ Puka kabukabunai deleleia boina, 'Lau eabiveni'u kauna 'eva ia nuanai mauli veina be'alu itani nutu boina.'"

³⁹ Luva kanania 'eva Idume Kabukabuna eluvavaia ia deabivenia kauta kataua 'eva muliai bevenita, 'olana Iesu ena nuavi asido'o eabia 'ounai Idume Kabukabuna 'eva asido'o eveni.

Kau Viloata E'alama.

⁴⁰ Kau vaida Iesu ena luva kania 'uluta deika koanai dediaka, "Momo'ai dokadoka kau kanania 'eva Enolea kauna."

⁴¹ Vaida dediaka, "Ia 'eva Keliso." Beia vaida delavuai dediaka, "Keliso 'eva aboina Kalileiai be'asi?"

⁴² Puka kabukabunai kanania eluva koma. Keliso 'eva Davida kekenai bepupulu Davida emia vanuana Betele'ema laloanai."

⁴³ Kanaua 'ounai Iesu dainai kau viloata e'alama.

⁴⁴ Ia vaida deula belioa, beia sia kau ka ia kaunai ekao'au.

*Iuda Kauta Namata**Iesu Sia Deabivenia.*

⁴⁵ Mulinai lo'e kabukabuna de'imala kauta kataua demue deda'a kabukabu kauta namata mai Palisea kauta kevata, inoku ia deta'u delavuaita dediaka, "Dava 'ounai ia sia oi ovuala o'asi?"

⁴⁶ 'Ima'ima kauta eta luva devamuea dediaka, "Kanaua koanai easimo vali'u sia kau ka kanaua boina eluva kovo kau kanania eluluva boinai."

⁴⁷ Inoku Palisea kauta denu'ovi dediaka, "Oi vaka 'ani evada'amui va'eva, una?"

⁴⁸ Oi olalovaia kau namata 'o Palisea kauta ka ia eabivenia? Asi'i.

⁴⁹ Beia do'u kauta kataua Mose ena talavatu sia deikabasia kauta 'eva Dilava ena sivada ia akatai bemimia."

⁵⁰ Ia banota ka Nikedemo, melala ka eda'a Iesu kevana kauna, eta'u e'outa ediaka,

⁵¹ "Ita eta talavatu avekenai sia kau ka mekau ekavenia 'avaea, ia lelenu ekaika makava, ia dava evavaia davana ekaikabasia makava."

⁵² Ia de'ouia dediaka, "Oni vaka Kalileia kaumu, una? Puka kabukabuna boikala inoku bodavalia sia enolea kauna ka 'eva Kalileiai be'asi."

⁵³ Inoku kau boutai demue itaumo ena luma deda'aia.

8*Mo'a Ateatena Dedavalua.*

¹ Beia Iesu 'eva eda'a Olive lolona.

² Elani 'avu'ani vabulanai Iesu mune'e eda'a lo'e kabukabuna laloanai kau boutai deda'a ia dedabubua, inoku ia emiadivo evaikabasita.

³ Talavatu 'ola kauta mai Palisea kauta ateate ka ekulakulai dedavalua devuaia deasi. Do'u vailatai devalavala,

⁴ inoku Iesu de'ouia dediaka, "Vaikabasi kaumu e, ateate kanania 'eva ekulakulai lai adavalua.

⁵ Inoku Mose ena talavatu laloanai 'eva kanania eluva koma, katanua boita 'a'ate 'eva bika'ai eka aku bata. Vali'u oni 'eva dava okoma?"

⁶ Lavuai kanania deabia deda'a Iesu kevanai 'eva bevaviua, kanaua'i va'evai bene'eadivo. Beia Iesu 'eva esilidivo imana li'uli'unai kanoai elelele.

⁷ Ia delavuaia basibasi koanai, ia elavadivo inoku e'outa ediaka, "Viloumua'i kau ka sia mai emu si'avana kaumu, bika'a itoa makava ateate kanania akua."

⁸ Mune'e esilidivo kanoai elelelele 'udai.

⁹ Luva kanania deika kauta 'eva ka'oka'o deda'a ovo motunai emakavala eda'amo 'alu'alunai epua, Iesu mo sibona devikanua ateate ia kevanai elava.

¹⁰ Iesu elavadivo inoku ateate elavuaia ediaka, "Ateate e, kau katanua a'i? Sia kau ka mekau evenimu?"

¹¹ Ateate ediaka, "Lovia namana e, sia kau ka." Iesu ia e'ouia ediaka, "Lau vaka oni sia mekau ka bavenimu, da'a sia si'avana ka bovavaia 'udai."

Iesu 'Eva Kanobata Ailalana.

¹² Iesu kau eluva venita 'udai koanai ediaka, "Lau 'eva kanobata 'ailalana. Kau ka lau muli'uai bedada'a kauna 'eva vabuto'o laloanai sia bedada'a, beia mau'i 'ailalana beabia."

¹³ Palisea kauta ia de'ovenia dediaka, "Oni sibomu valimu okakava, emu vali kava 'eva sia momo'aina."

¹⁴ Iesu enu'ovi ediaka, "Lau sibo'u vali'u akakava 'eva momo'aina 'olana lau a'i asi mai a bada'ala 'abuna 'eva aikabasia beia oi 'eva lau a'i asi 'o a bada'ala 'abuna sia oi oikabasia.

¹⁵ Oi kau eta koakoa vitaitanai oi ovaluvata. Lau 'eva sia kau ka avaluvata.

¹⁶ Beia lau valuva bavavaia koanai, e'u valuva 'eva bekomolo, 'olana lau 'eva sia sibo'u, Kama'u esini'u kauna vaka keva'uai.

¹⁷ Emui talavatu laloanai kanania eleleia koma, kau lua eta luva beka'onamo 'eva momo'ai luvana.

¹⁸ Lau sibo'u vali'u akakava mai Kama'u esini'u kauna vaka vali'u ekakava."

¹⁹ Inoku ia delavuaia dediaka, "Kamamu 'eva a'i?"

Iesu enu'ovi ediaka, "Oi sia oikabasi'u 'ounai Kama'u sia oikabasia. Bema oi lau bomaikabasi'u koanai Kama'u vaka oi bomaikabasia."

²⁰ Iesu lo'e kabukabuna laloanai veniveni monina ine'edivona 'abuna kevanai evaikabasi laloanai luva katania eluvavai. Beia sia kau ka ia elioia 'olana ia ena melala asido'o edaia.

Lau Adada'a 'Abuna Sia 'Ani Oi Boda'a.

²¹ Iesu ia e'outa 'udai ediaka, "Lau 'ani bada'a tau, inoku oi lau bokavu'u beia emui si'avanai oi bobaba. Sia 'ani oi boda'a lau badada'a 'abuna."

²² Luva kanania 'ounai Iuda kauta namata sibota devilavuai viveni dediaka, "Ia kanania eluva koma, 'Lau badada'a 'abuna sia 'ani oi boasi,' Kanaua anina 'eva ia sibona beaku bala, 'o?"

²³ Iesu ediaka, "Oi 'eva venuai oasi lau 'eva akai asi, oi 'eva kanobata kanania kaumui, lau 'eva sia kanobata kanania kau'u."

²⁴ Lau 'ani a'oumui, 'Emui si'avanai oi bobaba,' Kauna 'eva Lau kau'u sia oi boabiveni'u koanai emui si'avanai oi bobaba."

²⁵ Ia delavuaia dediaka, "Inoku oni 'eva dai?" Iesu eta luva evamuea ediaka, "Lau siako a'oumui lau 'eva dai."

²⁶ Oi daimuiai lau luva doutamo bamaluva maivaka mekau namana bamavenimui, beia esini'u kauna 'eva momo'ai umauna, lau ia kevanai aika luvana mo kanobata kauta a'outa."

²⁷ Iesu Kamana lovana eakuia 'eva ia nuata sia de'eko'ovi.

²⁸ Kanaua 'ounai Iesu ediaka, "Lau Kau Nakuna oi boisi'u 'au koanai 'ani oi boikabasi kauna 'eva lau kau'u, maivaka lau sibo'u sia dava ka avavaia beia Kama'u dava evaikabasi'u vitaitatai aluvavaita."

²⁹ Maivaka esini'u kauna 'eva ebano'u, ia lau sia evikani'u 'avaea, 'olana melala boutai ia ivalalonamana vinaulata avavai."

³⁰ Luva katania e'outa 'eva kau doutamo ia deabivenia.

Abela'amo Kekena.

³¹ Inoku Iesu Iuda kauta ia deabivenia kauta e'outa ediaka, "E'u vaikabasi luvata daitai oi bodadai koanai oi 'eva lau ibano'u kaumui umaumui."

³² Inoku luva umauna oi boikabasia, maivaka luva umauna betata'u beluvune'emui."

³³ Ia denu'ovi dediaka, "Lai Abela'amo kekena kaumai maivaka sia kau ka da'alana lai ba'abi. Lai aboina beluvune'emai okoma?"

³⁴ Iesu e'outa ediaka, "Lau oi luva umauna a'oumui, si'avana evavaia kauna 'eva si'avana da'alana e'abi."

³⁵ Da'alaabi kauna 'eva 'ola kauna ena lumai sia bemia keinikeini, 'ola kauna nakuna 'eva luma kanaua'i bemia keinikeini.

³⁶ Kanaua 'ounai Nakuna betata'u beluvune'emui koanai oi 'ani eluvune'emui vaika.

³⁷ Lau aikabasimui oi Abela'amo kekena kaumui, beia e'u luva nuamuiai sia emimia 'ounai oi o'ula boaku ba'u.

³⁸ Lau Kama'u vailanai aikata davata a'oumui, inoku oi kamamui enai oi oika davata oi ovavaita."

39 Ia Iesu ena luva devamuea dediaka, “Lai kamamai 'eva Abela'amo.” Inoku ia e'outa ediaka, “Oi Abela'amo nakuna koanai Abela'amo evavai vinalata oi bomavavai.

40 Dilava enai luva momo'aina aika davana a'oumui, beia oi dala okakavu oi boaku ba'u. Abela'amo sia kanaua boina evavaia.

41 Oi kamamui evavai davata 'eva oi ovavaita.” Ia Iesu de'ouia dediaka, “Lai sia apulu tauasi, lai kamamai 'eva ka'onamo Dilava mo sibona.”

42 Iesu mune'e ediaka, “Oi kamamui Dilava koanai oi bomalalo'au veni'u. 'Olana lau Dilava enai asi nia'i. Lau 'eva sia sibo'u e'u ulai asi beia Kama'u esini'u.

43 Dava 'ounai aluvavai luvata 'eva nuamui sia de'eko'ovi? 'Olana e'u luva iabidaena sia oi oula venia.

44 Oi kamamui 'eva diabolo, oi o'ula kamamui ena ula vinalana oi bo-vavaia. Ia 'eva akuaku kauna makavanai easimo vali'u, ia sia luva umaulai eluluva, 'olana ia nuanai sia luva umauna ka emimia. Ia dede luvana eluvala 'eva ia ena koakoa umauna, 'olana ia 'eva dede kauna maivaka dede boutai kamata.

45 Lau luva umauna aluvala 'ounai lau e'u luva sia oi ovamomo'aia.

46 Inoku kau ka lau e'u si'avana 'ani odavalia 'eva bovala'asia. Lau luva umauna aluvala koanai dava 'ounai e'u luva sia oi ovamomoaia?

47 Dilava nakuna kauna 'eva Dilava ena luva leleta be'ika, beia oi lele sia o'ika 'olana oi sia Dilava nakuna.”

Iesu Mai Abela'amo.

48 Iuda kauta namata Iesu ena luva devamuea dediaka, “Oni 'eva Samalia kaumu inoku ka'uba si'avana vaika nuamuai emimia, 'ani lai aluva komolo, una?”

49 Inoku Iesu ediaka, “Sia ka'uba si'avana vaika ka lau nua'uai emimia. Lau Kama'u 'olana a'aku beia oi lau 'ola'u sia oi o'aku.

50 Lau sia sibo'u e'u nuavi akavua, beia Dilava betata'u e'u nuavi bekavua maivaka ia 'eva lau 'ou'uai valuva bevavaia kauna.

51 Lau oi luva umauna a'oumui, e'u luva eabi'inia kauna 'eva sia beba kovo.”

52 Kanaua'i Iuda kauta namata dediaka, “Vali'u lai aikabasimu kave'i ka'uba si'avana vaika oni nuamuai emimia. Abela'amo eba mai enolea kauta vaka deba beia oni odiaka emu luva beabi'inia kauna 'eva ba aviavina sia beonovaia.

53 Oni lai kamamai Abela'amo okeinia, una? Ia eba mai enolea kauta vaka deba, inoku olalovaia oni 'eva dai?”

54 Iesu enu'ovi ediaka, “Bema lau sibo'u baku'uabalai, e'u akuabalai anina asi'i. Lau Kama'u, ia kauna eta'u lau eaku'uabalai. Inoku oi odiaka, ia 'eva 'Emui Dilava'.

55 Oi ia sia oi oikabasia, lau 'eva ia aikabasia. Inoku lau bamadiaka lau ia sia aikabasia koanai lau dede kau'u itani oi boimui. Beia lau ia aikabasia maivaka ena luva abi'inita.

56 Oi kamamui Abela'amo e'u boni beikala 'ounai elalonama, inoku eikaia 'eva elalonama si'asi'a.”

57 Iuda kauta namata dediaka, “Oni vikaumu asido'o imanavui (50) eabia, ia Abela'amo aboina 'eva oikaia?”

58 Iesu e'outa ediaka, “Lau oi luva umauna a'oumui. Abela'amo asido'o epulu lau 'eva 'ani amia.”

59 Luva kanaua deika koanai ia bika'a deabisi Iesu beakua, beia ia sibona do'u vilolatai epode eda'a ovo lo'e kabukabuna evikania eda'a.

9

*Iesu Maka 'Ede Kauna
Makana Evanama'inata.*

¹ Iesu dala eda'aia eda'a laloanai maka 'ede kauna ka eikaia, ia 'eva makana 'edetai epulu.

² Ibanona kauta Iesu delavuaia dediaka, "Vaikabasi kaumu e, dai ena si'avana 'ounai kau kanania makana 'edenai epulu? Kau kanania ena si'avana 'o sinana kamana eta si'avana?"

³ Iesu eta luva evamuea ediaka, "Sia kau kanania ena si'avana maivaka sia sinana kamana eta si'avana, beia Dilava ena siavu vinalata ia kaunai bevala'asi beikala 'ounai.

⁴ Lau esini'u Dilavana ena vinala laniai ekavavaia. Boni be'asi koanai sia kau ka bevinaula.

⁵ Lau kanobatai amimia laloanai lau 'eva kanobata ena 'ailala."

⁶ Iesu luva kanania eluvavaia mulinai kanoai e'anodi inoku 'anodinai 'ika'ika emataia, 'ede kauna makana luana eukuta.

⁷ Inoku e'ouia ediaka, "Da'a, Siloama 'ovunai vailamu bokaovai." (Siloama anina 'eva sinia.) Kau kanaua eda'a vailana ekaovai, emue easi makana 'ani denama'ina.

⁸ Kevanai kauta mai 'ana'inai ia enoi va'ame deikaia kauta delavuui lavuui dediaka, "Ana'inai ua'i emia enoi va'ame kauna ka'onamo kanania, una?"

⁹ Vaida dediaka, "Kauna ka'onamo kanana." Vaida dediaka, "Asi'i, ikana ia mo delaovenia." Beia ia sibona e'outa ediaka, "Kauna 'eva lau kau'u kanania."

¹⁰ Ia deta'u delavuaia dediaka, "Vali'u makamu a deko oikaika?"

¹¹ Ia eta luva evamuea ediaka, "Kau vana de'aea Iesu kauna eta'u 'ika'ika emataia maka'u eukuta, inoku e'ou'u bada'a Siloama 'ovunai vaila'u bakao-vai. Kanaua 'ounai ada'a vaila'u akaovai inoku aikaika."

¹² Ia delavuaia dediaka, "Kau kanaua 'eva ai?" Ia ediaka, "Lau sia aikabasi."

Palisea Kauta Makana Denama'ina Kauna Delavuaia.

¹³ Ia deta'u kau kanaua 'ana'inai makana de'ede kauna devuaia deasi Palisea kauta kevata.

¹⁴ Boni kanaua'i Iesu 'ika'ikai 'ede kauna makana eukuta deata 'eva melala kabukabuna.

¹⁵ Kanaua 'ounai Palisea kauta vaka ia delavuaia aboina makana denama'ina. Maka 'ede kauna ediaka, "Ia 'ika'ikai maka'u eukuta, akaovai inoku vali'u 'ani aikaika."

¹⁶ Palisea kauta vaida dediaka, "Kau kanania 'eva sia Dilava kevanai easi 'olana ia melala kabukabuna sia eabi'inia." Beia vaida dediaka, "Si'avana kauna ka aboina vatabulovo koata kania boita bevavai?" Kanaua 'ounai ia viloata e'alama.

¹⁷ Mune'e Palisea kauta maka 'ede kauna delavuaia 'udai dediaka, "Ia eta'u makamu eva ata, inoku oni olalovaia ia 'eva dai?" Kau kanaua ediaka, "Ia 'eva enolea kauna."

¹⁸ Iuda kauta namata sia devamomo'ai ia 'eva maka 'ede kauna inoku 'ani makana denama'ina eda'amo kau kanaua sinana kamana de'aeta deasi.

¹⁹ Inoku ia delavuaia dediaka, "Nia oi nakumui, una? Makana 'edetai epulu kauna kanania, a? Vali'u ia makana 'eva aboina denama'ina inoku eikaika?"

²⁰ Ia sinana kamana ia eta luva devamuea dediaka, "Lai aikabasi ia 'eva lai nakumai maivaka ia makana 'edetai epulu.

²¹ Beia vali'u aboina eikaika maivaka dai eta'u ia makana evanama'inata 'eva lai sia aikabasi. Olavuaia, ia 'ani e'aida'aida sibona lovana eakuia."

²² Ia sinana mai kamana 'eva Iuda kauta namata makautu demakau 'ounai kanaua deluva koma. 'Olana Iuda kauta 'ani devamomo'aia kau ka be'oudae Iesu 'eva Keliso koanai Iuda kauta eta lo'eai bevala'asia.

²³ Kanaua 'ounai sinana kamana dediaka, "Ia 'ani e'aida'aida olavuaia."

²⁴ Maka 'ede kauna melala ivaluana de'aeia inoku de'ouia dediaka, "Dilava boakuabalai. Lai aikabasi evanama'inamu kauna kanania 'eva si'avana kauna."

²⁵ Kau kanaua eta luva evamuea ediaka, "Lau sia aikabasi, ia si'avana kauna 'o asi'i. Dava ka'onamo lau aikabasia 'eva maka'u de'ede beia vali'u 'ani aikaika."

²⁶ Inoku ia delavuaia dediaka, "Oni kevamuai dava evavaia? Makamu aboina eva ata?"

²⁷ Ia eta luva evamuea ediaka, "Lau siako 'ani a'oumui, beia lele'u sia oi oika. Vali'u dava 'ounai oi o'ula boika 'udai? Oi vaka o'ula ia ibanona kaumuiai oi bo'ao, una?"

²⁸ Ia deta'u depilaia si'ala dediaka, "Oni 'eva kau kanaua ibanona kaumu, lai 'eva Mose ibanona kaumu."

²⁹ Lai aikabasi Dilava eta'u Mose eluvavenia, beia lai sia aikabasi kau kanana a'i easi."

³⁰ Kau kanaua eta luva evamuea ediaka, "Vali'u dava edeana umauna epupulu 'olana ia maka'u evanama'inata beia oi sia oikabasia ia a'i easi."

³¹ Ita kaikabasi Dilava si'avana kauta leleta sia e'ika. Ia dekukudivo venia kauta mai'vaka ena ula vinalana devavaia kauta mo kataua leleta e'ika.

³² 'Ana'inai kanobata emakavala koanai easimo vali'u sia kau ka eta'u makana 'edetai epulu kauna ka makana evanama'inata valina ka kaika kovo.

³³ Kau kanania 'eva sia Dilava kevanai easi koanai ia vinala kanania boina sia bemavavaia."

³⁴ Ia deta'u kau kanaua ena luva devamuea dediaka, "Oni 'eva si'avana laloanai opulu inoku oni otata'u lai bovamalelemai, una?" Ia deta'u Iuda kauta eta lo'eai dedolia asi.

Sia Deabiveni Kauta 'Eva

Maka 'Ede Kauna Boina.

³⁵ Iesu kau kanaua dedolia asi valina eika inoku edavalia koanai ia elavuaia ediaka, "Oni Lau Kau Nakuna oabiveni'u, una?"

³⁶ Kau kanaua Iesu ena luva evamuea ediaka, "Loviamu e, ia 'eva dai? 'Ou'u lau batata'u ia babivenia."

³⁷ Iesu ediaka, "Oni vali'u ia 'ani oikala kauna kanania oni eluva venimu."

³⁸ Inoku kau kanaua ediaka, "Lovia namana e, lau abiveni." Inoku ia Iesu ekukudivo venia.

³⁹ Iesu mune'e ediaka, "Valuva dainai lau asi kanobata kanania'i, kanaua'i maka 'ede kauta beikaika inoku deikaika kauta kataua makata be'ede."

⁴⁰ Palisea kauta vaida ia kevanai kauta kataua 'eva luva kanaua deika inoku delavuaia, "Lai vaka makamai de'ede, una?"

⁴¹ Iesu e'outa ediaka, "Oi Makamui dema'ede koanai kevamuiai si'avana bemaasi'i. Beia vali'u oi odiaka oi oikaika 'ounai emui si'avana 'eva demimia do'o."

10

Luva Ivavitaitana

Mamoe I'imana kauna.

¹ Iesu ediaka, "Lau oi luva umauna a'oumui. Kau ka mamoe alana nutualanai sia eda'adodo beia ala kukuanai etakeini kauna 'eva vinala mai abi'avaea kauna."

² Ia nutualai eda'adodo kauna 'eva mamoe i'imana kauna.

³ Nutuala eikalakao kauna 'eva kau kanaua nutualana eluvua inoku mamoe ia lelenu de'ika. Ia ena mamoe vata umautai e'aeta inoku e'ana'ivaita dela'asi.

⁴ Ia ena mamoe boutai evala'asi paluta koanai, ia vailatai edada'a inoku ena mamoe ia mulinai dedada'a 'olana ia lelenu de'ikabasia.

⁵ Ia sia kau edeana ka mulinai bedada'a, kau kanaua kevanai beveau akauma 'olana kau edeana kauna lelenu de'ikabasia."

⁶ Iesu luva ivavitaitana kanania'i e'outa, beia ia eluvavaia luvana ovonai sia deovo.

Iesu 'Eva Mamoe I'imana

Kauna Mediana.

⁷ Kanaua 'ounai Iesu eluva 'udai ediaka, "Lau oi luva umauna a'oumui. Lau 'eva mamoe eta nutuala.

⁸ Deasi 'ana'i kauta boutai kataua 'eva vinoa kauta mai abi'avaea kauta, kanaua 'ounai mamoe ia leleta sia deika.

⁹ Lau 'eva nutuala, lau e'uai dedododo de'asi kauta boutai 'eva bemaui. Ia 'eva beda'adodo mai bela'asi iani bedavali.

¹⁰ "Vinoa kauna 'eva bevinaomo, beakuakumo mai bevasi'avanalamo 'ounai easi. Lau asi 'eva mamoe mauili beabia mai mauili nama'ina itoina beabia.

¹¹ Lau 'eva mamoe i'imata kauna mediana, mamoe i'imata kauna mediana 'eva ena mauili ene'ea divo ena mamoe daitai.

¹² Tava ekakavu kauna 'eva sia mamoe i'imata kauna umauna, sia mai ena mamoe, kanaua 'ounai 'oveka 'asina e'asi eikala koanai ia mamoe evikanita inoku eveau 'akauma, inoku 'oveka 'asina mamoe ealata 'eva deveau siusiu.

¹³ Kau kanaua eveau 'akauma 'olana ia 'eva tava ekakavu kauna maivaka mamoe naota sia e'aku.

¹⁴ "Lau 'eva mamoe i'imata kauna mediana, lau e'u mamoe aikabasita maivaka e'u mamoe vaka lau deikabasi'u.

¹⁵ Vitaitanai Kama'u lau eikabasi'u maivaka lau Kama'u aikabasia, inoku e'u mauili ane'ea divo e'u mamoe daitai.

¹⁶ Lau maie'u mamoe edeata vaida 'eva sia ala kanania laloanai demimia, kataua vaka bavuata ba'asi inoku ia vaka lele'u be'ika, ua'i mamoe 'itona beka'onamo mai mamoe i'imata kauna beka'onamo.

¹⁷ Kama'u elalo'au veni'u 'olana lau e'u mauili ane'ea divo, kanaua'i lau batata'u babia 'udai.

¹⁸ Sia kau ka e'u mauili bebuku vai'u, beia lau sibou e'u ulai e'u mauili ane'ea divo. Lau mai e'u siavu e'u mauili bane'ea divo maivaka mai e'u siavu e'u mauili babia 'udai. Kama'u enai abia luvana 'eva kanaua."

¹⁹ Luva katania'i Iuda kauta viloota 'ani e'alama 'udai.

²⁰ Kau doutamo dediaka, "Ka'uba si'avana vaika ia nuanai emimia kanaua'i ia 'olana esi'avana. Dava 'ounai ia lelenu de'ika?"

²¹ Beia vaida dediaka, "Luva katania 'eva sia kau nuanai ka'uba si'avana vaika emimia kauna beluluva luvata. Inoku ka'uba si'avana vaika maka 'ede kauna makana 'ani beva ata?"

Iuda Kauta Iesu Devasi'avanala.

²² Inoku Ielusalemai Lo'e Ivakabukabuna Naduna bonina eabia, ua 'eva 'elu bonina,

²³ inoku Iesu 'eva Lo'e kabukabuna laloanai vaka ka akanai eda'a, vaka kanaua 'eva Solomona ena vaka.

²⁴ Iuda kauta namata deasi Iesu delavaia kaiukau inoku delavaia dediaka, "Ovalalo to'ato'amai, aida melalanai bo'oumai kave'i? Bema oni Keliso 'eva 'oumai kave'i."

²⁵ Inoku Iesu eta luva evamuea ediaka, “Lau oi 'ani a'oumui, beia oi 'eva sia oabiveni'u. Lau Kama'u vanai vatabulovo vinaulata avavaita davata 'eva lau vali'u dekakava.

²⁶ Beia oi sia oabiveni'u 'olana oi 'eva sia lau e'u mamoe.

²⁷ E'u mamoe 'eva lele'u de'ika. Lau aikabasita, maivaka ia lau muli'uai dedada'a.

²⁸ Lau mauli keinikeini avenita, ia 'eva sia bebaba maivaka sia kau ka ima'uai bebukuvai'u.

²⁹ Kama'u mamoe kataua eveni'u kauna 'eva dava boutai ekeinista, sia kau ka Kama'u imanai bebukuvaita.

³⁰ Lau mai Kama'u lai laluaana 'eva ka'onamo.”

³¹ Iuda kauta luva kanania deika melalanai bika'a deabisi ia beaku bala.

³² Beia Iesu e'outa ediaka, “Kama'u kevanai vatabulovo vinaulata namata doutamo avaikamui, vinaula katania davana dainai bika'ai oi boaku'u?”

³³ Ia ena luva devamuea dediaka, “Sia vinaula nama'ita ovavai dainai bika'ai lai bakumu, beia Dilava ovasi'avanala dainai, 'olana oni 'eva kau mo beia oni sibomu Dilava'i ova'aomu.”

³⁴ Iesu eta luva evamuea ediaka, “Emui Talavatu laloanai 'ani deleleia, Dilava ediaka, 'Oi 'eva dilava.’

³⁵ Dilava ena luva easi kevatai kauta e'aeta dilava, inoku Puka kabuk-abuna luvana kanaua 'eva sia ekaukua.

³⁶ Dilava evasiavu'u mai esini'u asi kanobatai inoku adiaka, ‘Lau 'eva Dilava Nakuna,’ koanai, dava 'ounai oi odiaka lau Dilava avasi'avanala?

³⁷ Bema Kama'u ena vinaula sia bavavaia koanai sia oiboabiveni'u.

³⁸ Beia Kama'u ena vinaula avavai koanai, bema sia oi oabiveni'u beia vinaula avavai kataua oi boabivenita. Kanaua'i oi boikabasi maivaka ovota oi bo'ovo Kama'u 'eva lau nua'uai maivaka lau 'eva Kama'u nuanai.”

³⁹ Iuda kauta namata dala dekaavu 'udai Iesu belioa. Beia ia kevatai eda'a ovo.

⁴⁰ Iesu Iolidana nutuna ekeinista avekenai emue eda'a makavanai Ioane evaidi'u kabukabu 'abunai ua'i emia,

⁴¹ kau doutamo deasi ia kevana inoku dediaka, “Ioane vatabulovo koana sia ka evavaia, ia kau kanania lovana eakuia davata boutai 'eva demomo'ai.”

⁴² Inoku 'abu kanaua'i kau doutamo Iesu deabivenia.

11

Lasalo 'Ani Eba.

¹ Kau ka vana Lasalo 'eva e'olele, ia 'eva Betani kauna, Malia 'a'ana Maleta ita eta vanua.

² Malia kanaua eta'u deolo bonana medianai Lovia namana Iesu aena esisita inoku vuinau eukuta lada ateatena, ia lovuna Lasalo 'eva e'olele kanaua.

³ Kanaua 'ounai lovuna luana luva desinia eda'a Iesu kevana dediaka, “Lovia namana e, olalo'au venia kauna 'eva e'olele.”

⁴ Iesu vali kanania eika koanai ediaka, “Olele kanania 'eva sia Lasalo bevabala vaika, kanania epulu 'eva Dilava ena nuavi bevala'asia, kanaua'i Dilava Nakuna nuavi beabia.”

⁵ Iesu 'eva Maleta kadina Malia ita maivaka lovuta Lasalo elalo'au venita.

⁶ Iesu Lasalo ena 'olele valina eika koanai, ia boni lua vaka ua'i emia 'abunai emia.

⁷ Inoku Iesu ibanona kauta e'outa ediaka, “Ita ekamue ekada'a Iudea.”

⁸ Ibanona kauta dediaka, “Vaikabasi kaumu e, ualavi mo Iuda kauta namata deula bika'ai beaku bamu, beia oni emu lalovai 'eva bomumue boda'a ua'i?”

⁹ Iesu enu'ovi ediaka, “Melala ka'onamo laloanai melala koana 'eva 'ouka lua (12), kau ka laniai edada'a kauna 'eva sia betatai, 'olana ia kanobata ena 'ailala eikala.

¹⁰ Beia boniai bedada'a kauna 'eva betatai, 'olana ia nuanai 'eva 'ailala asi'i.”

¹¹ Iesu luva kanaua eluvaia mulinai e'outa ediaka, “Eta kau Lasalo 'eva 'ani emuinai tabu. Beia lau bada'a ua'i bakuia.”

¹² Ibanona kauta dediaka, “Lovia namana e, ia e'olele emuinai koanai ia 'ani benama'ina 'udai.”

¹³ Iesu 'eva Lasalo ena ba lovana eakuia, beia ibanona kauta delalovaia ia 'eva emuinai tabu.

¹⁴ Kanaua 'ounai Iesu e'outa kave'i ediaka, “Lasalo 'ani eba,

¹⁵ oi 'oumuiai lau ua'i asi'i 'eva lalo'u denanama, 'olana oi botata'u lau oi boabiveni'u. Ita kada'a ia kevana.”

¹⁶ Inoku Toma (de'aea vi'apala) banona vaida kataua e'outa ediaka, “Ita vaka kada'a, ia ita ekaba ka'ona.”

Bai Ko'isi 'Udai Mai Mauli 'Olana

Eva Iesu.

¹⁷ Iesu ua'i ela'asi koanai de'ouia Lasalo 'ani eba kauanina boni vani mitava laloanai 'ani emia.

¹⁸ Ielusalema mai Betani viloata 'eva sia edau'a itani maela lua boina.

¹⁹ Maleta mai Malia lovuta Lasalo eba 'ounai Iuda kauta doutamo deasi ia kevatai nuata bevakula'ilata.

²⁰ Maleta Iesu easi valina eika koanai, ia ela'asi eda'a ita bevidavali, beia Malia 'eva lumai emia.

²¹ Maleta Iesu e'ouia ediaka, “Lovia namana e, oni nia'i bomamia koanai lovu'u sia bemaba.

²² Beia lau aikabasi vali'u Dilava kevanai dava bonoinoi vaia davana ia betata'u bevenimu.”

²³ Iesu Maleta e'ouia ediaka, “Oni lovumu 'eva beko'isi 'udai.”

²⁴ Maleta enu'ovi ediaka, “Lau aikabasi melala to'onai ba kauta boutai beko'isi 'udai koanai ia vaka beko'isi 'udai.”

²⁵ Iesu Maleta e'ouia ediaka, “Lau 'eva ko'isi 'udai maivaka mauli. Lau eabiveni'u kauna 'eva bemaba, beia bemaui.

²⁶ Inoku demauli mai deabiveni'u kauta boutai 'eva sia beba kovo beia bemaui keinikeini. Oni luva kanania oabivenia, una?”

²⁷ Maleta enu'ovi ediaka, “O, Lovia namana, lau abivenimu, oni 'eva Keliso, Dilava Nakuna be'asi kanobatai kauna.”

Iesu Ekani.

²⁸ Luva kanania eluvaia mulinai emue eda'a kadina Malia e'aeia 'aba'abai e'ouia ediaka, “Vaikabasi kauna 'ani easi oni lavuaimu elavuai.”

²⁹ Malia luva kanaua eika koanai alimo eko'isi eda'a Iesu kevana.

³⁰ Melala kanaua'i Iesu 'eva asido'o vanuai eda'adodo, ia ua'i Maleta ita devidavali 'abunai emia do'o.

³¹ Iuda kauta kataua Malia ita lumai demia nuana devakula'ilala kauta ia deikaia alimo eko'isi ela'asi koanai mulinai deda'a, delalovaia ia edada'a mitavai ua'i bekakani.

³² Malia eda'a Iesu emia 'abunai ela'asi inoku eikaia koanai komolonai aena 'olanai epakadivo 'eva ediaka, “Lovia namana e, oni nia'i bomamia koanai lovu'u 'eva sia bemaba.”

³³ Iesu Malia ekani eikaia mai Iuda kauta kataua ia ita deasi kauta vaka dekanai eikata koanai nuana evilalo mai emanomano.

³⁴ Ia elavuaia ediaka, “A'i oi okoleia?” Ia ena luva devamuea dediaka, “Lovia namana e, mai ikala.”

³⁵ Inoku Iesu ekani.

³⁶ Juda kauta dediaka, "Oikaia a elalo'au venia koma."

³⁷ Beia ia vaida dediaka, "Kau kanania maka 'ede kauna makana evanama'inata inoku ia bemata'u Lasalo bai bema'alavuia sia bemaba."

Iesu Lasalo Bai Evako'isia.

³⁸ Iesu nuana evilalo si'asi'a. Inoku eda'a mitava, mitava kanaua 'eva bika'a va'alana ka inoku bika'a namana kai nutualana devaakububua.

³⁹ Iesu ediaka, "Bika'a oabia tau!" Beia ba kauna lovuna Maleta ediaka, "Lovia namana e, ia 'ani epeda, 'olana ia vali'u 'ani boni ivavanina ikolena."

⁴⁰ Inoku Iesu ia e'ouia ediaka, "Lau 'ani a'oumu, oni boabiveni'u koanai Dilava ena nuavi oi boikala."

⁴¹ Kanaua 'ounai ia deta'u bika'a deabia tau. Inoku Iesu e'a'a dae ediaka, "Kama'u e, lau avanama'inamu 'olana lele'u 'ani o'ika."

⁴² Lau aikabasi oni 'eva melala bounai lele'u o'ika, beia nia'i kau delalava daitai lau luva kanania aluvala. Ia beabiveni 'eva oni ota'u lau osini'u."

⁴³ Iesu luva kanania eluvaia mulinai e'ae 'unu'unu ediaka, "Lasalo e, la'asi mai!"

⁴⁴ Inoku ba kauna ela'asi easi, imana mai aena 'eva mitava tubu'anai de'umita maivaka vailana tubu'a kai de'umia. Iesu e'outa ediaka, "Mitava tubu'ata oabita ovo inoku ovikania eda'a."

Iesu Beakubala Lalovina

Delalovaia.

(Mt 26.1-5; Mk 14.1, 2; Lk 22.1, 2)

⁴⁵ Juda kauta doutamo deasi Malia deikaia kauta 'eva Iesu koa kanaua evavaia deikaia inoku deabivenia.

⁴⁶ Beia vaida deda'a Palisea kauta kevatai inoku de'outa Iesu dava evavaia.

⁴⁷ Inoku kabukabu kauta namata mai Palisea kauta valuva namana de'imala kauta de'aeta ita dedo'u, "Kau kanaua 'ani vatabulovo koata doutamo evavaita 'eva vali'u ita dava ekavavaia."

⁴⁸ Ita ia ekavikania koa katania bevavai 'udai vavai 'udai koanai kau boutai ia beabivenia, inoku Loma kauta be'asi eta lo'e kabukabuna mai eta kanobata bebuku vaita."

⁴⁹ Inoku ia banota ka vana Kaiapa, vikau kanaua laloanai ia 'eva kabukabu kauta namata 'olatai kauna ka eko'isi ediaka, "Oi sia dava ka oi oikabasia."

⁵⁰ Sia oi olalovaia kau ka'onamo bemaba kau daitai 'eva enama'ina vakaia kanobata itoina besi'avana."

⁵¹ Sia ia sibona ena lalovai ai luva kanania eluvaia, beia vikau kanaua laloanai ia 'eva kabukabu kauta 'olatai kauna dainai, ena enoleai kanaua eluva koma Iesu bebaba Juda kauta daitai,

⁵² sia Juda kauta mo sibota daitai, beia Dilava nakuna 'abu edeata edeatai demimia kauta vaka bevado'uta mai bevaka'onamota.

⁵³ Melala kanaua'i eabilamala eda'a laloanai Juda kauta namata 'eva delovaku Iesu beaku bala.

⁵⁴ Kanaua 'ounai Iesu Juda kauta viloatai sia evaila. Ia eda'a tau eda'a kano'akuna kevanai vanua ka vana Epalaima, ua'i ibanona kauta ita demia.

⁵⁵ Juda kauta eta La'au keini naduna 'ani ekevai laloanai Juda kauta doutamo vanua edeata edeatai dela'asi deda'a Ielusalemai beva'olu kave'i bekabukabu makava vakaia nadu bepupulu.

⁵⁶ Ia Iesu dekavuia inoku lo'e kabukabuna laloanai delava sibota viloatai devilavuai viveni dediaka, "Oi dava olalovaia? Ia nadu dainai 'ani beasi 'o asi'?"

⁵⁷ Beia kabukabu kauta namata mai Palisea kauta luva deveni, kau ka Iesu ena mia 'abuna eikabasia koanai ia bevaikabasita, ia betata'u belioa.

12

Malia Iesu Aena Deoloai Esisita.

(Mt 26.6-13; Mk 14.3-9)

¹ Melala kalakoi vailai demia La'au keini naduna bepupulu 'eva Iesu eda'a Betani, bai evako'isia kauna Lasalo ena vanua.

² Iesu iabidaena koana lavilavi ianina ka deva'olua, inoku Maleta 'eva ia da'alata eabi, ia Lasalo mai kau vaida 'eva Iesu ita aniani 'abunai demia.

³ Inoku Malia eta'u deolo kavapuna ka'onamo tavana namavaikana de-olona eabia Iesu aena palapalatai esisia inoku vuinai Iesu aena palapalata eukuta lada. Deolo bonana mediana kanaua luma laloana itoinai ekaolia.

⁴ Iesu ibanona kauna ka Iuda Isakaliote kauna muliai Iesu venina beveveni mai kouna bekokou kauna ediaka,

⁵ "Dava 'ounai deolo kanania moni namavaikanai sia etavatava vaia inoku monina ta'ovala kauta bemavenita."

⁶ Ia sia ta'ovala kauta elalovaita 'ounai luva kanania eluvaia, beia ia 'eva vinoa kauna, moni iko'unina e'imala kauna, deudala 'ovu davana 'eva eabia ia sibona eduluvaia.

⁷ Inoku Iesu ediaka, "Ovikania 'avaea, lau ikole'u bonina dainai deolo kanania eva'olua.

⁸ Melala boutai ta'ovala kauta 'eva oi viloamuiai demimia, beia lau 'eva sia melala boutai oi viloamuiai bamimia."

Lasalo Iakubana Lalovaina

Delalovaia.

⁹ Iuda kauta mato namavaikana Iesu valina deika ia 'eva 'ani Betani ai, inoku deda'a ua'i. Sia Iesu mo sibona beikala, beia Lasalo bai evako'isia 'udai kauna vaka beikala.

¹⁰ Kanaua 'ounai kabukabu kauta namata delovaku Lasalo vaka beaku bala,

¹¹ 'olana Lasalo kevanai koa kanaua epulu 'ounai Iuda kauta doutamo ia devikanita dekeini Iesu deabivenia.

Iesu Ielusalemai Eda'adodo Itani

Lovia 'Olana Boina.

(Mt 21.1-11; Mk 11.1-11; Lk 19.28-40)

¹² Elani kau mato namavaikana nadu dainai deasi kauta 'ulu deika Iesu 'eva Ielusalema easi venia.

¹³ Kanaua 'ounai ia vakolo uauata deabi dela'asi deda'a Iesu ita bevidavali, inoku devaoi dediaka,

"Osana! Dilava betata'u
Lovia namana vanai e'asi
kauna bevanama'inala!

Dilava betata'u Isalaela eta
Lovia 'olana bevanama'inala!"

¹⁴ Iesu doniki nakuna ka edavalia inoku akanai emia'au. Kanaua 'eva Puka kabukabunai ilelena vitaitana ediaka,

¹⁵ "Siona vanuana namana kaumui e,
sia oi bomakau.

Oikaia, emui lovia 'olana
'eva doniki nakuna akanai
emia'au e'asi."

Sek 9.9

¹⁶ Kanaua melalanai ibanona kauta luva kania ovotai sia deovo eda'amo Iesu ena nuavi ai eko'isi 'udai mulinai vakaia ia lovana deakuia luvata deleleta davata mai ia kevanai devavai davata kataua delalota une.

17 Iesu eta'u Lasalo bai evako'isia 'udai deikaia kauta deta'u ia valina dekava odaoda.

18 Kau doutamo dela'asi deda'a Iesu beikala 'olana ia vatabulovo koana kanaua evavaia valina deika 'ounai.

19 Kanaua 'ounai Palisea kauta sibota deviluva viveni dediaka, "Oikaia, ita sia dava ka ekavavaia bedaita, kau boutai 'ani ia mulinai dedada'a."

'Elene Kauta Vaida Iesu Dekavuia.

20 Nadu kanaua laloanai deda'a Ielusema Dilava bekukudivo venia kauta kataua vilotai 'eva 'Elene kauta vaka vaida.

21 Ia deasi Kalileiai Betesaida kauna Pilipo kevana de'ouia dediaka, "Lovi-amu e, lai a'ula Iesu lai baikala."

22 Pilipo eda'a Andelea e'ouia inoku laluaana deda'a Iesu de'ouia.

23 Iesu eta luva evamuea ediaka, "Lau Kau Nakuna nuavi namana babia melalana 'ani easi.

24 Lau oi luva umauna a'oumui, witi keana ka be'ekoasi kanoai inoku sia bebaba koanai ia keana 'eva 'avaeana mo bemimia. Beia ebaba koanai kea doutamo bevapuluta.

25 Kau ka ena maui elalo'au venia kauna 'eva ena maui bevataulea, kanobata kanania'i kau ka ena maui evaiviivia kauna 'eva ena maui beabi 'inia beda'amo maui keinikeini.

26 Lau da'ala'u be'abi kauna 'eva muli'uai bedada'a, inoku lau a'i koanai e'u da'alaabi kauna vaka ua'i. Kama'u betata'u lau da'ala'u e'abi kauna bevanama'inala.

Iesu Ena Ba Luvana Eluvavaia.

27 Vali'u lau nua'u 'eva ebavunu si'asi'a inoku luva dava baluvala? Lau badiaka, 'Kama'u, melala koana kanania laloanai vamauli'u?' Asi'i. Lau asi 'olana umauna 'eva melala koana kanania'i banana.

28 Kama'u e, vamu vanuavia." Inoku vutuvutuui lele ka ediaka, "Lau 'ani avanuavia, maivaka bavanuavia 'udai."

29 Kau mato ua'i delava lele kanaua deika koanai dediaka, "E'ulua," vaida dediaka, "Anelu ka Iesu eluva venia."

30 Iesu e'outa ediaka, "Lele kanania e'asi 'eva oi bevanama'inamui 'ounai, ia sia lau.

31 Vali'u melala kanania 'eva kanobata bevaluvala melalana, inoku kanobata kanania eloviala kauna Satani vali'u belo'oa asi.

32 Kanobatai lau beabi'u isi koanai kau boutai bavelita be'asi keva'u."

33 Ia luva kanania eluvaia 'eva ia a beba koma dalana eluva vaia.

34 Kau mato dediaka, "Talavatuui luva lai aika ediaka Keliso 'eva bemia keinikeini, oi aboina odiaka, 'Kau Nakuna 'eva beabia isi.' Kau Nakuna kanania 'eva dai?'"

35 Inoku Iesu eta luva evamuea ediaka, "Melala kava'ina mo 'eva 'ailala ita oi bomimia. 'Ailala oi oabia laloanai oda'a, vabuto'o betata'u asi'i ema'alavumui makauna. Vabuto'o laloanai edada'a kauna 'eva sia eikabasi ia a eda'ala.

36 'Ailala oi oabia do'o laloanai oabivenia, kanaua'i oi 'eva 'ailala nakunai oi bo'ao." Iesu eluva koa mulinai kevatai eda'a ovo eda'a epode.

Iuda Kauta Doutamo

Iesu Sia Deabivenia.

37 Iesu vatabulovo koata doutamo vailatai evavai, beia ia sia deabivenia.

38 Kanania 'eva Isaia enolea kauna ena luva ivamomo'aina kanania eluva koma, "Lovia namana e, dai emai luva lai aluvaia luvana eabivenia,

maivaka Lovia namana imana
siavuna 'eva dai kevanai
bevala'asia?"

Isa 53.1

³⁹ Kanaua 'ounai kau mato beabiveni 'eva sia edaia, 'olana Isaia vaka eluva vitaitanai ediaka,
⁴⁰ "Dilava eta'u makata eva'edeta,
mai nuata e'alavu,
asi'i makatai dava demaika
nuatai demalalovai 'eva demalalo'udai,
inoku amavanama'inata makauna,
Dilava kanaua eluva koma."

Isa 6.10

⁴¹ Isaia luva kanania eluvaia 'olana Iesu ena nuavi eikaia inoku eluvavaia.
⁴² Melala kanaua'i Iuda kauta namata doutamo Iesu deabivenia. Beia Palisea kauta makauta demakau 'ounai eta abiveni sia de'ou dae, 'olana Iuda kauta eta lo'eai asi'i demavala'asita makauna,
⁴³ 'olana ia kau etai akuabalai deula venia vaika vakaia Dilava ena akua-balai.

Iesu Ena Luva Betata'u Kau Bevaluvala.

⁴⁴ Inoku Iesu evaoi 'unu'unu ediaka, "Kau ka lau eabiveni'u kauna 'eva sia lau mo eabiveni'u beia esini'u kauna kanaua vaka eabivenia.

⁴⁵ Kau ka lau eika'u kauna 'eva lau esini'u kauna kanaua vaka eikala.

⁴⁶ Lau 'eva 'ailala boina asi kanobatai, kanaua ounai lau deabiveni'u kauta boutai 'eva sia vabuto'o laloanai bemimia.

⁴⁷ Kau ka e'u luva 'uluta e'ika beia sia eabidaeta kauna 'eva lau ia sia bavaluvala. Lau sia kanobata bavaluvala dainai asi beia kanobata bavamaulia.

⁴⁸ Kau ka lau sia e'ula veni'u mai e'u luva sia eabita dae kauna 'eva mai ivaluvana kauna ka emimia, melala to'onai aluvavai luvata kataua betata'u ia bevaluvala.

⁴⁹ 'Olana sia lau sibo'u e'u ulai aluluva, beia Kama'u esini'u kauna etata'u e'ou'u luva davana baluvala maivaka aboina baluvala.

⁵⁰ Inoku lau aikabasi ia ena luva pasisi 'eva bevada'amui maui keinikeini 'abuna, kanaua 'ounai aluvavai luvata kataua 'eva Kama'u e'ou'u luvata vitaitatai aluvavaita."

13

Iesu Ibanona Kauta Aeta Edeinita.

¹ Belani 'eva La'au keini naduna, Iesu eikabasi kanobata kanania bevikania beda'a Kamana kevana melalana 'ani edaia. Ia melala bounai kanobatai ia ena kau kauta elalo'au venita, vali'u ia ena lalo'au itoinai bevaikata beda'amo bebaba.

² Lavilavi deaniani laloanai, diabololo 'ani Simona nakuna Iuda Isakaliote kauna nuana eania Iesu venina beveveni mai kouna bekokou.

³ Iesu eikabasi 'eva Kamana eta'u dava boutai ia ena siavu venunai e'uleta, inoku ia 'eva Dilava enai easi maivaka bemumue beda'a Dilava kevana.

⁴ Inoku Iesu aniani 'abunai eko'isi, ena ivadodo tubu'ana akanai davana eabia ovo ene'eia divo inoku ikulada tubu'ana eabia kukanai elioia.

⁵ Vei nauai elaiia uda inoku ibanona kauta aeta edekini makava, ikulada tubu'ana kukanai elioia tubu'anai aeta eukuta lada.

⁶ Iesu easi Simona Petelo kevanai ela'asi koanai Petelo ediaka, "Lovia namana e, oni lau ae'u bodeinita, una?"

⁷ Iesu Petelo ena luva evamuea ediaka, “Vali'u lau dava avavaia davana oni ovonai sia o'ovo, beia beda'a muliai 'eva ovonai 'ani bovo.”

⁸ Petelo ediaka, “Asi'i, oni lau ae'u sia bodeini kovo.” Iesu enu'ovi ediaka, “Aemu sia badeinita koanai oni 'eva sia lau ibano'u kaumu.”

⁹ Simona Petelo ia e'ouia ediaka, “Lovia namana e, sia ae'u mo sibota, beia ima'u mai 'ola'u vaka bodeinita.”

¹⁰ Iesu enu'ovi ediaka, “Kau 'ani eidi'u kauna 'eva kauna itoina 'ani emakamaka inoku aena mo bodeinita. Oi 'eva 'ani oi omakamaka, beia oi ka 'eva asido'o omakamaka.”

¹¹ 'Olana Iesu eikabasi dai 'eva ia venina beveveni mai kouna bekokou, kanaua 'ounai ia ediaka, “Beia oi ka 'eva asido'o omakamaka.”

¹² Aeta edeini koa mulinai ena ivadodo tubu'ana eabia evadodoa 'udai. Emue 'abunai emiadio. Ia eta'u elavuaita ediaka, “Lau dava kevamuiavavaia davana anina oi oikabasia?”

¹³ Oi lau o'ae'u emui vaikabasi kau'u mai Lovia namana, kanaua oi oluva koma 'eva ekomolo, 'olana lau 'eva kanaua boi'u.

¹⁴ Inoku lau emui Lovia namana mai emui vaikabasi kau'u 'ani aemui adeinita koanai oi vaka banomui ka ka aeta oi bodeinita.

¹⁵ Lau oi kevamuiavavaia koa kanania avavaia oi oikala koana vitaitanai mo oi bovavaia.

¹⁶ Lau oi luva umauna a'oumui, da'alaabi kauna 'eva ena 'ola kauna sia ekeinai, maivaka veauneke kauna 'eva esinia kauna sia ekeinai.

¹⁷ Vali'u avavai koata katania anita 'ani oi oikabasita, inoku oi bovavaita koanai Dilava oi bevanama'inamui.

Iesu Eta'u Ia Venina Beveveni Mai Kouna Bekokou Kauna E'ouia Dae Makava.

(Mt 26.20-25; Mk 14.17-21; Lk 22.21-23)

¹⁸ “Lau sia oi boumuiavavaia lovamui a'aku, lau adilata kauta kataua 'eva aikabasita. Beia Puka kabukabunai deleleia luvana kanaua 'eva bemomo'aia, 'Laluana palaoa lai ani ka'ona kauna eta'u lau evaiviivi'u.’

¹⁹ Vali'u dava kanania asido'o epupulu laloanai lau oi a'oumui vaika, kanaua 'ounai bepupulu koanai oi boobiveni lau 'eva lau.

²⁰ Lau oi luva umauna a'oumui, kau ka lau asinia kauna eabia dae kauna 'eva lau eabi'u dae, mai kau ka lau eabi'u dae kauna 'eva esini'u kauna vaka eabia dae.”

²¹ Iesu luva kanania eluvaia mulinai ia nuana ebavunu inoku eluva asi ediaka, “Lau oi luva umauna mo a'oumui. Oi kaumu ka 'eva lau veni'u beveveni mai kou'u bekokou.”

²² Kanaua 'ounai ibanona kauta sibota deviika viveni sia deikabasi ia 'eva dai lovana eakuia.

²³ Ia ibanona kauta ka Iesu ena lalo'au kauna Iesu kevanai emiadio.

²⁴ Simona Petelo makana evailu ia kevanai inoku ediaka, ‘Lavavaia ia dai lovana eakua.’

²⁵ Iesu kevanai emiadio kauna kanaua eilu keke eda'a Iesu kevana elavuaita ediaka, “Lovia namana e, oni dai lovana oakua?”

²⁶ Iesu ia ena luva evamuea ediaka, “Palaoa kena nau laloanai baudala uku bavenia kauna 'eva kanaua.” Inoku Iesu eta'u palaoa eabia nau laloanai eudaia uku inoku Iuda evenia, ia 'eva Simona nakuna Isakaliote kauna.

²⁷ Komolonai Iuda palaoa eabia eania 'eva Satani ia nuanai edodo. Inoku Iesu Iuda e'ouia ediaka, “Dava bovavaia davana 'eva vavaia kaokao.”

²⁸ Aniani 'abunai demia kauta sia deikabasi Iesu luva kanaua dava 'ounai ia e'ouia.

²⁹ Iuda 'eva moni iko'unina e'imaia 'ounai vaida delalovaia Iesu ia e'ouia nadu dainai dava deula venita davata betatava, 'o dava vaida ta'ovala kauta bevenita.

³⁰ Iuda palaoa kena eabia eania mulinai, komolonai eko'isi ela'asi, 'eva 'ani eboni.

Talavatu Luvana Makamakana.

³¹ Iuda ela'asi eda'a koanai, Iesu ediaka, "Vali'u 'eva lau Kau Nakuna e'u nuavi bela'asi mai lau e'uai Dilava ena nuavi vaka bela'asi.

³² Inoku lau e'uai Dilava ena nuavi bela'asi koanai Dilava vaka lau Kau Nakuna e'u nuavi bevala'asia, inoku komolonai mo bevavaia.

³³ Naku'u e, lau 'eva melala kava'ina mo oi ita ekamia. Inoku oi lau bokavu'u. Iuda kauta a'outa vitaitanai vali'u oi a'oumui, lau badada'a 'abuna 'eva sia 'ani oi boda'a.

³⁴ Lau oi talavatu luvana makamakana avenimui, oi bovilalo'au viveni. Lau oi alalo'au venimui vitaitanai oi vaka oi bovilalo'au viveni.

³⁵ Oi bovilalo'au viveni koanai, kau boutai beikabasi oi 'eva lau ibano'u kaumui."

Iesu Eta'u Petelo Ia Be'oua Avuavu

Luvana Eluvavaia Makava.

(Mt 26.31-35; Mk 14.27-31; Lk 22.31-34)

³⁶ Simona Petelo ia elavuaia ediaka, "Lovia namana e, a boda'ala?" Iesu ediaka, "Vali'u lau adada'a 'abuna oni lau muli'uai sia 'ani boasi, beia muliai 'eva muli'uai bo'asi."

³⁷ Petelo elavuai ediaka, "Lovia namana e, vali'u mulimuai dava 'ounai sia 'ani bavasi? Oni daimuai Lau e'u mauili bane'ea divo."

³⁸ Inoku Iesu ia ena luva evamuea ediaka, "Lau dai'uai oni emu mauili bone'ea divo dokadoka, una? Lau oni luva umauna a'oumu, o'oloko asido'o be'alala laloanai oni melala koi lau bo'ou'u avuavu."

14

Iesu 'Eva Kamana Kevana

Beda'ala Kauta Eta Dala.

¹ Iesu ediaka, "Nuamui sia oi bovbavunu. Dilava oi boabivenia, lau vaka oi boabiveni'u.

² Kama'u ena lumai 'eva mia 'abuta doutamo, bema asi'i koanai lau oi 'ani bama'oumui. Lau bada'a oi emui 'abu ka bava'olua.

³ Lau bada'a oi emui 'abu ka bava'olua, mulinai bamumue ba'asi bavua-mui ekada'a lau a'i bamimia 'eva oi vaka ua'i lau ita ekamia.

⁴ Lau badada'a 'abuna dalana 'eva oi 'ani oikabasia."

⁵ Toma Iesu e'ouia ediaka, "Lovia namana e, lai sia aikabasi oni 'abu dava boda'ala, inoku dalana 'eva a lai baikabasia koma?"

⁶ Iesu enu'ovi ediaka, "Dala 'eva lau, luva umauna 'eva lau, mai mauili vaka lau. Kamata kevana beda'ala kauta boutai eta dala 'eva lau.

⁷ Oi lau bomaikabasi'u dokadoka koanai, Kama'u vaka oi bomaikabasia, vali'u vailata beda'ala laloanai ia 'ani oi oikabasia maivaka 'ani oi oikaia."

⁸ Pilipo Iesu e'ouia ediaka, "Lovia namana e, Kamata vaikamai kanaua'i 'eva emai ula bounai bedaia."

⁹ Iesu enu'ovi ediaka, "Pilipo e, lau oi ita 'ani kamia dau'adau'a, beia oni 'eva lau sia oikabasi'u, una? Kau ka lau eika'u kauna 'eva Kama'u 'ani eikaia, oni aboina odiaka, Kamata vaikamai?"

¹⁰ Lau 'eva Kama'u nuanai mai Kama'u 'eva lau nua'uai kanaua 'eva sia oabivenia? Aluva venimui luvata katania 'eva sia lau sibo'u e'u ulai aluluva, nia 'eva Kama'u lau nua'uai emimia kauna ena vinaula evavaita.

11 Lau badiaka lau 'eva Kama'u nuanai mai Kama'u 'eva lau nua'uai koanai oi boobiveni'u, asi'i koanai avavaita vinaulata 'outai oabiveni'u.

12 "Lau oi luva umauna mo a'oumui, kau ka lau eabiveni'u kauna 'eva avavaita vinaulata kataua ia vaka bevavai. Mune'e vinaula namata umauta vaka bevavai, 'olana lau adada'a Kama'u kevana.

13 Inoku lau va'uai oi bonoinoi vai davata boutai bavavaita. Kanaua'i Kama'u ena nuavi 'eva bela'asi Nakuna dainai.

14 Lau va'uai dava ka oi bonoinoi vaia 'eva lau batata'u bavavaia.

Iesu Eluva'ana'i Idume Kabukabuna Besinia Be'asi.

15 "Bema oi lau bolalo'au veni'u koanai e'u talavatu luvata daitai oi bodadai.

16 Lau batata'u Kama'u banoia inoku Vidulu idumena ka bevenimui, ia 'eva oi ita bemia keinikeini.

17 Ia 'eva luva umauna Idumena Kabukabuna, kanobata kauta 'eva sia 'ani beabiadae 'olana sia deikaia mai sia deikabasia, beia oi 'eva ia oi oikabasia 'olana ia ita oi omimia mai oi nuamuiai bemimia.

18 "Lau sia bavanimui 'avaea itani melo sinana kamana asi'i melona boina, lau 'ani bamue basi kevamui.

19 Melala kava'inamo laloanai kanobata kauta 'eva lau sia beika'u 'udai, beia oi 'eva lau oi boika'u, 'olana lau amaui 'ounai oi vaka bomauli.

20 Melala kanaua be'asi laloanai oi bolaloune lau 'eva Kama'u nuanai, oi 'eva lau nua'uai, maivaka lau 'eva oi nuamuiai.

21 Kau ka lau e'u talavatu luvata eabita dae mai daitai edadai kauna 'eva lau elalo'au veni'u, lau elalo'au veni'u kauna 'eva Kama'u betata'u ia belalo'au venia. Inoku lau vaka ia balalo'au venia, mai ia kevanai sibo'u bavala'asi'u."

22 Iuda beia sia Isakaliote kauna, Iuda edeana ka Iesu elavuaia ediaka, "Lovia namana e, lai mo kevamaia'i dava 'ounai bovala'asimu beia kanobata kauta kevatai 'eva sia bovala'asimu?"

23 Iesu Iuda ena luva evamuea ediaka, "Kau ka lau elalo'au veni'u kauna 'eva e'u vaikabasi luvata daitai bedadai, Kama'u betata'u ia belalo'au venia, maivaka lau Kama'u ita lai ba'asi kevanai ita lai bamimia.

24 Kau ka lau sia elalo'au veni'u kauna 'eva e'u vaikabasi luvata daitai sia edadai. Luva 'uluta oi o'ika luvata katania 'eva sia lau sibo'u e'u luva beia Kama'u esini'u kauna ena luva.

25 "Lau oi ita kamimia do'o laloanai dava katania 'ani a'oumui.

26 Beia Vidulu Idumena Kabukabuna, lau va'uai Kama'u besinia kauna betata'u dava boutai bevaikabasimui, mai a'oumui luvata boutai bevalalomui une.

27 "Vaka'ona oi kevamuiiai avikania. Lau e'u vaka'ona oi avenimui, vaka'onana 'eva sia kanobata eveveni boina. Nuamui sia oi bovabavunuta mai sia oi bomakau.

28 Aluluva lele'u 'ani oi oika, Lau 'ani bavanimui badada'a inoku 'ani bamue'udai basi kevamui. Oi lau olalo'au veni'u koanai, lau adada'a Kama'u kevana 'eva lalomui bemanama 'olana ia 'eva lau ekeini'u vaika.

29 Lau dava katania vali'u 'ani avaikabasimui makava vakaia muliai bepupulu, kanaua 'ounai depupulu koanai oi 'ani oabiveni'u.

30 "Lau oi ita sia ekaluvaluva dau'a 'olana kanobata kanania eloviala kauna 'ani e'asi. Ia lau keva'uai ena siavu asi'i,

31 beia kanobata beikabasi, lau 'eva Kama'u alalo'au venia mai Kama'u eluva veni'u davata vitaitatai avavaia. Oko'isi kada'a."

¹ Iesu ediaka, “Lau 'eva vine auna umauna, mai Kama'u 'eva vine kulana i'imana kauna.

² Ia etata'u lau kau'uai sia devuvua le'eta boutai 'eva ekalata ovo inoku devuvua le'eta boutai 'eva eloleta bemakamaka kanaua'i ia vuata doutamo bevuvua.

³ Lau oi a'oumui luvata 'outai 'ani oi omakamaka.

⁴ Oi lau nua'uai oi bomimia, inoku lau vaka oi nuamuiiai bamimia. Sia le'e ka sibona 'ani bevua 'avaea, le'e 'eva vine auna akanai belava 'au kave'i 'eva bevuvua. Kanaua vitaitanai mo oi lau kau'uai sia oi bolava 'au kave'i 'eva vuavuumui sia bepupulu.

⁵ “Lau 'eva vine auna oi 'eva le'ena. Bema kau ka lau nua'uai emimia, mai lau ia nuanai amimia kauna 'eva vuana doutamo bevapuluta, oi lau bovikani'u koanai sia dava ka 'ani oi bovavaia bedaia.

⁶ Kau ka lau nua'uai sia bemimia koanai, ia 'eva vitaitana au le'ena deitua 'au inoku e'ibu boina. Au le'eta kataua boita 'eva devisita, 'alova laloanai bekapota dodo inoku de'ani.

⁷ “Oi lau nua'uai oi bomimia mai e'u luva oi nuamuiiai bemimia koanai oi oulavai davata boutai oi bonoinoivai 'eva bevenimui.

⁸ Oi vuavuumui bedoutamo lau ibano'u kaumui ai oi bo'ao koanai Kama'u ena nuavi bela'asi.

⁹ Kama'u lau elalo'au veni'u vitaitanai lau vaka oi alalo'au venimui. E'u lalo'au laloanai oi bomimia.

¹⁰ Lau Kama'u ena talavatu luvata daitai adadai 'ounai ena lalo'au laloanai amimia, vitaitanai oi e'u talavatu luvata daitai oi bodadai koanai, oi vaka lau e'u lalo'au laloanai oi bomimia.

¹¹ Lau luva kanania 'ani a'oumui kanaua 'ounai e'u lalonama 'eva oi nuamuiiai bemimia, kanaua'i emui lalonama 'eva benama vaika.

¹² Lau e'u talavatu luvana 'eva kanania. Lau oi alalo'au venimui vitaitanai banomui ka ka oi bolalo'au venita.

¹³ Kau ka ena lalo'au namavaikana ena kau kevatai kauna 'eva ena maui beveveni ia daitai.

¹⁴ Lau a'oumui davana oi bovavaia koanai, oi 'eva lau e'u kau.

¹⁵ Vali'u vailata eda'ala laloanai lau sia ba'aemui 'udai da'alaabi kaumui, 'olana da'alaabi kauna 'eva sia eikabasi ia ena 'ola kauna dava evavaia. Beia lau oi ba'aemui e'u kau, 'olana Kama'u enai aikabasita davata boutai 'ani avaikabasimui.

¹⁶ “Oi lau sia oi odila'u beia lau oi adilamui mai abimui isi oi bodada'a vuavuumui oi bovapulu, vuavua kataua bemia keinikeini. Inoku lau va'uai oi bonoinoi vaita davata Kama'u betata'u bevenimui.

¹⁷ E'u talavatu luvana 'eva kanania. Banomui ka ka oi bolalo'au venita.

Kanobata Kauta Bevaiiivimui.

¹⁸ “Kanobata kauta bevaiiivimui koanai, oi boikabasi 'eva ia lau devaiivi-ivi'u makava.

¹⁹ Oi kanobata enai oi bo'ao koanai, ia betata'u oi belalo'au venimui vitaitana ia ena umauna. Beia oi 'eva sia kanobata ena. Lau oi kanobatai adilamui kanaua 'ounai kanobata etata'u oi evaiiivimui.

²⁰ A'oumui luvata oi bolalovai'inita, da'alaabi kauna 'eva ena 'ola kauna sia ekeinia. Lau devaanaana'u koanai, oi vaka bevaanaanamui. Lau e'u luva daitai bemadai koanai oi vaka emui luva daitai bemadai.

²¹ Oi 'eva lau e'u 'ounai koakoa katania kevamuiiai bevavaita, 'olana esini'u kauna sia deikabasiasia.

²² “Lau sia bama asi bama'outa koanai ia si'avanai sia bema va'eva. Beia vali'u ia eta si'avanai be'ou to'ato'a dalana 'ani asi'i.

²³ Kau ka lau evaiiivi'u kauna 'eva Kama'u vaka evaiiiviva.

²⁴ Sia kau ka evavai vinaulata 'eva lau ia viloatai vinaulata sia bama vavai koanai ia si'avanai sia bema va'eva. Beia valiu vatabulovo koata katania 'ani deikata, inoku lau Kama'u itana, lai lalua 'eva devaiviivimai do'o.

²⁵ Beia ia kanania devavaia 'eva eta talavatu pukana laloanai deleleia luvana kanaua bevamomo'aia,
'Sia mai aninai lau
devaiviivi'u 'avaea.'

Sal 35.19, 69.4

²⁶ "Vidulu kauna luva umauna Idumena Kabukabuna, Kama'u kevanai be'asi basinia bevasi kele'emui, inoku ia 'eva lau vali'u beakava.

²⁷ Oi vaka lau vali'u oi bokakava 'olana oi lau ita makavanai kamia easimo vali'u."

16

¹ Iesu e'outa ediaka, "Lau oi luva katania boutai 'ani a'oumui 'olana 'eva emui abiveni asi'i emataule makauna.

² Oi 'eva Iuda kauta eta lo'eai bevala'asimui. Luva umauna, melalana be'asi laloanai oi beaku bamui kauta belalovaia ia 'eva Dilava da'alana de'abi.

³ Ia oi kevamuii dava katania bevavai 'olana ia 'eva Kama'u 'o lau sia deikabasimai.

⁴ Beia lau oi luva katania 'ani a'oumui 'eva melalana be'asi koanai lau avaikabasimui luvata 'ani oi bolalota une.

Idume Kabukabuna Ena Vinaula.

"Beia 'ana'inai 'eva sia a'oumui 'olana lau oi ita kamia 'ounai.

⁵ Beia vali'u lau 'ani adada'a esini'u Dilavana kevana, beia oi sia ka olavuai'u odiaka, 'Oni a oda'ala'

⁶ 'Olana lau oi luva katania 'ani a'oumui 'ounai nuamui 'eva vilaloai evonu.

⁷ Beia lau oi luva umauna a'oumui, oi emui nama'ina dainai 'eva lau 'ani bada'a tau. 'Olana lau sia badada'a koanai vidulu kauna sia be'asi kele'emui, beia lau badada'a koanai ia basinia be'asi kele'emui.

⁸ Ia be'asi koanai, kanobata kauta 'eva si'avana, komolo mai Dilava ena valuva dalana sia deikabasia kauta bevaikabasita.

⁹ Ia si'avana lovana beakua 'olana kau lau sia deabiveni'u.

¹⁰ Komolo lovana beakua 'olana lau adada'a Kama'u kevana inoku oi 'ani lau sia oi boika'u 'udai.

¹¹ Valuva lovana beakua 'olana kanobata kanania eloviala kauna 'ani valuva eabia mekau evuala 'ounai.

¹² "Lau oi luva doutamo bama'oumui, beia vali'u oi bo'abi 'eva sia be'daimui.

¹³ Beia luva umauna Idume Kabukabuna be'asi koanai, ia betata'u luva umauta boutai laloatai be'ana'ia vaimui. Ia sia sibona ena lalovaiai belu-luva, ia kaianai e'ika davana mo beluva vaia mai bepupulu davana oi bevaikabasimui.

¹⁴ Ia betata'u e'u nuavi bevala'asia 'olana lau e'uai luva be'abi inoku oi bevaikabasimui.

¹⁵ Kama'u ena dava boutai 'eva lau e'u. Kanaua 'ounai lau adiaka, Idume Kabukabuna lau keva'uai luva be'abi inoku oi bevaikabasimui.

¹⁶ Melala kava'ina mo laloanai oi lau sia boika'u, inoku melala kava'ina mo mulinai 'eva oi lau boika'u."

Vilalo Mai Lalonama.

¹⁷ Ia ibanona kauta vaidia sibota viloatai devilavuai viveni dediaka, "Elu-luva ediaka, 'melala kava'ina mo laloanai oi lau sia boika'u, inoku melala

kava'ina mo mulinai 'eva oi lau boika'u,' "olana lau 'eva Kama'u kevana ada'ala,' luva kanaua anina 'eva dava?"

¹⁸ Ia sibota devilavuai 'udai 'udai dediaka, "Melala kava'ina mo anina 'eva dava? Ia dava eluvavaia 'eva ita ovonai sia ka'oyo."

¹⁹ Iesu eikabasi ibanona kauta deula belavuaia 'ounai e'outa ediaka, "E'u luva kanania, 'melala kava'ina mo laloanai oi lau sia boika'u inoku melala kava'ina mo mulinai oi lau boika'u' 'eva oi sibomui viloamuia oi ovilavuai viveni, una?"

²⁰ Lau oi luva umauna a'oumui, oi 'eva bokakani mai nuamui bevilalo, laloanai kanobata kauta 'eva belalonama. Oi 'eva nuamui bevilalo, beia emui vilalo 'eva lalonama be'ao.

²¹ Ateate ka melo bevapulus koanai eanana 'olana ena mauili bonina 'ani edaia, beia melo 'ani epulu koanai ena anaana ebolabolala ia lalona denanama 'olana melo ka kanobatai 'ani epulu.

²² Vitaitana kanaua boina vali'u 'eva emui vilalo melalana, beia lau 'eva oi baikamui 'udai oi bolalonama, inoku sia kau ka emui lalonama kanaua beabia tau.

²³ Melala kanaua be'asi laloanai oi lau keva'uai sia dava ka oi bolavuai vaia. Lau oi luva umauna a'oumui, lau va'uai dava ka oi bonoinoi vaia 'eva Kama'u betata'u bevenimu.

²⁴ Lau va'uai sia dava ka oi onoinoi vaia 'ani easimo vali'u. Oi bonoia 'eva bevenimui oi boabia, inoku lalonama nuamui bevavonua.

Iesu Eta'u Kanobata Ekaokaia.

²⁵ "Lau a'oumui luvata boutai 'eva luva ivavitaitatai aluvavai, bonina be'asi laloanai lau oi luva ivavitaitatai sia ba'oumui, beia Kama'u valina bakava kave'i.

²⁶ Melala kanaua laloanai lau va'uai oi bonoinoi, beia lau sia adiaka 'eva Kama'u banoia oi bedulumui,

²⁷ 'olana oi lau olalo'au veni'u maivaka lau Dilava kevanai asi 'eva oi ovamomo'ai'u dainai Kama'u sibona oi elalo'au venimui.

²⁸ Lau Kama'u kevanai asi kanobatai, vali'u kanobata bavikania bamue'udai badada'a Kama'u kevana."

²⁹ Inoku ibanona kauta de'ouia dediaka, "Vali'u emu luva 'eva e'ailala kave'i, sia 'ana'inai luva ivavitaitatai oluva boina.

³⁰ Vali'u lai 'eva oni sia balavuaimu 'udai, inoku 'ani lai aikabasi oni 'eva dava boutai oikabasita, kanaua dainai lai abivenimu oni 'eva Dilava enai oasi."

³¹ Iesu eta luva evamuea ediaka, "Vali'u 'ani oi oabiveni'u, una?"

³² Beia melalana 'eva e'asi, mai 'ani easi, oi boumuia oi boda'a odaoda, ka ka oi boda'a emui vanua. Lau sibo'u oi bovikani'u. Beia lau 'eva sia sibo'u, 'olana Kama'u 'eva lau ita.

³³ Lau oi luva katania 'ani a'oumui, oi lau ita ekavaka'onamo ai vaka'ona oi boabia. Kanobata kanania'i oi bevaiviivimui, beia oi bovapasisi, lau 'eva kanobata 'ani akaokaia."

17

Iesu Ibanona Kauta Mai Abiveni Kauta Boutai Daitai Emeamea.

¹ Iesu luva kanania eluvaia mulinai, e'a'a dae vutuvutu eikaia inoku emeamea ediaka, "Kama'u e, melalana 'ani edaia nakumu ena nuavi vala'asia, inoku nakumu vaka oni emu nuavi bevala'asia.

² 'Olana oni siavu ovenia kau boutai be'ana'ia vaita, oni ota'u ovenia kauta boutai kataua mauili keinikeini bevenita.

³ Mauili keinikeini 'eva kanania, kau oni beikabasimu, oni mo sibomu 'eva Dilava umaumu, maivaka Iesu Keliso oni osinia kauna beikabasia.

4 “Vinaula oveni'u bavavaia vinaulana 'ani avaolea, inoku emu nuavi kanobata akanai 'ani avala'asia.

5 Kama'u e, kanobata asido'o epulu laloanai lau oni ita kamiavaia nuavina kanaua vali'u vailamuai nuavina e'uai vala'asia.

6 “Kanobatai oveni'u kauta kataua kevatai oni vamu 'ani avaikabasita, ia 'eva oni emu oni ota'u lau oveni'u, inoku ia emu luva dainai dedadai.

7 Vali'u ia 'ani deikabasi oveni'u davata boutai 'eva oni kevamuai de'asi.

8 “Olana o'ou'u luvata ia avaikabasita 'eva deabitadae, inoku deikabasi lau oni kevamuai asi maivaka devamomo'aia oni lau osini'u.

9 “Lau ia daitai ameamea. Lau 'eva sia kanobata kauta daitai ameamea, beia oveni'u kauta kataua daitai ameamea 'olana ia 'eva oni emu.

10 Lau e'u dava boutai 'eva oni emu, oni emu dava boutai 'eva lau e'u, inoku ia etai e'u nuavi ela'asi.

11 “Lau 'eva kanobatai sia bamia dau'a, avavasi oni kevamu, beia ia 'eva kanobatai bemimia do'o. Kama'u Kabukabuna e, oni vamu oveni'u vana siavunai botautaavu ia beka'onamo vitaitana ita kavaka'onamo boina.

12 Lau ia ita lai amia laloanai a'imata kave'i oni vamu oveni'u vana siavunai atautaavu. Sia ka etaule, beia betaule kauna ka'onamo mo etaule, puka kabukabuna luvana bevamomo'aia 'ounai.

13 Lau 'eva vali'u avavasi oni kevamu, beia kanobatai amimia do'o laloanai luva kania aluvavai, ia nuatai e'u lalonama itoina beabia.

14 “Emu luva 'ani ia avaikabasita inoku kanobata 'eva ia evaiivita, 'olana lau 'eva sia kanobata ena vitaitanai ia vaka sia kanobata ena.

15 E'u meamea 'eva kanobatai sia boabita tau beia diabololo kevanai botau-taavu.

16 Lau 'eva sia kanobata ena vitaitanai ia vaka sia kanobata ena.

17 Emu luva umaunai bovakabukabuta, emu luva 'eva luva umauna.

18 Oni lau osini'u asi kanobata kauta viloatai amia vitaitanai lau ia asinita deda'a kanobata kauta viloatai demimia.

19 Ia daitai lau sibo'u avakabukabu'u, ia vaka sibota emu luva umaunai bevakabukabuta.

20 “E'u meamea 'eva sia ia mo sibota daitai, ia eta luvai lau bevamomo'ai'u kauta kataua vaka daitai ameamea.

21 Kama'u e, oni 'eva lau nua'uai mai lau 'eva oni nuamuai, vitaitanai ia boutai 'eva nuata beka'onamo. Ia vaka be'asi ita nuatai kanaua'i kanobata kauta beikabasi oni 'eva lau osini'u.

22 Nuavi oveni'u nuavina 'eva ia avenita, ita nuata eka'onamo vitaitana ia nuata beka'onamo.

23 Lau 'eva ia nuatai inoku oni 'eva lau nua'uai. Inoku ia nuata beka'onamo kave'i kanobata kauta bevaikabasita oni 'eva lau osini'u, lau olalo'au veni'u vitaitanai ia vaka olalo'au venita.

24 “Kama'u e, lau a'ula 'ani oveni'u kauta kataua lau a'i 'eva ia vaka ua'i lau ita, inoku ua'i ia e'u nuavi oveni'u nuavina kanaua beikala 'olana kanobata asido'o ovavaia laloanai oni lau olalo'au veni'u 'ounai.

25 Kama'u komolo kaumu e, kanobata kauta 'eva oni sia deikabasimu, beia lau 'eva oni aikabasimu mai muli'uai dedada'a kauta kania deikabasi oni 'eva lau osini'u.

26 Lau 'eva oni vamu ia avaikabasita maivaka bavaikabasita basibasi, 'olana emu lalo'au kele'e'uai lalo'auna 'eva ia kevatai vaka bemimia, inoku lau vaka ia nuatai bamimia.”

18

Iesu Deabia Delioia.

(Mt 26.47-56; Mk 14.43-50; Lk 22.47-53)

¹ Iesu ena meamea evaolea koanai ia ibanona kauta ita Kidilona lavanai dekeini deda'a Olive kulana laloanai deda'adodo.

² Venina eveni mai kouna ekou kauna Iuda vaka 'abu kanaua eikabasia, 'olana melala doutamo Iesu mai ibanona kauta ita 'abu kanaua'i dedo'u.

³ Kabukabu kauta namata mai Palisea kauta deta'u lo'e kabukabuna de'imala kauta mai kuali kauta 'itona desinita 'eva Iuda eta'u kau kataua evada'ata deda'a, imata mai 'alovata, mai lamepata maivaka kuali davata deabi kula kanaua laloanai deda'adodo.

⁴ Iesu kevanai bepupulu davata boutai 'ani eikabasi, kanaua 'ounai eda'a keke eda'a kevatai elavuaia ediaka, "Oi dai okavua?"

⁵ Ia denu'ovi dediaka, "Iesu Nasaleta kauna." Inoku Iesu ediaka, "Lau kau'u kanania." Venina eveni mai kouna ekou kauna Iuda vaka ua'i ia ita delava.

⁶ Iesu ediaka, "Lau kau'u kanania." koanai ia delava dua de'eko kanoai denodivo.

⁷ Iesu mune'e elavuaia 'udai ediaka, "Oi dai okavua?" Inoku ia deluva 'udai dediaka, "Iesu Nasaleta kauna."

⁸ Iesu enu'ovi ediaka, "Ani a'oumui 'lau kau'u kanania.' Oi lau okavu'u koanai, kau katania oi bovikanita bedada'a."

⁹ Kanania epulu 'eva eluvavaia luvana bemomo'ai ediaka, "Ani oveni'u kauta kataua sia ka avataulea."

¹⁰ Simona Petelo 'eva mai ena kuali lepona, inoku evelia asi, kabukabu kauta namata 'olatai kauna ena da'alaabi kauna kaiana idibana epaia ovo. Da'alaabi kauna kanaua vana 'eva Malaku.

¹¹ Iesu Petelo e'ovenia ediaka, "Kuali lepona kanana iudana 'abunai udala. Anaana 'ouna kanania Kama'u eveni'u davana sia bainua, una?"

Iesu Devuaia Deda'a Ana Kevana.

¹² Kuali kauta eta 'ola kauna ita mai Iuda kauta namata lo'e kabukabuna de'imala kauta ita Iesu deabia delioia,

¹³ devuaia makava deda'a Ana kevana, 'olana Ana 'eva Kaiapa lavana. Vikau kanaua'i Kaiapa 'eva kabukabu kauta 'olatai kauna.

¹⁴ 'Aua'inai Kaiapa ena lalovaiai Iuda kauta namata e'outa ediaka, "Nama'ina 'eva kau ka'onamo bemaba kau boutai 'outai."

Petelo Melala Lava'ana'inanai

Iesu E'ouia Avuavu.

(Mt 26.69, 70; Mk 14.66-68; Lk 22.55-57)

¹⁵ Simona Petelo mai Iesu ibanona kauna ka ita Iesu mulinai deda'a. Ibanona kauna kanaua 'eva kabukabu kauta 'olatai kauna eikabasia kave'i 'ounai ia 'eva Iesu mulinai eda'a kabukabu kauta 'olatai kauna ena luma alana laloanai eda'adodo.

¹⁶ Beia Petelo 'eva ua'i nutuala aunai evi'ima, ibanona kauna kanaua kabukabu kauta 'olatai eikabasia kave'i kauna emue easi nutuala e'imaia vatona e'ouia, inoku Petelo evadodoa ala laloanai.

¹⁷ Nutuala e'imaia vatona kanaua Petelo elavuaia ediaka, "Oni vaka kau kanaua ibanona kaumu ka, una?" Petelo ediaka, "Sia lau."

¹⁸ 'Elu namavaikana 'ounai da'alaabi kauta mai lo'e kabukabuna de'imaia kauta 'alova detouia kevanai delava kauta devasiavusiavuta. Petelo vaka ia vilolatai 'alova enanata.

Kabukabu Kauta Namata 'Olatai Kauna Eta'u Iesu Elavuaia.

(Mt 26.59-66; Mk 14.55-64; Lk 22.66-71)

¹⁹ Melala kanaua'i kabukabu kauta 'olatai kauna Ana, Iesu kevanai ibanona kauta mai ena vaikabasi luvata elavuai lavuai vaita.

20 Iesu ia ena luva evamuea ediaka, “Lau 'eva melala bounai kau mato vailatai aluvaluva, lau melala boutai Iuda kauta de'asi deakubou 'abutai ua'i Iuda kauta eta lo'e laloatai mai lo'e kabukabuna laloanai avaikabasi, lau sia luva ka vunivuniai aluvala.

21 Oni lau dava 'ounai olavuai'u? E'u luva deika kauta kataua boma-lavuaita, ia deikabasi lau luva dava aluvaia.”

22 Iesu kanaua eluva koma koanai ua'i lo'e kabukabuna de'imaia kauna ka eko'isi Iesu vailana epi'aia inoku ediaka, “Kabukabu kauta 'olatai kauna ena luva sia kanaua bovamuea koma.”

23 Iesu ena luva evamuea ediaka, “Lau aluva va'eva koanai, luvana kanaua luvala asi. Beia lau luva umauna aluvala koanai dava 'ounai opi'a'u?”

24 Inoku Ana eta'u Iesu imana ido'o 'initai esinia eda'a Kaiapa kabukabu kauta 'olatai kauna kevana.

Petelo Iesu E'ouia Avuavu.

(Mt 26.71-75; Mk 14.69-72; Lk 22.58-62)

25 Simona Petelo 'eva ua'i 'alova kevanai elava enanaia laloanai delavuaia dediaka, “Oni vaka ia ibanona kaumu ka, una?” Ia e'ou avuavu ediaka, “Lau 'eva asi'.”

26 Kabukabu kauta 'olatai kauna ena da'alaabi kauna kaiana Petelo epaia ovo kauna kadi'a'ana ka eta'u Petelo elavuaia ediaka, “Oni Iesu ita kula kanaua laloanai aikamui, una?”

27 Petelo mune'e e'ou avuavu 'udai laloanai, o'oloko komolonai e'alala.

Iesu Pilato Vailanai.

(Mt 27.1, 2, 11-14; Mk 15.1-5; Lk 23.1-5)

28 Iuda kauta namata Kaiapa ena lumai Iesu devala'asia devada'ala deda'a Kavana kauna ena luma namanai. Kavana kauna 'eva Lomai easi. Ua 'eva ani taba elele inoku Iuda kauta namata 'eva Kavana ena luma laloanai sia deda'adodo, 'olana ia eta koakoa daitai Dilava vailanai sia be'obu La'au keini naduna laloanai beaniani 'ounai.

29 Kanaua 'ounai Pilato ela'asi eda'a kevatai elavuaia ediaka, “Kau kanania va'eva dava evavaia 'ounai oi ovuala o'asi keva'u?”

30 Ia ena luva devamuea dediaka, “Ia si'avana sia bemavavaia koanai sia lai bamavuala bama asi oni kevamu.”

31 Pilato e'outa ediaka, “Oi sibomu emu ovuaia oda'a emui talavatu vitaitanai oi bovaluvala.” Iuda kauta namata dediaka, “Lai sia mai siavumai kau ka lai bava bala.”

32 Kanania epulu 'eva Iesu a beba koma luvana eluvavaia luvana kanaua bemomo'ai.

33 Pilato luma namanai edodo 'udai inoku Iesu e'aeia, elavuaia ediaka, “Oni Iuda kauta eta lovia 'olana, una?”

34 Iesu ia ena luva evamuea ediaka, “Oni sibomu emu lalovaii lavuai kanana oluvala, 'o kau vaidai oni kevamuai lau lova'u deakuia luvana oluva vaia?”

35 Pilato Iesu ena luva evamuea ediaka, “Inoku oni olalovaia lau 'eva Iuda kau'u? Oni emu kau umauta mai kabukabu kauta namata oni devuamu deasi keva'u. Oni va'eva dava ovavaia?”

36 Iesu enu'ovi ediaka, “E'u lovia vanuana 'eva sia kanobata kanania enai. Bema e'u lovia vanuana kanobata kanania enai koanai, e'u kau dai'uai bemaviaku, Iuda kauta namata imatai bemavamauli'u, beia e'u lovia vanuana 'eva sia kanobata kanania'i.”

37 Pilato ia elavuaia ediaka, “Oni 'eva lovia 'olana ka, una?” Iesu ia ena luva evamuea ediaka, “Luvana mo kanana 'ani oluvala, lau 'eva lovia 'olana ka, lau apulu asi kanobatai 'olana 'eva luva umauna bavala'asia. Luva umaunai demimia kauta 'eva lau lele'u be'ika.”

³⁸ Pilato elavuaia ediaka, “Luva umauna 'eva dava?”

Kanaua eluva koma, inoku ela'asi 'udai eda'a Juda kauta namata e'outa ediaka, “Kau kanania kevanai sia va'eva ka adavalia.

³⁹ Oi emui koakoa daitai La'au keini naduna bonina edaia koanai vabuto'o kauna ka avala'asia. Inoku oi o'ula Juda kaumui emui lovia 'olana bavala'asia, una?”

⁴⁰ Inoku ena luva vaoiai devamuea dediaka, “Asi'i. Sia ia. Lai a'ula Balaba bovenimai.” Balaba 'eva abi'avaea kauna.

19

Pilato Eluva Iesu Au Ido'o Valaukuna Akanai Beaku Bala.

(Mt 27.15-31; Mk 15.6-20; Lk 23.13-25)

¹ Pilato kuali kauta luva evenita Iesu deabia devuaia deda'a de'odia.

² Kuali kauta 'ini auma ilo'una ia 'olanai deva'olala, maivaka tubu'a 'aolana ka ia devavadodoia.

³ Inoku kevanai delava basia dediaka, “Juda kauta eta Lovia 'olana e, bomauli keinikeini!” Inoku vailana depi'aia.

⁴ Pilato mune'e ela'asi, Juda kauta namata e'outa ediaka, “Kaiamui ovaala, lau batata'u oi vailamuiai ia bavala'asia kanaua'i oi boikabasi ia kevanai sia va'eva ka adavalia kovo.”

⁵ Inoku Iesu ela'asi koanai 'olanai 'ini auma ilo'una e'olaia mai kaunai tubu'a 'aolana ivavadodona. Pilato e'outa ediaka, “Kau kanania oikaia.”

⁶ Kabukabu kauta namata mai lo'e kabukabuna de'imala kauta Iesu deikaia koanai devaoi dediaka, “Au ido'o valaukuna akanai oaku bala, au ido'o valaukuna akanai oaku bala!” Pilato ia e'outa ediaka, “Oi sibomui oabia, au ido'o valaukuna akanai oi boaku bala, 'olana lau ia kevanai sia va'eva ka adavalia.”

⁷ Juda kauta namata ia ena luva devamuea dediaka, “Lai 'eva mai emai talavatu. Talavatu kanaua vitaitanai ia 'eva bebaba, 'olana ia sibona Dilava nakunai evaaoa.”

⁸ Pilato lele kanaua eika koanai emakau si'asi'a,

⁹ inoku ena vinaula lumanai eda'adodo 'udai, Iesu elavuaia ediaka, “Oni a'i oasi?” Beia Iesu sia luva ka eluvaia.

¹⁰ Pilato ediaka, “Oni okokono mo sia boluva veni'u, una? Oni sia oikabasi lau 'eva mai e'u siavu oni baluvumu 'o au ido'o valaukuna akanai baku bamu?”

¹¹ Iesu ia ena luva evamuea ediaka, “Dilava oni siavu sia bemavenimu koanai oni lau boaku ba'u siavuna 'eva kevamui bema asi'i. Kanaua 'ounai oni imamui euda'u 'ovu kauna kanaua ena si'avana 'eva oni emu si'avana ekeinina.”

¹² Melala kanaua'i Pilato dala ekavu Iesu beluvua. Beia Juda kauta namata devaoi basibasi dediaka, “Kau kanana boluvua koanai oni 'eva sia lovia 'olana Kaisala ena kau. Kau ka ia sibona lovia 'olanai evaaoa kauna 'eva Kaisala ena 'ou kauna.”

¹³ Pilato luva kanania eika koanai Iesu evala'asia, inoku ia 'eva ena valuva 'abuna mia'aunai emia divo, 'abu kanaua vana de'aeia 'eva 'bika'a palapalana', 'Ebelu leletai vana 'eva 'Kabata'.

¹⁴ Melala kanaua 'eva La'au keini naduna iva'oluna kave'i melalana, melala 'eva 'ani eado'alavuni, Pilato Juda kauta e'outa ediaka, “Emui lovia 'olana kanania oikaia.”

¹⁵ Ia devaoi dediaka, “Oaku bala, oaku bala, au ido'o valaukuna akanai oaku bala!” Pilato elavuaia ediaka, “Oi o'ula emui lovia 'olana kanana au ido'o valaukuna akanai baku bala?” Kabukabu kauta namata deluva dediaka, “Lai sia mai emai lovia 'olana kauna ka, Kaisala mo sibona.”

¹⁶ Inoku Pilato eta'u Iesu kuali kauta imatai eudaia au ido'o valaukuna akanai beaku bala.

*Iesu Au Ido'o Valaukuna
Akanai Dekokoia 'Au.*

(Mt 27.32-44; Mk 15.21-32; Lk 23.26-43)

Inoku kuali kauta Iesu devada'ala devuaia deda'a.

¹⁷ Iesu sibona ena au ido'o valaukuna evuaia deda'a 'abu ka vana "Ola kuliana", 'Ebelu leletai 'eva 'Kolokota'.

¹⁸ Kanaua'i Iesu au ido'o valaukuna akanai dekokoaia 'au, kau lua vaka ia ita dekokota 'au, ka avekenai ka avekenai, Iesu 'eva bo'adatai.

¹⁹ Pilato eta'u malele ka ua'i au ido'o valaukuna eakuia 'au, kanania eleleia koma, 'IESU NASALETA KAUNA, IUDA KAUTA ETA LOVIA 'OLANA.'

²⁰ Iuda kauta doutamo malele kanaua devakua, 'olana Iesu dekokoaia 'au 'abuna mai Ielusalema vanuana viloota 'eva sia edau'a. Maivaka malele kanaua 'eva 'Ebelu leletai, Loma leletai mai 'Elene leletai deleleia.

²¹ Inoku Iuda kauta eta kabukabu kauta namata Pilato de'ouia dediaka, " 'Iuda kauta eta Lovia 'olana' sia bomalelea. Beia kanania boina bomalelea, 'Kau kanania sibona ediaka, Lau 'eva Iuda kauta eta Lovia 'olana.' "

²² Pilato eta luva evamuea ediaka, "ani aleleia 'au davana kanaua boina mo bemimia."

²³ Kuali kauta Iesu dekokoaia 'au mulinai ena tubu'a deabia de'idia vitavani ka ka si'ata deabi. Ia ena tubu'a ivadodo laloanai tubu'ana 'eva sia ikuli 'inina, itoina 'eva akai dekulia easimo venuai.

²⁴ Kuali kauta sibota deluvaluva dediaka, "Sia eka 'idia beia punipuniai ekaikabasi dai beabia." Kanania epulu koma 'eva Puka kabukabunai deleleia luvana kanaua bemomo'ai luvana ediaka,

"Ia e'u tubu'a dekoaleia,
e'u ivadodo 'eva depunipuni vaia"

Sal 22.18

Kanaua 'ounai kuali kauta 'eva kanania devavaia koma.

²⁵ Au ido'o valaukuna kevanai delava 'a'ateta 'eva Iesu sinana mai sinana kadina, inoku Kolopa adana Malia mai Malia Makadala ateatena.

²⁶ Iesu ia sinana mai ibanona elalo'au venia kauna ua'i delava eikata koanai, sinana e'ouia ediaka, "Sina'u e, nakumu kanana."

²⁷ Ibanona kauna kevanai vaka e'ouia ediaka, "Lele'u ika, sinamu kanana." Melala kanaua'i ibanona kauna kanaua eta'u Malia evada'ala deda'a ena lumai demia.

Iesu Ena Ba.

(Mt 27.45-56; Mk 15.33-41; Lk 23.44-49)

²⁸ Kanaua mulinai Iesu eikabasi vinaula boutai 'ani evaoleta, inoku Puka kabukabuna luvana bevamomo'aia 'ounai ediaka, "Vei ba'u aba."

²⁹ Vodu ka ua'i vine veina vamaina devavonua, inoku dapulu ka deabia vine veina vamaina laloanai dekaeia uku, vakaia siliboai dedo'oia 'au, deisia 'au eda'a Iesu bibi'anai.

³⁰ Iesu vine veina vamaina einuia mulinai ediaka, "Ani eole." Inoku 'etuna elo'easi, eba vaika.

Iesu Duluna Dekosisia.

³¹ Vali'u 'eva va'olu kave'i melalana inoku mala 'eva La'au keini naduna, ba kauta ua'i au ido'o valaukuna akanai bemimia beda'amo mala 'eva sia benama'ina 'ounai, Iuda kauta namata Pilato denoia, au ido'o valaukuna akanai dekokota 'au kauta aeta kuliata beaku mokuta inoku kauanita beabita ovo.

³² Kuali kauta deda'a Iesu ita dekokota 'au kauta kevatai, inoku kau lava'ana'ina aena kuliata devamoku, mune'e deda'a banona ka kevanai aena kuliata devamoku.

³³ Beia deda'a Iesu kevanai deikaia 'ani eba 'ounai aena kuliata sia devamoku.

³⁴ Kuali kauna ka eta'u Iesu duluna ioai ekoia ulu, komolonaimo lala mai vei de'itabu ka'ona.

³⁵ Makanai eikaia kauna 'ani valina ekava, inoku ia ena vali kava 'eva momo'aina, ia eikabasia 'eva luva umauna eluvala, inoku oi ia evamomo'aia davana oi boabivenia.

³⁶ Koa kanania epulu 'eva Puka kabukabuna luvana evamomo'aia ediaka, "Sia kuliana ka devamokua kovo".

Ex 12: 46, Num 9: 12, Sal 34: 20

³⁷ Puka kabukabuna kai mune'e ediaka, "Duluna dekoia ulu kauna 'eva kau beikala."

Iesu Kauanina Dekoleia.

(Mt 27.57-61; Mk 15.42-47; Lk 23.50-56)

³⁸ Iosepa Alimatea kauna vaka Iesu ibanona kauna ka, beia vunivuniai 'olana Iuda kauta namata makauta emakau. Dava kataua mulitai ia eda'a Pilato kevanai enoia Iesu kauanina beabia ovo. Inoku Pilato ena luvai Iosepa eda'a Iesu kauanina eabia ovo.

³⁹ Nikodemo 'ana'inai boni ka eda'a Iesu kevana kauna vaka Iosepa ebanoia nopa mai 'aloe mulamula bonata kula'ilata lua deula venita mulamulata eabi eda'a, ena mekau 'eva kiloglam koinavui (30) boina.

⁴⁰ Inoku kauta lalua Iesu kauanina deabia mulamulai deto'aia mai tubu'a nama'ina ba kauta de'umita tubu'anai de'umia, Iuda kauta eta ba kauta devavaita kave'i vinalana vitaitanai devavaia.

⁴¹ Iesu au ido'o valaukuna akanai dekokoaia 'au 'abuna kevanai 'eva kula ka, kula kanaua laloanai mitava makamakana ka 'eva asido'o ba kauna ka dekokoleia.

⁴² Inoku Iesu ua'i dekokoleia, 'olana mitava kanaua 'eva ekevai maivaka melala kanaua 'eva La'au keini naduna iva'oluna kave'i melalana.

20

Iesu Bai Eko'isi 'Udai.

(Mt 28.1-8; Mk 16.1-8; Lk 24.1-12)

¹ Masi melalana 'avu'avuni vabulanai Malia Makadala ateatena eda'a mitava beikala, ekailao 'uli de'alavua bika'ana 'ani deabia tau eikaia.

² Ia eveau emue'udai eda'a Simona Petelo mai ibanona ka Iesu elalo'au venia kauna kevatai e'outa ediaka, "Lovia namana mitavai 'ani deabia tau, lai sia aikabasi a'i dene'eiadivo."

³ Petelo mai ibanona kauna ka deko'isi deda'a mitava.

⁴ Lalua deveau ka'ona deda'a beia banona eta'u Petelo eveau kania e'ana'ia eda'a mitava.

⁵ Beia sia edodo, ia 'uli nutualanai ekai dodo, tubu'a nama'ita kanoai deno tubu'ata eika.

⁶ Simona Petelo muliae eveau easi komolonai eda'a mitava 'ulina laloanai edodo, tubu'a nama'ita deno tubu'ata eika.

⁷ Maivaka tubu'a ka Iesu 'olana de'umia tubu'ana 'eva sia tubu'a nama'ita ita deno ka'ona, beia ilo'u kave'ina 'abu edeanai eno.

⁸ Kanaua laloanai ibanona ka mitavai ela'asi makava kauna edodo eda'a eikata inoku eabiveni.

⁹ Beia Puka kabukabuna luvana asido'o ovonai deovo luvana ediaka 'Ia 'eva bai beko'isi 'udai'.

*Iesu 'Eva Malia Makadala
Ateatena Kevanai Evaila.*

(Mt 28.9, 10; Mk 16.9-11)

¹⁰ Inoku ibanona kauta lua demue deda'a eta luma.

¹¹ Malia 'eva mitava kevanai elava ekani, ekani laloanai enovo dodo mitava laloana eikaia.

¹² Inoku ia anelu lua tubu'a deva'ita devadodota eikata, Iesu kauanina dene'eia divo 'abunai demia, ka 'eva aena duasi ka 'eva 'olana duasi.

¹³ Ia delavuaia dediaka, "Ateate e, dava 'ounai okakani?" Ia enu'ovi ediaka, "E'u Lovia namana 'ani deabia tau, sia aikabasi a'i dene'ea divo."

¹⁴ Kanaua eluva koma inoku elava 'udai 'eva Iesu ua'i elava eikaia, beia sia eikabasi ua 'eva Iesu.

¹⁵ Iesu ia elavuaia ediaka, "Ateate e, dava 'ounai okakani? Dai okavua?" Malia elalovaia ia 'eva kula i'imana kauna ka, inoku ediaka, "Loviamu e, oni ia ovuaia oda'a a'i one'eia divo 'eva lau vaikabasi'u. Inoku lau bada'a babia."

¹⁶ Iesu e'aeia ediaka, "Malia e!" Malia elava 'udai inoku 'Ebelu lelenai ediaka, "Laboni!" (Luva kanania anina 'eva vaikabasi kauna)

¹⁷ Iesu Malia e'ouia ediaka, "Sia boabi'u kovo, 'olana asido'o aele'au Kama'u kevana. Beia boda'a bo'akala'u bo'outa, lau 'eva baele'au lau Kama'u mai oi Kamamui maivaka e'u Dilava mai emui Dilava kevana bada'ala."

¹⁸ Inoku Malia Makadala ateatena eda'a ibanona kauta e'outa ia Lovia namana eikaia, mune'e Iesu luva eluvata luvata ia e'outa.

*Iesu Ibanona Kauta
Kevatai Evaila.*

(Mt 28.16-20; Mk 16.14-18; Lk 24.36-49)

¹⁹ Melala ka'onamo kanaua'i melala 'ani eulu laloanai, ibanona kauta boutai 'abu ka'onamoai deakubou, luma nutualata de'alavuta, 'olana Iuda kauta namata makauta demakau. Inoku Iesu eda'a viloatai elavadivo e'outa ediaka, "Nua'elu kevamuia'i bemimia."

²⁰ Luva kanania eluvaia mulinai imana luana mai duluna evaikata. Ibanona kauta Lovia namana deikaia koanai delalonama si'asi'a.

²¹ Iesu mune'e e'outa ediaka, "Nua'elu kevamuia'i bemimia. Kama'u lau esini'u vitaitanai, lau vaka oi asinimui."

²² Kanaua eluva koma mulinai ladaena epululuta, ediaka, "Idume Kabuk-abuna oabia.

²³ Kau eta si'avana oi bo'ou kao koanai eta si'avana 'eva i'ou kaota, beia eta si'avana sia oi bo'ou kao koanai eta si'avana 'eva sia i'ou kaota."

Toma Iesu Eikaia.

²⁴ Ibanona kauta 'ouka lua ka vana Toma, de'aea vi'apala, Iesu do'u kanaua kevatai eda'a dodo boninai 'eva ia sia ua'i viloatai.

²⁵ Ibanona kauta vaidia ia de'ouia dediaka, "Lai Lovia namana lai aikala." Beia Toma ediaka, "Lau ikoko loita imanai ba'ika mai ima'u li'uli'uta ikoko 'abutai baisi dodo, mune'e ia dulunai ima'u baisia dodo, bema asi'i koanai lau 'eva ia sia babivenia."

²⁶ Masi ka eole mulinai ibanona kauta luma laloanai dedo'u 'udai, Toma vaka ua'i ia ita. Nutuala de'alavu 'inia. Beia Iesu 'eva eda'a ia viloatai elavadivo ediaka, "Nua'elu kevamuia'i bemimia."

²⁷ Inoku ia Toma e'ouia ediaka, "Imamu li'uli'una emai ima'u kanania abia kovo, maivaka imamu emai dulu'uai isia dodo, inoku nuamu sia belalo to'ato'a beia boabiveni'u."

²⁸ Toma Iesu ena luva evamuea ediaka, “Oni 'eva e'u Lovia namana, lau e'u Dilava!”

²⁹ Iesu ia e'ouia ediaka, “Oni oika'u 'ounai oabiveni'u. Sia deika'u beia deabiveni'u kauta kataua 'eva denama'ina.”

Puka Kanania 'Olana.

³⁰ Iesu vatapulovo koata doutamo ibanona kauta vailatai evavai davata 'eva puka kanania laloanai sia aleleta 'au.

³¹ Beia katania aleleta 'olana 'eva oi boabiveni Iesu 'eva Keliso, Dilava Nakuna. Inoku ia oi boabivenia 'eva vanai mauli oi boabia.

21

Iesu Ibanona Kauta

Kalakoi Ka Kevatai Evaila.

¹ Kanaua mulinai, Iesu Tibelia 'ovunai ibanona kauta kevatai ela'asi 'udai, kanania ela'asi koma.

² Simona Petelo, Toma de'aea vi'apala, Natanaela Kalileai Kana kauna, Sebedeo nakuna luana, mai ibanona kauta lua vaka ua'i ita 'abu ka'onamoai demia.

³ Simona Petelo eta'u ia e'outa ediaka, “Lau 'ani adada'a bava'eka.” Ia dediaka, “Lai vaka oni ita ekada'a.” Deda'a asiai dele'au, beia boni kanaua laloanai 'eva sia sisi ka devakoala.

⁴ Taba elele laloanai Iesu 'eva nabuai elava, beia ibanona kauta sia deikabasi ua 'eva Iesu.

⁵ Inoku Iesu elavuaia ediaka, “E'u kau e, sisi ka oi ovakoala?” Ia denu'ovi dediaka, “Dava asi'i.”

⁶ Iesu mune'e e'outa ediaka, “Emui vuo asi idibana duasi onaia, inoku sisi vaid a 'ani oi bovakoata.” Kanaua devavaia koanai vuo bevelia 'au 'eva sia edaita, 'olana sisi doutamo vaika.

⁷ Inoku Iesu ibanona kauna elalo'au venia kauna kanaua eta'u Petelo e'ouia ediaka, “Ua 'eva Lovia namana.” Simona Petelo 'eva ena tubu'a evadada ovo eva'eka, inoku luva kanania eika 'Ia 'eva Lovia namana' koanai eko'isi ena tubu'a elioia komolonai veiai elovo uku.

⁸ Ibanona kauta vaid a 'eva asiai vuo sisiai evonu vuona develia 'ovu deda'a nabua, 'olana nabua 'eva sia edau'a, lova sinavu ka boina.

⁹ Ia nabuai dele'au koanai dekaillao 'alova 'itana akanai sisi ine'e'auta deikata, palaoa vaid a vaka ua'i.

¹⁰ Iesu ia e'outa ediaka, “Vali'u oi oakuta sisita vaid a oabi omai.”

¹¹ Simona Petelo emue'udai asiai ele'au vuo evelia 'au nabuai, vuoai sisi namata mo 'avaeana boutai sinavu ka imanavui koi (153), sisi namata 'avaeana beia eta vuo 'eva sia e'idi.

¹² Iesu ia e'aeta ediaka, “Omai oaniani!” Inoku ibanona kauta sia deula belavuaia bediaka, “Oni dai?” 'olana 'ani deikabasia ia 'eva Lovia namana.

¹³ Iesu eda'a palaoa eabia inoku evenita, maivaka sisi vaka kanaua evavaia koma.

¹⁴ Kanania 'eva Iesu bai eko'isi 'udai mulinai melala ivakoina ia ibanona kauta kevatai evaila.

Iesu Mai Petelo.

¹⁵ Deaniani koa mulinai Iesu Simona Petelo elavuaia ediaka, “Simona Ioane nakuna e, oni momo'ai lau olalo'au veni'u vaika vakaia vaid a katania eta lalo'au, una?” Petelo ediaka, “O, Lovia namana, oni oikabasi lau oni ulamu a'ula.” Inoku Iesu ediaka, “E'u mamoe nakuta bovananita.”

¹⁶ Melala ivaluana elavuai 'udai ediaka, “Simona Ioane nakuna e, oni lau olalo'au veni'u, una?” Petelo ediaka, “O, Lovia namana, oni oikabasi lau oni ulamu a'ula.” Inoku Iesu ediaka, “E'u mamoe bo'imata kave'i.”

¹⁷ Iesu melala ivakoina Petelo elavuaia ediaka, “Simona Ioane nakuna e, oni lau olalo'au veni'u, una?” Petelo nuana eanana 'olana 'ani melala ivakoina elavuaia ediaka, “Oni lau ula'u o'ula?” Petelo ediaka, “Lovia namana e, oni 'eva dava boutai oikabasita, oni oikabasi lau oni ulamu a'ula.” Iesu ediaka, “E'u mamoe bovananita.”

¹⁸ Lau oni luva umauna a'oumu, 'alu'alumu koanai oni sibomu tubu'amu oवादodo maivaka oulavenia 'abuna 'eva oda'ala. Beia bomomotu koanai imamu boisi pailolo, kau ka betata'u tubu'amu bevavadodomu, bevuamu sia oula venia 'abuna boda'ala.”

¹⁹ Iesu luva kanania eluvaia 'eva Petelo a beba koma Dilava ena nuavi bevala'asia beikala. Inoku e'ouia ediaka, “Mai muli'uai da'a.”

Iesu Ibanona Elalo'auvenia Vaika

Kauna Ena Luva.

²⁰ Petelo ekai 'udai 'eva Iesu ibanona elalo'au venia kauna mulitai eda'a eikaia, ia 'eva ani bouai Iesu kaunai ekabe'au, inoku elavuaia ediaka, “Lovia namana e, dai oni venimu beveveni mai koumu bekokou?”

²¹ Petelo kau kanaua eikaia koanai Iesu elavuaia ediaka, “Lovia namana e, kau kanaua 'eva a beko?”

²² Iesu eta'u Petelo e'ouia ediaka, “Bema lau ba'ula ia bemimia beda'amo lau bamue'udai ba'asi, beia oni kevamuai kanaua 'eva dava? Oni 'eva mai muli'uai da'a.”

²³ Luva kanania 'ounai ibanona kauta sibota viloatai deluvaluva vaia dediaka, ibanona kauna kanaua sia bebaba. Beia Iesu 'eva sia ediaka kau kanaua sia bebaba, ia ediaka, “Bema lau ba'ula ia bemimia beda'amo lau bamue'udai ba'asi, beia oni kevamuai kanaua 'eva dava?”

²⁴ Ibanona kauna kanaua eta'u luva kania boutai e'ou asi maivaka eleleta, inoku ita kaikabasi luva kania eluva vaita luvata 'eva umauta.

²⁵ Iesu 'eva koa doutamo vaika evavai. Lau alalovaia kataua boutai ka'o ka'o demalele 'au koanai, kanobata itoina puka kania bemadoubou 'eva sia bedaia.

VEAUNEKE ETA VINAULA

Puka Laloana Ilelena Luvana

Puka Kanania 'eva Vali Nama'ina Luka eleleia davana mulinai eleleia. Puka kanania laloanai eka ikala 'eva Idume Kabukabuna eta'u veauneke kauta dala bevinaula vaia evaikata, kanaua'i ia deta'u Iesu valina nama'ina deilolo vaia Ielusalemai mai Iudeai mai Samaliai mai kanobata to'onai 'abu vaida kevatai (1.8). Puka kanania 'eva Keliso ena kau 'itota lovata eakuia, kanaua'i Iuda kauta ita vilotai emakavala, inoku namana eao koanai, kanobata kauta eta abiveniai eao. Luka 'eva Keliso ena mauili lovana eakuia kave'i mai ia mulinai deda'a kauta vaka, kanaua'i 'eva Keliso eta'u Dilava ena luva 'ana'i 'ani siako Isalaela kauta evenita davana bounai evamomo'aia kave'i.

Puka kanania'i dava ka namana lovana eakuia kanaua 'eva Idume Kabukabuna ena vinaula, ia e'ovu easi Veauneke kauta kevata, inoku e'ana'ia vaita mai evakula'ilata. Dala kanania'i Vali nama'ina deabiadae, abiveni kauta eta mato 'eva namana. Puka kanania laloanai 'eva veauneke kauta doutamo sisibata, maivaka Petelo mai Paulo eta vinaula devavai luvata vaka doutamo. Petelo 'eva veauneke kauna mai ia 'eva Iesu ebanoia. Beiamo Paulo 'eva sia kanauamo boina. Makavanai Paulo ekula'ila Iesu ena kau bevavaita si'asi'a. Beiamo Iesu ia e'aeia laloanai elalo'udai, inoku da'ala abi kaunai eao Iesu ena vinalamo evavaita.

Puka Iduvuna Namata

- a. Va'olu luva umauna i'oudaena. (1.1 - 26)
 1. Iesu ena luva mai luva'ana'i to'ota. (1.1 - 14)
 2. Iuda 'abuna iabina ka iabiana isi. (1.15 - 26)
- b. Ielusalemai luva umauna i'oudaena. (2.1 - 8.3)
- c. Iudea mai Samaliai luva umauna i'oudaena. (8.4 - 12.25)
- d. Paulo ena vinaula kau kevatai. (13.1 - 28.31)
 1. Iloilo vinalana kalimana lava'ana'ina. (13.1 - 14.28)
 2. Ielusalemai do'u luvaluvana. (15.1 - 35)
 3. Iloilo vinalana kalinama ivaluana. (15.36 - 18.22)
 4. Iloilo vinalana kalimana ivakoina. (18.23 - 21.16)
 5. Paulo vabuto'o kauna Ielusalemai, Kaisaleai, mai Lomai. (21.17 - 28.31)

Iesu Eluva'ana'i Idume Kabukabuna Besinia Be'asi.

¹ Teofilo e, e'u puka makavana laloanai Iesu ena vinaula mai ena vaikabasi emakavala evavai davata,

² eda'amo ia eabia isi ele'au vutuvutu eda'aia koanai valina boutai aleleta. Asido'o ele'au laloanai, Idume Kabukabuna siavunai ena veauneke ia edilata kauta kevatai vinaula bevavaita vinalaulata lovata eaku.

³ Ena ba mulinai, bevamomo'aia ia 'eva emauli dokadoka 'ounai boni vaninavui (40) laloatai ia sibona melala doutamo ena veauneke kau kevatai evala'asia, maivaka kevatai Dilava ena lovia vanuana valina ekava.

⁴ Melala ka eta miado'u laloanai Iesu luva kanania evenita ediaka, "Telusalema sia oi bovikania, beia Kama'u eluva'ana'i vaia Idumena Kabukabuna oi bo'imala, luvana kanaua lau oi 'ani a'oumui.

⁵ Ioane 'eva veiai kau evaidi'uta kabukabu, beia boni vidamo laloatai oi 'eva Idume Kabukabuna ai oi boidi'u kabukabu."

Iesu Ele'au Eda'a Vutuvutu.

⁶ Iesu ibanona kauta ita dedo'u koanai ia delavauia dediaka, "Lovia namana e, vali'u mo kanania'i Isalaela kanobatana ena siavu bovenia 'udai, una?"

⁷ Iesu eta luva evamuea ediaka, "Kama'u sibona siavunai melalata mai bonita 'ani eva'oluta, oi sia mai emui komolo dava kanania aida bepupulu davana oi boikabasia.

⁸ Beia Idume Kabukabuna be'ovu oi akamuiai koanai siavu oi boabia, lau vali'u oi bokava odaoda Ielusalemai, Iudea mai Samalia vanuata itoinai, maivaka beda'a mo kanobata to'ona."

⁹ Iesu luva kanania eluvavaia mulinai, ia makata umaunai eabia isi ele'au vutuvutu eda'aia deikaia, inoku oli ka ia e'alavua, kanaua'i ia sia deikaia 'udai.

¹⁰ Ia vutuvutuai ele'au 'abuna deika 'inia laloanai, komolonai kau lua tubu'a deva'ita devadodota 'eva ia delava basita.

¹¹ Inoku de'outa dediaka, "Kalilea kaumui e. Dava 'ounai nia'i oi olalava oi o'a'ali dae vutuvutu oi oikala? Iesu vali'u kevamuiai eabia isi vutuvutu eda'ala kauna mune'e bemumue be'asi 'eva vali'u ele'au vutuvutu eda'ala oi oikala vitaitanai be'asi."

Veauneke Kauna Ka Deabia Isi Iuda 'Abunai.

¹² Inoku veauneke kauta Olive lolonai de'ovu deda'a Ielusalema, 'abu kataua viloota eta dau'a 'eva kilomita ka'onamo boina.

¹³ Ielusalemai deda'adodo koanai deda'a demia vaia lumanai dele'au deda'a aka daiutuna. Kauta kataua vata 'eva katanai, Petelo, Ioane, Iakobo, Andelea, Pilipo, Toma, Batolomeo, Mataio, Alepeo nakuna Iakobo, Simona Selote kauna, mai Iakobo nakuna Iuda.

¹⁴ Ia boutai 'abu ka'onamoai devaka'ona mai'a'ateta ita mai Iesu sinana Malia mai kadina ita demeamea kevanai kevanai.

¹⁵ Melala kanaua'i abiveni kauta 'avaeana boutai sinavu ka luanavui (120) dedo'u, inoku Petelo eko'isi vailatai elavadivo eilolota.

¹⁶ Ediaka, "Bo'akala'u e! Puka Kabukabuna luvana be'asi bemomo'ai davana Idume kabukabuna eta'u Davida nutunai Iuda lovana ka 'ani eakuia makava Iesu iabina bedada'a kauta 'eva ia be'ana'ia vaita.

¹⁷ Iuda 'eva lai banomai ka, 'olana ia vaka edilaia lai ita lai avinaula ka'ona vinaula kanania laloanai."

¹⁸ (Iuda ena si'avana moninai kano ka etavaia, inoku ua'i e'eko 'olana e'ana'ia, bo'ana epou silina boutai dedouasi mulumuliai.

¹⁹ Ielusalemai demia kauta boutai vali kanania deika, kanaua 'ounai kano kanaua vana de'aeia 'Akeledama', ita leletai luva kanaua anina 'eva 'Lala Kanona'.)

²⁰ "Olan Salamo pukanai 'ani ilelena ediaka,
'Ena luma 'eva be'avaea.
Sia kau ka ua'i bemimia.'

Sal 69.25

Mune'e eleleia,
'Ia 'abuna 'eva kau ka
betata'u beabia.'

Sal 109.8

²¹ Kanaua dainai vali'u 'eva ita vilootai banota ka ekabiiasi. Kau kanaua 'eva Lovia namana Iesu ena da'a to'ato'a itoina eikaia kauna mai

²² Ioane ena vaidi'u kabukabu ai epulu melalanai easimo Iesu ele'au vutuvutu eda'aia koanai ia vaka ua'i kauna ka. Lai lai bavinaula ka'ona Iesu ena ko'isi 'udai valina ikavana dainai."

²³ Kanaua 'ounai kau lua deula venita ka beabia isi, ka vana Iosepa vaidā de'aea Balasaba mune'e de'aea Iusto, mai ka 'eva vana Matia.

²⁴ Inoku demeamea dediaka, "Lovia namana e! Oni 'eva kau boutai nuata oikabasi, kau katania luana viloatai davana odilala kauna 'eva vali'u bovaikamai.

²⁵ Ia 'eva vidulu mai veauneke vinaulana kanania Iuda evikania vinulana bevavaia, 'olana Iuda 'eva 'ani eda'aovo ena 'abu umauna eda'aia."

²⁶ Inoku depunipuni, laloanai va ela'asi 'eva Matia, inoku veauneke kauta 'ouka ka'onamo 'eva eva'ouka luata.

2

Pentikosi Melalanai

Idume Kabukabuna Easi.

¹ Pentikosi melalanai abiveni kauta boutai 'abu ka'onamoai deakubou.

² Inoku vutuvutuai 'ulu ka alimo easi itani lani namana ka eunu 'uluna boina, ia demia do'u lumana bounai evavonua.

³ Maivaka dava ka deikaia ikana itani 'alova vulena malana boina eda'a ka ka laikubuatai.

⁴ Ia boutai Idume Kabukabunai 'ani devonu, inoku Idume Kabukabuna evenita vitaitanai vanua edeata edeata leletai deluva.

⁵ Kanaua melalanai Iuda kauta Dilava makauna demakau kauta kanobata edeata edeatai demia kauta deasi Ielusalemai.

⁶ Ulu kanania deika koanai, 'abu ka'onamoai deakubou maivaka do'u 'eva nama vaikana, do'u kauta delalo toatoa, 'olana ka ka leleta umaunai abiveni kauta vali kanaua deluvaia 'uluna deika.

⁷ Boutai detabulovo si'asi'a mai nuata debavunu dediaka, Deluluva kauta katania 'eva Kalilea kauta, una?

⁸ A boina ita boutai 'eva ka ka leleta umaunai deluluva leleta ka'ika?

⁹ Ita 'eva kanobata edeata edeata ai kasi, Patia, Media, Elama, Mesopotamia, Iudea, Kapadokia, Ponto, Asia,

¹⁰ Pelikia, Pamupulia, Aikupito ai maivaka Kulene ai, ua 'eva Libia eta 'abu ka. Loma ai deasi kauta, vaidā 'eva Iuda kauta vaidā 'eva sia Iuda kauta beia kukudivo dalanai Iuda kautai devaaota kauta,

¹¹ vaidā 'eva Kelete mai Alabia ai deasi. Kau kataua Dilava koa namata evavai koata lelemai umaunai deluva vai leleta lai aika."

¹² Boutai detabulovo mai delalo to'ato'a, ia ka ka sibota delavuui lavuui dediaka, "Kanania 'eva dava?"

¹³ Beia vaidā 'eva abiveni kauta demediamedia vaita dediaka, "Ani deinu ba."

Petelo Pentikosi Melalanai Eilolo.

¹⁴ Inoku Petelo mai banona 'ouka ka ita deko'isi, ia mato eilolo venita 'unu'unu ediaka, "Iuda kaumui mai Ielusalemai oi omimia kaumui e. Kaimui ovaala kave'i. Dava kanania a epulu koma davana valina bavaik- abasimui.

¹⁵ Lai kaumai katania 'eva sia lai ainu ba, oi olalovaia boina, maivaka vali'u mo 'avu'avuni melala koana kalavani ka.

¹⁶ Beia enolea kauna Ioela kanania eluva koma ediaka,

¹⁷ Dilava ediaka, Melala to'ona be'asi koanai, Lau Idume'u 'eva kau boutai akatai bava'ovua.

Nakumui momoluaneta mai 'a'ateta benolea, emui kau 'alu'aluta 'eva bemakakeini, maivaka emui kau momotuta benivinivi.

¹⁸ Mune'e melala kanaua'i lau Idume'u 'eva e'u da'alaabi kauta momoluaneta mai 'a'ateta akatai bava'ovua inoku

ia 'eva benolea.

¹⁹ Vatabulovo davata vaidā vutuvutu akanai bavala'asita, maivaka kanobata akanai koa namata vaidā bavapuluta, lala, 'alova maivaka vaitabu imusina.

²⁰ Lovia namana ena melala namana mai nuavina e'avi e'asi koanai, melala 'eva bevabulaavu, vuia 'eva be'aola itani lala boina.

²¹ Inoku Lovia namana vanai be'ae'ae kauta 'eva bemaui.'

Iol 2.28 – 32

²² "Isalaela kaumui e, kaiamui ovaala kave'i. Iesu Nasaleta kauna 'eva Dilava ia nuanai evinaula vatabulovo vinalata mai koa namata vaidā evavaita, koakoata oi viloumuiai evala'asita 'eva oi boumuiai oi oikabasita kave'i.

²³ Dilava ena ula maivaka ena ikabasi ai Iesu kanania 'ani siako eva'olua dalanai oi evenimui. Oi ota'u si'avana kauta imatai oi oudaia au ido'o valaukuna akanai dekokoa 'au eba.

²⁴ Beia Dilava eta'u bai evako'isia 'udai, ba ena anaana ai eluvu ne'ea, 'olana ba ia beabi 'inia ua'i vabuto'o 'abunai 'eva sia edaia.

²⁵ Davida ia valina ekava ediaka,

'Lovia namana 'eva melala

bounai vaila'uai aikala.

'Olana ia 'eva lau idiba'u duasi,

lau sia bamakau kovo.

²⁶ Kanaua 'ounai nua'u elalonama,

mai mala'u 'eva lalonama luvata eluvavaita, kau'u 'eva nuabata lalonai bemimia.

²⁷ 'Olana idume'u 'eva mitavai sia bovikania, maivaka emu Kabukabu kauna sia ua'i bovikania bepepeda.

²⁸ Oni ota'u maui dalana ovaika'u,

vailamuai 'eva lalonamai

bovavonu'u.'

Sal 16.8-11

²⁹ "Bo'akala'u e! Lau 'eva oi kevamuiai 'ava'avata Davida valina bakava kave'i. Oi oikabasi ia 'eva eba inoku dekoleia, mitavana 'eva vali'u nia'i ita kevatai emimia.

³⁰ Beia Davida 'eva enolea kauna inoku eikabasia 'eva Dilava eta'u ia eluva'ana'i pasisi evenia, ia kekena ka 'eva ia ena mia'au 'abunai ua'i bemia'au.

³¹ Davida eta'u vailai dava bepupulu davana eikaia 'ana'i 'eva Keliso ena ko'isi 'udai luvana eluvavaia ediaka,

'Ia 'eva mitavai ua'i sia bevikania,

ia kauanina sia bepepeda.'

Sal 16.10

³² Dilava eta'u Iesu kanania ba ai evako'isia 'udai. Lai boumaiai lai aikaia maivaka lai aikabasi.

³³ Dilava eta'u ia eabia isi imana idibana duasi evamiala. Kamana eluva'ana'i vaia Idumena Kabukabuna 'ani eabia. Inoku 'ani esinia 'ovu, vali'u ena siavu makamuiai 'ani oi oikala maivaka kaiamuiai 'ani oi o'ika.

³⁴ 'Olana Davida 'eva sia ele'au eda'a vutuvutuai beia ia ediaka,

'Lovia namana 'eva e'u Lovia e'ouia ediaka,

Lau idiba'u duasi miadivo,

³⁵ beda'amo oni emu 'ou kauta

aemu ivalavana 'au davanai

bavaaota.'

Sal 110.1

36 “Kanaua 'ounai Isalaela kaumui boumuiai oi boikabasi komolo 'eva oi ota'u Iesu au ido'o valaukuna akanai oi okokoia 'au kauna 'eva Dilava eta'u 'ani Lovia namana mai Keliso ai evaaoo.”

*Kau Do'unamo Delalo 'Udai
Vaidi'u Kabukabu Koana Deabia.*

37 Kau luva kataua leleta deika koanai nuata debata inoku Petelo mai veaneke kauta delavuvaita dediaka, “Bo'akalamai e! Lai dava lai bavavaia?”

38 Petelo ia e'outa ediaka, “Oi boumuiai oi bolalo 'udai, ka ka Iesu Keliso vanai oi boidi'u kabukabu emui si'avana i'ou kaota dainai. Inoku Idume Kabukabu ena ainama 'ani oi boabia.

39 Luva'ana'i kanania 'eva oi mai nakumui daitai maivaka dau'ai vaika demimia kauta kataua Lovia namana eta Dilava be'aeta kauta boutai daitai.”

40 Petelo luva doutamo vaidai kau e'outa kave'i maivaka evakula'ilata ediaka, “Ulu si'avana kanania'i oi bovamaulimui.”

41 Petelo ena luva deabia dae kauta boutai vaidi'u kabukabu koana deabia, melala kanaua'i kau 'eva sinavu boutai koinavui (3,000) abiveni kauta eta do'u laloanai dedodo.

Abiveni Kauta Boutai Nuata Ka'onamoai 'Abu Ka'onamoai Demia.

42 Ia 'eva melala boutai veaneke kauta eta vaikabasi luvata lelete ikata deulaveni mai deakubou ka'ona 'abu ka'onamoai, ita deaniani ka'ona maivaka demeamea ka'ona.

43 Veaneke kauta vatabulovo vinaulata mai koa vinaulata doutamo devavaita inoku kau boutai 'eva Dilava makauna demakau.

44 Inoku abiveni kauta boutai deakubou ka'ona 'abu ka'onamoai mai eta dava boutai dekole vidavena.

45 Eta lavo mai kano detavatavavai inoku kau ka ka eulavenia monina vitaitanai devenia.

46 Melala bounai Dilava ena lo'e kabukabuna laloanai deakubou, maivaka luma ka ka laloatai mailalonamata ita mai nuata nama'inata ita deviani vidavena,

47 Dilava devanama'inala, kau boutai ia delalonama venita. Melala bounai Lovia namana etata'u evamaulita kauta kataua 'eva abiveni kauta ita evaka'onamota.

3

*Petelo Mai Ioane 'Ome Kauna Ka
Devanama'inala.*

1 Melala ka lavilavi melala koana koi boina meamea melalana, Petelo mai Ioane deda'a Dilava ena Lo'e kabukabuna.

2 Ua'i kau ka epulu 'ome'ome 'eva melala bounai devuala deasi lo'e kabukabuna nutualana vana 'Si'amobalaveni nutualana' aunai ua'i devamiala. Kau lo'e kabukabuna deda'a venia kauta kataua kevatai enoi va'ame.

3 Petelo mai Ioane lo'e kabukabuna ai deda'a dodo eikata koanai kevatai moni enoinoi.

4 Petelo mai Ioane ia deteia basibasi. Inoku Petelo ia e'ouia ediaka, “Lai ikamai!”

5 'Ome kauna elalovaia 'eva dava ka bevenia 'ounai eikata.

6 Petelo ia e'ouia ediaka, “Lau keva'u moni asi'i. Beia keva'uai dava emimia davana bavenimu. Iesu Keliso Nasaleta kauna vanai, ko'isi da'a!”

7 Inoku Petelo ia imana idibanai eabi eduluia isi, komolonai aena mai aena 'ato'atota dekula'ila.

⁸ Ia elovo isi elavadivo, eda'a kokovo. Ia ita lo'e kabukabuna laloanai deda'a dodo, eda'a maivaka elovo isi lovo isi inoku Dilava evanama'inala.

⁹ Do'u kauta boutai deikaia eda'a maivaka Dilava evanama'inala.

¹⁰ Deikabasia ia 'eva melala bounai lo'e kabukabuna kanaua nutualana vana 'Si'amobalaveni nutualana' aunai emia divo enoi va'ame kauna, inoku detabulovo si'asi'a dava kevanai epulu davana dainai.

*Petelo Lo'e Kabukabuna Laloanai
Solomona Ena Vakai Eilolo.*

¹¹ Aena enama'ina kauna eta'u Petelo mai Ioane e'avaleta laloanai, kau doutamo vaika detabulovo si'asi'a inoku deveau deda'a vaka ka vana Solomona ena vakai ua'i deikaia.

¹² Petelo ia eikata koanai ediaka, "Isalaela kaumui e, dava 'ounai dava kanania'i oi otabulovo si'asi'a? Maivaka dava 'ounai oi lai oalulumai? Oi olalovaia lai sibomai emai siavuai 'o emai ka'uba siavutai kau kanania lai avako'isia udada'a, una?"

¹³ Abela'amo, Isa'ako mai Iakobo eta Dilava maivaka ita 'ava'avata eta Dilava eta'u ena da'alaabi kauna Iesu nuavi evenia. Beia oi ota'u Pilato oi ovenia, maivaka Pilato eula bevala'asia lalovaina evavaia koanai oi o'ouia avuavu.

¹⁴ Kabukabu mai Komolo kauna oi o'ouia kao, inoku akuaku kauna beluvune'ea dainai oi onoinoivaia.

¹⁵ Oi ota'u maui 'olana kauna oi oaku bala, beia Dilava eta'u ba ai evako'isia 'udai, lai aikaia kaumai katania.

¹⁶ Iesu vana siavunai 'ome kauna kanania kula'ila eabia, kauna kanania 'ani oi oikala maivaka oi oikabasia. Luva umauna lai Iesu abivenia 'ounai oi boumuiai vilamuiai kau kanania evanama'inala kave'i.

¹⁷ "Bo'akala'u e, lau aikabasi oi mai emui 'ana'iavai kauta ita Iesu kevanai dava oi ovavaia davana 'eva sia oi oikabasia.

¹⁸ Beia Dilava eta'u enolea kauta boutai etai 'ani eluvaia 'ana'i luvana easi emomoai, ia ediaka, Keliso 'eva bevaanaanala.

¹⁹ "Kanaua 'ounai olalo 'udai, oi bo'ilo Dilava kevana oi boasia, kanaua'i emui si'avana besiuta ovo. Melalana be'asi koanai Lovia namana kula'ila makamkana bevenimui.

²⁰ Dilava betata'u Iesu mune'e besinia be'asi oi kevamui, makavanai oi daimuiai edilaia kauna Keliso.

²¹ Iesu vutuvutu ai bemimia beda'amo Dilava dava boutai bevamaka-makata melalana be'asi. Siako vaika ena enolea kauta kabukabuta kevatai eluva'ana'i vitaitanai.

²² "Olana Mose ediaka, 'Lovia namana emui Dilava 'eva enolea kauna ka oi daimuiai emui kau umauta vilootai bevako'isia vitaitana lau boi'u, ia beluluva davata boutai 'eva lenea oi bo'ika.

²³ Enolea kauna kanaua lenea sia be'ika kauta boutai 'eva Dilava ena kau vilootai beba palu.'

²⁴ Luva umauna, enolea kauta boutai kataua Samuela ena melala ai easi mo vali'u 'eva melala kanania 'ani deluvaia 'ana'i vaia.

²⁵ "Oi 'eva enolea kauta 'ava'avata. Dilava eta'u oi 'ava'avamui ita luvana'ani devavaia 'eva oi daimuiai. Ia Abela'amo e'ouia ediaka, 'Oni kekemu 'outai kanobatai kau boutai bavanama'inata.'

²⁶ Dilava ena Da'alaabi kauna evako'isia koanai esinia 'ana'i easi oi kevamuiai bevanama'inamui kanaua'i oi ka ka emui maui si'avata vaika dalatai oi boda'a tau."

4

*Petelo Mai Ioane Kau Namata**Eta Do'u Vailanai Delavadivo.*

¹ Petelo mai Ioane kau deluva venita laloanai, kabukabu kauta mai lo'e kabukabuna i'imana kauta eta 'ola kauna maivaka Sadukea kauta 'eva deasi ia kevata.

² Ia 'eva debadu si'asi'a 'olana veauneke kauta kataua 'eva Iesu ena ko'isi 'udai 'ounai ba kauta ba ai beko'isi 'udai valina kau devaikabasita.

³ Inoku ia lalua deabita deliota vabuto'o lumanai de'alavuta beda'amo belani, 'olana 'ani elavilavi 'ounai.

⁴ Beia kau doutamo luva kanaua deika mai deabivenia kauta 'eva sinavu boutai imanavui (5,000) boina.

⁵ Elani 'eva vanua 'ola'ana'ita, vanua kauta namata mai talavatu 'ola kauta boutai Ielusalem mai deakubou.

⁶ Kabukabu kauta 'olatai kauna Ana, Kaiapa, Ioane, Alesanda mai kabukabu kauta 'olatai kauna ena iduvu kauta vaida, ia boutai 'eva ua'i.

⁷ Lalua devuata deda'a vailatai devalavata inoku delavuvaita dediaka, "Siavu davai 'o dai vanai vinaula kanania oi ovavaia?"

⁸ Petelo 'eva Idume Kabukabuna ai evonu, ia eta luva evamuea ediaka, "Vanua 'ola'ana'imui mai vanua kaumui namamui e.

⁹ Vali'u oi lai olavuvaimai 'ome kauna kevanai koa nama'ina ivavaina dainai mai aboina enama'ina koanai,

¹⁰ oi boikabasi maivaka Isalaela kauta boutai beikabasi, Iesu Keliso Nasaleta kauna, au ido'o valaukuna akanai oi oaku bala beia Dilava eta'u ba ai evako'isia 'udai kauna vanai 'eva 'ome kauna kanania 'ani enama'ina vailamui elalava oi oikala.

¹¹ Iesu 'eva
'luma idauna kaumui oi ovasi'avanala bika'ana,
'luma kubuana bika'anai
eao.'

Sal 118.22

¹² Vamauli 'eva ia sibona mo enai ekadavalua, 'olana kanobata bounai laloanai Dilava sia va edeana ka eveni ita bevamaulita."

¹³ Iuda kauta namata delalovaia Petelo mai Ioane sia malele 'abuna ka namana deda'aia, eta ikabasi asi'i kauta, beia sia demakau luva deluva kave'i deikata 'eva detabulovo si'asi'a. Maivaka deikabasi kau katanania 'eva Iesu ita deividoka.

¹⁴ Beia kau 'ani enama'ina kauna ua'i ia lalua ita delava deikaia 'ounai sia luva ka deluvaia.

¹⁵ Kanaua 'ounai ia deta'u Petelo, Ioane mai kau enama'ina kauna de'outa do'u namana 'abunai bela'asi, inoku dela'asi mulinai kau kataua sibota deluvaluva.

¹⁶ Dediaka, "Kau katanania kevatai dava ekavavaia? 'Olana Ielusalem mai demimia kauta boutai 'ani deikabasi ia 'eva vatabulovo vinaulana edeana vaika ka devavaia, sia 'ani eka 'ouavuvu diba.

¹⁷ Beia kau kevatai vali kanania ikavana bevapuala, ita 'eva kau katanania ekavamakauta sia kau ka kevanai Iesu vana beluva vaia kovo."

¹⁸ Inoku de'aeta 'udai dedodo, de'outa Iesu vana sia beilolo vaia kovo maivaka sia kena bevaikabasi vaia kovo.

¹⁹ Beia Petelo mai Ioane eta luva devamuea dediaka, "Oi olalovaia oi lelemui daitai lai badadai 'o Dilava lenea daitai lai badadai. Dilava vailanai davana 'eva ekomolo?

²⁰ 'Olana lai aika mai lele lai aika davata lai bavunita 'eva sia bedaia."

²¹ Ivamakauta luvatai de'outa mulinai devala'asita, bevaanaanata dalana sia ka dedavalia 'olana dava epulu davana dainai kau boutai 'eva Dilava devanama'inala.

²² Vatabulovo vinaulanai enama'ina kauna vikauna 'eva vaninavui (40) ekeinia.

Abiveni Kauta Eta Meamea.

²³ Devala'asita mulinai, Petelo mai Ioane demue'udai deda'a banota kevatai, kabukabu kauta namata mai vanua kauta namata luva dava deluvaia luvata boutai de'outa.

²⁴ Leleta deika mulinai, boutai nuata devaka'onamo Dilava kevanai de-meamea 'unu'unu dediaka, "Akai vaika umauna Loviana e, vutuvutu mai kanobata mai 'atubata maivaka laloatai demimia davata boutai 'eva oni ovavaita.

²⁵ Idume Kabukabuna siavunai emu da'alaabi kauna 'ava'avamai Davida nutunai emu luva eluva vaia ediaka, 'Pulu edea kauta dava 'ounai debadu, maivaka kau dava anita asi'i davata dava 'ounai delalovaita namavaikana?

²⁶ Kanobata loviata 'olata deko'isi inoku vanua kauta namata ita devaka'onamo Lovia namana mai ia ena Keliso devibodala vaita.'

Sal 2.1, 2

²⁷ "Momo'ai dokadoka, 'Eloda mai Pontio Pilato 'eva pulu edea kauta mai Isalaela kauta ita vanua namana kanania laloanai demiado'u. Emu da'alaabi kauna kabukabuna Iesu, oni odilaia Kelisoai ovaaoa kauna devasi'avanala.

²⁸ Ia 'eva oni emu siavu ai mai ulai 'ani ova'olua vinaulana bepupulu davana devavaia.

²⁹ Kanaua 'ounai, Lovia namana e, ia eta vamakau luvata lalovaita, inoku lai oni emu da'alaabi kaunai vakula'ilamai, sia lai bamakau oni emu luva lai baluvala.

³⁰ Imamu isipailolo emu siavu vala'asia 'olele kauta vanama'inata maivaka vatabulovo vinaulata mai koa namata oni emu da'alaabi kauna kabukabuna Iesu vanai vavai."

³¹ Ia demeamea koa mulinai do'u lumana e'iuvai 'iuvai, ia boutai 'eva Idume kabukabuna evavonuta inoku mai kula'ilata ita Dilava luvana deluvaia.

Abiveni Kauta Sibota

Devidulu Viveni.

³² Abiveni kauta boutai 'eva lalovai ka'onamo ai mai nuata ka'onamo ai, sia kau ka sibona ena dava ka 'ouna evavaia beia eta dava boutai 'eva devikole viveni.

³³ Veauneke kauta mai siavuta namavaikana ita Lovia namana Iesu ena ko'isi 'udai valina deilolo vaia. Inoku Dilava ena vanama'ina 'eva ia boutai akatai.

³⁴ Ia vilolatai 'eva sia kau ka etabu, 'olana mai eta kano 'o luma kauta kataua 'eva detavatava vaita monita kataua deabita deda'a,

³⁵ veauneke kauta vailatai de'uleta, inoku dekole kave'i ka ka ena ulalu vitaitanai.

³⁶ Kau ka vana Iosepa, Lebi iduvuna kauna Kupulo ai epulu, veauneke kauta 'eva ia vana de'aeia Banaba (anina 'eva 'Vakula'ila kauna')

37 Ena kano etavatavavaia monina bounai eabia eda'a veauneke kauta vailatai e'uleia.

5

Anania Mai Sapila Eta Dede.

¹ Kau ka vana Anania adana Sapila ita eta kano ka detavatava vaia.

² Ia adana ita deikabasi 'eva kano kanaua monina kalina ia eabia kao, kalina mo eabia eda'a veauneke kauta vailatai e'uleia.

³ Inoku Petelo ia e'ouia ediaka, "Anania e! Satani nuamu aeko 'ani evavonua vaika, Idume Kabukabuna 'ani olebaia inoku kano monina kalina 'eva oni sibomu daimuai 'ani oabia kao?"

⁴ Asido'o kano kanaua otavatava vaia koanai, kano kanaua 'eva oni emu, inoku otavatava vaia mulinai monina vaka oni emu. Koa kanania dava 'ounai nuamui olalovaia? Oni 'eva sia kau olebata beia Dilava olebala."

⁵ Anania luvu kanaua eika koanai e'eko 'eva eba, inoku vali kanaua deika kauta boutai demakau si'asi'a.

⁶ 'O'ole vaidela'asi deasi kauanina tubu'ai de'umia inoku devuaia delala'asi deda'a dekolala.

⁷ Melala koana koi boita deole mulinai adana eda'adodo, ia sia eikabasi 'eva dava epulu.

⁸ Petelo ia elavuaia ediaka, "Lau 'ou'u, oni adamu ita emui kano oi otavatava vaia 'eva tavana kanania, una?" Ia ediaka, "O, tavana kanana."

⁹ Petelo ia e'ouia ediaka, "Dava 'ounai oni adamu ita nuamui oi ovaka'onamo Lovia namana Idumena oi ovakovo'a? Lele'u o'ika, adamu dekolala kauta 'eva nutuala aunai delalava, oni vaka bevuaia bela'asi."

¹⁰ Ia komolonai e'eko Petelo aena 'olanai 'eva eba. 'O'ole dedodo deasi 'eva banai dedavalia, inoku devuaia delala'asi deda'a adana 'aba'abanai dekolala.

¹¹ Melala kanaua'i abiveni kauta boutai mai vali kanaua deika kauta boutai 'eva demakau si'asi'a.

Veaueneke Kauta Vatabulovo Vinaulata Doutamo Devavai.

¹² Veaueneke kauta vatabulovo vinaulata mai koa namata doutamo kau vailatai devavai, abiveni kauta boutai nuata ka'onamoai Solomona ena vakai deakubou.

¹³ Beia kau vaidela 'eva demakau sia deda'a kevata, ia eta 'ola aku 'eva namavaikana kau kataua kevatai.

¹⁴ Beia kau mai 'a'ate doutamo Lovia namana deabivenia kauta deda'a 'eva ia kauta devadouta.

¹⁵ Kanaua 'ounai 'olele kauta devuata deda'a dalai inoku toto'a mai 'eta akatai devaenota 'au kanaua'i Petelo kevatai beda'a keini koanai va'ava'ana beda'a akatai.

¹⁶ Ielusalema 'aba'abanai vanuata kauta doutamo vaika vaka deasi, 'olele kauta mai ka'uba si'avata vaika nuatai dedodo kauta kataua devuata deasi ua'i, inoku boutai 'eva denama'ina.

Veaueneke Kauta Devaiiivita.

¹⁷ Kabukabu kauta 'olatai kauna mai ia ibanona kauta, Sadukea iduvuna kauta ita 'eva veauneke kauta demama venita.

¹⁸ Inoku veauneke kauta deliota devuata deda'a vabuto'o lumana laloanai de'alavuta.

¹⁹ Beia boni kanaua'i Lovia namana ena anelu ka eta'u vabuto'o lumana nutualanana eluvuaia inoku evala'asita,

²⁰ ediaka, "Oda'a, Dilava ena Lo'e Kabukabuna laloanai mauili makamakana luvana kanania itoina kau vailatai oi boluva vaia."

²¹ Luva kanaua deika vitaitanai devavaia, 'avu'ani vabulanai Lo'e Kabuk-abunai deda'adodo inoku kau devaikabasita.

Melala kanaua'i kabukabu kauta 'olatai kauna mai banona ita deda'a do'u namana kauta mai Isalaela kauta namata ita dedo'u, luva desinia eda'a veauneke kauta vabuto'o lumanai bevuata be'asi.

²² Lo'e Kabukabuna i'imana kauta deda'a vabuto'o lumanai dela'asi 'eva ia ua'i sia dedavalita, kanaua 'ounai demue'udai deda'a inoku do'u namana kauta de'outa dediaka,

²³ "Vabuto'o lumanai 'eva i'alavu 'ininai lai adavalia mai nutuala i'imana kauta vaka ua'i nutualai delava, beia nutuala lai aluvuia lai ada'adodo koanai sia kau ka ua'i lai adavalia."

²⁴ Lo'e Kabukabuna i'imana kauta eta 'ola kauna mai kabukabu kauta namata luva kanaua deika koanai, delalo to'ato'a namavaika, koa kanaua anina 'eva dava.

²⁵ Inoku kau ka edodo easi 'eva e'outa ediaka, "Vabuto'o lumanai oi o'alavuta kauta kataua 'eva Lo'e Kabukabuna laloanai delalava kau devaik-abasita."

²⁶ Lo'e Kabukabuna de'imala kauta eta 'ola kauna ita deda'a veauneke kauta devuata kave'i deasi, sia dava ka devavaia 'olana demakau kau bika'ai asi'i demaakuta makauna.

Veauneke Kauta Kau Namata Sia Demakau Venita.

²⁷ Veauneke kauta devuata deda'a do'u namana vailanai devalavata, inoku kabukabu kauta 'olatai kauna eta'u eluvuaita.

²⁸ Ediaka, "Lai oi atalavatumui, kau kanania vanai sia oi bovaikabasi. Beia vali'u emui vaikabasi luvatai Ielusalema bounai vali kanania 'ani edaonala, inoku oi o'ula ena ba vuvuana oi bovakoamai."

²⁹ Petelo mai veauneke kauta vaida denu'ovi dediaka, "Lai 'eva Dilava lлена daitai lai badadai, sia kau leleta daitai lai badadai.

³⁰ Oi ota'u Iesu au akanai oi okokoia oi oaku bala kauna, ita 'ava'avata eta Dilava eta'u ba ai 'ani evako'isia 'udai.

³¹ Dilava ia eabia isi imana idibanai evamiala ita i'ana'ivaita mai ivamaulita kaunai evaaoa kanaua'i Isalaela kauta belalo'udai inoku eta si'avana be'oukao.

³² Lai mai Idume Kabukabuna 'eva dava katania vuta iakuta kaumai, Dilava eta'u Idume Kabukabuna kanaua eveni ia lелena daitai dedadai kauta kataua kevatai."

Kamaliela Eilolo Veauneke Kauta Bevikanita.

³³ Luva kanaua deika koanai, debadu si'asi'a inoku deula veauneke kauta beku bata.

³⁴ Beia Palisea kauna ka vana Kamaliela, talavatu 'ola kauna ka, kau boutai ia 'olana deaku kauna, do'u namana laloanai eko'isi veauneke kauta e'outa bela'asi mulimuliai melala kava'inamo bevi'ima.

³⁵ Inoku ia do'u namana kauta e'outa ediaka, "Isalaela kaumui e, kau katania kevatai dava oi bovavaia 'eva oi bolalovaia kave'i.

³⁶ 'Ana'inai Teuda eko'isi ediaka ia vaka kau ka, kau boutai sinavu vani (400) boina mulinai deda'a. Ia deaku bala koanai ibanona kauta boutai deveau siusiu, inoku sia davana ka epulu.

³⁷ Ia mulinai Kalilea kauna ka vana Iuda, kau vata ilelena melalanai eko'isi, kau doutamo nuata eani ia mulinai deda'a, ia vaka deaku bala, inoku mulinai deda'a kauta boutai deveau siusiu.

³⁸ Kanaua 'ounai vali'u lau oi a'oumui, kau katania kevatai sia dava ka oi bovavaia, oi bovikanita 'avaea bedada'a, bema ia eta vinaula katania devavai 'eva kau eta lalovaiiai be'asi koanai anita sia 'ani bepulu.

³⁹ Beia Dilava enai be'asi koanai, kau katania sia 'ani oi bo'outa kao bedaia. Asi'i sibomui mo oi omadavalimui 'eva oi Dilava oviaku venia."

⁴⁰ Ia Kamaliela lлена deabia dae, veaneke kauta de'aeta dedodo, de'odita mulinai detalavatuta Iesu vanai sia bevaikabasi 'udai, inoku devala'asita deda'a.

⁴¹ Veaneke kauta do'u namana kauta devikanita 'eva delalonama si'asi'a, 'olana Dilava 'ani ia eabita isi 'eva Iesu vanai devamalalaita.

⁴² Melala bounai Lo'e Kabukabuna laloanai mai kau ka ka eta luma laloatai Iesu 'eva Keliso valina nama'ina kanaua devaikabasi vaia mai deilolo vaia basibasi.

6

Kau Kalakoika Dedilata Bevidulu.

¹ Melala kataua'i Iesu ibanona kauta eta mato 'eva ele'au vaika koanai Iuda kauta vaida 'Elene leletai deluvaluva kauta deta'u Iuda kauta vaida 'Ebelu leletai deluvaluva kauta ita devina, 'olana iani dekoleta koanai eta obu 'eva devatabuta.

² Veaneke kauta 'ouka lua deta'u Iesu deabivenia kauta boutai devami-atado'u inoku dediaka, "Sia enama'ina iani ikoleta dainai Dilava ena luva ilolo vaina vinaulana ekavikania.

³ Kanaua 'ounai bo'akalamai e, oi viloamuiiai kau kalakoika valita denama'ina kauta aonekai mai Idume Kabukabunai devonu kauta oi bodilata, vinaula kanania ekavenita be'ana'ia vaia.

⁴ Beia lai 'eva melala bounai meamea mai ilolo vinaulata mo lai bavavai."

⁵ Veaneke kauta eta lalovai luvana devamomo'aia, inoku kau katania dedilata, Sitiveni abiveni mai Idume Kabukabunai evonu kauna, Pilipo, Polokolo, Nikanolo, Timona, Pamena, mai Nikolao ia 'eva pulu edea kauna Antiokai easi Iuda kaunai evaaoa kauna.

⁶ Kau kalakoika katania devuata deda'a veaneke kauta vailatai devalavata, inoku veaneke kauta deta'u imata ia laikubuatai deka'au de-meamea devanama'inata.

⁷ Dilava ena luva 'eva 'abu bounai edaonala, Ielusalema laloanai Iesu deabivenia kauta 'eva ekubu ele'aumo mai kabukabu kauta doutamo vaka Iesu deabivenia.

Sitiveni Deabia Delavuaia.

⁸ Sitiveni 'eva Dilava ena iulaveni mai siavu ai evonu, ia eta'u kau vailatai koa namata mai vatabulovo vinaulata evavai.

⁹ Beia kau vaida 'eva deva'ekotau vaika, kau kataua 'eva Iuda kauta eta lo'e vana 'La'asi 'avaea' kauta, ia vaida 'eva Kulene mai Alesandeleai deasi, vaida Silisia mai 'Eisiasi deasi, ia deta'u Sitiveni ita deadedua.

¹⁰ Beia ia Sitiveni bevadeduala 'eva sia edaita 'olana Idume Kabukabuna eta'u aoneka evenia 'eva eluva vaita.

¹¹ Kanaua 'ounai ia deta'u kau vaida nuata deani beluluva bediaka, "Lai 'eva ia Mose mai Dilava akatai luva si'avata vaika eluva lлена lai a'ika."

¹² Kanaua'i vanua kauta mai vanua kauta namata maivaka talavatu 'ola kauta devabaduta, ia deko'isi deda'a Sitiveni deabia kao devuaia deda'a do'u namana kauta vailatai.

¹³ Inoku kau vaida devuata deasi 'eva dede luvatai de'ouia dediaka, "Kau kanania 'eva Kabukabu 'abuna kanania mai Mose ena talavatu ivasi'avanata luvana eluvala basibasi.

14 Lai ia lenea lai aika ediaka, Iesu Nasaleta kauna betata'u Lo'e Kabuk-abuna kanania bevasi'avanala maivaka Mose ita evenita koakoata boutai bevaedeanata."

15 Do'u namana 'abunai demia kauta boutai Sitiveni deteia 'eva ia vailana ikana itani anelu ka vailana boina.

7

Sitiveni Do'u Namana

Vailanai Eilolo.

1 Kabukabu kauta 'olatai kauna Sitiveni elavuaia ediaka, "Luva katania 'eva momo'aita, una?"

2 Sitiveni ena luva evamuea ediaka, "Bo'akala'u mai kama'u boumuia e, lele'u oika. Ita 'ava'avata Abela'amo asido'o eda'a 'Alana, ia Mesopotamiai emia do'o laloanai, nuavi Dilavana ia kevanai evailaasi,

3 e'ouia ediaka, 'Emu kano mai domu bovikanita, boda'a lau oni bavaikamu kanonai.'

4 "Kanaua 'ounai Abela'amo eta'u Kaledea kauta eta kano evikania, eko'isi eda'a 'Alanai emia. Kanaua'i emia eda'amo kamana eba, inoku Dilava eta'u esinia easi kano kanania'i vali'u oi omimia 'abuna.

5 Dilava Abela'amo sia kano kava'ina kena evenia, sia aena ivalavanadivo 'abuna vitaitana vaka kena eva'oula venia. Beia Dilava eluva'ana'i 'eva kano kanaua ia mai ia kekena bevenita. Melala kanaua'i Abela'amo 'eva sia mai nakuna.

6 Dilava eta'u ia kanania boina e'ouia ediaka, 'Oni kekemu 'eva 'abu edea kauta eta kanoai bemimia, vikau sinavu vani (400) laloanai kano kanaua kauta da'alata be'abi mai bevaanaanata.'

7 Beia Dilava eluva vaka ediaka, 'Eta da'ala iabinai devaaota kauta kataua 'eva lau batata'u bavaluvata, kanaua mulinai ia kano kanaua'i bela'asi inoku 'abu kanania'i lau bekukudivo veni'u.'

8 Inoku Dilava Abela'amo e'ouia iva bevavaia 'eva Dilava ena luva'ana'i ivamomo'aina koana. Kanaua 'ounai Aisaka epulu melalana ivakalavaninai koanai iva koana evavaia. Aisaka nakuna Iakobo evapulua, maivaka Iakobo nakuna 'ouka lua Isalaela iduvuna 'olata depulu.

9 "Iduvu 'olana kauta 'eva kadita Iosepa demama venia, Aikupito kauta kevatai detavatava vaia da'alaabi kaunai eao. Beia Dilava 'eva Iosepa ebania,

10 maivaka ena mekau boutai laloatai evamaulia. Koakoa nama'ina mai aoneka evenia Palao Aikupito lovia 'olana vailanai, Palao eta'u Iosepa siavu evenia Aikupito kanobatana mai ena luma kauta boutai be'ola vaita.

11 "Inoku Aikupito mai Kanaana kanota itoinai doe nama vaikana epulu inoku anaana nama vaikana evapulua. Ita 'ava'avata sia iani kena de-avalua.

12 Iakobo luva eika iani 'eva Aikupito ai ua'i, inoku ita 'ava'avata esinita eta melala makavana da'ana.

13 Eta melala ivaluana da'anai 'eva Iosepa sibona bo'akalana vailatai eluvusi ia 'eva dai, inoku Palao Iosepa kadi'a'ana eikabasita.

14 Inoku Iosepa luva esinia kamana Iakobo mai kadi'a'ana kauta boutai kalakoika navu ima (75) be'asi Aikupito.

15 Inoku Iakobo eko'isi eda'a Aikupito, ua'i eba mulinai ita 'ava'avata vaka ua'i deba.

16 Ba kauta kauanita 'eva devuata deda'a Sekema mitavanai dekoleta. Mitava kanaua 'eva Abela'amo eta'u 'Amolo nakuna imatai moniai etavaia.

17 "Dilava ena luva'ana'i Abela'amo kevanai ivamomo'aina melalana ekevai laloanai, ita 'ava'avata Aikupitoai 'eva kauta mato namavaikana.

¹⁸ Eda'amo to'onai lovia 'olana edeana ka Aikupito eloviala, ia 'eva Iosepa sia eikabasia.

¹⁹ Lovia 'olana kanaua ita 'ava'avata elebata inoku evaanaanata, evaasia-sita sibota nakata 'oma'omata beitota asi kanaua'i bebaba.

²⁰ Melala kanaua'i Mose epulu, melo si'amobalavenina Dilava vailanai, vuia koi kamana ena lumai de'imaia.

²¹ Inoku devala'asia mulimuliai devikania koanai Palao nakuna vatona eabia inoku eva'aida'aidala ia sibona nakunai evaaoa.

²² Kanaua 'ounai Mose 'eva Aikupito kauta eta aoneka boutai laloatai devaikabasia, inoku ia ena luvai mai ena koai 'eva desiavu vaika.

²³ "Mose vikauna vaninavui eabia koanai ia eula dona Isalaela kauta beikata.

²⁴ Ia banona ka Aikupito kauna ka eta'u evasiavanala 'eva eikaia, kanaua 'ounai ia eda'a kau kanaua eduluia inoku Aikupito kauna eaku bala.

²⁵ Mose elalovaia 'eva ia dona belaloune Dilava betata'u Mose imanai ia bevamaulita, beia ia sia deikabasi.

²⁶ Elani Isalaela kauta lua deviaku, Mose eda'a kevatai eabita kao inoku ediaka, 'Kau e, oi laluaana 'eva kadi'a'a, oi sibomui dava 'ounai oi ovaanaana-mui?'

²⁷ Beia ekula'ila kauna eta'u Mose edolia tau inoku elavuaia ediaka, 'Oni dai eva'oula venimu lai bolovia vaimai maivaka bovaluvamai kaunai evaaomu?'

²⁸ Oni o'ula lau boaku ba'u vitaitana lavi Aikupito kauna oaku bala boina?'

²⁹ Mose luva kanaua eika koanai, komolonai eveau akauma eda'a Midiana kanonai emia vitaitana 'abu edea kauna boina, ua'i nakuna momoluaneta lua depulu.

³⁰ "Vikau vaninavui (40) deole mulinai, Sinai lolona kevanai kano'akunai au 'ini'ininai 'alova evule laloanai anelu ka Mose kevanai evailaasi.

³¹ Mose eikaia koanai etabulovo, eilulao eda'a kevanai beikala kave'i laloanai, Lovia namana lelana eika.

³² Ediaka, 'Lau 'eva 'ava'avamu eta Dilava, Abela'amo, Aisaka mai Iakobo eta Dilava.' Mose emakau si'asi'a e'ululu 'ululu, sia eula beikala.

³³ Lovia namana eta'u ia e'ouia ediaka, 'Emu tamaka abita ovo, 'olana olalava 'abuna 'eva ekabukabu.

³⁴ Lau e'u kau Aikupitoai deanana aikata maivaka eta kani leleta a'ika, kanaua 'ounai a'ovu asi bavamaulita, vali'u ko'isi basinimu bomue'udai boda'a Aikupito.'

³⁵ "Mose ka'onamo kanania kauna ia deta'u delavuaia dediaka, 'Oni dai eva'oula venimu lai bolovia vaimai maivaka bovaluvamai?' Dilava eta'u ia esinia ia belovia vaita mai ivamaulita kaunai be'ao, au 'ini'inina eani laloanai ia kevanai evailaasi aneluna ena vidulu ai.

³⁶ Mose kauna kanaua Isalaela kauta Aikupitoai evala'asita, inoku vatabulovo vinaulata mai koa namata vaidia Aikupitoai, 'Atu 'Aolanai maivaka vikau vaninavui kano'akunai evavaita.

³⁷ Mose mo kanaua eta'u Isalaela kauta e'outa ediaka, 'Dilava betata'u enolea kauna ka oi viloumuiai besinia, vitaitana lau boi'u.'

³⁸ Ia kauna kanaua 'eva Isalaela kauta itana kano'akunai demia bou, mai Sinai Lolona akanai ia eluva venia aneluna itana maivaka ita 'ava'avata ita, inoku ia maui luvana eabia eveni keini ita kevatai.

³⁹ "Beia ita 'ava'avata sia deula Mose lelana be'ika, ia sia deabia dae, ia deula bemue'udai beda'a Aikupito.

⁴⁰ Ia deta'u Alona de'ouia dediaka, 'Ita be'ana'ia vaita dilavata vaidia vavaita, 'olana Mose Aikupitoai evada'ata asi kauna 'eva sia lai aikabasi ia kevanai 'ani dava epulu?'

Exo 3.1 ⁴¹ Melala kanaua'i ia deta'u bolomakau nakuna va'ava'ana ka devavaia, veniveni davata devuata deasi dilava dedena kanaua vailanai dene'eta divo, imatai devavaia davana vailanai delalonama.

⁴² Dilava ia kevatai eda'a ovo inoku evikanita sibota vutuvutu davata bekukudivo venita. Enolea kauna ena pukai ilelena luvana vitaitanai ediaka,

'Isalaela kaumui e, vikau vaninavui kano'akunai ainama mai vanama'ina sisita 'eva oi lau sia oainama veni'u.

⁴³ Oi dilava vana Moloka ena aiole lo'ena oi ovuala, maivaka emui visiu dilavana vana Lepana va'ava'ana vaka oi ovuala, dilava dedeta oi ovavaita kataua 'eva oi okukudivo venita.

Kanaua 'ounai Lau batata'u oi bavada'amui tau oi boda'a Babulonia avekenai.'

Amo 5.25-27

⁴⁴ "Ita 'ava'avata kano'akunai kevatai 'eva Dilava ena aiole lo'ena ka, Dilava eta'u Mose e'ouia aiole kanaua bevavaia vitaitanai devavaia, Mose eikaia koana vitaitanai.

⁴⁵ Mulinai ita 'ava'avata deta'u ia kamata imatai aiole lo'ena kanaua deabia devuaia Iosua ita deda'a pulu edea kauta eta kanoai dela'asi, Dilava eta'u vailatai kano kauta elo'ota asi, inoku ia demia vaia easimo Davida ena melalai.

⁴⁶ Dilava ena nama'ina 'eva Davida evenia, inoku ia Dilava enoia 'eva Iakobo ena Dilava ena luma ka bedaua.

⁴⁷ Beia Solomona eta'u luma evalavala.

⁴⁸ "Beia aka umauna Dilavana 'eva kau imatai devavaia lumana laloanai sia emimia. Enolea kauna ena luva vitaitana ediaka,

⁴⁹ 'Lovia namana kanania eluva koma,

Vutuvutu 'eva e'u mia'au 'abuna, kanobata 'eva ae'u ivalavadivona 'abuna.

Lau e'u luma davana oi bodaua?

E'u laani 'abuna 'eva a'i?

⁵⁰ Dava katanania boutai 'eva sia Lau ima'uai avavai, una?'

Isa 66.1, 2

⁵¹ "Ola pasisi kaumui, nuamui mai kaiamui oi o'alavuta kave'i vitaitana Dilava sia deikabasia kauta boita. Oi otata'u melala boutai Idume Kabuk-abuna oi otatauava. 'Ava'avamui devavai koakoata 'eva oi vaka oi ovavai.

⁵² Oi 'ava'avamui enolea kauna sia ka devasi'avanala, una? Vinaula komolo kauna be'asi luvana deluva vaia kauta deaku bata, vali'u oi otata'u komolo kauna venina oi oveni kouna oi okou inoku oi oaku bala.

⁵³ Oi kaumui 'eva Dilava ena talavatu anelu eveni 'eva oi oabia beia lelena daitai sia oi odai."

Bika'ai Sitiveni Deaku Bala.

⁵⁴ Do'u namana kauta Sitiveni lelena deika koanai debadu si'asi'a inoku adeta deala'opa devaikalala.

⁵⁵ Beia Sitiveni 'eva Idume Kabukabunai evonu, e'a'a dae vutuvutu eikaia inoku Dilava nuavina maivaka Iesu Dilava idibana duasi elava eikaia.

⁵⁶ Ia ediaka, "Oikaia! Vutuvutu eviluvu inoku Kau Nakuna Iesu Dilava idibana duasi elalava aikala."

⁵⁷ Ia deva'oi 'unu'unu imatai kaiata de'oububuta inoku ia boutai Sitiveni deveau venia,

⁵⁸ deabia deliviasi vanua mulimulinali inoku demakavala bika'ai deakuia, dede luvata deluva kauta kataua 'eva eta tubu'a ivadodo devadada ovo kau 'alu'aluna ka vana Saulo aena 'olanai dene'edivo.

⁵⁹ Bika'ai deakuia laloanai Sitiveni emeamea ediaka, "Lovia namana Iesu e, lau idume'u abia."

⁶⁰ Ekuidula inoku eva'oi ediaka, "Lovia namana e! Si'avana kanania tavana sia bovenita." Kanaua eluva koma mulinali eba.

8

¹ Saulo eta'u evamomo'aia Sitiveni 'eva deaku bala.

Saulo Dilava Ena Lo'e Kauta

Evaanaanata.

Melala ka'onamo kanaua'i Ielusalemi Dilava ena lo'e kauta devaanaanata vaika, inoku abiveni kauta boutai devaveauta siusiu deda'a Iudea mai Samalia kanotai demia, veaneke kauta sibota mo Ielusalemi demia.

² Dilava 'olana deaku kauta vaida Sitiveni deabia dekanidiala inoku devuaia deda'a dekoleia.

³ Beia Saulo eula Dilava ena lo'e kauta beabi siata, luma ka ka laloatai edodo, momoluane mai 'a'ate evelita la'asi, evuata eda'a vabuto'o lumana laloanai e'alavuta.

Vali Nama'ina Samaliai

Deilolo Vaia.

⁴ Abiveni kauta devaveauta siusiu 'eva deda'a 'abuta ka ka laloatai vali nama'ina deilolo vaia.

⁵ Pilipo eda'a Samalia vanuana namanai ela'asi, ua'i kau kevatai Keliso valina eilolo vaia.

⁶ Kau mato Pilipo lelana deika mai vatabulovo vinaulata evavai deikata koanai ia boutai 'eva ia eluva luvata leleta deika kave'i.

⁷ Kau doutamo nuatai ka'uba si'avata vaika kevatai mai vaoivaoita dela'asi, inoku 'eko kauta mai 'ome kauta dounamo 'eva denama'ina.

⁸ Kanaua 'ounai ua'i vanua namana kanaua laloanai lalonama namavaikana epulu.

⁹ Kau ka vana Simona 'eva vanua namana kanaua'i emia, ia siako vaikai eoadi inoku Samalia kauta boutai 'eva detabulovo. Ia sibona evanamala,

¹⁰ inoku kau boutai, namanai eda'amo kikinai epua, ia lelana de'ika mai dediaka, "Dilava ena siavu 'eva kauna kanania vana Siavu Namavaikana."

¹¹ Siako vaika sinosino vinaulatai evatabulovota 'ounai ia lelana deika.

¹² Beia Pilipo Dilava ena lovia vanuana valina nama'ina mai Iesu Keliso vana eilolo vaia koanai, deabivenia, inoku momoluane mai 'a'ate evaidi'uta kabukabu.

¹³ Simona vaka eabiveni inoku evaidi'ua kabukabu, Pilipo ebanoia deda'a to'ato'a 'eva koa namata mai vatabulovo vinaulata evavai eikata 'eva etabulovo si'asi'a.

¹⁴ Ielusalemi veaneke kauta luva deika 'eva Samalia kauta vaka Dilava ena luva deabia dae, kanaua 'ounai Petelo mai Ioane desinita deda'a Samalia.

¹⁵ Laluana deda'a Samaliai dela'asi koanai, abiveni kauta daitai de-meamea 'eva Idume Kabukabuna beabia,

¹⁶ 'olana Idume Kabukabuna 'eva asido'o e'ovu ia ka akatai, ia 'eva Lovia namana Iesu vanai mo devaidi'uta kabukabu.

17 Kanaua 'ounai Petelo mai Ioane imata ia akatai dekao'au demeamea 'eva Idume Kabukabuna deabia.

18 Simona 'eva veauneke kauta imata abiveni kauta laikubuatai dekao'au demeamea 'eva Idume Kabukabuna deabia eikata koanai, ia eta'u moni vaida eabita easi veauneke kauta evenita 'eva ediaka,

19 "Lau vaka siavu kanana oi boveni'u kanaua'i lau ima'u ia akatai bakao'au bameamea kauta boutai 'eva Idume Kabukabuna beabia."

20 Beia Petelo ia e'ouia ediaka, "Oni emu moni itana oi boba ka'ona 'olana oni olalovaia Dilava ena ainama davana 'eva moni ai botavala.

21 Oni vinala kanania laloanai sia mai 'abumu 'o avumu, 'olana Dilava vailanai oni nuamu 'eva sia ekomolo.

22 Emu si'avanai lalo'udai inoku Lovia namana noia, ama'i nuamu lalovaina si'avanana be'oua kao.

23 "Olana oni aikamu 'eva nuamuai mama evonu vaika maivaka si'avana 'ani evavilimu kaiu."

24 Simona enu'ovi ediaka, "Lau dai'uai Lovia namana enai oi bomeamea kanaua'i oi oluvavai luvata 'eva sia ka keva'uai bepupulu."

25 Petelo mai Ioane Lovia namana ena luva deluvasi vaia maivaka deilolo vaia mulinai, demue'udai deda'a Ielusalema. Eta dalai da'a laloanai 'eva Samalia vanuata doutamo laloatai vali nama'ina deilolo vaia.

Pilipo Etiopia Kauna Ka Namana

Evaidi'ua Kabukabu.

26 Lovia namana ena anelu ka Pilipo e'ouia ediaka, "Ko'isi divo duasi boda'ala, Ielusalemai eda'a Kasa dalana 'eva kano'akuna."

27 Kanaua 'ounai Pilipo eko'isi eda'a, dalai Etiopia kauna ka eikaia. Ia 'eva kau namana ka Etiopia eta lovia 'olana ateatena Kanadake ena dava e'ima kauna. Ia 'eva eda'a Ielusalemai emeamea,

28 inoku ena mue'udai ai 'eva ena kalioteai emia'au, enolea kauna Isaia ena puka evakua.

29 Idume Kabukabuna eta'u Pilipo e'ouia ediaka, "Da'a kaliote kauna kanaua 'aba'abanai bodada'a."

30 Inoku Pilipo eveau eda'a kau kanaua kevanai 'eva enolea kauna Isaia pukana evakua lelana eika. Inoku elavuaia ediaka, "Oni ovakua davana 'eva anina ovonai o'ovo, una?"

31 Kau namana kanaua ediaka, "Lau a baikabasi koma? Sia mai ivaik-abasi'u kauna ka." Inoku ia eta'u Pilipo enoia bele'au kevanai bemimia.

32 Puka Kabukabuna laloanai evakua luvana 'eva kanania boina deleleia.

"Ia 'eva itani mamoe boina
sia mai 'uluna bevada'ala

beda'a beaku bala,
'o itani mamoe nakuna boina

vuina beukua kauna vailanai
'eva 'ulu'uluna asi'i,

kanaua 'ounai ia nutunai sia
luva ka eluvaia kovo.

33 Ena lele vunu 'ounai valuva
laloanai ena komolo deabia ovo.

Sia kau ka ia kekena lovata be'aku
'olana kanobatai

ena mauli
'ani deabia ovo."

Isa 53.7, 8

34 Kau namana kanaua Pilipo elavuaia ediaka, "Ou'u, enolea kauna 'eva dai lovana eakua? Ia sibona lovana eakua 'o kau ka lovana eakua?"

³⁵ Inoku Pilipo eta'u puka ivakuna pukana kanaua 'abunai emakavala, maivaka Iesu valina nama'ina evaikabasia.

³⁶ Laluana dalai deda'a laloanai, deasi vei 'abuna kai dela'asi, inoku kau namana kanaua ediaka, "Ikala, vei nia, lau dava 'ounai sia baidi'u kabukabu?"

³⁷ (Pilipo ena luva evamuea ediaka, "Bema mai nuamu bounai boabiveni koanai vaidi'u kabukabu boabia 'eva enama'ina." Inoku kau namana kanaua ediaka, "Lau mai nua'u bounai abiveni Iesu Keliso 'eva Dilava Nakuna.")

³⁸ Inoku e'ouia kaliote bevalavala kao, Pilipo mai kau namana lalua de'ovu deda'a vei laloanai, Pilipo eta'u kau kanaua evaidi'ua kabukabu.

³⁹ Kauta lalua vei ai dele'au deasi koanai, Lovia namana Idumena eta'u Pilipo eabia tau. Inoku kau namana kanaua Pilipo sia eikaia 'udai, beia dalai mai lalonamana eda'a.

⁴⁰ Beia Pilipo 'eva Asoto vanuanai evailaasi, inoku eda'a vanua boutai laloatai edodo vali nama'ina eilolo vaia eda'amo Kaisalea vanuanai ela'asi.

9

Saulo Elalo 'Udai.

(Vn 22.6-16; 26.12-18)

¹ Melala kanaua'i ua'i Ielusalema laloanai Saulo 'eva Lovia namana ibanona kauta ivamakauta mai iaku bata luvata eluva 'aku'aku, kanaua 'ounai ia eda'a kabukabu kauta 'olatai kauna kevana,

² inoku enoia malele ka belelea bevenia beabia beda'a Iuda kauta eta lo'e Damaseko ai. Ua'i Iesu deabivenia dala kanania'i deda'avaia kauta mai 'a'ateta beliota bevuata bemue'udai beda'a Ielusalema.

³ Saulo dalai eda'a Damaseko vanuana 'ani ekevaia laloanai alimo 'ailala ka vutuvutuai e'ovu ia edua.

⁴ Saulo e'eko kanoai, lele ka eika ia e'ouia ediaka, "Saulo e! Saulo e! Lau dava 'ounai ovaanaana'u?"

⁵ Saulo elavuai ediaka, "Lovia namana e, oni dai?" Ena luva evamuea ediaka, "Lau 'eva Iesu, ovaanaana'u kau'u.

⁶ Vali'u ko'isi boda'a vanua laloanai bodododo, ua'i kau ka betata'u oni bovavaita davata vinaulata be'oumu."

⁷ Saulo ita eda'a kauta ua'i delava sia luva ka deluvaia, lele deika beia sia kau ka deikaia.

⁸ Saulo kanoai eko'isi, beia makana evaata koanai ia sia dava ka eikaia kovo. Kanaua 'ounai imanai deabi devada'ala deda'a Damaseko.

⁹ Melala koi emia laloanai makana 'eva de'ede, mai sia eaniani 'o dava ka einua.

¹⁰ Damasekoai abiveni kauna ka vana Anania, ena makakeini ai Lovia namana ia e'aeia ediaka, "Anania e!" Anania enu'ovi ediaka, "O! Lovia namana, lau nia."

¹¹ Inoku Lovia namana ia e'ouia ediaka, "Ko'isi da'a dala vana 'Komolo' ua'i Iuda ena lumai Taso kauna ka vana Saulo bolavua'ilavuai vaia. 'Olana vali'u ia 'eva emeamea.

¹² Ena makakeini ai 'eva kau ka vana Anania eikaia easi ia akanai ekao'au emeamea 'eva makana eviluvu."

¹³ Beia Anania Lovia namana ena luva evamuea ediaka, "Lau kau kanania valina melala doutamo 'ani aika, ia Ielusalemai emu kabukabu kauta doutamo 'ani evaanaana vaika.

¹⁴ Maivaka kabukabu kauta namata eta siavuai 'ani easi nia'i inoku oni vamuai de'ae'ae kauta boutai beliota."

¹⁵ Beia Lovia namana ia e'ouia ediaka, "Da'a. 'Olana lau 'ani ia adilaia da'ala'u be'abi, pulu edea kauta, lovia 'olata kauta maivaka Isalaela kauta vailatai lau va'u beilolo vaia.

¹⁶ Lau batata'u ia bavaikala 'eva lau va'u dainai ia beanana vaika."

¹⁷ Kanaua 'ounai Anania eko'isi eda'a lumai edodo, imana luana Saulo akanai ekao'au 'eva ediaka, "Bo'akala'u Saulo e! Dalai oasi laloanai Lovia namana Iesu kevamuai evailaasi kauna esini'u a'asi, oni makamu bevaata boikaika 'udai maivaka Idume Kabukabunai bevavonumu."

¹⁸ Komolonai itani sisi unata boina Saulo makanai de'ekoasi, inoku makana denama'ina, ena ikaika enama'ina 'udai. Eko'isi inoku eidi'u kabukabu.

¹⁹ Inoku eaniani mulinai 'eva kauanina ekula'ila 'udai.

Saulo Damasekoai Eilolo.

Saulo boni vida boita abiveni kauta ita Damaseko ai demia.

²⁰ Komolonai Saulo eko'isi Iuda kauta eta lo'e ka ka laloatai eilolo Iesu 'eva Dilava Nakuna.

²¹ Lelena deika kauta boutai detabulovo si'asi'a dediaka, "Nia 'eva Ielusalemai Iesu dekudivo venia kauta evavaita si'asi'a vaika kauna. Inoku easi nia'i vaidava vaka beliota bevuaata beda'a kabukabu kauta namata kevatai, una?"

²² Beia Saulo ena ilolo ena siavu 'eva namana eao, inoku Damasekoai Iuda kauta demia kauta sia delalo to'ato'a Iesu 'eva Keliso ivamomo'ainai.

Saulo Epode.

²³ Melala vaidava deole mulinai, Iuda kauta dedo'u Saulo iaku bana lovana deakuia,

²⁴ beia Saulo 'eva ia eta luvaluva 'ani eikabasi. Boni mai lani ia vanua alana nutualana deikaia kao Saulo beaku bala 'ounai.

²⁵ Ia mulinai dedada'a kauta boni laloanai Saulo aleka laloanai deudaia ala akanai valoai deva'ovua.

Saulo Eda'a Ielusalema.

²⁶ Saulo eda'a Ielusalemai ela'asi koanai ia eula abiveni kauta ita bevaka'ona, beia ia boutai 'eva ia demakau venia 'olana sia devamomo'aia ia 'ani eabiveni dokadoka.

²⁷ Beia Banaba eta'u evada'ala deda'a veauneke kauta kevatai. Inoku Saulo Lovia namana dalai a eikaia koma, mai Lovia namana eta'u ia e'ouia luvata, maivaka Damaseko ai Iesu vanai eilolo mai kula'ilana ita luvata e'outa.

²⁸ Kanaua 'ounai Saulo ua'i ia ita demia inoku Ielusalema bounai deda'aia kaiu, Iesu vanai eilolo mai kula'ilana ita.

²⁹ Iuda kauta 'Elene malatai deluluva kauta Saulo ita deluvaluva mai deadedua, kanaua 'ounai deula beaku bala.

³⁰ Bo'akalana deikabasia koanai, Saulo devuaia deda'a Kaisalea ua'i desinia eda'a Taso.

³¹ Inoku Iudea, Kalilea mai Samalia kanota boutai laloatai Dilava ena lo'e kauta nua'elu deabia. Lovia namana makauna demakau inoku Idume Kabukabuna eduluta vitaitanai eta kula'ila 'eva ebata'ina mai Dilava ena lo'e kauta eta mato 'eva ele'au.

Petelo 'Olele Kauna

Vana Aenea Evanama'inala.

³² Petelo eda'a vanua ka ka laloatai ekeini eda'a Dilava ena kabukabu kauta Ludai kevatai ela'asi.

³³ 'Abu kanaua'i 'eko kauna ka vana Aenea edavalia. Ia vikau kalavani 'eva kanaua boina eno.

³⁴ Inoku Petelo ia e'ouia ediaka, "Aenea e! Iesu Keliso 'ani evanama'inamu. Ko'isi, emu enokai davata lo'uta." Komolonaimo Aenea eko'isi.

³⁵ Luda mai Salonai demia kauta boutai koa kanaua deikaia koanai, delalo 'udai deda'a Lovia namana kevana.

Petelo Tabita Evamaulia.

³⁶ Iopa vanuanai abiveni ateatena ka emia, ia vana 'eva Tabita. ('Elene malatai 'eva Doleka.) Ia 'eva melala boutai vinaula nama'ita evavai mai ulalu kauta eduluta.

³⁷ Melala kanaua'i ia e'olele inoku eba. Kauanina devaidi'ua kave'i inoku aka daiutuna ka laloanai devaenoa.

³⁸ Luda mai Iopa viloata 'eva sia edau'a. Kanaua 'ounai Iopa ai abiveni kauta vaida deikabasi Petelo 'eva ua'i Luda ai, inoku deko'isi kau lua desinita deda'a Petelo kevana, denoia beda'a kaokao beda'a kevana.

³⁹ Kanaua 'ounai Petelo eko'isi ia ita deda'a, inoku dela'asi koanai devuaia deda'a luma laloanai devaelea'au eda'a aka daiutunai. Obu vaida vaka ua'i delava dekani, Doleka maulinai laloanai ivadodo mai tubu'a ekulita tubu'ata kataua Petelo devaikaia.

⁴⁰ Petelo eta'u ia boutai esinita dela'asi inoku ekuidula emeamea. Mulinai ba ateatena evailala inoku ediaka, "Tabita e! Ko'isi." Ia makana evaata Petelo eikaia inoku eko'isi emia divo.

⁴¹ Petelo eta'u imanai eabi inoku eduluia evalavala kole. Abiveni kauta mai obu e'aeta deasi kevana, ateate evamaulia ateatena evaikaia.

⁴² Vali kanania 'eva Iopa vanuanai bounai laloanai deluvaia odaoda, inoku kau doutamo Lovia namana deabivenia.

⁴³ Petelo 'eva Iopai bolomakau avata ekulita kauna vana Simona kevanai ua'i kena emia dau'a.

10

Anelu Konelio Kevanai Evailaasi.

¹ Kaisalea vanuanai Loma kuali kauna ka vana Konelio, Italia kuali kauta boutai sinavu ka (100) e'olavaita kauna.

² Ia mai ena luma kauta boutai 'eva Dilava lelana daitai dedadai mai makauna demakau, ia ena dava doutamo luda kauta ulaluta eainama venita, maivaka melala boutai Dilava kevanai emeamea.

³ Melala ka ado'alavuni avekenai melala koana koi boina, ia emakakeini 'eva Dilava ena anelu ka eikaia une easi ia ena lumai edodo 'eva e'ouia ediaka, "Konelio e."

⁴ Ia mai makauna anelu eteia inoku elavuaia ediaka, "Lovia namana e, davaka dainai o'asi?"

Anelu enu'ovi ediaka, "Emu meamea mai ulalu kauta oainama venita davata 'eva dele'au deasi Dilava vailanai vitaitana ainama ilalovaikaota davata boita.

⁵ Vali'u emu kau vaida sinita deda'a Iopa, kau ka vana Simona vana ivaluana 'eva Petelo be'oua ita be'asi.

⁶ Ia 'eva Simona ka bolomakau avatai dava edeata edeata ekulita kauna ena 'abuai emimia, ena luma 'eva 'atu 'aba'abanai."

⁷ Anelu luva kanaua eveni inoku eda'a mulinai, Konelio eta'u ena lumai da'alaabi kauta lalua mai kuali kauna ka Dilava lelana daitai edadai kauna e'aeta.

⁸ Konelio kevanai depulu davata boutai kau koina kataua e'outa mulinai, esinita deda'a Iopa.

Petelo Makakeini Davana Ka Eikaia.

⁹ Elani ado'alavuninai kau kataua deasi Iopa 'ani dekevaia 'eva Petelo ele'au eda'a luma 'uvinai laani 'abunai ua'i bemeamea.

¹⁰ Vikolo eakua inoku eula iani kena beania, iani deva'olu do'o laloanai ia dava ka eikaia itani enivinivi boina.

¹¹ Vutuvutu eluvu eikaia mai dava ka tubu'a namavaikana boina kaiana si'ata vani iabi kaota e'ovu easi kanobata.

¹² Ua'i tubu'a kanaua laloanai 'eva sisi aeta vani vani sisita boutai, kanoai delalau davata boutai mai akai delolovo manumanuta boutai iudata.

¹³ Inoku lele ka ia e'ouia ediaka, "Petelo e, ko'isi, akuta anita."

¹⁴ Beia Petelo lele kanaua ena luva evamuea ediaka, "Lovia namana e, lau sia 'ani bavavaia, Dilava vailanai de'obu sisita 'o sia dekabukabu sisita asido'o ka ania kovo."

¹⁵ Lele kanaua melala ivaluana ia e'ouia ediaka, "Dilava 'ani evamaka-makata davata 'eva oni 'obuta sia bo'oulai."

¹⁶ Melala koi koa kanania epulu inoku komolonai tubu'a kanaua 'eva deabi muea eda'a vutuvutu.

¹⁷ Petelo makakeini anina kanaua ilalovainai nuana evabavunua laloanai, Konelio esinita kauta Simona ena luma dedavalua inoku deasi ena ala nutualana vailanai delavadivo.

¹⁸ De'ae lavuai dediaka, bema kau ka vana Simona, ia vana ka 'eva Petelo na'i emimia 'o asi'?

¹⁹ Petelo makakeini kanaua elalovaia do'o laloanai Idume Kabukabuna eta'u ia e'ouia ediaka, "Simona e, kau koi 'eva oni de kavumu.

²⁰ Ko'isi, 'ovu da'a kevata, ia ita oi bodada'a 'eva sia bolalo to'ato'a, 'olana lau ia asinita."

²¹ Petelo e'ovu eda'a inoku kau kataua e'outa ediaka, "Oi okavua kauna 'eva lau kau'u kanania. Emui lalovai ka 'ounai oi o'asi, una?"

²² Inoku ia ena luva devamuea dediaka, "Lai 'eva Konelio kualo kauta sinavu ka (100) e'olavaita kauna esinimai lai a'si. Ia 'eva komolo kauna mai Dilava makauna emakau kauna inoku Iuda kauta boutai 'eva ia 'olana de'aku. Dilava ena anelu kabukabuna ka ia e'ouia oni daimuai bevisini boda'a ia ena luma, kanaua'i oni luva dava boluvala 'eva lelemu be'ika."

²³ Petelo eta'u kau kataua eabita dodo lumai deno. Elani 'avu'avuninai Petelo deko'isi inoku ia ita deda'a, Iopai abiveni kauta vaida vaka ia debanoia ita deda'a.

Petelo Eda'a Konelio Ena Luma.

²⁴ Melala ivaluanai 'eva Kaisalea vanuanai dela'asi. Konelio 'eva kadi'a'ana mai ena kau umauta vaida eveauta ita demia bou Petelo de'imaia.

²⁵ Petelo lumai eneke dodo laloanai Konelio ita devidavali inoku Petelo aena 'olanai epakadivo ekukudivo venia.

²⁶ Beia Petelo Konelio evelia isi 'eva e'ouia ediaka, "Ko'isi, lau 'eva kau mo oni boimu."

²⁷ Luluana mai luvaluvata lumai deda'adodo laloanai ua'i kau doutamo demiado'u eikata.

²⁸ Inoku Petelo e'outa ediaka, "Oi oikabasi 'eva ita Iuda kauta eta talavatu 'eva pulu edea kauna ka ita sia ekamia ka'ona, maivaka sia ekada'a kevana. Beia Dilava eta'u lau evaika'u 'eva sia kau ka 'obuna 'o sia ekabukabu luvana baluvala kovo.

²⁹ Kanaua 'ounai lau dai'uai oi ovisini koanai komolonai asi sia a'ouba'oa. Lau a'ula oi balavuaimui 'eva lau dai'uai dava ounai oi ovisini?"

³⁰ Konelio ia ena luva evamuea ediaka, "Melala vani 'ani deda'a laloanai, ado'alavuni avekenai melala koana koi boina vitaitana vali'u boina 'eva lau e'u lumai ameamea laloanai komolonaimo kau ka tubu'ana de'amale'amalea elava vaila'uai aikaia.

³¹ Inoku e'ou'u ediaka, 'Konelio e, Dilava 'ani emu meamea leleta eika maivaka ulalu kauta oainama venita davata 'eva elalovaikao.

³² Kanaua 'ounai luva bosinia beda'a Iopa, kau ka vana Simona de'aea Petelo kevanai, ia 'eva kau ka vana Simona bolomakau avata ekuli kauna ena lumai emimia ua'i 'atu 'aba'abanai.'

³³ Kanaua 'ounai lau oni daimuai luva asinia kaokao evasi, inoku o'asi 'eva enama'ina. Vali'u lai boumaiai 'eva Dilava vailanai nia'i lai amiado'u, Lovia namana 'ani eluva pasisi venimu luvata boutai 'eva lai bo'oumai lelemu lai ba'ika."

Petelo Konelio Ena Lumai Eilolo.

³⁴ Petelo ena luva emakavala ediaka, "Luva umauna, vali'u lau aikabasi kave'i 'eva Dilava kau boutai dala vitaitanai eabita dae.

³⁵ Beia iduvu boutai laloatai Dilava makauna demakau kauta maivaka vinaula komolo devavai kauta 'eva Dilava betata'u beabita dae.

³⁶ Dilava luva esinia eda'a Isalaela kauta kevatai 'eva oi oikabasi, Iesu Keliso enai nua'elu valina nama'ina eilolo vaia, ia 'eva kau boutai eta Lovia namana.

³⁷ Iudea kanobatanai dava namavaikata 'ani epulu davata 'eva katania, Ioane kau vailatai vaidi'u kabukabu eilolo vaia mulinai 'eva Kalilea ai demakava.

³⁸ Dilava eta'u Iesu Nasaleta kauna evasiavua 'eva oi oikabasi, inoku Idume Kabukabuna mai siavu ia akanai eva'ovua, Iesu eda'a to'ato'a 'abuta boutai nama'ina vinaulata evavai mai Diabolo ena siavu venunai kauta boutai evanama'inata, 'olana Dilava 'eva ia ita.

³⁹ Iudea vanuata boutai laloatai mai Ielusalemai evavai davata boutai makamaiai lai aikata. Iuda kauta deta'u au ido'o valaukuna akanai dekokoia 'au eba.

⁴⁰ Beia melala ivakoinai Dilava eta'u Iesu ba ai evako'isia inoku evala'asia kau kevatai,

⁴¹ sia kau boutai ia deikaia, beia lai Dilava 'ani edilamai kaumai mo lai aikaia. Ia ba ai eko'isi mulinai ia ita lai aniani maivaka vei lai ainu ka'ona kaumai kataua 'eva ia lai aluvasi vaia.

⁴² Ia lai e'oumai kau kevatai vali nama'ina lai bailolo vaia maivaka lai baluvasi 'eva Dilava eta'u ia edilaia mauili kauta mai ba kauta ivaluvata kaunai evaaoa.

⁴³ Enolea kauta boutai ia deluvasi vaia 'eva ia beabivenia kauta boutai 'eva ia vanai eta si'avana be'ou kao."

Pulu Edea Kauta Idume Kabukabuna Deabia.

⁴⁴ Petelo luva katania eluva do'o laloanai, Idume Kabukabuna e'ovu kaiata devaala kauta kataua boutai akatai.

⁴⁵ Iuda kauta Iesu deabivenia kauta Petelo debanoia ita deasi kauta kataua 'eva detabulovo si'asi'a 'eva Idume Kabukabuna ena ainama 'eva pulu edea kauta akatai vaka 'ani iva'ovuna,

⁴⁶ 'olana ia mala edeata edeatai deluvaluva leleta deika mai Dilava devanama'inala. Inoku Petelo ediaka,

⁴⁷ "Kau katania 'eva Idume Kabukabuna 'ani deabia vitaitana ita 'ani kabia boina. Inoku dai ia be'outa kao veiai sia beidi'u kabukabu?"

⁴⁸ Petelo ia e'outa Iesu Keliso vanai beidi'u kabukabu. Inoku deidi'u kabukabu mulinai Petelo denoia melala vidamo ua'i ia ita bemimia.

11

Petelo Ielusalemiai Dava Epuļu

Davana E'oulai Kave'i

¹ Iudeai Veauneke kauta mai bo'akalana demimia kauta luva deika 'eva pulu edea kauta vaka Dilava ena luva 'ani deabia dae.

² Kanaua 'ounai Petelo eda'a Ielusalemiai koanai, Iuda kauta Iesu deabivenia kauta kataua ia de'ovenia,

³ dediaka, "Oni oda'a iva sia deabi kauta eta lumai inoku ia ita oi oaniani ka'ona."

⁴ Petelo eta'u ia vailatai dava depulu davata boutai e'oulai kave'i.

⁵ Ediaka, "Lau 'eva Iopa vanuanai ua'i ameamea inoku amakakeini 'eva vutuvutuai dava ka itani tubu'a namavaikana boina kaiana si'ata vani i'abi kaota e'ovu aikaia, inoku e'ovu easi keva'uai.

⁶ Laloanai akaidodo 'eva kanobata sisita aeta vani vani, aivala sisita, kanobatai delalau davata mai akai delolovo manumanuta aikata.

⁷ Inoku lele ka aika e'ou'u ediaka, 'Petelo e, ko'isi, akuta anita.'

⁸ Beia ia ena luva avamuea adiaka, 'Lovia namana e, lau sia 'ani bavavaia, lau asido'o de'obu davata 'o sia dekabukabu davata ka nutu'uai edodo.'

⁹ Beia melala ivaluana vutuvutuai lele kanaua ediaka, 'Dilava 'ani evamakamakata davata 'eva oni 'obuta sia bo'oulai.'

¹⁰ Melala koi kanania epulu. Inoku dava kataua boutai 'eva develi 'au 'udai deda'a vutuvutu.

¹¹ Melala kanaua'i Kaisaleai kau koi desinita deasi keva'u kauta deasi lau amia lumanai delavadivo.

¹² Inoku Idume Kabukabuna e'ou'u ia ita lai badada'a sia ba'ouba'oa. Bo'akalata kalakoina katania vaka ita lai ada'a Kaisaleai kau ka vana Konelio ena lumai lai ada'adodo.

¹³ Ia e'oumai ediaka, anelu ka ena lumai evailaasi eikaia inoku ia e'ouia ediaka, 'Kau ka vana Simona 'eva de'aea Petelo dainai bovisini beda'a Iopa.

¹⁴ Ia betata'u luva beabia be'asi luvanai oni mai emu luma kauta boutai bevamaulimui.'

¹⁵ E'u luva amakavala laloanai Idume Kabukabuna easi ia akatai e'ovu vitaitana makavanai easi ita akatai e'ovu boina.

¹⁶ Inoku Lovia namana eluva luvana alaloia une, 'Ioane veiai evaidi'u kabukabu, beia oi 'eva Idume Kabukabunai oi bovaiddi'uta kabukabu.'

¹⁷ Kanaua 'ounai Lovia namana Iesu Keliso deabivenia kauta kataua 'eva bema Dilava ita ainama evenita ainamana vitaitanai vaka ia evenita. Inoku lau kau a boi'u 'eva Dilava ena vinaula kanaua ba'alavaua?'"

¹⁸ Ia luva kanaua deika koanai eta 'ovede luvata devapuata inoku Dilava devanama'inala dediaka, "Dilava 'ani pulu edea kauta evalalota'udai inoku maui evenita."

Antiokai Lo'eta Kauta.

¹⁹ Sitiveni deaku bala koanai abiveni kauta 'eva devaanaanata vaika inoku deda'a odaoda, vaida deda'a dau'adau'a deda'a Poenikia, Kupulo mai Antioka, Iuda kauta mo kevatai vali nama'ina deilolo vaia.

²⁰ Beia abiveni kauta vaida 'eva Kupulo mai Kulene kauta. Ia deda'a Antioka inoku pulu edea kauta kevatai Lovia namana Iesu valina nama'ina deilolo vaia.

²¹ Lovia namana siavuna 'eva ia ita inoku kau doutamo vaika eta maui deveni Lovia namana kevanai inoku ia deabivenia.

²² Ielusalemiai Dilava ena lo'e kauta vali kanania deika, inoku Banaba desinia beda'a Antioka.

²³ Ia Antiokai ela'asi koanai Dilava ena iulaveni koana eikaia, ia lalona denama, inoku ia boutai evakula'ilata mai nuata bounai Lovia namana beabivenia.

²⁴ Banaba 'eva kau mediana, Idume Kabukabunai evonu mai ena abiveni namavaikana. Kanaua 'ounai kau doutamo eta mauili Lovia namana devenia.

²⁵ Inoku Banaba 'eva Saulo ikavuna eda'a Taso.

²⁶ Inoku edavalia koanai evuaia eda'a Antioka. Vikau ka itoina ia laluaana ua'i abiveni kauta ita demiado'u maivaka kau doutamo devaikasasita. Ua'i Antiokai abiveni kauta vata de'aeta makava 'eva Keliso ena kau.

²⁷ Melala kanaua'i Ielusalemia enolea kauta vaida de'ovu deasi Antioka.

²⁸ Kau kataua ka vana 'eva Akabo, eko'isi elavadivo inoku Idume Kabukabuna siavunai 'eva doe namavaikana kanobata itoinai bepupulu davana eluvaia 'ana'i. (Doe kanaua 'eva Kalaudio elovia melalanai epulu.)

²⁹ Antiokai abiveni kauta 'eva ka ka eta kula'ila vitaitanai deula vidulu besisini beda'a ia bo'akalata deabiveni kauta Iudea ai demimia kauta kataua kevatai.

³⁰ Inoku kanania boina devavaia. Banaba mai Saulo imatai ainama kataua desinita kole deabi deda'a 'ana'iaivai kauta devenita.

12

'Eloda Iakobo Eaku Bala

Inoku Petelo Devavabuto'oa.

¹ Melala kanaua'i Lovia 'olana kauna 'Eloda eta'u lo'e kauta vaida bevaanaanata si'asi'a 'ounai eabita.

² Ia eta'u Ioane 'a'ana Iakobo kuali leponai ekala bala,

³ Ia vinaula kanaua'i Iuda kauta evalalonamata eikata koanai, ia eda'a Petelo vaka belioa. Nia 'eva Iuda kauta eta nadu vana Palaoa Sia Ivakubuna Naduna melalanai epulu.

⁴ Elioia mulinai, vabuto'o lumanai e'alavua, kuali kauta 'ouka kalakoi imatai eudaia, vani vani be'imala. 'Eloda elalovaia 'eva nadu mulinai bevala'asia kau mato vailatai bevaluvala.

⁵ Kanaua 'ounai Petelo vabuto'o lumanai deabi 'inia, beia lo'e kauta 'eva ia dainai Dilava kevanai demeamea kula'ila.

Vabuto'o Lumanai Anelu

Petelo Eduluia Eveau Ovo.

⁶ Belani koanai 'Eloda 'eva Petelo bevala'asia valuva vailanai inoku boninai Petelo 'eva seini luai dedo'oua inoku kuali kauta lua vilootai eno emuinai. Inoku kuali kauta lua nutuala aunai delava.

⁷ Komolonai Lovia namana ena anelu evaiaasi inoku 'ailalana ka daiutu laloana eduia, anelu eta'u Petelo panai eaku inoku evaibia 'eva e'ouia ediaka, "Ko'isi kaokao," inoku ia imana 'ato'atota seini de'eko asi.

⁸ Anelu eta'u Petelo e'ouia ediaka, "Tubu'amu mai tamakamu vadodota." Petelo koakoata evavai, inoku anelu ediaka, "Ivadodomu ai lope inoku muli'uai bodada'a."

⁹ Petelo anelu mulinai eda'a vabuto'o lumanai ela'asi, beia anelu evavai davata depulu dokadoka 'eva ia ovotai sia eovo, ia eko ia 'eva emakakeini.

¹⁰ 'Ima kauta makavana mai ivaluana deda'ata vikani inoku deasi deda'a 'auli nutualana ekeini vanua namana kokona edada'akanaua'i 'eva nutualana sibona eviluvu, inoku laluaana dela'asi vanua dalana deda'aia deda'a koanai, komolonai anelu ia evikania.

11 Petelo nuana e'ailala 'eva ediaka, "Vali'u lau aikabasi komolo 'eva Lovia namana eta'u ena anelu esinia inoku 'Eloda ena siavu venunai mai Iuda kauta lau keva'uai bevavaia lalovaita davata boutai laloatai evamauli'u."

12 Ia nuana e'eko'ovi koanai, komolonai eda'a Malia ena luma, Malia kanaua 'eva Ioane Maleko sinana, abiveni kauta doutamo ua'i deakubou inoku demeamea.

13 Petelo luma kanaua nutualanai eakuaku, inoku da'alaabi vatona ka vana Loda eda'a nutuala beikala.

14 Ia Petelo lologa eikaune koanai lalona denama keini vaika 'eva nutuala sia eluvuia, ia eveau emue'udai inoku e'outa ediaka, "Petelo 'eva nutulalai elalava."

15 Ia vato de'ouia dediaka, "Oni obobo'o!" Beia ia eluva kula'ila ua 'eva ia umauna. Kanaua 'ounai ia deluva dediaka, "Ama'i ua Petelo eikalakao aneluna."

16 Beia Petelo eakuaku do'o 'ounai nutuala deluvuia 'eva deikaia koanai, detabulovo si'asi'a.

17 Petelo imanai e'outa kao 'uluta beasi'i, inoku Lovia namana vabuto'o lumanai a evala'asia koma luvana e'outa, maivaka e'outa ediaka, "Luva kanaua Iakobo mai bo'akalata kevatai oi boluva vaia. Inoku evikanita eda'a 'abu ka.

18 'Avu'avuni avulai kualo kauta sibota vilovaita laloto'ato'a mai makau namavaikana epulu 'eva Petelo kevanai dava epulu 'ounai.

19 'Eloda e'outa bekavua, beia sia dedavalia, kanaua 'ounai i'imana kauta elavuaia inoku ena luvai deaku bata. Kanaua mulinai 'Eloda Iudea evikanita eda'a Kaisaleai ua'i kena emia.

'Eloda Eba.

20 'Eloda 'eva Tulo mai Sidono kauta ebadu venita vaika, kanaua 'ounai boutai nuata devaka'onamoa beda'a ia kevana. Lava'ana'iana deda'a 'Eloda ena luma e'ola vaia kauna vana Balasto kevanai deva'amea beduluta, inoku deda'a 'Eloda kevanai nua'elu denoinoi vaia. 'Olana ia eta iani 'eva lovia 'olana kauna kanaua ena kanobatai de'asi.

21 'Eloda edilaia melalanai, ia eta'u ena lovia tubu'ana evadodoa inoku ena lovia imia'aunai emia'au 'eva kau eilolota.

22 Inoku vanua kauta devaoi dediaka, "Nia 'eva dilava ka lologa, sia kau lologa."

23 Komolonai Lovia namana ena anelu 'Eloda eakuia, 'olana ia Dilava sia evanama'inala, inoku 'imolo'imolo ia kauanina deania 'eva eba.

24 Beia Dilava ena luva 'eva ekula'ila inoku abiveni kauta numelana ekubu 'abu bounai edaonala.

25 Banaba mai Saulo desinita vinaulana bevavaia vinaulana kanaua devaolea koanai Ielusalema devikanita, Ioane vana ka Maleko vaka devuaia ita demue'udai deda'a Antioka.

13

Banaba Mai Saulo Desinita La'asi.

1 Antioka ai lo'e kauta vaida 'eva enolea kauta mai vamalele kauta vata katania, Banaba, Simeona (avata 'umabobokota kauta), Lukio (Kulene kauna), Manaena ('Eloda ita de'aida'aida ka'ona kauna) mai Saulo.

2 Ia deta'u Lovia namana dekuvudiva venia mai delove lalovaita, Idume Kabukabuna e'outa ediaka, "Lau dai'uai Banaba mai Saulo oi boabita dae, lau adilata vinaulana bevavaia dainai."

3 Delove mai demeamea mulinai, imata ia laluvana akatai deka'o'au inoku desinita la'asi.

Kupuloai Deilolo.

⁴ Idume Kabukabuna eta'u Banaba mai Saulo esinita de'ovu deda'a Seulekia, ua'i aunakoia'i dele'au dekeini deda'a Kupulo motumotunai.

⁵ Salami ai dela'asi koanai, Iuda kauta eta lo'e laloatai Dilava ena luva deilolo vaia. Ioane Maleko 'eva ia kevatai evidulu.

⁶ Motumotu itoinai dekeinina deda'amo Papo ai dela'asi, ua'i Iuda kauta eta sinosino kauna mai enolea dedena kauna ka vana Baliesu dedavalia.

⁷ Ia 'eva motumotu kanaua ena Kavana kauna Selekiu Paulo, nuakomolo kauna ena kau. Kavana kauna kanaua eta'u Banaba mai Saulo daitai luva esinia, 'olana ia eula Dilava ena luva 'uluna beika.

⁸ Beia Baliesu vana ivaluana 'eva 'Elimasi ('Elene malatai anina 'eva sinosino kauna) sia eula Kavana kauna beabiveni 'ounai ia lalua e'alavuta.

⁹ Beia Saulo, ia vana ivaluana 'eva Paulo, 'eva Idume Kabukabuna ai evonu, inoku sinosino kauna kanaua ete'inia,

¹⁰ e'ouia ediaka, "Oni 'eva Diabolo nakuna! Komolo vinaulata boutai eta 'ou kaumu, dede mai kau ilebata vinaulatai ovonu. Lovia namana ena luva umaota boutai 'eva dede ai ovaaota.

¹¹ Vali'u Lovia namana imana 'eva oni akamuai bene'ea 'au inoku makamu be'ede, melala kava'inamo melala 'ailalana sia boikala." Komolonai 'Elimasi eonovaia vaitabu boita mai vabuto'o makana de'alavua, kau ekavuta imanai be'abi bevada'ala.

¹² Kavana kauna koa kanaua epulu eikaia koanai, eabiveni, 'olana Lovia namana ena vaikabasi luvatai etabulovo si'asi'a.

*Paulo Mai Banaba Deda'a**Pisidia Kanona Antiokai Deilolo.*

¹³ Paulo mai debanoia kauta ita Papo ai aunakoia'i dele'au deda'a Peleka, Pamupulia kanonai dela'asi, ua'i Ioane Maleko ia evikanita emue'udai eda'a Ielusalem.

¹⁴ Paulo mai Banaba Peleka ai deko'isi deda'a Pisidia kanona Antioka ai dela'asi. Ua'i melala kabukabunai deda'a Iuda kauta eta lo'eai deda'adodo inoku demiadivo.

¹⁵ Mose ena talavatu pukana mai enolea kauta deleleta pukata devakuta mulinai, Iuda kauta eta lo'e i'olavaina kauta luva desinia eda'a kevatai dediaka, "Bo'akalamai e, mai emui vakula'ila luvana ka kau katania daitai koanai, anoimui oi boluvala asi."

¹⁶ Paulo eko'isi imanai koakoa evavaita inoku ediaka, "Isalaela kaumu mai oi pulu edea kaumu Dilava oi okukudivo venia kaumu e, lele'u oika.

¹⁷ Isalaela kauta eta Dilava eta'u kubuta 'ava'avata edilata inoku Aikupito ai demia laloanai kauta evavovo'o, maivaka ia ena siavu namavaikanai Aikupito ai evala'asita.

¹⁸ Vikau vaninavui (40) boina kano'akunai kevatai evapasisi.

¹⁹ Ia eta'u Kanaana kanobatata kalakoika evavaita si'asi'a. Kanota ekoleta Isalaela kanotai deao vikau sinavu vani imanavui (450) boina laloanai.

²⁰ Dava katania depulu mulitai, Dilava eta'u valuva kauta evenita be'ana'ia vaita easimo enolea kauna Samuela ena melalai.

²¹ "Inoku ia deta'u lovia 'olana ka denoinoi vaia 'eva Dilava eta'u Beniamina iduvuna kauna ka, Kisa nakuna Saulo evenita, vikau vaninavui elovia.

²² Dilava Saulo eabia ovo mulinai, Davida ia eta lovia 'olanai evaaoa. Ia eluva vaia ediaka, 'Iese nakuna Davida 'ani adavalia lau nua'u eula venia kauna, ia 'eva lau aula vaita vinaulata boutai bevavaita.'

²³ Dilava ena luva'ana'i vitaitanai Davida ena pulu kaunai Isalaela kauta bevamaulita kauna evako'isia, kauna kanaua 'eva Iesu.

²⁴ “Iesu ena vinaula asido'o emakavala laloanai, Ioane 'eva Isalaela kauta boutai kevatai lalo 'udai mai idi'u kabukabu eilolo vaia.

²⁵ Ioane ena vinaula 'ani bevaolea laloanai kau e'outa ediaka, 'Oi olalovaia lau 'eva dai? Lau 'eva sia Keliso. Ia 'eva lau muli'uai e'asi, lau 'eva sia anama'ina vaika ia ena tamaka valota baluvuta.'

²⁶ “Bo'akala'u, Abela'amo kekena maivaka oi pulu edea kaumui Dilava makauna oi omakau kaumui e, Dilava eta'u vamauli luvana kanania esinia easi ita kevatai.

²⁷ Telusalema ai demimia kauta mai ia i'ana'ia vaita kauta Iesu sia deika-iaune. Inoku enolea kauta deleleia luvana melala kabukabuna boutai devakua luvana ovonai sia deovo. Kanaua 'ounai ia Iesu vinaula si'avana kaunai devaaoa 'eva enolea kauta eta luva ivamomo'aina vitaitanai.

²⁸ Iesu bevabala dalana sia ka dedavalia, beia Pilato denoia beakubala.

²⁹ Ia luvana puka kabukabunai deleleia vinalata boutai devaoleta mulinai, au ido'o valaukuna akanai deabia ovo 'eva mitavai dekoleia.

³⁰ Beia Dilava eta'u ba ai evako'isia 'udai.

³¹ Inoku melala doutamo ia ita Kalilea ai deda'a Ielusalema kauta kataua 'eva ia deikala. Vali'u kau kataua 'eva Isalaela kauta kevatai ia luvana deluvasi vaia.

³² “Inoku lai 'eva Dilava ita 'ava'avata kevatai eluva'ana'i vaia valina nama'ina kanaua lai abia a'asi oi kevamui lai aluvasi vaia.

³³ Dilava eta'u Iesu ba ai evako'isia kanaua'i ita 'ava'avata kevatai ena luva'ana'i evamomo'aia. Salamo ivaluana laloanai vaka Iesu valina ekava ediaka,

'Oni 'eva lau Naku'u.

Vali'u melalanai lau 'eva
oni Kamamu.'

Sal 2.17

³⁴ Dilava Iesu ba ai evako'isia, inoku mitava laloanai sia bepeda 'udai. Ua 'eva ia ena luva puka kabukabunai eluva vaia ediaka, 'Davida kevanai aluva'ana'i vaia kabukabuna mai vanama'inana 'eva oi vaka bavenimui.'

Isa 55.3

³⁵ Salamo ka laloanai vaka kanania eluva koma, 'Emu Kabukabu Kauna 'eva sia bovapedala 'avaea.'

Sal 16.10

³⁶ Davida maulinai koanai, ia Dilava ena ula da'alata eabi, mulinai eba 'eva kubuna 'ava'avana kevatai dekoleia, inoku kauanina 'uliai epeda.

³⁷ Beia Dilava ba ai evako'isia 'udai kauna 'eva kauanina sia epeda.

³⁸ Kanaua 'ounai bo'akala'u e, lai a'ula oi boikabasi 'eva Iesu dainai si'avana i'ou kaota valina 'eva oi kevamui lai ailolo vaia.

³⁹ Dilava eta'u Iesu deabivenia kauta kevatai komolo evenita, 'olana Mose ena talavatu 'abuta boutai laloatai komolo sia oi bodavalia.

⁴⁰ Kanaua 'ounai oi bo'imamui kave'i 'eva enolea kauta deta'u deluva vaia davana 'eva kevamui sia bepupulu. Ia dediaka,

⁴¹ “Ouvo'ouvo kaumui,
oi botabulovo si'asi'a
inoku oi bobaba.

Lau oi emui melalai

dava ka bavavaia,

bema kau ka be'oumui,

beia sia 'ani oi boabivenia.' ”

Hab 1.5

⁴² Paulo mai Banaba Iuda kauta eta lo'e ai dela'asi laloanai, kau ia denoita melala kabukabuna vailai 'eva dava kataua vaida vaka beluva vai.

⁴³ Kukudivo eole mulinai, Iuda kauta doutamo mai pulu edea kauta Dilava dekudivo venia kauta Paulo mai Banaba mulitai deda'a. Ia laluaana kau kataua deluva venita inoku devakula'ilata Dilava ena iulaveni laloanai bemimia.

⁴⁴ Melala kabukabuna ivaluanai kevaimo vanua namanai demia kauta boutai deasi deakubou Dilava ena luva lena be'ika.

⁴⁵ Beia Iuda kauta kau mato deikata koanai demama si'asi'a, Paulo eluva luvata deva'ekotau maivaka luva si'avata vaika de'ouia.

⁴⁶ Beia Paulo mai Banaba deluva kula'ila dediaka, "Lai atata'u Dilava ena luva oi lai a'oumui makava, beia sia oi oabivenia inoku sibomui si'avana 'abunai oi one'emui divo mauli keinikeini sia oi oula venia, kanaua 'ounai vali'u lai 'ani akai 'udai pulu edea kauta kevatai.

⁴⁷ Lovia namana lai kanania e'oumai koma,
'Lau oni ane'emu divo pulu edea
kauta eta ailalai bo'ao,
maivaka vamauli boabia boda'a
kanobata to'ona.' "

Isa 49.6

⁴⁸ Pulu edea kauta luva kanaua deika koanai lalota denama inoku Lovia namana ena luva 'olana deaku. Mauli keinikeini dainai Dilava 'ani edilata kauta boutai 'eva deabiveni.

⁴⁹ Inoku Lovia namana ena luva 'eva kano kanaua itoina laloanai dekavaia oadaa.

⁵⁰ Beia Iuda kauta deta'u 'a'ate mai vata namata 'a'ateta ia Dilava makauna demakau mai vanua namana de'olavaia kauta nuata deani, Paulo mai Banaba devaiviivita inoku kano kanaua laloanai delo'ota asi.

⁵¹ Paulo mai Banaba aeta apulolota deaku ovo 'eva vanua namana kauta kataua davaiviivita si'avanana koana inoku deda'a Aikonio.

⁵² Antiokai abiveni kauta kataua 'eva lalota denama mai Idume Kabuk-abunai devonu.

14

Paulo Mai Banaba Aikonio Ai.

¹ Paulo mai Banaba Antiokai devavaia vitaitanai Aikonio ai vaka Iuda kauta eta lo'e laloanai deda'adodo inoku deilolo, Iuda kauta mai pulu edea kauta doutamo vaika deabiveni.

² Beia Iuda kauta vaida sia deabiveni kauta deta'u pulu edea kauta nuata deani inoku deabiveni kauta debadu venita.

³ Ia laluaana ua'i kena demia dau'a inoku Lovia namana valina dekava kula'ila maivaka vatabulovo vinaulata mai koa namata devavaita, ua'i Lovia namana ena iulaveni ai ia luvana deilolo vaia davana evamomo'aia.

⁴ Vanua namana kauta sibota devi'alama, vaida Iuda kauta ita, vaida veauneke kauta ita.

⁵ Pulu edea kauta mai Iuda kauta ia i'ana'ivaita kauta ita delovaku veauneke kauta luana bevaanaanata inoku bika'ai beaku bata.

⁶ Beia laluaana luva deika koanai, deveau'ovo deda'a Lukaonia kanona laloanai Lusitela mai Delebe maivaka 'aba'abata vanuata.

⁷ Ua'i vali nama'ina deilolo vaia.

Paulo Mai Banaba Lusitela Ai.

⁸ Ua'i Lusitela vanuanai 'eva 'ome kauna ka emia, ia epulu 'ome'ome 'ounai sia kena eda'a to'ato'a.

⁹ Paulo eluvaluva laloanai kau kanaua kaiana evaala. Paulo ia ete'inia, inoku kau kanaua eikaia 'eva ena abiveni Dilava enai betata'u bevanama'inala.

¹⁰ Eluva 'unu'unu ediaka, "Ko'isi lavadivo!" Komolonai kau kanaua elovo isi inoku aenai eda'a to'ato'a.

¹¹ Kau mato Paulo deikaia koa kanaua evavaia koanai, Lukaonia malatai devaoi dediaka, "Dilava 'ani kauai deao de'ovu deasi ita kevatai."

¹² Inoku Banaba vana de'aeia Seo, ua 'eva ia eta dilava ka vana, mai Paulo vana de'aeia 'Eleme, ua 'eva ia eta dilava ka vana vaka de'aeia 'olana ia 'eva luva iluvana kauna.

¹³ Seo ena lo'e 'eva vanua namana nutualana auna vailanai, ena kabukabu kauna bolomakau labauta vaidā maivelavelata evuata eda'a nutuala aunai, 'olana ia kau mato ita deula veauneke kauta kevatai ainama vinaulata bevavaita.

¹⁴ Beia Paulo mai Banaba luva deika koanai, tubu'ata de'idita inoku kau mato vilootai deveau dodo, devaoi dediaka,

¹⁵ "Kau e, koa kanania dava 'ounai oi ovavaia? Lai 'eva kau mo, vitaitana oi boimui. Lai vali nama'ina lai abia a'asi oi lai a'oumui 'eva dava si'avata vaikata katania kevatai oi bokai 'udai oi boda'a mauli Dilavana kevana, ia vutuvutu mai kanobata mai 'atu maivaka laloatai davata boutai evavaita kauna.

¹⁶ Ana'ina melalanai Dilava kanobata ka ka kauta eikata vadae sibota eta ula dalatai demauli.

¹⁷ Beia vinaula nama'ita ivavaitai 'eva ia ua'i sibona evala'asia, ena iulaveni evala'asia 'eva vutuvutuai lamu evaakua inoku kano ianifa eta melala umautai, iani doutamo evenimui maivaka nuamui lalonamai evavonu."

¹⁸ Laluana luva kataua deluva beia kau mato ia kevatai ainama vinaulata devavai i'alavutai debavunu vaika.

¹⁹ Beia Iuda kauta vaidā Antioka mai Aikonio ai deasi inoku kau mato nuata deani 'eva Paulo bika'ai deakuia inoku develia deda'a vanua namana alana mulumulina, delalovaia ia 'ani eba.

²⁰ Beia abiveni kauta Paulo delavaia kaiu koanai, ia eko'isi inoku emue'udai eda'a vanua namana laloanai edodo. Elani ia Banaba ita deda'a Delebe.

Paulo Mai Banaba Demue'udai Deda'a Sulia Kanona Antiokai.

²¹ Paulo mai Banaba ua'i Delebe ai vali nama'ina deilolo vaia 'eva kau doutamo devuata deasi Iesu ibanona kautai devaoota. Kanaua mulinai demue'udai deda'a Lusitela, Aikonio mai Pisia Antiokai.

²² 'Abu kataua'i ia deta'u Iesu ibanona kauta devakula'ilata maivaka nuata devapasisita abiveni umaunai bemimia, de'outa dediaka, "Ita 'eva anaana doutamo laloatai ekadodo makava inoku Dilava ena lovia vanuanai ekada'adodo."

²³ Paulo mai Banaba Dilava ena lo'e ka ka laloatai 'eva 'ana'ivai kauta vaidā dedilata inoku deloveai 'eva demeamea, Lovia namana deabivenia kauna imanai deudata.

²⁴ Laluana Pisia kanonai deda'a keini deda'a Pamupulia kanonai dela'asi.

²⁵ Inoku ua'i Pelekai vali nama'ina deilolo vaia mulinai, de'ovu deda'a Atalia vanuanai.

²⁶ Ua'i laluana aunakoiai dele'au deveau demue deda'a Antioka, maka-vanai ua'i Antioka ai dedilata Dilava ena iulaveni laloanai bevinaula, inoku vali'u vinaula kanania 'ani devaolea.

²⁷ Antiokai dela'asi koanai, ia laluaana deta'u lo'e kauta devado'uta, Dilava ia etai dava evavaia davata boutai mai pulu edea kauta kevatai abiveni dalana aboina eluvia 'eva valita dekava.

²⁸ Inoku kauta laluaana abiveni kauta ita ua'i kena demia dau'a.

15

Ielusalemai Dilava Ena Lo'e

Kauta Deakubou.

¹ Iudeai abiveni kauta voida deasi Antiokai abiveni kauta devaikabasita dediaka, "Mose ena talavatu vitaitanai iva sia oi boabia koanai oi 'eva vamauli sia oi boabia."

² Luva kanaua 'ounai Paulo mai Banaba kau kataua ita deadedua eda'amo devina si'asi'a, kanaua 'ounai Dilava ena lo'e kauta deta'u Paulo mai Banaba deabita isi abiveni kauta voida ita beda'a Ielusalema, ua'i veaneke kauta mai 'ana'iavai kauta kevatai luva kanaua belavuai lavuui vaia.

³ Dilava ena lo'e kauta deta'u ia desinita, Poenikia mai Samalia kanotai dekeini laloanai, pulu edea kauta eta mauili aboina deveni luvata deluva. Abiveni kauta boutai vali kanania deika 'eva delalonama si'asi'a.

⁴ Ia Ielusalemai dela'asi koanai, Dilava ena lo'e kauta, veaneke kauta mai 'ana'iavai kauta deta'u ia deabitadae, inoku Paulo mai Banaba Dilava dava evavaia ia imatai davata boutai ia vailatai valina dekava.

⁵ Inoku Palisea iduvunai abiveni kauta voida deko'isi inoku dediaka, "Pulu edea kauta 'eva iva beabia maivaka Mose ena talavatu vitaitanai bedadai."

⁶ Veaneke kauta mai 'ana'iavai kauta deakubou mekau kanaua lovana deaku.

⁷ Deluvaluva vaia dau'a mulinai, Petelo eko'isi inoku ediaka, "Bo'akala'u e, oi oikabasi 'eva siako Dilava eta'u oi viloumuiai lau edila'u 'eva pulu edea kauta nutu'uai vali nama'ina bakavala 'uluna be'ika inoku beabiveni.

⁸ Kau nuata eikabasita Dilavana eta'u ita kevatai evavaia vitaitanai pulu edea kauta vaka Idume Kabukabuna evenita, koa kanaua'i Dilava ia eabita isi kauna evamomo'aita.

⁹ Ia mai ita vilouata sia evaedeanata, eta abiveniai 'ounai ia nuata evamaka-makata.

¹⁰ Vali'u dava 'ounai oi o'ula Dilava oi bovakovoa, ita 'ava'avata 'o ita sia 'ani ekavuala bedaia eveevena 'eva abiveni kauta 'atotai oi one'ea 'au?

¹¹ Ita kabiveni 'eva Lovia namana Iesu ena iulaveni ai mauili ekaabia, vitaitanai ia vamauli deabia boina."

¹² Do'u kauta boutai lele devunu laloanai, Banaba mai Paulo etai Dilava eta'u pulu edea kauta vilouatai vatabulovo vinaulata mai koa namata evavaita luvata deluva vaita 'eva leleta deika.

Iakobo Ena Ilolo.

¹³ Ia deluva koa koanai, Lovia namana kadina Iakobo eko'isi ediaka, "Bo'akala'u e, lele'u oika.

¹⁴ Simona 'ani ita e'outa kave'i Dilava eta'u pulu edea kauta kevatai ena lalovai a evala'asia makava koma mai ia vilouatai kau eabita ia ena kauai evaaota.

¹⁵ Luva kanania 'eva enolea kauta eta luva ita devitaita, kanania deleleia koma,

¹⁶ 'Kanania mulinai lau bamumue ba'asi inoku Davida ena aiola e'eko aiolena badaua 'udai.

Demukamuka davata badauta 'udai mai bavalavala 'udai.

¹⁷ Kau kalina demauli kauta boutai

mai pulu edea kauta kataua lau ata'u a'aeta lau e'u umautai be'ao kauta boutai 'eva lau Lovia namana bekavu'u.

18 Lovia namana kanaua eluva koma, siako vaika luva kataua evaikabasivai.'

Amo 9.11, 12

19 Kanaua 'ounai lau alalovaia 'eva pulu edea kauta deikai 'udai Dilava kevana deda'ala kauta 'eva sia kama vamekauta.

20 Nama'ina 'eva kamalele venita inoku kama'outa, imatai devavaita dilavata deainama venita ianita Dilava vailanai 'ani de'obu ianita sia be'ani, sia bekulakula, mai sisi 'atotai dedo'o bata sisita sia be'ani, maivaka lalata sia be'inu.

21 'Olana Mose ena talavatu makavana melalanai easimo vali'u 'eva vanua boutai laloatai deilolo vaia maivaka melala kabukabuta boutai laloatai Iuda kauta eta lo'e ka ka laloatai devakuta."

Do'u Kauta Malele Desinia Eda'a

Pulu Edea Kauta Kevatai.

22 Inoku veauneke kauta, 'ana'iaivai kauta mai Dilava ena lo'e kauta boutai deula ia viloatai kau vaidā bedilata inoku besinita Paulo mai Banaba ita beda'a Antioka, inoku dedilata kauta katania, Iuda vana de'aea Balasaba mai Sila, ia laluaana 'eva bo'akalata viloatai kau i'ana'ia vaita kauta.

23 Malele kanania boina deleleia 'eva da'a kauta devenita, "Lai veauneke kaumai mai 'ana'iaivai kaumai, oi bo'akalamui, emai vanama'ina luvana evavasi oi bo'akalamai pulu edea kaumui Antiokai, Suliai mai Kilikia oi omimia kaumui kevamui.

24 Lai valimui 'ani lai aika 'eva banomai vaidā nia'i devasi, eta luvai nuamui devaanaanata maivaka devabavunuta, beia lai sia luva kanaua boina ka lai avenita.

25 Kanaua 'ounai lai boumaiai lai avamomo'aia kau vaidā lai badilata inoku lai basinita eta lalo'au kauta Banaba mai Paulo ita bevasi kevamui.

26 Kau luana katania Banaba mai Paulo 'eva ita eta Lovia namana Iesu Keliso vana dainai eta maui sia delalovaita.

27 Kanaua 'ounai Iuda mai Sila lai asinita maleleai lai aleleia luvata ivamomo'aia 'eva ia nututai beluvavaia.

28 Enama'ina vaika Idume Kabukabuna eta'u lai evaikamai 'eva talavatu katania akatai sia mekau ka lai bane'ea 'au.

29 Imatai devavaita dilavata deainama venita ianita sia oi bo'ani, sisi mai lalata sia oi bo'ani, sisi 'atotai dedo'o bata sisita sia oi bo'ani, maivaka sia oi bokulakula. Oi dava katania sia oi bovavai 'eva emui vinaula bekomolo. 'Ani lai alelelele koa. Kaeno."

30 Lo'e kauta deta'u kau katania desinita 'eva de'ovu deda'a Antiokai, ua'i abiveni kauta devado'uta inoku malele devenita.

31 Malele devakua laloanai, vakula'ila luvata 'uluta deika 'eva lalota de-nama vaika.

32 Iuda mai Sila 'eva enolea kauta, abiveni kauta nuata devakula'ila maivaka vakula'ila luvatai kena deluva venita dau'a.

33 Ua'i kena demia dau'a mulinai, abiveni kauta deta'u ia mai nua'eluta ita desinita demue'udai deda'a Ielusalema ia desinita kauta kataua kevata.

34 (Beia Sila eula 'ounai emia.)

35 Paulo mai Banaba 'eva Antiokai demia, ua'i ia laluaana mai kau doutamo itana Lovia namana valina devaikabasi vaia mai deilolo vaia.

Paulo Mai Banaba Viloata E'alama.

36 Melala vaidā deole mulitai Paulo eta'u Banaba e'ouia ediaka, "Ita kamue'udai kada'a Lovia namana valina kailolo vaia vanuata kataua boutai laloatai ua'i bo'akalata a devavai koma ekaikata."

37 Inoku Banaba eula Ioane vana de'aea vaka Maleko 'eva bevuala ia ita beda'a ka'ona.

³⁸ Beia Paulo sia elalovaia komolo 'eva ia bevuala ia ita bedada'a 'olana ia ua'i Pamupuliai evikanita inoku sia emue'udai eda'a ia ita devinaula.

³⁹ Kanaua 'ounai ia lalua deviala 'eva viloaata e'alama. Inoku Banaba eta'u Maleko evuaia eda'a aunakoiai dele'au deda'a Kupulo.

⁴⁰ Beia Paulo eta'u Sila edilaila inoku bedada'a laloanai, bo'akalata deta'u Lovia namana ena iulaveni laloanai dene'eta 'au.

⁴¹ Ia lalua Sulia mai Kilikia kanotai dekeini deda'a, Dilava ena lo'e kauta ua'i devakula'ilata.

16

Timoteo Vaka Paulo

Mai Sila Ebanota.

¹ Paulo eda'a Delebe vakaia eda'a Lusitela ai ela'asi, ua'i abiveni kauna ka emia ia vana 'eva Timoteo, ia sinana 'eva Iuda ateatena mai abiveni ateatena, beia kamana 'eva 'Elene kauna.

² Abiveni kauta ua'i Lusitela mai Aikonio ai demia kauta Timoteo ena nama'ina deluva vaia.

³ Paulo eula Timoteo bevuala ia ita bedada'a, mai eivaia 'olana ua'i Iuda kauta demimia kauta deikabasi ia kamana 'eva 'Elene kauna.

⁴ Vanua ka ka laloatai dekeini laloanai, Ielusalemai veaukeke kauta mai 'ana'iaivai kauta devamomo'aaita talavatu kataua 'eva ia deta'u kau de'outa talavatu kataua daitai bedadai.

⁵ Kanaua 'ounai Dilava ena lo'e kauta eta abiveni 'eva ekula'ila maivaka melala boutai eta mato 'eva ekukubu.

Paulo Emakakeinai

Makedonia Kauna Eikaia.

⁶ Paulo banona ita deda'a Pelikia mai Kalatia kanota laloatai dekeini 'olana Idume Kabukabuna eta'u e'outa kao 'Aisia kanonai Dilava ena luva sia beilolo vaia.

⁷ Deda'a Musia kanona vaikoanai dela'asi koanai, deula Bitunia kanona beda'ala, beia Iesu idumena e'outa kao.

⁸ Kanaua 'ounai Musia kanonai dekeini de'ovu deda'a Toloa vanuana.

⁹ Boni kanaua'i Paulo emakakeini 'eva Makedonia kauna ka ia vailanai elava eikaia inoku ia enoia ediaka, "Bokeini bo'asi Makedoniai lai bodulumai."

¹⁰ Paulo emakakeini mulinai, komolonai dala lai akavu lai bada'a Makedonia, 'olana to'onai lai aikabasi 'eva Dilava eta'u lai e'aemai vali nama'ina ua'i lai bailolo vaia.

Pilipiai Lidia

Lovia Namana Eabivenia.

¹¹ Ua'i Toloai aunakoiai lai aele'au lai aveau keini komolo lai ada'a Samotlake. Inoku elani lai aveau lai ada'a Neapoliai lai ala'asi.

¹² 'Abu kanaua lai avikania lai ada'a Pilipo, ua 'eva Makedonia kanona vanuana namana lava'ana'ina maivaka Loma ena ikakao venunai emia. Inoku ua'i boni vaida lai amia.

¹³ Melala Kabukabunai vanua namana nutualanai lai ala'asi ada'a lava 'aba'abanai, lai alalovaia 'eva meamea 'abuna ka ua'i. 'Abu kanaua'i lai amia divo inoku 'a'ate vaida ua'i demiado'u 'a'ateta ita lai aluvaluva.

¹⁴ Kaiata devaala lelemai deika 'a'ateta kataua ka vana 'eva Lidia, ena vanua 'eva Tuatila. Ia 'eva tubu'a 'aolata etavatavavaita. Ia vaka Dilava ekukuduvonia ateatena ka. Lovia namana eta'u nuana eva'ailalala inoku Paulo ena luva eabia dae.

15 Ia mai ena luma kauta boutai lai avaidi'uta kabukabu mulinai, enoimai lai bada'a ena luma, lai e'oumai ediaka, "Bema oi olalovaia lau Lovia namana abivenia ateate'u koanai, oi bo'asi ua'i e'u lumai oi bomimia." Inoku ia lai eva asiasimai lai ada'a ia ena luma.

Pilipoai Paulo Mai Sila

Devavabuto'ota.

16 Melala ka lai ada'a meamea 'abuna laloanai, da'alaabi vatona ka nuanai ka'uba si'avana vaika emia vatona ita lai avidavali. Vato kanaua 'eva vailai bepupulu davata e'ou asita, vinaula kanaua'i ia ena 'ola kauna ena moni doutamo evavai.

17 Vato kanaua Paulo mai lai boumaiai mulimaiai eda'a 'eva evaovai oi ediaka. "Kau katania 'eva akai vaika Dilavana ena da'alaabi kauta, oi kevamuiai bevamaulimui dalana deluva vaia."

18 Melala doutamo ia kanaua boina evavaia. Inoku Paulo kaiana evabo'o 'ounai elava 'udai ka'uba si'avana vaika e'ouia ediaka, "Iesu Keliso vanai lau a'oumu dokadoka, vato kanana nuanai la'asi!" Komolonai ka'uba si'avana vaika vato evikania ela'asi.

19 Vato ena 'ola kauna eikabasi ia ena moni davali dalana 'ani eole koanai, Paulo mai Sila deabita deliota inoku develita deda'a tavatava 'abunai 'ana'iavai kauta vailatai.

20 Valuva kauta vailatai devalavata inoku dediaka, "Kau luana katania 'eva Iuda kauta, inoku ita eta vanua laloanai devasi'avanala.

21 Maivaka koako devaikabasita davata 'eva ita Loma kauta eta talavatu avekenai sia kabidae mai sia kamaulivai davata."

22 Do'u kauta deko'isi Paulo mai Sila de'ou si'ata, inoku valuva de'ana'ia vaia kauta deluva ia lalua ena tubu'a be'idita inoku 'odi'odi auna ai be'odita.

23 De'odi si'ata mulinai, devuata deda'a vabuto'o lumanai dedolita dodo, vabuto'o lumana e'imala kauna de'ouia be'imata kave'i.

24 Vabuto'o lumana i'imana kauna kanaua boina de'ouia 'ounai ia lalua evuata eda'a laloai vaika daiutuna laloanai evadodota, au ubata viloatai aeta eva'akuta uda edo'o 'inita kave'i.

25 Boni malolua laloanai Paulo mai Sila 'eva demeamea mai Dilava ivanama'inana masita deabi, inoku vabuto'o kauta 'eva kaiata devaala ia leleta deika.

26 Komolonai kanokau namavaikana epulu 'eva vabuto'o lumana itoina euteute, nutuala boutai deviluvu mai vabuto'o kauta boutai imata aeta dedo'ota 'eva deodi.

27 Vabuto'o lumana e'imala kauna muinaitabunai eibi, inoku nutuala boutai deviluvu eikata koanai, eko'isi ena kuali lepona evelia asi sibona beaku bala 'olana ia elalovaia vabuto'o kauta 'ani deveau ovo.

28 Beia Paulo eva oi 'unu'unu ediaka, "Ovapuata! Sibomu sia oi boaku bamu, lai boumaiai 'eva nia."

29 Vabuto'o lumana e'imala kauna lamepa 'ae'aena e'ae'ae, inoku eveau dodo eda'a 'eva mai 'ululu 'ululuna Paulo mai Sila vailatai ekuidula.

30 Inoku evuata ela'asi eda'a mulimuliai elavuaia ediaka, "Loviamui e, dava bavavaia 'eva vamauli badavalia?"

31 Ia lalua de'ouia dediaka, "Lovia namana Iesu boabivenia 'eva vamauli boabia oni mai emu luma kauta boutai."

32 Inoku lalua Lovia namana ena luva ia mai ena luma kauta boutai kevatai deilolo vaia.

33 Boni kanaua'i lalua evuata eda'a, deakuta pau'apau'a 'abuta edeinita kave'i, inoku komolonai Paulo mai Sila deta'u ia mai ena luma kauta boutai devaidi'uta kabukabu.

³⁴ Vabuto'o lumana i'imana kauna ia lalua evuata eda'a ena lumai evananita, inoku ia mai ena luma kauta boutai delalonama 'olana Dilava deabivenia 'ounai.

³⁵ Elani 'avu'avuni laloanai, valuva de'ana'ia vaia kauta deta'u kau 'uma'umata desinita deda'a vabuto'o lumana i'imana kauna kevanai de'ouia dediaka, "Kau katana bovala'asita bedada'a."

³⁶ Vabuto'o lumana i'imana kauna Paulo e'ouia ediaka, "Valuva de'ana'ia vaia kauta luva deveni 'eva oni mai Sila bavala'asimui oi bodada'a, vali'u oi bola'asi mai nua'elumui oi bodada'a."

³⁷ Beia Paulo kau 'uma'umata e'outa ediaka, "Lai 'eva Loma kaumai, ia valuva 'abunai lai sia devalavamai emai va'eva ka dedavalia beia kau vailatai deakumai 'avaea inoku vabuto'o lumanai de'alavumai. Inoku vali'u de'ula vunivuniai lai bevala'asimai, una? Sia bedaia, ia sibota be'asi lai bevala'asimai."

³⁸ Kau 'uma'umata kataua demue deda'a valuva de'ana'ia vaia kauta kevatai de'outa ia lalua 'eva Loma kauta, luva kanania deika koanai demakau si'asi'a.

³⁹ Valuva de'ana'ia vaia kauta deko'isi deda'a lalua kevatai de'outa kave'i asi'i demabadu, inoku vabuto'o lumanai devala'asita, denoita vanua kanaua bevikania.

⁴⁰ Paulo mai Sila vabuto'o lumanai dela'asi mulinai, deda'a Lidia ena luma ua'i abiveni kauta vaidia ita devidavali, devakula'ilata inoku devikanita deda'a.

17

Tesalonikai Viala

Namavaikana Epuhu.

¹ Paulo mai Sila deda'a Amepipoli mai Apolonia kanotai dekeini deda'a Tesalonika, ua'i 'eva Iuda kauta eta lo'e ka.

² Paulo ena koakoa dainai, eda'a lo'e laloanai edodo. Ua'i melala kabuk-abuta koi laloatai kau ita delovaku Puka Kabukabunai deleleia luvata umautai eluvaluva,

³ eluvavaita kave'i mai luvata evala'asita kave'i Keliso 'eva beanana mai ba ai beko'isi 'udai, ediaka, "Iesu kanania oi kevamuia lau valina akakava kauna 'eva Keliso."

⁴ Iuda kauta vaidia nuata devadai Paulo mai Sila ita devaka'onamo, 'Elene kauta Dilava makauna demakau kauta doutamo vaka ia ita devaka'onamo maivaka lovia 'a'ateta doutamo vaka ia ita devaka'onamo.

⁵ Beia Iuda kauta vaidia 'eva demama, kanaua 'ounai tavatava 'abunai mia 'avaea kauta eta koa desi'avana vaika kauta vaidia devalalota, kau doutamo devabouta 'eva vanua namana laloanai viala namavaikana devapulua. Deda'a molaumolau maibaduta kau ka vana Iasoni ena lumai Paulo mai Sila be kavuta bevuata bela'asi kau mato vailatai.

⁶ Beia sia dedavalita 'ounai Iasoni mai abiveni kauta vaidia luma kanaua'i develita asi devuata deasi vanua namana de'olavaia kauta vailatai, devaoi dediaka, "Kau vaidia kanobata itoinai devalipulipua kauta vali'u 'ani deasi eta vanua namana laloanai,

⁷ inoku Iasoni eabita dae ena lumai evadodota. Kau kataua 'eva Kaisala ena talavatu deva'alamala, ia dediaka 'eva Lovia 'olana edeana ka emimia, ia vana 'eva Iesu."

⁸ Kau mato mai vanua namana de'olavaia kauta luva kanania deika koanai, 'ulu namavaikana devavuala.

⁹ Vanua namana de'olavaia kauta deta'u Iasoni mai banona ita de'outa moniai valuva tavana deveni inoku devikanita deda'a.

Veauneke Kauta Deda'a Belea.

¹⁰ Boni kanaua laloanai abiveni kauta deta'u Paulo mai Sila desinita deda'a Belea. Ua'i dela'asi koanai, komolotai deda'a Iuda kauta eta lo'e.

¹¹ Iuda kauta Belei demimia kauta kataua 'eva maieta leleika vakaia Tesalonika kauta, nuata umaotai vali nama'ina deika inoku melala boutai Puka Kabukabuna luvata demalele vaita beikabasi Paulo eluva luvata 'eva momo'ai.

¹² Kanaua 'ounai ia doutamo deabiveni, 'Elene lovia 'a'ateta doutamo mai 'Elene kauta doutamo vaka deabiveni.

¹³ Beia Iuda kauta Tesalonikai demimia kauta luva deika Paulo 'eva Dilava ena luva Belea laloanai eilolo vaia koanai, ia deasi ua'i kau mato nuata deani va'eva devapulu.

¹⁴ Komolonaimo abiveni kauta deta'u Paulo desinia 'atu duasi eda'a, beia Sila mai Timoteo 'eva Belei demia.

¹⁵ Kau vaida Paulo devuaia deda'a Atene, inoku ia 'eva demue deda'a Belea, Paulo ena luva deabia deda'a Sila mai Timoteo kevatai beda'a kaokao beda'a Paulo kevana.

Paulo Ateneai Eilolo.

¹⁶ Paulo 'eva Sila mai Timoteo Ateneai e'imata laloanai, vanua namana laloanai dilava dedeta evonu vaika eikata 'eva nuana eanana vaika.

¹⁷ Kanaua 'ounai Paulo Iuda kauta eta lo'e laloanai Iuda kauta mai 'Elene kauta Dilava makauna demakau kauta ita delovaku, maivaka melala bounai dedada'a ua'i tavatava 'abunai kauta ita delovaku.

¹⁸ Epikulo kauta mai Stoiko vaikabasi kauta vaida Paulo ita devi'oudoli. Vaida delavuai dediaka, "Luva 'avaea 'avaea kauna kanania dava e'oua?" Vaida dediaka, "Ia 'eva kanobata edeata dilavata lovata e'aku." Luva kanania deluvaia 'olana Paulo 'eva Iesu mai ena ko'isi 'udai valina nama'ina eilolo vaia.

¹⁹ Kanaua 'ounai Paulo deabia devuaia deda'a do'u 'abuna ka vana Aleopako, ua'i de'ouia dediaka, "Lai a'ula lai baikabasi oni vaikabasi makamaka kanania davana lovana oakua?"

²⁰ Dava vaida o'oulai lai kevamaiai 'uluta lai aika 'eva dedeana vaika, kanaua 'ounai lai a'ula lai baikabasi dava kataua anita 'eva dava."

²¹ (Atene kauta boutai mai 'abu edea kauta ua'i demimia kauta 'eva sia dava edeata vaida lovata de'aku, ia melala bounai dava makamakata valita de'ika mai lovata de'aku.)

²² Paulo 'eva Aleopako kauta dedo'u vilatai eko'isi elavadivo inoku eluva ediaka, "Oi Atene kaumui e, lau aikamui 'eva oi okula'ila vaika kukudivo vinaulata dalata boutai laloatai.

²³ E'u da'a to'ato'a emui vanua namana laloanai emui kukudivo 'abuta aikata laloanai, emui kabukabu vakana ka akanai kanania boina deleleia 'Sia kaikabasi Dilavana kevana' davana adavalia. Oi sia oikabasia kauna oi okukudivo venia, 'ounai vali'u oi kevamuiai bailolo vaia.

²⁴ "Dilava kanobata mai laloanai davata boutai evavai kauna 'eva vutu-vutu mai kanobata Loviana namana inoku kau imatai devavai lo'eta laloatai sia emimia.

²⁵ Maivaka ia sia dava ka etatabu ita dava imatai kamavenia davana sia elalovaia, 'olana ia sibona mauili, ladae mai dava edeata edeata boutai eveveni kau boutai kevatai.

²⁶ Kau ka'onamo enai kanobata kauta boutai evavaita 'eva kanobata itoina akanai bemimia. Ia sibona eta'u ia eta melala mai eta mia 'abuta umauta eva'olu makava.

²⁷ Dilava vinaula katanania evavai 'eva kau boutai be'asi ia bekavua 'eva bedavalia, luva umauna Dilava ita ka ka kevatai 'eva sia edau'a.

²⁸ Kau vaida kanania deluva koma,
 'Ia enai kamauli, ka'iuvai'iuvai
 mai kamimia.'
 Itani emui sisiba kao kauta deluva boina,
 'Ita 'eva ia nakuna.'

²⁹ Inoku ita Dilava nakuna melalanai, Dilava 'eva sia kolo 'o siliva 'o bika'a
 aoneka kauta imatai devavaita kataua boitai ekavaoa.

³⁰ "Ana'inai Dilava 'eva kau ia sia deikabasia koanai, eta bo'o 'eva eikata
 vadai, beia vali'u 'eva 'abu boutai kau boutai e'outa pasisi belalo'udai.

³¹ Ia valuva melalana ka 'ani eva'olua, ia 'ani edilaia kauna betata'u
 kanobata itoina dala komolonai bevaluvala. Dilava eta'u kau kanaua ba ai
 evako'isia 'udai 'eva vinaula kanania kau boutai vilatai evamomo'aia."

³² Bai ko'isi 'udai luvana Paulo eluvavaia deika koanai, kau vaida ia
 demamai vaia, beia vaida dediaka, "Lai a'ula luva kania boluvavai lai
 baika 'udai."

³³ Kanaua'i Paulo ia evikanita eda'a.

³⁴ Kau vaida deabiveni inoku Paulo ita deda'a. Ia viloatai 'eva valuva
 kauna ka vana Dionusio, ia valuva 'abuna Aleopako de'olavaia kauta ka,
 maivaka ateate ka vana Damali mai kau vaida vaka deabiveni.

18

Paulo Kolintoai Eilolo.

¹ Kanaua mulinai Paulo Atene vanuana evikania eda'a Kolinto vanuana.

² Ua'i ia Iuda kauna ka Pontoai epulu kauna vana Akuila ita devidavali,
 ualavi mo adana Plisila ita Italiai deasi, 'olana melala kanaua'i lovia 'olana
 kauna vana Klaudio luva eveni Iuda kauta boutai Loma bevikania. Paulo
 eda'a ia beikata,

³ ua'i ia ita demia mai devinaula, 'olana ia 'eva aiole ivavaita kauna
 vitaitana ia laluaana boita.

⁴ Melala kabukabuta boutai 'eva Paulo eda'a Iuda kauta eta lo'e laloanai
 delovaku, eula Iuda kauta mai 'Elene kauta nuata beva'ailalata.

⁵ Sila mai Timoteo Makedoniai deasi koanai, Paulo ena melala itoinai
 eveni iloloai vali nama'ina eilolo vaia, Iuda kauta kevatai eluvasi Iesu 'eva
 Keliso.

⁶ Beia Iuda kauta Paulo ena luva deakuavu mai kevanai luva si'avata vaika
 deluva koanai, ena tubu'a apulolota eakuakuta ovo inoku e'outa ediaka, "Oi
 bobaba koanai ua 'eva oi sibomui emui va'eva, lau vuvuana sia bakoala.
 Vali'u vaila eda'ala melalanai lau 'eva pulu edea kauta kevata bada'ala."

⁷ Inoku Iuda kauta eta lo'e evikania eda'a pulu edeana kauna ka vana
 Tito Iusto ena lumai ua'i bemimia, ia 'eva Dilava ekukudivo venia kauna ka,
 inoku ena luma 'eva Iuda kauta eta lo'e kevanai.

⁸ Iuda kauta eta lo'e e'olavaia kauna Kelisopo mai ena luma kauta boutai
 ita Lovia namana deabivenia maivaka Kolinto kauta doutamo vaka Paulo
 eilolo lologa deika 'eva deabiveni inoku devaidi'uta kabukabu.

⁹ Boni kai Paulo emakakeini 'eva Lovia namana ia eluva venia ediaka, "Sia
 bomakau, boluluva mo, lele sia bovuvunu.

¹⁰ 'Olana lau 'eva oni ita 'ounai, sia kau ka oni bevasi'avanamu, vanua
 namana kanania laloanai lau e'u kau 'eva dounamo."

¹¹ Kanaua 'ounai Paulo vikau ka mai vuia kalakoi ua'i emia, Dilava ena
 luva kau evaikabasita.

¹² Kalio 'eva Akaia kanona eta kavana laloanai, Iuda kauta devaka'ona
 Paulo deabia devuaia deda'a valuva 'abunai.

¹³ Deluva dediaka, "Kau kanania 'eva Iuda kaumai emai talavatu eukua,
 kau nuata e'ani Dilava dala edeatai bekukudivo venia."

¹⁴ Paulo 'ani beluluva laloanai, Kalio eta'u Iuda kauta e'outa ediaka, "Oi Iuda kaumui e, bema kau kanania va'eva evavai 'o koakoa si'avata vaika evavai koanai, lau oi lelemui bama ika diba.

¹⁵ Beia nia 'eva luva mai va mai oi sibomui emui talavatu oi oadedua vaita koanai, oi sibomui oi bovakomoloa. Lau dava katana boita 'eva sia avaluvata."

¹⁶ Inoku ia eta'u Iuda kauta valuva 'abunai evala'asita.

¹⁷ Ia boutai deko'isi Iuda kauta eta lo'e e'olavaia kauna Sosotene deabia kao valuva 'abuna vailanai deaku si'ala. Beia Kalio 'eva koa kanaua lovana sia eakuia.

Paulo Emue'udai Eda'a Sulia Kanona Antiokai.

¹⁸ Paulo Kolintoai kena emia dau'a mulinai, bo'akalana evikanita inoku Plisila mai Akuila 'eva ia debanoia ita aunakoiaa bekeini Sulia beda'ala. Asido'o aunakoiaa deveau asi laloanai Kenakelea vanuanai vuina itoina detalia ovo 'olana luva'ana'i ka Dilava vailanai evavaia 'ounai.

¹⁹ Epesoai dela'asi laloanai, Paulo eta'u Plisila mai Akuila ua'i evikanita. Ia sibona eda'a Iuda kauta eta lo'eai eda'adodo ua'i Iuda kauta ita delovaku.

²⁰ Iuda kauta Paulo denoia ia ita kena bemia dau'a koanai, ia sia eula.

²¹ Ia 'ani bedada'a laloanai, e'outa ediaka, "Bema Dilava ena ulai koanai bamue'udai ba'asi kevamui." Inoku aunakoiaa ele'au Epeso evikanita.

²² Paulo Kaisaleai ela'asi koanai, eda'a Ielusalemi ua'i Dilava ena lo'e kauta vanama'ina luvana evenita inoku e'ovu eda'a Antioka.

²³ Ua'i Antiokai kena emia dau'a mulinai, eda'a Kalatia mai Pulukia kanota itoinai laloanai eda'a 'abu ka ka laloatai abiveni kauta boutai evakula'ilata.

Apolo Epesoai Eilolo.

²⁴ Iuda kauna ka vana Apolo, ia 'eva Alesandeleai epulu kauna, easi Epeso. Ia 'eva luvaluva kave'i kauna maivaka Puka kabukabuna luvata eikabasita kave'i kauna.

²⁵ Ia 'eva Lovia namana ena dalai devaikabasi vaia, inoku Iesu valina nama'ita komolota evaikabasivai mainuana umauna ita eilolovai, beia ia 'eva Ioane ena vaidi'u kabukabu mo eikabasia.

²⁶ Ia Iuda kauta eta lo'e laloanai eilolo kula'ila. Plisila mai Akuila ia lelana deika koanai, devuaia deda'a ia eta lumai inoku Dilava ena dala ia kevanai deluva vaia kave'i.

²⁷ Apolo eula beda'a Akaia vanuana koanai, Epesoai abiveni kauta deko'isi ia devakula'ilala mai malele ka deleleia eda'a Akaiaa abiveni kauta kevatai uai ia edada'a koanai beabiadae. Ia ua'i ela'asi koanai, Dilava ena iulavenia deabiveni kauta kataua 'eva eduluta namavaikana.

²⁸ Ia ena luva kula'ilai 'eva kau vailatai Iuda kauta eta luva eva'ekotau, ia Puka kabukabuna luvanai evamomo'aia Iesu 'eva Keliso.

19

Paulo Epesoai Eilolo.

¹ Apolo Kolintoai emia laloanai, Paulo 'eva Asia kanona lolota bo'adatai ekeini eda'a Epesoai ela'asi. Ua'i abiveni kauta vaidia ita devidavali.

² Paulo elavuvaita ediaka, "Oi oabiveni koanai Idume Kabukabuna oi oabia, una?" Ia dediaka, "Asi'i. Lai 'eva Idume Kabukabuna luvana 'uluna sia ka lai aika kovo."

³ Inoku ia elavuvaita 'udai ediaka, "Vaidi'u kabukabu davanai devaidi'umui kabukabu?" Ia deluva dediaka, "Ioane eluva vaia vaidi'u kabukabunai devaidi'umai kabukabu."

⁴ Paulo ediaka, “Ioane ena vaidi'u kabukabu 'eva lalo'udai koana. Ioane kau e'outa ia mulinai e'asi kauna beabivenia, ua 'eva Iesu.”

⁵ Luva kanaua deika koanai, Lovia namana Iesu vanai evaidi'uta kabukabu.

⁶ Paulo imana ia akatai ekao'au koanai, Idume Kabukabuna easi ia akatai, inoku mala edeata edeatai deluvaluva maivaka denolea Dilava enai luvata deluvavaita.

⁷ Ua'i 'eva kau boutai 'ouka lua boina.

⁸ Vuia koi laloatai Paulo Iuda kauta eta lo'e laloanai edodo kau kevatai Dilava ena lovia vanuana valina eilolovaia mai evaikabasi vaia kula'ila.

⁹ Beia kau vaidi 'eva nuata depasisi, sia deabiveni maivaka kau boutai vailatai Iesu iabivenina Dalanai luva si'avata vaika deluva. Kanaua 'ounai Paulo kau kataua evikanita, abiveni kauta mo evuata deda'a Tulano malelena lumana laloanai ua'i melala bounai evamaleleta.

¹⁰ Vikau lua 'eva ua'i evamalele, kanaua 'ounai Iuda kauta mai 'Elene kauta Asia kanonai demimia kauta boutai Lovia namana luvana deika.

Sikeva Nakuna Ka'uba

Si'avata Vaika Devakooa.

¹¹ Dilava eta'u siavu Paulo evenia vatabulovo vinaulata edeata vaika bevavai.

¹² Kau Paulo ena muko mai ena tubu'a liolio kauaninai demia tubu'ata deabita deda'a 'olele kauta akatai dene'e'au 'eva eta 'olele denama'ina maivaka ka'uba si'avata vaika nuatai dela'asi.

¹³ Iuda kauta vaidi eta vinaula 'eva vanua laloatai deda'a to'ato'a inoku dekovokovo Lovia Namana Iesu vana de'ouia kau nuatai ka'uba si'avata vaika delo'ota asi. Kanania de'outa koma, “Paulo eilolo vaia kauna Iesu vanai a'oumu pasisi. La'asi!”

¹⁴ Iuda kauta eta kabukabu kauta 'olatai kauna Sikeva nakuna kalakoika 'eva vinaula kanania devavaia.

¹⁵ Melala ka ka'uba si'avana vaika eta luva evamuea ediaka, “Lau Iesu aikabasia, inoku Paulo vaka aikabasia. Beia oi 'eva dai?”

¹⁶ Inoku kau nuanai ka'uba si'avana vaika emimia kauna kanaua ia akatai elovo 'au mai ena siavu boutai ekeinita. Ia eaku si'ata 'eva mai'okota mai mailalalalata ena lumai deveau la'asi.

¹⁷ Iuda kauta mai 'Elene kauta Epesoai demimia kauta vali kanania deika koanai, boutai demakau si'asi'a, inoku Lovia namana Iesu vana 'eva aka umaunai deakuia abalai.

¹⁸ Abiveni kauta doutamo deasi inoku eta si'avana devavai si'avanata kau vailatai de'ou asi.

¹⁹ Ua'i sinosino kauta doutamo eta mena pukata devuata deasi kau vailatai detouta. Puka kataua tavata devakuta 'eva siliva monina imanavui boutai 'ouka (50,000) boina.

²⁰ Dala kanania'i 'eva Lovia namana ena luva dekavaia odaoda maisi-avuna ekubu.

Paulo Nuana Evavaia Kave'i

Bedada'a Ieluselema.

²¹ Dava katanai boutai depulu mulinai, Paulo nuana evavaia kave'i eula Makedonia mai Akaia kanotai bekeini beda'a Ieluselema. Ia sibona ediaka, “Bada'a ua'i mulinai, lau 'eva bada'a Loma vaka baikala.”

²² Paulo ena vidulu kauta lua Timoteo mai Elasio esinita de'ana'ia deda'a Makedonia, beia ia 'eva ua'i Asiai kena emia dau'a.

Epesoai Viala Namavaikana Epulu.

23 Melala kanaua'i Lovia namana ena dala dainai Epesoai adedua namavaikana epulu.

24 Uai kau ka vana Demetelio, ia 'eva siliva vinaulana evavaia, ena vinaula kauta deta'u dilava ateatena Atemi ena luma silivai devavaia, vinaula kanaua'i moni doutamo deabita.

25 Melala ka Demetelio eta'u ena vinaula kauta mai kau vaidia vinaula vitaitana devavaia kauta e'aeta ka'ona deasi ia kevana, inoku e'outa ediaka, "E'u kau e, oi oikabasi ita vinaula kanania'i moni nama'ita ka'abi.

26 Beia kau kanania Paulo oi oikala mai valina oi o'ika 'eva nia'i Epesoai mai Asia kanona itoina laloanai kau doutamo nuata aboina e'ilota mai evada'ata tau, ia ediaka 'eva kau imatai devavai dilavata kataua 'eva sia dilava umauta.

27 Vailai si'avana ka bepupulu 'eva eta vinaula kanania vana nama'ina beabi si'ala, beia dilava ateatena namana Atemi ena lo'e mai ia sibona vana vaka beabi si'ata. Ia 'eva Asia kanona itoina laloanai mai kanobata itoina laloanai dekukudivo venia dilavana ena nama'ina 'ani betaule 'avaea."

28 Deakubou kauta luva kanaua deika koanai, debadu si'asi'a inoku devaoi dediaka, "Epeso kaumai emai dilava ateatena Atemi e, oni 'eva onama vaika!"

29 Vanua namana kauta boutai devaoi laialaia inoku nuata ka'onamoai deko'isi deda'a Kaio mai Alisitako deabita kao develita deda'a do'u lumana laloanai. Kau luana katanania 'eva Makedonia kauta, Paulo debanoia kauta.

30 Paulo eula bela'asi beda'a kau mato vailatai, beia abiveni kauta ia de'alavua.

31 Maivaka 'abu kanaua'i 'ola kauta vaidia 'eva Paulo ena kau, ia luva desinia eda'a Paulo kevana deva'amea do'u lumana kanaua laloanai sia bedododo.

32 Do'u kauta 'eva delalo to'ato'a, ia vaidia dava ka devaoi vaia, vaidia 'eva dava edeana mo ka devaoi vaia. Beia ia doutamo 'eva sia deikabasi dava 'ounai deda'a ua'i.

33 Iuda kauta vaidia kau vana Alesanda dedoliasi kau mato vailatai. Alesanda imana eabia isi do'u kauta eta vaoi devapuala, inoku ia eula Iuda kauta vuvua sia bemakoala luvana kau vailatai beluva vaia.

34 Beia deikaiaune ia 'eva Iuda kauna koanai, melala koana lua vitaitana 'eva ia boutai devaoi ka'ona luva ka'onamo devaoi vaia dediaka, "Epeso kaumai emai dilava ateatena Atemi e, oni 'eva onama vaika!"

35 Mulinai vanua kauta eta luvaluva ilelena kauna do'u kauta e'outa lele devunu 'eva e'outa ediaka, "Epeso kaumui e, kanobata kauta boutai 'ani deikabasi Epeso vanuana 'eva dilava ateatena Atemi Lo'ena mai ia va'ava'ana vutuvutuai easi davana eikata kao.

36 Dava kanania 'eva sia 'ouavuavu davana, kanaua 'ounai lele oi bovuunu. Maivaka sia bo'omuiai dava ka oi bovavaia 'ilelo.

37 Kau katanania oi ovuata oasi nia'i kauta 'eva lo'e davana sia ka devinaoa, maivaka eta dilava ateatena kevanai luva si'avana vaika sia ka deluvaia.

38 Bema Demetelio mai ena vinaula kauta sibota deula kau ka va'evai bene'eadivo koanai, valuva 'eva iluvuna mai valuva i'olavaita kauta vaka ua, ia betata'u va'eva kanaua bekavua.

39 Dava ka ua'i lovana oi boakua koanai, oi bovuala boda'a vanua kauta eta do'u namana vailatai bevakomoloa.

40 Vali'u 'ulu kanania epupulu 'ounai 'ola kauta ita asi'i va'evai dema'uleta. Kanaua bekoma koanai sia mai dalana ia eta luva ekavamueia, 'olana 'ulu kanania 'eva sia mai 'olana."

41 Luva kanania eluvaia mulinai, do'u kauta boutai esinita la'asi.

20

Paulo Eda'a Makedonia Mai 'Elene.

¹ Viala mai 'ulu kanaua epua mulinai, Paulo luva esinia eda'a abiveni kauta kevata deasi kevana, evakula'ilata mulinai, e'outa no'olo inoku evikanita eda'a Makedonia.

² 'Abu ka ka laloatai ekeini eda'a koanai, vakula'ila luvata doutamoai abiveni kauta eluva venita, mulinai eda'a 'Elene ai ela'asi.

³ Paulo vuia koi ua'i 'Elene ai emia, ia eva'olu aunakoiai bele'au beda'a Sulia laloanai, Iuda kauta vaida delovaku ia beaku bala valina eika, kanaua 'ounai ia eula bemue'udai beda'a Makedoniai bekeini beda'a Sulia.

⁴ Debanioia kauta 'eva katania, Pulo nakuna Sopatele ia 'eva Belea kauna, Alisitako mai Sekundo ia 'eva Tesalonika kauta, Kaio ia 'eva Delebe kauna, Tukiko mai Tolopimo ia 'eva Asia kauta, mai Timoteo.

⁵ Kau katania de'ana'ia deda'a Toloa ai lai de'imamai.

⁶ Palaoa 'avaeana naduna mulinai Pilipo ai aunakoiai lai aveau asi boni ima mulinai ua'i Toloa ai lai avidavali. Ua'i melala ima lai amia.

Toloi Paulo Eutuko Evamaulia.

⁷ Masi kanaua bonina lava'ana'inai lai boumaiai lai amiado'u palaoa kabukabuna lai bania. Paulo do'u kauta eluva venita eda'amo malolua, 'olana belani 'eva ia bevikanita.

⁸ Aka laloanai lai amiado'u 'abunai ua'i 'eva lamepa doutamo deani.

⁹ Kau 'alu'aluna ka vana Eutuko 'eva ua'i kaiasi 'abunai emia. Paulo eluvaluva keini laloanai, Ia luma vakana ivakoina akana kanaua'i emuinai tabu 'eva e'ekoasi eda'a kuai. Deabia isi koanai, ia 'ani eba.

¹⁰ Paulo e'ovu eda'a Eutuko akanai epaka 'au inoku imana kukuanai ela'u keini 'eva ediaa, "Nuamui sia behavunu, ia 'eva maulina do'o."

¹¹ Paulo ele'au 'udai eda'a lumai 'eva palaoa ekovia inoku deania. Eluvaluva eda'amo taba elele mulinai, evikanita eda'a.

¹² Kau 'alu'aluna maui maulina devuaia deda'a luma, nuata mailalona-mata ita.

Toloa Devikania Deveau Asi

Deda'a Mileto.

¹³ Paulo eluva ia 'eva aenai beda'a Aso 'ounai ena luva lai abiadae, lai aunakoi ai lai ae'le'au lai aveau 'ana'i lai ada'a, ua'i lai a'imaia bele'au.

¹⁴ Aso ai lai avidavali koanai, aunakoiai ele'au inoku lai ada'a Mitulene.

¹⁵ Elani lai aveau lai ada'a Kioso motumotuna kevanai lai aveau keini inoku boni ivaluanai lai akeini lai ada'a Samo inoku boni ivakoinai 'eva Mileto ai lai ala'asi.

¹⁶ Paulo elalovaia 'eva Epesoai lai baveau keini, ia sia eula ua'i Asia kanonai melala namavaikana lai bavaolea 'avaea, 'olana ia 'ilena deolo eula mai dalana koanai, Pentikos melalanai 'eva Ielusalemai bela'asi.

Paulo Epeso Lo'ena De'olavaia

Kauta E'outa No'olo.

¹⁷ Ua'i Mileto ai Paulo luva esinia eda'a Epeso lo'ena de'olavaia kauta kevatai be'asi kevana.

¹⁸ Ia dela'asi koanai, e'outa ediaka, "Melala makavanai lau asi Asia kanonai ala'asi easimo vali'u melalana oi kevamuiai a amia koma 'eva oi oikabasi kave'i.

¹⁹ Iuda kauta vaida eta aivala dekovota keva'uai melalatai, maimanau'u mai maka'u maiveitai Lovia namana da'alana abi.

²⁰ Oi oikabasi oi idulumui luvata 'eva kau vailatai mai luma ka ka laloatai ailolo vai mai avaikabasi vai 'eva sia ka avunia.

²¹ Lau Iuda kauta mai 'Elene kauta kevatai a'ou asi kave'i 'eva ia belalo'udai beda'a Dilava kevana mai eta Lovia namana Iesu beabivenia.

²² Vali'u Idume Kabukabuna lelenā daitai badadai bada'a Ielusalema, sia aikabasi ua'i keva'uai dava bepupulu.

²³ Lau aikabasi 'eva vanua ka ka laloatai Idume Kabukabuna e'ou'u 'eva vailai bevaanaana'u mai bevavabuto'o'u.

²⁴ Beia e'u maui 'eva alalovaia sia mai anina, lau a'ula veau vilo'o mo bavaolea inoku Lovia namana Iesu 'ani eveni'u vinalana bavaolea kave'i, vinala kanaua 'eva Dilava ena iulaveni valina nama'ina ba'oua asi.

²⁵ "Lau oi boumuiai viloumuiai ada'a keinikeini Dilava ena lovia vanuana ailolo vaia, vali'u aikabasi oi sia ka 'eva lau oi boika'u 'udai.

²⁶ Kanaua 'ounai vali'u oi vailamuiai a'ou asi oi ka bobaba si'avana 'abuna boda'ala 'eva sia lau e'u va'eva.

²⁷ 'Olana Dilava ena ula itoina 'ani ailolo vaia oi kevamuiā sia dava ka avunia.

²⁸ Sibomui oi bo'imamui kave'i mai Idume Kabukabuna eta'u mamoe emui ikakau venunai e'uleta kataua oi bo'imata kave'i. Dilava ena lo'e kauta, kataua 'eva Dilava nakuna ena ba ai 'ani etavata.

²⁹ Lau aikabasi bavikanimui mulinai, vaikabasi kauta dedeta vaidā 'oveka 'asita aivalata boita be'asi oi viloumuiai inoku abiveni kauta kataua itani mamoe boita beabi si'ata.

³⁰ Maivaka emui kau umauta vaidā ia ita oi ovinaula ka'ona kauta beko'isi abiveni kauta vaidā dede luvatai bevada'ata tau ia mulitai bedada'a.

³¹ Kanaua 'ounai oi bo'imamui kave'i, oi bolalovai 'inia vikau koi laloanai boni mai lani sia avapuala maka'u maiveitai melala boutai oi boumuiai avaikabasimui.

³² "Vali'u lau oi Dilava imana laloanai mai ia ena iulaveni luvana laloanai audamui 'ovu, luva kanaua 'eva oi boumuiai 'ani bevalavamui 'ini mai Dilava ena kau kabukabuta boutai bevanama'inata vitaitanai oi vaka bevanama'inamui.

³³ Lau oi viloumuiai amia koanai, lau sia kau ka ena siliva 'o kolo 'o tubu'a ka aula venia 'avaea.

³⁴ Oi sibomui oi oikabasi 'eva lau ima'u katania'i avinaula 'eva lau mai ibano'u kauta emai ula davata boutai avapuluta.

³⁵ Dava boutai avavai laloatai, lau oi avaikamui 'eva vinala kula'ila kanania boinai debadebade kauta oi boduluta, Lovia namana Iesu eluvavaia luvana oi bolalovai 'inia ediaka, Veniveni 'eva ena nama'ina namavaikana vakaiā abiabi."

³⁶ Paulo luva kanania eluvaia mulinai, ia ita dekuidula ka'ona demeamea.

³⁷ Ia boutai dekanai 'unu'unu laloanai Paulo kukuanai dela'u keini deba'uia.

³⁸ Ia devilalo si'asi'a 'olana ia ediaka vailana sia beikala 'udai. Inoku debanoia ita deda'a aunakoi ai bevaelea'au.

21

Paulo Eveau Asi Beda'a Ielusalema.

¹ Lai a'outa no'olo mulinai, aunakoi ai lai aveau asi komolomaiai lai ada'a Koso motumotuna, elani lai akeini lai ada'a Lodo motumotunai inoku ua'i lai ada'a Patala vanuanai lai ala'asi.

² Ua'i Poenikia beda'ala aunakoina ka lai adavalia 'eva lai aele'au inoku lai aveau asi.

³ Kupulo motumotuna lai aikaia inoku lai adivoia lai aveau lai ada'a Sulia, ua'i Tulo ai lai avadai'au 'eva aunakoiāi tamu bedadala.

⁴ Abiveni kauta vaida ua'i lai adavalita inoku masi ka ia ita lai amia. Idume Kabukabuna siavunai ia Paulo de'ouia sia beda'a Ielusalema.

⁵ Beia emai ko'isi melalana eabia koanai, lai avikanita lai ada'a. Abiveni kauta kataua boutai, ia adata mai nakuta ita lai debanomai vanua namanai lai ala'asi lai ada'a, ua'i nabuai lai akuidula lai ameamea.

⁶ Ka ka ita lai avi'ou no'olo mulinai, aunakoiai lai aele'au inoku ia demue'udai deda'a eta luma.

*Enolea Kauna Akabo Eta'u
Paulo Emakakeini Venia.*

⁷ Tulo ai komolomaiai lai aveau ada'a Tolemaia ai lai ala'asi, abiveni kauta ita lai avidavali inoku ua'i boni ka'onamo ia ita lai amia.

⁸ Elani ua'i lai avikanita lai ada'a Kaisalea ai lai ala'asi, inoku evanelia kauna Pilipo ena lumai lai amia, ia 'eva diakono kauta kalakoika banota ka.

⁹ Ia nakuna vavatota vani 'eva enolea vavatota.

¹⁰ Ua'i boni vaida lai amia laloanai, enolea kauna ka vana Akabo Iudea ai easi.

¹¹ Ia easi lai kevamaiai 'eva Paulo kukuana i'apana eabia, sibona imana mai aena edo'ota inoku eluva ediaka, "Idume Kabukabuna ediaka, Ielusalemai Iuda kauta betata'u kukua 'apana kanania 'olana kauna belioa inoku beveni keini pulu edea kauta kevatai."

¹² Luva kanaua lai aika koanai, lai mai ua'i kau kataua ita Paulo lai anoia sia beda'a Ielusalema.

¹³ Inoku ia lai emai luva evamuea ediaka, "Dava 'ounai oi okakani inoku lau nua'u oi ovamanomanoa? Lau 'ani ava'olu 'eva sia belio'u mo dainai, beia Ielusalemai Lovia namana Iesu vana dainai vaka bababa."

¹⁴ Ia lelemai sia eabi dae 'ounai lai avikania inoku lai adiaka, "Lovia namana ena ula 'eva pulu."

Paulo Eda'a Ielusalemai Ela'asi.

¹⁵ Boni vaida deole mulinai, lai abiva'ai inoku lai ada'a Ielusalema.

¹⁶ Abiveni kauta vaida Kaisaleai debanomai inoku devuamai lai ada'a Nasona ena lumai ua'i lai bamimia. Ia 'eva Kupulo kauna maivaka abiveni kauna ka 'ana'ina.

¹⁷ Ielusalemai lai ada'adodo koanai, bo'akalata mai lalonamata deabimadae.

¹⁸ Elani 'eva Paulo ita lai ada'a Iesu kadina Iakobo lai baikala, ua'i lo'e de'olavaia kauta boutai vaka devaila.

¹⁹ Paulo vanama'ina luvata evenita mulinai, ia ena vinaula laloanai Dilava eta'u pulu edea kauta viloatai dava evavai davata boutai valita ekava.

*'Ola'ana'i Kauta Paulo De'ouia
Beda'a Lo'e Kabukabuna.*

²⁰ Luva kanaua deika koanai, Dilava devanama'inala. Inoku Paulo de'ouia dediaka, "Bo'akalamai e, 'ani oikabasi Iuda kauta doutamo deabiveni, inoku ia boutai 'eva Mose ena talavatu dainai dedadai.

²¹ Beia Iuda kauta katania 'eva vali dedena kanania boina deika, Iuda kauta pulu edea kauta viloatai demimia kauta o'outa Mose ena talavatu kevanai beda'atau, nakuta momoluaneta iva sia beabia maivaka Iuda kauta demaulivaia koakoatai sia bemaui.

²² Ia luvamu vali'u be'ika oni 'ani oasi. Dava 'ani ekavavaia?

²³ Kanaua 'ounai lai ba'oumu vinaulana bovavaia. Emamai kau vani 'eva Dilava kevanai eta luva'ana'i 'ani devavaia.

²⁴ Kau katania boabita ia ita kaumu 'obuta iabiovota koakoana oi bovavaia, ia tavata boveveni kanaua'i vuita betaliovo. Inoku kau boutai

beikabasi oni akamuai luva kataua deluva 'eva sia momo'aita, beia oni sibomu 'eva Mose ena talavatu dainai odadai.

²⁵ Pulu edea kauta 'ani deabiveni kauta kataua lai avamomo'aia luvana malelei lai alele venita asinia 'eva kau iani deveveni dilava dedeta kevatai ianita sia be'ani, maivaka sisi vidiota mailalata sia be'ani, sisi 'atotai dedo'ota ba sisita sia be'ani mai kulakula koakoata sia bevavai."

²⁶ Elani Paulo kau vani kataua evuata ia ita deda'a kauta 'obuta iabiovota koakoana devavaia, inoku ia eda'a lo'e kabukabuna laloanai edodo 'eva ivavaita kave'i koakoana vinaulana aida be'ole maivaka ia ka ka sibota eta veniveni ainamata aida bevavai melalata vaikabasita eveni.

Lo'e Kabukabunai Iuda Kauta Paulo Deabia Kao.

²⁷ Melala kalakoi ka vinaulana kanaua 'ani be'ole laloanai, Iuda kauta vaida Asia kanonai deasi inoku Paulo lo'e kabukabuna laloanai deikaia koanai, ia kau mato devaasiasita Paulo deabia kau,

²⁸ devaoi dediaka, "Isalaela kaumui e, odulumai! Kau kanania 'eva 'abu boutai laloatai kau boutai evaikabasita ita eta kau mai Mose ena talavatu mai lo'e kabukabuna kanania e'ou si'ata, maivaka pulu edea kauta vaka evuata easi lo'e kabukabuna laloanai inoku 'abu kabukabuna kanania deva'obua."

²⁹ Kanaua deluva koma 'olana 'ana'inai Paulo 'eva Epeso kauna Tolopimo ita Ielusalema vanuana laloanai demia deikata, inoku ia delalovaia 'eva Paulo ia evuaia eda'a lo'e kabukabuna laloanai.

³⁰ Luva kanania'i vanua itoinai ai 'ulu namavaikana evavaia, inoku kau 'abu ka ka laloatai deveau deasi. Paulo deabia kao, lo'e kabukabunai develia tatala dela'asi, inoku komolonai lo'e kabukabuna nutualata de'alavuta.

Loma Kuali Kauta Paulo Deabia.

³¹ Paulo beakubala deko laloanai valina eda'a Loma eta kuali kauta e'olavaita kauna eika Ielusalema vanuana itoinai 'eva viala namavaikana epupu.

³² Komolonai ia kuali de'olavaia kauta mai kuali kauta ita deveau deda'a kau mato kataua kevata. Kau kataua kuali 'ola kauna mai ena kuali kauta deikata koanai Paulo iakunai devuakao.

³³ Kuali 'ola kauna eda'a Paulo eabia, inoku ena luvai seini lua ai delioia. Elavuaia ia 'eva dai maivaka dava evavaia.

³⁴ Kau mato laloatai vaida luva edeana devaoi vaia mune'e vaida luva edeana mo devaoi vaia, kanaua'i 'ulu namavaikana devavuala 'ounai, kuali 'ola kauna luva umauna sia ka eika, kanaua 'ounai ia luva eveni Paulo bevuala beda'a kuali kauta eta mia 'abunai.

³⁵ Paulo devada'ala deda'a vadai ai eneke'au koanai, kau mato 'eva deaivala si'asi'a 'ounai kuali kauta deta'u devuaia isi dele'au.

³⁶ Kau mato ia mulinai deda'a 'eva devaoi dediaka, "Oaku bala!"

Paulo Kau Mato Eluva Venita.

³⁷ Kuali kauta Paulo 'ani eta alai bevadodoa laloanai, Paulo kuali 'ola kauna enoia ediaka, "Bemanama'ina luva ka bama'oumu." Inoku kuali 'ola kauna elavuaia ediaka, "Oni 'Elene malata oikabasi, una?"

³⁸ Oni Aikupito kaumu kanana 'ana'inai viala ovapulua inoku akuaku kauta boutai sinavu vaninavui (4,000) ovuata oi oda'a kano'akunai, una?"

³⁹ Paulo ia ena luva evamuea ediaka, "Asi'i. Lau 'eva Iuda kau'u, Kilikia ai Taso laloanai, vanua namana kanaua kau'u. Anoimu, kau katania bama luva venita."

40 Kualii 'ola kauna komolo evenia beluluva, inoku Paulo vadai elava'au imana eabi isi kau lele bevuvunu. Kau mato lele devunu koanai, Paulo 'Ebelu malatai eluva venita.

22

1 "Bo'akala'u mai kama'u boumuiai e, kaiamui ovaala vali'u bakakava lele'u oi boika."

2 'Ebelu leletai eluva venita lelenu deika koanai, 'uluta asi'i kaiata devaala inoku Paulo ediaka.

3 "Lau 'eva Iuda kau'u, Taso vanuanai Kilikia kanonai apulu, beia Ielusalema vanuana kanania'i a'aida'aida. Kamaliela 'eva lau e'u vamalele kauna, ita 'ava'avata eta talavatu boutai evamalele'u kave'i maivaka Dilava ena vinaula akula'ila vaia vitaitana vali'u oi okula'ila vaia boina.

4 Lau Iesu deabivenia dala kanania'i deda'avaia kauta, 'a'atetaavaiivita, vaida aku bata, kau mai 'a'ate aliota vabuto'o lumanai akapota dodo.

5 Kabukabu kauta 'olatai kauna mai do'u namana kauta boutai e'u luva 'ani bevamomo'aia. Ia deta'u malele deveni'u ada'a bo'akalata Damaseko ai kauta kevata, ua'i abiveni kauta bavuata ba'asi Ielusalemai bevabuto'o.

Paulo Elalo'udai Valina Ekava.

(Vn 9.1-19; 26.12-18)

6 "Ado'alavuni boina lau ada'a Damaseko akevaia laloanai, 'ailala namavaikana ka vutuvutuai komolonai e'ovu easi lau edui'u kaiu.

7 Komolonai a'eko kanoai 'eva lele ka eluva veni'u lelenu aika ediaka, 'Saulo e, Saulo e, lau dava 'ounai ovaiviivi'u'?

8 Lau alavuaia adiaka, 'Lovia namana e, oni dai?' Ia ediaka, 'Lau Iesu, Nasaleta kau'u, oni lau ovaiviivi'u kau'u.'

9 Ibanu'u kauta 'ailala kanaua deikaia, beia lau eluva veni'u lelenu kanaua 'eva sia deika.

10 "Lau alavuaia adiaka, 'Lovia namana e, lau dava bavavaia?' Ia ediaka, 'Ko'isi, boda'a Damaseko, kau ka ua'i luva dava be'oumu 'eva vinaulata boutai bovavai.'

11 Ibanu'u kauta ima'u ai deabi devada'a'u lai ada'a Damaseko, 'olana 'ailala kanaua 'eva e'ailala vaika maka'u eva'edeta.

12 "Kau ka vana Anania easi eika'u. Ia 'eva talavatu luvata daitai edadai mai kabukabu kauna maivaka ua'i Iuda kauta demimia kauta boutai 'eva ia 'olana de'aku.

13 Ia easi keva'uai elavadivo inoku e'ou'u ediaka, 'Bo'akala'u Saulo e, boikaika 'udai.' Melala kanaua'i komolonai lau maka'u enama'ina ia aikaia.

14 Inoku ia ediaka, 'Ita 'ava'avata eta Dilava 'ani oni edilamu ena ula boikabasia mai vinaula komolo kauna Iesu boikala maivaka ia nutunai beluluva lelenu bo'ika.

15 Oni 'eva ia bevaluala makamuai dava oikala mai kaiamuai dava o'ika 'eva kau boutai kevatai valita bokakava.

16 Vali'u oni dava o'imala? Ko'isi, Lovia namana vanai 'ae'ae, boidi'u kabukabu inoku emu si'avana bedei ni ovo.'

Lovia Namana Paulo Esinia Eda'a

Pulu Edea Kauta Kevata.

17 "Mulinai lau amue ada'a Ielusalema, inoku lo'e kabukabunai ameamea laloanai, amakakeini.

18 Lovia namana aikaia e'ou'u ediaka, 'Molau. Ielusalema bovikania kaokao, 'olana lau vali'u bokakava 'eva kau katania sia beabiadae.'

19 Lau adiaka, 'Lovia namana e, kau katania deikabasi lau ada'a Iuda kauta eta lo'e ka ka laloatai oni deabivenimu kauta kataua akuta inoku aliota vabuto'o lumanai ane'eta divo.

²⁰ Oni valimu ikavana kauna Stipano lalana dekoko koanai, lau vaka ua'i alava, deaku bala kauta avamomo'aita maivaka tubu'ata aika kao.'

²¹ Inoku Lovia namana e'ou'u ediaka, 'Da'a, lau oni basinimu boda'a pulu edea kauta dau'ai demimia kauta kevata.' "

Paulo 'Eva Loma Kauna.

²² Kau mato Paulo lelana deika eda'amo luva kanaua eluvaia koanai devilavila leleta devaele'au akai vaika dediaka, "Oaku bala! Kau kanana boina kauna 'eva sia mai ena nama'ina kanobatai bemimia."

²³ Ia devilavila, eta tubu'a deito maivaka 'apulolo deito dele'au akai.

²⁴ Kual i'olavaina kauna ena kual kauta e'outa Paulo devuaia deda'a ia eta 'abuai, ua'i be'odia inoku belavuaia kau dava 'ounai ia depilaia.

²⁵ Ia Paulo delioia be'odia laloanai, kual kauta sinavu e'ola vaita kauna ia kevanai elava kauna elavuaia ediaka, "Loma kauna asido'o valuva eabia kauna be'odia 'eva ekomolo, una?"

²⁶ Kual kauta e'ola vaita kauna luva kanaua eika koanai, ia eda'a ia i'olavaina kauna e'ouia ediaka, "Kau kanaua 'eva Loma kauna. Oni dava bovavaia?"

²⁷ Kual i'olavaina kauna eda'a Paulo kevanai inoku elavuaia ediaka, "Bo'ou'u, oni Loma kaumu, una?" Paulo enu'ovi ediaka, "O."

²⁸ Kual i'olavaina kauna ediaka, "Lau moni nama vaikanai tava aveni 'eva asi Loma kau'uai ao." Beia Paulo ediaka, "Lau 'eva Loma kauta eta puluta."

²⁹ Ua'i delava belavuaia kauta alimo delava tau, kual i'olavaina kauna 'eva emakau, 'olana ia eikabasi Paulo 'eva Loma kauna, beia seiniai elioia 'ounai.

Paulo Do'u Namana Vailanai Elava.

³⁰ Elani kual i'olavaina kauna eula beikabasi kave'i Iuda kauta dava 'ounai Paulo vuvua devakoala. Kabukabu kauta namata mai do'u namana kauta evado'uta, inoku Paulo eluvua evuaia eda'a ia vailatai evalavala.

23

¹ Paulo do'u namana kauta ete 'inita inoku ediaka, "Bo'akala'u e, melala boutai nua'u nama'inai mai sia va'eva ka avavaia Dilava vailanai amia easimo vali'u."

² Kabukabu kauta 'olatai kauna Anania luva kanaua eika 'eva Paulo kevanai delava kauta e'outa nutuna bebalala avu.

³ Inoku Paulo ia e'ouia ediaka, "Oni 'eva itani ikekebili deva'inai deto'aia davana boina, Dilava beakumu, talavatu vitaitanai na'i omimia lau bovaluva'u, beia oni sibomu mo talavatu ova'alamaia 'eva luva oveni lau beaku'u."

⁴ Paulo kevanai delava kauta kataua dediaka, "Oni Dilava ena kabukabu kauta 'olatai kauna kevanai oluva si'asi'a?"

⁵ Paulo ediaka, "Bo'akala'u, lau sia aikabasi ia 'eva kabukabu kauta 'olatai kauna. Puka kabukabunai kanania eleleia koma, 'Emu lovia kauna kevanai sia boluva si'asi'a.' "

⁶ Paulo do'u namana kauta eikata une koanai, vaid a 'eva Palisea kauta, vaid Sadukea kauta, inoku vailatai e'ae'ae 'unu'unu ediaka, "Bo'akala'u e! Lau 'eva Palisea kau'u, mai Palisea nakuta, lau e'u nuabata ba kauta 'ani beko'isi 'udai 'ounai vali'u valuva 'abunai alalava."

⁷ Ia luva kanaua eluvaia koanai, Palisea kauta mai Sadukea kauta deviala, inoku do'u kauta devi'alama lua.

⁸ 'Olana Sadukea kauta dediaka ko'isi 'udai 'eva asi'i, maivaka anelu 'o idume vaka asi'i, beia Palisea kauta 'eva kataua boutai devamomo'aita.

⁹ 'Ulu namavaikana epulu, talavatu 'ola kauta vaidā 'eva Palisea kauta deko'isi inoku deluva kula'ila dediaka, "Kau kanania kevanai va'eva sia ka lai adavalia. Ama'i anelu ka 'o idume ka 'ani ia eluva venia."

¹⁰ Viala eda'a namavaikana, inoku Kualī i'olavaina kauna emakau 'eva Paulo asi'i demavelia mukamuka, kanāua 'ounai kualī kauta esinita de'ovu deda'a ia kevatai Paulo develia tau, devuaia deda'a kualī kauta eta 'abu.

¹¹ Boni kanāua'i Lovia namana Paulo kevanai elava inoku ediaka, "Bokula'ila! Ielusalemāi valī'u okava vitaitana Lomai vaka valī'u bokakava."

Juda Kauta Paulo Beaku Bala.

¹² Elani 'avu'avuni Juda kauta demia ka'ona delovaku inoku Dilava vailanai deluva'ana'i, ia sia beaniani maivaka sia dava ka beinua beda'amo Paulo beaku bala.

¹³ Kauta boutai vaninavui (40) ekeinīa 'eva kanāua boina deluva'ana'i.

¹⁴ Deda'a kabukabu kauta namata māi vanua kauta namata kevatai inoku dediaka, "Lai Dilava vailanai 'ani lai aluva'ana'i, lai sia dava ka lai bania beda'amo Paulo lai baku bala.

¹⁵ Valī'u oi māi do'u namana kauta luva oi bosinīa beda'a kualī i'olavaina kauna kevanai oi bodedede oi bodiaka, Paulo be'asi nīa'i kevamuiāi luva komolona oi boabia oi bokoma. Ia be'asi asido'o nīa'i elā'asi laloanai lai 'ani ava'olu lai baku bala."

¹⁶ Beia Paulo uana Paulo vunivunīai beakua 'uluna eika koanai, ia eda'a kualī kauta eta 'abuāi Paulo e'ouia.

¹⁷ Inoku Paulo kualī kauta sinavu e'ola vaita kauna ka e'aeia easi inoku eouia ediaka, "Kau 'alu'aluna kanania bovuala boda'a ua'i kualī i'olavaina kauna kevanai, luva ka be'oua."

¹⁸ Kanāua 'ounai kualī kauna kanāua Paulo uana evuaia eda'a kualī i'olavaina kauna kevana e'ouia ediaka, "Vabuto'o kauna Paulo luva esinīa ada'a ia kevana inoku enoi'u kau 'alu'aluna kanania bavuala ba'asi kevamui, 'olana ia luva ka oni be'oumu."

¹⁹ Kualī i'olavaina kauna Paulo uana imanai eabi deda'a 'aba'abai inoku elavuaia, "Luva dava o'ula bo'ou'u?"

²⁰ Ia ediaka, "Juda kauta 'ani deluva ka'ona benoimu, 'Mala Paulo bovuala boda'a do'u namana kauta kevatai, bevaluvāla kavē'i kevanai luva komolona beabia bekoma."

²¹ Leleta sia bo'ika 'olana kau boutai vaninavui (40) ekeinīa 'eva belavate'e Paulo be'imāla. Dilava vailanai deluva'ana'i sia beaniani 'o sia dava ka beinua beda'amo Paulo beaku bala. Valī'u kau kataua 'ani de'olu bevavaia, kaiata mo devaamo inoku oni emu 'eva dava."

²² Kualī i'olavaina kauna kau 'alu'aluna kanāua e'ouia kao ediaka, "O'ou'u luvana kanania 'eva sia kau ka bo'oua." Inoku esinīa eda'a.

Paulo Desinīa Eda'a Kaisalea Kavana Kauna Feliki Kevana.

²³ Kualī i'olavaina kauna eta'u kualī kauta sinavu de'ola vaita kauta lua e'aeta deasi inoku e'outa ediaka, "Kualī kauta sinavu lua (200), osi ai deveau kauta boutai kalakoika navui (70) māi io kauta boutai sinavu lua (200) oi bova'oluta. Valī'u bonīai melala koana kalavanika (9) 'eva oi boda'a Kaisalea.

²⁴ Osi vaidā vaka oi bova'oluta Paulo bemia'au, oi bo'imāla kavē'i oi bovuala boda'a Kavana kauna Feliki kevana."

²⁵ Inoku kualī i'olavaina kauna malele ka eleleia beda'a Kavana kauna kevana, kanania eleleia koma.

²⁶ "Lau Kalaudio Lusīa, Kavana kaumu Feliki nama'imu e, avanama'inamu.

²⁷ Juda kauta kau kanania deabia kao inoku deula beaku bala, beia aikabasi ia 'eva Loma kauna 'ounai e'u kualī kauta ita lai ada'a inoku lai avamaulia.

²⁸ Lau aula baikabasi dava 'ounai vuvua devakoala, kanaua 'ounai avuaia ada'a Iuda kauta eta do'u namana laloanai.

²⁹ Lau ua'i aikabasi kau kanania sia dava ka evavaia kanaua dainai ia bebaba 'o bevabuto'o vaia, ia sibota eta talavatu laloanai lavuailavuai vaidai outai deabia.

³⁰ Maivaka Iuda kauta vaidai delovaku beaku bala deko valina aika koanai, komolonai mo asinia evasi kevamu. Vuvua devakoala kauta vaka a'outa bevasi vailamuai eta nua mekau luvata beluva vaita."

³¹ Kanaua 'ounai kualai kauta ia i'olavaita kauna lлена daitai dedai, boni kanaua'i Paulo devuaia deda'a Anetipatili ai dela'asi.

³² Elani aetai deda'a kauta demue'udai deda'a eta vinaula 'abuna, beia osiai kauta 'eva Paulo devuaia deda'a.

³³ Osiai kauta Kaisaleai dela'asi koanai, malele kanaua Kavana kauna vana Feliki devenia, maivaka Paulo vaka Feliki ena ikakao venunai devikania.

³⁴ Kavana kauna malele kanaua evakua mulinai, Paulo elavuaia ia 'eva 'abu dava kauna. Ia eika Paulo 'eva Kilikia kauna koanai,

³⁵ ia ediaka, "Oni va'eva 'abunai dene'emui divo kauta be'asi koanai, oni yumu bokokou ba'ika." Inoku ia ena kualai kauta e'outa Paulo ua'i vabuto'o lumanai lovia kauna 'Eloda ena luma laloanai beikala kao.

24

Paulo Vuvua Ekoia.

¹ Melala ima deole mulinai kabukabu kauta 'olatai kauna Anania, vanua kauta namata vaidai mai Loma eta talavatu eikabasi kave'i kauna vana Teletulo ita de'ovu deda'a Kaisalea, Kavana kauna Feliki vailanai Paulo vuvua devakoala luvata de'ouia.

² Inoku Feliki luvai esinia eda'a Paulo devuaia deasi, Teletulo eko'isi vuvua devakoala luvana emakavala ediaka, "Kavana kaumu Feliki nama'imui e, vikau namavaikana o'olavaimai kave'i nua'elu laloanai lai amia. Emu aonekai emai kanobata kanania laloanai dava nama'ita doutamo depulu.

³ Kanaua 'ounai 'abu boutai mai dala boutai laloatai lai oni lai abimudae. Feliki Kavana kaumu nama'imui vaika, lai nuamai boutai oni lai avanama'inamu.

⁴ Vali'u sia bavabavunumu, beia anoimu bolalomai, emai luva to'oto'ona 'uluna bo'ika.

⁵ Kau kanania lai adavalia ia 'eva va'eva ivapuluta kauna. Kanobata bounai laloanai Iuda kauta kevatai viala mai 'ulu namavaikata evapulu kauna, maivaka ia 'eva Nasaleta iduvuna kauta e'olavaita kauna.

⁶ Ia etata'u Lo'e Kabukabuna eva'obua 'ounai lai abia. (Emai talavatu vitaitanai lai bavaluvata.)

⁷ Beia kualai i'olavaina kauna Lusua mai aivalana ita easi kevamaiai ebuku vaimai.

⁸ Inoku vuvua devakoala kauta e'outa bevasi kevamu.) Inoku oni sibomu kau kanania bolavuaia, vuvua lai avakoa vaia luvata nutunai bela'asi leleta bo'ika 'eva baikabasi."

⁹ Iuda kauta vaka Teletulo ena luva deduluia dediaka, luva katana boutai 'eva momo'aita.

Paulo Kavana Kauna Feliki Vailanai Sibona Valina Ekava.

¹⁰ Kavana kau 'olana eka'uiadae Paulo e'ouia beluluva, inoku Paulo eluva ediaka, "Lau aikabasia vikau namavaikana eta kanobata laloanai valuva doutamo ovavaita 'ounai lau nua'u medianai oni vailamuiai sibo'u vali'u bakakava.

11 Oni sibomu 'ulu kanania 'olana bokavua koanai 'ani boikabasia, boni ouka lua 'ani deda'a laloanai lau ala'asi ada'a Ielusalemai bameamea.

12 Vuvua devakoa'u kauta sia kena dedavali'u lo'e kabukabunai kau ka ita lai avina, 'o lau Iuda kauta eta lo'e laloatai 'o vanua kanaua laloanai sia va'eva ka avavaia.

13 Kau katanania vali'u oni vailamuai vuvua devakoa'u luvata katanania 'eva sia luva momo'aita.

14 "Beia lau oni vailamuai ba'ouasi luvana 'eva kanania, kau katanania dedika lau kukudivo dedena dalanai lau 'eva 'ava'avamai eta Dilava akukudivo venia. Mose ena talavatuai mai enolea kauta eta pukai deleleta davata boutai abitadae.

15 E'u nuabata Dilava enai 'eva vitaitana vaka kau katanania boina. Emai nuabata 'eva komolo kauta mai si'avana kauta boutai ba ai beko'isi 'udai.

16 Kanaua 'ounai melala bounai avakula'ila'u nua'u nama'inanai bamimia Dilava mai kau vailatai.

17 "Vikau namavaikana dau'ai amia mulinai amue ada'a Ielusalema e'u kau kevatai ainama babita ba'asi ulalu kauta bavenita maivaka veniveni ainamata bavavaita.

18 Vuvua devakoa'u kauta lau ivavai'u kave'i koakoana avavaia avamakamaka'u mulinai lo'e kabukabunai deika'u, lau sia kau mato ita, maivaka sia 'ulu ka ua'i avavaia.

19 Beia Iuda kauta vaidia Asia kanonai deasi kauta vaka ua'i, e'u va'eva ka dedavalia koanai vali'u bemaasi nia'i vailamuai vuvua bemavakoa'u.

20 Asi'i koanai, nia'i Iuda kauta katanania sibota bermaluva, lau do'u namana kauta vailatai alava devaluva'u koanai e'uai va'eva dava dedavalia.

21 Ia vailatai alava koanai luva ka'onamo kanania avaoi vaia adiaka, 'Ba kauta beko'isi 'udai mo 'ounai vali'u oi oabi'u valuva 'abunai oi one'e'u divo.' "

22 Inoku Feliki, Lovia Namana ena dala eikabasia kave'i kauna valuva evailulalao inoku ediaka, "Kuali i'olavaina kauna Lusia be'asi koanai emui valuva balovaku vaia."

23 Ia eta'u kualii kauta sinavu e'olavaita kauna e'ouia Paulo beikala kao kave'i, beia sia be'alavu 'inia, ena kau oi boikata vadade be'asi bedulua ena ula davata bevenivenia.

Paulo Vikau Lua

Vabuto'o Lumanai De'alavua.

24 Melala vaidia deda'a mulinai Feliki adana Dulusila ita deasi, Dulusila 'eva Iuda ateatena. Feliki evisini eda'a 'eva Paulo easi, inoku Paulo Keliso Iesu laloanai abivenina valina ekava lelena deika.

25 Paulo eta'u vinaula komolo, kauani ena ula koakoana i'oukaona mai valuva namana be'asi lovana eakuia koanai, Feliki emakau inoku ediaka, "Ani edaia, vali'u bomumue bodada'a, melala nama'ina ka e'uai edaia koanai bavisini 'udai bo'asi."

26 Melala kanaua'i Feliki enuabata 'eva Paulo moni vaidia ia bemavenia bemavala'asia, kanaua 'ounai ia melala doutamo evisini Paulo eda'a ia ita deluvaluva.

27 Vikau lua deole mulinai Polokio Feseto eta'u Feliki 'abuna eabia. Beia Feliki eula Iuda kauta bevalalonamata 'ounai Paulo vabuto'o lumanai evikania.

¹ Feseto be'olavaia kanonai ela'asi ena vinaula emakavala, boni koi mulinai Kaisaleai eda'a Ielusalema.

² Kabukabu kauta namata mai Iuda kauta namata deda'a ua'i kevanai Paulo vuvua devakoala.

³ Feseto denoia va'ame deula vali'u Paulo besinia be'asi Ielusalema. 'Olana ia deva'olu la'ukai demia te'e, Paulo be'asi 'eva dalai beda'ala avu beaku bala delalovaia.

⁴ Beia Feseto eta luva evamuea ediaka, "Paulo 'eva Kaisaleai vabuto'o lumanai de'alavua, melala kava'inamo lau 'ani bamue'udai bada'a ua'i.

⁵ Nama'ina 'eva emui 'ola'ana'i kauta ita lai bada'a Kaisalea, inoku kau kanaua dava ka evavaia si'asi'a koanai, ua'i vuvuana bevakoala."

⁶ Boni kalavani 'o 'ouka boita ia ita demia mulinai, Feseto eda'a Kaisalea. Elani eda'a valuva 'abunai emia divo inoku luva esinia eda'a Paulo bevuala be'asi.

⁷ Inoku Paulo easi koanai, Iuda kauta Ielusalemai deasi kauta deda'a ia delavaia kai luva mekauta doutamo vaika deluva kevanai, luva kataua boutai 'eva sia momo'aita.

⁸ Paulo eta luva tavana evamuea ediaka, "Lau sia va'eva ka avavaia, lau Iuda kauta eta talavatu sia ava'alamaia, 'o lo'e kabukabunai sia dava ka avavaia si'asi'a 'o Loma kauta e'olavaita kauna Kaisala kevanai sia va'eva ka avavaia."

⁹ Beia Feseto eula Iuda kauta lalota bevanama 'ounai Paulo elavuaia ediaka, "Oni o'ula boele'au boda'a Ielusalemai inoku vuvua devakoamu luvata katania 'outai ua'i lau vaila'uai bolalava bavaluvamu, una?"

¹⁰ Paulo ediaka, "Lau vali'u Kaisala ena valuva 'abuna vailanai alalava, lau bevaluva'u 'abuna 'eva kanania'i. Oni oikabasi dokadoka, lau Iuda kauta kevatai sia va'eva ka avavaia.

¹¹ Lau bamava'eva koanai va'eva tavana ba bema'oua, lau sia amakau bababa. Beia Iuda kauta vuvua devakoa'u luvata boutai sia demomo'ai, sia kau ka mai ena komolo lau beabi'u ia imatai beudala. Anoinoi Kaisala vailanai balalava bevaluva'u."

¹² Feseto valuva kauta ita delovaku mulinai Paulo e'ouia ediaka, "Oni Kaisala kevanai onoinoi 'ounai boda'a Kaisala kevanai bevaluvamu."

Feseto Paulo Evuaia Eda'a Akilipa Vailanai.

¹³ Melala vaida deole mulinai lovia 'olana kauna Akilipa lovuna Belenike ita deda'a Kaisaleai eta 'olaaku koana Feseto kevanai bevavaia.

¹⁴ Boni vovo'o ua'i demia mulinai, Feseto eta'u lovia 'olana Akilipa kevanai Paulo lovana eakuia, ediaka, "Feliki 'eva kau ka nia'i vabuto'o lumanai evikania.

¹⁵ Ada'a Ielusalema koanai, kabukabu kauta namata mai Iuda kauta namata deasi keva'uai vuvua devakoala maivaka denoi'u bavavabuto'oa.

¹⁶ A'outa adiaka, 'Loma kauta eta koako 'eva sia kanania boina, kau 'eva sia de'alavua 'avaea beda'amo vuvua devakoala kauna ita valuva 'abunai belavadio ia mai ena komolo sibona valina bekakava.'

¹⁷ Ia ita lai asi nia'i koanai, melala sia avadau'ala, elani ada'a valuva 'abunai amiadio, avisini eda'a kau kanaua bevuala be'asi, inoku easi.

¹⁸ Vuvua devakoala kauta deko'isi deluva koanai, lau alalovaia ia sia va'eva kai vuvua devakoala.

¹⁹ Beia ia deadedua vai 'eva eta kukudio dalanai maivaka ba kauna ka vana Iesu, kauna kanaua 'eva Paulo ediaka emauli kataua ia ita deadedua vai.

²⁰ Luva katania ikavuta avavitaitata e'uai sia edaia, kanaua 'ounai Paulo alavuaia be'ula koanai beda'a Ielusalemai ua'i bevaluvala.

²¹ Beia ia enoinoi Kaisala ia bevaluvala, kanaua 'ounai aluva vabuto'o lumanai be'alavua bemimia beda'amo basinia beda'a Kaisala kevana."

²² Inoku Akilipa eta'u Feseto e'ouia ediaka, "Lau vaka a'ula sibo'u kaia'uai kau kanaua ena luva 'uluta ba'ika." Feseto ia ena luva evamuea ediaka, "Mala ia ena luva 'uluta bo'ika."

²³ Elani Akilipa mai Belenike eta tubu'a nama'ita mai nuavita eta bata'ina koana ivala'asina davata devadodota, kuali 'olavaina kauta mai vanua kauta namata ita dedodo deda'a do'u lumana. Feseto ena luvai Paulo devuaia deasi.

²⁴ Feseto eko'isi ediaka, "Lovia 'olana kaumu Akilipa mai oi ovaila kaumui boumuiai e! Kau kanania oi oikala. Iuda kauta ua'i Ielusalemai mai nia'i Kaisaleai demimia kauta boutai kau kanania keva'uai vuvua devakoavaia deva'oi vaia dediaka, 'Ia sia mai ena nama'ina bemimia, ia bebaba.'

²⁵ Ia bebaba va'evana sia ka adavalia, maivaka sibona enoi'u Kaisala ia bevaluvala, kanaua 'ounai alalovaia basinia beda'a Loma.

²⁶ Beia lau sia aikabasi ia akanai luva dava mo balelea beda'a Kaisala kevana. Kanaua 'ounai avuala a'asi oi boumuiai vailamuiai, mai namavaikana 'eva lovia 'olana kauna Akilipa vailamuai, ekalavuaia kave'i ia luvana nama'ina ekadavalia ekalelea.

²⁷ 'Olana lau lalovaia sia ekomolo bema vabuto'o kauna basinia 'avaea ia ena va'eva luvana sia balelea une koanai."

26

Paulo Akilipa Vailanai

Sibona Vuna Eaku.

¹ Akilipa eta'u Paulo e'ouia ediaka, "Ani komolo avenimu sibomu vumu aku." Inoku Paulo imana eabita isi inoku ediaka,

² "Lovia 'olana kauna Akilipa e, lau sibo'u alalovaia vali'u melala kanania'i oni vailamuai alalava 'eva enama'ina, 'olana Iuda kauta lau vuvua devakoa'u luvata vailamuai sibo'u vuta ba'aku.

³ 'Olana dokadoka Iuda kauta eta koakoa mai eta adedua boutai 'eva oikabasita kave'i, kanaua 'ounai anoimu bovapasisimo kaiamu bovaala baluluva bo'ika.

⁴ "Iuda kauta boutai deikabasi'u, lau e'u mauili aboina kiki'uai abilamala easimo vali'u, e'u vanuai maivaka Ielusalemai 'eva deikabasi.

⁵ Ia siako 'ani deikabasi'u maivaka de'ula koanai, beluvasi, lau 'eva Palisea kaunai ao, ia eta kukudivo talavatuta pasisita devavai laloatai lau vaka ia daitai adai.

⁶ Vali'u valuva 'abunai alalava 'eva 'olana Dilava ena luva'ana'i 'ava'avamai kevatai evavaia davana anuabata vaia 'ounai.

⁷ Emai iduvu 'ouka lua (12) boni mai lani Dilava dekukudivo venia 'eva luva'ana'i kanania denuabata vaia bepupulu. Lovia 'olana e, nuabata kanaua 'ounai Iuda kauta lau vuvuana devakoa'u.

⁸ Dava 'ounai Dilava ba kauta evako'isita 'udai 'eva sia oi oabivenia oi oko?

⁹ "Lau vaka nua'uai alalovaia Iesu Nasaleta kauna vana ivaiviivina vinulata si'avanata doutamo bamavavaita 'eva bemanama'ina.

¹⁰ Lau Ielusalemai kanaua boina avavaia, kabukabu kauta namata siavu deveni'u, ada'a Dilava ena kau doutamo abita vabuto'o lumanai a'alavuta, maivaka beaku bata luvana deluvaia koanai lau ima'u abia isi.

¹¹ Melala doutamo ada'a Iuda kauta eta lo'e ka ka laloatai akuta avala'asita, avakovoa a'outa eta abiveni bevunita, lau abadu venita vaika, ua'i kanobata edeatai kauta vaka ada'a akuta.

*Paulo Elalo'udai Valina Ekava.
(Vn 9.1-19; 22.6-16)*

12 “Vinaula kanaua dainai 'eva melala kai kabukabu kauta namata siavu deveni'u desini'u ada'a Damaseko.

13 Loviamu e, ado'alavuniai dalai 'ailala ka vutuvutu akanai aikaia, ena 'ailala 'eva melala ena 'ailala ekeinia, debano'u kauta ita eduimai kaiu.

14 Lai boumaiai lai a'eko kanoai, lele ka 'Ebelu malatai e'ou'u aika ediaka, 'Saulo e, Saulo e, dava 'ounai lau ovaiviivi'u? Lau ovasi'avana'u 'eva sibomu bovaanaanamu vinaulana ovavaia.'

15 Alavuaia adiaka, 'Lovia namana e, oni dai?' Lovia namana ediaka, 'Lau Iesu, oni ovaiviivia kauna.

16 Ko'isi aemuiai lava, lau kevamuai availaasi 'eva oni adilamu e'u da'alaabi kaunai bo'ao, vali'u lau aoika'u koma mai vailai bavaikamu davata valita kau bo'outa.

17 Lau Iuda kauta mai pulu edea kauta imatai oni bavamaulimu, maivaka basinimu boda'a pulu edea kauta kevata.

18 Makata bovaata inoku vabuto'oai bovakeinita be'asi 'ailalai, inoku Satani ena siavu kevanai bekeini be'asi Dilava kevana, kanaua'i lau be-abiveni'u ia eta si'avana i'ou kaota mai Dilava ena kabukabuta kauta vilolatai ia eta 'abu be'abi.'

Paulo Ena Vinaula Lovana Eakuia.

19 “Lovia 'olana kaumu Akilipa e, vutuvutuai aikaia davana kanaua lelana daitai adai.

20 Damasekoai ailolo makava, mulinai Ielusalemai, muliai Iudea vanuata boutai laloatai inoku ada'a pulu edea kauta kevatai ailolo 'eva ia belalo'udai inoku bemue'udai beda'a Dilava kevana, vinaula nama'ita bevavaita 'eva ia eta lalo'udai ivamomo'aina.

21 Kanaua dainai Iudea kauta lo'e kabukabuna laloanai deabi'u kao, de'ula beaku ba'u.

22 Beia Dilava lau edulu'u basibasi easimo vali'u nia'i vailamuiai alalava inoku kikinai eda'a namana koanai boutai kevatai aluvasi vaia. Lau 'eva luvu ka'onamo mo kanaua enolea kauta mai Mose ia lovana deakuia bepupulu davana luvana a'oumui.

23 Keliso 'eva beanana inoku ba ai ko'isi 'udai imakavana, vamauli 'ailalana luvana beabia be'asi Isalaela kauta mai pulu edea kauta boutai kevatai.”

Paulo Akilipa E'ouia Beabiveni.

24 Paulo sibona valina ekava laloanai, Feseto evaoi ediaka, “Paulo e, oni 'olamu 'ani esi'avana, emu aoneka namavaikana eta'u 'olamu evasi'avanala.

25 Paulo ia e'ouia ediaka, “Feseto Kau namamu e, lau 'ola'u 'eva sia esi'avana, lau aluvavai davata 'eva luvu amauta maivaka mai anita.

26 Lau aluvavai luvata katania 'eva lovia 'olana kauna vaka dava katania eikabasita 'ounai lau nua'u bounai aluluva. Lau aikabasi ia enai dava katania sia ka evuni, 'olana dava katania 'eva sia ua'i 'aba'abai depulu.

27 Akilipa Lovia 'olana kaumu e, oni enolea kauta oabivenita, una? Lau aikabasi oni ia ovamomo'aita.”

28 Akilipa Paulo e'ouia ediaka, “Melala kava'inamo kanania laloanai oni olalovaia lau Keliso ena kauai 'ani bovaao'u, una?”

29 Paulo ediaka, “Melala eto'oto'o 'o melala edau'a, lau Dilava anoia 'eva sia oni mo beia vali'u melala kanania'i lele'u oi o'ika kaumui boumuiai oi bomaasi lau boi'u oi bomaao, beia lau sia a'ula oi kanania boina beliomui.”

30 Inoku Lovia 'olana kauna, Kavana kauna, Belenike mai ua'i demia kauta boutai deko'isi,

³¹ daiutu kanaua devikania dela'asi mulinai, ia ka ka sibota deviluva viveni dediaka, "Kau kanania 'eva sia dava ka evavaia si'asi'a kanaua'i ia bevabala 'o bevavabuto'oa."

³² Akilipa eta'u Feseto e'ouia ediaka, "Kau kanania 'ani kamavala'asia, beia ia Kaisala vana e'ouia ua'i bevavaluvala."

27

Paulo Aunakoiai Bekalima

Beda'a Loma.

¹ Ia eta ula devalavala 'eva lai aunakoiai lai bakalima lai bada'a Italia, inoku Paulo mai vabuto'o kauta vaida 'eva kualii kauta sinavu ka e'olavaita kauna ka vana Iulio imanai deudata, ia 'eva lovia 'olana Aukusto ena kualii kauna ka.

² Lai Dalamutio aunakoina kai lai aele'au inoku Asia aveketa nabuata lai baveauta lai aveau asi, Tesalonikai Makedonia kauna ka vana Alisitako vaka lai viloomaiaia.

³ Elani 'eva Sidonoai lai avadai'au, inoku ua'i Iulio ena iulaveni koana Paulo kevanai evavaia 'eva beda'a ena kau beikata ena ula davata vaida bevenia.

⁴ 'Abu kanaua lai avikania lai aveau asi 'udai 'eva lai ada'a Kupulo motumotu laloana eva'olo'oloa duasi lai aveaua 'olana lani evailamai easi.

⁵ Kilikia mai Pamupulia 'atutai lai aveau keini lai avikanita lai ada'a Lukia kanobatanai 'abu vana Mula ai lai avadai'au.

⁶ Ua'i 'eva kualii 'olavaina kauna kanaua eta'u Alesandelea aunakoina ka beda'a Italia davana edavalia, inoku kanaua'i evanekemai keini.

⁷ Boni doutamo maka'imaka'i lai aveau inoku mai bavunumai lai ada'a Kenido kevanai. Emai ula 'abuna lai aveau venia laloanai valea vilamaiaia easi sia edaimai 'ounai Salamone i'donai lai aveau keini lai ada'a Kelete motumotuna laloana duasi lai aveaua.

⁸ Mai bavunumai nabua 'aba'abana lai aveaua lai asi avadai'au 'abu ka vana 'Aunakoi Eta Vadai'au 'Abuna Koevana Vaika', 'abu kanaua mai Lasea vanuana viloota 'eva sia edau'a.

⁹ Boni doutamo ua'i deole inoku lani esi'avanai 'atuai veauna 'ani besi'avana vaika 'olana vali'u Iuda kauta eta ani kabu melalana 'ani ekeinia. Kanaua 'ounai Paulo ia evaikabasita makava ediaka,

¹⁰ "Kau boumuiaia e, lau eta kalima aikala vali'u nia'i ekada'a 'eva besi'avana vaika inoku eta dava doutamo betaule, aunakoi bemukamuka mai eta mauili vaka ekaito'au."

¹¹ Beia kualii 'olavaina kauna 'eva Paulo ena luva sia eabivenia, ia aunakoi 'uala kauna mai aunakoi ikalina kauna mo leleta eda'avai.

¹² 'Elu namavaikana ua'i aunakoi bevadai'au 'eva emai mia sia benama'ina, kanaua 'ounai kau doutamo 'eva deula lai bamaveau asi 'udai inoku bemadaia koanai Poenikia ai lai bamavadai 'au inoku 'elu namavaikana melalana 'eva ua'i mo lai bamamia. Kelete laloanai aunakoi eta vadai'au 'abuna kanaua mo enama'ina 'olana dae duasi divo duasi ita viloota mai dodo duasi divo duasi ita viloota duasi evailata.

Levo Elava'au Easi.

¹³ Lani nama'ina divo duasi eunu koanai, ia delalovaia eta ula lanina 'ani eunu, 'ounai do'o develia 'au inoku Kelete nabuana 'aba'abana lai aveaua lai ada'a.

¹⁴ Beia lai aveau asi sia e'oima 'eva Valea ka vana Eulakuilo 'eva motumotu duasi eunu easi.

¹⁵ Levo aunakoi edavalia koanai, aunakoi Levo evailala 'eva sia edaia, kanaua 'ounai sia lai aula inoku lani evivumai lai ada'a.

¹⁶ Motumotu kikina ka vana Kauda laloana eva'olo'oloa duasi lai alu keini koanai, emai ke'epi lai ado'o 'au laloanai bavunu namavaikana lai adavali.

¹⁷ Inoku ia deta'u ke'epi develia 'au koanai 'onau vaida aunakoi venunai develita keini dedo'o 'inīta, asi'i ua'i Libia polenai demaveau'au makauna 'eva palai deva'ovuta mai do'o dene'eia, inoku aunakoi ealu eda'a.

¹⁸ Levo eunu si'asi'a eda'a boni ivaluanai 'eva kau eta dava vaida dekapoasi.

¹⁹ Mune'e eda'a boni ivakoinai 'eva aunakoi davana umauta vaida dekapoasi.

²⁰ Boni doutamo laloatai melala mai visiu sia ka lai aikaia mai Levo pasisina eunu basibasi, emai lalovai boutai deole lai alalovaia sia lai bamauli.

²¹ Kau boutai sia deaniani kovo melala edau'a vaika mulinai, Paulo eko'isi ia vailatai elavadivo inoku ediaka, "Kau boumuiai e, oi lau lele'u bomaika Kelete ai sia kamaveau asi koanai, si'avana kanania sia kamadavalia mai sia dava ka bemasi'avana maivaka sia dava ka kamavataulea.

²² Beia vali'u lau oi anoimui, nuamui oi bovakula'ilata, 'olana nia'i sia kau ka ena mauli betaule, aunakoi sibonamo betaule.

²³ 'Olana lavi boniai e'u Dilava akukudivo venia Dilavana ena anelu esinia easi keva'uai elavadivo,

²⁴ inoku e'ou'u ediaka, 'Paulo e, sia bomakau. Oni 'eva Kaisala vailanai bolalava bevaluvamu, Dilava ena vanama'ina oni akamuai 'ounai aunakoi ai oi oele'au kauta katania boutai bemaui.'

²⁵ Kanaua 'ounai kau boumuiai nuamui oi bovakula'ilata, 'olana lau Dilava abivenia 'eva ia lau e'ou'u davata vitaitatai bepupulu.

²⁶ Beia ita 'eva ekaalu ekada'a motumotu kai ekavule'au."

²⁷ Boni iva'ouka vanina (14) boninai lai 'eva Adalia 'atubatanai lai avule do'o. Malolua laloanai aunakoi kauta deonovaia kanobata 'ani lai akevaia.

²⁸ Kanaua 'ounai 'onau deva'ovua eda'a 'atu 'oulana devakovoa 'eva lova lua navui (20), kena lai amia kovo mulinai devakovoa 'udai 'eva e'ovu lova 'ouka ima (15).

²⁹ Aunakoi kauta demakau 'eva emai aunakoi asi'i bika'ai emaakua 'au 'ounai do'o vani aunakoi mulinai lai ava'ovuta, inoku deula bemalani kaokao.

³⁰ Aunakoi devinaula kauta deula beveauovo, ke'epi ka 'atuai deva'ovua 'eva dedede dediaka aunakoi vailanai do'o vaida beva'ovuta.

³¹ Inoku Paulo kualī kauta mai ia i'olavaita kauna e'outa ediaka, "Kau katania aunakoi ai sia bemimia koanai, oi sia oi bomauli."

³² Kanaua 'ounai kualī kauta ke'epi valona detauia uku e'ekoasi 'atuai evuleasi.

³³ Melala ena dae ekevai laloanai, Paulo ia boutai enoita iani kena beanīa, e'outa ediaka, "Vali'u 'ani melala iva'ouka vanina (14) 'eva oi ovi'ima mo oi omimia, sia dava kena oi oania.

³⁴ Vali'u 'eva anoimui iani kena oi bo'ani, oi boaniani 'eva mauli oi boabia. 'Olamuiai vui sia ka'onamo ka betaule."

³⁵ Kanaua eluva koma mulinai, palaoa vaida eabita ia boutai vailatai Dilava kevanai evanama'inata, mulinai ekovia inoku eania makava.

³⁶ Boutai nuata evakula'ilata inoku sibota vaka iani vitalua deabi deani.

³⁷ Lai kaumai boutai sinavu lua kalakoi ka navui kalakoi (276) 'eva aunakoi ai lai ae'e'au.

³⁸ Boutai deaniani bo'ata dekubu kave'i koanai, iani dekapoasi 'atuai aunakoi bevaveaveala.

39 Taba elele koanai, kua deikaia beia 'abu dava sia deikaiaune, beia kanobata ka nabuana nama'ina deikaia, inoku nuata devaka'ona deula aunakoi nabua kanaua'i bemavadaia 'au.

40 Do'o valota detau uku, do'o 'atuai devikanita kali valona devadadata ovo inoku palai develia 'au lani bevivuta beda'a nabuai bevadaia'au.

41 Beia aunakoi 'eva nekeneke ai emia'au, vailana emia'au 'ini sia e'iuvai'iuvai kovo, inoku ka'uda namata deta'u aunakoi 'ununa deakuia mukamuka.

42 Kualii kauta eta lalovai 'eva vabuto'o kauta beaku bata 'olana asi'i demana'u 'au inoku demaveau 'akauma 'ounai.

43 Beia kualii 'olavaina kauna eula Paulo bevamaulia 'ounai kualii kauta eta lalovai vinaulana bevavaia davana e'alavua. Inoku e'outa na'u deikabasi kauta belovo asi makava benana'u beda'a nabua.

44 Kau kalina bounai 'eva vaida aunakoi papa'ona si'asi'ata deabi mai vaida aunakoi davana kikita deabi dena'u. Kanaua boina devavaia 'eva boutai nabuai dela'asi mai nama'inata.

28

Paulo Melita Motumotunai Ele'au.

1 Boumaiai mai nama'inamai nabuai lai alavadivo koanai lai aikabasi motumotu kanaua vana 'eva Melita.

2 Motumotu kanaua kauta lai devikau venimai kave'i. Lamu eaku mai 'elu namavaikana 'ounai 'alova detouia lai boumai deabimaidae kaumai lai avasiavuta.

3 Paulo au i'apana eabia 'alovai ene'eia 'au, alaala kau'asina 'alova siavuna eonovaia 'eva au i'apanai elovo asi Paulo imanai eala'au etabataba.

4 Motumotu kanaua kauta kau'asi Paulo imanai eala'au etabataba deikaia koanai ka ka deluva dediaka, "Ama'i kau kanania 'eva akuaku kauna, ia 'atuai sia ebaba maulinai ele'au, vali'u koana 'eva sia bemaui."

5 Beia Paulo imanai kau'asi kanaua ekapioaovo eda'a 'alova laloanai e'ekouda, ia sia ealaia.

6 Kau ua'i kauta delalovaia imana 'ani be'ale 'o bevada'unai be'eko bebaba, devi'ima eda'a melala edau'a ia kevanai sia dava ka epulu, inoku nuata devaedeana dediaka, "Ia 'eva dilava ka."

7 Ia demia kevana duasi kano kataua 'eva motumotu loviana kauna vana Pubilio ena 'abu, ia mai lalonamana ena lumai lai eabimaidae inoku boni koi laloanai e'imamai kave'i.

8 Pubilio kamana 'eva e'olele lumai eno, ena 'olele 'eva kauna desiavu mai evabo'ane'ea. Paulo eda'a ena daiutu laloanai edodo akanai emeamea, imana ia akanai ekao'au 'eva enama'ina.

9 Koa kanaua epulu mulinai motumotu kanaua laloanai 'olele kauta boutai deasi inoku evanama'inata.

10 Ia eta 'olaaku koana dala edeata edeatai lai deainama venimai, maivaka lai aveau asi koanai dalai lai aulavai davata boutai 'eva deuda 'au.

Paulo Lomai Ela'asi.

11 Vuia koi mulitai Alesandelea aunakoinai lai aele'au lai aveau asi 'atubatai. Aunakoi kanaua vana 'eva 'Vi'apala', ia 'elu melalanai motumotu kanaua'i evadai'au emia.

12 Sulakuse ai lai ala'asi, ua'i boni koi lai amia.

13 Ua'i emai palai lai akoia isi lai aveau asi lai ada'a Legio ai lai avadai'au, elani 'eva levo eunu, inoku lai aveau asi boni ivaluanai 'eva lai Puteoli ai lai aveau 'au.

14 Ua'i bo'akalamai vaida lai adavalita, denoimai lai ada'a kevatai masi ka ia ita lai amia, ua'i lai ako'isi 'eva lai ada'a Loma.

15 Ua'i bo'akalamai vaida lai valimai deika 'eva deasi mo vailai vanua vaida vata 'Apio tavatava 'abuna' mai 'Laani lumata koi' ua'i ia ita lai avidavali. Paulo kau katania eikata koanai Dilava evanama'inala maivaka nuana ekula'ila.

16 Lomai lai ala'asi koanai Paulo 'eva komolo devenia sibona luma kai emia, kualo kauna ka ia e'imaia.

Paulo Lomai

Vali Nama'ina Filolovaia.

17 Boni koi deole mulitai Paulo eta'u Iuda de'ana'iavaia kauta e'aeta ia ita bedodo'u, dedo'u koanai Paulo eko'isi ediaka, "Bo'akala'u boumuiai e, lau ita eta kau sia ka avasi'avanala 'o ita 'ava'avata eta koakoa sia ka avavaia si'asi'a, beia lau 'eva ua'i Ielusalemia ia delio'u inoku Loma kauta imatai deuda'u.

18 Loma kauta delavuai'u inoku deula bevala'asi'u 'olana sia si'avana ka dedavalia kanaua'i lau bevaba'u.

19 Beia Iuda kauta valuva luvana devasi'avanala, lau devasiasi'u mo Kaisala vana a'ouia, ia vailanai balalava bevaluva'u. Beia lau e'u kau umauta sia a'ou si'ata.

20 Kanaua 'ounai lau a'aemui baikamui mai oi ita ekaluvaluva. 'Olana Isalaela kauta denuabata vaia kauna 'ounai seini kanania lau aka'uai."

21 Ia ena luva devamuea dediaka, "Oni luvamu malelena sia ka ua'i Iudeai easi lai adavalia, 'o bo'akalamai vaka ua'i sia luva ka deabia deasi 'o oni emu vavai si'avata vaika sia ka valina deluvavaia.

22 Vali'u lai a'ula oni emu lalovai luvana boluvavaia lelemu lai baik, 'olana lai aikabasi oni abido'u kataua ovavaia davana 'eva 'abu itoinai kau sia deula venia."

23 Inoku Paulo 'eva do'u kauta ita boni ka dedilaia, boni kanaua eabia koanai kau doutamo develi deasi Paulo emia 'abunai dedo'u. 'Avu'avuni eda'amo eboni 'eva Paulo eta'u Dilava ena lovia vanuana lovana eakuia kau kevatai mai Iesu valina Puka kabukabunai deleleia Mose ena talavatu pukata laloatai mai enolea kauta eta pukai davana evaikabasi vaia bevin-aula vaia.

24 Kau vaida ena luva deika 'eva deabia dae, beia vaida 'eva ena luva sia deabivenia.

25 Ia nuata sia eka'onamoai be'ulu, eta 'ulu laloanai Paulo luva ka'onamo kanania eluvavaia ediaka, "Idume Kabukabuna enolea kauna Isaia nutunai 'ava'avamui kevatai eluvaia kave'i kave'i ediaka,

26 'Da'a kau katania kevatai bodiaka,

Luva kanania oi boika 'udai'udai beia ovonai sia oi bo'ovo,
oi bo'ika 'udai'udai beia sia oi boikala nee.

27 'Olana ulu kanania kauta 'eva nuata devabula avu

kaiata debubu,

makata de'ede.

Sia kanaua bekoma koanai,

makatai beikala,

kaiatai lele be'ika,

nuata beko'ovi,

belalo'udai beka'i'udai be'asi keva'u lau mauili bavenita.'

Isa 6.9, 10

28 Kanaua 'ounai oi boikabasi kave'i, Dilava ena vamauli luvana 'eva pulu edea kauta kevata 'ani esinia, ia be'ika."

29 (Paulo kanaua eluva koma mulinai Iuda kauta de'ulu, ia boutai luva kanaua sibota deviala vaia.)

30 Paulo vikau itoitai lua ua'i emia, luma emia vaia davana sibona tavana eveni, kokona deasi beikala kauta boutai eabitadae.

³¹ Ia Dilava ena lovia vanuana luvana eilolo vaia mai Lovia namana Iesu Keliso valina evaikabasi vaia mai kula'ilana ita, sia kau ka ia e'alavua.

Paulo Ena Malele LOMA Kauta Kevatai

Puka Laloana Ilena Luvana

Paulo eta'u puka kanania eleleia 'olana ena ula 'eva beda'a abiveni kauta doutamo vaida Loma vanuana namanai kauta beikata. Ena ula 'eva beda'a ita kena bemimia vakaia beda'a Sipeini (15.23, 24). Puka kanania laloanai Paulo eta'u Keliso Valina nama'ina eluvaia asi kave'i, mai Iesu mulinai deda'a kauta kataua eta mauili abekoma.

Makavana 'eva vanama'ina luvana abiveni kauta doutamo Lomai demia kauta kevatai eluvavaia. Epua mulinai puka anina luvana umauna kanania eluvaia kave'i koma, "vali nama'ina laloanai komolo Dilava enai easi davana ela'asi, abiveniai ekamakavaia beda'amo to'ona." (1.17) Maivaka Paulo ediaka, kau kataua Iuda kauta 'o pulu edea kauta boutai 'eva si'avana kauta. Kanaua 'ounai Dilava eta'u ia elalota vaika, e'aeta 'udai Iesu Keliso beabivenia kauta 'eva Dilava betata'u ia bevamaulita.

Puka elena 5 – 8 laloanai Paulo eta'u Dilava ena anina mai Idume Kabuk-abuna abiveni kauta eta mauili laloanai davana lovana eakuia. Elena 9 – 11 'eva Paulo sibona ena mekau namana ka lovana eakuia, kanaua 'ounai Iuda kauta kataua Dilava edilata ia ena kau ai be'ao kauta doutamo Iesu deda'a mulili venia. Maivaka pulu edea kauta 'eva deasi Iesu ibanona kautai deao, beia Iuda kauta 'eva asi'i. 'A Paulo ena abiveni 'eva muliai Iuda kauta be'asi Iesu ena kauai be'ao. Puka kanania to'onai 'eva Paulo eta'u koakoa mai vinaula abiveni kauta beda'avai kauta lovata eaku.

Puka Iduvuna Namata

- a. Lova aku mai luvaluva namata. (1.1 - 17)
- b. Kau vamauli beabia 'eva dava namana. (1.18 – 3.20)
- c. Dilava ena vamauli dalana. (3.21 – 4.25)
- d. Mauili makamakana Keliso enai. (5.1 – 8.39)
- e. Isalaela kauta Dilava ena lalovai laloanai. (9.1 – 11.36)
- f. Abiveni maulina. (12.1 – 15.13)
- g. Luva to'ota mai vanama'ina luvata. (15.14 – 16.27)

Paulo Ena Veaneke Vinaulana

Valina Eluvavaia.

¹ Lau Paulo e'u malele kanania. Iesu Keliso ena da'ala iabina kau'u, ena veaneke kaunai ba'ao 'ounai Dilava edila'u e'ae'u ena vali nama'ina bailolo vaia.

² Vali nama'ina kanania 'eva Dilava eta'u 'ani siako eluva'ana'i vaia ena enolea kauta nututai deluvavaia Puka Kabukabunai deleleia vitaitanai,

³ ia Nakuna valina, eta Lovia namana Iesu Keliso, kauai epulu Davida kekenai easi,

⁴ ia idumena kabukabunai 'eva ba ai evako'isia inoku evamomo'aia maisi-avuna ia 'eva Dilava Nakuna.

⁵ Iesu Keliso dainai mai ia vanai vidulu namana mai veaneke koana 'ani lai abia, kanaua 'eva pulu edea kauta viloatai kau boutai lai ba'aeta beabiveni mai ia lalena be'ika.

⁶ Dilava eta'u e'aeta kauta viloatai oi vaka ua'i Iesu Keliso enai.

⁷ Loma ai oi omimia Dilava elalo'au venimui e'aemui ena kauai eva-aomui kaumui boumuiai, Kamata Dilava mai Lovia namana Iesu Keliso kevatai vilalo koana maivaka nua'elu oi boabia.

Paulo Eula Beda'a Loma.

⁸ E'u luva lava'ana'ina kanania: Iesu Keliso vanai e'u Dilava avanama'inala oi boumuiai daimuiai, 'olana oi emui abiveni valina kanobata bounai 'ani deika.

⁹ Dilava mainua'u bounai da'alana a'abi kanaua Nakuna valina nama'ina ailolo vaia Dilavana eikabasi e'u meamea ai lau oi alalovaimui,

¹⁰ melala bounai e'u meamea ai Dilava anoia ena ulai dala'u bermaluvua melala ka bamavasi bamaikamui.

¹¹ 'Olana lau e'u ula namana baikamui, idume ena ainama bavenimui inoku bevakula'ilamui.

¹² Ua 'eva lau oi viloamuiai bamimia laoanai lau mai oi ita sibota ekavidulu viveni, eta abiveniai ka ka ekaduluta.

¹³ Bo'akala'u e, lau a'ula oi boikabasi, melala doutamo aula bavasi kele'emui, idume vuavuaana badavali itani pulu edea kauta vaidia eta mauili deveni aikata boina, beia dava vaidia deta'u de'alavu'u easimo vali'u.

¹⁴ Lau 'eva vali nama'ina ikavanai tava baveveni kau boutai kevatai, 'Elene kauta mai 'ailala asi'i kauta maivaka nuata de'avaea kauta mai aoneka kauta kevatai.

¹⁵ Kanaua 'ounai lau aula vaika oi Loma ai oi omimia kaumui vailamuiai vaka vali nama'ina bailolo vaia.

¹⁶ Lau vali nama'ina sia amalalai vaia, 'olana ia 'eva Dilava ena siavu, abiveni kauta boutai bevamaulita, lava'ana'ina 'eva Iuda kauta, muliai 'eva puluedea kauta.

¹⁷ 'Olana vali nama'ina enai komolo Dilava kevanai easi davana ela'asi, abiveniai emakavala beda'amo to'ona, puka kabukabunai deleleia boina, "Komolo kauna 'eva abiveniai bemauii."

Dilava Ena Badu Kau Etai.

¹⁸ Kau eta da'amulili mai vavai si'asi'a 'outai Dilava ena badu vutuvutuiai evala'asia, eta koakoa si'avatai luva umauna dekaokaia kauta etai.

¹⁹ Dilava ikabasina ia etai 'eva makanaimo, 'olana Dilava eta'u evaikata.

²⁰ Makavanai kanobata epulu easimo vali'u Dilava enai sia ka'ika davata kataua 'eva ena miakeinikeini siavuna mai idume maulina 'eva ia evavai davata laloatai dela'asi kave'i deikata deikabasita, kanaua 'ounai kau be'ouavuavu 'eva dalana asi'i.

²¹ Dilava deikabasias beia sia deabia dae maivaka sia devanama'inala ia 'eva Dilava, 'ounai nuata de'avaea mai nuata lalovaita si'avatai vabuto'o eta'u nuata e'alavua.

²² Ia sibota delalovaia deaoneka, beia ia 'eva bo'o kautai deao.

²³ Miakeinikeini Dilavana ikukudivo venia 'eva debilabolala, ia kau va'ava'ata sia bemiakeinikeini kauta, manumanu, sisi, delalau davata, mai va'ava'ata imatai devavai davata dekuudivo venita.

Kau Vinaula Si'avata Vaika

Edeata Edeata Devavai.

²⁴ Kanaua 'ounai Dilava eta'u nuata si'avana eula venia 'abunai evikanita, inoku sibota eta koakoa si'avata vaika pedata vinaulata ka ka kevatai bevavai.

²⁵ Dilava ena luva umauna 'eva ia deta'u dede davanai devaao, beia Dilava dava evavai davata dekuudivo venita da'alata deabi. Beia evavaita kauna ia sibonamo ekavanama'inala beda'amo to'ona asi'i. Amen.

²⁶ Dilava eta'u evikanita deda'a eta koakoa si'avata vaika laloatai. Eta 'a'ate deta'u 'a'ate dekulata kanaua sia bemakoma davana 'eva devavaia.

²⁷ Dala vitaitanai momoluane vaka 'a'ate ita kamoanena sia deula, ia momoluane 'eva momoluane deula venita vaika. Momoluane sibota banota

kevatai koa si'avata vaika devavai. Kanaua tavana 'eva eta koakoa si'avata daitai sibota mekauna dekoaia.

²⁸ Ia nuatai 'eva Dilava ilalovai 'ininai sia deula venia, Dilava eta'u eta bo'o lalovaitai evikanita, sia demavavai vinaulata 'eva devavai.

²⁹ Vinaula si'avata vaika edeata edeata nuatai devonu, koakoa si'avata vaika, 'oualavu mai lalovai si'avata vaika, mama, akuaku, viaku, dede mai nua vanana vinaulatai devonu. De'oukeinikeini,

³⁰ mai ka ka vata devavai si'asi'a lualuvai, Dilava devaiviivia, deaivala 'avaea, de'apa, maivaka deabitaisi, lalovai si'avata vaika 'abu vaidai delalovaita bevavai. Kamata mai sinata leleta sia deika.

³¹ Ia 'eva eta lalovailalovai asi'i, eta luva'ana'i sia deabi 'ini, mai kau etai 'eva nama'ina 'o vilalo sia devaikata.

³² Dilava ena talavatu deikabasia 'eva kau 'abu kanaua boinai demimia kauta 'eva bebaba. Beia si'avana kataua 'eva devavai basibasi inoku kau vaid devavai koanai devakula'ilata.

2

Dilava Ena Lavuai.

¹ Kanaua 'ounai luvai kau ka va'evai one'eadivo kaumu, sia maiemu komolo luvana ka. Oni luvai kau ka va'evai one'eadivo 'eva sibomu mekau ovenimu. 'Olana ia va'evai one'eadivo vinaulana vitaitanai oni vaka ovavaia.

² Ita kaikabasi Dilava 'eva maiena komolo kanaua devavai koma kauta va'evai bene'etadivo.

³ Kanaua 'ounai oni luvai kau ka va'evai one'eadivo beia vinaulana vitaitana ovavaia kaumu, olalovaia Dilava va'evai bene'emudivo 'abunai 'ani boda'atau, una?

⁴ 'O dava 'ounai sia oikabasi Dilava ena nama'ina namavaikana kanaua eta'u e'ana'ia vaimu lalo'udai dalanai ena nama'ina namana, ena vi'ima mai ena vakula'ila oika 'iu'iuta?

⁵ Beia nuamu evabula, sia olalo'udai 'ounai oni sibomu emu mekau ovalalo, Dilava ena badu mai ena komolo lavuai melalanai bele'au koanai emu mekau ua'i bela'asi.

⁶ Dilava betata'u kau ka ka eta koakoa vitaitatai tavata bevenita.

⁷ Kau vaid vinaula nama'ita devapasisi mai nuavi mai 'ola-aku maivaka sia bepupua maulina dekvua kauta 'eva Dilava betata'u mau keinikeini bevenita.

⁸ Beia kau vaid deidono mai luva umauna ulana sia de'ula, vinaula va'evata deabidae kauta 'eva Dilava ena badu mai ena mekau akatai beva'ovua.

⁹ Vinaula si'avata vaika devavaia kauta boutai 'eva adedua mai anaana bekoala sia Iuda kautamo mo ia puluedea kauta vaka.

¹⁰ Ia vinaula nama'ina devavaia kauta boutai 'eva Dilava betata'u nuavi, 'ola-aku mai nua'elu bevenita, makavana 'eva Iuda kauta, mulinai 'eva puluedea kauta.

¹¹ 'Olana Dilava 'eva sia kau ka enai e'au.

¹² Mose ena talavatuai sia demimia kauta devinaula si'asi'a 'eva vinaula si'asi'a ananana beabia, ia talavatuai demimia kauta devinaula si'asi'a 'eva talavatu bealuvata.

¹³ Talavatu 'uluna deika 'avaea kauta 'eva Dilava vailanai komolo sia beabia, ia talavatu vinaulana devavaia kauta 'eva komolota be'oua.

¹⁴ Puluedea kauta kevatai Mose ena talavatu 'eva asi'i, ia nuatai talavatu koana vitaitana devavaia koanai, talavatu kevatai asi'i beia ia sibota 'eva talavatuai de'ao.

¹⁵ Ia talavatu luvana nuatai deleleia davana eta koakoai ela'asi mai nuata vaka kanaua evamomo'aia, eta lalovailalovai kanaua etata'u va'evata e'oua 'o komolota e'oua.

¹⁶ Vali nama'ina ailolo vaia vitaitanai, melalana bele'au koanai Dilava betata'u kau eta lalovai vuniatai bevaluvata Iesu Keliso dainai.

Juda Kauta Delalovaia

Talavatu Beduluta.

¹⁷ Oi sibomui oi odiaka oi 'eva Iuda kaumui, talavatuai oi olava 'ini mai Dilava oi oapavaia,

¹⁸ maivaka Dilava dava eula venia davana oi oikabasia mai komolo e'asi 'abuna oi oikabasia 'olana oi talavatu oi omalele vaia.

¹⁹ Oi olalovaia oi 'eva maka'ede kauta ivada'ata kave'i mai vabuto'oai demimia kauta eta 'ailala

²⁰ maivaka bo'o kauta ivaidibata mai sia demalele kauta ivaikabasita kaumui, 'olana talavatu laloanai aoneka mai luva umauna itoinai oi odavalita.

²¹ Banomui oi ovaikabasita beia dava 'ounai oi sibomui sia oi ovamalele-mui? Oi oilolo odiaka sia bevinao, beia oi ovinao?

²² Oi odiaka sia bekulakula, beia oi okulakula? Va'ava'a imatai devavai davata oi ovaivi-ivita, beia oi lo'e laloana davata ovinaota?

²³ Oi talavatu emimia 'ounai oi o'apa, beia talavatu oi oukua 'eva Dilava vana oi ovavaia si'asi'a.

²⁴ Puka kabukabuna laloanai ediaka, "Oi Iuda kaumui daimuia puluedea kauta Dilava vana devavaia si'asi'a."

²⁵ Talavatu boda'avaia kave'i koanai iva 'eva nama'ina bevenimu, ia talavatu boukua koanai oni 'eva vitaitana iva sia oabia boina.

²⁶ Puluedea kauna ka sia deivaia beia Dilava ena talavatu luvana beda'avaia kave'i koanai Dilava betata'u iva eabia kaunai bevaoa.

²⁷ Inoku kauaninai sia eivaia beia talavatu eda'avai kave'i kauna betata'u oni Iuda kaumui va'evai bene'emu divo, 'olana talavatu deleleia davana kevamuai mai iva oabia beia talavatuna oukua 'ounai.

²⁸ Kau kauaninai ikana Iuda kauna beia sia Iuda kauna umauna maivaka kauaninai iva eabia 'eva sia iva umauna.

²⁹ Beia nuana evamakamakala kauna ia 'eva Iuda kauna umauna, maivaka iva momo'aina 'eva nuana itoinai Idume Kabukabuna ai bevavaia, ia sia talavatuai. Kau kanaua boina 'eva vanama'ina Dilava kevanai beabia, ia sia kau kevatai.

3

Dilava Sibonamo Ekavamomo'aia.

¹ Kanaua boina koanai Iuda kauta eta nama'ina 'eva dava? Iva ena nama'ina 'eva dava?

² Dala doutamoai. Lava'ana'ina 'eva Dilava ena luva Iuda kauta kevatai ene'eia divo be'imala.

³ Bema vaida eta abiveni asi'i koanai aboina? Eta abiveni asi'i 'ounai Dilava sibona ena luva'ana'i sia bevamomo'aia, una?

⁴ Kanaua sia bekoma. Kau boutai bededede, beia Dilava sibonamo ivamomo'aina. Puka kabukabunai deleleia vitaitana,

"Emu luvai bovamomo'aimu 'eva okomolo.

Inoku belavuaimu koanai bokomolo."

Sal 51.4

⁵ Beia ita eta si'avana betata'u Dilava ena vinaula komolona bevala'asia koanai, ita dava ekakoma? Inoku Dilava ana-ana 'abunai ene'eta divo 'eva

eva'eva, una? Asi'i. Sia kanaua bekoma. (Kania 'eva kau eta lalovailalovai a'oua.)

⁶ Sia kanaua boina. Dilava sia bekomolo koanai, kanobata a belavuaia koma?

⁷ Vaida dediaka, "Lau e'u dede bemata'u Dilava ena luva umauna bevala'asia mai ena nuavi bevanamala koanai, dava 'ounai lau vinaula si'avana mekauna bavuala si'avana kauna boina?"

⁸ Vaida lai vuvua devakoamai 'avaea dediaka lai 'eva kania aluva koma, "Nama'ina ivapuluna dainai si'avana vinaulata ekavavai." Eta dede mekauna bekoala 'eva benama'ina.

Sia Kau Ka Ekomolo Vaika.

⁹ Kanaua boina koanai dava ekakoma? Ita Iuda kauta 'eva kanama'ina vakaia puluedea kauta? Asi'i vaika. 'Olana Iuda mai puluedea kauta 'eva si'avana laloanai kamimia luvana 'ani aluvaia.

¹⁰ Puka Kabukabunai deleleia vitaitana, "Kau ka sia ekomolo vaika Dilava vailanai, asi'i vaika.

¹¹ Maivaka sia kau ka 'eva eaoneka, Dilava ikavuna kauna sia ka.

¹² Boutai 'ani deda'a ovo inoku eta maui 'eva anita asi'i maivaka sia vinaula kave'i kauna ka, asi'i vaika.

Sal 14.1-3.

¹³ Eta luva bonata 'eva desi'avana itani mitava iluvuna, malata 'eva dede luvata deluluva. Nututa luvatai 'eva banota deva ana-anata itani kau'asi ivabata mulamulana boina.

Sal 5.9

¹⁴ Nututa 'eva sivada mai nua 'avala luvatai devonu.

Sal 10.7

¹⁵ Kau beva ana-anata mai beaku bata 'eva demolau.

¹⁶ 'Abu davana beda'ala 'eva kau bevaiviivita mai bevadeduata.

¹⁷ Maivaka nua'elu dalana 'eva sia deikabasia.

Isa 59.7, 8

¹⁸ Dilava sia demakauvaia kovo."

Sal 36.1

¹⁹ Ita kaikabasi talavatu dava e'oua 'eva kau talavatu venunai demimia kauta eluva venita, inoku kau be'ou avuavu dalana 'eva asi'i, kanobata itoinai 'eva Dilava ena lavuai laloanai bedododo.

²⁰ Dilava vailanai sia kau ka ekomolo talavatu ida'avai kave'ina dainai, inoku talavatu 'eva evaikabasita ita si'avana kauta.

Kau Beabiveni Kauna Komolona Be'oua.

²¹ Vali'u Dilava kau komolo bevenita dalana 'ani evala'asia, sia talavatuai, kanaua 'eva talavatu mai enolea kauta devamomo'aia.

²² Komolo Dilava kevanai easi 'eva Iesu Keliso deabivenia kauta boutai bedavaliala, kau boutai kevatai sia ka 'eva bedeana.

²³ 'Olana boutai 'ani si'avana devavai 'ounai Dilava ena nuaviai detabu.

²⁴ Beia Dilava ena iulaveni koana 'eva eveni 'avaea, boutai komolo Keliso Iesu dainai deabia, 'olana ia eta'u etavata 'udai.

²⁵ Dilava eta'u Iesu esinia easi kanobatai eba 'eva nua'elu koanai eao, eta si'avana daitai Iesu eba 'ounai eka abivenia kauta 'eva eta si'avana be'ou kao. Kanania evavaia 'eva ia ena komolo koana evaikata. Nuana eabia kao, 'ana'inai kau si'avana devavai kauta evikanita eta si'avana e'oukao.

²⁶ Dilava koa kanaua evavaia 'eva vali'u melala katania daitai 'ounai sibona ena komolo evaikavaika vaia, dala kanaua'i Iesu deabivenia kauta vaka komolo bevenita.

²⁷ Kanaua boina koanai dava eka'apavaia? Inoku dala davanai? Talavatu ida'avainai? Asi'i. Sia dava ka ai. Ia abiveni dalanai.

²⁸ Luva umauna ita kaikabasia 'eva Dilava abiveniai kau komolo evenita, ia sia talavatu ida'avainai.

²⁹ Dilava 'eva Iuda kauta mo sibota eta Dilava, una? Ia puluedea kauta eta Dilavai sia be'ao, una? Asi'i. Ia 'eva puluedea kauta vaka eta Dilava.

³⁰ Dilava 'eva ka'onamo iva kauta abiveniai komolo bevenita mai sia iva kauta vaka abiveni vitaitana aimo komolo bevenita.

³¹ Kanaua boina koanai ita 'eva abiveni kanania'i talavatu kavatauleia, una? Asi'i vaika. Ita 'eva talavatu kabi 'inia.

4

Abiveniai Abela'amo 'Eva Komolo Kauna.

¹ Kanaua boina koanai dava ekakoma 'ava'avata Abela'amo enai? Abiveni koana 'eva a edavalia koma?

² Abela'amo ena vinaula daitai komolo kaunai bema a'o koanai, dava kataua daitai tava apa, beia Dilava vailanai 'eva asi'i.

³ Puka kabukabuna dava ekoma?
"Abela'amo 'eva Dilava evamomo'aia 'ounai
Dilava eta'u ia komolo kaunai evaoa."

Gen 15.6

⁴ Vinaula kauna 'eva maitavana beia tava kanaua 'eva sia ainama davana, ua 'eva ena vinaula tavana.

⁵ Kau ka vinaula nama'ina sia evavaia, beia Dilava si'avana kauna komolo evenia Dilavana eabivenia kauna 'eva ena abiveni 'ounai komolo kaunai bevaao.

⁶ Kau vinaula 'ounai komolo sia deabia beia Dilava enai komolo deabia kauta eta nama'ina dainai Davida luva kanania eluvaia.

⁷ "Kau kataua eta vinaula si'avata vaika e'ou kao mai eta si'avana eabiovo kauta 'eva benama'ina.

⁸ Lovia namana eta si'avana
sia bevakuta kauta 'eva benama'ina."

Sal 32.1,2

⁹ Vanama'ina kanania 'eva deivata kauta mo beabia 'o sia deivata kauta beabia? Ita 'ani kaluva, "Abela'amo ena abiveni 'ounai Dilava eta'u komolona e'ouia."

¹⁰ Melala davanai komolo kaunai evaoa? Deivaia mulinai 'o asido'o deivaia? Dilava Abela'amo ena komolo e'ouia 'ana'i vakaia deivaia.

¹¹ Abela'amo 'eva asido'o deivaia laloanai ena abiveniai komolo eabia, muliai deivaia, kanaua 'eva abiveni koana ivamomo'aina. Kanaua 'ounai Abela'amo 'eva mai eta abiveni kauta Dilava komolo kautai evaota kauta boutai kamata.

¹² Inoku deivata kauta vaka kamata 'eva Abela'amo. Beia sia deivata kauta boutai mo, vaidia ita kamata Abela'amo asido'o deivaia laloanai eabiveni dalana kanaua vitaitanai bedada'a kauta vaka kamata.

*Dilava Ena Luva'ana'i 'Eva
Kabiveni Kauta Eta.*

¹³ Luva'ana'i 'eva eveni Abela'amo mai 'ava'avana ita kanobata itoinai beabia ia eta, kanaua 'eva sia talavatu dainai evenia, beia komolo kanaua 'eva Abela'amo ena abiveni Dilava enai dainai evenia.

¹⁴ 'Olana talavatu deabia dae kauta luva'ana'i bemabia ia etai bema koanai abiveni 'eva ena nama'ina asi'i, luva'ana'i vaka anina asi'i.

¹⁵ Talavatu eukua 'eva Dilava ena badu evapulua, beia talavatu bema asi'i koanai va'eva adeduata vaka bema asi'i.

¹⁶ Kanaua 'ounai luva'ana'i 'eva abiveniai easi vitaitana vidulu namana, Abela'amo 'ava'avana boutai beabia, sia talavatu deda'avaia kave'i kauta mo, beia Abela'amo eabiveni vitaitanai deabiveni kauta boutai etai. 'Olana Abela'amo 'eva ita boutai kamata.

¹⁷ Puka kabukabunai kanania deleleia koma, "Lau oni kanobata doutamo kamatai avaomu." Kanaua 'ounai Abela'amo 'eva ita kamata Dilava vailanai. Abela'amo eta'u Dilava kanaua ba kauta evamaulita maivaka sia depulu davata evapuluta kauna eabivenia.

¹⁸ Dilava Abela'amo e'ouia 'ana'i 'ava'avana doutamo bevenia, laloanai kataua boutai anita asi'i. Abela'amo 'eva nuana bounai Dilava eabivenia, kanaua 'ounai ia 'eva kanobata doutamo kamatai eao, Puka kabukabunai eluva vitaitana, "Ava'avamu 'eva bedoutamo vaika itani visiu boita."

¹⁹ Abela'amo vikauna sinavu ka 'ounai kauanina eonovaia 'eva itani ba kauna boina mai Sala vaka melo bevapulua 'abuna ia bo'anai 'eva asi'i, beia Abela'amo ena abiveni 'eva sia emanomano.

²⁰ Abela'amo Dilava ena luva'ana'i ai nuana sia evalalo to'ato'a ena abiveniai elava 'ini inoku ekula'ila Dilava evanama'inala.

²¹ Mai eikabasi dokadoka Dilava 'eva maisiavuna eluva'ana'i davana 'eva bevavaia.

²² Kanania 'ounai, "Dilava Abela'amo ena abiveniai eabiadae, komolo kaunai evaoa."

²³ Ia eabiadae komolo kaunai evaoa luvana deleleia 'eva sia Abela'amo sibona mo dainai

²⁴ Beia ita vaka komolo kautai beva aota 'olana Iesu eta Lovia namana ba ai evako'isia 'udai Dilavana kabivenia 'ounai.

²⁵ Dilava Iesu evenita eba 'eva ita eta si'avana daitai, mai evako'isia 'udai emauli 'eva ita komolo bevenita 'ounai.

5

*Komolota E'ouia 'Ounai
Ekalalonama.*

¹ Eta abiveniai komolo kabia 'ounai Dilava ita nua'eluai ekamia Iesu Keliso eta Lovia namana dainai.

² Ita kaikabasi abiveni dalana kanaua'i 'ani kadodo inoku ia dainai iulaveni kanania laloanai kamimia, lalovai namana 'eva Dilava ena nuavi laloanai ekadodo davana kanaua kalalonama vaia.

³ Sia kanaua mo, beia anana melalatai vaka kalalonama, 'olana kaikabasi anana etata'u vakula'ila evapulua,

⁴ Vakula'ila etata'u koa mediana evapulua, maivaka koa mediana etata'u nuabata evapulua.

⁵ Nuabata kanania 'eva sia bevavaita si'asi'a, 'olana Dilava ena lalo'au 'eva esisia 'ovu ita nuatai Idume Kabukabuna enai, Idume Kabukabuna kanaua 'eva Dilava eveni ita eta.

⁶ Ita sibota ekaduluta sia edaia laloanai Dilava eula melalana umaunai Keliso eba vinaula si'avata devavai kauta daitai.

⁷ Kau ka komolo kauna dainai bebaba 'eva bepasisi. Ama'i vaidā be'ula 'eva nama'ina kauna dainai bebaba.

⁸ Beia si'avanai kamia do'o laloanai Keliso eba ita daitai, Dilava ena lalo'au 'eva kanaua evaikata koma.

⁹ Kanaua 'ounai Keliso eba lalanai Dilava komolo evenita. Ita kaikabasi kave'i ia dainai Dilava ena badu laloanai bevamaulita.

¹⁰ Ita 'eva Dilava ena 'ou kautai kao laloanai Nakuna eba 'ounai ia mai ita nua'elu kabia, 'ani nua'elu kabia kauta 'eva kaikabasia kave'i Keliso ena mauliai bevamaulita.

¹¹ Sia kanaua mo, ita Dilava enai kalalonama eta Lovia namana Iesu Keliso dainai vali'u ita Dilava itana 'ani nua'elu kabia.

Ba Adamu Enai Easi,

Mauli Keliso Enai Easi.

¹² Kau ka'onamo dainai si'avana kanobatai edodo, si'avana eta'u ba edodo vaia, kanaua 'ounai ba easi kau boutai kevatai, dala kanaua'i boutai devinula si'asi'a.

¹³ Si'avana 'eva 'ani epulu 'ana'i kanobatai, vakaia talavatu deveni. Talavatu asi'i 'ounai kau eta'i si'avana 'eva sia devakua.

¹⁴ Beia ba 'eva e'ana'ia vaita Adamu ena melalai easi mo Mose ena melalai, kau Adamu ena vinaula si'avata vitaitanai sia devinaula kauta boutai vaka deba.

Kanaua 'ounai Adamu 'eva muliai be'asi kauna ivavitaitana.

¹⁵ Beia Dilava ena ainama 'eva sia Adamu ena si'avana boina. 'Olana kau ka'onamo ena si'avana dainai kau doutamo deba, beia Dilava ena iulaveni koana 'eva nama vaikana, Adamu ena si'avana ekeinia kanaua 'eva ena iulaveni koana ainamana kau ka'onamo Iesu Keliso dainai doutamo bemaui.

¹⁶ Mai Dilava ena ainama namana mai kau ka'onamo ena vavai si'asi'a 'eva luana sia devitaita, kau ka'onamo ena vavai si'asi'ai va'eva lavuaina easi, beia ainama namana easi komolo evapulua.

¹⁷ Kau ka'onamo ena vinaula si'asi'a dainai ba eta'u e'ola vaita, ita kaikabasi kave'i kataua Dilava ena iulaveni koana namana eva'olua davana mai komolo ainamana beabia kauta maui keinikeini laloanai be'ola kau ka'onamo Iesu Keliso dainai.

¹⁸ Kanaua 'ounai kau ka'onamo ena vinaula si'asi'ai kau boutai mekau deabia, maivaka kau ka'onamo ena vinaula komoloai komolo eabia easi kau boutai maui keinikeini evenita.

¹⁹ Kau ka'onamo ena lele ika asi'i dainai kau doutamo si'avana kautai deao, maivaka kau ka'onamo ena lele ika dainai kau doutamo komolo kautai be'ao.

²⁰ Talavatu elava 'eva kau eta si'avana beika kave'i beia kau eta si'avana evanamata 'udai'udai. Beia si'avana namana eao 'abunai Dilava ena iulaveni koana 'eva ekeini vaika.

²¹ Kanaua 'ounai si'avana e'ola ba dalanai mai Dilava ena iulaveni koana vaka komolo dalanai be'ola beda'avaita maui keinikeini 'abuna Iesu Keliso eta Lovia namana dainai.

6

Si'avana Enai Ekaba

Ia Keliso Enai Ekamaui.

¹ Kanaua boina koanai ita luva davana ekaluvala? Dilava ena iulaveni koana namanamo be'ao 'ounai si'avana ekavavai basibasi, una?

² Kanaua sia bekoma. Ita si'avana enai kaba inoku si'avana siavunai kada'a ovo, dava 'ounai si'avana laloanai ekamia 'udai.

³ Ita Keliso Iesu ita 'ani kaidi'u kabukabu kauta 'eva ena ba ai vaka ia ita 'ani kaidi'u kabukabu ka'ona, kanaua 'eva sia oi oikabasia, una?

⁴ Kanaua 'ounai vaidi'u kabukabuai ita 'eva ia ita kaba maivaka ia ita dekoleta, Keliso Kamana nuavina siavunai ba ai evako'isia 'udai. Kanaua 'ounai ita vaka mauli makamakanai ekamia.

⁵ Ita ia ita kaba ka'ona koanai ia ba ai eko'isi 'udai vitaitanai ita vaka ba ai ekako'isi 'udai.

⁶ 'Ani kaikabasi ita kauanita 'ana'ina 'eva Keliso ita au ido'o valaukuna akanai deba inoku kauanita ena si'avana siavuna ua'i 'ani iabi ovona, inoku ita 'eva si'avana da'alana sia ekabia 'udai.

⁷ 'Olana eba kauna 'eva si'avana siavunai 'ani iluvuna.

⁸ Vali'u ita Keliso ita kaba koanai, kaikabasi dokadoka ita 'eva ia ita ekamia ka'ona.

⁹ 'Olana kaikabasia Keliso 'eva ba ai eko'isi 'udai 'ounai sia beba 'udai, ba 'eva ia sia be'ola vaia 'udai.

¹⁰ Ba ia eba vaia davana 'eva si'avana boutai bevaoleta 'ounai melala ka'onamoai eba, beia mauli emauli vaia davana 'eva Dilava nuavina dainai emauli.

¹¹ Dala vitaitanai oi vaka sibomui oi boikabasimui, si'avana enai 'ani oi oba, beia Dilava enai 'ani oi omauli Keliso Iesu laloanai.

¹² Kanaua 'ounai si'avana betata'u kauanimumi bebaba davana sia be'ola vaia mai ena ula vinalata si'avata vaika sia oi boabita dae.

¹³ Maivaka kauanimumi kava'ina kena si'avana laloanai sia oi bone'ea divo, si'avana vinalata davanai be'ao, beia sibomui oi bovenimumi Dilava ena vitaitana kau kataua ba ai demauli 'udai kauta boita, kauanimumi itoina oi bovenia, ia betata'u komolo vinalata davatai beva aomui.

¹⁴ Si'avana 'eva oi emui 'ola kaunai sia be'ao, 'olana oi 'eva talavatu venunai sia oi omimia, ia Dilava ena iulaveni venunai oi omimia.

Komolo Dokadoka Da'alana Ekabi.

¹⁵ Inoku a ekakoma? Talavatu venunai sia kamimia beia Dilava ena iulaveni venunai kamimia 'ounai si'avana ekavavai, una? Asi'i vaika.

¹⁶ Oi 'ani oikabasia sibomui oi ovenimumi kau ka enai lelana oi o'ika koanai ena da'ala abi kaumui'ai oi o'ao. Kanaua 'ounai oi 'eva si'avana ena da'ala iabinai bevada'amui ba 'abuna 'o Dilava lelana ikanai bevada'amui komolo 'abuna.

¹⁷ Dilava ekavanama'inala. 'Olana 'ana'inai oi 'eva si'avana ena da'ala iabinai oi oao, beia vali'u oi nuamui itoina devaikabasimui luvana kanaua oi oabia dae.

¹⁸ Oi si'avana enai 'ani iluvumui, vali'u komolo ena da'ala iabinai oi o'ao.

¹⁹ Melala boutai mauliai aluvaluva 'olana nuamui sia de'ailala 'ounai. 'Ana'inai kauanimumi oi oveni vinalata si'avata vaika mai si'avana ivavaina basibasi da'alata iabinai oi oao vitaitanai, vali'u 'eva kauanimumi komolo ena da'ala iabinai oveni, oi bokabukabu.

²⁰ Oi si'avana ena da'ala iabinai oi o'ao koanai oi 'eva sia oi oula komolo da'alana iabinai oi bo'ao.

²¹ Melala kataua'i vinalata si'avata vaika vuavutai 'eva dava oi odavali? Vali'u oi omalalai vai davata mo? Dava kataua to'otai 'eva ba.

²² Beia oi vali'u 'eva si'avanai 'ani iluvumui, inoku Dilava ena da'ala iabina kaumui'ai oi o'ao. Kanaua 'ounai vuavuumui 'eva kabukabu dalana umaunai, to'onai 'eva mauli keinikeini.

²³ 'Olana si'avana tavana 'eva ba, beia Dilava ena ainama namana 'eva mauli keinikeini Keliso Iesu ita eta Lovia namana enai.

7

Keliso Talavatuai Eluvuta.

¹ Bo'akala'u e, lau 'eva oi talavatu oi oikabasia kaumui a'oumui, oi 'ani oikabasi talavatu 'eva kau e'ola vaia maulinai emimiado'o laloanai.

² Talavatu dainai ateate ka adana kevanai bemimia kau ena mauli melalata boutai laloatai, beia kau bebaba koanai ia 'eva kamoane talavatu ena 'ani iluvuna ovo.

³ Kanaua 'ounai kau emimia do'o laloanai ateate beko'isi kau edeana ka beadavala koanai ia 'eva kulakula ateatena ekako. Beia kau bebaba koanai ia 'eva talavatu ena 'ani iluvuna ovo. Kau edeana ka beadavala koanai sia ekadiaka ia 'eva kulakula ateatena.

⁴ Kanaua 'ounai bo'akala'u e, oi vaka Keliso ena ba dainai talavatu ena oi oba, inoku oi oda'a Keliso ba ai eko'isi kauna kevana, vuavuata bepupulu 'eva Dilava ena.

⁵ Ita kauani ena ulai kamia laloanai, lalovai si'avata vaika depulu talavatu ena devinaula kauanitai inoku vuavuata kavapuluta to'ona 'eva ba.

⁶ Beia ita edo'o 'inita davana ena kaba 'ounai vali'u talavatu ena 'eva 'ani deluvuta ovo, kanaua 'ounai ita 'eva dala makamakana Idume Kabukabuna ena da'ala ekabi, ia sia 'ana'inai deleleia davana.

Si'avana Eta'u Evabata.

⁷ Kanaua 'ounai dava ekavavaia? Talavatu 'eva esi'avana? Asi'i vaika. Talavatu eta'u lau evaikabasi'u si'avana 'eva dava. Talavatu sia be'ou'u bediaka, "Oni sia dava ka boulaivenia 'avaea." koanai, lau sia baikabasi ula 'avaea 'eva dava.

⁸ Inoku si'avana eta'u dala'u ekavu talavatu luvana ulu 'avaea edeata edeata nua'uai evapuluta, beia talavatu bema asi'i koanai, si'avana 'eva eba boina ena siavu asi'i.

⁹ Makavanai lau 'eva talavatu sia aikabasia laloanai alalovaia nama'i'u ai amauli amia, beiamo talavatu luvana aikabasia koanai si'avana 'eva aikaia une emauli, lau 'eva aba boina.

¹⁰ Talavatu kanania 'eva mauli evaikata davana, beia lau e'uai ia 'eva ba davanai eao.

¹¹ 'Olana si'avana eta'u dala'u ekavu talavatuai eleba'u inoku ba kau'u ai evao'u.

¹² Beia talavatu sibona 'eva ekabukabu, talavatu luvana sibona vaka ekabukabu, kataua 'eva dekomolo mai denama'ina.

¹³ Kanaua boina koanai dava nama'ina kanaua eta'u lau e'u ba davanai eao, una? Asi'i vaika. Talavatu luvana medianai si'avana eta'u lau e'uai ba evapulua, 'ounai si'avana 'eva ekaikabasia kave'i, talavatu luvana dainai si'avana 'eva si'avana umaunai eao.

Si'avana Eta Mauli E'olavaia.

¹⁴ Kaikabasi talavatu 'eva Dilava ena easi, beia lau 'eva kauani ena ao, si'avana eta'u etava'u ena da'ala iabinai ao.

¹⁵ Lau dava avavaia davana sia aikabasia, 'olana aula venia bavavaia davana sia avavaia, beia dava ulana sia aula davana avavaia.

¹⁶ Talavatu eta'u nama'ina mai si'avana evaikata. Inoku dava sia aula venia davana avavaia koanai, lau avamomo'aia talavatu 'eva enama'ina.

¹⁷ Kanaua 'ounai avavaia 'eva sia lau sibo'u umau'u, beia si'avana nua'uai emimia davana.

¹⁸ Lau aikabasi sia dava ka nama'ina nua'uai emimia, ua 'eva kauani'u ena ula 'ounai nua'uai sia emimia, 'olana lau dava nama'ina aula venia bavavaia beia ivavainai 'eva sia edaia.

¹⁹ Vinaula nama'ina aula venia bavavaia davana sia avavaia, mai vinaula si'avata vaika ivavaita sia aulavenita davata avavai basibasi.

²⁰ Beia dava sia aula venia davana avavaia koanai, evavaia davana 'eva sia lau uma'u, ia si'avana nua'uai emimia davana evinaula.

²¹ Inoku lau vinaula dalana ka adavalia, lau e'u ula vinaula nama'ina bavavaia, beia vinaula si'avata vaika mo dela'asi.

²² Nua'u laloana umauna 'eva Dilava ena talavatu elalonama vaia.

²³ Beia aikala 'eva kauani'u talavatu edeana evinaula vaia, talavatu kanaua talavatu nua'uai emimia davana ekualia, kanaua 'eva kauani'u ai evinaula vaika ena talavatu venunai elio'u evavabuto'o'u.

²⁴ Lau ma'adi, ilalo'umo! Dai betata'u lau kauani'u kanania eda'avai'u ba 'abunai kauna enai bevamauli'u?

²⁵ Beia Dilava apavaia Iesu Keliso eta Lovia namana evamauli'u 'ounai. Kanaua 'ounai e'u mauli 'eva kanania boina, lau nua'u umauna 'eva Dilava ena talavatu da'alana iabinai e'ao, ia kauani'u 'eva si'avana ena talavatu da'alana iabinai e'ao.

8

Keliso Eta Si'avana Eabi Ovo Ia Idume Kabukabuna Evenita.

¹ Kanaua 'ounai vali'u Keliso Iesu laloanai demimia kauta 'eva sia mekau ka bekoala.

² 'Olana Keliso Iesu dainai Idume Kabukabuna mauli talavatuna easivaia kauna eta'u si'avana mai ba talavatuna etaiai 'ani eluvumu ovo.

³ Kauani ena badebade dainai talavatuai sia bedaia 'abunai 'eva Dilava eta'u evavaia. Ia eta'u Nakuna ka'onamo esinia, si'avana kauna boina si'avana tavanai eao, kau eta mekau boutai evua.

⁴ Kanaua evavaia 'ounai ita kauani ena vinaula si'avata vaika sia kavavai, Idume Kabukabuna ena ulai kamimia kauta nuatai talavatu ena ula komolo vinalana bevaolea kave'i.

⁵ Kauani ena ulai demimia kauta 'eva kauani ena ula davata mo delalovaita, beia Idume Kabukabuna ena ulai demimia kauta 'eva Idume Kabukabuna ena ula vinalata davata delalovaita.

⁶ Kauani ena ula lalovaitai be'ana'ia vaia to'ona 'eva ba, beia Idume Kabukabuna ena ula lalovaitai be'ana'ia vaia to'ona 'eva mauli keinikeini mai nua'elu.

⁷ Kauani ena lalovai e'ana'ia vaia 'eva Dilava evaiviivia, 'olana kanaua 'eva Dilava ena talavatu sia eda'avaiia maivaka bevavaia sia bedaia.

⁸ Kau kataua kauani ena ulai demimia kauta 'eva Dilava ivalalonamanai 'eva sia bedaita.

⁹ Beia oi Dilava Idumena Kabukabuna nuamui ai emimia koanai, oi 'eva kauanimui sia evada'amui, ia Idume Kabukabuna evada'amui. Beia kau ka nuanai Keliso Idumena asi'i kauna 'eva sia Keliso ena kau.

¹⁰ Nuamui ai Keliso emimia koanai kauanimui 'eva 'ani eba si'avana dainai, beia idumemui 'eva emauli komolo dainai.

¹¹ Beia Dilava Idumena Iesu ba ai evako'isia kauna nuamui ai emimia koanai Keliso Iesu ba ai evako'isia Dilavana betata'u oi kauanimui bebaba davata vaka bevamaulita 'olana Idumena Kabukabuna nuamui ai emimia 'ounai.

Idume Kabukabuna Eda'avaita Dilava Nakunai Kao.

¹² Kanaua 'ounai bo'akala'u e, ita 'eva ekavinaula, ia sia kauani ena tava veniai, maivaka kauani ena ulai sia ekamauli.

13 'Olana kauani ena ula 'abutai bomimia koanai oni 'eva bobaba Dilava vailanai, ia Idume Kabukabuna ena ulai kauani ena vinaula si'avata vaika bobabata koanai oni 'eva bomauli keinikeini.

14 'Olana kau kataua Dilava Idumena Kabukabuna e'ana'ia vaita kauta 'eva Dilava nakuna.

15 Oi 'eva da'ala-abi mai makau idumena sia oi oabia ia Idume Kabukabuna oi oabia, kanaua 'eva evada'amui Dilava nakunai oi oao, Idume Kabukabuna kanaua siavunai Dilava ka'aea, "Kama'u, lau Kama'u."

16 Idume Kabukabuna kanaua ita idumeta ita devamomo'aia ita 'eva Dilava nakuna.

17 Vali'u ita ia nakuna koanai ita 'eva avuna ekabia kauta. Dilava avuna kanaua ekabia 'eva Keliso ita ia nakunai ekao Dilava avuna ekabia. Inoku Keliso ita ena anana eka ana-anavaia koanai ia nuavina vaka ekabia.

Vailai Vutuvutu Vanuanai

Nuavi Laloanai Ekamia.

18 Lau alalovaia vali'u melala kanania'i ita kana-anavaia davana 'eva kikina, beia nuavi kanaua muliai ita etai bela'asi davana 'eva namavaikana.

19 Dilava evavai davata boutai 'eva devi'ima eta ula namana 'eva Dilava nakuna bevala'asita.

20 'Olana depulu davata boutai 'eva dava anita asi'i venunai demimia, sia sibota eta ulai, beia Dilava ena ulai.

21 Depulu davata kauani pedana edo'o 'initai 'eva beluvuta, inoku Dilava nakuna eta nuavi iluvuna laloanai bemia ka'ona.

22 Inoku ita kaikabasi depulu davata boutai 'eva mai nua ana-anata itani ateate melo bevapulua ananana boina easi mo vali'u melala kanania.

23 Beiamo sia sibota, Dilava vuavuana lava'ana'ina ai Idumena Kabukabuna kabia kauta vaka nuata mekau mai kavi'ima Dilava nakunai bevaota mai kauanita itoinai bevamaulita.

24 Ita nuabata kanania'i mauili kabia. Beia nuabata kanaua ekaikala koanai sia ekaula venia. Dai eula venia davana 'ani eabia kauna nuabata ai beula venia?

25 Beia dava kaula vaika davata asido'o kabita koanai, ita 'eva vapasisiai mai kula'ilata ekavi'ima.

26 Dala vitaitanai Idume Kabukabuna 'eva eduluta eta badebade laloatai, ita a ekameamea koma 'eva sia kaikabasi, beia Idume Kabukabuna sibona etata'u emeamea mai ita daitai nua mekau kau sia beluluva bedaia davata enoinoivai.

27 Maivaka kau nuata e'ika Dilavana Idume Kabukabuna ena lalovai davana 'eva eikabasia, 'olana Idume Kabukabuna 'eva Dilava ena kau daitai enoinoi Dilava ena ula vitaitanai.

28 Ita kaikabasi Dilava dava boutai evavinaulata ka'ona 'eva Dilava delo'au venia kauta mai ena ulai e'aeta kauta ivanama'inata dainai.

29 'Olana Dilava 'eva ena kau eikabasita makava inoku edilata ia Nakuna ikaikanai be'ao, inoku Keliso 'eva 'aida'aidanai be'ao bo'akalana boutai viloatai.

30 Edilata kauta ia eta'u e'aeta, e'aeta kauta ia eta'u komoloai evaota, komoloai evaota kauta ia eta'u ena nuavi evenita.

Sia Dava Ka Dilava Ena Lalo'au

Enai Beabita Tau.

31 Dava nama'ita vaika katania a eka'oulai koma? Dilava ita 'uvita enene'e koanai dai 'eva ita bevaiviivita? Sia kau ka.

32 Ia nakuna ka'onamo dainai sia evavaia, ita boutai daitai eveni 'avaea. Nakuna evenita 'ounai dava boutai vaka bevenita 'avaea.

³³ Dai betata'u Dilava edilata kauta adeduai bene'eta divo? Sia kau ka. Dilava 'eva ia evamomo'aia sia deva'eva.

³⁴ Mai dai betata'u mekau bevenita? Sia kau ka. 'Olana Keliso Iesu eba, inoku eko'isi 'udai, ia 'eva Dilava idibana ai emimia, ita daitai enoinoi.

³⁵ Dai betata'u Keliso ena lalo'au ai beabita tau? Adedua betata'u 'o ana-ana betata'u 'o vaivivi betata'u 'o doe betata'u 'o ulalu betata'u 'o makau betata'u 'o kualilepona betata'u? Sia kau ka.

³⁶ Dava kataua 'eva Puka Kabukabunai deleleia vitaitana ediaka, "Lai 'eva oni daimuai melala boutai ba lai availala, lai 'eva mamoe ai devaomai beaku bamai."

Sal 44.22

³⁷ Beia dava katania boutai laloatai ita 'eva akai vaika, elalo'au venita kauna dainai.

³⁸ 'Olana lau aikabasi dokadoka, ba 'o maui aneluta 'o siavu ka'ubata, vali'u demimia davata 'o vilalai be'asi davata, siavu edeata edeata,

³⁹ kano akanai 'o kano venunai, depulu davata boutai sia ka betata'u Dilava ena lalo'au enai beabita tau, 'olana ita eta Lovia namana Iesu Keliso laloana kamimia 'ounai.

9

Dilava Isalaela Kauta Edilata.

¹ Luva umauna aluvala Keliso laloana, lau 'eva sia adedede Idume Kabukabuna vaka nua'u eikabasia evamomo'aia.

² E'u vilalo 'eva nama vaikana, nua ana-ana nua'uai davana 'eva ena ole asi'i.

³ Lau sibo'u aula 'eva bo'akala'u kataua e'u iduvu kauta daitai bema vasivada'u Keliso enai bema abi'uovo inoku ia 'eva bemamaui.

⁴ Ia 'eva Isalaela kauta, Dilava nakunai deao mai ena nuavi evala'asia etai, etai luva'ana'i kabukabuna evavaia mai talavatu evenita, lo'e kabukabuna umaunai dekukudivo mai luva'ana'i deabia.

⁵ Ia 'ava'avata 'eva kau namata, Keliso vaka ia eta puluai easi, ia 'eva Dilava dava boutai e'ola vaita kauna, ekavanama'inala keinikeini. Amen.

⁶ Lau sia adiaka Dilava ena luva'ana'i 'eva e'ekoasi, 'olana Isalaela 'ava'avanai depulu kauta mo 'eva sia boutai Isalaela kauta umauta.

⁷ Abela'amo 'ava'avana boutai 'eva sia ia nakuna umauta. 'Olana Dilava Abela'amo e'ouia "Isako enai bepupulu kauta mo 'ava'avamu ai be'ao."

⁸ Anina 'eva melo kauanina depupulu davata 'eva sia Dilava nakuna. Beia Dilava ena luva'ana'iai bepupulu melota 'eva Abela'amo nakuna umautai be'ao.

⁹ Luva'ana'i 'eva kanania eluva koma, "Vikau vilalai melala kanania boinau lau bamumue 'eva Sala melo ka bevapulua."

¹⁰ Sia kanaua mo, beia Lebeka esivabu nakuna vi'apala 'eva kamata ka'onamo Isako ita 'ava'avata ena melalai vaka vitaita.

¹¹ Beia asido'o melo depulu mai dava ka nama'ina 'o si'avana asido'o devavaia laloana, Dilava edilata kauta 'eva ia sibona ena ulai evavaia.

¹² Sia eta vavai daitai ia nia ena 'ae'aeai evavaia, Dilava Lebeka e'ouia ediaka, "Kau 'aida'aidana betata'u kau mulikaina da'alana be'abi."

¹³ Puka kabukabunai ilelena vitaitana ediaka, "Lau Iakobo alalo'au venia ia Esau ulana sia a'ula."

¹⁴ Kanaua boina koana dava ekakoma? Dilava 'eva ena vavai sia dekomolo, una? Asi'i vaika.

¹⁵ Dilava eta'u Mose e'ouia ediaka, "Lau baduluta kauta 'eva

baduluta mai balalota kauta
'eva balalota."

Eso 33.19

¹⁶ Kanaua 'ounai Dilava kau edilai 'eva sia kau ka ena ulai 'o kula'ilai, beia Dilava sibona ena vilaloai.

¹⁷ Puka kabukabunai Dilava Palao e'ouia ediaka, "Lau oni lovia 'olanai ane'emudivo 'olana 'eva kanania. E'u siavu emuai bavala'asia, inoku kanobata itoinai lau va'u be'oua."

¹⁸ Kanaua 'ounai Dilava mo ena ula vitaitanai belalota kauta 'eva elalota, nuata bevapasisi kauta nuata evapasisi.

Dilava Ena Badu Mai Vilalo.

¹⁹ Kanaua boina koanai oi ka lau bo'ou'u bodiaka, "Kanaua ekoma koanai, dava 'ounai Dilava lai vuo evakoamai? Dai betata'u Dilava ena ula be'alavua?"

²⁰ E'u kau e, oni kau a boimu, Dilava ena luva ovamuea? Vodu sia betata'u evavaia kauna be'oua bediaka, "Dava 'ounai kanania ovavai'u koma?"

²¹ Vodu vavai kauna 'eva mai ena komolo ia betata'u 'ika'ika ka'onamoai vodu bevavaita, ka 'eva vodu nama'ina vinaula namatai bevinaula vaia, ka 'eva vodu 'avaeana vinaula kikitai mai melala boutai ai bevinaula vaia.

²² Dilava 'eva itani vodu vavai kauna boina ena ula 'eva ena badu mai ena siavu bevaika vaika vaia, beiamo nuana eabi 'inia ebadu venita kauta kevatai beda'amo ba bonina 'ani eva'olua davana be'asi.

²³ Maivaka kanania evavaia 'eva eula ena nuavi namana bevala'asia elalo'au venita kauta kevatai 'eva 'olana kanania, kau kataua 'ani eva'oluta kauta 'eva ena nuavi beabia.

²⁴ Vodu 'eva ita e'aeta kauta, sia Iuda kauta mo, ia pulu edea kauta vaka.

²⁵ Enolea kauna 'Osea ena pukai eluvavaia vitaitana ediaka, "Sia e'u kau umauta kauta ba'aeta 'e'u kau.'

Iduvu kataua sia alalo'au venita
iduvuta ba'aeta 'e'u lalo'au.'

Hos 2.23

²⁶ E'outa, oi 'eva sia lau e'u kau
Abunai ia 'eva be'aeta Mauli Dilavana nakuna."

Hos 1.10

²⁷ Enolea kauna Isaia Isalaela kauta valita ekava ediaka, "Isalaela kauta bemadoutamo vaika 'atu nabuana boina, beia vitaluamo 'eva mauli beabia.

²⁸ Lovia namana betata'u molauai
lavuai luvana kanobatai
bene'ea kave'i."

Isa 10.22, 23

²⁹ Itani Isaia eluva 'ana'i boina,
"Kula'ila Loviana 'ava'avamai
vaida sia bemavikanita koanai
lai 'eva Sodoma mai Komola
vitaitatai lai bamao."

Isa 1.9

*Pulu Edea Kauta Deabiveni
Ia Isalaela Kauta Sia Deabiveni.*

³⁰ Kanaua 'ounai dava ekakoma? Pulu edea kauta 'eva komolo sia deka'vuia beia 'ani deabia, kanaua 'eva abiveniai deabia.

³¹ Beia Isalaela kauta 'eva talavatu dalanai komolo deka'vuia, beia sia dedavalia.

³² Dava 'ounai sia deabia? 'Olana abiveniai sia deka'vuia ia delalovaia vinalai bedavalia. Isalaela kauta tailea bika'anai detai.

³³ Puka Kabukabunai ilelena vitaitana ediaka,

“Ikala Siona lolonai bika'a ka ane'eia divo
bika'a kanaua kau bevatai leata
mai bika'ana kanaua
betata'u beva'ekoasita.
Beia dai eabiveni kauna 'eva
sia bemalalai.”

Isa 8.14, 28.16

10

Isalaela Dilava Ena Vinaula

Sia Deikaia Une.

¹ Bo'akala'u e, e'u ula namana mai mainua'u bounai e'u meamea edada'a Dilava kevana, Isalaela kauta 'eva bemamauli.

² Lau aikabasi ia 'eva nuata umaunai Dilava deula venia, beia luva momo'aina enai eta ikabasi asi'i.

³ Ia sia deikabasi komolo 'eva Dilava kevanai easi, beia sibota mo eta komolo devalava davata deabi 'ini. Kanaua 'ounai Dilava ena komolo sia deabia dae.

⁴ Beia Keliso 'eva talavatu evaolea, inoku beabiveni kauta boutai 'eva komolo beabia.

⁵ Mose eta'u talavatu ai komolo beabia lovana eakuia ediaka, “Kau ka talavatu daina bedadai 'eva ia 'ani bemauli.”

⁶ Beia komolo abiveniai e'asi davana kanania eluva koma, “Nuamui ai sia oi bodiaka, Dai bele'au beda'a vutuvutu?” (Kanaua 'eva, Keliso beva'ovua.)

⁷ 'O, “Dai be'ovu beda'a 'uli laloanai?” (Kanaua 'eva, Keliso ba kauta viloatai bevaelea'au.)

⁸ Eluvavaia davana 'eva kanania, “Dilava ena luva 'eva oi kevamui ai, nutumui ai mai nuamui ai.” Ua 'eva abiveni luvana, lai ata'u ailolo vaia.

⁹ Luvana 'eva kanania boina, oni nutumu ai bo'oua dae 'Iesu 'eva Lovia namana, 'maivaka Dilava ba ai evako'isia kauna nuamu ai boabiveni koanai oni 'eva bomauli.

¹⁰ 'Olana nuamu ai boabiveni koanai 'ani bokomolo Dilava vailana, maivaka nutumu ai bo'oua dae koanai 'ani bomauli.

¹¹ Puka Kabukabunai 'eva ediaka, “Ia beabivenia kauta boutai 'eva sia bemalalai.”

¹² Iuda mai pulu edea kauta viloatai eta edeana 'eva asi'i. 'Olana Dilava 'eva ka'onamo boutai eta Lovia namana maivaka vanai dekudivo kauta boutai 'eva vanama'ina evenita itoi.

¹³ Puka Kabukabunai eluva vitaitana,

“Lovia namana vanai de'ae'ae kauta
boutai 'eva bemauli.”

Iol 2.32

¹⁴ Inoku kau kataua enai sia deabiveni kauta 'eva a be'aea koma? Mai valina sia de'ika kauta 'eva a beabivenia koma? Maivaka kau ka kevatai sia beilolo koanai vali a beika koma?

¹⁵ Mai vali ikavana kauta sia besinita koanai vali 'eva a beilolo vaia koma? Puka Kabukabunai ilelena vitaitana, “Vali nama'ina deabia de'asi kauta aeta 'eva a denama'ina koma!”

Isalaela Kauta Vali Nama'ina

Sia Deabia Dae.

¹⁶ Beia Isalaela kauta doutamo 'eva vali nama'ina sia deabia dae. Isaia eluva vitaitana, "Lovia namana e. Dai 'eva emai vali deabivenia? Sia kau ka."

¹⁷ Kanaua 'ounai abiveni 'eva vali nama'ina 'uluna ikanai e'asi, mai luva nama'ina 'eva Keliso ena luvai e'asi.

¹⁸ Beia lau alavuui lavuui, vali nama'ina sia de'ika, una? Asi'i. Vali nama'ina 'eva 'ani deika. Puka Kabukabunai ediaka, "Leleta 'eva 'ani ela'asi eda'a kanobata boutai laloatai, maivaka eta luva 'eva kanobata to'ota aveke aveke edavalita."

Sal 19.4

¹⁹ Mai alavuui lavuui 'udai, Isalaela kauta 'eva sia deikabasi, una? Asi'i, Deikabasi. Makavanai Dilava ena luva Mose eluvaia ediaka, "Oi bavamamui kanobata edeana kauta vata asi'i kauta kevatai, mai oi bavabadumui kanobata kataua eta ikabasi Dilava enai asi'i kauta kevatai."

Deu 32.21

²⁰ Mai Isaia nuana evakula'ilala mai sia emakau inoku ediaka, "Kau sia dekavu'u kauta 'eva dedavali'u. Maivaka sia denoi'u kauta kevatai sibo'u avala'asi'u."

Isa 65.1

²¹ Beia Isalaela luvata eluva ediaka, "Melala ka'onamo itoinai laloanai ima'u aisia asi lele sia deika kauta mai deda'amulili kauta a'imata bemumue."

Isa 65.2

11

Dilava Isalaela Elalota.

¹ Kanaua 'ounai lau alavuui 'udai, Dilava ena kau ulata sia e'ula, una? Asi'i vaika. Lau vaka Isalaela kau'u, Abela'amo 'ava'avana, Beniamina ena iduvu kau'u.

² Dilava ena kau edilata makava kauta 'eva sia evasi'avanata. Puka Kabukabunai enolea kauna Elia eluva luvana 'ani oi oikabasia. Elia eta'u Dilava vailanai Isalaela kauta luvata eluva ediaka,

³ "Lovia namana e, ia emu enolea kauta 'ani deaku bata, mai emu vala kabukabuta 'ani deluvuta mukamuka, lau mo sibo'u amimia, maivaka dekavu'u beaku ba'u."

⁴ Beia Dilava Elia ena luva evamuea dava ekoma? Ia ediaka, "Lau 'eva sibo'u e'u kau sinavu kalakoi ka navui (7,000) dede dilavana Ba'ala sia dekukudivo venia kauta 'eva abita kao."

⁵ Inoku vali'u dala vitaitanai kau kalina vaka Dilava ena iulaveniai edilata kauta 'eva demimia.

⁶ Dilava edilata 'eva ena iulaveni koana 'ounai, ia sia kau eta vinaula daitai. Eta vinaula daitai edilata koanai Dilava ena iulaveni koana 'eva anina asi'i.

⁷ Kanaua boina koanai dava ekakoma? Isalaela kauta dava dekavua davana 'eva sia dedavalialia, ia Dilava edilata kauta vitalua mo 'eva kanaua dedavalialia. Beia kalina 'eva nuata devapasisi.

⁸ Puka Kabukabunai ilelena vitaitana ediaka, "Dilava eta'u nuata evamuinaita,

makatai sia deikaika mai
kaiatai lele sia deika
easimo vali'u."

Deu 29.4, Isa 29.10

⁹ Maivaka Davida Dilava e'ouia ediaka,
"Eta nadu vakana 'eva viu mai doko ai bevaaoa
inoku bevaviuta be'eko
mekau beabia.

¹⁰ Makata bovamuina tabuta
sia beikaika,
mai kabeta bovava'evata
melala boutai."

Sal 69.22, 23

*Dilava Ena Vamauli 'Eva
Pulu Edea Kauta Deabia.*

¹¹ Lau alavuai udai, ia 'eva viuai deviu 'ounai 'ani depua vaika, una? Asi'i vaika. Ia eta si'avana daitai pulu edea kauta mauli dedavalia, inoku Isalaela kauta ia bemama venita.

¹² Isalaela kauta eta va'evai kanobata kauta vanama'ina namana dedavalia, maivaka Dilava ena vamauli laloanai de'eko 'eva pulu edea kauta vanama'ina namana dedavalia. Beia Isalaela kauta boutai Dilava ena vamauli laloanai bedododo koanai, vanama'ina 'eva benama vaika.

¹³ Lau 'eva oi pulu edea kaumui a'oumui. Lau Dilava ena veauneke kau'u pulu edea kauta daitai 'ounai, vinaula avavaia davana 'eva apavaia.

¹⁴ Kanaua bavavaia laloanai e'u ula namana e'u pulu kauta bavamamata Keliso beabivenia, inoku Dilava betata'u vaidia bevamaulita.

¹⁵ Dilava Isalaela kauta evaivi ivita 'ounai kanobata kauta ita devikau. Inoku Dilava Isalaela kauta beabita dodo koanai dava bepupulu? Kanaua 'eva ba kauta bemaui.

¹⁶ Palaoa kena Dilava kavenia davana ekabukabu koanai palaoa itoina vaka ekabukabu, lamu ekabukabu koanai le'ena vaka dekabukabu.

¹⁷ Olive ivadona le'ena vaidia 'eva 'ani iukuta 'abutai olive 'asina le'ena deabita olive ivadona kukuanai de'apata 'au, lamu ka'onamoai olive veina deabia, inoku oni 'eva Olive 'asina le'ena.

¹⁸ Le'e kataua detauta uku davata kevatai sia bo'apa. Bo'apa beia kanania bolalovaia, oni 'eva lamu sia odulua, ia lamu 'eva oni edulumu.

¹⁹ Kanaua 'ounai oni 'eva bodiaka, "Le'e kataua detauta uku 'abutai lau ama'i be'apa'u 'au."

²⁰ Luva umauna, eta abiveni asi'i 'ounai Dilava eba'ita ovo, beia oni 'eva emu abiveni dainai 'abutai olalava. Kanaua 'ounai sia bo'apa, ia bomakau.

²¹ 'Olana Dilava le'e umauta sia bemalalota koanai, oni vaka sia bemalalomu.

²² Kanaua 'ounai Dilava ena nama'ina mai ena vapasisi bolalovaita, de'eko kauta kataua 'eva Dilava ia kevatai evapasisi, beia ena nama'ina laloanai bomimia koanai oni kevamui benama'ina. Kanaua sia bovavaia koma koanai, oni vaka betaumu uku.

²³ Ia eta 'oualavu bemavikanita koanai Dilava betata'u be'apata 'au 'udai, 'olana Dilava kanaua bevavai koma 'eva bedaia.

²⁴ Oi pulu edea kaumui 'eva itani au 'asina le'ena boina, kanaua 'ounai i'apa 'au au ivadona kukuanai 'eva eveavea. Inoku Dilava betata'u Olive ivadona le'eta itauta uku davata auta umautai be'apata 'au 'udai 'eva eveavea vaika.

*Dilava Ena Vilalo**Kau Boutai Akatai.*

²⁵ Bo'akala'u e, lau a'ula oi luva vuniana kanania oi boikabasia, sibomui emui aoneka sia oi boapavaia. Luva vuniana kanaua 'eva Isalaela kauta vali'u vaida nuata devapasisi vaia beda'amo Dilava edilata kauta pulu edea boutai beda'adodo makava.

²⁶ Inoku Isalaela kauta boutai 'eva bemaui. Puka Kabukabunai ilelena vitaitana ediaka,
 "Siona ai vamaui kauna ka be'asi.
 Ia betata'u Iakobo 'ava'avana kevatai Dilava ivasi'avanana davata bevailuta tau.

²⁷ Melala kanaua'i eta si'avana babita tau Lau e'u luva'ana'i vitaitana'i."

Isa 59.20, 21, 27.9

²⁸ Iuda kauta vali nama'ina devasi'avanala 'ounai Dilava ena 'ou kautai deao 'eva oi pulu edea kaumui emui nama'ina davanai eao, ia 'ava'avata edilata 'ounai ia Dilava ena lalo'au laloanai demimia.

²⁹ 'Olana Dilava ena 'ae'ae mai ena ainama 'eva sia bevaedeanala.

³⁰ 'Ana'inai oi pulu edea kaumui Dilava ena luva sia oi oabita dae, beia vali'u oi 'eva Dilava ena vilalo 'ani oi oabia, 'olana Iuda kauta Dilava ena luva sia deabia dae 'ounai.

³¹ Dala vitaitana'i vali'u Iuda kauta 'eva Dilava ena luva sia deabia dae, Beia vilalo kanaua oi oabia vitaitana ia vaka Dilava ena vilalo kanaua beabia.

³² Dilava eta'u kau boutai luva sia deabita dae 'abunai e'alavuta, 'olana kanaua'i ena vilalo bevaikata.

Dilava Vana Ekavanama'inala.

³³ Dilava 'eva ena ikabasi mai ena aoneka vitaitana 'atu 'oulana boina. Ena lalovai kave'i luvana 'eva dai betata'u be'oua kave'i? Ena koakoa dalana 'eva dai betata'u beikabasia kave'i? Sia kau ka.

³⁴ Puka kabukabunai ediaka,
 "Dai 'eva Lovia namana nuana eikabasia? 'o,
 Dai 'eva ia ena vaidiba kaunai e'ao?"

Isa 40.13

³⁵ Dai betata'u dava ka Dilava bevenia makava inoku Dilava dava kanaua tavana beveveni?"

Iob 41.11

³⁶ Dava boutai ivapuluta 'eva Dilava, dava boutai ia enai dela'asi, maivaka dava boutai ia enai be'ao. Nuavi 'eva Dilava kevanai beda'amo to'ona asi'i. Amen.

12*Emui Kukudivo Koana Umauna.*

¹ Kanaua 'ounai bo'akala'u e, Dilava ena vilalo nama vaikana 'ounai anoimui, kauanimui mai nuamui itoina Dilava oi bovenia, veniveni davata maulita ai be'ao, bekabukabu Dilava nuana bevanama'inala. Emui kukudivo koana umauna 'eva kanaua.

² Kanobata kanania ena koakoa sia oi bokovo kovo vaia, 'a nuamui oi bovamakakata emui maui oi bovaedeanata, inoku Dilava ena ula 'eva dava, ia elalonama vaia 'eva dava mai nama'inana umauna 'eva dava oi boikabasia kave'i.

Dilava Ena Ainama Evenimu Davana Vinaulana Bovavaia.

³ Vidulu namana eveni'u 'ounai, lau oi boumuiai a'oumui. Sibomui sia oi bolalovaimui vaika, beia sibomui oi bolalovai lalovai kave'i, nuamui bekomolo, Dilava eta'u ka ka emui abiveni a boita evenimui vitaitatai.

⁴ Ita kauanita 'eva ka'onamo beia le'ena 'eva dounamo, ia eta vinaula 'eva edeata edeata.

⁵ Dala vitaitanai ita 'eva kadoutamo, beia Keliso laloanai ita 'eva kauani ka'onamo, le'ena edeata edeata kavaka'onamo.

⁶ Dilava ena iulaveni koana ainama davata edeata edeata 'ani evenita, kau ka ena ainama 'eva enolea koanai ia benolea ena abiveni vitaitanai.

⁷ Kau ka ena ainama 'eva da'ala abi koanai ia 'eva da'ala be'abi, kau ka ena ainama 'eva vaikabasi koanai ia 'eva bevaikabasi.

⁸ Vakula'ila kauna bevakula'ila, veniveni kauna beveniveni mainuana bounai, 'ana'iavai kauna be'ana'iavai maikula'ilana, vilalo kauna bevilalo mailalonamana.

Nuata Umaunai

Bo'akalata Ekalalo'auvenia.

⁹ Emui lalo'au 'eva oi bovamomo'aia. Si'avana davata ulata sia oi bo'ula, nama'ina davata oi bovavaita.

¹⁰ Ka ka oi bovilalo'au viveni bo'akalamui boina, maivaka ka ka 'ola oi boaku viveni.

¹¹ Oi bovinacula kula'ila sia oi bobalea. Idume siavunai Lovia namana da'alana oi bo'abi mai nuamui bounai.

¹² Oi onuabata vaia enai oi bolalonama. Bavunu melalatai oi bokula'ila. Melala bounai oi bomeamea.

¹³ Dilava ena kau deulalu kauta oi boduluta. Da'a'au kauta oi boabita dae emui lumai.

¹⁴ Devaivivimui kauta Dilava oi bonoia bevanama'inata, sia oi bosivada venita, ia oi bovanama'inata.

¹⁵ Delalonama kauta ita oi bolalonama, dekakani kauta ita oi bokakani.

¹⁶ Boumuiai emui mia ai nuamui beka'onamo. Sia oi bo'apa, mia mamedu kauta ita oi bomia ka'ona. Sibomui emui aoneka sia oi boapavaita.

¹⁷ Kau ka ena vinaula si'avana kevamuiiai davana tavana si'avana si oi bovamuea, ia kau boutai vailatai vinaula nama'ita oi bovavai.

¹⁸ Bedaimui koanai, kau boutai ita nua'elu ai oi bomimia.

¹⁹ E'u kau e, si'avana tavana sibomui sia oi bovamuea, oi bovikania Dilava ena badu bevavaia. 'Olana Puka kabukabunai 'ani ilelena, "Lovia namana ediaka, Tava veni 'eva lau ima'u ai, lau batata'u tavana bavamuea."

²⁰ Mai ilelena 'udai,

"Emu 'ou kauna vikolo eakua

koanai iani oi bovenia,

maivaka 'atona elada koanai vei oi bovenia.

Koakoa kanania oi bovavaia 'eva

ia bovamalalalaia vitaitana itani 'olanai 'alova one'ea 'au."

Aon 25.21, 22

²¹ Vinaula si'avata sia betata'u oi bekaokaimui, beia emui vinaula nama'itai vinaula si'avata oi bokaokaita.

13

Ita Kavamani Ena Siavu

Venunai Ekamia.

¹ Kau boutai 'eva de'ola vaita kauta leleta beabita dae. 'Olana 'ola 'eva sibona sia epulu ia Dilava enai easi, 'ola kauta boutai 'eva Dilava eta'u evalavata.

² Kanaua 'ounai kau ka 'ola kauna evaiiviiva 'eva Dilava evalavala kauna evaiiviiva, vaivivi vinaulana evavaia kauna 'eva sibona ena mekau be-davalia.

³ 'Olana vinaula nama'ina devavaia kauta 'eva 'ola kauta sia demakau venita, beia va'eva vavai kauta mo. Oni o'ula 'ola kauna sia bomakau venia? Kanaua boina koanai vinaula nama'ita bovavai, inoku ia bevanama'inamu.

⁴ Ia 'eva Dilava ena da'ala abi kauna emu nama'ina vinaulana evavaia. Beia bovavai si'asi'a koanai ia bomamakau venia. 'Olana ia 'eva kualilepona sia eabia 'avaea. Ia 'eva Dilava ena da'ala abi kauna vavai si'asi'a kauta tavata bevenita.

⁵ Kanaua 'ounai 'ola kauta leleta ekaika, sia mekau mo kevanai ekada'atau 'ounai, ia lalovai komolo 'ounai vaka.

⁶ Kanaua 'ounai oi vaka moni visi monina oi oveveni, 'olana ia 'eva Dilava ena da'ala abi kauta, melala boutai vidulu vinaulana kanania devavaia.

⁷ Dava oi boveveni Kavamani etai davata 'eva oi bovenita. Moni visi edeata edeata davata oi boveveni, demakau venia kauna oi bomakau venia, de'ola aku venia kauna oi bo'ola aku venia.

Banomui Bolalo'au Venita

Dokadoka.

⁸ Kau ka kevanai sia dava ka boabia 'avaea makava, beia ekavavaia basibasi davana 'eva ka ka ekalalo'au venita. Kevana kauna elalo'au venia kauna 'eva talavatu 'ani eda'avaia kave'i.

⁹ Talavatu katania, 'Sia bokulakula vaika, sia boakuaku, sia bovinao, maivaka kau ka ena dava sia boulavenia 'avaea' mai talavatu vaida ita devaka'onamo 'eva luva namana ka'onamo kanania, 'Kevamu kauna bolalo'au venia itani sibomu olalo'au venimu boina.'

¹⁰ Kau ka maiena lalo'au kauna etata'u kevana kauna sia evasi'avanala. Kanaua 'ounai oi bovilalo'au viveni 'eva talavatu itoinai 'ani oi ovamomo'aia.

'Ailala Dalanai Ekada'a.

¹¹ Melala dava kanania 'eva 'ani oi oikabasi makamui deata lalo'au vinaulana oi bovavaia melalana 'eva 'ani ele'au. 'Olana makavanai kabiveni koanai ivamaulita melalana 'eva dau'ai beia vali'u 'eva 'ani ekevai.

¹² Boni 'ani e'ole Iesu ena asi melalana 'ani ekevai. Kanaua 'ounai vabuto'o vinaulata kavikani, beia 'ailala ena kualile davata kabita.

¹³ Eta koakoa bemanama'ina vitaitana lanai kavavai boina. Sia eka aivala, sia ekainu ba, sia ekakulakula, sia ekabo'o, sia ekaviaku, sia ekamama.

¹⁴ Lovia namana Iesu Keliso 'eva emui kualile tubu'anai oi bova aoa, ia kauanimui eta ula vinaulata si'avata vaika sia oi boabita dae.

14

Bo'akalamui Mekau

Sia Oi Bovenia.

¹ Kau ka ena abiveni ebadebade kauna oi boabia dae, ia ena lalovai dava kanaua 'eva sia oi boadedua vaia.

² Kau ka mai ena abiveni dava boutai e'ani, beia ka ena abiveni ebadebade kauna loba ianita mo e'ani.

³ Dava boutai e'ani kauna sia e'ani kauna sia bevasi'avanala maivaka loba ianita mo e'ani kauna dava boutai e'ani kauna sia bevavaia si'asi'a, 'olana Dilava eta'u ia laluanu 'ani eabita dae.

⁴ Oni 'eva dai, kau ka ena da'ala abi kauna o'oua si'asi'a? Ia belava 'ini 'o be'eko kanaua 'eva 'ola kauna ena siavuai. Ia 'eva belava 'ini 'olana Lovia namana 'eva mai siavuna bevalava 'inia.

⁵ Kau ka elalovaia melala ka 'eva ekeini vaika vakaia melala vaidā, mai kau ka elalovaia melala boutai 'eva vitaita. Ka ka sibota eta lalovai lalovai bevalava kave'i.

⁶ Kau kanania Lovia namana dainai elalovaia melala ka namana, kau kanaua Lovia namana dainai dava boutai e'ani, 'olana Dilava evanama'inala makava vakaia eaniani. Mai kau ka Lovia namana dainai iani vaidā ebo'okaita, ia vaka Dilava evanama'inala.

⁷ 'Olana ita vilootai sia kau ka ia sibona dainai emauli, maivaka sia kau ka ia sibona dainai ebaba.

⁸ Kamauli, 'eva Lovia namana dainai kamauli, maivaka ekaba 'eva Lovia namana dainai ekaba. Kanaua 'ounai kamauli 'o ekaba ita 'eva Lovia namana ena.

⁹ Kanania 'ounai Keliso eba mai emauli 'udai, ba mai mauli kauta eta Lovia namanai be'ao.

¹⁰ Beia oni dava 'ounai bo'akalamu va'evai one'eadivo? Dava 'ounai ovasi'avanala? Ita boutai 'eva Dilava vailanai ena valuva 'abunai ekalavadiyo.

¹¹ Puka kabukabunai ielelena vitaitana,

“Lovia namana ediaka;

Lau amauli dokadoka 'ounai,
kau boutai lau vaila'u ai bekuidula,
maivaka kau boutai nututai
be'ou dae Lau 'eva Dilava.”

Isa 45.23

¹² Kanaua 'ounai ita boutai ka ka sibota Dilava vailanai valita ekakava.

Bo'akalamui Sia Oibova'ekoa.

¹³ Kanaua 'ounai ita ka ka sibota va'evai sia ekane'eta divo. Maivaka bo'akalata si'avana laloanai ivasi'avanata 'o iva'ekota lalovaina sia ekalalovaia.

¹⁴ Lau Lovia namana Iesu laloanai aikabasia maivaka avamomo'aia Dilava vailanai aniani davata sia ka sibona evasi'avanala, beia kau ka elalovaia aniani davata ka esi'avana koanai iani kanaua 'eva ia sibona kevanai esi'avana.

¹⁵ Beia emu aniani davana 'ounai bo'akalamu nuana ovaananala koanai, oni 'eva sia lalo'au dalanai odada'a. Bo'akalamu kanaua dainai Keliso eba kauna emu iani boania davanai sia bovasi'avanala.

¹⁶ Kanaua 'ounai olalovaia koakoa oni kevamuai enama'ina davana 'eva bo'imala kave'i si'avana vaika asi'i dema'oua.

¹⁷ 'Olana Dilava ena lovia vanuana 'eva sia aniani mai inuina davana, beia komolo, nua'elu mai lalonama, kataua 'eva Idume Kabukabuna evuata easi.

¹⁸ Dala katania kau ka Keliso da'alana e'abi kauna 'eva Dilava ia elalonama venia mai kau vaka ia ena nama'ina devamomo'aia.

¹⁹ Kanaua 'ounai melala boutai mai kula'ilata nua'elu dalata ekakavu, maivaka ka ka ekavakula'ilata.

²⁰ Iani dainai Dilava ena vinaula sia bovasi'avanala. Iani boutai 'eva denama'ina, beia oni aniani davana ka oania dainai banomu si'avana laloanai bedododo koanai si'avana 'eva oni emuai.

²¹ Bo'akalamu nuana ivabavununa vinaulana sia bovavaia 'eva enama'ina, sisi kataua sia bo'ani 'o sia boinu ba.

²² Kanaua 'ounai lalovai katania emu abiveniai Dilava mai oni laluvana vilovamuai 'eva bo'ima kave'i. Kau ka dava ka sibona elalovaia ekomolo davana evavaia laloanai, vinaula kanaua dainai nuana sia bejavunu kauna 'eva nama'ina.

²³ Ia nuana mailalo to'ato'ana eaniani kauna 'eva Dilava ia mekau evenia, 'olana aniani kanaua lalonaia ia sia eabiveni 'ounai. Abiveniaia sia devavaita davata boutai 'eva desi'avana.

15

Sibota Sia Ekavalalonamata

Banota Ekaduluta.

¹ Ita abiveniaia kakula'ila kauta 'eva abiveniaia debadebade kauta eta mekau ekavuala. Ita sibota eta lalonama mo sia ekakavu.

² Ka ka kevata kauta ekavalalonamata sibota eta nama'ina 'ounai, kanaua betata'u eta abiveni bevakula'ilala.

³ 'Olana Keliso vaka sibona ena lalonama mo sia ekavuia. Puka Kabukabunai ilelena vitaitana ediaka,
"Vabo'obo'o luvata oni devabo'omu kauta lau vaka devabo'o'u."

Sal 69.9

⁴ 'Ana'inai delele davata 'eva ita ivamaleleta 'ounai deleleta, inoku Puka kabukabuna ekavakua 'eva ita vapasisi mai kula'ila bevenita beda'amo nuabata ekadavalia.

⁵ Lau ameamea vapasisi mai vakula'ila eveveni Dilavana betata'u Keliso Iesu mulinaia oi bodada'a koanaia nuamui bevaka'onamota.

⁶ Inoku boumuiaia mai nuamui ka'onamo maivaka luva ka'onamoai ita eta Lovia namana Iesu Keliso Kamana Dilava oi bovanama'inala.

Valina Nama'ina

Pulu Edea Kauta Kevatai.

⁷ Kanaua 'ounai Keliso eabimui dae vitaitanaia banomui oi boabita dae, koakoa kanaua'i Dilava ekavanama'inala.

⁸ Lau oi a'oumui, Dilava ena luva umauna 'ounai Keliso 'eva Iuda kauta eta da'ala iabina kaunai eao, 'ava'avata etai Dilava ena luva 'ana'i luvata ivamomo'aia daitai,

⁹ maivaka pulu edea kauta Dilava ena vilalo dainai bevanama'inala. Puka kabukabunai Davida eluva vitaitana ilelena,
"Kanaua 'ounai pulu edea kauta viloatai bavanama'inamu,
maivaka Oni vamu masina babia."

Sal 18.49

¹⁰ Mai Mose eluva ediaka,
"Pulu edea kaumui e,
Dilava ena kau ita oi bolalonama ka'ona."

Deu 32.43

¹¹ Maivaka Davida eluva ediaka,
"Pulu edea kaumui boumuiaia,
Lovia namana oi bovanama'inala.
Maivaka kau boumuiaia, ia masina oi bo'abi."

Sal 117.1

¹² Mai Isaia vaka ediaka,
"Iese 'ava'avanai kau ka bela'asi,
pulu edea kauta be'ola vaita.
Pulu edea kauta betata'u ia sibona benuabata venia dokadoka."

Isa 11.10

¹³ Lau ameamea, ula namana eveveni Dilavana betata'u emui abiveniaia lalonama mai nua'elu bounai ai bevavonumui. Inoku Idume Kabukabuna siavunai melala boutai emui nuabata 'eva be'itabu 'itabu.

Paulo Pulu Edea Kauta Eta Vinaula Kaunai Eao.

14 Bo'akala'u e, lau aikabasi dokadoka oi 'eva emui koakoa nama'ita doutamo, mai boumuiai 'eva abiveni dalana oi oikabasia kave'i 'ounai, sibomui ka ka oi bovaikabasimui 'eva bedaia.

15 Beia mai kula'ila'u malele kanania laloanai dava vaidā alele venimui 'eva oi ivalalovaimui une, kanania 'eva Dilava ena iulaveni koana eveni'u 'ounai.

16 Lau 'eva pulu edea kauta etai Keliso Iesu ena da'ala abi kau'u ai ao, bavinaula itani kabukabu kau'u Dilava ena vali nama'ina bailolo vaia, inoku Idume Kabukabuna ena vakabukabu siavunai pulu edea kauta 'eva veniveni davatai be'ao Dilava beabita dae.

17 Kanaua 'ounai Dilava ena vinaula avavaia 'eva a'apa Keliso Iesu laloanai.

18 Lau luva edeata edeata sia baluvavaita, beia luva ka'onamo baluvavaia, Keliso lau edulu'u pulu edea kauta kevatai bavinaula mai bavuata ba'asi Dilava kevana lelena beda'avaia davana mo bailolo vaia,

19 lau e'u vinaula kanaua laloanai Idume kabukabuna siavunai koa mai vatabulovo vinaulata siavuta dela'asi. Kanaua'i Ielusalemai ada'a kaiu ada'a mo Iluliko ai Keliso valina nama'ina 'abu itoinai ailolo vaia.

20 Melala bounai e'u lalovai namana 'eva kanania, Keliso vana sia deikabasia 'abutai vali nama'ina bailolo vaia. Kanaua 'eva kau ka ena kovolo evalavala kovolona akanai e'u luma asi'i amavalavaia 'ounai.

21 Puka kabukabunai ilelena vitaitana ediaka,
 "Valina sia de'ika kauta 'eva be'ika,
 maivaka lelena sia de'ika kauta 'eva beikabasia."

Isa 52.15

Paulo Elalovaia Beda'a Loma.

22 Vinaula kanaua eta'u melala doutamo e'alavu'u 'ounai, sia avasi kele'emui.

23 Beia vali'u 'abu kanania e'u vinaula 'ani avaoleta, maivaka vikau doutamo a'ula bavasi baikamui.

24 Kanaua 'ounai lau a'ula bakeini Sipenia bada'ala koanai baikamui, mai lalonama'u oi ita melala kikinamo eka mia, mulinai oi bodulu'u bada'a ua'i.

25 Beia lau vali'u Ielusalema ada'ala 'eva Dilava ena kau ua'i demimia kauta iduluta dainai.

26 'Olana Dilava ena lo'e kauta kataua Makedonia mai Akaia kanota ai sibota eta ulai ainama davata dedoubou Dilava ena kabukabu kauta Ielusalemai deulalu kauta eta.

27 Ia vinaula kanaua devavaia mai lalonamata. Ia kanaua devavai koma 'eva enama'ina. 'Olana Iuda kauta idumeta ena vanama'ina pulu edea kauta ita dekoleia 'ounai pulu edea kauta kauani ena vanama'ina davata vaidā Iuda kauta Keliso deabivenia kauta bevenita 'eva ekomolo.

28 Vinaula kanania bavaolea, moni devaboua monina sibo'u babia bada'a Ielusalema kauta bavenita mulinai, bavasi baikamui inoku bada'a Sipenia.

29 Lau aikabasi, bavasi kele'emui koanai Keliso ena vanama'ina itoinai bavasi vaia.

30 Bo'akala'u e, eta Lovia namana Iesu Keliso dainai maivaka lalo'au kanaua Idume kabukabuna evenita lalo'auna dainai anoimui, emui meamea ai ekavaka'onamo lau dai'uai Dilava eka noia.

31 Emui meamea ai Dilava oi bonoia Iudea laloanai Iesu Keliso sia deabivenia kauta imatai bevamauli'u, maivaka Dilava ena kau ua'i Ielusalemai demimia kauta e'u vinaula kanania beabia dae mai lalonamata.

32 Kanaua 'ounai Dilava ena ulai bavasi kele'emui mai lalonama'u, maivaka ita ekavakula'ila viveni.

33 Nua'elu eveveni Dilavana boumuiai kevamuiiai bemimia. Amen.

16

Paulo Ena Vanama'ina Luvata.

¹ Lau oi avaikabasimui lovuta Foibe bevavasi, ia 'eva Kenakelea vanua namana Dilava ena lo'e ena vinaula ateatena ka.

² Anoimui Lovia namana vanai oi boabia dae, vitaitana Dilava ena kabukabu kauta oi oabita dae boina, maivaka ena ula vinaulatai 'eva oi bodulua, 'olana ia eta'u kau doutamo eduluta, lau vaka edulu'u.

³ E'u vanama'ina Pilisikila mai Akula oi bovenita, ia 'eva lau ita Keliso Iesu ena vinaula lai avavaia kauta.

⁴ Laluana lau dai'uai eta maui sia delalovaia. Vanama'ina luvana avenita, sia laumo sibo'u, beia pulu edea kauta eta Dilava ena lo'e kauta boutai vaka vanama'ina luvana devenita.

⁵ E'u vanama'ina Dilava ena lo'e kauta ia laluana eta lumai dedodo'u kataua vaka oi bovenita. E'u vanama'ina e'u lalo'au kauna Epaineto oi bovenia, ia 'eva Asia laloanai kau lava'ana'ina ena maui eveni Keliso enai.

⁶ E'u vanama'ina Malia oi bovenia, ia 'eva oi daimuiiai vinaula namana evavaia.

⁷ E'u vanama'ina kadia'a'u Anadoloniko mai Iunia oi bovenita, ia laluana mai lau 'eva vabuto'o lumanai lai amia. Veauneke kauta ia laluana deikabasita kave'i, ia 'eva Keliso deabivenia makava vakaia muliai 'eva lau.

⁸ E'u vanama'ina Amapilia oi bovenia, Lovia namana laloanai alalo'au venia.

⁹ Maivaka e'u vanama'ina Ulebano oi bovenia, Keliso enai laluana lai avinaula ka'ona, e'u lalo'au kauna Sataku vaka e'u vanama'ina oi bovenia.

¹⁰ Maivaka e'u vanama'ina Apele oi bovenia, ia 'eva adedua depulu melalatai ena abiveniai Keliso enai elava 'ini.

E'u vanama'ina Alisotobulo ena luma kauta oi bovenita.

¹¹ E'u vanama'ina kadia'a'u 'Elodiona oi bovenia, e'u vanama'ina Nakiso ena luma kauta oi bovenita ia 'eva Lovia namana laloanai kauta.

¹² E'u vanama'ina Tulupena mai Tuluposa oi bovenita, ia 'eva Lovia namana dainai vinaula devavai kave'i 'a'ateta.

E'u vanama'ina e'u lalo'au ateatena Pelesi oi bovenia, ia 'eva Lovia namana ena vinaula nama vaikana evavaia.

¹³ E'u vanama'ina Lovia namana edilaia kauna Lufo mai sinana ita oi bovenita, ia sinana 'eva lau sina'u ai eao.

¹⁴ E'u vanama'ina Asunukilito, Pilekona, 'Eleme, Pataloba, 'Elema mai itana demia ka'ona kauta oi bovenita.

¹⁵ E'u vanama'ina Filoloko, Iulia, Nelea lovuna ita, Olumpa mai Dilava ena kabukabu kauta boutai ita demia ka'ona kauta vaka oi bovenita.

¹⁶ Ka ka sibomui viba'u kabukabunai oi bovanama'inamui.

Keliso ena lo'e kauta boutai eta vanama'ina desisini emuiiai.

Valalovai 'Ini Luvana

To'ona Evenita.

¹⁷ Bo'akala'u e, avasiasimui, koa kole maivaka emui abiveni devasi'avana kauta mai ikabasi oi oabia ikabasina devaiivivia kauta oi boika'inita, maivaka kevatai oi boda'a tau.

¹⁸ 'Olana kau kataua boita kauta 'eva Keliso ita eta Lovia namana ena vinaula sia devavaia, ia sibota eta ula vinaulata devavai, eta luva nama'ita maivaka dede luvatai kau kataua si'avana enai sia mai eta ikabasi kauta delebata.

¹⁹ Oi vali nama'ina 'olana oi o'aku 'eva kau boutai valina 'ani deika, kanaua 'ounai lau 'eva oi alalona venimui. Lau a'ula oi 'eva dava nama'ita kevatai oi boaneke, beia dava si'avata vaika ivavaita sia oi bolalovaia.

²⁰ Nua'elu Dilavana 'ani kevaimo aemui palapalata venutai Satani bemoia mudumudu. Lau ameamea, ita eta Lovia namana Iesu ena iulaveni koana akamuiaia bemimia.

Abiveni Kauta Vaida

Eta Vanama'ina Luvata.

²¹ Timoteo, lai laluaana lai avinaula ka'ona kauna mai kadia'a'u Luka, Iasona, Sosipatolo eta vanama'ina kele'emui ai desisini.

²² Lau, Teletio, Paulo eluva luvata malele kanania'i aleleta kau'u vaka Lovia namana vanai avanama'inaemui.

²³ Kaio kevanai amimia, nia'i ena lumai Dilava ena lo'e kaumai lai adodo'u 'eva edulumai mai lalonamamai lai amimia, ena vanama'ina esinia kele'emui, vanua namana monina e'imala kauna Elasuto mai bo'akalata Koato laluaana eta vanama'ina vaka desisini kele'emui.

²⁴ Lau ameamea, eta Lovia namana Iesu Keliso ena iulaveni koana 'eva boumuiaia akamuiaia bemimia. Amen.

Dilava Ekavanama'inala.

²⁵ Dilava ekavanama'inala, ia 'eva mai kula'ilana emui abiveniaia bevalava 'inimui, Iesu Keliso valina nama'ina ailolo vaia davana dalanaia, mai luva umauna vuniana 'ana'inai melala dau'a vaika devunia davana evala'asia dalanaia.

²⁶ Beia vali'u luva umauna kanaua 'eva mia keinikeini Dilavana ena luvai enolea kauta eta lelelele laloanaia ela'asi, kau boutai luva umauna kanaua devaikabasita, kanaua 'ounai kanobata boutai Dilava beabivenia maivaka lлена beda'avaia.

²⁷ Iesu Keliso dainai aoneka Dilavana sibo sibonamo ekavanama'inala ia nuavina bemia keinikeini! Amen.

Paulo Ena Malele Lava'ana'ina KOLINTO (1) Kauta Kevatai

Puka Laloana Ilena Luvana

Paulo ena melalai, Kolinto 'eva vanua namana Akaia kanona laloanai Elene 'abuna. Paulo sibona 'eva kau lava'ana'ina Iesu valina nama'ina Kolintoai eiloloa, beia eda'aovo ede'a 'abu vaida ena vinaula bevavaia laloanai abiveni kauta vilootai adedua namata vaida depulu.

Kanaua 'ounai malele kanania eleleia, kevatai beluvavaia kave'i mai eta adedua vaka bevakomolota. Ena makau namana 'eva eta abiveni asi'i ema'ekoasi 'ounai, maivaka eta koako mediata vaka si'avata vaikai asi'i demaao. Dala nama'ina kanaua dekamoane kauta bemauli vaia eluvavaia kave'i, maivaka kanaua 'eva dava namana inoku bevavaia 'eva enama'ina. Mai Paulo ediaka, adedua kania kau kevatai depupulu 'olana Idume Kabukabuna eta mauili be'ana'ia vaita 'eva sia de'ula 'ounai. Paulo ediaka, dala nama'inanai eka mia maivaka Idume Kabukabuna ena vidulu abiveni kauta kevatai davata lovata eaku. Ba kauta kataua eta ko'isi 'udai lovata eako. Kania boutai 'eva Kolinto kauta eta adedua davata. Paulo eta'u luva nama'ita doutamo evenita Dilava ena ula kanaua beikabasia.

Puka kanania elena 13 laloanai 'eva Paulo eta'u dalana nama'ina kanaua kau ilalo'auvenita lovana eakuia, kanaua 'eva Idume Kabukabuna ena veniveni davana nama'ina eveni davata boutai akatai, inoku Dilava sibona etata'u ena kau evenita.

Puka Iduvuna Namata

- a. Lova aku. (1.1 - 9)
- b. Koa oleta Dilava ena lo'e laloanai. (1.10 – 4.21)
- c. Kulakula koakoata si'avata vaika mai luma mauina. (5.1 – 7.40)
- d. Abiveni kauta mai si'avana kauta. (8.1 – 11.1)
- e. Lo'e mauina mai kukudivo dalana. (11.2 – 14.40)
- f. Keliso mai abiveni kauta eta ko'isi 'udai. (15.1 - 58)
- g. Abiveni kauta eta vidulu Iudea eta. (16.1 - 4)
- h. Paulo ena ula luvana mai luva to'ota. (16.5 - 24)

Vanama'ina Luvana.

¹ Lau Paulo, Keliso Iesu ena veauneke kau'u Dilava ena ulai e'ae'u, mai abiveniai bo'akalata Sosotene ita,

² malele kanania lai alelea evavasi Dilava ena lo'e kaumui Kolinto vanuanai kevamui, oi Keliso Iesu enai edilamui mai e'aemui Dilava ena kabukabu kaumui oi bo'ao, mai 'abu boutai eta Lovia namana Iesu Keliso vana de'aea mai dekukudivo venia kauta kataua boutai kevatai. Iesu Keliso 'eva ia mai ita eta Lovia namana.

³ Lai ameamea Dilava ita Kamata mai Lovia namana Iesu Keliso eta iulaveni mai nua'elu bevenimui.

Paulo Vanama'ina Luvana

Dilava Evenia.

⁴ Lau melala boutai Dilava avanama'inala oi daimui 'olana Keliso Iesu laloanai Dilava ena iulaveni evenimui.

⁵ 'Olana Keliso laloanai oi 'eva dala boutai laloatai, emui luvaluva boutai mai emui ikabasi boutai 'ani evaloviata.

⁶ Keliso valina lai akavala valina nuamui 'ani ekula'ila.

⁷ Kanaua 'ounai vali'u oi 'eva Idume Kabukabuna ena ainama sia kai oi otabu beia ovi'ima beda'amo eta Lovia namana Iesu Keliso bemue 'udai.

⁸ Iesu betata'u bevalava 'inimui beda'amo to'onai, inoku ia ena asi melalanai oi 'eva va'eva sia bevakoamui.

⁹ Dilava 'eva lele ivavua venina kauna, ia eta'u oi e'aemui oi boda'a Nakuna Iesu Keliso ita eta Lovia namana ita oi bovaka'onamo.

Dilava Ena Lo'e Kauta Viloata Edau'a.

¹⁰ Bo'akala'u e, eta Lovia namana Iesu Keliso vanai anoimui, boumuiai emui luvaluva beka'onamo inoku viloamui sia be'alama, beia oi bo-vaka'onamo kave'i nuamui mai vaka emui lalovailalovai.

¹¹ Bo'akala'u e, Koloe ena luma kauta vaida de'ou'u oi viloamui 'eva viala depupulu.

¹² Lau a'oua davana anina kanania, ka oluluva odiaka, "Lau 'eva Paulo ena," ka oluluva odiaka, "Lau 'eva Apolo ena," ka oluluva odiaka, "Lau 'eva Petelo ena," ka oluluva odiaka "Lau 'eva Keliso ena."

¹³ Inoku Keliso 'eva dekovia, una? Paulo oi daimui au ido'o valaukuna akanai deaku bala, una? 'O Paulo vanai oi vaidi'u kabukabu oi oabia, una?

¹⁴ Dilava avanama'inala 'olana lau oi sia ka avaidi'umui kabukabu, beia Kilisupo mai Kaio mo avaidi'uta kabukabu.

¹⁵ Kanaua 'ounai sia kau ka bodiaka oni 'eva lau va'uai oidi'u kabukabu.

¹⁶ 'O momo'ai, Setefano mai ena luma kauta vaka avaidi'uta kabukabu, beia mulinai sia aikabasi kau ka avaidi'ua kabukabu 'o asi'i.

¹⁷ Keliso esini'u 'eva sia vaidi'u kabukabu 'ounai beia vali nama'ina bailolo vaia, inoku kau ena aoneka luvanai sia bailolo, 'olana Keliso ena ba au ido'o valaukuna akanai siavuna asi'i emaole makauna.

Keliso 'Eva Dilava Ena Siavu Mai Ena Aoneka.

¹⁸ Keliso au ido'o valaukuna akanai ena ba valina idumeai deba kauta kevatai 'eva bo'o luvanai eao, beia kanaua 'eva Dilava ena siavu ita evamaulita kauta etai.

¹⁹ Puka kabukabunai 'ani ilelena, "Aoneka kauta eta aoneka bavaolea, mai idiba kauta eta idiba 'eva dava asi'iai bavaaoa."

Isa 29:14

²⁰ Inoku aoneka kauna 'eva a'ia'i? Malele kave'i kauna 'eva a'ia'i? Melala kanania'i luva eidibavaia kauna 'eva a'ia'i? Dilava eta'u kanobata kauta eta idiba 'eva bo'oai evaao.

²¹ Inoku Dilava ena aoneka 'eva kanania boina, kanobata kauta eta aoneka ai 'eva Dilava sia beikabasia, beia Dilava ena lalonama 'eva ilolo luvana bo'o luvanai devaaoa kanaua beabivenia kauta 'eva bevamaulita.

²² Iuda kauta eta ula 'eva koa namata be'ika inoku Dilava bevamomo'aia, mai 'Elene kauta 'eva aoneka dekavuia.

²³ Beia lai 'eva Keliso au ido'o valaukuna akanai eba valina lai ailolo vaia, kanaua 'eva Iuda kauta evakuaku leata mai pulu edea kauta kevatai 'eva bo'o lalovainai devaao.

²⁴ Beia Iuda kauta 'o sia Iuda kauta viloatai Dilava e'aeta kauta kataua etai Keliso 'eva Dilava ena siavu mai Dilava ena aoneka.

²⁵ Dilava ena lalovai kanaua bo'oai devaaoa lalovaina eta'u kau eta aoneka ekeinia, maivaka Dilava kevanai badebade davanai devaaoa davana eta'u kau ena kula'ila ekeinia.

²⁶ Bo'akala'u e, oi kau a boimui ai Dilava e'aemui kanaua bolalovaia, kau eta ikaikai 'eva dounamo sia oi oaoneka, dounamo sia oi okula'ila, maivaka dounamo loviai sia oi opulu.

²⁷ Beia Dilava eta'u kanobata kauta oi bo'o kaumui ai devaaomui kaumui edilamui aoneka kauta bevamalalaita, mai oi badebade kaumui ai devaaomui kaumui edilamui kula'ila kauta bevamalalaita.

²⁸ Dilava eta'u kanobata kauta kau kataua deikata 'iu'iu, sia devakuta mai kevata dava asi'i ai devaota kauta edilata, kau kataua kanobata kauta kau namatai devaota kauta bevasi'avanata.

²⁹ Kanaua 'ounai kau ka Dilava vailanai be'apa 'abuna asi'i.

³⁰ Beia oi 'eva Dilava evuamui easi Keliso Iesu ita evaka'onanomui. Keliso 'eva Dilava enai easi eta aonekai eao, inoku ia kaunai 'eva kakomolo, kakabukabu mai si'avana 'abunai evamaulita.

³¹ Kanaua 'ounai Puka kabukabunai 'ani ilelena, "E'apa kauna 'eva Lovia namana emapavaia."

Iel 9.24

2

Paulo Keliso Au Ido'o Valaukunai Eba Lovana Eakuia.

¹ Bo'akala'u e, lau avasi kele'emui Dilava ena luva vuniata ailolo vaita koanai, idiba luvatai mai kau eta aoneka ai sia ailolo.

² 'Olana oi ita kamia laloanai lau nua'u avavaia kave'i sia dava ka baikabasia beia Iesu Keliso mai ena ba au ido'o valaukuna ai davana mo baikabasia.

³ Lau avasi na'i kamia laloanai maibadebade'u mai maimakau'u mai mai'ululu 'ululu'u.

⁴ E'u luva mai e'u ilolo 'eva sia kau ena aonekai mai vasiasi luvatai, beia Idume Kabukabuna ena siavu ai aluvaluva mai ailolo.

⁵ 'Olana oi emui abiveni 'eva kau eta aonekai sia belava 'au, beia Dilava ena siavu ai belava 'au.

Dilava Ena Aoneka.

⁶ Beia abiveniai dekula'ila kauta kevatai 'eva aoneka luvata lai ailolo vaita. Aonekana kanaua 'eva sia kanobata kanania ena 'o kanobata de'ola vaia kauta eta, 'ola kauta katanai 'eva eta siavu be'ole.

⁷ Beia lai 'eva Dilava ena aoneka kau kevatai evuni aonekana kanaua lai a'oua, inoku kanobata asido'o epulu laloanai Dilava 'eva aoneka kanaua 'ani eva'oua ita eta nuaviai be'ao.

⁸ Aoneka kanaua 'eva kanobata de'ola vaia kauta sia deikabasia, be- maikabasia koanai Dilava ena nuaviai emimia Loviana namana au ido'o valaukuna akanai sia bemaaku bala.

⁹ Puka kabukabunai ilelena boina, "Bepupulu davana kanaua Sia kau ka eikaia, 'o 'uluna sia eika, 'o sia kau ka elalovaia Dilava 'ani eva'oua ia delalo 'au venia kauta kataua eta."

Isa 64.4

¹⁰ Beia Dilava 'eva Idumena Kabukabunai dava vuniana kanaua ita kevatai evala'asia. Idume Kabukabuna 'eva dava boutai ekakavu 'ounai Dilava ena lalovai vuniata vaka bevaikata.

¹¹ Kau ka kau edeana ka ena lalovai sia eikabasia, ia sibona idumena etata'u ena lalovai boutai eikabasita. Vitaitana Dilava Idumena 'eva Dilava ena lalovai boutai eikabasita.

¹² Ita 'eva kanobata idumena ena lalovai sia kabita, beia Idume Kabukabuna Dilava enai easi Idumena kanaua kabia, kanaua 'ounai Dilava ena vilalo koana evenita davata boutai ekaikabasita.

¹³ Lai a'oulai luvata katania 'eva sia kau ena aoneka ai devaikabasimai luvata lai aluva vai, beia luva kataua 'eva Idume Kabukabuna evaikabasimai luvata lai aluva vai. Kau davata idumeta Idume Kabukabuna deabia kauta kevatai lai aluva vaita.

¹⁴ Kau nuanai Idume Kabukabuna asi'i kauna Dilava Idumena Kabukabuna enai de'asi davata boutai sia eabita dae, dava kataua ia kevanai 'eva bo'o davatai evaota, maivaka ovota sia e'ovo, 'olana kataua 'eva Idumeai mo ekaikabasita.

¹⁵ Kau nuanai Idume Kabukabuna emimia kauna 'eva dava boutai anita beikabasi, beia kau ka nuanai Idume Kabukabuna asi'i kauna 'eva kau kanaua nuanai Idume Kabukabuna emimia kauna ena mauili ovona sia be'ovo.

¹⁶ Puka kabukabunai ilelena boina,

“Dai Lovia namana ena lalovai eikabasi koanai ia betata'u Lovia namana vaidiba bevenia?”

Isa 40.13

Beia ita 'eva Keliso ena lalovai 'ani kabia.

3

Va'alama Dilava Ena Lo'e Laloanai.

¹ Bo'akala'u e, kau Idume Kabukabunai devonu kauta kataua kevatai aluva boina 'eva oi kevamui'ai sia baluva vai, beia oi 'eva kanobata kanania kaumui boinai a'oumui, itani melo 'oma'omana Keliso laloanai boina.

² Oi vaikabasi avenimui 'eva vitaitana bae boina kanaua'i avanimui beia sia bokama pasisitai, 'olana oi 'eva bokama kanaua ianinai asido'o oi okula'ila, vali'u vaka oi boania 'eva sia bedaia.

³ 'Olana oi kaumui 'eva kanobata kauta eta mia ai oi omimia do'o, oi viloa-mui'ai mama mai viala demimia, inoku koakoa katania'i oi 'eva kanobata enai oi o'ao, ena mia vitaitanai oi omimia.

⁴ Oi viloa-mui'ai ka odiaka, “Lau 'eva Paulo mulinai adada'a,” ka oluluva odiaka “Lau 'eva Apolo mulinai adada'a.” Inoku oi 'eva kanobata kauta eta koakoa oi ovavai.

⁵ Inoku Apolo 'eva dai, mai Paulo vaka dai? Lai 'eva Dilava da'alana lai a'abi kaumai, lai emai vinalai 'eva oi ota'u Dilava oi oabivenia, lai ka ka 'eva Lovia namana vinala evenimai vinalana mo lai avavaia.

⁶ Lau 'eva kea avadoia, Apolo 'eva veiai esisia, beia Dilava eta'u kea evakubua.

⁷ Inoku vadovado kauna mai sisisisi kauna 'eva sia ekaabitaisi, beia Dilava mo ekabia isi 'olana ia etata'u dava kataua evakubuta.

⁸ Vadovado kauna mai sisisisi kauna eta vinala 'eva sia dedeana, Dilava betata'u ka ka eta vinala vitaitanai tavata bevenita.

⁹ Lai lalua 'eva Dilava ena vinala kaumai, oi 'eva Dilava ena loba maivaka ena luma.

¹⁰ Dilava ainama eveni'u vitaitanai lau 'eva luma ivalava kave'ina kaunai ao luma ivalavana abuna 'ani ava'olua, inoku kau vaidi 'eva kanaua akanai luma dedaua, beia luma bedaia 'eva a bedaia koma lalovaina belalovaia kave'i makava.

¹¹ 'Olana Dilava 'ani Iesu Keliso evalavala luma kanaua idauna abunai eao, kanaua 'ounai kau ka luma edeana idauna abuna sia ka bevalavala.

¹² Luma idauna abuna akanai 'eva kau vaid a kolo, siliva 'o bika'a 'amale 'amaletai luma dedaui, beia vaid a 'eva au ai 'o duvu ai 'o ako ai luma dedaui.

¹³ Beia kau ka ka eta vinaula koata 'eva lavuai melalana kanaua betata'u bevala'asita, melala kanaua 'eva mai 'alovana be'asi kau boutai eta vinaula beduita mai 'alovai bekovota kau ka ka eta vinaula nama'ita davata bevala'asi.

¹⁴ Luma idauna 'abuna kanaua akanai kau ka ka dava devavai davata 'alovai sia beani palu koanai ia eta vinaula 'eva tavata be'abi.

¹⁵ Beia kau ka ena vinaula kanaua 'alovai bevalo'olo'oa koanai ia 'eva betatabu, beia ia sibona 'eva bemauli vitaitana ia 'eva 'alova laloanai eveau asi.

¹⁶ Oi oikabasi oi 'eva Dilava ena lo'e kabukabuna maivaka Dilava Idumena 'eva oi nuamui ai emimia.

¹⁷ Kau ka Dilava ena lo'e kabukabuna bevasi'avanala koanai Dilava betata'u kau kanaua bevasi'avanala, 'olana Dilava ena lo'e kabukabuna 'eva ekabukabu inoku oi kaumui katana 'eva lo'e kabukabuna kanaua.

¹⁸ Sibomui sia olebamui. Viloamui ai kau ka elalovaia ia 'eva eidiba vaika kanobata kanania maulina laloanai koanai, ia 'eva sibona bo'o kaunai beva'oa, vakaia ia 'eva idiba kauna umaunai be'ao.

¹⁹ 'Olana kanobata kanania aonekana 'eva Dilava vailanai bo'o aonekana. Puka kabukabunai kanania deleleia koma, "Dilava eta'u sibota delalovaia deaoneka kauta eta aoneka evaviuta."

Iob 5.13

²⁰ Mai vaka ediaka, "Lovia namana 'eva eikabasi aoneka kauta eta lalovai 'eva anita asi'."

Sal 94.11

²¹ Kanaua 'ounai kau ka sia eka apa vaia. Dava boutai 'eva oi emui.

²² Paulo 'o Apolo 'o Petelo, mai kanobata kanania 'o mau li 'o ba, mai vali'u depupulu davata 'o vailai bepupulu davata, boutai 'eva oi emui,

²³ inoku oi 'eva Keliso nuanai oi omimia, Keliso 'eva Dilava nuanai emimia.

4

Keliso Ena Veauneke Kauta.

¹ Kanaua 'ounai kau 'eva lai Keliso ena vinaula kaumai mai Dilava ena lalovai luvata vuniata i'imata kaumai ai beva'omai.

² Vinaula kanaua boina i'imana kauna 'eva 'ola kauna ia bevamomo'aia ena vinaula bevavai kave'i mai nuana bounai.

³ Beia vali'u oi 'o kau ka lavuai 'abunai bemane'eu 'eva sia alalovaia namana, maivaka lau sibo'u vaka lavuai 'abunai sia ane'e'u.

⁴ Lau sibo'u va'evai sia ane'e'u divo, beia koako kanaua 'eva lau sia evakomolo'u, Lovia namana mo sibona lau belavuai'u.

⁵ Kanaua 'ounai lavuai melalana asido'o e'asi laloanai sia kau ka lavuai ai oi bone'ea divo oi bovi'ima beda'amo Lovia namana be'asi, inoku ia betata'u vabuto'oai devuni davata kataua 'ailalai bevala'asita, maivaka kau nuatai devunita davata bevala'asita. Inoku melala kanaua'i kau ka ka Dilava kevanai vanama'ina luvana beabia.

⁶ Bo'akala'u e, oi daimui ai lau mai Apolo ita ivavitaitamai ai luva katanania a'oulai, 'olana lai kevanai ai "Puka kabukabunai deleleia luvana akanai sia oi bokeini" luvana anina oi boikabasia kave'i, sia kau ka oi boapavaia mai sia kau ka oi bovasi'avanala.

⁷ Dai eta'u vaida viloatai oi evanamamui? Maivaka dava kanana oi oabia davana Dilava sia evenimui davana ka, una? Dava kanaua oi oabia davana Dilava evenimui koanai dava 'ounai oi o'apa?

⁸ Oi olalovaia oi oula veni davata boutai 'ani oi oabi? Oi olalovaia oi kaumui kevamui ai dava 'ani doutamo? Oi olalovaia oi 'eva 'ani lovia kaumui ai oi oao beia lai 'eva asi'i? Lau alalovaia oi bomalovia umauna 'eva bemanama'ina, inoku lai oi ita kamalovia ka'ona.

⁹ Beia lau alalovaia Dilava eta'u ena veauneke kaumai 'eva muli umaunai ene'ema divo, vitaitana si'avana kauta kataua kau mato vailatai beaku bata. Lai 'eva vaika vaika davatai lai ba'ao kanobata itoina laloanai kau mai anelu boutai bealulumai.

¹⁰ Oi olalovaia Keliso dainai lai 'eva bo'o kaumai ai lai a'ao, beia oi 'eva Keliso laloanai oi oaoneka. Oi olalovaia lai 'eva abadebade, beia oi 'eva okula'ila, oi 'eva 'olamui de'aku, beia lai 'eva 'olamai sia de'aku.

¹¹ Melala boutai laloatai lai 'eva vikolo deakumai, 'atomai delada, emai tubu'a asi'i, deakumai, emai mia 'abuta asi'i lai alu 'avaea alu 'avaea easi mo vali'u.

¹² Lai 'eva sibomai kula'ilamai umaunai lai amimia. Kau desivada venimai koanai lai avanama'inata, devaivivimai koanai lai avapasisi,

¹³ vamai deabi si'ata koanai lai 'eva ia lai aluva venita kave'i. Lai 'eva vitaitana kanobata ito'au ito'auna davata mai dava boutai lu'ulu'uta ai devaomai easi mo vali'u.

¹⁴ Lau luva kania aleleta 'eva sia oi bavamalalaimui 'ounai, beia oi e'u lalo'au melomui 'ounai avaidibamui oi bolalovai 'inia sia oi bo'apa.

¹⁵ Kevamui ai ivaikabasimui kauta bemaoutamo vaika Keliso laloanai, beia kamamui 'eva sia douta. Beia vali nama'ina ailolo vaia maui oi oabia 'ounai lau 'eva kamamui ai ao Keliso Iesu laloanai.

¹⁶ Kanaua 'ounai anoimui, lau e'u koakoa vitaitata oi bovavai.

¹⁷ Kanania 'ounai Timoteo asinia evavasi kevamui, ia 'eva lau e'u lalo'au melona mai ena abiveni Lovia namana enai. Ia betata'u e'u maui dalana Keliso Iesu laloanai amia vaia maolina kanaua 'abu bounai ada'aia Dilava ena lo'e laloatai avaikabasi vaikabasita oi bevalalovai 'inimui.

¹⁸ Viloamui vaida 'eva de'apa 'olana delalovaia lau sia bamue 'udai kele'emui.

¹⁹ Beia Lovia namana be'ula koanai, lau 'eva 'ani bavasi kele'emui, inoku lau sibo'u de'apa kauta kataua eta siavu davai dava bevavai siavuta baikabasi, beia dava dava de'oulai davata lovata sia ba'aku.

²⁰ 'Olana Dilava ena lovia vanuana maolina 'eva sia luvaluva 'avaeatai, beia mai siavuna emimia.

²¹ Oi dava oi oulaveni? Ima'u mai auna bavasi bavakomolomui, 'o lalo'au mai manau koakoanai bavasi kele'emui?

5

Kulakula Koana Dilava Ena Lo'e Kauta Viloatai Epulu.

¹ Vali'u emui koakoa 'eva valina 'ani aika oi viloamui kulakula koana epupulu kau ka kamana adana ivaluana ita denoka'ona, inoku koakoa kanaua 'eva koakoa si'avana vaika mulimuli kauta vaka kanaua sia devavai koma.

² Beia oi 'eva oi o'apa mo, ia sia oi okakani, kau ka viloamui kanaua evavai koma kauna ivala'asina lovana oi bomaaku 'eva bemanama'ina.

³ Lau oi viloamui asi'i, beia idumeai lalovai lalovai lau 'eva oi keva-mui, inoku koakoa kanaua evavaia kauna 'eva mekau avenia vitaitana itani lau 'eva na'i kevamui boina.

⁴ Eta Lovia namana Iesu vanai oi bododo'u koanai lau vaka idumeai 'eva na'i oi ita, inoku eta Lovia namana Iesu ena siavu bevala'asia ita kevatai,

⁵ inoku kau kanaua 'eva Satani ekavenia, ia kauanina si'avana vaika kanaua 'eva bevasi'avanala inoku idumena 'eva bemaui Lovia namana ena asi melalanai.

⁶ Oi o'apa 'eva sia ekomolo, oi 'ani oikabasi vakubu mulamulana kava'inamo betata'u palaoa itoina bevakubua vitaitana si'avana kikina betata'u mauili itoina bevasi'avanala.

⁷ Oi vakubu mulamulana 'ana'ina itani si'avana boina kanaua oi boitoa'au koanai oi 'eva palaoa makamakana laloanai sia mai vakubu mulamulana palaoana ai oi bo'ao. 'Olana Keliso ita eta La'aukeini naduna mamoenia eta si'avana iabita ovo daitai deaku bala, kanaua 'ounai oi 'eva nuamui ai sia vakubu mulamulana kaumuiai oi oao.

⁸ Kanaua 'ounai ita eta La'aukeini naduna ekavavaia palaoana laloanai 'eva sia mai vakubu mulamulana, 'olana vakubu mulamulana 'ana'ina 'eva si'avana mai koakoa si'avata vaika evenita, beia palaoa kanaua laloanai vakubu mulamulana asi'i 'eva lalovai komolo mai luva umauna palaoana.

⁹ E'u malele kanaua aleleia malelena laloanai 'ani a'oumui, kulakula kauta ita sia oi bovaka'onamo.

¹⁰ Lau sia adiaka kanobata kauta katania dekulakula, deidono, devinao, mai dilava dedeta dekukudivo venita kauta ita sia oi bovaka'onamo. Kevatai oi bopode koanai oi 'eva kanobata kanania oi hovikania oi bobaba.

¹¹ Lau oi alele venimui adiaka, oi viloumuiai kau ka sibona ediaka, ia 'eva abiveni kauna beia ekulakula, eidono, dilava dedeta ekukudivo venita, eluva si'asi'a, einu ba, mai evinao, kau kanaua boina kauna ita sia oi boaniani ka'ona kovo.

¹² Mulimuliai demimia kauta sia bavaluvata 'olana kanaua 'eva sia lau e'u vinaula. Beia oi emui vinaula 'eva Dilava ena lo'e laloanai demimia kauta oi bovaluvata.

¹³ Dilava betata'u mulimuliai demimia kauta bevaluvata. Puka kabuk-abunai eluva ediaka, "Si'avana kauna 'eva viloumuiai oi bovala'asia."

6

Banota Sia Ekavaluvata Mulimuli Kauta Vailatai.

¹ Oi abiveni kaumui viloumuiai kau ka bo'akalana ita deadedua koanai, dava 'ounai evuala edada'a mulimuli kauta vailatai devaluvata? Ia dava 'ounai sia evuala edada'a abiveni kauta kevatai devakomolota?

² Oi 'ani oikabasi Dilava ena kau 'eva kanobata kauta bevaluvata, inoku oi kanobata kauta oi bovaluvata kaumui dava 'ounai adedua kikita vaida viloumuiai 'eva sia oi ovakomolota?

³ Oi 'ani oikabasi vailai ita 'eva anelu ekavaluvata. Kanaua 'ounai luva umauna mauili kanania davata ekavakomolota 'eva bedaia.

⁴ Adedua kataua boita kevamuiai depupulu koanai dava 'ounai oi ovuata odada'a valuva kauta Dilava ena lo'ei vata asi'i kataua kele'eta?

⁵ Lau kanania aluva koma 'olana 'eva oi malalai koakoata oi ovavai, na'i oi viloumuiai aoneka kauna ka emimia koanai, ia bemata'u abiveni kauta katana bemavakomolota.

⁶ Beia abiveni kauna ka etata'u banona evaivivia inoku evuala edada'a lavuai 'abuna, oi 'eva mulimuli kauta vailatai kanaua oi ovavai koma.

⁷ Kanaua 'ounai oi abiveni kaumui viloumuiai adedua kanaua boina oi ovavaia koanai boumuiai 'ani oi o'eko. Luvana asi'i, devava'evamui 'o delebamui beia oi bomavapasisi 'eva bemanama'ina.

⁸ Beia bo'akalamui kevatai oi ova'eva, oi olebata, mai oi ovavai si'asi'a 'eva sia enama'ina.

⁹ Oi 'ani oikabasi si'avana kauta 'eva Dilava ena lovia vanuanai sia bedododo. Ia asi'i demalebamui, kulakula kauta kataua, dilava dedeta dekuku divo venita kauta, kau adata dekulata kauta, mai momoluane lua dekulakula, 'a'ate lua dekulakula 'a'ateta,

¹⁰ vinoa kauta, idono kauta, inu ba kauta, luva si'asi'a kauta, abi'avaea kauta, kataua boutai 'eva sia ka Dilava ena lovia vanuanai bedodo kovo.

¹¹ Oi vaida vaka 'ana'inai kanaua boimui, beia vali'u 'eva Lovia namana Iesu Keliso vanai mai eta Dilava Idumenai emui si'avana 'ani edeinita ovo, 'ani evakabukabumui, maivaka 'ani komolo evenimui.

Kauanimui 'Eva Dilava Ivanuavina Vinaulana Oi Bovavaia.

¹² Kau ka beluluva bediaka, "Lau dava boutai bavavai 'eva bedaia," luva umauna, beia boutai 'eva sia denama'ina kevamuiai. "Dava boutai bavavai 'eva bedaia," beia kataua ka 'eva lau e'u mauli sia be'ola vaia.

¹³ Bokama 'eva bo'a ena, mai bo'a 'eva bokama beabia. Kanaua 'eva luva umauna, beia Dilava betata'u luana bevaoleta. Kauanita 'eva kulakula davanai sia be'ao, 'olana kauanita 'eva Lovia namana ena, mai Lovia namana 'eva kauanita be'imala kauna.

¹⁴ Dilava eta'u ena siavuai Lovia namana Iesu bai evako'isia 'udai, vitaitani ita vaka siavu kanaua'i bevako'isita.

¹⁵ Luva umauna oi oikabasia oi ka ka kauanimui 'eva Keliso kauanina le'eta oi ovaka'onamo kauani ka'onamoai oi o'ao. Inoku lau sia batata'u Keliso kauanina le'ena ka babia bada'a kulakula ateatena ita bavaka'onamo. Asi'i vaika.

¹⁶ Oi oikabasi kau ka kulakula ateatena ita devaka'onamo 'eva lalua kauani ka'onamo, 'olana Puka kabukabuna laloanai kanania deleleia koma, "Lua devaka'onamo 'eva kauani ka'onamo."

¹⁷ Beia kau ka Lovia namana ita devaka'onamo kauna 'eva lalua idumeai deka'onamo.

¹⁸ Kulakula kevanai oi boda'a tau, 'olana kau ka si'avana edeata edeata boutai evavai 'eva ia sibona kauanina sia evasi'avanala, beia kulakulai 'eva sibona kauanina evasi'avanala.

¹⁹ Oi 'ani oikabasi kauanimui 'eva Idume Kabukabuna ena lo'e kabukabuna, ia 'eva oi laloamui emimia, Dilava eta'u Idume Kabukabuna evenimui. Kanaua 'ounai oi sibomui sia oi bo'ola vaimui.

²⁰ 'Olana Dilava 'eva 'ani tava namanai etavamui. Kanaua 'ounai kauanimui oi bovavai davata boutai laloatai 'eva Dilava nuavina oi bovala'asia.

7

Kamoane Luvaluvana.

¹ Vali'u dava kataua emui maleleai oi olavuai lavuai vai lavuaita tavata avamueta. Kau sia bemakamoane 'eva bemanama'ina.

² Beia kulakula 'avaea edounamo vaika 'ounai kau 'eva sibona adana umauna kevanai bemimia, maivaka ateate 'eva sibona adana umauna kevanai bemimia.

³ Kau betata'u adana ia kevanai ena kamoane koana bevavaia, vitaitana mo ateate vaka betata'u ia adana kevanai ena kamoane koana bevavaia.

⁴ Ateate 'eva sibona kauanina sia be'ola vaia beia adana betata'u be'ola vaia, vitaitana mo kau sibona kauanina sia be'ola vaia, beia adana betata'u be'ola vaia.

⁵ Adamui kevatai kauanimui sia oi bo'oua kao beia laluaana nuamui bovaka'onamo oi bomia 'avaea melala kava'ina mo, kauanimui bekabukabu meamea dainai, inoku mulinai oi bovaka'onamo 'udai, inoku Satani 'abuna sia oi bokolea asi'i emakovomui, 'olana kauanimui oi bo'imala eva sia bedaia 'ounai.

⁶ Lau luva kanania aluvala kevamui 'eva sia talavatu luvana ia vidulu luvana.

⁷ Lau e'u ula kau boutai 'eva lau vitaita'uai bemaio sia bemakamoane. Beia Dilava 'eva veniveni ka ka evenita, ka 'eva ena veniveni kanania evenia 'eva sia bekamoane, ka 'eva ena veniveni kanaua evenia 'eva bekamoane.

⁸ Vali'u 'eva kau sia dekamooane kauta kataua mai 'a'ateta, obu mai toae a'outa. Sia bekamoane bemia 'avaea lau boi'u 'eva enama'ina.

⁹ Beia ia sibota kauanita be'imata kave'i sia bedaia koanai bekamoane. Bekamoane 'eva enama'ina 'olana asi'i kulakula lalovai lalovaina kanaua eta maui ema vasi'avanala.

¹⁰ Oi okamoane kaumui a'oumui, luva kanania 'eva sia lau lele'u beia Lovia namana larena. Ateate 'eva adata kevatai sia beda'aovo 'avaea.

¹¹ Eda'aovo ateatena 'eva sia bekamoane, 'o asi'i koanai bemue 'udai beda'a adana kevana. Kau vaka adana sia bevala'asia.

¹² Kalina boumui e, kanania 'eva sia Lovia namana ena luva beia lau oi vailamui aluvala. Abiveni kauna ka 'eva sia eabiveni ateatena eadavala, inoku ateate kanaua e'ula adana ita bemimia koanai, kau kanaua adana sia bevala'asia.

¹³ Abiveni ateatena ka sia eabiveni kauna eadavala, inoku kau kanaua e'ula adana ita bemimia koanai, ateate kanaua adana sia bevala'asia.

¹⁴ Sia eabiveni kauna adana abiveni ateatena ita devaka'onamo 'ounai kau kanaua 'ani ekabukabu, mai sia eabiveni ateatena adana abiveni kauna ita devaka'onamo 'ounai ia 'ani ekabukabu. Beia kanaua sia bemako koanai, nakumui 'eva bema'obu Dilava vailanai, beia koa kanaua 'ounai nakumui 'eva 'ani dekabukabu.

¹⁵ Beia sia eabiveni kauna 'o ateatena e'ula adana abiveni ateatena 'o kauna bevikanian koanai sia oi bo'alavua, koa katanian boita laloatai abiveni kauna 'o ateatena vuona sia bekoala. Dilava 'eva ita e'aeta nua'eluai ekamia.

¹⁶ Abiveni ateatemu e, oni sia oikabasi adamu ama'i oni daimuai maui beabia, maivaka abiveni kaumu e, oni sia oikabasi adamu ama'i oni daimuai maui beabia.

Oni A Boimuai Dilava E'aemu Eva Kanaua Boimu Bomimia.

¹⁷ Kau ka ka Lovia namana ia evenia maulina vitaitanai bemimia, maivaka ka ka Dilava e'aeta maulina vitaitanai bemimia. Talavatu luvana kanania 'eva Dilava ena lo'e kauta boutai kevatai avaikabasi vaia.

¹⁸ 'Ani deivaia kauna Dilava ena 'ae'ae eabia dae koanai ena iva sia bevunia, beia sia deivaia kauna Dilava ena 'ae'ae eabia dae koanai beivala lalovaina sia belalovaia.

¹⁹ Deivala 'o sia deivala 'eva sia dava namana. Beia dava namana 'eva Dilava ena talavatu mo ekada'a vaia kave'i.

²⁰ Kau ka ka maui kanaua demia vaia laloanai Dilava e'aeta vitaitanaimo bemimia.

²¹ Oni da'alabi kaumu laloanai Dilava e'aemu koanai, nuamu sia bebvunu, beia melala edeana kai bevala'asimu 'avaea koanai boabia dae.

²² Da'alabi kauna Lovia namana eta'u e'aeia kanaua 'eva sia da'alabi kauna Lovia namana laloanai. Vitaitana mo, kau da'ala sia e'abi kauna kanaua Keliso eta'u e'aeia 'eva Keliso ena da'ala iabina kauna.

²³ Oi 'eva Dilava 'ani tavamui namanai etavamui, 'ounai oi 'eva sia kau eta da'ala abi kaumuiai oi bo'ao.

²⁴ Bo'akala'u e, ka ka mauili kanaua oi omia vaia laloanai e'aemui vitaitanai kanaua boimui Dilava ita oi bomimia.

Sia Dekamoane Kauta Luvata.

²⁵ Vali'u sia dekamooane kauta luvana 'eva kanania. Sia Lovia namana ena luva ia lau e'u luva oi emuiiai alulava. Beia Lovia namana ena vilaloai lalovai komolo eveni'u 'ounai oi bovamomo'ai'u.

²⁶ Vali'u 'eva adedua melalata, kanaua 'ounai lau alalovaia oi a omia koma kanaua boinai mo oi bomimia 'eva benama'ina.

²⁷ Okamoane kaumu adamu sia bovala'asia, beia sia okamoane kaumu 'eva kamoane sia bolalovaia.

²⁸ Beia bokamoane koanai oni si'avana sia ovavaia, maivaka vato makamaka bekamoane koanai ia si'avana sia evavaia. Beia kamoane kauta 'eva bavunu doutamo bedavalita eta mauiliai, kanaua 'ounai avalalounemui.

²⁹ Bo'akala'u e, kanania aluva koma, melala to'ona 'eva 'ani be'asi, inoku vali'u beda'amo vaila melalatai dekamooane kauta bemimia itani sia dekamooane boina Dilava ena vinaula bevavaia.

³⁰ Dala vitaitanai, dekakani kauta kataua bemimia itani nuata sia devilalo boina. Delalonama kauta bemimia itani sia delalonama. Detavatava kauta dava kataua detavata 'eva lovata sia be'aku itani sia ia eta.

³¹ Mai kau kataua vali'u kanobata davata doutamo devinaula vaita kauta 'eva belalovaia itani vinaula kataua 'eva kevatai dava asi'i boina. 'Olana kanobata kanania mai vali'u kamia vaia mauilina 'eva 'ani beole.

³² Lau e'u ula 'eva oi nuamui sia bebavunu. Sia ekamoane kauna 'eva Lovia namana mo ena vinaula evavaia, ena lalovai boutai 'eva Lovia namana lalona bevanama.

³³ Beia ekamoane kauna 'eva kanobata mo davata elalovaita, 'olana ena ula 'eva adana lalona bevanama.

³⁴ Maivaka ena lalovai 'eva evaluala adana lalona bevanama mai Lovia namana lalona bevanama. Beia sia ekamoane ateatena 'o vatona 'eva Lovia namana ena vinaula mo elalovaia, 'olana kauaniai mai idumeai bekabukabu. Beia ekamoane ateatena 'eva kanobata davata elalovaita, 'olana ena ula 'eva adana lalona bevanama.

³⁵ Lau kanania aluva koma 'olana 'eva oi emui nama'ina 'ounai, beia sia atalavatumui. Lau a'ula oi 'eva mauili komolonai oi bomauili, Lovia namana ena vinaula oi ovavaia koanai nuamui sia belulua.

³⁶ Kau ka nuantai elalovaia nakuna vatona enai sia evavai kave'i 'ani emia keini, beia kau kanaua ena ula nakuna vatona bemakamoane koanai dala bevakavu bevakamoane, kanaua 'eva si'avana sia evavaia.

³⁷ Beia kau kanaua sibona nuana evavaia kave'i maivaka nuana evapasisia nakuna vatona sia bekamoane, inoku sia evakamoane vaka ekomolo.

³⁸ Inoku kau kanaua nakuna vatona evakamoane 'eva ekomolo, beia kau kanaua nakuna vatona sia evakamoane 'eva evavai kave'i vaika.

³⁹ Ateate 'eva melala boutai adana dainai bedadai eta miai. Beia adana bebaba koanai, ia 'eva 'ani ateate 'avaeana, inoku be'ula bekamoane koanai abiveni kauna beadavala Lovia namana laloanai.

⁴⁰ Beia e'u lalovai 'eva kanania boina, obu kanaua sia bekamoane 'eva belalonama si'asi'a. Lau alalovaia Lovia namana Idumena 'eva lau nua'uai, 'ounai kanania aluva koma.

¹ Vali'u kanania 'eva ainama ianita dilava dedena devenia luvana. Luva umauna ita kaikabasi, "Ita boutai 'eva mai eta ikabasi." Inoku ikabasi etata'u apa eabia isi, beia lalo'au etata'u abiveni kauta evakula'ilata.

² Kau ka sibona elalovaia ia 'eva mai ena ikabasi dava vaida eikabasita, beia bemaikabasita dokadoka davata 'eva sia eikabasita.

³ Beia kau ka Dilava elalo'au venia kauna 'eva Dilava vaka kau kanaua eikabasia.

⁴ Kanaua 'ounai ainama ianita dilava dedeta devenita inoku ka'ani luvata 'eva katania. Ita kaikabasi dilava dedeta 'eva sia dilava umauna kanobata kanania laloanai, kaikabasi Dilava umauna 'eva ka'onamo mo.

⁵ Kau deta'u dilavai devaota kauta vaida vutuvutuai mai kanobatai, (inoku 'dilavata' mai 'loviata' katania 'eva doutamo.)

⁶ Beia ita 'eva mai eta Dilava ka'onamo, Kamata. Ia 'eva dava boutai evavaita, inoku ia dainai kamimia. Maivaka Lovia namana 'eva ka'onamo Iesu Keliso. Ia dainai dava boutai depupulu, inoku ia dainai ita kamimia.

⁷ Beia abiveni kauta vaida luva umauna kanania sia deikabasia. Vali'u melala kanania'i vaida 'eva dilava dedeta eta vinaula 'ani demadanata kave'i 'ounai iani kataua boita de'ani koanai ia delalovaia kanaua 'eva dilava dedeta eta, eta lalovai lalovaiai nuata sia dekomolo, delalovaia iani kanaua deania ianina 'ani eva'obuta Dilava vailanai.

⁸ Iani 'eva sia bevuaata beda'a Dilava kevana, sia eka aniani beia Dilava vailanai ena si'avanana asi'i 'o eka aniani Dilava vailanai vaka ena nama'inana asi'i.

⁹ Beia oi bo'imamui kave'i, 'olana emui ikabasiai oi oaniani, kanaua betata'u eta abiveni debadebade kauta asi'i emava'ekota si'avana laloanai.

¹⁰ 'Olana kau ka ena abiveni ebadebade kauna oni idiba kaumu dilava dedena ena vakai oaniani beikamu koanai, ia nuana ovakula'ilala ena lalovai beva'eva inoku dilava dedeta eta iani be'ani.

¹¹ Inoku Keliso bo'akalamu ena abiveni ebadebade kauna kanaua dainai eba 'eva oni emu idiba kanaua betata'u ia idumena bevasi'avanala.

¹² Oni emu vavai kanaua'i bo'akalamu nuana oabi si'ala ia elalovaia esi'avana koakoana bevavaia, inoku oni bo'akalamu kevanai 'eva ova'eva maivaka Keliso kevanai 'eva ova'eva.

¹³ Kanaua 'ounai iani kanaua etata'u bo'akala'u eva'ekoa koanai, lau iani kanaua sia bania 'udai 'olana asi'i amava'ekoa.

9

Paulo Vali Nama'ina Dainai

Tavana Sia Ekavu.

¹ Lau 'eva sia da'ala iabina kau'u. Lau 'eva veauneke kau'u. Lau eta Lovia namana Iesu aikaia. Oi 'eva Lovia namana ena vinaula avavaia vinaulana vuavuana kaumui.

² Kau vaida etai lau 'eva sia veauneke kau'u, beia oi emuai lau 'eva veauneke kau'u, 'olana oi Lovia namana oi oabivenia kauna eta'u eva-momo'aia lau 'eva veauneke kau'u.

³ De'ouabi'u kauta eta luva kanania bavamue koma.

⁴ Lau maie'u komolo e'u vinaula tavana iani mai vei ba'abi.

⁵ Veauneke kauta vaida mai Lovia namana kadina mai Petelo devavai vitaitata bamavavai, maie'u komolo ada'u abiveni ateatena e'u da'a to'ato'a laloatai bamavada'aia.

⁶ Banomai vaida sia bevinaula beia lau Banaba ita 'eva sibomai emai iani vinaulana lai bavavaia, una?

⁷ Kuali kauna davana sibona ena vinaula tavana beveveni? Vinaula kauna davana sibona ena loba ianina sia be'ani? Mamoe vanani kauna davana ena mamoe baena sia be'inu?

⁸ Lau melala boutai ka'ika luvata ivavitaitatai mo sia aluvaluva, Dilava ena talavatu vaka luva vitaitana eluvala.

⁹ Mose ena talavatu pukanai kanania eleleia koma, "Bolomakau witi ivamukamukana vinaulana evavaia laloanai nutuna sia bodo'oa avu beia bovikania beaniani."

Deu 25.4

Luva kanaua 'eva Dilava bolomakau elalovaita vaika 'ounai, una? Asi'i.

¹⁰ Kanaua eluvaia 'eva ita e'outa. Luva umauna luva kanaua 'eva ita daitai kanaua deleleia koma. Evovoi kauna mai e'ua'ua kauna ia laluaana eta vinaula devavaia vinaulana vuavuana denuabata venia 'eva beabia.

¹¹ Lai 'eva idume ena kea lai avadoa oi kevamuiai, inoku kauani ivanama'inana davata kevamuiai lai ba'abi 'eva sia ekomolo, una?

¹² Bema vaida vidulu oi ovenita 'eva mai eta komolo koanai, lai vaka emai komoloai vidulu namana kevamuiai lai babia.

Beia lai kanaua boina sia lai avavaia. Ia lai 'eva dava boutai kevatai lai avapasisi 'olana Keliso ena vali nama'ina asi'i lai ama'alavuia makauna.

¹³ Oi 'ani oi oikabasi lo'e kabukabunai devinaula kauta eta iani ua'i lo'e kabukabunai de'abi, maivaka vala kabukabunai devidulu kauta ainama ianina ua'i de kolea.

¹⁴ Inoku dala vitaitanai mo Lovia namana eluva ediaka vali nama'ina deilolo vaia kauta kataua eta mauli ivanama'inana davata 'eva ua'i vali nama'ina deabia dae kauta kevatai beabia.

¹⁵ Beia lau e'u komolo kanaua'i bamanoimui 'eva vinaulana sia avavaia. Mai vali'u alele venimui 'eva sia komolo kataua babita 'ounai. Kau ka bediaka lau e'u apa kanania anina asi'i koanai lau bamaba 'eva bemanama'ina.

¹⁶ Vali nama'ina ailolo vaia dainai ba'apa 'eva sia ekomolo. 'Olana lau ailolo vaia 'eva Lovia namana e'ou'u bavavaia vinaulana avavaia. Inoku vali nama'ina sia bailolo vaia koanai kele'euai 'eva besi'avana vaika.

¹⁷ Lau sibo'u e'u ulai vinaula kanania bamavavaia koanai tava'u bamakavua, beia Lovia namana ena vinaula eveni'u koanai, vinaula kanania 'eva Dilava lau eva'olavai'u bavavaia mo.

¹⁸ Inoku tava'u 'eva dava? Vali nama'ina ailolovaia 'avaea tava'u lovana sia akua mai vali nama'ina vinaulana avavaia laloanai e'u komolo sia akakavu. Lau tava'u 'eva lalonana katania.

¹⁹ Lau 'eva kau ka da'alana sia a'abi, beia lau sibo'u e'u ulai kau boutai eta da'alabi kau'uai a'ao, inoku kau doutamo bavuata ba'asi Iesu beabivenia.

²⁰ Iuda kauta ita lai amimia laloanai lau 'eva Iuda kauta vitaitatai a'ao, inoku ia bavuata ba'asi Iesu beabivenia. (Maivaka lau 'eva Mose ena talavatu venunai sia amimia,) beia talavatu venunai demimia kauta kataua ita lai amimia laloanai lau talavatu venunai demimia kauta vitaitatai a'ao, inoku ia bavuata ba'asi Iesu beabivenia.

²¹ Dala vitaitanai Mose ena talavatu sia deikabasia kauta ita lai amimia laloanai lau talavatu sia deikabasia kauta vitaitatai a'ao, inoku talavatu sia deikabasia kauta bavuata ba'asi Iesu beabivenia. (Beia luva umauna lau Dilava ena talavatu sia avikania, lau 'eva Keliso ena talavatu ada'avaia.)

²² Eta abiveni debadebade kauta kevatai amimia laloanai lau vaka abadebade ia vitaitatai a'ao, inoku vaida bavuata ba'asi Iesu beabivenia. Kanaua 'ounai lau 'eva dava boutai vitaitatai a'ao kau boutai kevatai, inoku dala davana bedaia dalana vaida bavuata ba'asi vamauli beabia Keliso enai.

²³ Lau dava katania boutai avavaita 'eva vali nama'ina dainai, inoku lau vaka ia ita vanama'inana kanaua lai babia ka'ona.

²⁴ Oi oikabasi kave'i veau vilo'o laloanai veau kauta doutamo deveau, beia ka'onamo mo 'ana'ia tavana eabia. Kanaua 'ounai oi boveau koanai 'ana'ia veuna oi boveau.

²⁵ Veau vilo'o laloatai dedododo kauta boutai veau vilo'oai ena vaidiba pasisina deabia. Kanaua devavaia 'eva 'ana'ia tavana sia bemia dau'a kanaua beabia 'ounai, beia ita vinaula kavavaia 'eva 'ana'ia tavana bemia keinikeini kanaua ekabia 'ounai.

²⁶ Kanaua 'ounai lau 'eva komolo'uai aveau bada'a mo veau to'ona 'abunai bala'asi, maivaka lau 'eva viaku kauna imana sia ekapo 'avaea kapo 'avaea kauna boina.

²⁷ Lau sibo'u kau'u avakula'ilala, avapasisia mai nua'u bada'avaia kave'i, 'olana vaidia kevatai vali nama'ina bailolo vaia mulinai lau asi'i demavasi'avana'u tavana sia amaabia maka'una.

10

Dilava Dedeta

Sia Ekakukudivo Venita.

¹ Bo'akala'u e, lau a'ula 'ava'avata Mose mulinai dedada'a kauta kevatai dava epulu davana sia oi bobolabolala. Dilava eta'u boutai oli venunai evada'ata inoku 'Atu 'Aolana laloanai dekeini.

² Ia boutai oli laloanai mai 'atu laloanai deidi'u kabukabu Mose ibanona kautai deao.

³ Boutai 'eva iani kanaua Dilava evenita ianina vitaitana mo deani.

⁴ Maivaka boutai vei Dilava evenita veina kanaua vitaitana mo deinuia. Dilava ena bika'a kanaua ita deda'a ka'ona, bika'ana kanaua'i vei ealu asi deinu, inoku bika'a kanaua 'eva Keliso.

⁵ Koakoa nama'ita kataua evavai, beia doutamo vaika 'eva Dilava lalona sia devanama, kanaua 'ounai kano'akunai deba palu kauanita 'eva 'abu edeata edeatai deno 'avaea'avaea.

⁶ Dava katania boutai 'eva ivavitaitana ita eta, bevalalovaita dava si'avata vaika sia ekaulavenita 'avaea ia devavaia vitaitana.

⁷ Dilava dedeta 'eva sia oi bokukudivo venita vaidia devavaia boina, 'olana Puka kabukabunai 'ani eleleia, "Kau 'eva demiadivo deaniani deinuinu inoku deko'isi kau mai 'a'ate ita neva si'avata vaika devavai."

⁸ Ita 'eva sia ekakulakula vaika vaidia ua'i devavaia boina, inoku melala ka'onamo laloanai kauta boutai da luanavui koi (23,000) deba.

⁹ Ita 'eva Lovia namana sia ekakovoa vaidia ua'i ia dekovoa boina, inoku kau'asi deta'u deala bata.

¹⁰ Maivaka ita sia eka'ou to'ato'a ia de'ou to'ato'a boina, inoku akuaku aneluna eta'u eaku bata.

¹¹ Dava katania depulu ia kevatai 'eva ivavitaitana ita eta, luvata deleleta 'eva ita ivalalovai inita kanobata to'ona e'asi laloanai.

¹² Inoku oni olalovaia 'ani olava 'ini kave'i koanai, bo'imamu kave'i asi'i oma'eko.

¹³ Vikovo oi kevamuia depupulu vikovota kataua 'eva kau kevatai depupulu kauta vitaitata. Beia Dilava 'eva lele ivavua venina kauna. Ia sia bevikanimu 'avaea vikovo kanaua emui kula'ila ekeinina vikovonai asi'i oi oma'eko 'ounai. Inoku vikovo oi oabia koanai, ia dala ka bevenimui oi boda'atau, kanaua'i oi bolava 'ini.

¹⁴ Kanaua 'ounai, e'u lalo'au kaumui e, dilava dedeta ikukudivo venita 'eva oi bovikanita.

¹⁵ Oi 'eva nuakomolo kaumui a'oumui, e'u luvai sibomui vaka oi bolalovaia lau dava a'oua.

¹⁶ 'Ou kanaua Lovia namana ena anido'u laloanai kabia inoku Dilava kavanama'inala 'ouna kainua koanai, ita boutai Keliso lalana kainua ka'ona. Maivaka Palaoa kakovia ka ka ka'ani koanai, ita boutai Keliso kauanina kania ka'ona.

¹⁷ Palaoa 'eva ka'onamo Keliso kauanina, ita 'eva kamato beia kauani 'eva ka'onamo, 'olana ita boutai palaoa kanaua ka'onamo kania ka'ona.

¹⁸ Isalaela kauta eta koakoa ekalalovaia, vala kabukabunai de'abu sisita deani kauta boutai 'eva vala kabukabuna vinalana devavaia ka'ona.

¹⁹ Lau dava ako, ainama davana kanaua dilava dedena devenia davana 'eva mai anina, una? Maivaka dilava dedena 'eva dilava umauna, una?

²⁰ Asi'i vaika. Pulu edea kauta eta ainama 'eva ka'uba si'avata vaika eta, beia sia Dilava ena. Lau a'ula oi ka'uba si'avata vaika ita sia oi bovaka'onamo.

²¹ Oi Lovia namana ena 'ouai oi oinuinu kaumui ka'uba si'avata vaika eta 'ouai sia oi boinuinu. Oi Lovia namana ena aniani vakavakanai oi oaniani kaumui ka'uba si'avata vaika eta aniani vakatai sia oi boaniani.

²² Ita Lovia namana nuana ekavananala 'eva sia enama'ina, 'olana ena badu bevala'asi koanai ita sia mai kula'ilata ia boina.

²³ Oi odiaka "dava boutai ekavavai 'eva bedaia," beia lau adiaka boutai 'eva sia 'ani benama'ina, oi odiaka "dava boutai ekavavai 'eva bedaia," beia adiaka boutai 'eva sia 'ani beduluta kave'i eta abiveni laloanai.

²⁴ Oi sia ka sibona ena nama'ina mo bekavua, beia banona vaida vaka eta nama'ina bekavua.

²⁵ Tavatava 'abunai detavatava vaita sisita 'eva oi bo'ani, beia sia oi bolavuai lavuai oi bodiaka kanaua 'eva dilava dedena enai deveveni sisina 'o asi'i, nuamui asi'i demabavunu.

²⁶ 'Olana Puka kabukabuna deleleia boina, "Kanobata mai laloanai demimia davata boutai 'eva Lovia namana ena."

Sal 24.1

²⁷ Sia eabiveni kauna ka beveamu lalua oi boaniani inoku oni o'ula bodada'a koanai bodada'a, vailamui ai dava ene'edivo davata boutai 'eva bo'ani, sia bolavuai lavuai nuamu asi'i emabavunu.

²⁸ Beia kau ka be'oumu, "Iani kanania 'eva dilava dedena devenia ianina" koanai, iani kanaua sia boania, 'olana e'oumu luvana kanaua dainai mai kau ka nuana asi'i emabavunu 'ounai.

²⁹ Lau sia adiaka oni 'eva ova'eva, beia e'oumu kauna belalovaia oni ova'eva.

Inoku kau ka sibona belavuai lavuai, dava 'ounai kau ka ena lalovailalovaiai lau e'u komolo belavuai lavuai vaia?

³⁰ E'u iani Dilava avanama'inala inoku ania koanai, dava 'ounai kau ka lau iani avanama'inala ania 'ounai luva'u eluluva?

³¹ Beia dava dava oi o'ani oi o'inu 'o oi ovavai, kataua boutai 'eva Dilava ena nuavi ivala'asina dainai oi bovavai.

³² Emui mia laloatai Iuda kauta, pulu edea kauta 'o Dilava ena lo'e kauta kataua iva'ekota vinalulata sia oi bovavai.

³³ Oi lau avavaia boina oi bovavaia lau kau boutai lalota bavanama dala boutai laloatai. Sibou e'u nama'ina sia akavua, beia boutai eta nama'ina akavua, kanaua 'eva ia vamauli beabia 'ounai.

11

¹ Lau Keliso evavaia vitaitana avavaia, oi vaka lau avavaia vitaitana oi bovavaia.

*Meamea Laloanai 'A'ate 'Olata
Beva'akuavu Luvana.*

² Lau oi avanama'inamui, 'olana dava boutai laloatai oi olalovai 'ini'u do'o maivaka vaikabasi avenimui vaikabasita oi oabi 'inita.

³ Vali'u lau a'ula oi boikabasi kave'i, kau boutai 'olatai kauna 'eva Keliso, ateate 'olanai kauna 'eva ia adana, Keliso 'olanai kauna 'eva Dilava.

⁴ Kanaua 'ounai kau boutai 'olata mai ivaakuavuta demeamea 'o Dilava ena luva deluvala 'eva 'olatai kauna Keliso 'olana sia de'aku.

⁵ Maivaka ateate 'olana ivaakuavuna asi'i laloanai emeamea 'o Dilava ena luva eluvala ateatena 'eva adana ia 'olanai kauna 'olana sia e'aku, itani ia vuina detalia ovo boina.

⁶ Beia ateate ka 'olana sia evaakuavua koanai, ia 'eva vuina beukua. Ateate vuina betalia ovo 'o vuina beukua 'eva mai malalaina 'ounai ateate 'olana 'eva bevaakuavua.

⁷ Kau 'eva meamea laloanai 'olana sia bevaakuavua, 'olana ia 'eva Dilava ikaikana maivaka ena nuavi evala'asia, ia ateate 'eva kau ena nuavi evala'asia.

⁸ Dilava 'eva ateate kauaninai kau sia evavaia, beia kau kauaninai ateate evavaia.

⁹ Mai Dilava 'eva ateate dainai kau sia evavaia, beia kau dainai ateate evavaia.

¹⁰ Kanaua 'ounai ateate 'eva 'olana bevaakuavua, inoku koa kanaua'i anelu beikabasi ia 'eva adana ena siavu venunai emimia.

¹¹ Ia eta mauili Lovia namana enai maulinai laloanai, ateate 'eva kau kevanai sia beda'atau sibona bemimia maivaka kau 'eva ateate kevanai sia beda'atau sibona bemimia.

¹² Ateate 'eva kau kauaninai easi, maivaka kau 'eva ateate kauaninai epupulu. Beia dava boutai 'eva Dilava kevanai deasi.

¹³ Sibomui 'ani oi olalovaia, ateate 'olana sia evaakuavua inoku kau vailatai emeamea 'eva sia ekomolo.

¹⁴ Kanobata maulina laloanai ita 'ani kaikabasi vui laka'ina kau etai 'eva malalai davana,

¹⁵ beia vui laka'ina 'eva ateate ena nuavi davana. Dilava eta'u ateate evenia 'olana ivaakuavunai be'ao.

¹⁶ Beia kau ka e'ula koako koania beadedua vaia koanai, lau aluluva adiaka, lai mai Dilava ena lo'e kauta boutai ita kevamaiai 'eva kukudivo koakoana edeana sia ka.

*Lovia Namana Ena
Anibou Kabukabuna Luvana.*

(Mt 26.26-29; Mk 14.22-25; Lk 22.14-20)

¹⁷ Vali'u e'u vaikabasi luvana kanania a'oumui laloanai lau 'eva oi sia avanama'inamui, 'olana emui lo'e do'uta oi o'abi 'eva si'avana doutamo devavai beia sia maieta vidulu kau kevatai.

¹⁸ Lava'ana'ina 'eva oi valimui a'ika emui lo'e do'uta oi o'abi laloatai 'eva sibomui oi ova'alamamui, luva kanania kena avamomo'aia.

¹⁹ (Va'alama 'eva bepupulu sia beasi'i inoku kanana'i 'eva luva umauna deluvala kauta ekaikata une.)

²⁰ Kanaua 'ounai 'abu ka'onamoai oi ododo'u anibou oi boabia, beia kanaua 'eva Lovia namana ena iani kabukabuna umauna sia oi oania.

²¹ 'Olana oi oaniani koanai, ka ka emui iani mo oi o'ani banomui sia oi o'imata, kanaua 'ounai vaida 'eva vikolo deakuta ia vaida 'eva deinu ba.

²² Emui lumai oi bomaaniani mai oi bomainuinu. Dilava ena lo'e kauta oi ovasi'avanata mai kele'etai dava asi'i kauta oi ovamalalaita. A ba'oumui

koma? Oi lolovaia vinaula kanania oi ovavaia 'eva bavanama'inamui, una? Asi'i vaika.

²³ Vaikabasi kanania oi avenimui 'eva Lovia namana kevanai abia vaikabasina vitaitana. Veni eveni mai kou ekou boninai Lovia namana Iesu palaoa eabia,

²⁴ vanama'ina luvana Dilava evanama'inala. Mulinai 'eva palaoa ekovia inoku eluva ediaka, "Kanania 'eva lau kauani'u aveveni oi emui. Kanania oi bovavai koma lau ilalovai 'ini'u."

²⁵ Deaniani mulinai dala vitaitanai mo 'ou eabia isi inoku eluva ediaka, "'Ou kanania 'eva Dilava ena luvana'ana'i namana makamakana, lau e'u ba lalanai avamomo'aia. Kanania oi bovavaia oi boinua lau ilalovai 'ini'u melalata boutai laloatai."

²⁶ Palaoa kanania oi oania mai 'ou kanania'i oi oinua melalata boutai, oi 'eva Lovia namana ena ba valina oi okavala beda'amo ia be'asi.

²⁷ Kanaua 'ounai, kau ka ena lalovai sia ekomolo laloanai palaoa beania 'o 'ouai beinuinu koanai, ia 'eva 'ani eva'eva Lovia namana kauanina mai lalana etai.

²⁸ Kanaua 'ounai kau ka sibona nuana bekavua kave'i makava inoku palaoa beania mai 'ouai beinuinu.

²⁹ 'Olana ia palaoa eania mai 'ouai einuinu beia Lovia namana kauanina sia elalovaia koanai ia 'eva Dilava ena lavuai ianina eania mai inuinuna einua.

³⁰ Kanaua 'ounai, oi doutamo 'eva oi o'olele, obadebade maivaka doutamo 'ani deba.

³¹ Beia ita sibota nuata ekakavu kave'i makava koanai, Dilava ena lavuai laloanai sia ekadodo.

³² Beia Lovia namana ita evaluvata mai mekau evenita 'eva evaidibata, inoku kanobata kauta ita mekau sia ekakoala ka'ona 'ounai.

³³ Kanaua 'ounai, bo'akala'u e, oi ododo'u Lovia namana ena iani kabukabuna oi oania koanai banomui oi bo'imata.

³⁴ Kau ka vikolo beakua koanai, ia 'eva ena lumai beaniani inoku be'asi, inoku oi bododo'u koanai oi Dilava ena lavuai laloanai sia oi bodododo.

Luva vaidia 'eva muliai lau bavavasi laloanai ba'oumui.

12

Veniveni Davata Idume Kabukabuna Kevanai De'asi.

¹ Bo'akala'u e, vali'u lau a'ula oi Idume Kabukabuna ena veniveni davata 'eva oi boikabasita kave'i.

² Oi oikabasi, asido'o oi oabiveni laloanai, dilava dedeta sia demauli dilavata kataua deta'u de'ana'ia vaimui maivaka devada'amui tau.

³ Kanaua 'ounai lau oi a'oumui, Dilava idumena ena viduluai eluluva davana 'eva Iesu sia esivadala ediaka, "Iesu 'eva esi'avana," mai Idume Kabukabuna ena vidulu eabia kauna nutunai vaka eluluva ediaka, "Iesu 'eva Lovia namana."

⁴ Idume Kabukabuna ena veniveni davata 'eva edeata edeata, beia Idume Kabukabuna ka'onamo mo kanaua etata'u eveveni.

⁵ Lovia namana ena vinaula ivavaita dalata 'eva edeata edeata, beia Lovia namana ka'onamo mo da'alana ka'abi.

⁶ Ita kau eta mauili laloatai Dilava ena vinaula dalata 'eva edeata edeata, beia Dilava ka'onamo mo etata'u ena kau boutai kula'ila evenita ia ena vinaula ekavavai.

⁷ Idume Kabukabuna etata'u abiveni kauta ka ka siavu evenita 'eva Dilava ena lo'e kauta boutai iduluta eta nama'ina 'ounai.

⁸ Idume Kabukabuna etata'u kau ka aoneka luvata evenia be'oulai, Idume Kabukabuna ka'onamo mo kanaua etata'u ka idiba luvata evenia be'oulai.

⁹ Idume Kabukabuna ka'onamo mo kanaua etata'u kau ka abiveni evenia, Idume Kabukabuna ka'onamo mo kanaua etata'u ka 'olele ivanama'inata siavuna evenia 'olele 'o anana bevanama'inata.

¹⁰ Idume Kabukabuna kanaua etata'u kau ka siavu evenia vatabulovo koata bevavai, ka 'eva enolea luvata be'oulai, mune'e ka siavu evenia idume edeata edeata eta edeana be'ou dae, ka siavu evenia lele edeata edeatai beluluva, ka 'eva siavu evenia lele edeata edeatai deluvaluva anita bevakeini.

¹¹ Dava katania boutai 'eva Idume Kabukabuna ka'onamo ia sibona evavaita, ia etata'u kau boutai ka ka veniveni edeata edeata evenita ia sibona ena ula vitaitanai.

Ita Boutai 'Eva Kauani Ka'onamo Le'ena.

¹² Kau kauanina 'eva ka'onamo, beia le'ena 'eva edounamo, inoku le'e kataua 'eva kauani ka'onamoai detai 'au. Inoku Keliso vaka kanauamo boina.

¹³ Vitaitanamo ita boutai Iuda kauta 'o 'Elene kauta, da'alabi kauta 'o da'ala sia de'abi kauta Idume Kabukabuna ka'onamo eta'u kauani ka'onamoai evaidi'uta kabukabu, ita boutai 'eva Idume Kabukabuna ka'onamo kabia nuatai emimia.

¹⁴ Kau kauanina le'ena 'eva edounamo ia sia ka'onamo.

¹⁵ Inoku ae bemaluva bemadiaka, "Lau 'eva sia ima 'ounai lau 'eva sia kauani le'ena ka," inoku luva kanaua bemaluvala beia ae 'eva kauani le'ena kai sia ekavaoa 'eva dalana asi'i.

¹⁶ Mai kaia bemadiaka, "Lau 'eva sia maka 'ounai, lau 'eva sia kauani le'ena ka," inoku luva kanaua bemaluvala beia kaia 'eva kauani le'ena kai sia ekavaoa 'eva dalana asi'i.

¹⁷ Inoku kauani itoinai maka ai bemao koanai, lele a bemaika koma? 'O kauani itoinai kaia ai bemao koanai, bona a bemalalai koma?

¹⁸ Sia kanaua boina. Dilava ena ula vitaitanai kauani le'ena boutai 'abuta umautai ene'etadivo inoku ka ka eta vinaula umauta bevavai.

¹⁹ Bema le'e boutai 'eva le'e ka'onamoai bemao koanai, kauani 'eva a'ia'i?

²⁰ Kauani 'eva sia kanaua boina. Kauani 'eva ka'onamo beia le'ena 'eva edounamo.

²¹ Kanaua 'ounai maka 'eva ima sia be'outa bediaka, "Lau oi sia aula venimui," 'Ola vaka ae sia be'outa bediaka, "Lau oi sia aula venimui."

²² Asi'i. Le'e kataua kauanai debadebade le'eta bemaasi'i koanai kauani 'eva sia bevinaula kave'i.

²³ Mai kalalovaia kauani le'ena vaidia eta vinaula dekiki le'eta 'eva ka'imata kave'i, maivaka le'e kamalalava le'eta kataua 'eva tubu'ai ka'alavuta kave'i.

²⁴ Beia le'e ikata denama'ina le'eta 'eva lovata sia ka'aku. Dilava kauani kanania evavaia koma 'eva le'e boutai evaka'onamota kauani ka'onamoai, debadebade le'eta vaka e'imata kave'i.

²⁵ Kanaua 'ounai kauani laloanai 'eva koa kole asi'i, beia le'e boutai 'eva bevaka'onamo ka ka bevidulu viveni.

²⁶ Bema le'e ka beanana koanai le'e boutai 'eva ia ita beanana ka'ona, bema le'e ka vana bevanama'inala koanai boutai ia ita belalonama ka'ona.

²⁷ Vali'u oi boumuiai 'eva Keliso kauanina, inoku oi ka ka 'eva ia kauanina le'ena ka ka.

²⁸ Dilava eta'u ena lo'e laloanai kau eabita isi, lava'ana'ina 'eva veauneke kauta, ivaluana 'eva enolea kauta, ivakoina 'eva vaikabasi kauta, maivaka siavu koata edeata edeata bevavai kauta, ia mulitai 'eva 'olele bevanama'ina

kauta, vaida vidulu kauta, vaida 'ana'iavai kauta, mai vaida lele edeata edeatai beluluva kauta.

²⁹ Ia boutai 'eva sia veauneke kauta mo, boutai 'eva sia enolea kauta mo. Boutai 'eva sia vaikabasi kauta mo. Boutai 'eva sia siavu koata bevavai kauta mo.

³⁰ Boutai 'eva sia 'olele bevanama'ina kauta mo. Boutai sia mala edeata edeatai beluluva kauta mo. Boutai sia mala edeata anita bevakeini kauta mo.

³¹ Idume Kabukabuna ena veniveni namata venivenita oi boula venita. Vali'u lau batata'u dala nama'ina umauna dalana bavaikamui.

13

Lalo'au.

¹ Lau lele edeata edeata mai anelu leletai bamaluva, beia keva'uai lalo'au asi'i koanai, lau 'eva itani kapa 'o 'ana'ile de'aku 'ulutamo devuvua davata boita.

² Lau enolea venivenina bamaabia 'o Dilava ena luva vunita mai idiba boutai bamaikabasita, maivaka e'u abiveni bemakula'ila vaika lolo bamavailuta, beia mo keva'uai lalo'au asi'i koanai, lau 'eva dava asi'i.

³ E'u dava boutai ta'ovala kauta bamavenita, maivaka kauani'u bamaveni 'avaea 'alovai bema'abua bemaani palu, beia mo keva'uai lalo'au asi'i koanai, kataua boutai eta nama'ina asi'i lau keva'uai.

⁴ Lalo'au koana 'eva vapisasi mai 'eluovo, lalo'au koana 'eva sia mama 'o sia vana eabi isi 'o sia apa.

⁵ Lalo'au koana 'eva sia vabo'obo'o, sia idono, sia ebadu molaumolau mai kau eta va'eva sia elalovai 'ini.

⁶ Lalo'au koana 'eva si'avana sia elalonama venia, beia ia 'eva komolo vinaulana elalonama venia.

⁷ Lalo'au koana 'eva dava boutai laloatai sia evuakao, ena abiveni sia ebadebade, melala boutai nuabatai emimia mai evapasisi dava boutai laloatai.

⁸ Lalo'au 'eva bemia keinikeini. Enolea luvata be'oulai beia 'ani beole, lele edeata edeatai beluluva beia 'ani beole, idiba luvata be'oulai beia vaka 'ani beole.

⁹ 'Olana eta idiba 'eva dekiki mai eta enolea luvata vaka dekiki mai sia dekomolo kave'i,

¹⁰ beia komolona umauna be'asi koanai, dava sia dekomolo kave'i davata kataua 'eva betaule.

¹¹ Lau melo'uai koanai e'u luvaluva, e'u lalovai lalovai, e'u ikabasi boutai 'eva dekiki, beia vali'u lau 'ani akau laloanai melo eta koakoa kataua boutai 'ani avikanita.

¹² Dava vali'u ka'ika 'eva itani oleole avuavunai va'ava'ata ka'ika boina, muliai 'eva bela'asi kave'i ekaikata kave'i. Dava boutai vali'u 'eva kava'ita mo aikabasi, beia muliai 'eva baikabasita kave'i, itani Dilava lau eikabasi'u kave'i boina.

¹³ Vali'u dava koina katania 'eva bemia keinikeini, abiveni, nuabata, mai lalo'au. Beia katania koina vilodatai nama vaikana 'eva lalo'au.

14

Enolea Venivenina Mai Mala Edeanai Eluluva Venivenina.

¹ Lalo'au dalanai oi bodada'a, Idume Kabukabuna ena veniveni davata 'eva oi boulavenita vaika, beia enolea venivenina oi boula venia namana kanaua'i Dilava valina oi bokakava.

² 'Olana kau ka lele edeana ai eluluva 'eva kau sia e'outa beia Dilava e'oua, luva umauna ena luva ovota sia be'ovo, ia 'eva dava vuniata eluvavaita Idume Kabukabuna ena siavuai.

³ Beia enolea kauna 'eva Dilava ena luva eluvala kau kevatai, eduluta, nuata evakula'ilata, maivaka nuata evapasisita.

⁴ Kau kanaua lele edeanai eluluva kauna ia sibona mo edulua, beia enolea kauna 'eva Dilava ena lo'e kauta boutai eduluta.

⁵ Lau a'ula boumuiai lele edeata edeatai oi boluluva beia e'u ula umauna 'eva oi boenolea, enolea kauna 'eva namana vakaia lele edeata edeatai eluluva kauna, 'olana lele edeana kanaua bevakeini kauna asi'i koanai Dilava ena lo'e kauta boutai vaka iduluta dalana asi'i.

⁶ Bo'akala'u e, lau bamavasi kevamuiai lele edeata edeatai bamaluva, beia luva kataua Dilava evala'asi luvata, idiba luvata, enolea luvata, 'o vaikabasi luvata vaida sia bamaabi bamavasi koanai, lele edeanai baluluva ena nama'ina 'eva dava oi kevamuiai? Ena nama'ina asi'i umauna.

⁷ Vitaitana dava vaida sia demauli beia akatai 'ulu kavavua davata kataua, siau 'o kita, 'uluta sia bekomolo kave'i koanai kau a beikabasi koma masi davana 'uluna devavuala.

⁸ Vitaitana kualii bisina euvania kauna bisi sia beuvania kave'i koanai dai beva'olu kualii belavala avu?

⁹ Kevamuiai vaka kanauamo boina, oi lelemuiai luva sia oi boluva kave'i koanai kau ka a beikabasi koma oi dava oi o'oua? Kanaua 'eva oi 'ani oluva 'avaea luva 'avaea mo.

¹⁰ Luva umauna kanobata kanania itoina laloanai lele edeata edeata 'eva doutamo, inoku boutai 'eva mai anita.

¹¹ Kau ka lele kanaua eluvala inoku lau sia aikabasia koanai, eluluva kauna lau keva'uai ia 'eva kanobata edeana kauna, lau vaka kanobata edeana kau'u ia kevanai.

¹² Kevamuiai vaka kanauamo boina. Oi oula vaika Idume Kabukabuna ena veniveni davata oi bo'abi 'ounai, veniveni kataua Dilava ena lo'e kauta beduluta mai bevakula'ilata venivenita 'eva Dilava kevanai oi bonoinoi vaita kula'ila.

¹³ Lele edeanai eluluva kauna 'eva emameamea Dilava emanoia luva iabi keinita emakabasi inoku luva eluvata luvata 'eva bevakeinita.

¹⁴ 'Olana lau lele edeanai ameamea koanai, idume'u 'eva emamea beia lau nua'u 'eva sia eikabasi dava.

¹⁵ Inoku lau dava bavavaia? Lau idume'u ai bameamea 'eva nua'u ai vaka bameamea. Lau idume'uai bamamasi 'eva nua'u ai vaka bamamasi.

¹⁶ Inoku oni idumemuai Dilava vanama'ina luvana ovenia koanai, kau 'avaeana ka emu vanama'ina luvana meameana kanaua ovona sia be'ovo kauna "Amen" a be'oua koma.

¹⁷ Emu vanama'ina luvana meameana Dilava kevanai meameana enama'ina vaika, beia kau vaida 'eva sia eduluta.

¹⁸ Lau Dilava avanama'inala, 'olana lau melala doutamo lele edeata edeata a'oulai vakaia oi boumuiai.

¹⁹ Lau a'ula Dilava ena lo'e do'una laloanai lele edeata edeatai luva da 'ouka (10,000) sia baluvavai, beia luva ima ovota be'ovo luvata baluvavaita beduluta eta ikabasi bepupulu.

²⁰ Bo'akala'u e, dava kania kevatai melo kikita eta lalovailalovaiaia sia oi bolalovaita, ia si'avana ivavaita melalatai oi 'eva melo 'oma'omata boitai oi bo'ao, beia emui lalovailalovaiaia oi 'eva kau namata boitai oi bo'ao.

²¹ Puka kabukabunai kanania eleleia koma,

"Lovia namana eluluva ediaka,
lele edeata edeata kauta mai

kanobata edeata kauta nututa
 bibi'atai lau batata'u kau katania
 kevatai e'u luva baluvala.
 Beia Iuda kauta katania 'eva
 lau lele'u sia be'ika."

Isa 28.11, 12

²² Kanaua 'ounai lele edeatai beluluva 'eva sia deabiveni kauta beikabasi koa kanaua 'eva Dilava kevanai e'asi, ua 'evaia sia deabiveni kauta daitai, beia enolea 'eva abiveni kauta koa kanaua'i eta abiveni bekula'ila, ua 'eva ia deabiveni kauta daitai.

²³ Inoku Dilava ena lo'e kaumui boumuiai oi bododo'u laloanai, lele edeata edeatai oi boluluva inoku kau dava katania ovota sia de'ovo kauta mai sia deabiveni kauta do'u kanaua laloanai abiveni kaumui lele edeata edeatai oi oluluva lelemui be'ika koanai, ia bediaka oi 'eva 'olamui desi'avana.

²⁴ Beia boumuiai enolea luvata oi boluluva laloanai, kau dava katania ovota sia de'ovo kauta 'o sia deabiveni kauta lelemui be'ika koanai beikabasi ia 'eva si'avana kauta. Inoku luva de'ika luvana betata'u ia bevaluvata,

²⁵ ia eta lalovai vuniata boutai bevala'asi, inoku bekukudivo Dilava bevanama'inala beluluva bediaka, "Luva umauna Dilava 'eva nia'i oi viloa-muiai."

Dilava Ena Lo'e Ena Vinaula.

²⁶ Kanaua 'ounai, bo'akala'u e, dava ekakoma? Oi ododo'u oi omeamea koanai masi ka oi oabia, ka evaikabasi, ka 'eva Dilava dava ka kevanai evala'asia davana valina ekakava, ka lele edeanai eluluva, maivaka ka 'eva lele edeana luvana kanaua evakeinia. Dava katania boutai oi ovavai 'eva Dilava ena lo'e kauta iduluta mai ivakula'ilata.

²⁷ Lele edeatai oi oluluva koanai, kau ka'onamo, lua 'o koi mo oi boluluva, beia melala ka'onamoai sia oi boluluva, ka beluva makava inoku ka mulinai boluluva, maivaka kau ka betata'u luva oi oluvala luvana bevakeinia.

²⁸ Beia lele edeata luvata iabikeinita kauna asi'i koanai, lele edeana ai eluluva kauna sia beluva 'unu'unu lo'e do'una kanaua laloanai, ia sibonamo kevanai mai Dilava kevanai beluluva.

²⁹ Enolea kauna ka'onamo, lua 'o koi mo beilolo inoku banota vaidia 'eva luva kataua deluluva luvata belalovailalovai vaita kave'i.

³⁰ Dilava ena luva ka be'asi demimia kaiata devala kauta ka kevanai be'asi koanai, eilolo makava kauna kanaua bevuakao inoku Dilava ena luva e'asi luvana lelenu be'ika.

³¹ Dala kanania'i enolea kaumui boumuiai ka'o ka'o Dilava ena luva oi boluluva, inoku kau boutai beikabasia maivaka bekula'ila.

³² Enolea luvata beluvavai kauta ia 'eva bevi'ima beda'amo eta melala bedaia inoku beluluva.

³³ 'Olana Dilava 'eva sia kau evaakuleta Dilavana, beia ia 'eva nua'elu Dilavana. Dilava ena kau eta lo'e do'uta boutai laloatai devavaia boina,

³⁴ 'a'ate 'eva sia beluluva lo'e do'uta laloatai. Ia 'eva sia maieta komolo beluluva, Mose ena talavatu eluva vitaitana ia 'eva sia be'ola.

³⁵ 'A'ate de'ula dava ka beikabasia koanai eta lumai ua'i adata belavuaite, 'olana ateate ka Dilava ena lo'e do'unai beluluva 'eva maimalalaina.

³⁶ Oi olalovaia Dilava ena luva 'eva oi Kolinto kaumui kevamuiai ela'asi? 'O oi mo sibomui daimuiai easi? Asi'i vaika.

³⁷ Kau ka elalovaia ia 'eva enolea kauna 'o Idume Kabukabuna ena veniveni ka eabia koanai, ia beikabasi kave'i lau dava alele venimui davata 'eva Lovia namana ena talavatu luvata.

³⁸ Beia ia talavatu katania sia beabita dae koanai oi vaka ia lelenu sia oi boabia dae.

³⁹ Kanaua 'ounai, bo'akala'u e, enoleai Dilava ena luva iluvana 'eva oi bokaualo vaia, beia lele edeatai beluluva kauta sia oi bo'outa kao.

⁴⁰ Dava boutai 'eva dala komolonai mai vitaitata umautai oi bovavaita.

15

Keliso Ena Ko'isi 'Udai.

¹ Bo'akala'u e, vali'u lau a'ula vali nama'ina ailolo vaia kevamuiyai valina oi obia kanaua akanai emui abiveni belava 'ini valina bavalalovai 'inimui.

² Vali nama'ina kanaua ailolo vaia kevamuiyai valina oi boabi 'inia koanai mauli oi boabia, kanaua 'ounai oi 'eva sia oi oabiveni 'avaea.

³ Lau vali nama'ina abia valina oi avenimui, kanania 'eva dava namavaikana. Kanaua 'eva Puka Kabukabunai deleleia vitaitana Keliso 'eva ita eta si'avana daitai eba,

⁴ ia dekolēia, inoku Puka kabukabunai deleleia vitaitana melala ivakoinai eko'isi 'udai emauli.

⁵ Ia Petelo kevanai ela'asi makava muliai veauneke kauta 'ouka lua kevatai ela'asi.

⁶ Kanaua mulinai ia 'eva abiveni kauta sinavu ima mai maikalina boutai melala ka'onamoai kevatai ela'asi, kau kataua doutamo 'eva vali'u demauli do'o, ia vaida 'eva 'ani deba.

⁷ Inoku ia ela'asi Iakobo kevanai, muliai veauneke kauta boutai kevatai ela'asi.

⁸ To'ona umaunai 'eva keva'uai vaka ela'asi, lau 'eva pulu dalana umaunai sia apulu kau'u.

⁹ Veauneke kauta boutai vilootai lau 'eva akiki vaika, inoku lau sia maie'u komolo be'ae'u veauneke kau'u, 'olana lau Dilava ena lo'e kauta avaiivivita.

¹⁰ Beia Dilava ena iulaveni koana 'ounai lau 'eva veauneke kau'uai a'ao, mai ena iulaveni koana eveni'u davana anina 'eva sia easi'i. Lau 'eva avinaula kula'ila vaika vakaia veauneke kauta boutai, beia kanaua 'eva lau sia sibo'u avinaula, ia Dilava ena iulaveni koana lau keva'uai davana evakula'ila'u avinaula.

¹¹ Kanaua 'ounai lau ailolo vaia 'o veauneke kauta vaida deilolo vaia, beia Iesu eba mai eko'isi 'udai valina lai ailolo vaia valina oi oabivenia.

Ita Eta Ko'isi 'Udai.

¹² Vali'u lai 'eva Keliso bai eko'isi 'udai kauna valina lai ailolo vaia, inoku dava 'ounai oi vaida oi odiaka bai ko'isi 'udai 'eva asi'i oi okoma?

¹³ Inoku bai ko'isi 'udai asi'i koanai Keliso vaka bai sia bemako'isi 'udai.

¹⁴ Keliso bai sia bemako'isi koanai, lai emai ilolo 'eva anina asi'i, inoku oi emui abiveni vaka anina asi'i.

¹⁵ Kanaua akanai, lai 'eva 'ani dede kaumaiai lai bamao 'olana Dilava valina lai aluvala 'eva ia Keliso bai evako'isia 'udai. Beia bai ko'isi 'udai asi'i koanai, Dilava vaka Keliso bai sia bemavako'isia 'udai.

¹⁶ 'Olana bai ko'isi 'udai asi'i koanai, Keliso vaka sia bemako'isi 'udai.

¹⁷ Inoku Keliso sia bemako'isi 'udai koanai, oi emui abiveni 'eva anina asi'i, oi 'eva si'avana laloanai oi bomamia do'o.

¹⁸ Inoku kanania anina 'eva Keliso deabivenia deba kauta 'eva 'ani bemataule.

¹⁹ Vali'u kanobata maulina kanania sibona mo dainai eta nuabata Keliso enai kane'eadivo koanai, ita 'eva bemalalota vaika vakaia kanobata kauta boutai.

²⁰ Beia luva umauna Keliso 'eva bai eko'isi 'udai. Kanaua 'eva ba kauta eta ko'isi 'udai koana lava'ana'ina.

²¹ Ba 'eva kau ka'onamo ena koakoa dainai easi, vitaitanai bai ko'isi 'udai vaka kau ka'onamo ena koakoa dainai e'asi.

²² Itani Adamu ena si'avana daitai kau boutai deba, vitaitanai Keliso dainai kau boutai bemaui.

²³ Beia ko'isi 'udai dalana umaunai Dilava betata'u ka ka bevako'isita 'udai. Lava'ana'ina 'eva Keliso, muliai 'eva ia ena mue 'udai melalanai ia deabivenia kauta kataua.

²⁴ Kanaua mulinai kanobata to'ona be'asi. Melala kanaua'i Keliso betata'u ka'uba si'avata vaika eta 'ola kauta boutai, lovia kauta boutai, mai siavu kauta boutai bevaoleta, inoku ia ena lovia vanuana bevamuea Kamana Dilava imanai beudala.

²⁵ Keliso 'eva belovia bemimia beda'amo Dilava betata'u 'ou kauta boutai Keliso aena palapalana venunai bene'eta divo.

²⁶ To'onai 'ou kauna Iesu betata'u bevaolea 'eva ba.

²⁷ Puka kabukabuna kanania eluva koma, "Dilava dava boutai ia aena palapalana venunai ene'eta divo." 'Dava boutai' ekoma 'eva ita kaikabasi kave'i Dilava 'eva sia Keliso aena palapalana venunai, Dilava eta'u dava boutai Keliso aena palapalana venunai ene'eta divo.

²⁸ Dava boutai Nakuna ena ikakao venunai beao mulinai, Nakuna sibona betata'u bevuala beda'a Kamana ena ikakao venunai bemimia. Inoku dava boutai 'eva Dilava be'olavai palu kave'i.

²⁹ Ko'isi 'udai bema asi'i koanai, kau devaidi'uta kabukabu 'ani deba kauta kataua ilalovaitai 'eva dava deulavenia 'ounai kanaua dekoma? Ba kauta sia beko'isi 'udai dokadoka koanai, dava 'ounai kau kataua devaidi'uta kabukabu ba kauta daitai?

³⁰ Dava 'ounai lai melala boutai vailamaiaia ba emimia bana sia lai amakau vaia?

³¹ Bo'akala'u e, emui maui Keliso Iesu laloanai maolina kanaua lau apavaia 'ounai luva umauna a'oumui. Lau 'eva melala boutai ba mo vaila'uai emimia.

³² Lau Epesoai kau kataua itani sisi aivalata boita kauta ita kau eta lalovai daitai lai aviaku koanai, ena nama'ina 'eva dava lau keva'uai? Beia ba kauta sia beko'isi 'udai koanai, luva kanania melala boutai deluvala luvana kavavaia, "Ita kaniani mo, kainuinu mo, 'olana mala 'eva ekaba."

³³ Kanaua deluva koma kauta asi'i demalebamui. "Kau si'avata vaika ita oi bovaka'ona 'eva emui koakoa nama'ita bevasi'avanata."

³⁴ Olalovai lalovai kave'i si'avana vinaulata ovikanita, 'olana kanania aluvala 'eva beva malalaimui, oi vaida 'eva Dilava sia oi oikabasia.

Ko'isi 'Udai Kauanina

'Eva Edeana.

³⁵ Beia kau ka belavuai lavuai bediaka, "Ba kauta a beko'isi 'udai koma? Kauani davanai be'ao?"

³⁶ Kanania 'eva bo'o lavuaina. Kea oi ovadoa keana sia beba makava koanai, ia 'eva sia bemaui.

³⁷ Dava ovadoa davana 'eva kea 'avaeana, ama'i witi keana 'o kea edeana ka, beia au kanaua bekukubu auna itoina sia ovadoa.

³⁸ Beia Dilava etata'u kea kanaua kauanina ka evenia ia ena ula vitaitanai, ia etata'u kea ka ka kauanita umauta mo evenita.

³⁹ Mauli davata boutai kauanita 'eva sia vitaita. Kau kauanita edeata, odola sisi kauanita edeata, manumanu kauanita edeata, 'atu sisi kauanita vaka edeata.

⁴⁰ Vutuvutu davata kauanita boutai, mai kanobata davata kauanita vaka boutai. Beia vutuvutu davata kauanita eta nuavi 'eva edeata, kanobata davata kauanita eta nuavi vaka edeata.

⁴¹ Melala ena nuavi 'eva edeana, vuia vaka ena nuavi edeana mo, visiu eta nuavi vaka ka mo. Inoku visiu ka ka eta nuavi vaka edeata edeata mo.

⁴² Inoku ba kauta beko'isi 'udai vaka kanauamo boina, kauani kakolea laloanai ia 'eva epepeda etaule, beia beko'isi 'udai 'eva bemaui keinikeini sia besi'avana.

⁴³ Kakolea laloanai, ikana esi'avana maivaka ebadebade, beia beko'isi 'udai laloanai ikana 'eva benuavi maivaka bekula'ila.

⁴⁴ Kanobata kauaninai kakolea, eko'isi 'udai 'eva idume kauaninai.

Kanobata kauanina 'eva edeana, mai idume kauanina vaka 'eva edeana.

⁴⁵ Puka kabukabunai 'ani ilelena boina, "Kau lava'ana'ina Adamu 'eva maui kauanai eao." Beia Adamu mulinai kauna Keliso 'eva maui eveveni Idumena.

⁴⁶ Idume kauanina sia easi makava, kanobata kauanina e'ana'ia vakaia mulinai 'eva idume kauanina easi.

⁴⁷ Kau lava'ana'ina Adamu 'eva kanobata apulolonai evavaia, kau ivaluana Keliso 'eva vutuvutuai easi.

⁴⁸ Kanobata kauta 'eva kanobatai easi kauna vitaitana, vutuvutu kauta 'eva vutuvutuai easi kauna vitaitana.

⁴⁹ Kanobatai easi kauna ikaikanai ka'ao vitaitana, kanaua 'ounai vutuvutuai easi kauna vaka ikaikanai ekao.

⁵⁰ Bo'akala'u e, lau dava a'oua davana kanania, kauani vidio mai lalai epulu kauanina kanaua Dilava ena lovia vanuanai sia beda'adodo, maivaka kauani bebaba kauanina 'eva sia bemaui keinikeini.

⁵¹ Kaiamui ovala, lau dava vuniana ka bavaikabasimui, ita boutai 'eva sia ekaba palu, beia ita boutai Dilava betata'u bevaedanata,

⁵² bemolau vaika itani maka kava'unumai boina bisi to'ona be'alala laloanai. Bisi 'uluna bevuvua koanai Dilava betata'u ba kauta bevako'isita 'udai sia bebaba kautai be'ao, inoku ita boutai bevaedanata.

⁵³ 'Olana kauani bepepeda kauanina bevaedanala sia bepepeda kauaninai be'ao, maivaka kauani bebaba kauanina bevaedanala sia bebaba kauaninai be'ao.

⁵⁴ Inoku kauani bepepeda kauanina bedeana kauani sia bepepeda kauaninai be'ao maivaka kauani bebaba kauanina bedeana kauani sia bebaba kauaninai be'ao koanai, Puka kabukabunai ilelena luvana 'eva bemomo'ai, "Dilava eta'u ba ena siavu evaolea ba evaolea vaika."

Isa 25.8

⁵⁵ "Ba e, oni bovaba siavuna a'ia'i?"

Ba e, oni bovanana siavuna a'ia'i?"

Hos 13.14

⁵⁶ Ba ena vanana siavuna 'eva si'avana kevanai eabia, beia si'avana ena siavu 'eva talavatu kevanai eabia.

⁵⁷ Dilava ekavanama'inala! Ia eta'u ita kevatai ba ena siavu evaolea eta Lovia namana Iesu Keliso kaunai.

⁵⁸ Kanaua 'ounai, bo'akala'u ma'adi e, oi bolava 'ini, kau ka sia beva'iuvai 'iuvaimui, melala boutai Lovia namana ena vinaula oi bovavai basibasi, 'olana oi oikabasi Lovia namana ena vinaula oi ovavaia 'eva sia oi ovinaula 'avaea.

16

Dilava Ena Kau Iduluta Monina.

¹ Vali'u oi Dilava ena kau Iudeai demimia kauta iduluta daitai moni oi bodoubou luvana 'eva kanania, Dilava ena lo'e kauta Kalatia kanonai demimia kauta a'outa moni dedoubou dalana vitaitana oi bovavaia.

² Masi ka ka bonita lava'ana'ita boutai laloatai oi ka ka emui davali vitaitanai moni kikitā keta oi bone'eta tau oi bodoubou bedouta, inoku lau bavavasi koanai moni doubou do'una ka sia ekavavaia.

³ Lau kevamuiāi bavavasi koanai oi oabita isi kauta luvata iluvana malelena balelea bavenita inoku ekasinita, emui ainama monita beabita beda'a Ielusalema.

⁴ Inoku bema lau mai ia lai badada'a benama'ina koanai, ia lau bebano'u ita lai badada'a.

*Paulo Ena Lalovai
Eva'oluta Lalovaita.*

⁵ Lau alalovaia Makedonia kanonai bakeini makava ia baikata mulinai bavasi kele'emui.

⁶ Lau melala kava'ina mo oi kevamuiāi bamimia 'o ekamia beda'amo 'elu melalana be'ole, inoku e'u da'a to'ato'a 'abuta ka ka badada'a laloatai oi bodulu'u.

⁷ Lau sia a'ula vali'u e'u da'a ai melala kava'inamo 'ileoloai baikamui inoku bakeini badada'a. E'u nuabata 'eva Lovia namana be'ula koanai lau oi ita kamamia dau'a.

⁸ Beia lau 'eva nia'i mo Epeso vanuanai bamimia beda'amo Pentikoste melalana beabia.

⁹ 'Olana Dilava ena vinaula dalana nutualana 'ani eluvuia ena vinaula namana nia'i bavavaia. Beia ivaivivi'u kauta vaka doutamo.

¹⁰ Timoteo bevavasi kele'emui koanai oi boabia dae, nuana oi bovakula'ilala ita oi bomimia asi'i emamakau, ia 'eva Lovia namana ena vinaula evavaia kauna lau bo'u.

¹¹ Sia kau ka ia iabidaena beba'oa, beia oi bodulua oi bosinia mai nua'eluna be'asi, inoku ia bemumue be'asi keva'u, lau 'eva ia a'imala bo'akalata vaidā ita bemumue be'asi.

¹² Bo'akalata Apolo valina 'eva kanania boina, avasiasia kula'ila bo'akalata vaidā ita bevavasi, beia vali'u 'eva sia e'ula, muliai melala nama'ina ka nuana bedaia koanai 'ani bevasi.

Vanama'ina Luvana To'ona.

¹³ Oi bo'imamui kave'i, emui abivenia i oi bolava 'ini, nuamui oi bovapasita, maivaka oi bokula'ila.

¹⁴ Dilava mai kau oi bolalo'au venita, koakoa kanania'i emui vinaula boutai oi bovavai.

¹⁵ Oi oikabasi Akaia kanona laloanai Sitepano mai ena luma kauta ita 'eva delalo'udai makava Dilava ena kauai deao inoku ia sibota eta mauili deveni Dilava ena lo'e kauta deduluta. Bo'akala'u e, lau 'eva oi avasiasimui,

¹⁶ abiveni kauta kataua boita mai vaidā ia ita devinaula ka'ona deduluta kauta leleta oi bo'ika.

¹⁷ Sitepano, Polotunato mai Akaiko deasi 'eva alalonama, 'olana oi oda'a tau laloanai ia 'eva oi 'abumui deabi.

¹⁸ Ia deta'u e'u nua bavunu devaolea, oi emui nua bavunu vaka devaolea. Kau kataua boita 'eva eka abita dae kave'i.

¹⁹ Dilava ena lo'e kauta Asia kanona laloanai kauta eta vanama'ina luvata desinita kele'emui ai, Akula mai Pilisikila eta vanama'ina luvana vaka Lovia namana vanai desinia, mai Dilava ena lo'e kauta ia eta luma laloanai dedodo'u kauta eta vanama'ina luvana vaka desinia.

²⁰ Bo'akalata nia'i demimia kauta boutai eta vanama'ina luvata desinita. Oi ka ka sibomui viba'u kabukabunai oi bovanama'inamui.

²¹ Lau Paulo sibo'u ima'uai e'u vanama'ina luvana kanania alelea.

²² Kau ka Lovia namana sia elalo'au venia kauna ia 'eva sivada laloanai bemimia.

Lovia namana e,
Mai! (Malana Ta!)

²³ Ameamea Lovia namana Iesu ena iulaveni koana kevamuiyai bemimia.

²⁴ E'u lalo'au 'eva oi boumuiyai kevamuiyai Keliso Iesu laloanai. Amen.

Paulo Ena Malele Ivaluana KOLINTO (2) Kauta Kevatai

Puka Laloana Ielena Luvana

Kolinto vanuanai vaikabasi kauta eta vaikabasi luvata si'avata vaika Paulo kevanai deluva 'eva abiveni kauta eta abiveni devavaia si'asi'a. Koakoa kanania 'eva Paulo ena lalovai lalovai ia akatai 'eva nama vaikana. Ena ula 'eva luva o vaikabasi kanania Kolinto kauta kevatai bevakomoloa, kanaua 'ounai malele kanania eleleia, ia ita belalonama 'udai.

Puka kanania paipana lava'ana'ina laloanai Paulo eta'u luva pasisita umauta vaida eluvata la'asi luva kataua Kolinto kauta evenita makava. Paulo eula ia 'eva kanaua sia beluva koma, beia eta apa, lovo ai mai ia deikaia 'iu'iu 'ounai luva pasisita umauta e'outa. Kolinto kauta luva katania 'uluta be'ika inoku bevamomo'aita mai eta koakoi belalo'udai 'eva lalonama bepupulu.

Melala kanaua'i vaka abiveni kauta Iudeai 'eva eta mauili desi'avana. Kanaua 'ounai Paulo vidulu monita vaida evalalo, beabita beda'a bevenita. Kanaua 'ounai Kolinto kauta nuata evakula'ilata, vinaula kanania 'ounai moni vaida beveveni (8 – 9).

Puka to'onai 'eva Paulo ediaka, vaikabasi kauta vaikabasita vaida deda'a devasi'avanala. Ena ula namana 'eva Kolinto kauta vaikabasi vaikabasita kataua leleta sia be'ika.

Puka Iduvuna Namata

- a. Lova aku. (1.1 - 11)
- b. Paulo mai Dilava ena lo'e kauta Kolintoai. (1.12 – 7.16)
- c. Vidulu davata abiveni kauta Iudeai eta. (8.1 – 9.15)
- d. Paulo veauneke kauba ena siavu. (10.1 – 13.10)
- e. Luva to'ota. (13.11 - 14)

Vanama'ina Luvana.

¹ Lau Paulo Keliso Iesu ena veauneke kau'u Dilava ena ula dainai, mai abiveni ai bo'akalata Timoteo itana malele kanania lai alelea evavasi Dilava ena lo'e kaumui Kolinto vanuanai oi omimia maivaka Dilava ena kau boumuiai Akaia kanona itoina laloanai oi omimia kaumui kevamui.

² Lai ameamea Dilava ita Kamata mai Lovia namana Iesu Keliso eta iulaveni koana mai nua'elu 'eva akamuiai bemimia.

Dilava 'Eva Vakula'ila Boutai Olata.

³ Dilava ekavanama'inala ita eta Lovia namana Iesu Keliso kamana. Ia 'eva vilalo mai vakula'ila lalovaita boutai 'olata Dilavana.

⁴ Emal bavunu boutai ia eta'u emai lalovai evakula'ila, kanaua 'ounai Dilava emai lalovai evakula'ilata vitaitanai valiu debavunu kauta nuata lalovaita lai bavakula'ilata vaka bedaia.

⁵ Olana Keliso eana ana vitaitanai lai vaka melala doutamo anaana, inoku melala doutamo vakula'ila lalovaina emai namana e'ao Keliso dainai.

⁶ Lai banaana 'eva oi nuamui ivakula'ilana mai ivamaulimui dainai, lai nuamai bevakula'ila oi vaka nuamui bevakula'ila, 'olana vakula'ila kanaua'i kula'ila oi boabia anaana kataua etai oi bolava 'ini itani lai anaana laloatai alava 'ini boina.

⁷ Emal nuabata namana kevamuiai davana 'eva elava 'ini, 'olana lai aikabasi ita anaana vitaitanai lai mai oi ita sibota nuata bevakula'ilata.

⁸ Bo 'akalamai e, lai a'ula Asia kanonai lai abavunu davata oiboikabasita. Lai anaana adavali 'eva nama vaikata mai demekau si'asi'a vaika, lai bamauli 'eva sia lai anuabata vaia.

⁹ Lai sibomai emai lalovai ai aonovaia 'eva 'ani lai aba. Beia kanania epulu 'eva lai sibomai kaumaiai sia lai babiveni kokonai, 'a ba ai evako 'isita 'udai Dilavana sibonamo lai babivenia 'ounai.

¹⁰ Ia eta'u ba si'avana vaika enai evamaulimai mai vaka bevamaulimai. Mai ia lai anuabata venia bevamaulimai 'udai.

¹¹ Oi vaka oi bodulumai emui meamea ai. Inoku meamea doutamo kataua daitai Dilava bevanama'inamai, Inoku kau doutamo betata'u vanama'ina luvata Dilava bevenia lai daimaiai.

*Paulo Ena Lalovai Eva'olua
Davana Eva'edeia.*

¹² Emai apa 'eva kanania nuamai umaunai lai avamomo'aia, emai maui kanobatai emai vikadia'a oi itana 'eva maillovena mai maikomolona Dilava enai. Lai kanania lai avavaia 'eva sia kanobata ena aonekai, beia Dilava ena iulaveni koana siavunai.

¹³ Lai oi bovaku mai oi boikabasi davanamo lai alele venimui, a'ula bounai oiboikabasi kave'i.

¹⁴ Oi vali'u sia oi oikabasimai kavei beia lau a'ula oi lai oiboikabasimai kave'i, inoku eta Lovia namana Iesu Keliso ena asi melalanai lai oi bapa vaimui vitaitanai oi lai boapa vaimui.

¹⁵ Lau kanania aikabasia kave'i 'ounai, inoku e'u lalovai avalavala 'eva bavasi 'ana'i kele'emui vanama'ina ivaluana oi boabia.

¹⁶ E'u lalovai ava'olua 'eva bavasi kele'emui vakaia bada'a Makedonia, inoku Makedoniai bamumue 'eva ba'asi kele'emui, vakaia oi botatau oibodulu'u bada'a Iudea.

¹⁷ Oi olalovaia e'u lalovai kanaua ava'olua 'eva veaveana avalavala, una? 'O kanobata lalovainai avavaia vakaia melala kaonamoai adiaka "O, 'o" mai "Asi'i, asi'i", una? Asi'i vaika.

¹⁸ Dilava 'eva lele ivavunenina kauna, vitaitanai emai luva evasi kele'emui davana 'eva melala kaonamoai "o" mai 'asi'i' sia lai aluvala.

¹⁹ Sila, Timoteo mai lau oi viloamui lai ailolo vaia kauna Dilava Nakuna Iesu Keliso 'eva melala kaonamoai "o" mai 'asi'i' sia eluvavaia, ia enai 'eva melala bounai luva umauna "o" mo emimia.

²⁰ Olana Keliso 'eva Dilava ena luva 'ana'i boutai evamomo'aita. Kanaua 'ounai Iesu Keliso dainai 'Amen' a'oua Dilava vana ekavanama'inala.

²¹ Oi mai lai ita Keliso laloonai evalava inita kauna 'eva Dilava. Ia eta'u evasiavuta.

²² Ia ena koa kautai ene'eia 'au 'eva ita ia ena maivaka Idumena Kabuk-abuna laloatai ene'eivivo kanaua 'eva bevamaulita koana.

²³ Lau Dilava vanai aluluva maivaka ia e'ulalovai eikabasi, asi'i amavaidibamui nuamui asi'i amavanana 'ounai sia avasi Kolinto.

²⁴ Lai oi emui abiveni sia lai ba'ola vaia 'olana emui abiveni ekula'ila, beia lai 'eva oi ita kavinaula ka'ona nuamui ivanama'inana kokonai.

2

¹ E'u lalovai avalavala 'eva sia bavasi kele'emui nuamui asi'i amavanana dainai.

² Olana lau oi nuamui bavaanana koanai dai beko'isi lau bevanama'ina'u? Ia oi mo emui lalovai 'ani ava anaana kaumui katana.

³ Kanaua kokonai malele kanana aleleia, lau bavavasi melalanai oi lau bovanama'ina'u kaumui emui lalovai asi'i amavanana makauna. Olana lau aikabasi kave'i lau balalonama koanai oi boumuaia vaka oi bolalonama.

⁴ Alele venimui melalanai nua'u eanana maivaka emekau maka'u maiveina, kanaua 'eva sia nuamui bava anaana kokonai beia bavaik-abasimui lau oi alalo'au venimui.

Kele'emui Va'eva Devavai Kauta

Eta Va'eva Oibo'oukao.

⁵ Kau ka eko'isi banona nuana eva anaanala koanai lau nua'u sia eva ananala ia oi boumuiai nuamui eva anaana vaika. Lau sia baluva pasisi si'asi'a vaika ia kevanai.

⁶ Kau kanaua ena si'avana tavana oi matomuiai ota'u mekau ovenia 'eva 'ani edaia.

⁷ Vali'u 'eva ena si'avana oibo'oukao vakaia nuana oi bovakula'ilala, nuana asi'i emavananala si'asi'a vaika makauna.

⁸ Kanaua 'ounai lau oi anoimui, oi ia oi olalovaia dokadoka koana oibo-vaikala.

⁹ Malele kanaua alele venimui 'olana dokadoka 'eva lau baikabasi lele'u oi oda'avai dokadoka melala boutai, 'o asi'i.

¹⁰ Oi kau ka ena si'avana oibo'oukao koanai lau vaka ena si'avana ba'oukao. Lau ia ba'ouakao dainai ena si'avana a'oukao kanaua 'eva oi daimuiai Keliso vilanai avavaia.

¹¹ Kanaua 'eva Satani asi'i emalebata makauna, 'olana ita 'eva ena vikovo vinaulata 'ani kaikabasita.

Paulo Ena Ula Tito Beikala.

¹² Lau ada'a Toloa vanuana Keliso valina nama'ina bailolo vaia koanai dala eluvu lau ua'i Lovia namana ena vinaula bavavaia.

¹³ Beia e'u lalovai 'eva sia enama'ina 'olana bo'akalata Tito ua'i sia adavalia, kaeno ako kau ua'i kauta kevatai inoku ada'a Makedonia.

Ita 'Eva Bona Namaina

Keliso Kevanai Easi.

¹⁴ Beia mo Dilava vanama'ina luvana avenia 'olana Keliso melala boutai eko'isi e'ana'ia vaimai ena mauli kula'ilana laloanai lai amimia, lai Keliso valina nama'ina lai bailolo vaia 'abu itoinai beikabasia itani bona nama'ina epulu odaoda boina.

¹⁵ Lai 'eva bona ka boina Dilava vilanai Keliso kevanai easi kau kataua demauli mai detaule kauta viloatai.

¹⁶ Kau kataua detaule kauta kevatai lai 'eva bona si'avana vaika ba beabia be'asi, kau kataua demauli kauta kevatai lai 'eva bona nama'ina mauli beabia be'asi. Dai edaiala vinaula kanania bevavaia?

¹⁷ Lai 'eva sia vaida doutamo boita, ia 'eva Dilava ena luva tavatava davanai devaao, 'a lai 'eva luva umauna lai ailolo vaia mai emai lalovai umautai Dilava vilanai mai Keliso laloanai itani Dilava esinita kauta boina.

3

Luva 'Ana'i Makamakana

Ena Vinaula Kauta.

¹ Oi olalovaia lai sibomai apa vaimai 'udai, una? 'O vaida devavaia boina, vaida kevatai lai ivanama'inamai maleleta lai baula venita lai ba'abi lai bavavasi kele'emui, 'o oi kevamuiai ivanama'inamai maleleta lai ba'abi lai bada'a vaida kevatai? Asi'i vaika.

² Oi 'eva lai emai malele, nuamaiai ileleta kau boutai deikabasi maivaka devakua.

³ Ela'asi kave'i oi 'eva Keliso ena malele, lai abia asi, 'umai sia eleleia ia mauli Dilavana Idumena Kabukabuna ai eleleia, bika'a akanai sia eleleia ia kau nuanai eleleia.

⁴ Lai kanaua avamomo'ai koma 'olana Dilava vailanai kanaua lai avamomo'iaia Keliso dainai.

⁵ Lai 'eva sia lai adiaka sibomai emai kula'ilai vinaula kanania lai avavaia, 'a kula'ila kanaua 'eva Dilava kevanai easi.

⁶ Dilava eko'isi luva 'ana'i namana makamakana vinaulana lai bavavaia kautai evaaomai, luva 'ana'i namana makamakana kanania 'eva talavatu pukanaia sia ilelena davana ia Idume Kabukabuna ena. Talavatu ilelena davana 'eva ba bevuala be'asi ia Idume Kabukabuna 'eva maui bevenita.

⁷ Talavatu bika'a akanai eleleta vakaia Mose evenia melalanai Dilava ena nuavi ela'asi Mose vailanai e'ailala, e'ailala si'asi'a vaika 'ounai Isalaela kauta sia deikaia 'udai 'udai, sia edau'a 'ailala kanaua maka'i maka'i etaule. Talavatu kanaua ba easi vaia davana nuavi kanaua boina laloanai easi melalanai,

⁸ Idume Kabukabuna ena vinaula kanaua maui easi vaia davana nuavina 'eva aboina namana be'ao koma!

⁹ Kau va'eva abutai bene'eadivo vinaulana enuavi koanai kau komolo bevenita vinaulana nuavina 'eva aboina namana be'ao koma!

¹⁰ Nuavi makavana davana enuavi, beiamo nuavi namana makamakana easi davana dainai nuavi kanaua 'eva itani sia enuavi.

¹¹ Dava emia kovo davana 'eva enuavi koanai, nuavi bemia keinikeini davana 'eva aboina namana beao koma!

¹² Emai nuabata kanania dainai lai aluva kula'ila.

¹³ Mose 'eva mukoai vailana e'alavua 'olana Isalaela kauta 'ailala kanaua etaule davana asi'i demaikala ounai. Lai 'eva vinaula kanaua boina sia lai avavaia.

¹⁴ Eta lalovai 'eva de'alavu dokadoka maivaka vali'u melala kanania talavatu ana'ina pukana devakua laloanai ia nuata lalovaita 'eva muko ka'onamo kanaua'i de'alavuta. Kau ka Keliso ena maui laloanai bedododo 'eva muko kanaua beda'atau.

¹⁵ Vali'u melala katania'i Mose ena talavatu bevakua koanai, muko 'eva nuata lalovaita e'alavu do'o mo.

¹⁶ Beia kau ka bemue 'udai bedada'a Lovia namana kevana koanai, muko ia kevanai davana 'ani iabina ovo.

¹⁷ Lovia namana 'eva Idume, inoku Lovia namana idumena a'ia'i 'eva ita talavatu enai ka'avaea.

¹⁸ Ita boutai vailatai muko iluvuna be'ao Lovia namana ena nuavi ita ekavaialala itani oleole boina, inoku nuatai Lovia namana idumena evinuala 'eva ita ia vitaitana umaunai ka'ao nuavi namana e'ao davana laloanai. Lovia namana 'eva Idume, ia vinaula kanania evavaia.

4

Lavo Nama'ina Vodu Laloanai Boina.

¹ Dilava ena vilalole lai vinaula kanania evenimai lai avavaia, kanaua 'ounai lai nuamai sia debadebade.

² Lai vunianai malalai vinaulata lai avavai davata 'ani lai aito'au, lai dede vinaulata sia avavai maivaka Dilava ena luva sia lai a'oua edeana. Ia luva umauna lai a'ouadae kave'i, kanaua'i kau nuata lalovaita umaunai beikabasi lai kau a boimai Dilava vailanai.

³ Beia vali nama'ina lai ailolo vaia davana kau etai evuni koanai, ama'i kau kataua mo bebaba kauta kevatai 'eva evuni.

⁴ Satani kanobata kanania dilavana eko'isi sia devamomo'aia kauta nuata lalovaita e'alavuta kokonai, vali nama'ina 'ailalana kanaua Keliso ena nuaviai evala'asi deikaia davana sia deikala une. Keliso 'eva Dilava vitaitana umauna kauna.

⁵ Lai sibomai valimai sia lai ailolo vaia, beia lai ailolo vaia lai adiaka Iesu Keliso 'eva Lovia namana, maivaka lai 'eva emui da'ala abi kaumai Iesu dainai.

⁶ Dilava eluva ediaka, "Vabuto'o laloanai 'ailala epulu." Inoku Dilava kanaua eko'isi ena 'ailalai lai nuamai eva'ailalala, Dilava ena nuavi Keliso vailanai evala'asia davana ovona laia'ovo mai lai aikala.

⁷ Lai 'eva vodu boina, nuamai ai lavo nama'ina kanania'i emimia, kanaua etata'u evaikata siavu namana 'eva Dilava kevanai e'asi, ia lai kevanai ai sia e'asi.

⁸ Dala doutamo edeata edeatai lai devabavunumai beia sia lai a'eko, dava doutamo nuamai devabavunuta beia nuamai sia debadebade.

⁹ Doutamo debadu venimai beia Dilava lai sia evikanimai, melala doutamo deakumai deva'ekomai beia sia lai asi'avana.

¹⁰ Kanania boinai melala bounai kauanimaiai Iesu ena ba lai avuala, kanaua 'eva Iesu ena mauli lai kuanimaiai emimia davana bela'asi dainai.

¹¹ Lai amimia emai mauli laloanai melala bounai Iesu dainai ba lai availala, kanaua 'eva lai kuanimai kanania bebaba davana koanai Iesu ena mauli bela'asi.

¹² Kanaua kokonai ba 'eva lai nuamaiai evinuala, ia mauli 'eva oi nuamui ai evinuala.

¹³ Puka kabukabuna kanania eleleia koma, "Lau abiveni 'ounai, aluva." Abiveni koana ka'onamo kanaua'i, lai vaka abiveni 'ounai, lai aluva.

¹⁴ Lai aikabasi Dilava, eta Lovia namana Iesu ba ai evako'isia Dilavana, betata'u lai vaka Iesu ita bevako'isimai ka'ona, inoku oi mai lai bevada'ata ia kevanai ekalavadivo.

¹⁵ Dava katania boutai 'eva oi emui nama'ina dainai lai avavai, kanaua 'eva Dilava ena iulaveni koana kau doutamo bedavalita, inoku vanama'ina luvata doutamo Dilava bevenia, vana beabiaisi.

Vamomo'ai Dalanai Kamauli.

¹⁶ Kanaua 'ounai nuamai sia bebedebade. Kuanimai 'eva bebedebade, beia nuamai 'eva melala ka ka laloatai bemakamaka.

¹⁷ Anaana kava'ina kanania vali'u melala kava'inamo lai akoala davana betata'u nuavi namavaikana mai miakeinikeini bebia be'asi, nuavi kanaua 'eva namavaikana vakaia anaana kanania.

¹⁸ Kanaua 'ounai makata 'eva dava kaika davata kevatai sia bemimia ia sia kaika davata eka ikata, 'olana kaika davata 'eva sia bemia dau'a ia sia kaika davata 'eva bemia keinikeini.

5

¹ Kuanita 'eva luma boina, ita kaikabasi eta luma nia'i kanobatai kamia vaia davana besi'avana vutuvutuai luma ka Dilava bevenita, kanaua 'eva kau imatai sia devavaia ia Dilava sibona evavaia lumana bemia keinikeini.

² Ita vali'u kuanita lumana kanania kamia vaia 'eva eanana vaika, eta ula namana 'eva eta luma vutuvutuai davana kanaua mauli kuanina kamavadodoia tubu'a boina.

³ Ita tubu'a kataua eka vadodota koanai, mai'okota sia bedavalita.

⁴ Kanobata lumana kuanita kanania'i kamia vaia do'o laloanai kamekau mai kanana 'eva sia kanobatai kuanita tubu'ana eka vadadaiaovo 'ounai, beia mauli kuanina tubu'ana vutuvutuai davana eka vadodoia 'ounai,

kanaua 'eva mauili kauanina betata'u ba kauanina 'abuna beabia mauili keinikeini kauaninai be'ao.

⁵ Dilava 'eva vinaula kanania ita etai eva'olua, ia eta'u Idume Kabukabuna evenita vinaula kanania vailai bepupulu davana ivamomo'aina.

⁶ Kanaua 'ounai ita melala boutai nuata ekula'ila. Ita kaikabasi kauanita kanania'i kamimia laloanai Lovia namana emimia 'abuna 'eva dau'ai ita etai.

⁷ Ita 'eva abiveni dalanai kamauli, ia sia dava kaikata daitai.

⁸ Ita nuata ekula'ila maivaka eta ula umauna kauanita lumana kanania ekavikania eka da'a Lovia namana ita ekamia.

⁹ Kauanita lumana kanania'i ekamia 'o ekavikania, luvana asi'i, eta ula namana umauna 'eva Lovia namana nuana ekavanama'inala.

¹⁰ Olana ita boutai Keliso ena lavuai namana vailanai ekalavadiwo belavuaite, ka ka nama'ina 'o si'avana kauani maulinai kavavai vitaitanai tavana eka abi.

Ivaka'ona Vinaulana Ekavavaia.

¹¹ Lai aikabasi Lovia namana aboina ekamakau vaia koma dainai kau lai avaasiasita. Dilava eikabasimai kave'i, inoku lau avavuvunimui oi vaka nuamui umautei kanaua oiboma ikabasimai koma.

¹² Lai 'eva kevamui ai sibomai ivanama'inamai sia lai ao 'udai, beia lai 'eva oi komolo lai avenimui oi boapavaimai, inoku kau ikaikana mo deapa vaia kauta kataua nuata lalovaitai sia delalovai kave'i kauta eta luva oibovamueta.

¹³ Emai koakoa mai emai luvaluva itani bo'o kauta boita koanai u'a 'eva Dilava vana dainai, beia lai akomolo koanai u'a 'eva oi daimui ai.

¹⁴ Kanaua 'eva Keliso ena lalo'au etau lai eva asiasimai. Lai aikabasi kave'i kau ka'onamo ita boutai daitai eba, kanaua anina ita boutai ia ita kaba.

¹⁵ Keliso kau boutai daitai eba kanaua 'eva vali'u demimia kauta ia sibota eta mauilai sia bemimia, 'a Keliso ia daitai eba mai eko'isi kauna dainai bemaui.

¹⁶ Kanaua 'ounai vali'u melala kanania vaila eda'ala laloanai lai kau ka kanobata ena lalovai lalovai dalanai sia ba'oua, 'ana'inai Keliso 'eva kanaua lai a'ouia koma beia vali'u 'eva kanaua boina sia lai alalovaia.

¹⁷ Kau ka Keliso laloanai emimia koanai, ia 'eva 'ani kau makamakana, mauili 'ana'ina 'ani eda'atau ia 'ani kau makamakanai eao.

¹⁸ Dava katania boutai 'eva Dilava evavaite. Dilava eta'u ia mai ita vilota evaka'onamo Keliso dainai, inoku vaka'ona vinaulana evenita kau eka vuata eka asi ia ena kauai be'ao.

¹⁹ Dilava eta'u Keliso dainai ia mai kanobata kauta vilota evaka'onamo, kau eta si'avana sia evakuta. Inoku vaka'ona luvana kanania evenimai lai baluvala.

²⁰ Kanaua 'ounai lai 'eva Keliso nutunai a'ao, Dilava 'eva lai nutumaiai eluva venimui. Lai Keliso vanai oi lai a'oumui. Oi Dilava itana oi bovaka'onamo.

²¹ Keliso 'eva sia si'avana kauna, 'a ita daitai Dilava eta'u si'avana kaunai eva aoa, inoku ita 'eva Keliso dainai komolo kautai eka ao Dilava vailanai.

6

Dilava Ena Vinaula Kauta 'Eva Adedua Laoatai Bevapasisi.

¹ Lai Dilava ita avinaula ka'ona kaumai lai anoimui, Dilava ena iulaveni koana oi oabia davana sia oi bovasi'avanala.

² Olana Dilava eluva ediaka,

“E'u ula melalana umaunai
lelemui aika,
maivaka vamauli melalana umaunai adulumui.”

Isa 49.8

Lau oi a'oumui Dilava ena ula melalana kanaua 'eva vali'u, vamauli melalana kanaua vaka vali'u.

³ Kau ka nuana sia lai avavaia si'asi'a, kau emai vinaula si'asi'a asi'i bemadavalia ounai.

⁴ Ia vailatai lai sibomai lai avamomo'aimai lai Dilava ena vinaula kaumai dala edeata edeata boutai laloatai, kataua 'o bavunu, anaana, mai adedua laloatai lai avapasisi,

⁵ de'odimai, devavabuto'omai mai matotai delavamaiavu, lai avinaula vunu, sia lai amuinai kavei maivaka vikolo eakumai,

⁶ emai loveai, emai ikabasiai, vapisisiai mai koakoa nama'itai, Idume Kabukabuna kula'ilanai mai kau ilalo'autai kau lai avaikata lai Dilava ena tamu ivuana kaumai.

⁷ Luva umauna lai a'ouadae, mai Dilava ena siavuai lai avinaula. Komolo vinaulata 'eva emai kualii davata imamai aveketa aveketai lai a'abi.

⁸ Vaida vamai deabisi vaida vamai devavai si'asi'a, devabo'omai maivaka dema akumai, beia lai Dilava ena vinaula kaumai lai a'ao. Kau dede kaumai devavaia, beia lai 'eva luva umauna lai aluvavaia.

⁹ Kau sia deikabasimai, beia Dilava eikabasimai. Kau delalovaia lai 'ani aba, beia maulimai lai amimia. De'odi si'amai, beia sia lai aba vaika.

¹⁰ Nuamai deanana beia melala boutai lai alalonama. Ulalu kaumai boina beia kau doutamo lai avaloviata. Kevamai dava asi'i boina, beia dava boutai 'eva lai emai demimia.

¹¹ Emai kau Kolinto ai kaumui e, dava boutai vailamui lai a'ouadae, emai lalovai boutai kevamui avala'asi.

¹² Lai 'eva oi alalomui beia oi 'eva lai sia olalomai.

¹³ Lau oi aluva venimui itani naku'u boita, lai avavai kevamui vitaitatai oi bomavavai kevamui, emui lalovai boutai kevamui oi bovala'asi.

Ita 'Eva Mauli Dilavana Ena Lo'e Kabukabuna.

¹⁴ Sia deabiveni kauta ita sia oi bovaka'onamo. Komolo mai si'avana aboina bevaka'onamo koma? 'Ailala mai vabuto'o 'eva sia bemia ka'onamo.

¹⁵ Keliso mai Diabolo nuata lalovaita aboina bevaka'onamo koma? Abiveni kauna mai sia eabiveni kauna laluvana eta lalovai 'eva ka'onamoai sia bemimia.

¹⁶ Dilava ena lo'e kabukabuna mai kau va'ava'ata lalua 'eva aboina bevaka'onamo koma? Ita 'eva mauli Dilavana ena lo'e kabukabuna. Dilava sibona kanania eluva koma,

“Lau 'eva ia ita lai bambia ka'ona,
maivaka sia bavikanita.

Lau 'eva ia eta Dilavai ba'ao,
ia 'eva lau e'u kauai be'ao.”

Lev 26.12

¹⁷ Kanaua 'ounai Dilava eluva ediaka,

“Oi 'eva ia ovikanita
kevatai oda'atau.

'Obu vinaulata sia oi bovavai.
Inoku lau oi babimuidae.

Isa 52.11, Esk 20.34, 41

¹⁸ Lau 'eva oi kamamui ba'ao,
oi 'eva lau naku'u momoluaneta mai 'a'ateta ai oibo'ao.

Kula'ila boutai Loviana namana,
nia lau e'u luva."

2Sam 7.14

7

¹ Kanaua 'ounai, e'u lalo'au kaumui boumuiai e, luva 'ana'i kanania kevatai eluvaia dainai, kauanita mai idumeta deva'obuta davata boutai kevatai eka da'atau eta mauili ekavamakamakata, 'a Dilava ekamakau vaia eta mauili itoina ia ekavenia eka kabukabu.

Kolinto Lo'e Kauta Paulo Lalona Devanama.

² Nuamuiiai emai mia 'abuna oi bovavaia. Lai sia kau ka kevanai va'eva lai avavaia, kau ka ena abiveni sia lai avavaia si'asi'a, maivaka kau ka sia lai alebala ena dava lai a'abi.

³ Luva kanania a'oumui 'eva sia mekau bavenimui dainai. Beia 'ana'inai a'oumui boina, eka mauili ka'ona 'o eka ba ka'ona beia oi 'eva melala boutai lai nuamaiai oi omimiamia.

⁴ Lau 'eva oi abimui isi mai apavaimui si'asi'a, kanaua 'ounai emai anaana laloatai nua'u ekula'ila maivaka alalonama siasia vaika.

⁵ Lai Makedonia ai lai ala'asi koanai lamai lai ani kovo, adedua edeata edeata laloatai lai amia, vaida ita lai aviala, nuamai mai makauta lai amia.

⁶ Beia nuata debadebade kauta nuata evakula'ila Dilavana eta'u Tito esinia easi kevamaiai vakaia nuamai evakula'ilata.

⁷ Kanaua 'eva sia ena asi ai mo, ia oi nuana aboina oi ovakula'ilala valina lai aika 'eva nuamai dekula'ila, maivaka oi oula oi boika'u, keva'uai oi ovavai si'asi'a davanai oi olalo'udai mai lau dai'uai emui vinaula kula'ila valina e'ou mai koanai e'u lalonama namavaikana eao.

⁸ E'u malele kanaua asinia evasi kevamuiiai davana nuamui eva anaana beia, vali'u lau kanaua sia alalovaia. 'Ana'inai, kena alalovaia 'olana malele kanaua nuamui eva anaana.

⁹ Ia vali'u 'eva lalo'u denanama. Sia nuamai deanana dainai, beia emui nua anaana eta'u evalalomui 'udai dainai alalonama. Oi nuamui deanana 'eva Dilava ena ulai epulu, kanaua 'ounai lai daimaiai sia si'avana ka oi odavalia.

¹⁰ Nua anaana kanaua Dilava ena ulai epulu davana 'eva kau enalalovai evaedeana evalalo 'udai vamauli bedavalia, kanaua 'eva sia eka luva vaia. Ia nua anaana kanobata ena ula dainai epupulu davana 'eva ba bevapulua.

¹¹ Nua anaana kanania Dilava ena ulai epulu davana dainai kevamuiiai evapuluta davata oi bolalovaita kave'i. Oi ovinaula kave'i, oi ovamomo'aomui oi 'eva sia maiemui va'eva, va'eva oi obadu vaia, Dilava oi omakau venia, lalo'au iulaveninai oi ovinaula, va'eva oi ovakomolota. Oi 'abu boutai laloatai emui va'eva asi'i davata oi ovala'asita.

¹² Lau alele venimui 'eva sia va'eva evavaia kauna 'o kevanai va'eva epulu kauna dainai, beia Dilava vilanai oi a oi o'imamai koma davana bela'asi dainai alele venimui.

¹³ Kanaua eta'u nuamai evakula'ila kave'i.

Sia kanaua mo, Tito ena lalonama dainai lalomai vaka denama si'asi'a vaika 'olana oi oduluia lalona oi ovanama 'ounai.

¹⁴ 'Ana'inai lau Tito vilanai apa vaimui, eva oi lau sia oi ovamalalai'u. Lai a'oumui luvata boutai 'eva luva umauna, vitaitanai oi ovamomo'ai lai Tito vilanai apa vaimui 'eva luva umauna.

¹⁵ Tito ena lalo'au kevamuiiai davana 'eva namavaikana, 'olana ia elalovai 'inia oi boumuiai lelana oi oika maivaka oi oabiadae maimakaumui mai mai'ola akumui ita.

¹⁶ E'u lalonama 'eva namavaikana 'olana aikabasimui kave'i oi emui koakoa denama'ina.

8

Makedonia Ai Abiveni Kauta Mailalonamata Ainama Deveni.

¹ Bo'akalamai e, lai a'ula oi boikabasi Dilava ena iulaveni koana ia ena lo'e kauta Makedonia ai kauta evenita.

² Ia anaana namavaikana laloanai demimia maivaka deulalu vaika, beia mailalonamata ainama doutamo deveveni.

³ Lau oi kevamui'ai ia avamomo'aita, dava kevatai davata doutamo deveveni, maivaka sibota eta ulai deveni keini.

⁴ Ia melala doutamo denoim'ai, ia vaka Dilava ena kau Ielusalemai kauta iduluta vinaulana bevavaia.

⁵ Eta veniveni kanaua 'eva namavaikana lai alalovaia davana dekeinia. Lava'ana'iana 'eva sibota devenita Lovia namana enai be'ao, mai Dilava ena ulai sibota devenita lai emai ai be'ao.

⁶ Kanaua 'ounai Tito lai anoia, ia ani ainama vinaulana kanania viloum'ai emakavala 'ounai, bedulumui beda'amo vinaula kanania oi bovaolea.

⁷ Dava boutai 'eva oi ovavai kavei, emui abiveni ai, emui luvai, emui ikabasiai, emui ula ai, maivaka emui lalo'auai kevamaiai davana. Kanaua 'ounai lai a'ula ainama vinaulana kanania vaka oi bovavai kave'i.

⁸ Lau sia talavatu ka ane'eadivo. Beia e'u ula 'eva vaid'a eta vidulu aboina kanaua bavala'asia kevamui'ai vakaia baikabasi oi emui lalo'au 'eva umauna.

⁹ Oi 'ani oikabasi eta Lovia namana Iesu Keliso ena iulaveni koana a enama koma. Ia 'eva lovia kauna, ia oi daimui'ai ulalu kaunai eao, 'olana ena ulaluai oi bevaloviamui.

¹⁰ Lau e'u lalovai vidulu vinaulana kanania enai 'eva kanania boina, oi vikau mulitai dava oi omakavala davana oi bomavaolea 'eva mai emui nama'ina. Vinaula kanania 'eva oi omakavala maivaka oi ovavaia mainu-amui itoinai.

¹¹ Kanaua 'ounai vali'u vinaula kanania oibovavaia beda'amo oibovaolea. Imakavana oi oula vaia 'ounai kevamui'ai demimia davata oibovaole.

¹² Oi emui ulai oi boveveni koanai, Dilava betata'u emui'ai demimia davata oibovenia kataua beabitadae, 'a kevamui'ai dava asi'i davata lovata sia be'aku.

¹³ Oi kevamui'ai bemekau vaid'a kevatai beveavea, kanaua boina koanai ua 'eva sia lau e'u ula. Beia lau a'ula ka ka boutai ekavitaita.

¹⁴ Vali'u melala kanania kele'emui dava doutamo kaumui kele'eta dava asi'i kauta oi boduluta, Inoku oi kevamui dava asi'i koanai ia eta dava bedouta laloanai oi bedulumui. Inoku boutaina vidulu vitaitamo eka abia.

¹⁵ Puka Kabukabunai 'ani ilelena boina, "Dounamo edoubou kauna ena sia edounamo vaika, vitalua edoubou kauna ena sia vitalua vaika."

Paulo Vinaula Kauta Tito Mai Banona Ita Esinita Deda'a Kolinto.

¹⁶ Dilava vanama'ina luvana avenia, 'olana emai ula lai badulumui davana vitaitana Tito vaka eula.

¹⁷ Emai noinoi ia bevasi kevamui'ai noinoina eabiadae. Sia emai noinoi mo dainai, ia sibona vaka eula vaika bevasi kele'emui.

¹⁸ Bo'akalata ka lai asinia Tito ita devavasi, ia 'eva vali nama'ina eilolo vaia dainai Dilava ena lo'e kauta boutai devanama'inala kauna.

¹⁹ Sia kanaua mo dainai, ia 'eva Dilava ena lo'e kauta deta'u deabia isi lai bebanomai mai bedulumai, itana eta lalo'au ainama monina kanania lai

babia bada'a Ielusalema. Kanaua 'eva Lovia namana nuavina dainai mai vidulu vinaulana lai bavala'asia ita eta ula 'eva eka vidulu.

²⁰ Lai a'imamai kave'i 'olana lai lalo'au ainamana monina namavaikana kanania lai ba'imala laloanai kau ka va'eva ka asi'i emadavalia inoku asi'i emaluva si'asi'a 'ounai.

²¹ Lai aula vinaula nama'ina mai komolona lai bavavaia sia Lovia namana mo vailanai ia kau vailatai vaka.

²² Vaka bo'akalata edeana ka vaka lai asinia itana devavasi, melala doutamo lai avakovoa eva lai aikala ia 'eva ena ulai evidulu. Vali'u ia 'ani eikabasimui kave'i laloanai eula vaika bevidulu.

²³ Tito 'eva lau bano'u lai avinaula ka'ona oi idulumui. Mai bo'akalata kataua ia itana devavasi kauta 'eva Dilava ena lo'e kauta deabita isi kauta Keliso ena nuavi bevala'asi'ounai.

²⁴ Kanaua 'ounai emui lalo'au koana oi bovaikata, Inoku Dilava ena lo'e kauta boutai bevamomo'aia maivaka beikabasi oi lai apa vaimui 'eva ekomolo.

9

Veniveni Vinaulana Oibovavaia Dilava Ena Kau Iduluta.

¹ Dilava ena lo'e kauta kabukabuta Iudeai kataua iduluta vinaulana valina malelana balele venimui 'eva sia a'ula.

² Olana lau aikabasi oi o'ula oi bovidulu, 'ounai abiveni kauta Makedoniai kataua vailatai apa vaimui, aluva adiaka, "Akaia kauta 'eva 'ani vikau mulitai deva'olu beveveni." Emui veniveni kula'ilana kanaua eta'u eva asiasita beveveni.

³ Vali'u bo'akalata katania asinita devavasi 'olana 'eva lai apa vaimui kanaua anina asi'i ema asi'i ounai. Ia lau a'oumui vitaitanai emui veniveni davana kanaua oi bova'olua.

⁴ Bema Makedonia kauta vaida ita lai bavavasi inoku beikamui sia oi ova'olu koanai, sia oi mo bomalalai, lai apa vaimui kanaua dainai lai bamamalalai si'asi'a.

⁵ Kanaua 'ounai lau alalovaia benama'ina bo'akalata katania banoita be'ana'ia bevasi kele'emui emui ainama davana oi o'ouia 'ana'i kanaua oi bova'olua. Inoku lai bala'asi koanai vidulu davana 'eva ani e'olu, kanaua betata'u bavaikata oi oveni 'eva mainuamui bounai, ia sia vasiasi dainai.

⁶ Oi bolalovai kave'i, kea vitalua mo bevavado kauna iani vitalua mo be'uaisi, 'a kea doutamo bevavado kauna iani doutamo be'uaisi.

⁷ Oi ka ka sibomui emui ula vitaitanai oi boveveni, ia sia mailaloto'ato'a mui 'o vasiasi 'ounai oi boveveni. 'Olana Dilava 'eva kau nuana medianai eveveni kauna elalo'au venia.

⁸ Dilava enai edaia ena ainama koana bevenimui 'eva bevenimui keini, inoku melala boutai dava nama'ita emuai 'eva bedouta, inoku oi emui vidulu vinaulata namaita doutamo oibovavai.

⁹ Puka Kabukabunai ilelana ediaka,

"Ia eta'u dava nama'ita

doutamo ulalu kauta evenita nuana nama'inai, ena vinaula komolo 'eva bemia keinkeini."

Sal 112.9

¹⁰ Dilava eta'u vinaula kauna kea evenia mai iani evenia Dilavana betata'u kea doutamo bevenimui oi bovaivado, bevakubuta, emui vinaula nama'ita vuata doutamo bevapuluta.

¹¹ Ia oi kevamui'ai dava boutai doutamoai beva'oa vaka'ia melala boutai oi boveveni. Inoku emui ainama davata lai babita bada'a kevata koanai kau doutamo Dilava enai vanama'ina luvana beluvala.

¹² Veniveni vinaulana kanania oi ovava'ia 'eva Dilava ena kau kabukabuta iduluta vinaulana mo sia evava'ia, 'a vinaula kanania betata'u kau doutamo vaka vanama'ina luvana Dilava bevenia.

¹³ Emui veniveni vinaulana kanania eta'u Keliso valina nama'ina oi o'ouiadae mai vinaula oi ovava'ia davana evamomo'aia, maivaka emui ainama vinaulana ia etai mai kau boutai etai davana evamomo'aia, kanaua 'ounai kau Dilava bevanama'inala.

¹⁴ Bemeamea oi akamui'ai koanai, kevamui ai belalovai si'asi'a 'olana Dilava ena iulaveni koana namavaikana oi emui'ai 'ounai.

¹⁵ Vanama'ina luvana Dilava ekavenia ena ainama namavaikana kevatai davana dainai, ainama kanaua valina luvai eka luvala kave'i 'eva sia bedaia.

10

Paulo Ena Vinaula

Eani Si'asi'a Vaia.

¹ Kau vaida dediaka lau oi kevamui'ai amimia 'eva amia mamedu mamedu, 'a adada'a dau'ai koanai akula'ila. Lau Paulo sibo'u Keliso nuana nama'inai mai ena lalo'au ai anoimui,

² kau luvamai deluva dediaka kanobata ena dalai lai amauli dekoma kauta kevatai baluva pasisi, beia lau oi anoimui emui koakoa ai oi bokomolo, bavasi kevamui'ai koanai asi'i amaluva pasisi.

³ Kanobata kanania laloanai kamimia beia ita 'eva kanobata kauta dekuai dalanai sia kakuali.

⁴ Eta kualo davata 'eva sia kanobata ena kualo davata boita, beia Dilava ena kualo davata kula'ilata. Kataua diabolo eta mia abuta pasisita vaka beakuta mukamuka.

⁵ Ita kau eta lalovai dedeta mai apa davata kataua Dilava ikabasina dalana de'alavua davata kakuta mukamuka, kau nuata lalovaita boutai kavuata ka'asi Keliso lelana beda'avai.

⁶ Oi boumui'ai Keliso lelana 'ani oi oda'avai palu kave'i koanai, lai bava'olu lelana sia deda'avai kauta kataua mekau lai bavakoata.

⁷ Oi 'eva dava mulitamo oi o'ika. Kau ka elalovaia ia Keliso ena kau koanai, ia sibona belalovai kave'i 'ana'i, 'olana lai vaka Keliso ena kau ia boina.

⁸ Lovia namana siavu evenimai 'eva emui mauili lai bavakula'ilata, ia sia lai bavasi'avanata, kanaua 'ounai siavu kanaua apa vaia vaika 'o dava, beiamo kanaua 'eva sia amalalai vaia.

⁹ Lau sia a'ula oi bolalovaia bodiaka bavamakaumui 'ounai malele katania aleleta.

¹⁰ Kau vaida dediaka, "Paulo ena malele luvata 'eva demekau maivaka dekula'ila, beia ia sibona umauna e'asi kevata 'eva ebadebede mai ena luva vaka 'eva mamedu mameduta anita asi'i."

¹¹ Kau kanania deluluva koma kauta belalovai kave'i, malele laloatai dava lai alelele davata mai lai umaumai lai bavavasi kevamui'ai koanai dava lai bavavai davata 'eva vitaitamo sia dedeana.

¹² Lai sia a'ula kau kataua sibota deabitaisi kauta ita lai bavaita. Ia 'eva aonekata asi'i. Ia sibota vilootai eta koakoa sibota devakovo.

¹³ Beia lai emai apa 'eva sia bekeini vaika, ia Dilava vinaula evenimai lai bavavaia vinaulana 'abunaimo bemimia, oi vaka vinaula kanaua laloanai oi okula'ila.

¹⁴ Lai emai apa 'eva sia ekeini vaika, Keliso valina nama'ina lai avasi vaia makava kevamui'ai 'ounai, emai apa 'abuna sia lai bavikania.

¹⁵ Kanaua 'ounai Dilava emai vinaula 'abuna e'ouia davana avekenai kau vaida vinaula vitaitana devavaia vinaulana sia lai apa vaia. Beia lai emai ula namana 'eva oi emui abiveni namana be'ao vakaia lai emai vinaula Dilava kevamui'ai e'ouia vinaulana vaka namana be'ao.

¹⁶ Kanaua 'ounai lai 'eva vali nama'ina lai bailolo vaia dau'a kanobatata vaidai ua'i sia kau ka eilolo kovo 'abuta kauta kevatai. 'Olana kau ka ena vinaula 'abunai vinaula 'ani evavaia vinaulana sia lai bapa vaia.

¹⁷ Puka Kabukabunai 'ani ilelena boina,
 "Dai e'ula be'apa 'eva
 Lovia namana dava evavaia davana beapa vaia."

Ier 9.24

¹⁸ Olana kau ka sibona nama'inana e'oua kauna Lovia namana ia sia eabiadae, beia Lovia namana ia sibona kau evamomo'aia enama'ina kauna eabiadae.

11

Paulo Mai Veauneke Kauta Dedeta.

¹ Lau a'ula 'eva oi boika'uvadai, kena abobo'o, beia oi bovapasisi.

² Lau 'eva oi amana venimui, itani Dilava emama venimui boina. Oi 'eva vato makamaka boina, aluva makava venimui kau ka'onamo oi boadavala, kanaua 'eva Keliso.

³ Beia lau nua'u ebavunu, 'olana kau'asi eta'u Eva elebaia eva akuleala vitaitanai oi vaka lalovai si'avata vaika betata'u nuamui beva akuleata Keliso ikukudivo venina dalana asi'i oi omavikania.

⁴ 'Olana kau ka e'asi sia Iesu lai ailolo vaia kauna ia Iesu edeana ka eilolo vaia kauna sia oi o'alavua ia oi oabidaae mailalonamamui, maivaka Idume Kabukabuna mai vali nama'ina kevamaiai oi oika valita sia oi oabidaae beia idume edeana mai vali edeana eilolo vaita davata oi oabitadae.

⁵ Lau alalovaia veauneke kauta namata kanaua deko kauta devavasi kele'emui 'eva sia denama'ina vaika vakaia lau.

⁶ Beiamo, ama'i luvaluvai 'eva sia edai'u, ia aoneka ai 'eva edai'u, kanania 'eva melala boutai mai dala boutai laloatai lai avala'asi kave'i kevamui'ai.

⁷ Dilava valina nama'ina kevamui'ai ailolo vaia 'eva tava'u sia akakavu, koa kanaua'i sibo'u avakiki'u oi babimui isi ounai. Inoku kanaua 'eva avavai si'asi'a, una?

⁸ Lau oi viloamui'ai avinaula laloanai, Dilava ena lo'e kauta vaida vanua edeanai kauta dedulu'u, lau 'eva kevatai moni abi 'avaea, moni kanaua'i oi badulumui 'ounai.

⁹ Lau kevamui'ai amia laloanai moniai oi bomadulu'u dainai sia av-abavunumui, bo'akalata Makedoniai deasi 'eva dava aula veni davata boutai deveni'u. Itani makavana melalatai mai vaila melalatai, maivaka lau 'eva sia bavabavunumui kovo.

¹⁰ Keliso luvana umauna nua'uai emimia davana aluvala, lau e'u apa kanania 'eva Akaia itoina laloanai sia kau ka be'alavua.

¹¹ Sia alalo'au venimui 'ounai kanania aluva koma, una? Asi'i. Dilava eikabasi alalo'au venimui.

¹² Lau vali'u tava sia akavua davana vinaulana bavavaia do'o inoku veauneke kauta kanania deko kauta vaida eta apa luvana deluvaia dediaka, "Ia 'eva ita itana dala ka'onamoai kavinaula," kanaua ba'alavua dainai.

¹³ 'Olana kau kataua 'eva sia veauneke kauta umauta, ia 'eva veauneke kauta dedeta, eta vinulai 'eva dededede, maivaka ikata devaedeana itani Keliso ena veauneke kauta boita.

¹⁴ Sia eka makalea, 'olana Satani vaka sibona ikana evaedeia itani 'ailala aneluna boina.

¹⁵ Kanaua 'ounai ena veauneke kauta ikata bevaedeanata itani komolo vinaulana devavaia kauta boita 'eva kevatai sia epasisi. Muliai 'eva eta koakoa si'avata vaika tavata vitaitata be'abi.

*Paulo Ena Anaana
Veauneke Vinaulana Laloanai.*

¹⁶ Aluva udai, sia kau ka belalovaia lau 'eva bo'o kau'u. Beia kanaua oi bolalovaia koma koanai, oabi'udae itani bo'o kau'u boina inoku lau e'u apa kena bekiki.

¹⁷ Lau dava luvana aluvala davana Lovia namana kevanai sia easi, apa lualuvana aluluva 'eva itani bo'o kauna ka boina.

¹⁸ Beia kau doutamo 'eva kanobatai dava dava devavai davata deapa vaita, inoku lau vaka kanaua bakoma.

¹⁹ Oi sibomui oi olalovaia oi okomolo si'asi'a vaika, kanaua 'ounai bo'o kauta 'eva oi oabitadae.

²⁰ Oi kau ka esinimuilao esinimuimai, elebamui, 'o evabo'omui, kevamuiiai eva namala, 'o vailamui epipi'a 'eva oi oabiadae.

²¹ Lau 'eva sia kanaua avavai koma. Oi olalovaia lau abadebade 'ounai kanaua sia avavaia, 'o kanaua sia avavaia davana bamalalai vaia, una?

Beia kau ka dava ka beapavaia koanai, (lau aluvaluva 'eva bo'o kauna boina) lau vaka ba'apa ia boina.

²² Ia 'Ebelu kauta, lau vaka 'Ebelu kau'u. Ia Isalaela kauta, lau vaka Isalaela kau'u. Ia Abela'amo 'ava'avana, lau vaka Abela'amo 'ava'avana.

²³ Ia Keliso ena da'ala abi kauta, una? (Lau aluvaluva 'eva itani bo'o kauna ka,) beia lau 'eva da'ala mai kau'u nama'i'u vakaia ia. Lau 'eva avinacula kula'ila vaika, melala doutamo avabuto'o, de'odi si'a'u, maivaka melala doutamo kevaimo bemavaba'u.

²⁴ Melala ima Iuda kauta i'odi mekauta boutai koinavui kalavanika (39) deveni'u.

²⁵ Melala koi Loma kauta auai de'odi'u, maivaka melala ka'onamo bika'a ai deaku'u. Melala koi aele'au asita deuku, vilodatai ka 'eva boni ka'onamo itoina 'atu laloanai avule.

²⁶ E'u da'a to'ato'a doutamo laloatai lau 'eva si'avana doutamo abu katania'i adavali, nutu abaka etai, vinoa kauta kevatai, sibo'u e'u pulu kauta mai pulu edea kauta etai, si'avana vaidia 'eva vanua namata laloatai, kano'akutai mai 'atubatai adavali, dedeai devikadi'a'a'u kauta etai vaka si'avana adavali.

²⁷ Lau 'eva avinacula mai abavunu, melala doutamo sia amuinai, vikolo eaku'u maivaka ato'u elada, melala doutamo iani keva'u asi'i, e'u muinai abuna asi'i maivaka tubu'a'u asi'i.

²⁸ Sia kataua mo, beia melala doutamo Dilava ena lo'e kauta 'abu edeata edeatai demimia kauta i'imata daitai nua'u ebavunu.

²⁹ Kau ka ebadebade koanai lau vaka abadebade, kau ka si'avana laloanai devadodoa koanai lau nua'u e'avala.

³⁰ Lau ba'apa koanai, dava kataua lau e'u badebade devala'asia davata bapa vai.

³¹ Dilava eikabasi lau sia adedede. Ia 'eva Dilava ita eta Lovia namana Iesu Keliso Kamana, Ia vana ekavanama'inala keinikeini.

³² Lau Damaseko ai amia koanai lovia 'olana vana Aleta ena Kavana kauna eta'u 'ima'ima kauta vanua namana nutualana aunai ene'etadivo belio'u.

³³ Beia bo'akalata vaidia deta'u aleka ka laloanai deuda'u lani elavivia dodo nutualana 'ilenai deva'ovu'u, ia kevanai aveau ovo.

¹ Apa 'eva sia dava ka nama'ina evapulua, beia lau 'eva ba'apa mo. Vali'u Lovia namana dava vaidā enoleai mai evaika'u davata luvata baluluva.

² Vikau 'oukavani (14) deda'a laloanai lau Keliso ena kau ka aikabasia kauna deabia isi devuaia deda'a vutuvutu ivakoina davana laloanai. (Lau sia aikabasi, kanania 'eva kau kauaninai eda'a 'o idumenai eda'a, Dilava mo sibona eikabasi.)

³ Aluva 'udai, kau kanania 'eva deabia isi deda'a Paladaiso laloanai. (Lau sia aikabasia, kanania 'eva kauanai eda'a 'o idumenai eda'a, Dilava mo sibona eikabasi.)

⁴ Vaka ua'i luva vaidā kau nututai bermaluva sia bemadaita, mai dava kataua valita kau sia beluvavai davata 'uluta eika.

⁵ Lau kau kanania boina kauna bapavaia, ia lau sibo'u sia bapa vai'u, mai dava kataua e'u badebade deva la'asia davatamo bapavai.

⁶ Lau bamaula bama apa koanai, lau 'eva sia bo'o kau'uai bamaao 'olana lau 'eva luva umauna bamaluvala. Beia lau sia ba'apa, 'olana lau sia a'ula oi ka lau dava avavai oi oika'u mai aluva luvata 'uluta oi oika daitai asi'i oi omadiaka lau 'eva namavaika'u.

Paulo Sia Be'apa.

⁷ Dava nama'ita vaika aikata daitai asi'i ama apa si'asi'a 'ounai Dilava kauani'uai anaana namana ka evapulua be'alavu'u, Satani 'eva anaana kanania laloanai evinuala beva'eko'u maivaka be'alavu'u sia ba'apa.

⁸ Melala koi ameamea Lovia namana anoia anaana kanania keva'uai davana beabia ovo.

⁹ Beia Lovia namana e'ou'u ediaka, "E'u iulaveni koana mo bavenimu, 'olana oni obadebade koanai e'u siavu 'eva namavaikana e'ao." Kanaua 'ounai e'u badebade abutai a'apa 'eva lalo'u denamavaika, 'olana Keliso ena siavuai be'alavu'u dainai.

¹⁰ Keliso dainai lau abadebade, luva si'avata vaika aka'uai deluvavai, deva anaana'u, debadu veni'u maivaka deva adedua'u laloatai 'eva lalo'u denanama. 'Olana lau abadebade koanai lau 'eva akula'ila vaika.

Paulo Ena Lalovai Namana Kolinto Kauta Kevatai.

¹¹ Oi ovasiasi'u 'ounai lau e'u koakoa 'eva itani bo'o boina. Oi 'eva lau dai'uai vali nama'ina oi bomaluvala kaumui. Ia ama'i sia maie'u nama'ina, beia emui veauneke kauta namata kanania deko kauta lau aka'uai sia dekeini.

¹² Lau viloumuiai amia koanai nua'u avapasisia, koa edeata edeata mai vatabulovo vinaulata mai siavu koata avavai davata deta'u devamomo'ai'u lau 'eva Keliso ena veauneke kau'u ka.

¹³ Dilava ena lo'e kauta 'abu edeata edeatai demimia kauta kevatai vinaula avavai vinaulata vitaitata mo oi kevamuiiai avavai. Beia oi kevamuiiai 'eva tava'u sia akakavu. Kanaua 'eva avavai si'asi'a koanai, e'u si'avana o'oukoo.

¹⁴ Valiu kanania 'eva melala ivakoina lau ava'olu bavasi baikamui, maivaka lau 'eva sia bavamekaumui. 'Olana lau 'eva oi mo aula venimui, ia emui lavo sia aula veni. Mai melo 'eva kamata mai sinata eta dava sia beva'olu, beia kama mai sina 'eva betata'u melo eta dava beva'olu.

¹⁵ Kanaua 'ounai lau 'eva mai lalonama'u e'u dava boutai bavenimui mai lau sibo'u vaka baveni vai'u oi idulumui dainai. Alalo'au venimui vaika 'ounai emui lalo'au bekiki keva'uai, una? Asi'i, sia kanaua bekoma.

¹⁶ Oi boumuiiai oi oikabasi, ua 'eva lau sia mekau avenimui, beia kau vaidā dediaka lau 'eva ava akuleamui dedeai alebamui.

¹⁷ A alebamui koma? Asinita kauta kevatai alebamui emui dava abita, una? Asi'i, oi oikabasia lau kanaua sia avavaia.

¹⁸ Lau Tito asinia evasi kele'emui koanai bo'akalata ka vaka asinia lalua devasi, 'eva Tito elebamui emui dava eabi, una? Asi'i, Tito mai lau lai lalua 'eva nuamai ka'onamoai lai avinaula maivaka dala ka'onamoai lai adada'a.

¹⁹ Oi ama'i olalovaia melala boutai lai 'eva sibomai emai komolo dalana kevamui lai akavua, una? Asi'i. Dilava vailanai lai 'eva Keliso ena vinaula kaumai luva katania lai aluva vaita, maivaka dava lai avavai davata boutai 'eva oi emai kau ma'adi idulumui dainai.

²⁰ Lau 'eva nua'u ebavunu, 'olana bavavasi koanai, lau alalovaimui vitaitanai badavalimui 'o asi'i, oi vaka oi olalovai'u vitaitanai oi bodavali'u 'o asi'i. Lau nua'u ebavunu dava katania asi'i kevamui amadavalita 'ounai, viala mai mama, badu mai idono, luva si'avata mai 'oukeinikeini, apa mai vinaula si'asi'a.

²¹ Lau 'eva nua'u ebavunu, 'olana bavasi 'udai koanai e'u Dilava betata'u bevamalalai'u vailamui, 'olana doutamo 'ana'inai koakoa 'obutai devavai si'asi'a 'ounai, eta kulakula mai eta malalai koakoatai sia delalo 'udai kataua daitai bakakani.

13

Paulo E'outa Abiveniai Bemimia.

¹ Vali'u kanania 'eva melala ivakoina lau bavasi kevamui. Puka Kabuk-abunai ilelena boina, "Va'eva ka 'eva makatai deikaia kauta lua 'o koi eta luvi eka vamomo'aia."

² Lau e'u da'a to'ato'a ivaluana kevamui koanai 'ana'inai oi ova'eva kaumui avaikabasimui. Beia vali'u dau'ai amimia laloanai kau kalina boumui avaikabasimui 'udai. Lau bavasi 'udai kele'emui koanai va'eva kaumui boumui mekau oi boabia.

³ Oi 'o'ula oi bovamomo'aia Keliso 'eva lau nutu'uai e'ao eluva venimui. Inoku oi oikabasi Keliso ena vinaula 'eva oi kevamui sia ebadebade, ia ena siavu kevamui 'eva ekula'ila.

⁴ Luva umauna Keliso 'eva badebade dainai au ido'o valaukuna akanai deaku bala, beia vali'u Dilava ena siavuai ia emauli emimia. Luva umauna Keliso ena mau li laloanai lai vaka lai abadebade, beia emai vikadi'a'a kevamui vikadi'a'ana laloanai Dilava ena siavuai Keliso ena mau li laloanai lai bamimia lai badulumui.

⁵ Sibomui emui mau li oikata kave'i, maivaka sibomui oikabasimui kave'i oi 'eva abiveni laloanai oi omimia 'o asi'i. Oi oikabasi Keliso Iesu 'eva emui mau li laloanai emimia. Asi'i koanai oi 'eva sia oi ovamomo'aimai dokadoka.

⁶ Lau aula oi boikabasi lai 'eva Keliso ena veauneke kaumai umaumai.

⁷ Lai Dilava kevanai lai ameamea oi sia va'eva ka oibovavaia dainai. Lai Keliso ena veauneke kaumai 'o sia veauneke kaumai beia kanau 'eva nuamui sia bevavavunu, ia emai ula namana 'eva oi vinaula komolota oi bovavai.

⁸ Lai 'eva luva umauna ivasi'avanana vinaulana sia ka lai bavavaia, ia iduluna vinaulana mo lai bavavaia.

⁹ Lai abadebade beia oi okula'ila koanai laloma denanama. Inoku lai ameamea oi bokomolo vaika.

¹⁰ Kanau 'ounai dau'ai amimia laloanai luva katania aleleta devavasi kele'emui, inoku bavavasi koanai Dilava siavu eveni'u siavuna akanai asi'i amalava pasisi venimui. Siavu kanania 'eva emui abiveni bevanamala ia sia bevasi'avanala.

Luva To'ona.

¹¹ Luva to'onai, bo'akala'u e, vali'u 'eva boumui oi bolalonama. Oibovinaula kula'ila emui abiveni oi bokomolo vaika. E'u noinoi luvata oi

boabidae, ka ka nuamui beka'onamo maivaka nua'eluai oibomimia. Inoku lalo'au mai nua'elu Dilavana 'eva kevamuiiai bemimia.

¹² Dilava ena vanama'inai ka ka oi bovanama'inamui.

¹³ Dilava ena kabukabu kauta boutai eta vanama'ina luvata desinita kevamuiiai.

¹⁴ Lovia namana Iesu Keliso ena iulaveni koana mai Dilava ena lalo'au mai Idume Kabukabuna ena vaka'onamo 'eva akamuiiai bemimia.

Paulo Ena Malele **KALATIA** Kauta Kevatai

Puka Laloana Ielena Luvana

Melala kataua'i kau lava'ana'ita umauta Iesu mulinai deda'a kauta 'eva Iuda kauta. Beia Iesu eta'u Paulo veauneke kaunai evaaaoa inoku esinia eda'a puluedea kauta kevatai vali nama'ina beilolo vaia. Kau doutamo abiveni kauta ita devaka'onamo. Beia adedua namana ka epulu. 'Ana'inai kau kataua 'eva Mose ena talavatu sia deda'a vaita kauta, itani Iuda kauta Mose ena talavatu deda'a vaia boita, inoku abiveni kautai deao koanai talavatu kataua beda'a vaita o asi'i? Kau vaida 'eva ia deva asiasita iva beabia Iuda kauta eta koakoa vitaitanai, inoku ia betata'u Mose ena talavatu beda'a vaita.

'A Paulo ediaka kanaua 'eva sia dava namana, ita Iesu Keliso eka abivenia 'eva Dilava vailanai eka komolo. Iuda kauta vaida 'eva deda'aua'i Kalatiai, inoku deula abiveni kauta ua'i beva asiasita Mose ena talavatu beda'avaita. Vinaula kanania 'eva Kalatiai epulu inoku Paulo valina eika. Kanaua 'ounai puka kanania eleleia, eta abiveni mai eta koakoa kanaua bevakomoloa.

Lava'ana'inai Paulo ediaka Dilava eta'u ia edilaiia veauneke vinaulana bevavaia. Maivaka ediaka kau kataua Iesu Keliso enai deabiveni kauta 'eva Dilava vailanai dekomolo. Inoku puka to'onai 'eva ediaka Keliso ita si'avana kevanai eva'avaeata 'eva Idume Kabukabuna betata'u ita be'ana'ia vaita, ita 'eva melala boutai koakoa mediata kataua kau kevatai eka vavai.

Puka Iduvuna Namata

- a. Lova aku. (1.1 - 10)
- b. Paulo veauneke kauna mai ena siavu. (1.11 – 2.21)
- c. Dilava ena iulaveni koana valina nama'ina. (3.1 – 4.31)
- d. Abiveni kauta eta komolo mai eta vinaula bevavai davata. (5.1 – 6.10)
- e. Luva to'ota. (6.11 - 18)

Vanama'ina Luvana.

¹ Lau Paulo, veauneke kau'u, vinaula kanania sia kau deveni'u 'o sia desini'u, beia Iesu Keliso mai Kamana ba ai evako'isia 'udai Dilavana ita desini'u.

² Lai abiveni kaumai bo'akalata ita nia'i lai amimia boumai vamaiai abiveni kaumui Kalatia kanona laloanai lo'e ka ka laloatai oi omimia kaumui ale venimui.

³ Lai ameamea Dilava ita Kamata mai Lovia namana Iesu Keliso eta iulaveni koana mai nua'elu 'eva akamuiiai bemimia.

⁴ Keliso sibona ena mauili eveni ita eta si'avana daitai, ia 'eva kanobata si'avana vaika kanania laloanai ita bevamaulita, ita Kamata Dilava ena ula vitaitanai.

⁵ Kanaua 'ounai Dilava ena nuavi bemia keinikeini. Amen.

Keliso Valina Nama'ina

Sibonamo.

⁶ Lau kevamuiiai ada'unai 'eva Keliso ena iulaveni koanai e'aemui Dilavana alimo oi ovikania 'avaea ia oi oda'a vali edeana deluva vaia kauta kevata.

⁷ Kanaua 'eva sia vali nama'ina umauna. 'Abu kanania'i kau vaida devalalomui to'ato'a 'olana de'ula Keliso valina nama'ina bevaedeanala.

⁸ Lai 'o vutuvutu aneluna ka bema asi koanai, vali edeana ka lai 'o ia bema ilolo vaia ia sia vali nama'ina 'ana'inai kevamui ai lai ailolo vaia valina boina koanai sivada beabia keinikeini.

⁹ Ana'inai lai aluvaia luvana vali'u mune'e lai aluvala 'udai. Kau ka sia vali nama'ina oabia dae valina ia vali edeana ka beilolo vaia koanai anana keinikeini beabia.

¹⁰ Vali'u lau 'eva kau eta ulai avinaula? Asi'i vaika. Dilava ena ulai avinaula. 'O kau nuata bavalalonamata dalana akavua? Kau nuata ivalalonamata amaula venia koanai, lau 'eva Keliso ena da'ala iabina kau'u ai sia amaa.

Veauneke Kauna Paulo

Sibona Sisibana.

¹¹ Bo'akala'u e, lau a'ula oi boikabasi vali nama'ina ailolo vaia valina 'eva sia kau ena ikabasiai e'asi.

¹² Sia kau ka kevanai abia 'o sia kau ka evaikabasi'u, beia Iesu Keliso keva'u ai evala'asia davana abia.

¹³ E'u mau li 'ana'inai Iuda kauta eta abiveni dalana ia amia koanai avavaia maulina 'uluna 'ani oi oika, Dilava ena lo'e kauta avai vi ivita vaika mai aula bavaoleta.

¹⁴ Lau ulu'u kauta Iudai doutamo vilotaia Iuda eta abivenia i lau 'eva aidiba vaika, mai 'ava'avamai eta koakoa 'eva aula venita vaika.

¹⁵ Beia sina'u bo'anai asido'o apulu laloanai Dilava 'ani edila'u, ena iulaveni koanai e'ae'u, ia ena ula ai

¹⁶ nakuna evala'asia keva'u ai, valina pulu edea kauta kevatai bailolo vaia, sia kau ka ita kanaua lai aluvaluva vaia.

¹⁷ 'O sia vaka ada'a Ielusalema, veauneke kauta 'ana'ita sia aikata, beia komolonai mo ada'a Alabia, mulina i ada'a mune'e Damaseko.

¹⁸ Vikau koi deole mulina i, lau aele'au ada'a Ielusalema Petelo kevana laluna lai aluvaluva, ua'i melala 'ouka ima lai amia.

¹⁹ Ua'i sia veauneke kauta edeata ka aikaia, Lovia namana kadina Iakobo mo sibona aikaia.

²⁰ Dilava vailana i luva kanania alelea 'eva umauna ia sia adedede.

²¹ Mulinai ako'isi 'eva ada'a Sulia mai Kilikia kanotai.

²² Beia ua'i Iudeai Dilava ena lo'e kauta 'eva lau koa'u sia deikabasia,

²³ vali'u mo deika dediaka, "Ana'inai evai vi i vita kauna eta'u abiveni kanaua bevaolea davana 'eva vali'u 'ani eilolo vaia."

²⁴ Kanaua 'ounai lau dai'u ai Dilava devanama'inala.

2

Paulo Mai Banona Ita

Eta Vinaula Ka'ona.

¹ Vikau 'ouka vani deole mulina i mune'e lau mai Banaba Tito lai avuaia ita lai aele'au ada'a Ielusalema.

² Dilava ena luva nua'u ai evala'asi 'ounai ada'a Ielusalema, vali nama'ina kanaua pulu edea kauta kevatai ailolo vaia valina aluva vaia. Abiveni kauta de'ola vaita kauta ita 'eva 'aba'abai lai aluvaluva vaia belalovai lalovai, 'olana e'u vinaula bounai 'ana'inai ailolo vaia valina mai vali'u ailolo vaia valina anita asi'i dema asi'i 'ounai.

³ Ibanomai kauna Tito 'eva 'Elene kauna beia sia devasiasia iva beabia.

⁴ Eta do'u laloanai kadi'a'a dedeta vaida vunivunia i dedodo, de'idimata Keliso Iesu enai mau li kabia maulina beikabasia, eta ula 'eva talavatu da'alana iabina kautai bemane'eta divo 'udai.

⁵ Eta lalovai sia lai avamomo'aia, 'olana vali nama'ina luvana umauna kevamui ai si'i emaedeana.

⁶ Beia kataua 'eva kau namatai devaota kauta (lau keva'uai 'eva eta edeana asi'i. Dilava 'eva kau kuanina ena nama'ina sia evamomo'aia,) inoku kau kataua vali nama'ina lau ailolo vaia valina akanai sia dava ka dene'ea 'au.

⁷ Ia delaloune Petelo Iuda kauta kevatai vali nama'ina eilolovaia vitaitanamo Dilava vinaula eveni'u vali nama'ina pulu edea kauta kevatai ailolo vaia.

⁸ Dilava ena siavuui Petelo 'eva veauneke kaunai eao Iuda kauta kevatai, vitaitanai mo Dilava ena siavuui lau 'eva veauneke kau'uai ao pulu edea kauta kevatai.

⁹ Do'u kanaua 'olana kauta Iakobo, Petelo mai Ioane Dilava iulaveni koana kanania eveni'u davana deikaia une koanai, lau Banaba ita kadi'a'a koana imamai deabi. Inoku devamomo'aia lai kaumai 'eva lai bada'a pulu edea kauta kevata, ia 'eva beda'a Iuda kauta kevata.

¹⁰ Luva ka'onamo deluvaia kevamaiai 'eva ta'ovala kauta lai balalo vaita namana, luva kanaua lai abiadae ia vinaula kanania 'eva lau 'ani siako vaika avavaia 'udai'udai davana.

Paulo Antioka Ai Petelo E'ovenia.

¹¹ Beia Petelo easi Antioka koanai kau vailatai a'ovenia 'olana ena koa 'eva sia ekomolo.

¹² Petelo pulu edea kauta ita deaniani ka'ona laloanai Iuda kauta vaidia Iakobo esinita kataua dela'asi, inoku Petelo 'eva kevatai eko'isi eda'atau, 'olana ia iva devaikabasi vaita kauta kataua emakau vaita.

¹³ Iuda kauta vaidia vaka ia ena makau kanaua vitaitanai dede koana devavaia, inoku eta makauai Banaba vaka eakulea.

¹⁴ Lau koa kanaua aikaia une 'eva vali nama'ina luvana umauna sia deda'avaia, kanaua 'ounai boutai vailatai Petelo a'ovenia adiakaa, "Oni 'eva Iuda kaumu, beia emu koa 'eva itani pulu edea kauta vitaitatai omimia, ia sia Iuda kauta boita. A boina pulu edea kauta bova asiasita Iuda kauta eta koakoai bemimia?"

Vamauli 'Eva Abiveniai E'asi.

¹⁵ Puluai ita 'eva Iuda kauta umauta, ia sia 'si'avana kauta', sia pulu edea kauta boita.

¹⁶ Beia kaikabasi kau 'eva talavatu kanaua iabi daenai sia bekomolo, ia Iesu Keliso beabivenia 'eva bekomolo. Kanaua 'ounai ita vaka Keliso Iesu kabivenia, kanaua'i Keliso iabiveninai ekakomolo ia sia talavatu iabi daenai, 'olana talavatu iabi daenai 'eva kau ka sia bekomolo.

¹⁷ "Beia ita Keliso kevanai eta komolo kakavua, beia si'avana kautai ka'ao itani pulu edea kauta vitaitata koanai, kanaua anina 'eva Keliso ita si'avana kauta ivavaita kauna, una? Beia kanaua 'eva asi'i vaika.

¹⁸ Sibou avasi'avanala talavatuna bavalavala 'udai koanai, lau sibou bavamomo'ai'u lau talavatu aukua kau'u mai si'avana kau'u.

¹⁹ Lau 'eva talavatu dainai aba talavatu enai, kanaua 'ounai Dilava enai bamauli.

²⁰ Lau 'eva Keliso ita au ido'o valaukuna akanai deakubamai, inoku lau sia amaui, beia Keliso lau nua'uai amaui. Beia maui kanania vali'u kauani'uai amia vaia maulina 'eva Dilava Nakuna elalo'au veni'u kauna sibona ena maui abivenia 'ounai eveni'u amaui.

²¹ Dilava ena iulaveni koana 'eva sia avasi'avanala. Talavatuai komolo kama abia koanai, Keliso 'eva 'ani eba 'avaea."

3

*Mauli 'Eva Talavatuai**Sia E'asi.*

¹ Kalatia kaumui e, oi 'eva bo'o kaumui. Dai menai evakuleamui? Vailamui umaunai Iesu Keliso valina 'ani aluvaia kave'i au ido'o valaukunai deaku bala.

² Lau a'ula dava ka'onamo mo oi bo'ou'u, Idume Kabukabuna oi oabia 'eva talavatu oi oda'avaia kave'i 'ounai 'o vali nama'ina oi oika mai oi oabivenia 'ounai?

³ Oi a obo'o koma? Siako 'ani mauli kanania Idume Kabukabunai oi oabi sinala, ia vali'u dava 'ounai oi o'ula kauani kula'ilanai oi bovaolea?

⁴ Oi vali nama'ina dainai oi oanana vaika 'eva anina asi'i una? Kanaua bekoma koanai, 'ani oi oanana vaika 'avaea.

⁵ Dava 'ounai Dilava Idumena evenimui mai vatabulovo vinaulata evavai vilouamui? Talavatu oi oda'avaia kave'i 'ounai 'o vali nama'ina oi oika oi oabivenia 'ounai?

⁶ Abela'amo olalovaia. Puka kabukabunai kanania deleleia koma, "Abela'amo Dilava eabivenia, ena abiveni dainai Dilava eta'u komolo kaunai evaoa."

Gen 15.6

⁷ Kanaua 'ounai oi boikabasi Dilava deabivenia kauta kataua boutai 'eva Abela'amo nakuna.

⁸ Puka Kabukabuna 'ani eikaia makava pulu edea kauta beabiveni 'eva Dilava betata'u komolota be'oua, kanaua 'ounai Abela'amo kevanai vali nama'ina eilolo vaia makava, "Oni daimuai kanobata kauta boutai Dilava bevanama'inata."

⁹ Kanaua 'ounai mai eta abiveni kauta kataua 'eva Dilava bevanama'inata, abiveni kauna Abela'amo ita.

¹⁰ Talavatuai demimia kauta boutai 'eva Dilava ena sivada venunai demimia, 'olana Puka kabukabunai kanaua eleleia koma, "Talavatu pukanai delele luvata boutai sia be'ima kave'i kauna 'eva Dilava ena sivada venunai emimia."

¹¹ 'Ani ela'asi kave'i talavatuai sia kau ka 'eva ekomolo Dilava vailanai, 'olana Puka kabukabunai ediaka, "Komolo kauna 'eva abiveniai bemaui."

Hab 2.4

¹² Beia talavatu 'eva abiveniai sia easi, luana sia devitaita, Puka kabukabuna ediaka, "Kau ka talavatu luvata boutai beda'avai palu kauna 'eva kataua'i bemaui."

¹³ Keliso ita eta sivada vuvuana ekoia, talavatu ena sivada laloanai evala'asita, 'olana Puka kabukabunai 'ani ilelena ediaka, "Au akanai dedodo'o kauta 'eva Dilava ena sivada laloanai."

¹⁴ Keliso evala'asita 'olana 'eva vanama'ina Abela'amo eabia vanama'inana pulu edea kauta bedavalia Keliso Iesu dainai, kanaua 'ounai ita eta abiveniai 'eva Idume Kabukabuna e'ouia ana'i idumena kanaua ekabia.

Talavatu Mai Luva 'Ana'i.

¹⁵ Bo'akala'u e, eta mia maulina laloanai vaikaika ka kaikaia, kau lua eta luva 'ana'i devavaia deva'olua mulinai sia kau ka dava ka beabia tau 'o akanai sia ka bene'ea 'au, vitaitana mo bemimia.

¹⁶ Dilava ena luva 'ana'i Abela'amo mai 'ava'avana kevanai evavaia. Puka Kabukabuna sia ediaka "ava'avamu kevatai' anina 'eva kau doutamo, beia ediaka "ava'avamu kevanai' anina 'eva kau ka'onamo, ua 'eva Keliso Iesu.

¹⁷ A'oua 'eva kanania, Dilava luva 'ana'i evavaia makava vakaia vikau sinavu vani koi navui (430) deole mulina'i talavatu eveni talavatuna betata'u luva 'ana'i kanaua sia beabia tau 'o sia beva'alamaia.

¹⁸ Talavatuai ainama bepupulu koanai, luva 'ana'iai 'eva ainama sia bepupulu. Ia luva 'ana'iai Dilava ena vilalo koanai ainama Abela'amo evenia.

¹⁹ Inoku talavatu ena vinaula 'eva dava? Talavatu epulu 'olana 'eva va'eva 'abuta bevala'asita. Ia 'eva anelu deabia deasi Mose imanai deudaia vinaulana epulu, beda'a mo pulu kanaua e'ouia 'ana'i puluna be'asi.

²⁰ Dilava ena luva 'ana'i laloanai 'eva aveke ka'onamo mo emimia, inoku vaka'onamo kauna ena vinaula 'eva asi'i, beia Dilava 'eva ka'onamo.

Talavatu Bevada'ata Beda'a Keliso Kevana.

²¹ Talavatu 'eva Dilava ena luva 'ana'i bevasi'avanala? Asi'i, asi'i vaika. Talavatu kanaua mauli eveni koanai, komolo 'eva 'ani talavatuai bema-asi.

²² Beia Puka Kabukabunai ediaka kanobata kanania kauta boutai 'eva si'avana e'alavuta laloanai demimia. Kanaua 'ounai Iesu Keliso enai de-abiveni kauta 'eva eta abiveniai luva 'ana'i kanaua beabia.

²³ Abiveni kanania asido'o e'asi laloanai, ita 'eva talavatu e'alavuta vabuto'o kauta boita beda'a mo abiveni bela'asi.

²⁴ Inoku talavatu 'eva eta ikakao kauna boina bevada'ata Keliso kevana ua'i abiveniai komolo bevenita.

²⁵ Vali'u abiveni kanaua 'eva 'ani easi, talavatu ena ikakao siavuna kevatai 'eva 'ani eole.

Abiveni Bevada'ata Dilava Nakunai Ekao.

²⁶ Keliso Iesu oi oabivenia 'ounai oi boumuiai 'eva Dilava nakuna.

²⁷ Keliso ita oi ovaka'onamo vaidi'u kabukabuna oi oabia kaumui boumuiai 'eva Keliso ena mauli tubu'ana vitaitana 'ani oi ovadodoa.

²⁸ Kanaua 'ounai oi sia ka 'eva edeana, Iuda kauna 'o 'Elene kauna, da'ala abi kauna 'o sia da'ala abi kauna, moluane 'o ateate, 'olana boumuiai 'eva ka'onamo Keliso Iesu laloanai.

²⁹ Inoku oi Keliso ena koanai, oi vaka Abela'amo ena pulu kaumui, Dilava ena luva'ana'i avuna 'eva 'ani oi boabia.

4

Ita Dilava Nakuna.

¹ Lau aluvata luvana kanania, melo 'eva kamana ena dava boutai be'olavai, beia melo kikina koanai, ia 'eva da'ala abi kauna boina.

² Ekiki laloanai, i'imana kauna mai ikakaona kauna eta ikakao venunai emimia beda'a mo kamana evamomo'aia melalana bedaia.

³ Vitaitana ita vaka melo kikita koanai kanobata ka'ubata edeata edeata da'alata iabitai kao.

⁴ Beia melalana umauna edaia koanai, Dilava nakuna esinia, ateate bo'anai epulu maivaka Iuda eta talavatu venunai epulu,

⁵ talavatu venunai kauta kataua bevamaulita, inoku beabita Dilava nakuna umaunai beva-aota.

⁶ Vali'u nakunai oi oao 'ounai, Dilava 'eva Nakuna Idumena esinia easi nuatai emimia, Idumena kanaua'i ita Dilava ka'aea, "Kama'u."

⁷ Kanaua 'ounai oi 'eva sia da'alabi kaumui, beia Dilava nakuna. Dilava nakuna umaumui 'ounai ena dava boutai eluva 'ana'i vai davata 'eva oi emui.

Paulo Nuana Ebavunu

Kalatia Kauta Etai.

⁸ Ana'inai Dilava sia oi oikabasia koanai, oi 'eva sia dilava umauta kauta eta da'alabi kaumui oi oao.

⁹ Beia vali'u Dilava 'ani oi oikabasia, lau kanania amaluva koma, Dilava vaka oi eikabasimui kave'i, dava 'ounai oi bomumue ka'uba edeata edeata badebadeta eta nama'ina asi'i ka'ubata kevatai eta da'alabi kaumui oi boao 'udai?

¹⁰ Oi 'eva melala, vuia, vikau ka'onamo mai vikau boutai naduta mo emui melala namatai oi ovaota.

¹¹ Lau 'eva oi daimui nua'u ebavunu, 'olana e'u vinaula boutai kevamui ai 'eva asi'i anita dema-asi'i.

¹² Bo'akala'u kaumui e, lau oi anoimui, lau oi banomui ai 'ani ao makava vitaitanai oi vaka talavatuai ola'asi lau boi'uai oao. Kele'e'uai sia koa ka oi ovavaia si'asia.

¹³ Oi oikabasi e'u 'olele 'ounai kevamui ai amia koanai vali nama'ina ailolovaia makava emui ai.

¹⁴ E'u 'olele ena mekauai avabavunumui, beia sia oi oika'uvadai, sia oi ovasi'avana'u, ia oi ovavai'u kave'i, Dilava ena anelu oi oabiadae boina 'o Iesu Keliso oi oabiadae boina.

¹⁵ Kanaua melalanai mailalonamamui oi omia, beia vali'u emui lalonama a eda'aia? Lau aikabasi melala kanaua'i makamui oi bomaosiasi lau oi bomaveni'u boina.

¹⁶ Beia vali'u lau luva umauna a'oumui 'ounai 'ani emui 'ou kau'uai a'ao, una?

¹⁷ Kau kataua eta ula nuamui be'ani, beia eta lalovai mai eta ula 'eva sia dekomolo, eta ula kevamaiai oi boda'atau, oi boula venita.

¹⁸ Kau mediana iula venina dainai, oi boula veni'u melala boutai 'eva mediana, sia kevamui ai amimia melalatai mo.

¹⁹ Naku'u e, oi daimui ai ebavunu, melo epupulu ana-anana boina, kanaua anana koma beda'a mo oi Keliso ikaikana vitaitanai oi bo'ao.

²⁰ Lau nua'u ebavunu 'ounai kevamui ai bamimia lele'u bavaedeanala badulumui, oi daimui ai alalovai lalovai vunu.

Luva Ivavitaitana

Akala Mai Sala Banota.

²¹ Oi dai oi o'ula talavatu venunai oi bomimia kaumui o'ou'u. Oi talavatu dava ekoma 'eva oi oikabasi, una?

²² Puka Kabukabuna kanania elelea koma, Abela'amo nakuna 'eva lua, ka 'eva adana da'alabi ateatena kanaua kevanai evapulua, ka 'eva ia adana umauna kevanai evapulua.

²³ Ia adana da'alabi ateatena nakuna 'eva kapulu vitaitanai epulu, beia adana umauna nakuna 'eva Dilava ena luva 'ana'i melona.

²⁴ Sisiba kanania 'eva luva ivavitaitana boina. 'A'ate lua 'eva luva 'ana'i namata lua. Ka 'eva Sinai lolonai easi da'alabi kauta evapuluta, ia 'eva Akala.

²⁵ Akala, e'oua 'eva Sinai lolona Alabia laloanai, ia 'eva vali'u melala kanania Ielusalema vanuana boina ia mai nakuna ita boutai talavatu da'alana iabina kautai de'ao.

²⁶ Beia Ielusalema vutuvutuai davana kanaua 'eva da'ala sia e'abi ateatena Sala, ia 'eva ita sinata.

²⁷ Puka Kabukabunai 'ani ilelena,
 "Opa'opa ateatemu e,
 bolalonama!

Mauli ananana sia onovaia ateatemu,
bolalave bovaoui mailalonamamu.
'Olana ateate 'avaeana nakuna
'eva bedouta,
ia ateate kanaua maiadana ateatena nakuna sia bedouta."

Isa 54.1

²⁸ Bo'akala'u e, vali'u oi 'eva Isako boina Dilava nakuna, ia ena luva 'ana'i vitaitanai.

²⁹ Melala kanaua'i kapulu vitaitanai epulu melona eta'u melo Idume Kabukabuna siavunai epulu melona kanaua evaiviivia, vali'u vaka kanaua mo boina.

³⁰ Beia Puka Kabukabuna a eleleia koma? Kanania eluva koma, "Da'alabi ateatena nakuna ita lo'ota asi, 'olana eadavala umauna ateatena nakuna ena dava 'eva da'alabi ateatena nakuna ita sia bekole ka'ona."

³¹ Kanaua 'ounai bo'akala'u e, ita 'eva sia da'ala abi ateatena nakuna, ia ita 'eva da'ala sia e'abi ateatena nakuna.

5

Keliso Eluvuta Ovo.

¹ Keliso eta'u ita 'ani eluvuta talavatu laloanai sia ekamia. Kanaua 'ounai olava 'ini, asi'i demaliomui 'udai talavatu ena da'alabi kaumuiasi' oi omao makauna.

² Kaiamui ovala, lau Paulo oi a'oumui, iva oi bomabia koanai Keliso ena vinaula 'eva anina asi'i kevamuiasi.

³ Mai aluva pasisi venimui 'udai adiaka, iva beabia kauna talavatu boutai be'imata kave'i 'eva benama'ina.

⁴ Oi talavatuai komolo oi okavua kaumui 'eva Keliso enai sibomui otaumui uku, Dilava ena iulaveniai 'eva 'ani oi otabu.

⁵ Beia ita 'eva eta abiveniai mai Idume Kabukabuna siavunai kanuabata Dilava komolo bevenita.

⁶ Ita Iesu Keliso laloanai ekaka'onamo koanai, iva 'o sia iva ena edea 'eva asi'i, ia dava namana 'eva abiveni, mai lalo'auai ela'asi.

⁷ Oi 'ana'inai 'eva abiveniai oi oda'a kave'i, beia dai e'alavumui luva umauna iabi daenai?

⁸ Nua-ani luvata kataua 'eva e'aemui Dilavana kevanai sia deasi.

⁹ Oi bolalovaia, "Vakubu mulamulana kikina etata'u palaoa itoinai evakubua."

¹⁰ Lau 'eva Lovia namana avamomo'aia bedulumui oi lalovai edeana sia ka oi boabia. Lalo to'ato'a evenimui kauna kau a boina beia Dilava betata'u tavana bevenia.

¹¹ Bo'akala'u e, iva ailolo vaia koanai dava 'ounai devaiviivi'u? Kanaua bemamomo'ai koanai Keliso ena au ido'o valaukuna bailolo vaia 'eva ade-duana asi'i.

¹² Lau a'ula iva devabavunuta kauta kataua 'eva sibota beda'atau be-mada'a adedua davana kanaua bemaokuaovo.

¹³ Bo'akala'u e, Dilava e'aemui 'eva beluvumui. Eluvumui kaumui 'eva kauani vinaulata si'avata vaika sia oi bovava, beia lalo'auai ka ka sibomui oi bovidulu viveni.

¹⁴ Talavatu boutai 'ani evaka'onamota luva kanania'i, "Kevamuiasi kauna bolalo'au venia oni sibomu olalo'au venimu vitaitana."

¹⁵ Oi bo'imamui kave'i sibomui emui vinai mai emui viaku 'avaea viaku 'avaeai asi'i sibomui oi omavaolemui makauna.

*Idume Kabukabuna Vuavuaana
Mai Kauani Ena Koakoa.*

¹⁶ Kanaua 'ounai adiaka, Idume Kabukabuna emui mauili be'ana'ia vaia koanai kauani ena ula vinaulata si'avata vaika sia 'ani oi bovavai.

¹⁷ 'Olana kauani ena ula vinaulata 'eva Idume Kabukabuna ekaokai, Idume Kabukabuna ena ula vinaulata vaka kauani ekaokai, ia laluanā 'eva 'ou kautai de'ao, kanaua 'ounai oi oulaveni davata oi bomavavai 'eva sia oi ovavai.

¹⁸ Idume Kabukabuna oi be'ana'ia vaimui koanai, oi 'eva talavatu venunai sia oi bomimia.

¹⁹ Kauani ena koa 'eva makanai mo. Davata katania, kulakula, lalovai 'obuta, mo'a,

²⁰ dilava dedeta ikukudivo venita, mena, vaivivi, viaku, mama, badu, idono, vibodala, vaikabasi dedeta,

²¹ lalovai si'avata, inuba, vavai 'avaea, mai koa vaida kataua boita boutai. 'Ana'inai 'ani aluva pasisi venimui, vali'u mune'e a'oumui pasisi 'udai, vinala kataua boita devavai kauta 'eva Dilava ena lovia vanuana sia bedavaliala.

²² Beia Idume Kabukabuna eta mauili be'ana'ia vaia vuavuaana 'eva lalo'au, lalonama, nua'elu, vapasisi, vilalo, vavai kave'i, abiveni dokadoka,

²³ manau mai nua pasisi. Katania boutai 'eva talavatu sia evaiivita.

²⁴ Keliso Iesu ena kau 'eva kauanita mai eta koa si'avata vaika mai eta ula si'avata vaika 'ani ikokota'au au ido'o valaukuna akanai.

²⁵ Idume Kabukabuna mauili 'ani evenita 'ounai, ia eta mauili ema'an'ia vaia.

²⁶ Ita sia eka-apa, banota sia ekavabaduta 'o sia ekamama venita.

6

Oi Bovidulu Viveni.

¹ Bo'akala'u e, kau ka va'eva laloanai edodo koanai, nuamuiiai Idume Kabukabuna evinuala kaumui ka botata'u nuamu medianai bovakomoloa. Beia oni vaka sibomu bo'imamu kave'i, vikovoai asi'i omadodo 'ounai.

² Emui mekau oi bovua vai'ade, dala kanania'i 'eva Keliso ena talavatu oi boabia 'isi.

³ Dava asi'i kauna elalovaia ia 'eva kau namana ka koanai, ia sibona lebala.

⁴ Ka ka sibomui emui vinaula oi bovakovota, dava ovavaia kave'i davana 'eva sibomu boapavaimu, ia sia boabia boda'a kau vailatai.

⁵ Kau boutai sibota eta mekau bevuvua.

⁶ Dilava ena luva emalelevaia kauna 'eva ena dava nama'ita boutai ena vaikabasi kauna ita bekoleta.

⁷ Sibomui sia oi boakulea, sia kau ka Dilava bevabo'oa. Kau kea evadoa vitaitanai mo anina beabia.

⁸ Inoku kauani ena ulai evadovado kauna 'eva kauani kevanai ba bedavaliala, beia Idume Kabukabuna enai evadovado kauna 'eva Idume Kabukabuna kevanai mauili keinikeini bedavaliala.

⁹ Vinaula nama'ina ivavainai sia ekakau ba'oa, ita sia ekabadebade koanai, 'ua'ua melalana be'asi laloanai vuavua nama'ina ekabia.

¹⁰ Kanaua 'ounai nama'ina kadavali melalatai kau boutai kevatai nama'ina ekavavai, beia abiveni kauta kevatai 'eva nama'ina ekavavai kave'i.

Vanama'ina Luvana To'ona

Mai Meamea.

¹¹ Lelelele namata katania oi boikata lau ima'uai aleleta devavasi kele'emui.

¹² Kau de'ula vata namata be'ao kauta kataua deva-asiasimui iva oi boabia, 'olana umauna 'eva Keliso ena au ido'o valaukuna dainai kau asi'i demavai-ivivita.

¹³ 'Ani deivata kauta kataua mo, talavatu dainai sia dedadai, ia oi deula venimui iva oi boabia, inoku kauanimui dainai oi bo'apa.

¹⁴ Lau dava ka sia bapavaia 'avaea, ia eta Lovia namana Iesu Keliso ena au ido'o valaukuna sibona mo bapavaia, Keliso dainai kanobata eba lau e'uai, lau vaka 'ani aba kanobata enai.

¹⁵ Iva 'o sia iva luana anita asi'i, beia dava namana 'eva mauili makamakana.

¹⁶ Dilava ena nua'elu mai vilalo 'eva lalovai kanania deabia dae kauta boutai kevatai, maivaka Dilava ena kau kataua idumeai Isalaela kautai deao kauta etai.

¹⁷ E'u luva to'onai sia kau ka nua'u beva ana-anala, 'olana lau kau'uai loi demimia loita devala'asita lau Iesu ena da'alabi kau'u.

¹⁸ Bo'akala'u boumuiai e, ameamea eta Lovia namana Iesu Keliso ena iulaveni koana akamuiai bemimia. Amen.

Paulo Ena Malele EPESO Kauta Kevatai

Puka Laloana Ielena Luvana

Puka kanania 'olana 'eva kanania boina. Dilava ena ula 'eva dava boutai vutuvutuai mai kanobatai Keliso laloanai bevaka'onamo. Keliso 'eva dava kataua boita 'olata kaunai be'ao (1.10). Maivaka Dilava ena ula 'eva sibona ena kau bevelita molau, inoku eta mauili boutai 'eva Keliso ita bevaka'onamo, inoku nuata 'eva beka'onamo.

Puka kanania elena lava'ana'ina 'eva Paulo eta'u nuana nama'inai eluva kulu'ila, kau bevaikabasita kave'i Iesu beabivenia, inoku bevaka'onamo itani abiveni kauta itona ka'onama. 'Olana Iesu ena vinala nama'ina akanai 'eva Dilava kau evamaulita, inoku Idume Kabukabuna bevenita, kanaua 'eva sibona betata'u ena kau eta vinala nama'ita bevavaita ena luvaitaitanai (1.4). Elena ivaluana 'eva Paulo ediaka, kau Keliso ita devaka'onamo 'eva nuata beka'onamo Dilava ena dala dainai bedadai.

Puka kanania laloanai 'eva Paulo luva ivavitaitata doutamo eveni kau bevaikabasita kave'i, eta vaka'onamo Keliso ita kanaua 'eva kau itona ka'onamoai be'ao, itani kauni ka'onamo boina (4.16), 'o itani luma boina (2.19 - 21). Puka kanania eka vakua kave'i 'eva Dilava ena ula ena kau eta dava nama'ita bevavaita 'eva eka ikabasita kave'i.

Puka Iduvuna Namata

- a. Lova aku (1.1 - 2)
- b. Keliso mai Dilava ena lo'e kauta. (1.3 - 3.21)
- c. Mauili makamakana Keliso laloanai. (4.1 - 6.20)
- d. Luva to'ota. (6.21 - 24)

Vanama'ina Luvana.

¹ Lau Paulo, Dilava ena ulaai Keliso Iesu ena veauneke kau'u, malele kanania oi kabukabu kaumui Epeso ai Keliso Iesu oi oabivenia kaumui alele venimui.

² Kamata Dilava mai eta Lovia namana Iesu Keliso eta iulaveni mai nua'elu 'eva akamuiai bemimia.

Keliso Dainai Dilava

Ainama Nama'ita Bevenita.

³ Dilava eta Lovia namana Iesu Keliso kamana eka vanama'inala, Keliso laloanai idume ena vanama'ina boutai ai evanama'inata vutuvutu kanobatanai.

⁴ Dilava asido'o kanobata evavaia koanai, ia ita 'ani Keliso laloanai edilata ia ena, lalo'auai ia vailanai ekakabukabu mai sia eka va'eva.

⁵ Ia siako 'ani elalovaia makava Iesu Keliso dainai ita ia ena ivanani melotai ekao, lalovai kanaua 'eva ia ena ula mai ena lalonama.

⁶ Kanaua 'ounai Dilava ekavanama'inala ena iulaveni nuavina laloanai evenita, iulaveni kanaua 'eva Nakuna elalo'au venia melona evenita 'avaea.

⁷ Keliso eba lalanai eta si'avana e'ou kao mai mauili kabia. Dilava ena iulaveni kanaua 'eva nama vaikana kevatai,

⁸ ena aoneka mai ikabasi itoinai evenita davana 'eva namavaikana.

⁹ Dilava ena ula lalovaina vuniana evala'asi ita kevatai mailalonomana ita, lalovai kanaua 'eva 'ani eva'olua Keliso laloanai bevavaia.

¹⁰ Inoku Dilava ena lalovai melalana bedaia koanai, Dilava vutuvutu mai kanobata davata boutai maivaka Keliso laloanai bevaka'onamota inoku be'olavaita.

¹¹ Dilava ena ula vitaitanai dava boutai evavai, lalovai elalovaia makava vitaitanai Keliso laloanai ita vaka edilata ena kau umaoutai ekaao.

¹² Kanaua 'ounai lai Iuda Keliso laloanai lai anuabata makava kaumai, Dilava ena nuavi lai bavanama'inala.

¹³ Inoku luva momo'aina ivamaulimui valina nama'ina 'uluna oi oika koanai, oi vaka Dilava eabimui ena kau. Keliso oi oabivenia 'ounai Dilava eabimui ia ena 'eva ivamomo'aina koanaai luva 'ana'i Idumena Kabuk-abuna evenimui.

¹⁴ Idume Kabukabuna ita etai 'eva Dilava ena luva 'ana'i ivamomo'aina mai eluva 'ana'i vai davata ekaabi beda'amo Dilava ena kau boutai beva-maulita. Dilava ena nuavi kavanama'inala.

Paulo Epeso Kauta

Daitai Emeamea.

¹⁵ Kanaua 'ounai, lau emui abiveni Lovia namana Iesu kevanai mai emui lalo'au Dilava ena kabukabu kauta boutai kevatai 'eva 'uluta 'ani aika,

¹⁶ oi daimuiaai vanama'ina luvata 'eva Dilava avenia basibasi. E'u meamea laloatai oi alalovaimui,

¹⁷ Eta Lovia namana Iesu Keliso ena Dilava mai Kamana nuavina anoia aoneka mai ikabasi Idumena bevenimui, inoku oi 'eva ia oi boikabasia kave'i.

¹⁸ Maivaka ameamea nuamui beva'ailala, inoku ia e'aemui 'ounai nuabata oi boikabasia, mai ena kabukabu kaumui 'eva nuavi vanama'inata namavaikata oi bo'abi.

¹⁹ Inoku mune'e ena siavu 'eva namavaikana mai edeanana vaika ita kabiveni kauta eka ikabasia. Siavu kanaua 'eva ena kula'ila bounai ai evinaula vaia vitaitana boina,

²⁰ Dilava ena siavu kanaua 'eva Keliso laloanai evinaula vaia inoku ba kauta vilootai evako'isia mai vutuvutu kanobatanai imana idibana ai evamiala,

²¹ Ia 'eva 'ani vutuvutu davata namata boutai akatai, 'ola kauta, siavu kauta, kula'ila kauta, lovia kauta boutai akatai, mai ia vana 'eva va namata boutai akatai, sia vali'u kanobatana kanania'imo ia vailai be'asi kanobatanai vaka.

²² Mai Dilava dava boutai Keliso aena palapalana venunai ene'eta divo mai eabisa isi ia 'eva lo'e kauta boutai 'olatai be'ao.

²³ Dilava ena lo'e kauta 'eva Keliso kauanina mai Keliso sibona evavonua, ia 'abu boutai ai dava boutai evavonuta.

2

Keliso Itana Mauli Evenita.

¹ 'Ana'inai emui va'eva mai emui si'avana 'outai oi 'eva idumeai oba.

² Si'avanai oi omia koanai kanobata kanania ena ula dalata oi ovavai mai vutuvutu venunai ka'uba eloviata Diabolana mulinai oi oda'a, Diabolo kanaua 'eva vali'u Dilava lelana daitai sia dedadai kauta nuatai evinaula.

³ 'Ana'inai ita boutai vaka ia vilootai kamia, kauanita ena koakoa si'avata vaika mai ena lalovai mai ena ula dalata kavavai. Eta koakoa si'avata daitai puluai ita vaka Dilava ena badu laloanai kamia, itani kau kataua boita.

⁴ Beia 'olana Dilava ena vilalo 'eva namavaikana, mai ena lalo'au 'eva namavaikana ita etai,

⁵ eta si'avanai kaba beia ia Keliso ita evamaulita ka'ona. Dilava ena iulavenia mai mauli oi oabia.

⁶ Dilava ita mai Keliso evako 'isita ka'ona vutuvutu vanuatai ai Keliso itana evaloviata ka'ona.

⁷ Kanaua 'eva ena iulaveni namavaika umauna Keliso laloanai, ita etai iulaveni kanaua 'eva vilai be'asi uluta boutai etai vaka bevala'asia.

⁸ 'Olana Dilava ena iulaveni 'ounai Keliso oi oabivenia 'eva evamaulimui. Nia 'eva sia oi sibomui emui kula'ilai, ia Dilava ena ainama.

⁹ Sia vinaula kave'i ai, 'ounai sia kau ka be'apa.

¹⁰ Kanaua dainai ita 'eva Dilava ena vinaula kave'i kauta, Keliso Iesu laloanai evavaita 'ounai vinaula nama'ita eka vavai, Dilava 'ani siako eva'oluta vaika vinaulata eka vavaita.

Ita Keliso Enai

Ekavaka'onamo.

¹¹ Momo'ai dokadoka puluai oi 'eva pulu edea kaumui inoku sibota de'aeta iva kauta kataua de'aemui sia iva kaumui. (Ua 'eva kauani ai kau imatai devavaia.)

¹² Olalovaia, melala kanaua'i oi 'eva Keliso enai dau'ai oi omia, Dilava edilata kauta Isalaela kauta vilootai oi 'eva asi'i. Maivaka luva 'ana'i talavatuna kevanai oi kau edeamui, kanobatai emui nuabata asi'i mai kevamuiiai Dilava asi'i laloanai oi omia.

¹³ 'Ana'inai Dilava enai dau'ai vaika oi omia kaumui beia vali'u 'eva Keliso Iesu lalanai evuamui easi Dilava kevanai.

¹⁴ Keliso 'eva ita eta nua'elu, Iuda kauta mai pulu edea kauta vilootai e'alavuta vaivivi ikekebilina eva'alamaia, laluaana evaka'onamota,

¹⁵ ia kauaninai Iuda kauta eta talavatu mai talavatu deleleta davata boutai evapuata. Ia ena ula 'eva ia sibona enai Iuda mai Pulu edea kauta vilootai kau makamakana ka'onamo ai bevaaoa, koakoa kanania'i Keliso nua'elu evavaia.

¹⁶ Inoku au ido'o valaukunai eba 'eva Iuda kauta mai Pulu edea kauta evaka'onamota evuata easi Dilava kevanai nua'elu evamakamakala, kanaua 'eva Iuda kauta mai Pulu edea kauta eta vaivivi koakoata boutai evapua.

¹⁷ Keliso easi 'eva daua'i vaika kaumui kevamuiiai nua'elu eilolovaia mai kevai kauta kevatai vaka nua'elu eilolovaia.

¹⁸ Ia dainai ita boutai maieta komolo Idume Kabukabuna ka'onamoai ekada'a Kamata kevana.

¹⁹ Kanaua 'ounai, oi vali'u 'eva sia 'abu edea kaumui mai sia kau edeamui, beia oi 'eva vanua ka'onamo Dilava ena kau kabukabuta ita mai iduvu ka'onamo Dilava ena luma kaumui,

²⁰ oi 'eva luma boina, veauneke kauta mai enolea kauta luma 'abuna devavaia davana akanai oi olava 'au, Keliso Iesu ia sibona 'eva luma divoavuaana.

²¹ Ia enai luma davana boutai detai'au ka'ona inoku evaele'aua Lovia namana ena lo'e kabukabunai bea'o.

²² Inoku ia enai oi pulu edea kaumui vaka Iuda kauta ita evalavamui ka'ona Dilava ena mia 'abuna be'ao ia Idumena Kabukabuna laloanai.

3

Paulo Pulu Edea Kauta

Eta Ilolo Kauna.

¹ Lalovai kanania dainai lau, Paulo, Keliso Iesu dainai avabuto'o 'olana oi Pulu edea kaumui emui nama'ina ikavuna 'ounai.

² Momo'ai dokadoka Dilava ena iulaveni vinaulana oi daimuiiai eveni'u 'eva 'uluna 'ani oi oika.

³ Kanaua 'eva Dilava dava vuniata evaikabasi'u, inoku lau 'eva 'ani luva to'oto'otaimo alele venimui.

⁴ Kanania oi bovakua koanai, oi boikabasi Keliso enai dava devuni davata 'eva 'ani aikabasita,

⁵ ulu 'ana'itai 'eva kau sia evaikabasita, beia vali'u Idume Kabukabunai Dilava ena veauneke kauta kabukabuta mai enolea kauta kabukabuta evaikabasita.

⁶ Evuni davana 'eva kanania vali nama'ina dainai Pulu edea kauta mai Isalaela kauta eta dava bekole ka'ona, kauani ka'onamoai bevaka'onamota, mai Keliso Iesu laloanai luva 'ana'i beabia ka'ona.

⁷ Lau 'eva Dilava ena iulaveni venivenina eveni'u vali nama'ina da'alaabi kau'uai a'ao ena vinaula siavunai.

⁸ Dilava ena kau boutai viloatai lau 'eva akiki vaika, beia Dilava iulaveni kanania eveni'u, Keliso enai Pulu edea kauta kevata ai ainama sia bepupua davana bailolo vaia,

⁹ mune'e dava boutai ivavaita Dilavana ena lalovai vunita 'ana'ina melalanai easi mo vali'u vikau doutamo deole sia evala'asi davana bounai a bavala'asia koma 'eva kau boutai bavaikata kave'i.

¹⁰ Kanaua 'ounai vali'u Dilava ena lo'e kauta daitai 'ola'ana'i aneluta mai siavu idumeta vutuvutu vanuatai demimia kauta kataua vaka Dilava ena aoneka edeata edeata beikabasita.

¹¹ Kanania 'eva ia ena lalovai namana, eta Lovia namana Keliso Iesu laloanai evaolea.

¹² Keliso laloanai mai abiveni ia enai dainai Dilava ida'avenina 'eva 'ani maikula'ilata mai sia 'ani ekamakau.

¹³ Kanaua 'ounai anoimui, lau oi nama'ina dainai anana 'eva sia oi bolalo to'ato'a, 'olana kanaua 'eva oi emui nuavi oi boabia 'ounai.

Keliso Ena Lalo'au

Oi Boikabasia.

¹⁴ Kanaua 'ounai Kamata vailanai akuidula ameamea,

¹⁵ kadi'a'a boutai vutuvutuui mai kanobatai ia enai maui dokadoka deabi,

¹⁶ Ameamea ena nuavi namavaikana laloanai Idume kabukabuna siavunai nuamui laloatai bevakula'lamui,

¹⁷ inoku emui abiveni dainai, Keliso 'eva nuamui ai bemimia. Ameamea, oi lalo'au laloanai lamumui bekula'ila mai oi bolava 'ini kave'i,

¹⁸ mai Dilava ena kabukabu kauta ita siavu oi boabia ka'ona, inoku Keliso ena lalo'au ena palapala mai laka'ina mai ena akai mai ena 'oula aboina 'eva oi boikabasia kave'i.

¹⁹ Inoku oi boikabasi, Keliso ena lalo'au 'eva ekeini vaika vakaia ita eta ikabasi, inoku emui maui 'eva Dilava ena dava boutai ai bevavonumui.

²⁰ Ita nuatai evinaula Dilavana ena siavuai kamanoia 'o kamalalovai 'eva bevenita daiasi bedaia.

²¹ Ameamea Dilava ena lo'e kauta laloatai mai Keliso Iesu laloanai ulu boutai laloatai nuavi 'eva Dilava bevenia keinikeini, Amen.

4

Keliso Kauaninai

Ekavaka'onamo.

¹ Lau Paulo Lovia namana ena vinaula avavaia 'ounai vabuto'o lumanai de'alavu'u, oi Dilava e'aemui kaumui anoimui ia ena ula maulinai oi bomimia.

² Melala boutai oi bomanau, 'ulumui asi'i, oi bomimiamo, lalo'auai ka ka oi bovidulu viveni.

³ Idume Kabukabuna evenimui nua'elunai oi bokula'ila vaka'onamo kanaua oi boabi'inia.

⁴ Keliso kauanina 'eva ka'onamo mai Idume Kabukabuna vaka ka'onamo. Vitaitana e'aemui koanai nuabata ka'onamoai e'aemui boina.

⁵ Lovia namana 'eva ka'onamo, mai abiveni ka'onamo, mai vaidi'u kabukabu vaka 'eva ka'onamo.

⁶ Dilava vaka ka'onamo deva momo'aia kautamo Kamata, ia 'eva dava boutai 'olata, mai kau boutai nuatai evinaula, maivaka deva momo'aia kauta nuatai emimia.

⁷ Beia Keliso ita ka ka ena veniveni davata edeata umauta evenita, iulaveni kanaua 'eva ena ula vitaitanai kau ka ka ekolevenita.

⁸ Puka kabukabunai kanania elelea koma,

“Ia ele'au eda'a akai koanai,
devabuto'o kauta evuata ita
deda'a mai ainama ena kau evenita.”

Sal 68.18

⁹ Ediaka 'Ia ele'au eda'a akai' anina 'eva dava? Anina 'eva ia e'ovu makava eda'a kanobatai.

¹⁰ Eda'a kanobatai kauna 'eva ele'au eda'a vutuvutu akana umaunai, vutuvutu mai kanobatai boutai siavunai bevavonuta 'ounai.

¹¹ Ia sibona ainama ena kabukabu kauta evenita 'eva vaida veauneke kautai be'ao, vaida enolea kauta be'ao, vaida evanelia kautai be'ao, vaida 'eva ilolo kauta mai vaida vamalele kautai be'ao.

¹² Keliso ainama kataua eveni 'eva Dilava ena kauta boutai beva'oluta lo'e vinaulata ivavaitai, inoku Keliso kauanina 'eva bedaua bele'au.

¹³ Dala kanania'i ita boutai ekaasi ekavaka'onamo Dilava Nakuna ekaabivenia ekaikabasia beda'amo Lovia namana laloanai ekakula'ila kave'i, Keliso ena koakoa nama'ita boutai vitaitatai ekao itani ia boina.

¹⁴ Inoku ita 'eva sia melo kikita boitai ekao, kau dedeta eta vaikabasi dedetai sia belebata itani ka'uda beakuta lao ona beakuta mai boina, mai lani bevivuta ua ekada'ala ona nia ekaasia boina.

¹⁵ Beia ita lalo'au ai luva umauna ekaluva inoku dava boutai etai ekakubukabu Keliso boina ekao, ia 'eva ita eta 'ola kauna.

¹⁶ Keliso enai kauani itoina evaka'onamo mai le'e boutai detata'u deabi'inia inoku sibota ka ka itau sibona ena vinaulai boutai devidulu devinaula inoku kauani itoina sibona lalo'au ai ekukubu mai edaua ele'au.

Mauli Makamakana Keliso Laloanai.

¹⁷ Kanaua 'ounai Lovia namana vanai lau oi a'oumui maivaka avalalomiune, vali'u oi emui mia melalatai emui mauli 'eva sia Pulu edea kauta boita be'ao, ia eta lalovai 'eva anita asi'i.

¹⁸ Ia nuata 'eva devabula. Dilava eveni maulina 'eva ia kevatai asi'i, 'olana eta 'oualavu mai nua pasisi dainai.

¹⁹ Ia dava devavaia davana sia demalalai vaia mai koakoa si'avata vaika devavai, maivaka dava 'obuta edeata edeata devavai.

²⁰ Beia oi 'eva dala kanaua'i Keliso sia oi omalele vaia.

²¹ Aikabasi oi Iesu valina 'ani oika mai ia enai luva umauna dalanai devaikabasimui.

²² Kanaua 'ounai kauanimui 'ana'ina mauli si'avana vaika dalanai evami-amui davana oi bovadadala ovo, kauani kanaua ena ula dedetai sibona evasi'avanala.

²³ Nuamui mai emui lalovai lalovai 'eva oi bovamakamakata.

²⁴ Kauani makamakana oi bovadodoa, u'a 'eva Dilava ikaikana luva umauna ena komolo ai mai kabukabu ai ivavaina.

²⁵ Kanaua 'ounai oi boumuiai dede luvata sia oi boluluva, kele'emui kauta luva umauta oi bo'outa, 'olana ita boutai 'eva Keliso enai kauani ka'onamo le'ena ka ka.

²⁶ Oi obabadu koanai oi bo'imamui kave'i mai va'eva sia oi bovavai, sia oi bobabadumo melala be'ulu,

²⁷ mai diabolo 'abuna sia oi bovavaia.

²⁸ Evinao kauna vinoa evikania, beia bevinaula, imanai dava nama'ita bevavai, inoku dava kataua'i ta'ovala kauta beduluta.

²⁹ Nutumuiai luva si'avata vaika sia oi boluva kove'i, beia vidulu luvata oi boluluva inoku lelemui de'ika kauta beduluta bekula'ila, inoku oi oluvala luvata de'ika kauta nama'ina bevenita.

³⁰ Dilava Idumena Kabukabuna sia oi bova nuanaanala, ia 'eva Dilava ena vamomo'ai koana oi kevamuiai beda'amo melala kanaua be'asi koanai bevamaulimui.

³¹ 'Ovede dede luvata badu viala mai 'oukeinikeini katania boutai oi bovikanita, maivaka vasi'avana lalovaita edeata edeata oi bovikanita.

³² Beia banomui ka ka kevatai oi bovavai kave'i mai oi bonama'ina, Dilava Keliso laloanai emui si'avana e'oukao vitaitanai ka ka eta si'avana oi bo'oukao.

5

Mauli 'Ailalana Laloanai

Ekamia.

¹ Kanaua 'ounai okovokovo Dilava boinai oao, 'olana oi 'eva Dilava nakuna mai ena lalo'au.

² Inoku lalo'au maulinai ekamia itani Keliso elalo'au venita boina, mai ita daitai Dilava vailanai sibona ena mauli eveni ainama davana bonana mediana mai si'avana iabi ovota davanai eao.

³ Beia oi vilomuiai kulakula lalovaita si'avata, 'obu davata, 'o idono koata ka nutumuiai sia boluvala kovo sia oi bovavaita, 'olana Dilava ena kabukabu kauta etai dava katania 'eva sia dekomolo.

⁴ Maivaka luva si'avata, vabo'obo'o luvata mai mediamedia luvata si'avata, dava katania 'eva sia dekomolo, beia Dilava enai vanama'ina luvata oi boluluva 'eva enama'ina.

⁵ Oi boikabasia 'eva benama'ina, kulakula, lalovai si'avata ivavaita 'o idono kauta 'eva dilava dedena dekukudivo venia boina, inoku Keliso mai Dilava eta lovia vanua laloanai kau kataua boita 'eva avuta asi'i.

⁶ Sia kau ka ena dede luvatai belebamui, 'olana dava katania daitai Dilava ena badu be'ovu lele sia de'ika kauta etai.

⁷ Kanaua 'ounai oi 'eva kau kataua boita ita sia oi bovidoka.

⁸ 'Ana'inai oi 'eva vabuto'o laloanai oi omia, beia vali'u oi 'eva Lovia namana 'ailalana laloanai, kanaua 'ounai oi 'eva 'ailala nakunai oi bo'ao.

⁹ 'Ailala vuavuana 'eva lalovai nama'ita koakoata nama'ita boutai ai, vinaula komolota, mai luva umauna.

¹⁰ Kanaua 'ounai olalovai kave'i Lovia namana ivanama'inana davana okavua.

¹¹ Vabuto'o vinaulata anita asi'i davata sia oi bovavai, ia oi bovala'asita vinaula kataua 'eva va'eva vinaulata.

¹² Dava vunivunia devavai davata katania 'eva desi'avana vaika 'ounai i'ola vaita 'eva amalalai.

¹³ Beia dava boutai 'ailalai ekavala'asi inoku ekaika kave'i.

¹⁴ 'Olana 'ailala etata'u dava boutai eva'ailala kave'i. 'Ounai kanania eluva koma,
"Muinai kaumu e,

ibi, bai ko'isi,
inoku Keliso oni beva'ailalamu.”

¹⁵ 'Ounai emui mia maulina 'eva oi bo'imala kave'i, bo'o kauta boitai sia oi bo'ao beia aoneka kauta boitai oi bo'ao.

¹⁶ Vinaula melalata boutai 'eva oi bovavai kave'i, 'olana melala katania 'eva melala si'avata.

¹⁷ 'Ounai sia oi bobobo'o, beia Lovia namana ena ula davana 'eva oi boikabasia.

¹⁸ Mulamula pasisitai sia oi boinu ba, kanaua betata'u bevasi'avanamui. Beia 'abunai Idume Kabukabunai oi bovovonu.

¹⁹ Banomui ita oi ovaka'onamo koanai Salamoai, masiai, mai idume masitai oi bokula'ila, nuamuiai Lovia namana masina oi bo'abi mai oi bovanama'inala.

²⁰ Melala boutai eta Lovia namana Iesu Keliso vanai Dilava kamata vanama'ina luvata ekavenia dava boutai 'outai.

Kamoane Mai Lo'e.

²¹ Ka ka sibomui banomui leleta oi bo'ika vitaitana Keliso 'olana oi o'aku boina.

²² 'A'ate e, adamui leleta oi bo'ika itani Lovia namana lelana oi o'ika boina.

²³ 'Olana kau 'eva adana e'ola vaia vitaitana Keliso 'eva lo'e e'ola vaia boina. Dilava ena lo'e kauta boutai 'eva ia kauanina, ia sibona 'eva lo'e kauta ivamaulita kauna.

²⁴ Maivaka vali'u lo'e kauta Keliso lelana de'ika vitaitanai 'a'ate vaka dava boutai laloatai adata leleta be'ika.

²⁵ Kau e, adamui oi bolalo'au venita vitaitana Keliso lo'e kauta elalo'au venita mai lo'e kauta daitai ia sibona ena maui eveni.

²⁶ Kanania evavaia 'eva Dilava ena lo'e kauta evamakamakata vitaitana vejai evaidi'uta boina inoku Dilava ena luvai evakabukabuta.

²⁷ Inoku ia enai 'eva lo'e mediana vaikai be'ao, sia be'obu 'o beloloi 'o dava ka ia kauaninai beavu'au, beia ia 'eva bekabukabu mai bekomolo dokadoka.

²⁸ Dala kanania vitaitanai kau adata belalo'au venita, itani sibota kauanita delalo'au venita boina. Kau adana elalo'au venia kauna 'eva sibona vaka elalo'au venia.

²⁹ Sia kau ka sibona kauanina evaivivia, beia evanania mai e'imala kave'i, itani Keliso lo'e kauta e'imata kave'i boina.

³⁰ 'Olana ita abiveni kauta 'eva Keliso kauanina le'eta.

³¹ Puka kabukabunai kanania eleleia koma, ' Kanania 'ounai kau 'eva kamana sinana bevikanita inoku adana ita bevaka'onamo, inoku ia lalua 'eva kauani ka'onamoai be'ao.'

³² Kanania 'eva luva vuniana namana, beia lau 'eva Keliso mai lo'e kauta 'eva ka'onamo lovata a'aku.

³³ 'Ounai aluva udai, oi kau boumuiai 'eva adamui oi bolalo'au venita itani sibomui oi olalo'au venimui boina, mai ateate vaka adana 'olana be'aku.

6

Naku Mai Kama Sina.

¹ Naku e, sinamui kamamui leleta oi bo'ika, 'olana oi 'eva Lovia namana ena. Kanania oi bovavaia 'eva ekomolo.

² “Sinamui mai kamamui 'olata oi bo'aku.” Kanaua 'eva talavatu lava'ana'ina mailuva'ana'ina.

³ Luva'ana'i 'eva kanania, “emui maui benama'ina mai kanobatai emui mia maulina 'eva bedau'a.”

⁴ Kama mai sina e, nakumui sia oi bovadaduta, ia Lovia namana ena vaidiba ai mai ena vaikabasi luvatai oi bova'aida'aidata.

*Da'alaabi Kauna
Mai 'Ola Kauna.*

⁵ Da'alaabi kaumui e, kanobatai de'ola vaimui kauta leleta daitai oi bodadai 'ola aku ai mai maimakaumui ita, mai nuamui momo'aita ita, itani Keliso lлена daitai oi odadai boina.

⁶ Melala boutai 'eva leleta oi bo'ika ia sia deikamuimo koanai leleta oi bo'ika, itani Keliso ena da'ala abi kauta boita, Dilava ena ula nuamui bounai ai oi bovavaia

⁷ Nuamui mediatai oi bovinaula, itani Lovia namana ena vinala oi ovavaia, ia sia kau eta vinala devavaia.

⁸ Olana 'ani oi oikabasi Lovia namana 'eva da'alaabi kauta 'o sia da'alaabi kauta vinala dava nama'inana devavaia daitai 'eva ka ka tavata beveveni.

⁹ Ola kaumui e, dala vitaitanai emui da'alaabi kauta kevatai oi bovavaia, mai sia oi bovamakauta, oi oikabasi oi mai ia 'eva emui 'Ola kauna ka'onamo vutuvutuai emimia, ia 'eva kau boutai eta koa vitaitatai eikata ia sia kau ka enai e'au.

*Dilava Ena Kualii Davata
Ekavadodota.*

¹⁰ E'u luva to'ona 'eva kanania, Lovia namana laloanai mai siavuna kula'ilanai oi bokula'ila.

¹¹ Dilava ena kualii davata boutai kaumui ai oi bovadodota, inoku diaboloo ena idiba vinalata oi bovailata.

¹² Olana ita 'eva sia kau kaviaku venita, beia ka'uba si'avata vaika eta 'ola kauta, siavu ka'ubata, kanobata vabuto'ona kanania de'ola vaia ka'ubata, mai kualii ka'ubata si'avata vaika vutuvutu venunai demimia ka'ubata ita kakualii.

¹³ Kanaua 'ounai vali'u Dilava ena kualii davata boutai oi boabita isi kaumui ai oi bone'eta 'au, inoku melala si'avana vaika be'asi koanai oi 'ani bolava 'ini, inoku dava kanaua be'ole mulinai oi 'eva 'abumui ai oi bolava'ini.

¹⁴ Kanaua 'ounai oi bolava 'ini, luva umauna itani i'apa boina kukuumui ai oi bo'apa 'inia, mai vinala komolo pedemui i'alavuna davana ai oi bone'ea'au,

¹⁵ mai ova'olu nua'elu valina nama'ina oi boluvala asi 'eva itani emui tamaka oi olavauda boina.

¹⁶ Katania boutai akatai, abiveni oi boabia isi itani 'alavu'alavu davana boina, inoku ka'uba si'avana vaika ena siba mai'alovata boutai 'ani oi bovabo'ota.

¹⁷ Dilava ena vamauli 'eva oabia isi kualii kokoena boina mai Idume kabukabuna ena kualii lepona, ua 'eva Dilava ena luva.

¹⁸ Melala boutai Idume Kabukabuna ena siavuai oi bomeamea, dava edeata edeata boutai akatai mai emui ula boutai meamea ai Dilava oi bonoia. Nuamui ai kanania bemimia mai makamui be'ata, melala boutai Dilava ena kabukabu kauta boutai daitai oi bomeamea.

¹⁹ Lau vaka aka'uai oi bomeamea, inoku lau nutu'u baluvua koanai Dilava lau luva beveni'u inoku lau 'eva mai kula'ila'u vali namaina laloanai luva devuni luvata bavala'asita.

²⁰ Lau 'eva Dilava esini'u vali nama'ina kanania bailolo vaia kanaua 'ounai avabuto'o. Oi bomeamea lau 'eva vali nama'ina bamailolo vaia kula'ila Dilava ena ulai.

²¹ Tukiko, bo'akalata lalo'auna mai Lovia namana ena da'ala iabina kauna nama'ina, dava boutai 'ani be'oumui inoku oi boikabasi lau 'eva a boi'u mai lau 'eva dava avavaia.

²² Asinia evavasi kele'emui 'olana 'eva kanania, oi boikabasi lai 'eva a boimai, mai bevakula'ilamui.

²³ Ameamea Dilava ita Kamata mai Lovia namana Iesu Keliso betata'u eta nua'elu, lalo'au maiabivenina bo'akalamai boumuiai bevenimui.

²⁴ Dilava ena iulaveni 'eva eta Lovia namana Iesu Keliso sia be'ole lalo'auna ai oi olalo'au venia kaumui boumuiai akamuiai bemimia.

Paulo Ena Malele **PILIPO** Kauta Kevatai

Puka Laloana Ilelena Luvana

Pilipo 'eva vanua namana ka Makedonia ai (Veauneke 16), Paulo eta'u vali nama'ina eilolo vaia 'abuna. Kanaua mulinai, eda'a 'abu ka 'eva vabuto'o lumai dekapoia dodo, inoku vali eika 'eva kau vaida deta'u Pilipo kauta eta abiveni devaedeana. Beiamo puka kanania laloanai adedua kataua sia eka davali. Paulo ena abiveni 'eva Iesu enai e'uleia dokadoka, kanaua 'ounai ia 'eva nuana nama'ina. Paulo ena mauili laloanai 'eva eanana, eulalu mai kauani davata eulavenita.

Kanaua 'ounai puka kanania ilelenai 'eva Paulo ena ula nama'ina luvana nama'ina beveveni 'olana Pilipo kauta eta vidulu ia kevanai 'eva namavaikana 'ounai. Mai dava ka 'eva, Paulo ena ula namana 'eva eta abiveni bekula'ila 'udai belava 'ini, 'olana asi'i demalalovaia Paulo 'eva vali'u vabuto'o lumana laloanai inoku asi'i demavilalo 'udai. Paulo ia e'outa, vidulu kanaua Dilava kevanai dedavalua 'eva mauili makamakana inoku kanaua 'eva Keliso enai dedavalua. Paulo ena ula namana 'eva Pilipo kauta Keliso ena koakoa mai ena vinaula beabita bemaui vaita. Keliso sibona nuana evamanaua, inoku vinaula kanaua Dilava ia evenia davana bevaolea kave'i.

Puka Iduvuna Namata

- a. Lova aku. (1.1 - 11)
- b. Paulo sibona ena mauili pasisina. (1.12 - 26)
- c. Mauili Keliso enai davana. (1.27 - 2.18)
- d. Timoteo mai Epapolodito ita eta luva. (2.19 - 30)
- e. 'Ou kauta mai si'avana luvata. (3.1 - 4.9)
- f. Paulo mai ena kau Pilipo kauta. (4.10 - 20)
- g. Luva to'ota. (4.21 - 23)

Vanama'ina Luvata Paulo

Ena Lelelele Pilipo Etai

¹ Paulo mai Timoteo, lai Keliso Iesu ena da'ala iabina kaumai, oi Dilava ena kabukabu kaumui boumuiai, ikakao kauta mai diakono kauta Pilipo ai oi omimia Keliso Iesu oi oabiveni kaumui 'eva malele kanania lai alele venimui.

² Lai ameamea Dilava ita kamata mai Lovia namana Keliso Iesu 'eva iulaveni mai nua'elu ai bevanama'inamui.

Paulo Pilipo Kauta

Daitai Emeamea

³ Lau alalovaimui melalata boutai koanai e'u Dilava avanama'inala.

⁴ E'u meamea boutai laloatai 'eva oi boumuiai daimuiai melala boutai mailalonama'u ita ameamea,

⁵ 'olana emui vidulu vinalana vali nama'ina vinalanai melala maka-vanai easimo vali'u,

⁶ kanaua'i aikabasi dokadoka, Dilava 'ani vinaula nama'ina kanaua nuamuiai emakavala kauna vinaula kanaua bevavaia beda'amo Iesu Keliso ena mue 'udai melalanai bevaolea kave'i.

⁷ Dala kanania'i e'u lalovai lalovai boumuiai kevamuiai 'eva ekomolo, lau nua'uai oi alalovaimui kao, 'olana vali'u lau avabuto'o 'o vali nama'ina

'eva momo'aina kanaua bavaikata une mai vali nama'ina ivamomo'aina, oi boumuiai 'eva Dilava ena iulaveni laloanai lau ita oi ovikole viveni.

⁸ Lau Iesu Keliso nuantai boumuiai a alalo'au venimui koma mai e'u ula bamaikamui 'eva Dilava eikabasi.

⁹ Inoku e'u meamea 'eva kanania. Emui lalo'au 'eva bekubu basibasi ikabasiai mai nuakomoloai,

¹⁰ kanaua 'ounai oi 'eva dava nama'ita umauta oi bodilata, nuamui be-makamaka mai va'evai sia oi bodododo beda'amo Keliso ena mue 'udai melalanai.

¹¹ Iesu Keliso enai vinaula komolo ai de'asi vuavuatai bevavonumui, 'olana katania betata'u 'eva nuavi mai vanama'ina doutamo Dilava bevenia.

*Paulo Vabuto'o Lumanai Emia
Vali Nama'ina Idulunai Eao.*

¹² Bo'akala'u e, lau a'ula oi boikabasi, dava keva'uai epulu davana kanaua 'eva vali nama'ina ikavanai eao.

¹³ Kanaua 'ounai lovia 'olana Kaisala ena luma itoina i'imana kauta mai kau boutai deikabasi lau 'eva Keliso dainai avabuto'o.

¹⁴ Lau 'eva avabuto'o dainai, bo'akalata doutamo Lovia namana enai nuata devakula'ilata mai sia demakau Dilava luvana maikula'ilata deluvavaia.

¹⁵ Luva umauna 'eva vaida Keliso valina mama ai mai vialai lau dai'uai deilolo vaia, beia vaida 'eva nuata nama'itai deilolo vaia.

¹⁶ Vaida katania 'eva lalo'auai deilolo vaia, deikabasi Dilava eveni'u vin-aulana 'eva vali nama'ina momo'aina umauna bavaikata dainai.

¹⁷ Vaida kataua 'eva Keliso valina sia nuata nama'itai deilolo vaia, ia eta ula 'eva vata beabisi, mai eta lalovai 'eva vabuto'oai amimia laloanai e'u anaana bemavanamala.

¹⁸ Dala davai, va'evanai 'o momo'ainai de'iuvai 'iuvai, beia luvana asi'i, dava namana 'eva Keliso valina 'ani deilolo vaia. Lau alalonama 'olana kanaua. 'O, lau 'eva balalonama basibasi.

¹⁹ 'Olana lau aikabasi emui meameai maivaka Iesu Keliso Idumena ena vidulu ai, dava keva'uai epulu davana betata'u bevala'asi'u.

²⁰ E'u ula namana mai e'u nuabata 'eva kanania e'u vinaula laloatai sia bamalalai, beia bakula'ila vaika, kanaua 'ounai melala boutai vitaitanai vali'u Keliso 'eva kauani'u ai babia isi, mauili'uai 'o ba ai.

²¹ 'Olana Keliso 'eva e'u mauili laloanai inoku mauili'uai 'o bai ai 'eva nama'ina badavalia.

²² Bema lau kauani maulinai bamauili, kanania anina 'eva lau vuavua vinaulata nama'itai doutamo bavavai, lau sia aikabasi davana 'eva babia.

²³ Lau 'eva 'abu lua viloatai amimia, aula vaika mauili kanania bavikania inoku Keliso kevana bada'ala, kanaua keva'uai 'eva benama'ina.

²⁴ Beia mauili'u ai amimia 'eva dava namana umauna emui nama'ina dainai badulumui.

²⁵ Lau avamomo'aia 'eva kanania, lau 'eva mauili'uai bamimia inoku oi boumuiai badulumui, ekavaka'onamo emui lalonama abiveninai mai ivakubunai.

²⁶ Kanaua 'ounai lau bamue 'udai ba'asi kevamui ai koanai, Keliso Iesu laloanai emui apa 'eva namana be'ao lau dai'uai.

²⁷ Dava namana 'eva kanania, Keliso ena vali nama'ina dainai sibomu koakoa nama'itai ovada'amui kave'i. Inoku bavavasi baikamui 'o sia bavavasi itani valimui mo bamaika, lau a'ula baikabasi oi 'eva lalovai ka'onamoai oi olava 'ini mai vali nama'ina iabiveninai oi okuali.

²⁸ Emui 'ou kauta sia oi bomakau venita, oi bokula'ila. Kanaua 'eva ia eta ba koana, beia oi kevamui 'eva mauili koana Dilava kevanai e'asi.

²⁹ Keliso dainai eainama venimui 'eva sia ia iabiveninai mo, beia ia dainai vaka oi boanana.

³⁰ Oi mai lau 'eva kavaka'onamo bavunu vitaitana kanania laloanai, kanaua 'eva 'ana'inai oi oika'u abavunu vitaitana, vali'u vaka oi o'ika lau abavunu do'o mo.

2

Keliso Nuana Vitaitanai Ka Ka Manau Ai Banomui Ita Oi Bovanamamui.

¹ Bema Keliso evakula'ilamui emui mauili laloatai, mai ena lalo'au ai edulumui, Idume Kabukabuna ita oi ovaka'onamo, emui vilalo mai vavai kave'i banomui kevatai.

² Inoku avaasiasimui, lalovai ka'onamoai e'u lalonama oi bovanamala vaika, oi bovilalo'au viveni, idume ka'onamoai mai ula ka'onamoai.

³ Sia dava ka idono ai 'o apa ai oi bovavaia, beia ka ka sibomui manau ai banomui oi bolalovaita bata'ina vakaia oi sibomui.

⁴ Ka ka sibomui emui nama'ina mo sia oi bokavua, beia vaida eta nama'ina vaka oi bokavua.

⁵ Emui lalovai mai koakoa 'eva Keliso Iesu nuana vitaitana boinai be'ao.

⁶ Keliso 'eva dava boutai
Dilava vitaitanai emia,
beia Dilava ita bemavitaita
'eva sia elalovaia.

⁷ Beia sibona evakikia,
da'ala abi kaunai eao,
kau ivavitaitatai epulu.

⁸ Kau vitaitanai eao laloanai,
ia sibona evamanaua mai
Dilava lenea eika eda'a mo eba,
ua'i au ido'o valaukuna akanai eba.

⁹ Kanaua 'ounai Dilava eta'u
eabia isi akai vaika,
inoku ia vana evenia 'eva
va boutai akatai.

¹⁰ Iesu vanai kau boutai
vutuvutuai, kanobatai mai kanobata venunai bekuidula,

¹¹ mai kau boutai nututai be'ouasi Iesu Keliso 'eva Lovia namana,
Nuavi boutai 'eva
Kamata Dilava ekavenia.

Visiu Boita Be'ailala.

¹² Kanaua 'ounai, e'u lalo'au kaumui e, melala boutai kevamuiam amimia 'o sia amimia laloanai lele'u daitai oi odai boina, vali'u e'u da'atau ai, melala bounai lele'u daitai oi bodadai ivamaulimui vinalata oi bovavai basibasi mai nuabatamui ita.

¹³ 'Olana Dilava 'eva oi nuamuiam evinaula ena ula dalana nama'inai mai siavunai sibomui oi bovavaia.

¹⁴ Dava boutai oi bovavaita 'eva sia adedua dalanai 'o sia 'ovede dalanai.

¹⁵ Kanaua 'eva sia 'ani oi bova'eva mai 'ani oi bomakamaka, Dilava nakuna mediamuiam oi bo'ao, va'eva mai si'avana uluna laloanai oi omimia, ia vilootai oi bo'ailala itani visiu vutuvutuai boita,

¹⁶ mauili luvana oi bovala'asia vitaitanai lau Keliso ena mue 'udai melalanai ba'apa lau 'eva sia aveau 'avaea 'o abavunu 'avaea oi dainai.

¹⁷ Beia bema lau bamaba inoku lala'u 'eva itani kabukabu venivenina ainamana boina bemasisia odaoda emui abiveni vinalata kabukabuta

davata akatai oi oveveni Dilava enai. Lau 'eva alalonama mai oi boumuiai ita ekalalonama ka'ona.

¹⁸'Ounai oi vaka oi bolalonama mai oi lau ita ekalalonama ka'ona.

Timoteo Mai Epapolodito.

¹⁹Lovia namana Iesu ena ula koanai anuabata Timoteo 'ani kevaimo basinia bevasi kele'emui, kanaua'i valimui ba'ika koanai lau vaka bakula'ila.

²⁰Sia kau ka Timoteo vitaitana lau keva'uai, ia ena ula dokadoka 'eva oi emui nama'ina dainai.

²¹Kau vaida sibota eta ula davata dekakavu, sia Iesu Keliso dainai.

²²Beia oi oikabasi Timoteo sibona evamomo'aia, 'olana Dilava ena vinula'i itani melo ka kamana ita boina ia lau ita avinaula ka'ona vali nama'ina vinaulanai.

²³Kanaua dainai e'u nuabata 'eva dava keva'uai a bemapulu koma baikata inoku ia basinia kaokao bevasi kele'emui.

²⁴Inoku lau 'eva Lovia namana enai avamomo'ai lau sibo'u 'ani kevaimo bavasi kele'emui.

²⁵Beia lau alalovaia ena nama'ina 'eva bo'akalata Epapolodito basinia 'udai bevasi kele'emui, lai avinaula ka'ona mai e'u ai e'au eviaku, ia vaka 'eva emui veauneke kauna, oi osinia kauna e'u ula davata bevavai.

²⁶Ia oi boumuiai elalovaimui bemaikamui mai nuana ebavunu vaika 'olana valina oi oika ia 'eva e'olele dainai.

²⁷Luva umauna ia 'eva e'olele siasia mai kevai mo eba. Beia Dilava eta'u elaloia, inoku sia ia mo elaloia ia lau vaka elalo'u, e'u nua anana asi'i namana emaa'o makauna.

²⁸Kanaua dainai e'u ula namana 'eva basinia bevasi kele'emui, kanaua 'ounai ia oi boikala 'udai koanai oi lalomui benanama inoku lau e'u nua mekau 'eva bekiki.

²⁹Lovia namana vanai ia oi boabia dae mai lalonamamui ita, mai kau ia boita 'eva 'olata oi bo'aku,

³⁰'olana kevaimo eba Keliso ena vinaula dainai, ia ena mau'i ebolabolala, sia oi boma veni'u viduluna vinaulana keva'u ai evavaia 'olana lau 'eva dau'ai.

3

Keliso Iabivenina Dainai

Komolo Bevenita.

¹Bo'akala'u e, luva to'onai, Lovia namana enai oi bolalonama! Sia akauba'oa luva ka'onamo kanania ilelena 'udai, 'olana oi bedulumui oi bokula'ila.

²Si'avana devavai kauta kataua kevatai, kauanita deivata 'avaea kauta kataua kevatai oi bo'imamui kave'i. Ia 'eva itani 'oveka boita.

³Ia Dilava Idumena Kabukabunai kakukudivo, Iesu Keliso kaapa vaia, Ita 'eva iva kauta umauta dainai kauani ena koakoa sia kavamomo'aia.

⁴Lau vaka kauani koakoana ivamomo'aina aikabasia. Bema kau ka kauani koakoana iabiveninai eikabasi, lau ia akeinia.

⁵Lau apulu 'oma'oma'u ai melala kalavani laloanai deiva'u. Isalaela kau'u, Beniamina ena iduvu kau'u, 'Ebelu kau'u umau'u. 'Ana'inai Iuda eta talavatu i'imanai lau 'eva Palisea kau'u ao.

⁶E'u kula'ila itoina avala'asia Dilava ena lo'e kauta avaanaanata. Talavatu vinaula komolo i'imanai lau 'eva sia ava'eva kovo.

⁷Beia 'ana'inai nama'ina deveni'u davata kataua vali'u Keliso dainai 'eva si'ava vaikata akoma.

⁸ Sia dava katania mo, dava boutai lau alalovaita anita asi'i, Iesu Keliso e'u Lovia namana baikabasia kave'i 'eva dava namana. Ia dainai lau dava boutai 'ani aitota 'au, lu'ulu'uai avaaota Keliso babia 'ounai,

⁹ inoku lau 'eva ia laloanai. Lau sibo'u talavatu iabinai komolo ka sia adavalia, beia Keliso iabiveninai. Dilava enai komolo kataua de'asi 'eva abiveniai.

¹⁰ Lau a'ula Keliso baikabasia mai ena ko'isi 'udai siavuna baikabasia, mai ia eanana vaia vitaitana lau vaka baonovaia, ena ba anaanana vaka baonovaia.

¹¹ Kanaua 'ounai lau anuabata venia ba ai ko'isi 'udai maulina babia.

Paulo To'ona Eveauvenia.

¹² Lau sia adiaka dava boutai katania 'ani abi 'o 'ani akomolo vaika, beia lau alo'oa do'o mo davana alalovaia, babia dainai 'eva Iesu Keliso eabi'u kao.

¹³ Bo'akala'u e, lau sia alalovaia bavunu anina 'ani abia. Beia dava ka'onamo abavunu vaia, muli'u ai vinalana abolabolala ia vaila'u ai vinalana mo akula'ila vaia,

¹⁴ to'ona aveau venia avu'u babia dainai Dilava e'ae'u vutuvutuui Iesu Keliso laloanai maui babia.

¹⁵ Boutai 'ani abiveniai kakula'ila kauta 'eva kanaua kamalalovaia koma. Bema oi vaida dava edeata oi olalovai koanai, Dilava betata'u katania vaka nuamui beva'aillata.

¹⁶ Ita dava 'ani kaikabasia davana mo dalanai kada'a.

¹⁷ Bo'akala'u e, e'u koa vitaitanai oi bovavai, emai vinala mai luva deabi dae kauta kataua oi boikata kave'i.

¹⁸ Dainai, 'ana'inai melala doutamo a'oumui vitaitana mai vali'u maiilulumaka'u ita a'oumui 'udai, kau doutamo Keliso ena ba au ido'o valaukunai 'eva eta 'ou boinai demauli vaia.

¹⁹ Eta dilava 'eva kauani ena ula davata. Inoku eta apa 'eva malalai davatai. Ia nuata lalovaita 'eva kanobata davatai. Ia eta maui to'ona 'eva 'alova 'abuna.

²⁰ Beia ita 'eva vutuvutu vanuana kauta. Inoku ita ivamaulita kauna Lovia namana Iesu Keliso kanielalovai ka'imala ua'ini be'asi.

²¹ Ia siavuna kanaua'i betata'u dava boutai beabita be'asi be'ola vaita, kauani badebadeta bevaedanata ia kauanina nuavina boinai be'ao.

4

Melala Boutai Lovia Namana

Enai Oi Bolalonama.

¹ Kanaua dainai, bo'akala'u e, oi alalo'au venimui kaumui mai bamaikamui 'udai, e'u lalonama mai e'u apa 'eva akamuiai, e'u lalo'au kaumui e, kanaua boina oi bolava 'ini koma Lovia namana laloanai.

² Lau Euodia anola mai Sunutuke anoia Lovia namana laloanai laluanu nuamui bevaka'onamo.

³ Oni eveeve ka'onamo kavuala kaumu, e'u ula 'a'ate luana katania boduluta, 'olana ia 'eva lau ita lai abavunu ka'ona vali nama'ina dainai, maivaka Kelemento mai lau bano'u umauta ita lai avinala ka'ona kauta, ia vata 'eva Dilava ena maui pukana laloanai demimia.

⁴ Melala boutai Lovia namana laloanai oi bolalonama. Aluvala 'udai. Oi bolalonama!

⁵ Emui koakoa nama'ita kau boutai vailatai oi bovala'asi. Lovia namana 'eva 'ani kevaimo be'asi.

⁶ Sia dava ka oi bonua bavunu vaia, beia dava boutai laloatai, meamea ai mai noinoi ai mai vanama'ina ita emui ula luvata 'eva Dilava oi bovenia.

⁷ Inoku Dilava ena nua'elu 'eva kau ena ikabasi ekeinia vaika, nua'eluna kanaua 'eva nuamui mai emui lalovai lalovai Iesu Keliso laloanai be'ima.

⁸ Bo'akala'u e, luva to'ona kanania, bema dava ka 'eva mediana 'o akua-balai davata koanai katania boita oi bolalovaita, momo'ai davata, 'ola aku davata, komolo davata, sia mai va'eva davata, lalo'au davata, ivanama'ina davata.

⁹ Lau keva'u ai dava oi oikabasia 'o oi oabia 'o keva'u ai 'uluna oi oika, 'o keva'u ai oi oikala davana oi bokovoa. Inoku nua'elu Dilavana 'eva oi ita.

Paulo Pilipo Kauta Eta Veniveni Eabia Nama'ina Luvana Eluvaia.

¹⁰ Lovia namana laloanai alalonama vaika oi lau olalovai'u 'udai dainai, aikabasi 'ana'inai oi olalovai'u, beia oi bodulu'u dalana asi'i.

¹¹ E'u ta'ovala luvana sia aluva vaia, 'ani amalele vaia dainai nua'u evitaita dava keva'u ai emimia davanai.

¹² Lau aikabasi dava ka'ula laloanai a bamauli koma, maivaka lau aikabasi dava ena douta laloanai a bamauli koma, dava vunita 'ani amalele vaita davata boutai 'ani amadana vaita, bo'akubu 'o vikolo, lovia 'o ta'ovala.

¹³ Keliso kula'ila eveni'u, ia laloanai lau dava boutai 'ani bavavaita.

¹⁴ Beia e'u mekau laloatai oi odulu'u 'eva enama'ina vaika.

¹⁵ Oi Pilipo kaumui e, oi oikabasi, vali nama'ina amakavala ailolo vaia ua'i, emui kanobata Makedonia avikania koanai, oi Pilipoai kaumui mo oi odulu'u.

¹⁶ Lau Tesalonika ai amia koanai, beia vidulu oi osinita 'udai 'udai deasi kele'e'u lau vidulu aula koanai.

¹⁷ Sia ainama akavua, beia oi ivanama'inamui vuavuaana ivavovo'ona akavua.

¹⁸ Lau dava boutai 'ani abita, kele'e'u dava 'ani doutamo, emui veniveni Epapolodito imanai oi osini davata 'ani abita. Kataua 'eva bonata nama'ita mai veniveni davata, Dilava 'ani eabita dae elalonama vaita.

¹⁹ Inoku e'u Dilava betata'u oi otabu boutai ena nuavi lavotai Iesu Keliso laloanai bevenimui.

²⁰ Dilava ita Kamata kevanai nuavi bemia keinikeini. Amen.

Vanama'ina Luvana To'ona.

²¹ Dilava ena kabukabu kauta boutai Keliso Iesu laloanai oi bovanama'inata. Bo'akalata kele'e'u ai demimia kauta 'eva eta vanama'ina desinita devavasi kevamui.

²² Dilava ena kabukabu kauta boutai mai vaidia lovia 'olana Kaisala ena lumai demimia kauta vaka vanama'ina desinita.

²³ Lovia namana Iesu Keliso ena iulaveni 'eva akamui ai bemimia. Amen.

Paulo Ena Malele KOLOSE Kauta Kevatai

Puka Laloana Ilehena Luvana

Kolose 'eva vanua ka Asia kanonai, Epeso kauta kele'etai. Paulo 'eva sia eda'a Kolose, beiamo kau vaidā esinita deda'a 'abu kanaua'i deilolo, inoku deasi Koloseai. Paulo vali eika 'eva kau vaidā deula eta abiveni bevaedeana, kanaua 'ounai puka kanania eleleia bevalava'inita.

Kanania e'outa koma, Keliso 'eva dava boutai 'olatai kauna, mai ia sibona mo betata'u ita boutai bevamaulita. 'A dala vaidā 'eva ita sia bevamaulita, ia Keliso kevanai beda'a tau. 'Olana Keliso nuanai 'eva Dilava eta'u dava boutai evapuluta, maivaka Keliso ena vinaula ai 'eva Dilava dava boutai eabita 'udai. Keliso 'eva ita nuatai emimia, inoku ita kamakamaka, mai ka'ula Keliso ena koakoa mai ena vinaula daitai ekadai. Paulo eta'u puka kanania eleleia, inoku kau lua evenita, Tukiko mai Onesimo, inoku ia lalua deabia deda'a Kolose kauata devenita.

Puka Iduvuna Namata

- a. Lova aku. (1.1 - 8)
- b. Keliso ena mauili mai ena vinaula. (1.9 – 2.19)
- c. Mauili makamakana Keliso enai. (2.20 – 4.6)
- d. Luva to'ota (4.7 - 18)

Vanama'ina Luvana.

¹ Lau Paulo, Dilava ena ula dainai Keliso Iesu ena veauneke kau'uai a'ao, mai bo'akalata Timoteo ita,

² Bo'akalamai Dilava ena kabukabu kaumui Koloseai oi omimia Keliso oi oabivenia kaumui lai alele venimui. Lai ameamea Dilava ita Kamata ena iulaveni mai nua'elu 'eva akamuiai bemimia.

Paulo Ena Meamea

Kolose Kauta Daitai.

³ Lai oi daimuiai lai ameamea melala boutai, eta Lovia namana Iesu Keliso Kamana Dilava lai avanama'ināla.

⁴ 'Olana valimui 'ani lai aika, Keliso Iesu oi oabivenia maivaka Dilava ena kabukabu kauta boutai oi olalo'au venita.

⁵ Abiveni mai lalo'au katania 'eva emui nuabatai e'asi, nuabata kanaua 'eva oi emui vutuvutuai emimia, inoku kanania 'eva luva umauna valina nama'ina 'ani siako oi oika laloanai oi oabi 'inia,

⁶ 'ani nama'ina kanaua 'eva 'ani easi kele'emui. Kanobata itoinai vali nama'ina kanania 'ani epulu odaoda ekukubu mai evuvua, vitaitana oi Dilava ena iulaveni koana 'uluna oi oika mai ovona oi ovo kave'i melala lava'ana'inai easi mo vali'u oi viloamuiai epulu.

⁷ Epafala kevanai vaikabasi kanaua oi oabia, ia 'eva emai lalo'au kauna lai ita da'ala lai abi, Keliso ena vinaula kave'i kauna oi daimuiai lai edulumai,

⁸ inoku ia eta'u lai e'oumai emui lalo'au 'eva Idume Kabukabuna enai.

Keliso Ena Mauili

Mai Ena Vinaula.

⁹ Kanaua 'ounai melala kanaua'i valimui lai aika koanai lai 'eva oi daimuiai lai ameamea basibasi easi mo vali'u. Dilava lai anoia Idume Kabukabuna betata'u ikabasi mai aoneka itoina bevenimui, Dilava ena idiba ai bevavonumui ena ula oi boikabasia.

¹⁰ Inoku oi 'eva Lovia namana ena ula maulinai oi bomimia, inoku ia lalona ivanamana vinaulata boutai oi bovavai, vinaula nama'ita edeata edeata boutai oi bovavai vuavuamui bevuvua inoku emui ikabasi Dilava kevanai 'eva namana be'ao.

¹¹ Ena siavu bounai ena nuavi siavunai e'asi davanai bevakula'ilamui inoku oi bolava 'ini mai lalonamamui ita oi bokula'ila melalata boutai laloatai.

¹² Maivaka Kamata vanama'ina luvata oi bovenia, ia eta'u eva'olumui dava kanaua ena kabukabu kauta ita oi boabia ena 'ailala vanuana laloanai.

¹³ Dilava eta'u vabuto'o ena siavu laloanai evamaulita, mai evuata easi nakuna elalo'au venia kauna kanaua ena lovia vanuana laloanai.

¹⁴ Inoku Iesu dainai ita evamaulita eta si'avana e'ou kao.

¹⁵ Keliso 'eva sia kaikala Dilava ikaikana, ia epulu makava vakaia depulu davata boutai 'eva ia venunai.

¹⁶ Olana Keliso dainai Dilava eta'u dava boutai vutuvutuai mai kanobatai evavaita, kaikata davata mai sia kaikata davata, lovia kauta, siavu kauta, 'ola kauta, mai talavatu kauta mai vutuvutu de'ola vaia kauta. Dilava eta'u dava kataua boutai evavaita ia dainai mai ia ena.

¹⁷ Keliso 'eva 'ani emia vakaia dava boutai depulu, inoku ia dainai dava boutai 'abutai demimia.

¹⁸ Keliso 'eva 'ola Dilava ena lo'e kauta 'eva kauani, ia 'eva mauili 'olana bai ko'isi 'udai batani kauna, kanaua 'ounai dava boutai laloatai ia 'eva vaila umaunai.

¹⁹ Kanaua 'eva Dilava sibona ena ula, ia sibona ena mauili bounai nakuna enai bemimia.

²⁰ Inoku Dilava eula nakuna dainai dava boutai vutuvutuai mai kanobatai bevaka'onamota be'asi ia kevana. Nakuna au ido'o valaukuna akanai eba 'eva nua'elu evavaia.

²¹ Ana'ina melalanai oi mai Dilava 'eva viluamui e'alama ena 'ou kaumuiai oi oao 'olana emui koa mai lalovai si'asi'a daitai.

²² Beia vali'u 'eva nakuna kuanina ena ba dainai vaka'onamo vinaulana evavaia inoku oi beabimui be'asi kabukabu kaumuiai oi bo'ao vailanai oi bomakamaka mai emui va'eva luvata sia beluvavaita.

²³ Kanaua 'ounai abiveni 'eva oi emui mauili 'olana be'ao, kanaua'i oi bolava 'ini kave'i vali nama'ina 'ani oi oika valina ena nuabatai sia oi boma'iuvai'iuvai. Vali nama'ina kanania 'eva kau boutai kevatai deilolo vaia kanobata laloanai, kanaua eta'u lau Paulo evada'a'u vinaula kau'uai a'ao.

Paulo Dilava Ena Lo'e Kauta Daitai Evinaula Vunu.

²⁴ Vali'u e'u ana-ana oi daimuiai ana-anana alalonama vaia. Lau Keliso ena ana-ana kalina evikania ia kuaninai kanaua Dilava ena lo'e kauta daitai davana kauani'uai ana-ana vaia.

²⁵ Dilava eta'u lau ena lo'e kauta eta vinaula kau'uai evao'u, koa kanania eveni'u 'olana 'eva oi badulumui, Dilava ena luva bailolo vaia beda'amo bavaolea kave'i 'abu boutai laloatai.

²⁶ Ena luva kanaua 'eva 'ana'inai easimo vali'u kau boutai kevatai evunia, beia vali'u 'eva evala'asia kave'i ena kabukabu kauta kevatai.

²⁷ Dilava eula ena lalovai vuniana pulu edea kauta kevatai evala'asia 'eva a enuavi koma kanaua ena kau bevaikabasi vaita, lalovai vuniana kanaua 'eva Keliso oi nuamuiai emimia lalovaina, inoku oi 'eva ena nuavi oi bonuabata vaia ia ita oi bokolea.

²⁸ Lai 'eva Keliso valina lai ailolo vaia kau boutai kevatai, aoneka edeata edeatai lai avaidibata mai lai avaikabasita inoku kau boutai benama'ina kave'i Keliso laloanai vakaia lai bavala'asita Dilava vailanai.

²⁹ Vinaula kanania dainai lau avinaula kula'ila mai abavunu Keliso etata'u kula'ila mai siavu lau nua'uai davana eveveni.

2

Kelabiveni Kula'ila Dede Eka'alavua.

¹ Lau a'ula oi boikabasi lau e'u bavunu 'eva aboina oi daimuia, mai abiveni kauta kataua Laodikeai demimia kauta daitai, mai lau umau'u sia deika'u kovo kauta vaka daitai.

² E'u lalovai umauna 'eva nuata bekula'ila mai lalo'auai bevaka'onamo, inoku nuata boutai be'ailala, beikabasi kave'i beda'amo Dilava ena luva vuniata beikabasita, kanaua 'eva Keliso.

³ Keliso nuanai 'eva idiba mai aoneka lavota boutai ua'i evunita.

⁴ Lau oi kanania a'oumui koma kau ka nua ani luvatai asi'i emalebamui 'ounai.

⁵ Lau 'eva sia oi kevamui, beia idume'u 'eva oi kevamui, beia emui mia 'eva dekomolo maivaka Keliso oi oabivenia mai kula'ilamui kataua a'ika 'eva alalonama.

Keliso Kaunai Bokabe'au 'Eva Mauli Umauna Boabia.

⁶ Kanaua 'ounai, oi Keliso Iesu 'ani oi oabia emui Lovia namana, vali'u 'eva ia nuanai oi bomimia.

⁷ Oi bolava 'ini ia nuanai itani au kanoai lamuna evavaia boina, ia akanai emui mauli oi bovalava 'au itani luma boina, vali nama'ina lai avaik-abasimui abiveninai oi bokula'ila inoku melala boutai ia oi bovanama'inala.

⁸ Oi bo'imamui kave'i, kau ka betata'u kau eta idiba dedetai mai dede luvatai asi'i demalebamui, vaikabasi kataua 'eva kau eta idiba koakoatai de'asi maivaka ka'uba si'avata kanobata laloanai de'ola ka'ubata kevatai de'asi, ia sia Keliso enai.

⁹ Olana Dilava ena mauli koakoana bounai 'eva Keliso kauanina laloanai emimia.

¹⁰ Oi emui vaka'onamo Keliso enai 'eva mauli nama'ina itoinai 'ani oi oabia. Keliso 'eva 'ola idumeta boutai mai siavu idumeta boutai 'olatai emimia.

¹¹ Keliso enai oi 'eva 'ani iva oi oabia, iva kanaua 'eva kau imatai sia devavaia, beia iva kanaua 'eva kauani ena koakoa si'avata vaika kevatai oi boda'a tau, kanaua 'eva Keliso ena iva.

¹² Oi emui vaidi'u kabukabuai 'eva Keliso ita dekolemui, mai emui abiveniai Keliso ita Dilava ena siavu ai oko'isi 'udai, siavu kanaua eta'u Keliso ba ai evako'isia 'udai.

¹³ Oi 'eva 'ana'inai idumeai oi oba 'olana emui si'avana daitai mai oi pulu edea kaumui kauanimui si'avana vaika sia deivaia, beia vali'u Dilava eta'u Keliso ita evamaulimui, eta si'avana boutai e'ou kau.

¹⁴ Eta koakoa si'avata vaika ilele'auta davata vuota kamavua si'avanata ia eta'u esiuta, eabi ovo au ido'o valaukuna akanai ekokota 'au.

¹⁵ Au ido'o valaukuna kanaua akanai Keliso eta'u 'ola idumeta mai siavu idumeta eta siavu boutai ebuku vaita emoita mudumudu kau vailatai evalalaita.

Ita 'Eva Keliso Ita 'Ani Kaba.

¹⁶ Kanaua 'ounai kau ka aniani 'o inuinu 'outai, lo'e naduta, 'o vuia 'eneasina lalonamana naduna, 'o Melala kabukabuna, kataua daitai asi'i sisibamui demakao.

¹⁷ Dava kataua boutai 'eva va'ava'ana boina vailai bepupulu, beia momo'aina 'eva Keliso.

¹⁸ Kau kataua sibota nuata demanau dededede mai anelu dekudivo venita kauta eta lalovai lalovai luvatai oi asi'i demava'ekomui asi, kataua 'eva sibota eta enolea luvatai de'apa, beia nuata 'eva idono davatai devonu.

¹⁹ Ia 'eva Keliso kevanai de'ekoasi, Keliso 'eva kauani 'olana, ia ena ikakao laloanai 'eva kauani itoina ekula'ila, ivataibouta mai kulia kolukoluta boutai eabi 'inita, inoku ekubu kave'i namana e'ao Dilava ena ula dalanai.

²⁰ Oi Keliso ita ka'uba si'avata vaika kanobata ena mauili de'ola vaia ka'ubata kevatai 'ani oi oba inoku, dava 'ounai oi kanobata ena talavatu oi oabita dae vitaitana itani oi kanobata ena,

²¹ oi odiaka, "Sia oi boabia kovo," "Sia oi bokovoa kovo," "Sia oi bovalelea kovo"?

²² Kataua boutai 'eva anita asi'i maivaka bepupua 'olana ia 'eva kau devavai mai devaikabasivai talavatuta.

²³ Talavatu katania boita ikaikata 'eva aoneka luvata boita, inoku kau detata'u anelu dekudivo venita kula'ila nuata demanau dededede sibota kauanita deva-ana-anata, beia vinaula kataua 'eva eta vidulu asi'i 'olana lalovai si'avana vaika kau nuanai bela'asi lalovaina be'ouakao 'eva sia bedaia.

3

Keliso Ita 'Ani Kako'isi 'Udai.

¹ Kanaua 'ounai, oi 'eva Keliso ita 'ani oi oko'isi 'udai 'ounai nuamui'ai 'eva vutuvutu laloana davata mo oi bokavuta, 'abu kanaua'i 'eva Keliso Dilava idibana duasi emimia 'abuna.

² Nuamui'ai 'eva aka davata kataua oi bolalovaita, ia kanobata kanania davata sia oi bolalovai.

³ 'Olana oi 'eva 'ani oi oba, inoku emui mauili 'eva Keliso ita 'ani Dilava nuanai ivunina.

⁴ Keliso 'eva oi emui mauili 'olana umauna, inoku bela'asi koanai oi vaka ia ita oi bola'asi ka'ona ena nuavi kanaua laloanai.

Ita 'Eva 'Ani Kau Makamakata.

⁵ Kanaua 'ounai kanobata maulina ena ula vinaulata nuamui'ai demimia davata oi bovabata, koakoata katania mo'a, lalovai 'obuta, kulakula, lalovai si'avata vaika, idono. Idono 'eva dilava dedeta ikukudivo venita koana.

⁶ 'Olana koakoa kataua 'outai Dilava ena badu e'asi kau kataua lлена sia deabidae kauta kevatai.

⁷ Ana'inai oi vaka kanaua oi omia koma kauani ena lalovai dalatai.

⁸ Beia vali'u 'eva oi dava katania boutai oi bovikanita, badu, vaivivi, lalovai si'avata, 'ovede luvata, mai luva si'avata, kataua sia ka nutumuiai oi boluvata kovo.

⁹ Banomui kevatai sia oi bodedede, 'olana emui mauili 'ana'ita eta koakoa 'eva 'ani oi ovadada ovo.

¹⁰ Inoku vali'u oi 'eva kauani makamakana 'ani oi ovadodoa. Kauani makamakana kanania 'eva evavaita Dilavana ena aoneka ai melala boutai bevamakamakamui beda'amo ia sibona ikaikanai oi bo'ao.

¹¹ Mauili makamakana kanania laloanai 'eva sia Iuda kauna 'o Iuda kauna, deivaia kauna 'o sia deivaia kauna, nuana sia e'ailala kauna 'o lalovai si'asi'a kauna, da'alabi kauna 'o sia da'ala abi kauna, kataua boutai eta edeana asi'i, boutai 'eva Keliso ena, Keliso 'eva boutai nuatai emimia.

Banota Ekaduluta.

12 Oi 'eva Dilava edilamui, evakabukabumui, mai elalo'auvenimui kau-mui, kanaua 'ounai oi sibomui vilalo, koakoa nama'ita, manau, madana mai vakula'ila oi bovadodota emui mauiliai.

13 Banomui ita emui nunuvai nunuvai mai emui luva vai'ade asido'o epupulu laloanai eta si'avana oi bo'ou kao vitaitana Lovia namana emui si'avana e'ou kao boina, oi vaka kanaua oi bovavai koma.

14 Inoku dava kataniai boutai akatai 'eva lalo'au oi bone'ea 'au, 'olana lalo'au etata'u dava boutai evaka'onamota dokadoka.

15 Keliso ena nua'elu 'eva nuamui be'ola vaia, kanaua 'ounai Dilava eta'u e'aemui ka'ona kauani ka'onamo laloanai. Melala boutai vanama'ina luvana Dilava oi bovenia.

16 Keliso ena luva 'eva nuamuiiai bemimia belovia, inoku ka ka sibomui aoneka itoinai ai oi bovaikabasi mai oi bovaaidiba, Salamo ai, masi ai, idume masitai Dilava oi bovanama'inala mai nuamui boutai vanama'ina lalovai lalovaitai.

17 Emui vinalai 'o emui luvai, davata boutai 'eva Lovia namana Iesu vanai oi bovavai, maivaka Kamata Dilava vanama'ina luvana oi bovenia Iesu dainai.

Vaidiba Luvata

Mauli Makamakanai.

18 'A'ate e, adamui eta ula oi boda'avaita, 'olana kanaua 'eva ekomolo Lovia namana vailanai.

19 Kau e, adamui oi bolalo'au venita, nuata sia oi bova ana-anata.

20 Melo mai vavato e, dava boutai laloatai kamamui sinamui leleta daitai oi bodadai, inoku kanaua 'eva Lovia namana nuana ivanama'ina.

21 Kama mai sina e, nakumui sia oi bo'ovenita si'asi'a, nuata asi'i demabadebade makauna.

Da'alabi Kauna

Mai 'Ola Kauna.

22 Da'alabi kaumui e, kanobatai de'ola vaimui kauta melala boutai leleta daitai oi bodadai, sia ia beikamui inoku bevanama'inaemui 'ounai, beia mai nuamui boutai oi bovinaula vitaitana Lovia namana 'olana oi o'aku oi ovinaula boina.

23 Vinaula dava oi ovavaia vinaulana oi bovavaia mai nuamui boutai, vitaitana itani Lovia namana ena vinaula oi ovavaia boina ia sia kau eta vinaula.

24 'Ani oi oikabasi Lovia namana avumui 'ani beva'olua oi boabia oi tavamuiiai be'ao, 'olana oi 'eva emui 'ola kauna umauna Keliso ena vinaula kaumui.

25 Ia si'avana kauta eta si'avana kanaua tavana vitaitana beabia, 'olana Dilava 'eva kau ka enai sia e'au.

4

1 'Ola kaumui e, emui da'alabi kauta komolo mai nama'ina dalanai oi bo'imata, 'olana oi oikabasi oi vaka emui 'ola kauna ka ua'i vutuvutuai emimia.

Nuata Komolotai

Ekameamea Basibasi.

2 Oi bomeamea basibasi, oi omeamea laloanai nuamui nama'itai Dilava vanama'ina luvana oi bovenia.

3 Lai vaka akamaiaai oi bomeamea inoku Dilava betata'u emai dala beluvua ena luva lai bailolo vaia Keliso ena luva vuniata lai bailolo vai, vinaula kanania dainai lau vabuto'o lumanai amimia.

⁴ Oi bomeamea vakaia lau luva kanania iloloai bavala'asi kave'i, vinaula kanania 'eva lau eveni'u bavavaia.

⁵ Oi boaooneka emui koakoa sia deabiveni kauta kevatai benama'ina, emui vinaula bonina sia oi bovaolea 'avaea.

⁶ Melala boutai kau nuana ivanama'inana luvaluvatai oi boluvaluva kave'i itani damena iani mamina evanama'inala boina, inoku ia eta lalovai luvata oi bovamueta kave'i.

Paulo Tukiko Mai Onesimo

Esinita.

⁷ Tukiko betata'u lau vali'u itoinai bekavala, ia 'eva ita bo'akalata eta lalo'au kauna ka, ia vaka abiveni dokadoka vinaulana kauna, ia 'eva lau bano'u ka Lovia namana da'alana lai abi ka'ona.

⁸ Asinia evavasi kele'emui 'olana 'eva lai emai mia nia'i maulina valina bekakava, inoku oi nuamui bevakula'ila.

⁹ Onesimo asinia Tukiko ita devavasi, ia vaka ita bo'akalata eta lalo'au mai abiveni dokadoka kauna ka, ia 'eva oi ita oi omia ka'ona. Ia betata'u dava nia'i depupulu davata boutai luvata kevamuiai beluluva.

Vanama'ina Luvana To'ona.

¹⁰ Alisitako lau bano'u ka vabuto'o lumana laloanai ena vanama'ina esinia evavasi, mai Banaba uana Maleko vaka ena vanama'ina esinia oi kele'emui. (Luva 'ani oi oabia Maleko bevavasi koanai oi boabia dae.)

¹¹ Iusto vana ka Iesu vaka ena vanama'ina evenimui. Iuda kauta katania koi mo ita lai avinaula ka'ona Dilava ena lovia vanuana valina ikavanai, ia eta vakula'ila keva'uai 'eva namavaikana.

¹² Epafala oi kadi'a'amui ka Keliso Iesu ena da'alabi kauna ena vanama'ina evenimui, ia 'eva melala boutai emeamea basibasi oi daimuiiai oi bolava 'ini nuamui bekula'ila mai nuamui boutai Dilava ena ula vinaulana ivavaina laloanai.

¹³ Lau oi vailamuiai aluvasi Epafala 'eva oi daimuiiai, Laodikea mai Eielopoli kauta kataua daitai evinuala kula'ila.

¹⁴ Eta lalo'au kauna Luka mulamula veni kauna mai Dema vaka eta vanama'ina devenimui.

¹⁵ E'u vanama'ina bo'akalata Laodikeai demimia kauta oi bovenita, maivaka ateate vana Numufa ena lumai Dilava ena lo'e kauta dedodo'u kauta oi bovenita.

¹⁶ Malele kanania oi bovakua bepupua mulinai 'eva oi bosinia beda'a Dilava ena lo'e kauta Laodikeai demimia kataua bevakua, inoku malele kanaua Laodikeai easi malelena oi bovakua.

¹⁷ Akipo oi bo'oua bodiaka, "Oni emu vinaula Lovia namana evenimu vinaulana bovavaia kave'i beda'amo bovaolea."

¹⁸ Vanama'ina kanania 'eva lau Paulo sibo'u ima'uai alelea. Sia oi bobolabola lau 'eva mai seini'u amimia. Ameamea Dilava ena iulaveni koana kevamuiai bemimia.

Paulo Ena Malele Lava'ana'ina TESALONIKA (1) Kauta Kevatai

Puka Laloana Ielena Luvana

Tesalonika 'eva vanua namana ka Makedonia kanona laloanai. Paulo Pilipo vanuana evikania 'eva eda'a Tesalonika, inoku ua'i abiveni kauta 'itona ka evalavala (Veauneke 17). Melala vaidā mulitai Paulo eda'a Kolinto vanuanai, inoku Timoteo easi Paulo kevanai inoku dava abiveni kauta ua'i Tesalonika kauta kevatai epulu davana lovana eaku. Paulo 'eva Timoteo kevanai vali eika laloanai, laluaana Sila ita puka kanania deleleia, Tesalonika kauta eta abiveni bevakula'ilala.

Puka kanania laloanai 'eva Paulo lalona denama si'asi'a 'ounai mai eta koakoa nama'ita daitai. Itani ia 'eva Keliso abemue koma 'eva sia deikabasia, mai deula beikabasi kave'i ba kauta 'eva 'ani deba vaika 'o asi'i, mai Keliso 'eva 'ani emue 'o asi'i, mai ia sibota delalovaia ia 'eva 'ani mauī keinikeini kanaua bedavalia 'o asi'i, mai Keliso 'eva aida be'asi? Lavuai katania luvata ivamueta 'eva Paulo e'outa melala boutai koakoa nama'ita bevavai, mai beva 'olu Lovia namana ena mueai be'asi melalana be'imala.

Puka Iduvuna Namata

- a. Lova aku. (1.1)
- b. Abi isi mai vanama'ina. (1.2 – 3.13)
- c. Abiveni mauīna umauna. (4.1 - 12)
- d. Keliso ena mue'udai ivaikabasita. (4.13 – 5.11)
- e. Luva to'ota. (5.12 - 22)
- f. Vanama'ina to'ota. (5.23 - 28)

Vanama'ina Luvana.

¹ Lau Paulo, Sila mai Timoteo emai malele lai alelea evavasi lo'e kabukabuna kaumui Tesalonikai oi omimia kaumui kele'emui, oi 'eva Dilava ita Kamata mai eta Lovia namana Iesu Keliso eta. Lai ameamea Dilava ena iulaveni mai nua'elu akamuiai bemimia.

Tesalonika Kauta Eta Mauī

Mai Eta Abiveni.

² Lai melala boutai oi daimuiai Dilava vanama'ina luvana lai avenia mai vamui lai a'oulai emai meamea laloatai.

³ Lai Kamata Dilava vilanai emui abiveni vinaulana oi ovavaia abivenina mai emui lalo'au koana oi obavunuvaia lalo'auna mai emui nuabata Lovia namana Iesu Keliso enai oi ovalava 'inia nuabatana lai alalovai 'inita.

⁴ Bo'akalamai e, lai 'ani lai aikabasi Dilava oi elalo'au venimui maivaka edilamui.

⁵ 'Olana eta vali nama'ina ela'asi kevamuiai 'eva sia luva 'avaeanai mo beia mai siavuna mai Idume Kabukabuna oi nuamuiai evamomo'aia. Lai oi ita a kamia koma 'eva oi 'ani oi oikabasi, ua 'eva oi emui nama'ina.

⁶ Luvana asi'i oi oanana vaika, beia lai boimaiai mai Lovia namana boinaī oi oao luva oi oabiadae mai lalonamamui kanaua 'eva Idume Kabukabuna enai easi.

⁷ Kanaua 'ounai oi 'eva abiveni kauta boutai Makedonia ai mai Akaia ai kauta eta vaikaika davanai oi oao.

⁸ Lovia namana valina nama'ina oi kevamuiai 'uluna ela'asi 'eva Makedonia mai Akaia ai mo sia eole ia eda'a 'abu bounai, emui abiveni Dilava

kevanai abivenina vaka 'abu itoina eda'aia. Kanaua 'ounai lai luva ka lai baluvala 'eva 'abuna asi'i.

⁹ 'Olana lai oi a oabimaidaē koma 'eva ia ita valina deluvavaia kauta mai a oi olalo 'udai koma dilava dedeta oi ovikanita ia Dilava umauna maui Dilavana da'alana oi oabi,

¹⁰ mai Dilava Nakuna Iesu ba ai eko'isi kauna vutuvutuai be'asi oi o'imala kauna valina vaka deluvavaia. Iesu 'eva Dilava ena badu be'asi laloanai 'olata bevamaui.

2

Paulo Ena Vinaula Tesalonikai.

¹ Bo'akalamai e, oi sibomui 'ani oi oikabasi lai avasi kevamui 'eva mai anina.

² 'Ani oi oikabasi lai Pilipo ai vuvua lai akoaia mai beakumai deko mulinai lai avasi oi kele'emui. Luvana asi'i devadeduamai vaika, beia eta Dilava evakula'ilamai valina nama'ina lai ailolo vaia kevamui.

³ Emai vakula'ila luvata 'eva sia lalovai si'avatai 'o sia lalovai 'obutai 'o sia dedeai.

⁴ Beia lai 'eva Dilava eabimai isi valina nama'ina evenimai valina lai akavaia, lai sia kau lai bavalalonamata dainai beia ita nuata eikabasia Dilavana nuana benama'ina dainai.

⁵ Oi oikabasi lai nua ani luvata sia lai avenimui 'o emai idono i'alavuta luvata sia lai avenimui. Dilava 'eva lai evamomo'aimai.

⁶ Lai sia kau ka enai ivanama'inamai lai akavua mai oi kevamui 'o vaida kevatai.

⁷ Lai Keliso ena veauneke kaumai 'ounai dava doutamo kevamui lai bamaula veni, beia lai oi viloamui 'eva lai amanau itani ateate nakuna e'imata boina.

⁸ Lai aula venimui 'ounai sia Dilava ena vali nama'ina mo sibona lai avenimui ia emai maui vaka lai avenimui, 'olana oi lai alalo'au venimui vaika.

⁹ Bo'akalamai e, 'ani oi olalovaia Dilava valina nama'ina lai ailolo vaia kevamui 'eva lai abavunu vaika, boni mai lani lai avinaula iani ikavutai 'olana sia kau ka mekau lai bavenia.

¹⁰ Oi makamui oi oikaia, maivaka Dilava eikabasi lai oi abiveni kaumui viloamui 'eva emai koa ekabukabu, ekomolo mai sia maiva'evana.

¹¹ Oi oikabasi lai ka ka a'imamui itani kama ka nakuna umauta e'imata boina.

¹² Lai avakula'ilamui, lai a'imamui kave'i maivaka lai avasiasimui Dilava ena ula maulina laloanai oi bomimia, Dilava 'eva e'aemui ena lovia vanuana mai nuavi laloanai oi bomimia.

¹³ Lai melala bounai Dilava vanama'ina luvana lai avenia, 'olana Dilava luvana kevamaiai oi oika luvana oi oabia laloanai sia kau eta luvai oi ovaoo, ia oi oabia kave'i Dilava ena luva umaunai oi ovaoo, Dilava ena luva kanaua 'eva oi oabiveni kaumui nuamui evinuala.

¹⁴ Bo'akalamai e, oi 'eva Dilava ena kau Iudeai vitaitatai oi oao, ia 'eva Keliso Iesu deabivenia, Dilava ena kau Iudeai kataua eta kau kevatai vuvua dekoaia vitaitana mo oi vaka emui kau kevatai vuvua oi okoiaia.

¹⁵ Iuda kauta 'eva Lovia namana Iesu mai enolea kauta deaku bata, lai vaka delo'omai asi. Ia Dilava devabadua mai kau boutai eta 'ou kautai deao.

¹⁶ Ia deta'u pulu edea kauta lai bailolo venita ia maui beabia dalana kanaua de'alavua. Kanania devavaia 'eva eta si'avana devanamata, Dilava ena badu 'eva 'ani ia akatai.

Paulo Eula Beikata 'Udai.

¹⁷ Bo'akalamai e, melala kava'ina mo lai avikanimui laloanai kauaniai 'eva viloata edau'a beia idume ai 'eva asi'i, lai alalovaimui vaika dala lai akavu lai bamaikamui.

¹⁸ Lai dala lai akavu lai bamavasi kele'emui, luva umauna lau Paulo melala vaida akovokovo dala akavu, beia Satani 'eva emai dala e'alavuta.

¹⁹ Eta Lovia namana Iesu Keliso ena mue'edai melalanai, emai nuabata, emai lalonama mai emai apa koana 'eva ia vailanai dava? Ua 'eva oi.

²⁰ Momo'ai dokadoka, emai apa mai emai lalonama 'olana 'eva oi.

3

¹ Ua'i lai bavi'ima dau'a lai aonovaia sia edaia 'ounai lai aula sibomai Atene ai lai bamimia.

² Bo'akalata Timoteo lai asinia, ia 'eva Dilava ena vinaula kauna Keliso valina nama'ina eilolo vaia kauna evasi kele'emui emui abiveni bevakula'ilala mai bevakula'ilamui.

³ Inoku ana-ana katania 'outai oi kaumui ka sia bomumue, oi 'ani oi oikabasi ana-ana 'eva vuvuata ita ekakoa.

⁴ Na'i kamia laloanai 'ani lai a'oumui makava ita 'eva vuvua ekakoata, inoku 'ani oi oikabasi dokadoka vitaitanai 'ani epupulu kanania.

⁵ Kanaua 'ounai lau ua'i bavi'ima dau'a aonovaia sia edaia 'ounai luva asini emui abiveni baikabasia, lau amakau 'eva dala vaidai bema vikovo Diabolona bekovomui koanai emai bavunu anina asi'i ema asi'i.

⁶ Timoteo kevamui 'eva vali'u 'ani emue easi kevamai, emui abiveni mai emui lalo'au valita nama'ita evuata easi. Vailamaiai eluva vai, oi melala boutai oi olalovaimai vaika mai oi o'ula oi bomaikamai vitaitana lai vaka a'ula lai bamaikamui.

⁷ Kanaua 'ounai bo'akalamai e, emai bavunu emai anana laloatai oi emui abiveni eta'u lai evakula'ilanamai.

⁸ Vali'u lai emai mia 'eva 'ani enama'ina, 'olana oi Lovia namana enai 'ani oi olava 'ini.

⁹ Eta Dilava vanai oi lai alalonama venimui vaika inoku vanama'ina luvana Dilava vailanai a lai baluvula koma?

¹⁰ Boniai mai laniai lai ameamea kula'ila lai a'ula oi lai bamaikamui 'udai, emui abiveni ena badebade 'abutai bamavakula'ilamui.

¹¹ Lai a'ula vali'u Dilava ita Kamata mai eta Lovia namana Iesu betata'u dala ka beva'olua lai emai ai inoku lai bavavasi kele'emui.

¹² Eta Lovia namana betata'u emui lalo'au bevakubua bevavonumui 'au ka ka sibomui oi bovilalo'au viveni maivaka kau boutai oi bolalo'au venita, lai oi alalo'au venimui vitaitana.

¹³ Dala kanania vitaitanai Lovia namana betata'u nuamui bevakula'ilata, eta Lovia namana Iesu ena kabukabu kauta ita be'asi koanai oi 'eva kabukabu kaumui mai sia mai emui va'eva kaumui oi bo'ao Kamata Dilava vailanai.

4

Dilava Nuana

Ivanama'inana Maulina.

¹ Bo'akalamai e, luva to'ona kanania, lai avaikabasimui a oi bomia koma Dilava belalonama miana 'ani oi ovavaia emui mauliai. Vali'u Lovia namana Iesu vanai lai anoimui mai lai avasiasimui mauili kanania'i oi bomia 'udai'udai.

² Oi 'ani oi oikabasi vaikabasi luvana davana 'eva lai avenimui Lovia namana Iesu ena siavuui.

³ Dilava ena ula 'eva kanania, oi boumuiai 'eva oi bokabukabu. Kulakula koakoata oi bovikanita.

⁴ Inoku boumuiai ka ka adamui ita kauanimumi bekabukabu mai 'ola-kumui oi bomimia.

⁵ Sia oi bokulakula pulu edea kauta boita, ia kauta 'eva Dilava sia deikabasia.

⁶ Koakoa kanania laloanai kau ka bo'akalana ena dava bevavaia si'asi'a 'eva Dilava betata'u ena si'avana tavana beveveni, lai 'ani a'oumui maivaka lai avaikabasimui.

⁷ Dilava e'aeta 'eva sia mo'a 'ounai, ia mauli kabukabunai ekamia 'ounai.

⁸ Kanaua 'ounai vaikabasi luvana kanania evasi'avanala kauna 'eva kau sia evasi'avanala, ia 'eva Dilava evasi'avanala, Idume Kabukabuna evenimumi Dilavana.

⁹ Bo'akalata a eka lalo'au venita koma luvana 'eva sia balele venimumi, 'olana Dilava oi 'ani evaikabasimui ka ka oi bovilalo'au viveni.

¹⁰ Oi kanania 'ani oi ovavaia bo'akalata Makedoniai boutai oi olalo'au venita. Bo'akalamai e, lai avasiasimui kanana oi bovavaia 'udai 'udai.

¹¹ Lai a'oumui vitaitanai emui mia maulita oi bovavai kave'i oi bomia laloka, sibomui lovamui oi bo'aku mai emui iani vinalata sibomui imamui umautai oi bovavai.

¹² Mauli nama'ina kanaua betata'u mulimuli kauta bevaikata 'olamui be'aku maivaka sia kau ka enai dava ka noinoina oi bonoinoi.

Lovia Namana Ena Mue 'Udai.

¹³ Bo'akalamai e, lai a'ula deba kauta kataua valita 'eva oi boikabasi, eta nuabata asi'i kauta kataua banotai sia oi bo'ao nuamui sia bevilalo.

¹⁴ Ita kavamomo'ai Iesu eba mai eko'isi 'udai, mai kavamomo'ai Dilava Iesu bevuala be'asi melalanai Iesu deabivenia kauta deba kataua ita Dilava ena mauli 'abunai bevada'ata dodo.

¹⁵ Lovia namana ena vaikabasi luvana kanania lai oi a'oumui, ita mauli kauta dai bemimia beda'amo Lovia namana ena mue'udai melalanai 'ani deba kauta akatai sia bekeini.

¹⁶ Dilava ena bisi be'alala mai anelu namana vaikabasi luvana bevaioi vaia laloanai Lovia namana sibona vutuvutuai be'ovu be'asi 'eva Keliso deabivenia deba kauta beko'isi makava.

¹⁷ Kanaua mulinai ita kanobatai kamimia do'o kauta beabita isi eka da'a oli akanai ia ita bevado'uta inoku ita boutai Lovia namana ita ekavidavali, inoku ua'i Lovia namana ita ekamia keinikeini.

¹⁸ Kanaua 'ounai luva katania'i sibota ka ka ekavakula'ila viveni.

5

Lovia Namana Ena Mue'udai

Dainai Ekava'olu.

¹ Bo'akalamai e, dava katania bepupulu melalata mai bonita 'eva oi sia lai balele venimumi.

² 'Olana oi vaka 'ani oi oikabasi kave'i Lovia namana ena mue'udai melalana 'eva vinao kauna boniai e'asi boina.

³ Inoku kau bediaka, "Dava boutai denama'ina 'ani kamia kave'i" koanai, si'avana namavaikana bevatabulovo be'asi akatai, itani ateate emauli ananana boina, eta veau ovo dalana asi'i.

⁴ Bo'akalamai e, oi 'eva vabuto'oai sia oi omimia 'ounai melala kanania oi sia bevatabulovomui vinao kauna boina.

⁵ Oi boumuiai 'eva 'ailala nakuna mai melala nakuna kaumui. Ita boutai 'eva sia boni 'o vabuto'o kauta.

⁶ Kanaua 'ounai ita 'eva sia demuinai kauta boitai ekao ekamuinai, beia ita 'eva ekaibi nuata bekula'ila eka vi'ima.

⁷ Olana muinai kauta 'eva boni demuinai, maivaka inuinu kauta 'eva boni deinuinu.

⁸ Beia ita 'eva melala ena kauta 'ounai nuata bekula'ila, abiveni mai lalo'au laloatai ekamia pedeta i'alavuta davatai be'ao maivaka vamauli nuabatana 'eva ekavuala 'olata i'openai be'ao.

⁹ Dilava ita edilata 'eva sia ena badu vuvuana ekakoala 'ounai, beia ita vamauli ekabia eta Lovia namana Iesu Keliso dainai.

¹⁰ Ita daitai Iesu eba 'eva ena mue'udai melalanai kamauli 'o kaba beia ita ia ita ekamia ka'ona.

¹¹ Kanaua 'ounai 'ani oi ovavaia vitaitanai ka ka oi bovakula'ilamui mai oi bovalava 'inimui.

Luva To'ota Mai

Vanama'ina Luvana To'ona.

¹² Bo'akalamai e, vali'u lai anoimui na'i viloamuiai vidulu vinaulana devavaia kauta kataua Lovia namana edilata be'ana'ia vaimui mai bevaidibamui kauta 'eva 'olata oi bo'aku.

¹³ Eta vinaula dainai ia 'olata oi bo'aku mai oi bolalo'au venita, mai nua'elumui ka ka ita oi bomia ka'ona.

¹⁴ Bo'akalamai e, lai avasiasimui, balea kauta oi bovoidibata, makau kauta oi bovakula'ilata, badebade kauta oi boduluta, boutai kevatai oi bovakula'ila.

¹⁵ Bolalovai 'inia ka ena si'avana tavana sia oi bovamuea, ia melala boutai oi bovavai kave'i banomui kevatai mai kau boutai kevatai.

¹⁶ Melala boutai oi bolalonama,

¹⁷ oi bomeamea basibasi,

¹⁸ dava boutai laloatai Dilava vanama'ina luvana oi bovenia, 'olana katania 'eva Dilava ena ula oi Keliso Iesu enai kaumui emui mauiliai oi ovavaita.

¹⁹ Idume Kabukabuna ena vinaula sia oi bo'oua kao itani 'alova sia oi ovabo'oa boina.

²⁰ Idume Kabukabuna kevanai de'asi luvata sia oi bo'ouavuavu.

²¹ Dava boutai oi bokovota, vakaia nama'ita davata 'eva oi boabi 'inita.

²² Ia dava si'avata vaika boutai kevatai 'eva oi boda'a tau.

²³ Nua'elu evenita Dilavana lai anoia, ia betata'u dala boutai laloatai bevakabukabumui dokadoka, inoku idumemui, nuamui mai kauanimui itoinai beabi 'inita, eta Lovia namana Iesu Keliso ena mue'udai melalanai va'eva boutai etai beabimui tau.

²⁴ E'aemui kauna ena luva 'evamomo'ai dokadoka, ia betata'u kanania bevavaia.

²⁵ Bo'akalamai e, lai daimaiaia oi bomeamea.

²⁶ Bo'akalata boutai vibra'u kabukabunai vanama'ina oi bovenita.

²⁷ Lovia namana vanai lau oi a'oumui, malele kanania 'eva bo'akalata boutai vailatai oi bovakua.

²⁸ Eta Lovia namana Iesu Keliso ena iulaveni koana akamuiai bemimia.

Paulo Ena Malele Ivaluana TESALONIKA (2) Kauta Kevatai

Puka Laloana Ilena Luvana

Tesalonika ai kau doutamo melala kanaua'i 'eva delalovai lalovai keini Keliso ena mue 'udaiai 'eva dava bepupulu. Kau vaida 'eva dediaka Lovia namana ena melala 'eva 'ani easi. Kanaua 'ounai Paulo malele kanania eleleia kau eta abiveni bevakomolota. Ia e'outa Lovia namana ena melala 'eva asido'o eabia. Inoku melala kanaua asido'o e'asi 'eva kau dotamo lele sia be'ika, mai vinaula si'avata edeata edeata boutai namata be'ao, maivaka talavatu iukuna 'eva be'asi Keliso ida'a mulilina namanai be'ao.

Paulo ia evakula'ilata abiveniai belava'ini kave'i, mai mekau vailata de'alavuta davatai bekeini kave'i. Ena ula 'eva bekula'ila vaika kanaua ita be'imata kave'i, vitaitana ia sibona e'imala kave'i mai ia ita devinaula ka'ona kauta boita. Vinaula kanaua kevanai sia bebadebade 'o sia bebalea, maivaka kau idulutai sia bebalea.

Puka Iduvuna Namata

- a. Lova aku. (1.1 - 2)
- b. Vanama'ina mai talavatu luvata. (1.3 - 12)
- c. Keliso ena mue'udai vaikabasita. (2.1 - 17)
- d. Abiveni maolina umauna. (3.1 - 15)
- e. Luva to'ota. (3.16 - 18)

Vanama'ina Luvana.

¹ Lau Paulo, Sila mai Timoteo emai malele lai alelea evavasi lo'e kabuk-abuna kaumui Tesalonikai oi omimia kaumui kele'emui, oi 'eva Kamata Dilava mai Lovia namana Iesu Keliso eta.

² Lai ameamea Dilava ita Kamata mai Lovia namana Iesu Keliso eta iulaveni koana mai nua'elu 'eva akamuiai bemimia.

Keliso Be'asi

Komolo Vinaulana Bevavaia.

³ Bo'akalamai e, lai oi daimuiai melala boutai Dilava vanama'ina luvana lai avenia, kanaua 'eva ekomolo 'olana oi emui abiveni 'eva ekukubu edada'a, mai emui lalo'au ka ka kevamui mai banomui kevatai 'eva ele'au edada'a.

⁴ Ana-ana boutai mai vikovo boutai laloatai oi ovapasisi maivaka emui abiveni sia oi ovikania, Dilava ena lo'e ka ka kauta vailatai lai apavaita.

⁵ Dava katania boutai dela'asi 'eva Dilava ena lavuai 'eva ekomolo. Oi Dilava ena lovia vanuana dainai vali'u oi oanaa, beia beda'a to'onai 'eva komolo oi boabia Dilava ena lovia vanuana kaumui oi bo'ao.

⁶ Dilava 'eva mai ena komolo. Ia betata'u oi deva-ananamui kauta kataua tavata bevamueta beva-ananata.

⁷ Ana-ana oi oabia kaumui oi lai ita tavata bevenita ekalaani. Lovia namana Iesu vutuvutuai bevaila ena anelu kula'ilata ita be'asi koana kanania 'eva bepupulu.

⁸ Ia be'asi mai 'alova 'alovana, Dilava sia deikabasia kauta kataua mai eta Lovia namana Iesu valina nama'ina lena daitai sia dedadai kauta 'eva anana bevakoata.

⁹ Ia beanana keinikeini mai mekau bekoala maivaka Lovia namana vailanai mai ena siavu nuavina kevanai beda'a tau vaika.

¹⁰ Lovia namana be'asi melalana kanaua'i ena kau kabukabuta bekukudivo venia mai deabivenia kauta kataua boutai bevanama'inala. Kanaua laloanai oi vaka ia vilootai ua'i 'olana vali lai akavala oi kevamui'ai 'eva oi oabivenia.

¹¹ Kanania lai alalovaia 'ounai, lai oi akamui'ai lai ameamea basibasi, inoku eta Dilava betata'u mia keinikeini kaumui'ai bevaomui ena 'ae'ae vitaitanai, mai ia betata'u ena siavu'ai emui koakoa anita nama'ita bevapuluta mai emui abiveni vinalata boutai bevamomo'aita.

¹² Dala kanania'i eta Lovia namana Iesu vana oi daimui'ai bevanama'inala, inoku ia dainai oi bevanama'inamui, eta Dilava mai Lovia namana Iesu Keliso eta iulaveni koana 'ounai.

2

Bo'o Kauna Diabolo Bela'asi.

¹ Bo'akalamai e, eta Lovia namana Iesu Keliso ena mue'udai maivaka ita ivaka'onamota ia kevanai kauna valina lai akakava, inoku lai anoimui,

² nuamui sia be'ululu, enolea luvata 'o luva voida 'o malele kevamaiai bevavasi bediaka, Lovia namana ena melala 'ani ele'au 'eva oi sia bevamakaumui 'o nuamui sia bebabata.

³ Kau ka dala kanania'i sia belebamui. 'Olana melala kanaua 'eva asido'o be'asi beda'amo kau Dilava beda'ala mulili bevaivivia makava vakaia bo'o kauna diabolo bela'asi, ia bedada'a 'abuna 'eva ana-ana keinikeini 'abuna.

⁴ Ia 'eva kau dekukudivo venita davata boutai mai de'aeta dilava dekoma kauta bevaivivita, ia sibona dava katania boutai akatai beva'oa Dilava ena lo'e kabukabuna laloanai bemiadivo inoku bediaka ia sibona 'eva Dilava.

⁵ Lau oi kevamui'ai koanai dava katania boutai a'oumui, inoku sia oi olalovai 'inita, una?

⁶ Maivaka vali'u 'ani oi oikabasi siavu davana etata'u ia eabi 'inia beda'amo ia ena melala umaunai vakaia kau kanaua bela'asi.

⁷ 'Olana bo'o kauna diabolo ena siavu vunivuniai 'ani evinuala, beia ia vali'u eabi 'inia davana kanaua beabi 'inia beda'amo ia beda'a tau.

⁸ Inoku bo'o kauna diabolo bela'asi, beia Lovia namana Iesu be'asi koanai nutuna lavivinai diabolo beaku bala mai ena nuaviai bevaolea.

⁹ Bo'o kauna 'eva Satani ena siavu'ai be'asi siavu dedeta edeatai, koakoa dedeta mai vatabulovo koata namata dedeta bevavai,

¹⁰ mai vinala si'avata vaika edeata edeata ai elebata kauta kataua 'eva bebababa. Ia bebababa 'olana luva umauna maui beveveni luvana kanaua ilalo'au venina deda'a mulili vaia.

¹¹ 'Olana kanania 'ounai Dilava eta'u akulea lalovaina siavuna nuatai ene'eia divo bevinuala, ia dede kanaua beabia dae.

¹² Inoku luva umauna sia deabivenia kauta mai si'avana delalona venia kauta boutai 'eva mekau bekoala.

Dilava Edilamui Mauli Oi Boabia.

¹³ Bo'akalamai e, oi Lovia namana elalo'au venimui kaumui, lai oi daimui'ai melala boutai Dilava vanama'ina luvana lai bavenia, 'olana makavanai Dilava edilamui, inoku Idume Kabukabuna ena siavu'ai, mai luva umauna iabiveninai oi Dilava ena kau kabukabumui ai oi bo'ao 'eva maui oi boabia.

¹⁴ Dilava eta'u vali nama'ina kevamui'ai lai ailolo vaia valina kanaua'i e'aemui oi oasi maui kabukabuna kanania'i, inoku avumui eta Lovia namana Iesu Keliso ena nuavi laloanai oi boabia.

¹⁵ Kanaua 'ounai bo'akalamai e, oi bolava 'ini, mai emai vaikabasi luvata lai ailolovai nutumaiai lai a'oulai 'o malele ai lai avenimui luvata oi boabi 'inita.

¹⁶ Eta Lovia namana Iesu Keliso mai ita Kamata Dilava elalo'au venita ena iulaveni laloanai vakula'ila keinikeini mai nuabata nama'ina evenita kauta lai anoita,

¹⁷ Ia betata'u nuamui bevapasisi mai bevakula'ilata melala boutai vinaula nama'ita oi bovavai mai luva nama'ita oi boluluva.

3

Lai Daimaiiai Oi Bomeamea.

¹ Bo'akalamai e, luva to'onai 'eva lai daimaiiai oi bomeamea, Lovia namana valina bela'asi odaoda kaokao inoku beabiadae mai'ola akuta vitaitana oi kevamuiiai epulu boina.

² Maivaka oi bomeamea 'eva Dilava betata'u bo'o kauta mai si'avana kauta kevatai bevala'asimai, 'olana kau doutamo Keliso sia deabivenia.

³ Beia Lovia namana 'eva momo'ai kauna, ia betata'u bevakula'ilamui mai si'avana kauta kevatai be'alavumui.

⁴ Lai Lovia namana enai lai avamomo'aimui lai avasiasimui vinaula katania oi ovavai vinaulata oi bovavai basibasi.

⁵ Lovia namana betata'u nuamui be'ana'ia vaita Dilava ena lalo'au anina mai Keliso ena vapasisi koana oi boikabasia kave'i.

Vinaula Nama'ina Ivavainai

Sia Oi Bobalea.

⁶ Bo'akalamai e, eta Lovia namana Iesu Keliso vanai lai avasiasimui, bo'akalata debalea 'o vaikabasi lai avenimui vitaitatai sia demauli kauta kataua kevatai oi bolavatau.

⁷ Inoku lai avavaia davana oi sibomui 'ani oi oikabasia a oi bomauli vaia koma. Lai oi kevamuiiai koanai sia kena lai abalea kovo.

⁸ Lai kau eta iani sia lai ani 'avaea ia tavata lai aveni, lai 'eva boni lani lai avinaula lai abavunu 'olana oi mekau asi'i lai amavenimui.

⁹ Kanaua lai avavai koma 'eva lai maiemai komolo vidulu kanaua lai babia, beia kanania lai avavaia 'eva vaikaika davanai be'ao oi bomauli vaia.

¹⁰ Lai oi ita kania laloanai vaidiba kanania vaka lai avenimui, "Kau ka sia e'ula bevinula koanai, ia sia beaniani."

¹¹ Lai 'ulu lai aika viloumuaia kau vaidia 'eva debalea, sia vinaula ka devavaia dedada'a kau vaidia eta vinaula laloatai dedododo.

¹² Lovia namana Iesu Keliso vanai lai a'outa mai lai avasiasita, bemia laloka eta iani kavu vinaulata bevavai eta iani bepupulu.

¹³ Bo'akalamai e, oi vinaula nama'ina ivavainai sia oi bobavunu.

¹⁴ Kau ka emai vaikabasi luvata malele kanania laloanai sia eabita dae kauna 'eva oi boika 'inia, ia ita sia oi bovaka'onamo, inoku sibona aviavina beonovaia 'eva bemalalai.

¹⁵ Beia kau kanaua oi oikala koanai 'ou kaunai sia oi bovaoa, ia bo'akalamui ai oi bovaoa oi bovaaidibala.

Vanama'ina Luvana To'ona.

¹⁶ Lovia namana 'eva eta nua'elu 'olana kauna, vali'u lai anoia ia betata'u sibona nua'elu bevenimui. Melala boutai mai dala boutai laloatai Lovia namana 'eva oi boumuaia kevamuiiai.

¹⁷ Lau Paulo e'u vanama'ina luvana kanania ima'u umaunai alelea, e'u malele boutai laloatai 'eva kanania alele koma oi bovamomo'aia ua 'eva lau e'u malele.

¹⁸ Lai ameamea eta Lovia namana Iesu Keliso ena iulaveni koana 'eva oi boumuaia akamuaia bemimia.

Paulo Ena Malele Lava'ana'ina TIMOTEO (1) Kevanai

Puka Laloana Ielena Luvana

Timoteo 'eva abiveni kauna 'alu'aluna ka, ia 'eva Paulo vali nama'ina eilolo vaia laloanai ebanoa deda'a to'ato'a kauna (Veauneke 16.1-3). Kanaua mulinai, Timoteo 'eva Dilava ena lo'e kauta Epesoai kauta i'ana'iavaita kaunai eao, inoku Paulo puka kanania eleleia eda'a kevana.

Dava lava'ana'ina lovana eakuia davana kanania. Timoteo 'eva be'imala kave'i, kau kataua vaida betata'u dedeai kau eta abiveni asi'i demava'ekota makauna. Kau katanania delalovaia kanobata kanania davana boutai 'eva desi'avana. Kanaua 'ounai kau ka e'ula bemia kave'i koanai, ia 'eva iani vaida sia be'ani mai ia 'eva sia bekamoane. Kanaua ia bevakomoloa. Ivaluana 'eva abiveni kauta i'mata dalana nama'ina mai ia eta vinaula, kau ika'inita vinaulana bevavaia kauna mai ena koakoa aboita 'eva lovata eaku. Luva to'ona 'eva Timoteo 'eva bemia kave'i itani Iesu Keliso ena vinaula kauna nama'ina umauna. Inoku abiveni kauta edeata edeata kevatai vaka kanaua bevinaula koma.

Puka Iduvuna Namata

a. Lova aku. (1.1 - 2)

b. Vaikabasi luvata Dilava ena lo'e mai vinaula kauta eta. (1.3 – 3.16)

c. Vaikabasi luvata Timoteo mai ena vinaula etai. (4.1 – 6.21)

Vanama'ina Luvana.

¹ Lau, Paulo, Dilava ita ivamaulita Dilavana mai Keliso Iesu ita kanuabata venia kauna eta luvai 'eva Keliso Iesu ena veauneke kau'uai ao,

² Timoteo alele venimu, oni 'eva lau naku'u umaumu Iesu iabivenina laloanai. Ameamea Kamata Dilava mai Keliso Iesu eta Lovia namana eta iulaveni koana, vilalo mai nua'elu akamuai bemimia.

Vaikabasi Kauta Dedeta Kevatai

Be'imata Kave'i.

³ Lau ada'a Makedonia kanona koanai, avasiasimu vitaitanai oni 'eva na'i Epeso vanuanai bomimia inoku kau vaida na'i bo'outa pasisi vaikabasi dedeta sia bevavai 'udai,

⁴ maivaka sibota kauanita sia beveveni kanobata dilavata sisibata mai kubudoli luvavata sia maieta ole davata kataua etai. Katania 'eva viala namata bevapuluta beia Dilava ena lalovai abiveniai evala'asi deikaia abivenina kanaua vinaulana ikabasinai sia devidulu.

⁵ E'u vasiasi luvana kanania 'olana umauna 'eva lalo'auai bemimia, kanaua 'eva nuata komolona medianai emakavala lalovai komolonai maivaka abiveni umaunai easi.

⁶ Ia kau vaida 'eva koakoa katanania kevatai deda'a tau deda'a luva anita asi'i luvata deluvavai.

⁷ Deula Dilava ena talavatu ivaikabasi vaina kautai be'ao, beia dava lovana deakua 'o nuatai dava deluva vaia kula'ilana 'eva ovona sia deovo.

⁸ Ita 'ani kaikabasi kau ka talavatu kanaua beda'avaia kave'i koanai talavatu 'eva dava nama'ina.

⁹ Maivaka 'ani kaikabasi talavatu kanaua 'eva komolo kauta daitai sia epulu ia talavatu 'eva talavatu deukua kauta daitai epulu, sia deda'a vaia kauta kataua mai Dilava 'olana sia de'aku kauta mai si'avana kauta, sia

dekabukabu kauta mai Dilava vana devasi'avanala kauta, kamata 'o sinata deaku bata kauta kataua mai akuaku kauta,

¹⁰ kulakula kauta, mai kau sibona banona ekulala mai ateate sibona banona ekulala kauta, da'alabi kauta detavatava vaita kauta, mai dede kauta, mai lavuai laloanai de'ou avuavu kauta, maivaka dava edeata edeata kataua vaikabasi umauna dainai sia dedadai davata.

¹¹ Vaikabasi umauna kanaua 'eva vanama'ina Dilavana valina nama'ina nuavina enai easi, vali nama'ina kanaua lau e'u ima'ima laloanai ene'eia divo vinaulana bavavaia.

Paulo Vanama'ina Luvana

Keliso Evenia.

¹² Keliso Iesu ita eta Lovia namana vanama'ina luvana avenia, inoku ia 'eva lau kula'ila eveni'u 'olana ia lele ika kau'uai evao'u ena vinaula laloanai.

¹³ Beia 'ana'inai 'eva Keliso vana i'ouna avavaia si'asi'a mai avaiivia, mai aivala si'asi'a kevanai melalanai, beia Dilava ena vilalo koana lau keva'uai 'olana e'u abiveni asi'i mai dava avavaia 'eva sia aikabasia.

¹⁴ Eta Lovia namana ena iulaveni koana keva'uai evanamala vaika, mai abiveni mai lalo'au Keliso Iesu enai ita eta kataua melala ka'onamoai eveni'u.

¹⁵ Kanania 'eva luva umauna nuata umautai eka abiadae mai ekabiveni. Keliso Iesu easi kanobatai 'eva si'avana kauta bevamaulita, vilolatai lau 'eva asi'avana vaika.

¹⁶ Beia Dilava ena vilalo koana lau 'eu ai, 'olana lau asi'avana vaika, inoku Keliso Iesu ena vapasisi kula'ilana kanaua sia bepupua vapasisina lau keva'uai bevala'asia, inoku vaida ikaika kanania beikala 'eva Keliso beabivenia maui keinikeini bedavalia.

¹⁷ Lovia 'olana emauli keinikeini, sia betoto'o, mai sia kaikala kauna, Dilava mo kanaua sibona 'olana ekaku mai enai nuavi bemimia beda'amo to'ona asi'i. Amen.

Paulo Timoteo Eva Asiasia

Bekula'ila.

¹⁸ Timoteo, naku'u e, luva avenimu luvana kanania boda'avaia, kanaua 'eva 'ana'inai enolea luvana iluvanai oni lovamu deakuia, inoku enolea luvata kataua vitaitata boda'avaita koanai oni 'ani kuali nama'ina bovavaia.

¹⁹ Emu abiveni mai nuamu komolona nama'ina boabi 'ini kave'i. Vaida nuata komolota katania devasi'avanata 'eva eta abiveni devaukuta.

²⁰ Ia vilolatai 'eva Humenaio mai Alesanada, laluaana 'eva 'ani Satani imanai avikanita ia ena siavu venunai bemimia, kanaua betata'u bevaikab-asita eta luva si'asi'a Dilava enai luvata bevapuata.

2

Kau Boutai Daitai

Ekameamea.

¹ E'u vasiyasi lava'ana'ina 'eva kanania, kau boutai daitai Dilava bonoia beduluta mai bevanama'inata, ia daitai emu meamea ai Dilava enai vanama'ina luvana boluvala.

² Mai lovia 'olana kauta mai siavu kauta boutai daitai vaka bomeamea, inoku ita mai ia 'eva mainua'eluta maui nama'ina laloanai ekamia Dilava 'olana iakuna mai kabukabu maulina bounai dalanai.

³ Meamea kanania boina 'eva enama'ina inoku Dilava ivamaulita kauna nuana ivanama'inana koana.

⁴ Dilava e'ula kau boutai maui beabia mai be'asi Dilava ena luva umauna beikabasia.

⁵ Inoku Dilava 'eva ka'onamo mai Dilava mai kau viloata ivaka'onamota kauna vaka ka'onamo Keliso Iesu, ia 'eva kau umauna,

⁶ ia sibona kauanina eveni kau boutai etavata beluvuta. Dilava 'eva ena ula evamono'aia melalana umaunai evala'asia.

⁷ Kanaua 'ounai lau edila'u ilolo mai veauneki kau'uai a'ao Keliso valina baluvala, pulu edea kauta ivamaleleta kau'uai a'ao Dilava ena luva umauna mai abiveni bavaikabasita. (Luva umauna aluvala sia adedede.)

⁸ Kanaua 'ounai, a'ula 'abu boutai ai kau sia bebabadu 'o sibota sia bevi'oudoli, ia eta mauli bekomolo laloanai imata kabukabuta beabi isi bemeamea.

A'ate Eta Koakoa

Nama'ita Bevavai.

⁹ Maivaka lau a'ula, 'a'ate eta tubu'a vadodoai 'eva 'ani devavaita kave'i, ia vuita sia bevaedeanata, 'o dava 'amale'amaleta kataua kolo 'o kutukutu'ai devavaita davatai sia bevavanamata, tubu'a tavata namata sia bevadodo.

¹⁰ Ia eta koakoa nama'ita bevavai koakoata betata'u bevamomo'aita ia 'eva Dilava dekukudivo venia 'a'ateta.

¹¹ Ateate 'eva ena manuai mai ena leleika itoinai ikabasi beabia.

¹² Lau a'oukao, 'a'ate 'eva kau sia bevamaleleta 'o sia be'ola vaita, ia 'eva bemimia 'ulu'uluta asi'i.

¹³ 'Olana Dilava eta'u Adamu evavai makava inoku muliai 'Eva evavaia.

¹⁴ Inoku Satani 'eva Adamu sia elebaia ia ateate elebaia, inoku si'avana ua'i ia kevanai emakavala.

¹⁵ Beia 'a'ate eta manau laloatai abiveni, lalo'au, mai kabukabu maulitai bemia basibasi koanai, nakuta bevapuluta, 'eva vamauli bedavalia.

3

Ikakao Kauta Eta Mauli

Lo'e Kabukabuna Laloanai.

¹ "Kau ka e'ula Dilava ena lo'e ikakaona vinaulana bevavaia koanai ia 'eva vinaula nama'ina eula venia," kanania 'eva luva umauna nuata umaunai ekabia dae luvana.

² Dilava ena lo'e ikakaona kauna 'eva ena koa benama'ina enai sia va'eva ka bedavalia, adana ka'onamo, nuana bevakula'ilala, nuana beabi 'inia, 'ola be'aku, da'a 'au kauta beabita dae ena lumai, mai vamalele vinaulana bevavaia kave'i,

³ sia beinu ba, sia beviala beia bemanau, sia beaivala, mai moni sia belalo'au venia.

⁴ Ia 'eva sibona ena luma kauta be'imata kave'i mai nakuna bevaidibata lelana be'ika mai 'olana be'aku dokadoka.

⁵ (Kau ka sibona ena luma kauta sia be'imata kave'i koanai, Dilava ena lo'e kauta a be'imata kave'i koma?)

⁶ Kau vali'umo eabiveni kauna 'eva lo'e ikakaona kaunai sia beabia 'isi, 'olana asi'i emaapa inoku Dilava Satani eva'ekoa boina asi'i ema'eko.

⁷ Inoku mulimuli kauta vaka ia 'olana be'aku, inoku sisiba sia bekakao mai Satani ena viuai sia beviviui.

Vidulu Kauta Eta Mauli

Lo'e Kabukabuna Laloanai.

⁸ Dala vitaitanai diakona vaka koakoa nama'ita bevaika vaikavai, dede vinaulata sia bevavai, sia beinu ba, mai dala va'evanai moni sia bekakavu.

⁹ Ia 'eva lalovai namata kataua Dilava 'ani evala'asita abiveni laloanai lalovaita deabi 'ini mainuata komolota mediatai.

¹⁰ Ia 'eva ekakovota makava inoku kevatai sia va'eva ka ekadavalia koanai diakono vinalana bevavaia.

¹¹ Dala vitaitana'i adata vaka koakoa nama'ita bevaika vaikavai maivaka sisiba sia bekaakai, sibota be'imata kave'i, mai vinala boutai laloatai 'eva momo'ai ai bevinaula.

¹² Diakono adana ka'onamo, nakuna mai ena luma kauta 'eva be'imata kave'i.

¹³ Kau kataua diakono vinalana devavaia kave'i kauta tavata 'eva 'ola aku vaidata etai be'abi, eta abiveni bevanamala bekula'ila vaika Keliso Iesu valina be'oua kave'i.

Eta Kukudivo Dalana.

¹⁴ Lau anuabata melala kava'inamo laloanai 'ani bavasi baikamu, beia malele kanania asinia evavasi kevamu,

¹⁵ 'olana 'ani kena bamaka'i boina ia malele kanania bevalalovaimu sibota eta mau'i a eka'imata kave'i koma Dilava ena lo'e kauta viloatai, kanaua 'eva mau'i Dilavana ena lo'e, Dilava ena luvu umauna bemia vaia mai bevakula'ilala 'abuna.

¹⁶ Ita kaikabasi kave'i eta kukudivo dalana kanaua Dilava kevatai evala'asia kukudivona 'eva namana.

Keliso 'eva kau kauaninai ela'asi,
idumeai ena komolo evamomo'aia,
anelu ia deikaia,
kanobata boutai kevatai
ia valina deilolo vaia,
mai kanobata kauta ia deabivenia,
nuavi laloanai eabia isi
eda'a vutuvutuai.

4

Vaikabasi Kauta Dedeta

Asi'i Demalehamui.

¹ Idume Kabukabuna e'outa kave'i ediaka, melala to'otai kau vaidata abiveni bevikanania ia dededede ka'ubata kataua mulitai bedada'a mai ka'uba si'avata vaika eta vaikabasi daitai bedadai.

² Vaikabasi katania boita 'eva dede kauta kevatai de'asi lalovai komolota kataua 'eva desi'avana vitaitana 'aui siavunai de'abuta.

³ Kau de'alavuta sia bekamoane mai iani vaidata 'eva sia be'ani. Beia Dilava iani evapulu 'eva eka ani, iani katania 'eva abiveni kauta mai Dilava ena luvu umauna deikabasia kauta kataua evenita vanama'ina luvana beluvata inoku be'ani.

⁴ Dilava evapulu davata boutai 'eva denama'ina, boutai akatai 'eva Dilava vanama'ina luvana ekavenia inoku eka ani ia sia ka ekavasi'avanala.

⁵ 'Olana iani 'eva Dilava ena luvu mai eta meamea etata'u evakabukabuta.

Keliso Iesu Ena Vinaula Kaumu

Nama'imuai Bo'ao.

⁶ Vaikabasi katania bo'akalata bovaikabasita kave'i koanai oni 'eva Keliso Iesu ena vinala kaumu nama'imuai bo'ao, inoku oni sibomu vaka abiveni luvatai mai vaikabasi nama'ina kanaua dainai odadai vaikabasinai bokula'ila.

⁷ Kanobata dilavata dedeta sisibata mai sisiba sia maianita kevatai bodata'atau, beia sibomu ivakula'ilamu vinalana bovavaia Dilava 'olana iakuna kaumuai bo'ao.

⁸ Kauanita ivakula'ilata vinaulata kavavai 'eva maiena nama'ina vaidā, beia Dilava 'olana iakuna koana ena nama'ina 'eva dava boutai laloatai, 'olana ia 'eva iluva'ana'i vaina eta mauilai vali'u kanobata kanania laloanaī mai mauī keīnīkeīni vailai mauilina vaka laloanaī.

⁹ Kanania 'eva luva umauna nuata umaūtai ekabia dae mai ekabivenia.

¹⁰ Kanania 'ounai kabavunu mai kanana 'olana 'eva ita mauī Dilavana kanuabata venia, ia 'eva kau boutai eta Vamaulī kauna, deabivenia kauta kataua 'eva bemaui.

¹¹ Luva katanīa bovaikabasita mai boluvavai beda'a vaita.

¹² 'Alu'alumu 'ounai kau oni sia beikamu 'iū'iū, beia ikaika nama'ita abiveni kauta vailatai bovala'asi emu luvaluvai, emu mauilai, emu lalo'auai, emu abiveniai, mai dala boutai laloatai sia va'eva ka bovavaia ia komoloai mai momo'ai ai bovavai.

¹³ Kau mato vailatai vinaula katanīa bovavai basibasi, Puka kabukabuna luvana bovakua, boilolo vaia, mai bovamalele vaia beda'amo lau bavasi kevamu.

¹⁴ Idume Kabukabuna ena veniveni nuamuai emimia venivenina sia bobalea vaia, kanaua 'eva lo'e kauta 'aida'aidata imata akamuai dekaō'au demeamea koanaī enolea luvana enai evenimu.

¹⁵ Bokaulo vinaula katanīa boutai laloatai mainuamu bounai bovavaita, inoku kau boutai oni emu vinaula 'ani enama'ina vinaulana beikala une.

¹⁶ Emu vaikabasi mai emu mauī bo'imata kave'i, dava katanīa bovavai basibasi, 'olana kanania bovavaia 'eva Dilava betata'u bevamaulimu mai lelemu de'ika kauta boutai vaka bevamaulita.

5

Lo'e Kabukabuna Kauta 'Eva

Pulu Ka'onamo Boina.

¹ Kau momotuta kevatai sia boluva pasisi kovo, beia 'ola aku dalanaī bo'outa kave'i itani ia 'eva oni kamamu boita, ia kau 'alu'aluta 'eva bo'akalamuai bovaota,

² 'ate momotuta 'eva sinamu boitai bovaota, mai 'ate 'alu'aluta 'eva lovvumuai bovaota mai nuamu komolonai.

'Aateta Obuta Umauta

Beikata Kave'i.

³ 'Aate obuta kataua deobu dokadoka 'aateta 'olata bo'aku.

⁴ Ia obu nakuna 'o kubuna vaidā koanaī, ia bovaikabasita makava eta kukudivo koakoana dainai eta luma kauta be'imata kave'i, kanaua boinaī 'eva kamata sinata mai kubuta eta 'ima'ima tavana bevamuea, 'olana kanaua 'eva Dilava nuana ivanama'inana vinaulana.

⁵ Obu ateatena sibona umauna emimia 'eva ena nuabata Dilava kevanai ene'eadivo boni mai lani boutai emeamea Dilava kevanai vidulu enoinoivaia.

⁶ Ia obu ateatena kanaua kauanina ena lalonama elalovaia namana 'eva kauaninaī emauli ia idumeai 'ani eba.

⁷ Abiveni kauta kevatai luva katanīa boluluva beda'avai, asi'i kevatai va'eva ka demadavalia makauna.

⁸ Inoku kau ka kadi'a'ana 'o ena luma kauta umauta sia vidulu ka evenita 'eva abiveni koakoana evunia, kau kanaua boina kauna 'eva esi'avana vaika vakaiā kau sia eabiveni kauna.

⁹ Va lele pukanaī obu vata sia beleleleta beda'amo eta pulu vikauta kalakoi navui avekenai, mai adata ka'o ka'o mo deobu vaita 'aateta 'eva vata beleleleta,

¹⁰ mai ateate kaikabasia kave'i ena mauili enama'ina, maivaka nakuna e'imata kave'i, da'a'au kauta eabita dae kave'i ena lumai, abiveni kauta da'alata e'abi, vaida eta bavunuai eduluta, mai vinaula nama'ita edeata edeata boutai laloatai evidulu ateatena.

¹¹ Beia obu 'a'ateta 'alu'aluta 'eva vata va lele pukanai sia boleleleta, 'olana nuata kamoane belalovaia koanai Keliso 'ani bebolabolala inoku bekamoane.

¹² Kanaua 'eva ia sibota Dilava ena lavuai 'abunai bedododo 'olana Dilava kevanai eta luva'ana'i makavana kanaua sia bekamoane 'udai luva'ana'inana deukua.

¹³ Ia 'eva balea kauta dedada'a luma ka mune'e luma ka ai dele'au, sia eta baleai mo beia eta sisiba kaoai mai kau edeata eta vinaula laloatai dedododo, mai luva sia bemaluva luvata deluvavai.

¹⁴ Kanaua 'ounai lau a'ula obu 'alu'aluta 'eva bekamoane nakuta bevapulu ta sibota eta luma be'ima. Inoku 'ou kauta sia 'ani beluva si'asi'a kevatai.

¹⁵ Obu vaida 'eva abiveni 'ani devikania deda'a Satani mulinai dedada'a.

¹⁶ Abiveni ateatena ka ena lumai obu vaida demimia koanai ia betata'u obu kataua beduluta, ia Dilava ena lo'e kauta mekau sia bevenita, inoku Dilava ena lo'e kauta betata'u obu umauta sibota demimia obuta kataua beduluta.

Dilava Ena Vinaula Dekaulo Vaia Kauta 'Olata Bo'aku.

¹⁷ Dilava ena lo'e ai 'aida'aidata kauta kau kevatai 'ana'ia vai vinaulana nama'ina devavaia kataua 'olata oi boaku vaika. Mai vinaula dekaualo vaia Dilava ena luva deilolo vaia mai devamalele vaia kauta kataua 'eva 'olata oi boaku vaika.

¹⁸ Puka kabukabunai ediaka,
"Bolomakau witi ivamukamukana vinaulana evavaia laloanai
nutuna sia bodo'o bubua,"

Deu 25.4

mai

"Vinaula kauna tavana beabia
'eva ekomolo."

Lk 10.7

¹⁹ Inoku kau ka Dilava ena lo'e e'olavaia kauna ena va'eva luvana eluluva 'eva lenea sia oi boabia dae, beda'amo kau lua 'o koi bevamomo'aia ia eva'eva 'eva leleta boabi dae.

²⁰ Inoku lo'e e'olavaia kauna ka si'avana evavaia dokadoka koanai kau mato vailatai bo'ovenia inoku lo'e de'olavaia kauta boutai ikaika kanania beikala koanai va'eva sia bevavaia.

²¹ Dilava mai Keliso Iesu mai anelu kabukabuta vailatai lau oni luva papisina a'oumu, vinaula katania boutai lovata a'aku vinaulata daitai bodadai, kau boutai kevatai koakoa vitaitamo bovavaia ia sia kau ka'onamo enai bo'au.

Sibomu Bo'imamu Kave'i.

²² Bolalovai kave'i makava vakaia imamu kau ka akanai bokao'au Lovia namana ena vinaula bevavaia, vaida eta koa si'avata laloatai sia bodododo. Sibomu bo'imamu kave'i emu mauili sia be'obu Dilava vailanai.

²³ Vei 'avaeana mo sia boinua, ia vine veina kena boinua bo'amu bedulua 'olana emu 'olele 'ounai.

²⁴ Kau vaida eta si'avana 'eva sia devuni kaikata, si'avanata kataua 'eva be'ana'ia vaita lavuai 'abunai, beia vaida eta si'avana 'eva muliai 'ani bela'asi.

²⁵ Vitaitana kau koa nama'ita devavai 'eva sia devuni kaikata, maivaka eta koa nama'ita sia kaikata koakoata vaka 'ani bela'asi.

6

Da'alabi Kauna Ena 'Ola Kauna 'Olana Be'aku.

¹ Abiveni kauta kataua da'alabi vinalana devavaia kauta boutai 'eva eta 'ola kauta 'olata be'aku vaika, inoku kau ka Dilava vana mai ita eta vaikabasi luvata akatai sia beluva si'asi'a.

² Da'alabi kauta eta 'ola kauta 'eva abiveni kauta koanai ia bo'akalata sia 'olata sia be'aku, beia da'alata beabi kave'i, 'olana 'ola kauta kataua da'alabi kauta kevatai vidulu deabia mai abiveni kauta kataua 'eva da'alabi kauta delalo'au venita. Dava katania 'eva bovamalele vaita mai bova-asiatia.

Moni Ekalalovaia Vaika 'Eva Eka'ekoasi.

³ Kau ka vaikabasi edeana ka evaikabasi vaia mai eta Lovia namana Iesu Keliso ena vaikabasi umauna mai Dilava ikukudivo venina vaikabasina dalana umauna evaikala davana sia evamomo'aia koanai,

⁴ ia 'eva eapa vaika, ia sia dava ka eikabasia. Ia ena lalovai desi'avana vaika, inoku luvaluva laloatai 'eva ebadadu mai luva sia eabidae, inoku luva kataua'i 'eva mama mai viala, luva si'avata vaika depupulu mai sia kau ka evamomo'aia.

⁵ Mai kau katania 'eva nuata sia dekomolo kave'i, Dilava ena luva umauna sia deikabasia, mai Dilava ivanama'inana vinalatai belovia delalovaia inoku sibota viloatai deviala basibasi.

⁶ Beia kau ka kevanai dava eabita davatai nuana edaia koanai Dilava ikukudivo venina maulina 'eva bevaloviaia.

⁷ Kapulu koanai dava sia ka kabiakasi kanobata, mai kanobatai ekaba koanai sia dava ka ekabia ekada'a vutuvutu.

⁸ Kanaua 'ounai kevatai iani mai tubu'a keta demimia koanai kataua 'eva 'ani edaia ita etai.

⁹ Ia de'ula bemalevia kauta kataua 'eva vikovi laloatai bedododo, lalovai bo'ota mai nuata iva-ananata lalovaita viunai beviviu, inoku eta mauli beabia beda'a si'avana 'abuna umaunai inoku bevavaita si'asi'a.

¹⁰ 'Olana moni ilalo'au venina 'eva si'avana edeata edeata boutai bevapuluta. Kau vaida moni ulana deula vaika 'eva abiveni debolabolala sibota nuata devavilalo.

Abiveniai Kuali Nama'ina Bovavaia.

¹¹ Beia oni Dilava ena kau, dava katania boutai kevatai boda'atau. Ia komolo umauna bokavua, Dilava 'olana bo'aku, boabivenia, lalo'auai bomimia, bovapasisi, mai manauai bomimia.

¹² Abiveniai kuali nama'ina bovavaia, vakaia mauli keinikeini boabi 'inia, 'olana kau mato devamomo'aimu vailatai emu abiveni koana o'oua dae kave'i melalanai Dilava mauli kanania laloanai e'aemu.

¹³ Dilava dava boutai mauli evenita Dilavana mai Keliso Iesu ia sibona Pontio Pilato kevanai luva umauna e'ouiadae kauna vailatai lau oni avasi-asimu.

¹⁴ Keliso ena talavatu pasisita luvata boda'avai kave'i mai kevatai sia bova'eva, mai kau ka vuvua sia bevakoamu beda'amo eta Lovia namana Iesu Keliso ena mue'udai melalana.

¹⁵ Ena mue 'udai melalana kanaua 'eva Dilava betata'u ena melala umaunai bevavaia. Dilava 'eva vanama'ina 'olana mai ia sibona mo dava boutai

'olata, lovia 'olana kauta boutai eta Lovia 'olana, mai lovia namata boutai eta Lovia namana.

¹⁶ Ia sibona mo bemia keinikeini sia beba kovo, ia 'eva 'ailala laloanai emimia 'ailala kanaua 'eva e'ailala vaika kau ka beda'a kevana 'eva sia bedaia, kau 'avaeana ka 'eva Dilava sia eikaia 'o sia beikala. 'Olaaku mai siavu 'eva Dilava kevanai bemia keinikeini. Amen.

Dava Kevatai Dedoutamo Kauta

Lo'e Laloanai.

¹⁷ Kau kataua vali'u kanobata kanania ena maui davatai delovia kauta bo'outa pasisi, sia be'apa, mai eta nuabata lovia davatai 'ani betaule davata kataua etai sia belava'au, ia eta nuabata 'eva Dilava kevanai mo bemimia, 'olana dava boutai eainama venita nuata ivanama'inata.

¹⁸ Bo'outa vinaula nama'ita bevavai, koa nama'itai belovia, mai kau vaidava kevatai kolekoleai beainama venita.

¹⁹ Dala kataua bevavai 'eva sibota eta lavo bevalalo, kataua'i ia bevamia 'inita maui vailai maulina ena, inoku maui kanaua beabia 'eva maui umauna.

²⁰ Timoteo e, vinaula kanana Dilava evenimu vinaulana bo'imala kave'i, kanobata luvaluvata mai bo'o luvata kataua kau vaidava de'ae lebata dediaka 'idiba' kauta kataua kevatai boda'atau.

²¹ 'Olana kau vaidava bo'o lalovaina kanaua delalovaia 'eva eta abiveni devataulea.

Ameamea Dilava ena iulaveni koana 'eva boumuiai kevamuiiai bemimia.

Paulo Ena Malele Ivaluana TIMOTEO (2) Kevanai

Puka Laloana Ielena Luvana

Timoteo 'eva Paulo ebanoi'a vali nama'ina vinaulana devavaia kauna. Kanaua 'ounai Paulo puka kanania eleleia eda'a kevana, dala nama'ita lovata eaku mai e'ouia dala kataua'i bedada'a melala boutai. Ia Timoteo e'ouia beabiveni kula'ila mai Iesu Keliso valina nama'ina belolo vaia melala bounai. Dilava ena luva beda'avaia kave'i. Kau beva ana-anala 'o mekau bevenia kauta daitai sia bevuakao vuakao. Inoku ia 'eva bekula'ila, Dilava vinaula evenia davana bevavaia kave'i.

Ia 'eva dede luvata edeata edeata leleta sia be'ika, mai eta lalovai sia de-mediana kauta kevatai beda'atau, luva kataua boita detata'u kau devavaita si'asi'a. Ia 'eva Paulo ena mia dalana belalovai 'inia kave'i inoku ia kanaua bemia koma, 'olana abiveniai dekula'ila kauta eta mia dalana 'eva kanaua, nua'eluai bemimia mai bo'akalata nuata bevanama'inata mai eta mekau bevuvua.

Puka Iduvuna Namata

- a. Lova aku. (1.1 - 2)
- b. Vanama'ina luvana mai vasiyasi luvana. (1.3 – 2.13)
- c. Vaidiba luvana. (2.14 – 4.5)
- d. Paulo ena ula luvana. (4.6 - 18)
- e. Luva to'ota. (4.19 - 22)

Vanama'ina Luvana.

¹ Lau Paulo, Dilava ena ula 'ounai Keliso Iesu ena veauneke kau'uai ao Keliso Iesu laloanai maui eluva'ana'i vaia maulina valina bakakava,

² Timoteo, naku'u ma'adi, alele venimu. Ameamea Kamata Dilava mai Keliso Iesu ita eta Lovia namana eta iulaveni koana, vilalo, mai nua'elu kevamuai bemimia.

Paulo Timoteo Nuana

Evakula'ilala.

³ Dilava vanama'ina luvana avenia, maivaka melala boutai e'u meameai oni sia abolabolamu boni mai lani laloatai. Dilavana kanaua nua'u kolomolona umaunai ia da'alana a'abi vitaitana 'ava'ava'u ia da'alana deabi boina.

⁴ E'u da'a laloanai okani melalana alalovaia, e'u ula itoina 'eva bamaikamu, inoku bamaikamu koanai lalo'u 'ani benama vaika.

⁵ Emu abiveni dokadoka alalovai 'inia, abiveni kanaua 'eva 'ana'inai oni kubumu ateatena Loi mai sinamu Iunisi demauli vaia abivenina, vali'u avamomo'aimu oni nuamuai vaka abiveni kanaua emimia.

⁶ Kanaua 'ounai lau oni avalalomu une, ima'u akamuai akao'au ameamea laloanai idume ena ainama kanana Dilava idume enai evenimu ainamana bovavulea vinaulana bovavaia kula'ila.

⁷ 'Olana Dilava 'eva sia makau idumena evenita, ia siavu, lalo'au mai nua pasisi idumena evenita.

⁸ Kanaua 'ounai eta Lovia namana valina ikavanai sia bomalalai mai Keliso dainai lau avabuto'o malalaina vaka sia bomalalai vaia. Dilava kula'ila evenita vitaitanai ana-ana laloatai ekamia vali nama'ina dainai.

⁹ Ia eta'u ita evamaulita maivaka e'aeta ena kabukabu kautai ekao. Kanaua 'eva sia dava ka kavavaia 'ounai, ia ena lalovai namana mai ena

iulaveni koana 'ounai. Ena iulaveni koana kanania 'eva 'ana'inai kanobata asido'o epulu laloanai Keliso Iesu dainai evenita.

¹⁰ Ia vali'u 'eva 'ani evaila kave'i Keliso Iesu ivamaulita kauna easi laloanai. Ia eta'u ba siavuna evaolea, mai mauli keinikeini sia be'ole maulina dalana vali medianai evala'asia.

¹¹ Vali mediana kanania 'ounai Dilava eta'u edila'u, bailolo, veauneke kau'uai ba'ao maivaka vaikabasi kau'uai ba'ao.

¹² Kanaua 'ounai lau 'eva kanania ana-ana koma, beia sia amalalai, 'olana lau aikabasi dai abiveni kauna vaka aikabasia kave'i lau ia kevanai ane'eiadivo vinalana be'imala kave'i beda'a mo ena mue 'udai melalanai.

¹³ Lau avaikabasimu luvata umauta dalatai bodada'a maiabivenimu maivaka mailalo'aumu Keliso Iesu laloanai.

¹⁴ Dava nama'ina evenimu oni emu ikakao venunai davana Idume Kabuk-abuna ita nuatai emimia idumena kanaua ena viduluai bo'imala kave'i.

¹⁵ 'Ani oikabasi banota Asia kanonai demia kauta boutai deasi deda'a'u mulili devikani'u, vilootai 'eva Bukelo mai Elemokene.

¹⁶ Lovia namana betata'u ena vilaloai Onesipolo mai ena luma kauta boutai bevanama'inata, 'olana ia melala doutamo nua'u evakula'ilala maivaka delio'u avabuto'o malalaina sia emalalai vaia.

¹⁷ Ia ua'i Lomai ela'asi koanai, lau ekavu'u eda'amo edavali'u.

¹⁸ Ameamea Lovia namana ia bedulua ia 'eva Lovia namana ena vilalo bedavalia melala kanaua'i. Maivaka oni 'ani oikabasi kave'i ia a edulu'u koma ua'i Epesoai.

2

Keliso Iesu Ena Kuali Kaumu Nama'imuai Bo'ao.

¹ Kanaua 'ounai, naku'u e, Keliso Iesu iulaveni koana kanaua evenimu iulavenina laloanai bokula'ila.

² Luva katania kau doutamo vailatai ailolo vaita 'uluta oika luvata kau ovamomo'aita kauta kataua bovaikabasita, inoku ia betata'u kau vaida bevaikabasita.

³ Keliso Iesu ena kuali kaumu nama'imuai bo'ao, vitaitana ana-ana laloatai kakula'ila boina.

⁴ Kuali kauna ka kau 'avaeata eta mauli koakoata laloatai sia edododo. Ia kuali vinalana evavaia kave'i 'olana ena ula 'ola kauna ia e'ana'iaivaia kauna nuana bevanama'inala.

⁵ Maivaka veau kauna veau vilo'o talavatuta boutai daitai bedai kave'i, asi'i koanai veauai 'ana'ia tavana sia beabia.

⁶ Loba vavai kauna bebavunu vakaia iani makavana 'eva ia beabia makava.

⁷ Lau dava luvana aluluva davana bolalovaia kave'i, 'olana Lovia namana 'eva 'ani nuamu beluvua dava boutai boikabasita.

⁸ Iesu Keliso ba ai eko'isi 'udai kauna bolalovai 'inia, ia 'eva Davida 'ava'avana, kanania 'eva vali nama'ina lau ailolo vaia.

⁹ Vali nama'ina ailolo vaia 'ounai ana-ana mai delio'u itani va'eva kauna ka boina, beia Dilava ena luva 'eva sia belioa bedaia.

¹⁰ Kanaua 'ounai e'u adedua boutai laloatai avakula'ila vaika Dilava eabita isi kauta daitai, kataua baduluta Keliso Iesu laloanai vamauli mai nuavi keinikeini beabia.

¹¹ Kanania 'eva luva umauna nuata umautai ekabia dae mai ekavomomo'ia.

“Ita Keliso ita kaba koanai,
ita ia ita eka mauli ka'ona.

¹² Ita ana-ana laloatai
ekakula'ila koanai,
ita ia ita ekalovia ka'ona.
Ita ia eka'oua avuavu koanai,
ia vaka ita be'outa avuavu.

¹³ Ita sia kabiveni koanai
ia 'eva melala boutai
abiveni kauna, 'olana ia 'eva
sibona sia be'oua avuavu.”

*Dilava Bevamomo'aimu
Ena Vinaula Kauna Umaumu.*

¹⁴ Luva katania kau bovalalovaita. Inoku Dilava vailanai bo'outa pasisi, luvaluva 'avaeata akatai sia beviale, luva kataua 'eva anita asi'i, kau 'ulu kataua de'ika 'eva eta maui devavai si'asi'a.

¹⁵ Bovinaula kula'ila, sibomu Dilava vailanai bovamomo'aimu oni 'eva vinaula kaumu umaumu emu vinaula sia omalalai vaia, inoku oni kaumu 'eva Dilava ena luva umauna luvana dalana komolonai ovaikabasi.

¹⁶ Kanobata luvaluvata mai bo'o luvaluvata kevatai boda'atau, 'olana kataua 'eva kau Dilava enai devada'ataua.

¹⁷ Luva kataua boita devaikaikasi 'eva itani dua si'avana vaika iva boina vidio eani palua, Humenaiio mai Pileto 'eva kau katania vilolatai.

¹⁸ Ia laluaana 'eva luva umauna dalana 'ani devikania ia eta dede luvata deluluva, ita 'ani kako'isi 'udai siako inoku ba ia sia ekako'isi 'udai, inoku luva kanaua etata'u kau vaida eta abiveni evavai si'asi'a.

¹⁹ Beia Dilava eta'u lava 'au 'abuna ka 'ani ene'eiadivo sia be'iuvai'iuvai kovo, inoku akanai luva katania deleleta, “Lovia namana 'eva ena kau boutai eikabasi,” maivaka “Daimo daimo dediaka ia Lovia namana vanai eta si'avana de'ouasi 'eva koakoa si'avata boutai bevikanita.”

²⁰ Luma namana ka laloanai 'eva olaka mai nau edeata edeata ua'i demimia, vaida 'eva kolo mai siliva ai devavaita, ia vaida 'eva auai 'o 'ika'ikai devavaita, inoku vaida 'eva vinaula namatai bevinaula vaita, ia vaida 'eva vinaula edeatai bevinaula vaita.

²¹ Kau ka ena maui laloanai sibona si'avana kevanai beda'atau koanai, ia 'eva vinaula namata laloatai bevavinaulala, ia 'eva bevakabukabua, mai ena vinaula vaka 'eva doutamo vaika ena 'ola kauna kevanai, maivaka 'ani eva'olu vinaula nama'ita boutai bevinaula vaita.

²² Melo 'alu'aluta eta lalovai si'avata vaika bovikanita, ia vinaula komoloai bokula'ila, abiveni, lalo'au mai nua'eluai bomimia, mai Lovia namana vanai nuata nama'itai de'aea kauta kataua ita oi bovaka'onamo.

²³ Bo'o mai luva 'avaea adeduata kevatai boda'atau, 'olana 'ani oikabasi kataua to'ota 'eva viala bepupulu.

²⁴ Beia Lovia namana ena da'alabi kauna 'eva sia beviale, ia 'eva kau boutai kevatai benama'ina mai vaikaikasi kauna medianai be'ao mai bevapasisi.

²⁵ Ia devaivivia kauta kataua 'eva maimanauna be'outa kave'i inoku dala kanaua'imo ama'i Dilava betata'u bevalalota'udai be'asi Dilava ena luva umauna beabia dae.

²⁶ Inoku kanaua'i eta lalovai lalovai bekomolo Satani ia eabita lenea dainai dedadai kauna ena viuai beda'atau.

3

Melala To'otai.

¹ Luva kanania 'eva bolalovai 'inia, melala to'otai 'eva mekau namavaikata bepupulu.

² Kau 'eva sibota mo belalo'au venita, moni mo beula venia vaika, luva si'avata beluluva, be'apa, bevakaunama, kau kevatai beluva si'asi'a, melo kamata sinata leleta daitai sia bedadai, luva nama'ita sia beluluva, mai kabukabu vinaulata sia bevavai,

³ kevata kauta sia belalo'au venita, si'avana sia be'ou kao, be'oukeinikeini, sia beikabasi ia sibota 'eva dava devavaia, beviala, vinaula nama'ina bevai-vivia,

⁴ veni beveveni mai kou bekokou, sia belalovai lalovai ia bevavai 'avaea, nuata apa bevovonu, lalonama vinaulata beula venita, ia Dilava sia belalo'au venia.

⁵ Kauaniaimo Dilava ikukudivo venia maulinai bemimia, ia maui kanaua siavana 'eva bevai-vivia. Kau kataua boita kauta 'eva kevatai oi boda'atau.

⁶ Kau kataua boita vaidai 'eva 'a'ate eta lalovai dekiki 'a'ateta eta luma laloatai dedododo, nuata de'ani ita kulakula vinaulata si'avata vaika devavai, 'a'ate kataua 'eva si'avana laloanai demimia eta ula si'avata vaika daitai.

⁷ 'A'ate kataua melala boutai dekovokovo de'ula dava makamakata bema-malele vai kave'i, beia Dilava ena luva umauna 'eva asido'o mo deikabasia.

⁸ Vitaitana Iane mai Iambole Mose devaivivia boina, kau kataua boita 'eva Dilava ena luva umauna vaka devaivivia, ia eta lalovai 'eva desi'avana vaika, Dilava ena abiveni sia devamomo'aia.

⁹ Ia eta vaikabasi 'eva sia bemia dau'adau'a, 'olana kau boutai 'eva ia eta bo'o beikala une, vitaitana Iane mai Iambole etai epulu boina.

Dilava Ena Luva Umaunai Bomimia.

¹⁰ Beia oni 'eva e'u vaikabasi vinaulata boutai 'ani oikabasita, e'u maui, e'u lalovai namana, e'u abiveni, e'u vakula'ila, e'u lalo'au, mai e'u vapasisi.

¹¹ Oni oikabasi lau devaivivi'u maivaka anana ua'i Antioka ai, Ikonio ai mai Lusitela ai. Devaivivi'u vaika beia avapasisi, inoku Lovia namana eta'u si'avana kataua laloatai evamauli'u.

¹² Luva umauna kau de'ula Keliso Iesu laloanai Dilava ikukudivo venia maulinai bemimia kauta boutai 'eva bevaana-anata.

¹³ Inoku si'avana kauta mai dede kauta eta si'avana bevavai basibasi beda'amo besi'avana vaika, inoku ia betata'u kau vaidai belebata mai ia sibota vaka belebata.

¹⁴ Beia oni 'eva Dilava ena luva umaunai bomimia, kanaua 'eva oikabasia omalele vaia mai oabivenia davana, maivaka oikabasi daidai 'eva oni emu vaikabasi kauta.

¹⁵ Kikimuai koanai Puka kabukabuna 'ani oikabasia easi mo vali'u, inoku Puka kabukabuna betata'u lalovai komolo bevenita, kanaua'i Keliso Iesu oabivenia maui oabia.

¹⁶ Puka Kabukabuna luvata boutai 'eva Dilava Idumena ena viduluai deleta, inoku eta vinaula 'eva namavaikata, kataua'i luva umauna ekava-malele vaia, bevalalovaita komolo, bevada'ata komolo, mai maui komolona bevaikabasita kanaua'i ekamia.

¹⁷ Kanaua 'ounai Puka kabukabuna luvana betata'u kau Dilava ena vinaula devavaia kauta koa nama'itai beva'oluta kave'i vinaula nama'ita boutai bevavaita.

4

¹ Dilava mai Keliso Iesu vilatai lau oni avasiasimu, Keliso 'eva beasi 'udai maui kauta mai ba kauta bevaluvata ena lovia vanuana be'olavaia.

² Dilava ena luva boilolo vaia, deabimu dae 'o sia deabimu dae melalata boutai laloatai, maikula'ilamu kau bovamaleleta, bovakomolota, bovaiddabata, mai bovakula'ilata.

³ 'Olana kau vaikabasi komolona lлена sia be'ika melalana 'eva be'asi, inoku ia sibota eta ula daitai bedadai maivaka sibota eta vaikabasi kauta doutamo bedavalita nuata ivanama'inata luvata beluluva leleta be'ika.

⁴ Dilava ena luva umauna 'uluna ikatai beda'atau, ia kubukama eta sisiba 'ana'ita dedeta leleta be'ika.

⁵ Beia oni 'eva melala boutai bo'imamu kave'i, maikula'ilamu anana laloatai bokula'ila, vali nama'ina ikavana vinalana bovavaia, Dilava ena vinala ivavaina kaunai bo'ao vinala boutai bovaoleta kave'i.

⁶ Lau e'u mauli itoinai 'eva Dilava enai inuinu ainama davanai be'ao, inoku e'u ba melalana kanaua 'eva 'ani ekevai.

⁷ Viaku laloanai viaku nama'ina 'ani aviaku vaia, mai veau vilo'o laloanai veau avaolea kave'i, maivaka e'u abiveni 'eva a'imaia kave'i.

⁸ Inoku vali'u 'eva e'u komolo 'ounai 'ana'ia vai koana eva'olua e'u, inoku Lovia namana komolo kauna lavuai be'ana'ia vaia kauna betata'u lau 'ana'ia vai koana beveni'u, sia lau mo sibou, ia boutai mailalo'auta Lovia namana de'imala bevaila ena asi melalanai kauta kataua vaka bevenita.

Paulo Ena Ula Luvana.

⁹ Dala bokakavu bomolau boasi kaokao lau keva'u.

¹⁰ 'Olana Dema 'eva kanobata maulina elalo'au venia 'ounai evikani'u eda'a Tesalonika. Kelesike 'eva eda'a Kalatia, mai Tito 'eva eda'a Dalamatia.

¹¹ Luka mo sibona 'eva lau keva'uai emimia. Bo'asi koanai Maleko bovuala laluna oi bo'asi, 'olana ia 'eva vinala kanania'i bedulu'u 'ani bedai.

¹² Tukiko 'eva 'ani asinia eda'a Epeso.

¹³ Bo'asi koanai, e'u tubu'a ivadodo imusina ua'i Toloai Kapo kevanai avikania tubu'ana boabia, mai puka bo'abi bo'asi, maivaka puka mamoe avatai deleleta pukata kataua 'eva boabita bo'asi ia sia bobolabola.

¹⁴ Alesanida 'auli vinalana evavaia kauna 'eva keva'uai evavai si'asi'a, beia Lovia namana betata'u ena koakoa kanaua vitaitanai tavana bevamuea.

¹⁵ Ia kevanai oni vaka bo'imamu kave'i, 'olana ita eta vaikabasi luvata 'eva evaivivita vaika.

¹⁶ Valuva lava'ana'inai, alavadivo vali'u akava laloanai sia kau ka edulu'u kovo, boutai devikani'u deda'a. Beia Dilava eta si'avana kanaua tavana sia bevamueia.

¹⁷ Ia Lovia namana 'eva lau keva keva'uai emia kula'ila eveni'u, inoku lau ata'u vali nama'ina itoina ailolovaia kave'i pulu edeana kauta boutai be'ika. E'u ba bevamomo'aia 'abunai evamauli'u.

¹⁸ Lovia namana betata'u lau si'avana 'abuta boutai laloatai bevamauli'u mai bevada'a'u kave'i ena vutuvutu vanuanai. Nuavi 'eva ia kevanai bemia keinikeini. Amen.

Vanama'ina Luvana To'ona.

¹⁹ E'u vanama'ina luvana Piliskila mai Akula laluna bovenita, maivaka Onesivolo ena luma kauta ita bovenita.

²⁰ Elasato 'eva Kolintoai emimia, inoku Tolovimo 'eva e'olele 'ounai Miletoai avikania ua'i emimia.

²¹ Dala bokakavu bomolau, 'elu melalana asido'o ele'au 'eva bo'asi. Eubulo, Pude, Lino mai lovuta Kalaudia, mai bo'akalata boutai eta vanama'ina luvana desinia kevanu.

²² Ameamea Lovia namana 'eva idumemu enai bemimia. Dilava ena iulaveni koana boumuiai kevanuiai bemimia.

Paulo Ena Malele **TITO** Kevanai

Puka Laloana Ielena Luvana

Tito 'eva sia Iuda kauna. 'A ia elalo'udai laloanai, Paulo eduluia ena veauneke vinalana laloanai. Paulo eta'u Tito 'eva Kelete motumotunai evikania, ia betata'u abiveni kauta ika'inita vinalana bevavaia 'abu kanaua'i.

Malele kanania laloanai, luva lava'ana'ina davana kanania. Keleta kauta eta koakoa 'eva sia denama'ina kave'i (1.10 - 13). Paulo ediaka, abiveni kauta i'ana'iavaita vinalana iulavenina kauna ena koakoa 'eva benama'ina kave'i. Mai kau ivaikabasita dalana Tito e'ouia, vitaitana moluane mai ateate 'alu'aluta mai da'ala abi kauta. Malele to'onai 'eva Paulo eta'u Tito e'ouia moluane mai ateate bevaikabasita nuata bevaka'onamo. Ia ka ka kevatai vinala mediata bevavai mai kau vaida kevatai. Ia 'eva badu luvata sia beluluva mai kau vaida ita sia bevina.

Puka Iduvuna Namata

- a. Lova aku. (1.1 - 4)
- b. Dilava ena lo'e vinala kauta. (1.5 - 16)
- c. Abiveni kauta eta mau. (2.1 - 15)
- d. Vasiasi luvata. (3.1 - 11)
- e. Luva to'ota. (3.12 - 15)

Vanama'ina Luvana.

¹ Lau Paulo, Dilava ena da'alabi mai Iesu Keliso ena veauneke kau'u. Lau 'eva desini'u kau Dilava edilata kauta kataua eta abiveni baduluta Dilava ena luva umauna beikabasia kanaua'i Dilava 'olana be'aku.

² Abiveni mai aoneka kanaua'i mau keinikeini benuabata vaia, Dilava 'ani siako kanobata asido'o epulu laloanai mau kanania eluva'ana'i vaia, ia 'eva sia ededede.

³ Ani elalo vaia makava vakaia ena melala umaunai valina nama'ina evala'asia kau boutai beikabasia, valina kanaua ailolo vaia, Dilava ivamaulita kauna evamomo'ai'u ia ena vinala kanania ivavainai.

⁴ Tito, naku'u umauna eta abiveni ka'onamo laloanai, lau oni alele venimu. Dilava ita kamata mai Keliso Iesu ita ivamaulita kauna iulaveni koana mai nua'elu bevenimu.

Tito Keleteai

Kau Namata Edilata.

⁵ Kelete ai avikanimu 'olana 'eva vinala boutai sia deole vinalata bovavaita kave'i inoku vanua boutai laloatai Dilava ena lo'eai kau namata bodilata 'ana'ia vai vinalana bevavaia, ikabasi avenimu ikabasinai bovinula.

⁶ Ana'ia vai kauna 'eva va'evai vuvua sia devakoala kauna, adana ka'onamo, nakuna beabiveni maivaka lele be'ika, sia bebika'a.

⁷ 'Olana Dilava ena vinala eikakao kauna 'eva va'evai vuvua sia devakoala, sibona ena ulai sia bedada'a, 'o sia bebadu molaumolau, sia beinu ba, sia beaivala mai moni sia beula venia vaika.

⁸ Ia Da'a'au kauta beabitae dae ena lumai mai dava nama'ina davana belalo'au venia, lalovai komoloi bemimia, komolo dalanai be mau, ena mau beaveni Dilava kevanai, mai nuana bekabukabu.

⁹ Dilava ena luva umauna devaikaikasi vaia vaikaikasina kanaua be-abi 'inia. Dala kanania'i vaikaikasi umauna bevaikaikasita kau nuata bevakula'ilata, mai vaikaikasi umauna devaivivia kauta kataua eta va'eva bevakomolota.

Vaikaikasi Kauta Dedeta

Oi Bo'outa Lele Bevuvunu.

¹⁰ 'Olana vaivivi kauta doutamo ua'i eta luva 'avaea luva 'avaei kau delebata, maivaka deivata kauta kataua doutamo vaka ua'i.

¹¹ Kau kataua oi bo'outa lele bevuvunu nututa be'alavu, 'olana abiveni kauta eta luma kauta doutamo nuata devabavunuta, sia bemavaikaikasi davata devaikaikasivai moni ilalovainai malalai vinalata kataua devavai.

¹² Kelete kauta eta enolea kauna umauna eta'u ka Kelete kauta e'outa ediaka, "Kelete kauta 'eva dede kauta, boloma 'asita si'avata vaika boita, debalea sibota bo'ata anita mo delalovaita."

¹³ Nia 'eva luva umauna eluvala, kanaua 'ounai bo'ovenita si'asi'a, inoku eta koakoa bekomolo Dilava beabivenia kula'ila.

¹⁴ Inoku Iuda kauta eta sisiba 'ana'ita mai kau kataua eta talavatu luvata 'uluta sia be'ika, kataua 'eva kau etai de'asi Dilava ena luva umauna devaivivia.

¹⁵ Nuata nama'ita kauta kataua 'eva kevatai dava boutai dekomolo kave'i, ia nuata si'avanai devonu kauta kataua mai sia deabiveni kauta 'eva kevatai sia dava ka ekomolo. Eta lalovai mai nuata umauta 'eva desi'avana.

¹⁶ Ia dediaka Dilava deikaikasi kave'i, beia eta koakoa ai 'eva Dilava sia deabia dae. Ia 'eva kau kataua uluta sia e'ula, lele sia de'ika kauta mai dava nama'ina ka sibota kevatai bevavaia 'eva sia bedaia.

2

Abiveni Komolona Umauna

Bevaikaikasita.

¹ Beia oni 'eva abiveni komolona umauna bovaikaikasita dala kanauai bemaui.

² Kau namata bovaikaikasita bevapasisi, eta koakoi kau ia 'olata be'aku, lalovai komoloi bemaui mai eta abiveni bekula'ila kave'i, lalo'auai mai vapasisiai.

³ Dala vitaitanaimo 'a'ate namata bovaikaikasita Dilava ena ula maulinai bemimia, vaida kevatai sia be'ou keinikeini, 'o sia beinu ba, ia vinala nama'ina dalata vaida bevaikaikasi vaita.

⁴ Inoku ia betata'u 'a'ate 'alu'aluta bevamaleleta sibota adata mai nakuta belalo'au venita,

⁵ belalovai komolo mai benama'ina kave'i, eta luma vinalatamo bevavai, koakoa nama'ita bevavai, mai adata daitai bedadai, inoku kau ka Dilava ena luva sia bevasi'avanala.

⁶ Dala vitaitanaimo, kau 'alu'aluta bovakula'ilata nua komoloi bemaui.

⁷ Oni 'eva dava boutai laloatai ikaika nama'ina bovaikata emu koa nama'itai. Emu vaikaikasi laloatai 'eva koakoa komolonai mai nuamu umaunai bovaikaikasi.

⁸ Luva komolona umaunai boluvaluva inoku sia kau ka emu luva bevavaia si'asi'a. Inoku oni devaivivimu kauta kataua bemalalai 'olana etai luva si'avana vaika beluvala 'abuna asi'i.

⁹ Da'alabi kauta bovaikaikasita dava boutai laloatai eta 'ola kauta leleta be'ika, nuata bevanama'inata mai eta luva tavata sia bevamueta.

¹⁰ Eta 'ola kauta kevatai sia bevinao beia dala boutai laloatai 'eva eta nama'ina mai lele ika koana bevala'asia, kanaua'i kau Dilava ita ivamaulita Dilavana ikabasina beula venia kula'ila.

*Keliso Ena Mue 'Udai Melalana
Ka'imala Laloanai.*

¹¹ Koakoa kataua boitai ekamia, 'olana Dilava ena iulaveni koana kanaua kau boutai bevamaulita iulavenina koana 'ani evala'asia.

¹² Iulaveni koana kanaua ita evaikabasita Dilava ivasi'avanana maulinai sia ekamauli mai kanobata iula venina vinalata si'avata vaika sia ekavavai, beia vapasisiai mai komoloai ekamia, mai Dilava ena ula maulina ekamauli vaia kanobata kanania laloanai.

¹³ Ita kanaua ekamia koma mai eta nuabata namana 'eva eta Dilava namana mai ivamaulita kauna Iesu Keliso ena mue 'udai melalana nuavina ka'imala laloanai.

¹⁴ Keliso sibona ena mauli eveni ita daitai inoku tavata eveni koa si'avata boutai laloatai eluvuta mai si'avana asi'i kautai evaota ia sibona ena umauta, kau ita nuata umautai ka'ula melala boutai nama'ina vinalata mo ekavavai.

¹⁵ Luva katania bovaikabasivai mai kau bovakula'ilata, maivaka eta mauilai dava desi'avana davatai maikula'ilamu bounai bovakomolota. Kau ka sia boikala vadai melo kikimuai beva aomu.

3

*Abiveni Kauta Beva'olu
Vinaula Nama'ita Ivavaitai.*

¹ Abiveni kauta bovalalotaune Kavamani kauta mai 'ola kauta eta siavu venutai bemimia, leleta daitai bedadai maivaka beva'olu vinaula nama'ita ivavaitai.

² Bo'outa kau ka kevanai sia beluva si'asi'a, nua'eluai bemimia, bemanau, mai koakoa nama'ita kau boutai kevatai bevavai.

³ Ana'inai ita vaka kabo'o, lele sia kaika, delebata kava'eva, mai kauani ena ula vinalata si'ava vaikata da'alata kabi kalalonama vaita. Mai eta mauli laloatai si'avana vinalata kavavai mai kamama, kau vaida devaivivita, mai ita ka ka vaka sibota kavaivivita.

⁴ Beia Dilava ita ivamaulita kauna ena koakoa nama'ina mai ena lalo'au dela'asi koanai,

⁵ ita evamaulita. Kanaua 'eva sia ita eta vinaula komolo 'ounai, beia ia sibona ena vilalo koanai evamaulita. Idume Kabukabunai evaidi'uta kapulu 'udai kau makamakatai kao evamaulita.

⁶ Dilava eta'u ena ainamai Idume Kabukabuna akatai esisia ivamaulita kauna Iesu Keliso dainai.

⁷ Kanaua 'ounai Dilava ena iulaveni koanai komolo evenita ia vilanai, inoku ita mauli keinikeini nuabatana kanuabata vaia maulina ekabia.

⁸ Vaikabasi kanania 'eva luva umauna, inoku lau a'ula oni boluva kula'ila vaia kau 'eva dava katania beikabasi. Inoku kau kataua Dilava deabivenia kauta 'eva be'imata kave'i vinaula nama'ita bevavai eta mauli laloatai. Katania 'eva dava nama'ita kau boutai beduluta.

*Koakoa Si'avata Vaika
Kevatai Boda'atau.*

⁹ Beia bo'o vialata, mai kubukama sisibata, mai Mose ena talavatu 'ounai devina 'o deviaku kauta kevatai boda'atau. Dava kataua 'eva anita asi'i mai kau ka sia bedulua.

¹⁰ Viloa ivavaina evapuluta kauna melala makavana mai ivaluana bo-vaidibala, kanaua mulinai 'eva bovikania 'avaea bevala'asia.

¹¹ Oni boikabasi kau kataua boita 'eva dala umauna devikania mai ia 'eva si'avana kauta, sibota eta si'avana detata'u devamomo'aita ia 'eva deva'eva.

Paulo Ena Ula Luvana Mai

Vanama'ina Luvana To'ona.

¹² Inoku lau Aletema 'o Tukiko basinia bevasi kevamu 'abumu beabia koanai, dala bokakavu boasi kaokao keva'u ua'i Nikapoli ai, 'olana lau nua'u 'ani avavaia kave'i ua'i bamimia 'elu melalana kanania laloanai.

¹³ Sena talavatu kauna mai Apolo ita boduluta eta kalima dalana bovavaia kave'i inoku ia dava boutai deula venita davata be'abi.

¹⁴ Eta kau ikabasi beabia eta maui'ai vinaula nama'ita bevavai vakaia kau kataua dava deula venita kauta beduluta. Inoku asi'i demamia 'avaea eta maui sia maivuata dema ao.

¹⁵ Kau nia'i keva'u'ai kauta boutai eta vanama'ina luvata desisini kevamu. Emai vanama'ina luvata eta kau boutai abiveni laloanai delalo'au venimai kauta kataua bovenita.

Ameamea Dilava ena iulaveni koana boumuiai kevamuiai bemimia.

Paulo Ena Malele PILEMONA Kevanai

Puka Laloana Ilelena Luvana

Pilemona 'eva kau namana ka, ia 'eva abiveni kauta Koloseai kauta elalo-vaita. Pilemona 'eva maiena da'ala abi kauna, ia vana 'eva Onesimo. Onesimo 'eva eveau 'akauma ena 'ola kauna kevanai, inoku eda'a vanua edeana ka laloanai emia. Vanua kanaua'i Paulo ita devidavali inoku elalo'udai. Melala kanaua'i Paulo 'eva vabuto'o 'abunai 'ounai Pilemona ita beluvaluva 'eva epasisi. Kanaua 'ounai malele kanania eleleia, inoku Onesimo evenia, ia betata'u beabia beda'a ena 'ola kauna bevenia.

Malele kanania laloanai, Paulo eta'u Pilemona eva'amea ena da'ala abi kauna beabidae mainuana nama'inanai. Mai e'ouia Onesimo 'eva 'ani elalo'udai ena mauili Lovia namana evenia. Paulo mainuana bounai Pilemona enoi vali'u melala kanania bedada'a laloanai Onesimo be'aea ia bo'akalana umauna.

Puka Iduvuna Namata

- a. Lova aku. (1-3)
- b. Vanama'ina Luvana. (4-7)
- c. Enoinoi Onesimo dainai. (8-22)
- d. Luva to'ona. (23-25)

Vanama'ina Luvana.

¹ Lau Paulo, Keliso Iesu dainai avabuto'o kau'u, mai bo'akalata Timoteo ita malele lai alelea evavasi Pilemona, emai kau ma'adi ita kavinaula ka'ona kaumu kevamu,

² mai lovuta Apia, Alekipo kakuali ka'ona kauna mai Dilava ena lo'e kauta na'i emu lumai oi odo'u ka'ona kauta boumuiai kele'emui.

³ Ameamea Dilava ita Kamata mai Lovia namana Iesu Keliso eta iulaveni koana mai nua'elu 'eva kevamuiai bemimia.

Pilemona Ena Lalo'au

Mai Abiveni.

⁴ Melala boutai e'u meamea ai oni alalovaimu mai e'u Dilava vanama'ina luvana avenia,

⁵ 'olana emu abiveni Lovia namana Iesu kevanai abivenina mai emu lalo'au Dilava ena kau kabukabuta kauta boutai kevatai lalo'auna valita 'ani aika.

⁶ Lau ameamea 'eva eta vikauai oni emu abiveni bevinaula kave'i laloanai dava nama'ita Keliso enai 'ani kabita davata kataua boutai boikabasita kave'i.

⁷ Kadi'u ma'adi e, emu lalo'au kanaua eta'u e'u lalonama evanamala vaika mai nua'u evakula'ilala vaika, 'olana bo'akalata Dilava ena kabukabu kauta nuata ova'elu 'ounai.

Paulo Onesimo

Dainai Enoinoi.

⁸ Kanaua 'ounai Keliso laloanai lau 'eva bamanua to'oto'o bamavasiasimu inoku vinaula komolona bomavavaia.

⁹ Beia alalo'au venimu 'ounai, kanaua sia bakoma ia anoimu. Lau Paulo vali'u 'ani amotu maivaka Keliso Iesu dainai avabuto'o kau'u,

¹⁰ naku'u Onesimo dainai lau oni anoimu, ia 'eva lau naku'uai eao uai' vabuto'o lumanai amia laloanai.

¹¹ 'Ana'inai 'eva ia ena nama'ina asi'i oni kevamuai, ia vali'u 'eva ena nama'ina 'ani namana eao oni mai lau kevatai.

¹² Lau 'eva ia asinia 'udai evavasi kevamu. Beia nua'u umaunai alalo'au venia kauna asinia.

¹³ Lau nia'i vali nama'ina dainai avabuto'o laloanai a'ula bama abi 'inia bemamia oni 'abumu bema abia lau bemadulu'u.

¹⁴ Beia lau sia dava ka bavavaia beda'amo oni boluva kave'i makava, inoku oni emu nama'ina ka lau keva'uai bovavaia, kanaua 'eva oni emu ulai bovavaia ia sia lau e'u vasiasi dainai bovavaia.

¹⁵ Onesimo 'eva melala kava'inamo evikanimu, viloamui e'alama 'ounai vali'u 'eva boabia 'udai kevamuai bemia vaika.

¹⁶ Ia 'eva sia da'alabi kauna boina, beia ia 'eva enama'ina vaika vakaia da'alabi kauta, ia 'eva bo'akalata lalo'auna, maivaka lau 'eva ia alalo'au venia, beia vali'u oni 'eva ia bolalovaia namavaikana, ia 'eva da'alabi kauna mai bo'akalata umauna Lovia namana enai.

¹⁷ Kanaua 'ounai, oni olalovaia lau emu kau umau'u koanai, Onesimo boabia dae kave'i itani lau oabi'u dae boina.

¹⁸ Ia oni kevamuai dava ka evasi'avanala 'o kevamuai dava ka eabia 'avaea koanai, dava kataua boutai 'eva lau va'uai bo'ule.

¹⁹ Lau Paulo luva kanania lau sibo'u ima'uai alelea. Tava vida 'eva boutai tavata baveni 'udai. (Ia oni adulumu dava odavalia davana lovana sia akua.)

²⁰ Kanaua 'ounai, kadi'u e, lau anoimu Lovia namana vanai e'u ula kanana bovavaia, Keliso laloanai nua'u bovamakamakala 'udai.

²¹ Lau malele kanania alelea 'eva aikabasi e'u noinoi kevamuai noinoina vinaulana 'ani bovavaia keini.

²² Mai lumai da'a'au daiutuna ka bovavaia kave'i lau e'u, 'olana e'u nua-bata Dilava enai 'eva emui meamea beabia dae inoku lau bavasi kevamu.

Vanama'ina Luvana To'ona.

²³ Lau bano'u ka Epafala, Keliso Iesu dainai laluanai lai avabuto'o ka'ona kauna ena vanama'ina luvana esinia oni kevamu.

²⁴ Maivaka Maleko, Alisitako, Dema, mai Luka, lau ita avinaula ka'ona kauta eta vanama'ina luvata desisini.

²⁵ Ameamea eta Lovia namana Iesu Keliso ena iulaveni koana 'eva oi idumemuai bemimia.

Malele 'EBELU Kauta Kevatai

Puka Laloana Ilelena Luvana

Puka kanania eleleia 'eva abiveni kauta vaidā kataua beduluta eta abiveni devikanita 'olana kau vaidā ia devabo'ota inoku adedua laloanai demia. Kanāua 'ounai puka kanania eleleia eta abiveni bevakula'ilala. Keliso mo sibona kevanai edaia Dilava ena dala umauta bevaikata.

Puka kanania dava namata koi lovata eakuta. Lava'ana'ina 'eva Iesu 'eva Dilava nakuna umauna. Iesu kanobatai emia laloanai, ia 'eva mekau doutamo ekoata, mai anaana namavaikata eabita inoku dala kanāua'i Dilava eta'u Iesu 'eva kau boutai iduluta kauna namānai evāoa (2.10). Kanāua 'ounai Iesu 'eva enolea kauta mai anelu mai Mose ekeinīta. Ivaluana 'eva Dilava sibona eta'u Iesu eabi isi kabukabu kaunai eao keinikeini. Ia 'eva kabukabu kauna namana vutuvutuai, ia 'eva kevanai edaia kau ia deabiveni dokadoka kauta bevamaulita. Mose ena koakoa mai ena talavatu lovata eaku. Kanāua 'eva Iesu dava evavaita kauna va'ava'ana vitaitana.

Puka kanania laloanai Isalaela kauta makavata kauta eta abiveni sisibata doutamo demimia (11), inoku kau eta abiveni evakulu'ilata. To'ona 'eva ia evakula'ilata adedua davadava kataua bedavalita, 'a ia 'eva eta abiveniai belava'ini beda'amo ba ai. Ia makata 'eva Iesu kevanai bemimia, ena dalai bedada'a, mekau mai anaana kataua 'eva eta abiveni sia beabia tau (12.1 - 12).

Puka Iduvuna Namata

- a. Lova aku: Keliso 'eva Dilava ivala'asina. (1.1 - 3)
- b. Keliso 'eva anelu ekeinīta. (1.4 – 2.18)
- c. Keliso 'eva Mose mai Iosua ekeinīta. (3.1 – 4.13)
- d. Keliso ena kabukabu vinalana ena namana. (4.14 – 7.28)
- e. Keliso ena luva'ana'i ena namana. (8.1 – 9.28)
- f. Keliso ena veniveni ena namana. (10.1 - 39)
- g. Abiveni 'eva dava namana. (11.1 – 12.29)
- h. Vasiasi luvana mai luva to'ota. (13.1 - 25)

Dilava Ena Luva

Nakuna E'outa.

¹ Siako vaika koanai Dilava eta'u enolea kauta nututai melala doutamo dala edeata edeatai 'ava'avata e'outa.

² Beia vali'u melala katania to'otai 'eva Nakuna nutunai ita e'outa. Dilava eta'u Nakuna dainai vutuvutu mai kanobata evavaita, ia eta'u Nakuna edilaia avuna davata boutai evenia ia ena.

³ Nakuna kanania Dilava ena nuavi 'amale 'amalena evala'asia, ia 'eva Dilava vitaitana umauna, ia ena luva siavunai dava boutai e'imata. Ia kau eta si'avana edeinita ovo mulinai vutuvutuai siavu boutai Dilavana idibana duasi 'olana iakuna 'abunai emia divo emia.

Dilava Nakuna 'Eva

Anelu Ekeinīta.

⁴ Ia 'eva anelu ekeinīta 'olana Dilava ia vana evenia vana 'eva anelu vata ekeinīta.

⁵ Dilava eta'u ia e'ouia ediaka,
"Oni 'eva lau Naku'u.
Vali'u melala kanania'i Lau oni

avapulumu,”

Sal 2.7

ia anelu sia ka kevanai kanaua eluva koma, mune'e ediaka,
 “Lau 'eva ia Kamanai ba'ao,
 ia vaka Lau Naku'u ai be'ao.”

2 Sam 7.14

⁶ Mai vaka Nakuna batani kauna esinia easi kanobatai koanai eluva ediaka,
 “Dilava ena anelu boutai
 'eva ia bekukudivo venia.”

Deu 32.43

⁷ Anelu lovata eaku ediaka,
 “Dilava ena anelu 'eva
 lani ai evaota, ena anelu vaid
 da'alana deabi aneluta 'eva
 'alova vulenai evaota.”

Sal 104.4

⁸ Ia Nakuna lovana eakuia ediaka,
 “Oni 'eva Dilava, emu
 lovia imia'auna bemia keinikeini,
 oni 'eva komolo ai emu vanua
 o'ola vaia.

⁹ Vinaula komolo oula venia,
 si'avana 'eva ovaivivia.
 Kanaua 'ounai Dilava emu Dilava
 eta'u lalonama deolonai esisimu
 emu lovia koana,
 vamu eabiaisai banomu vailatai.”

Sal 45.6, 7

¹⁰ Mai mune'e ediaka,
 “Lovia namana e,
 makavana umaunai kanobata
 'eva oni ovavaia, vutuvutu vaka
 oni imamuai ovavaia.

¹¹ Vutuvutu mai kanobata
 'eva betaule, beia oni 'eva
 bomia keinikeini,
 mai dava boutai bevuluvulu
 tubu'a 'ana'ina boina.

¹² Vutuvutu mai kanobata bolo'uta
 ikalu boina, ikata bedean
 tubu'a 'ana'ina boina.
 Ia oni 'eva 'abumuai mo,
 emu mauli vikauta 'eva
 sia be'ole.”

Sal 102.25-27

¹³ Sia melala ka Dilava anelu ka kanania e'ouia koma ediaka,
 “Idiba'u duasi miadivo
 beda'amo oni ivaivivimu kauta
 aemu palapalana ine'ena 'au
 davanai bava aota.”

Sal 110.1

¹⁴ Anelu 'eva dava? Ia boutai 'eva idume, Dilava da'alana deabi kauta,
 esinita vamauli beabia kauta beduluta.

2

Vamauli 'Eva Dava Namana.

¹ Kanaua 'ounai Nakuna valina luvana umauna 'ani kaika davana eka'imala kave'i, kanaua enai asi'i kama da'atau 'ounai.

² Dilava ena anelu nutunai 'ava'avamui e'outa luvata vaka siavu luvatai deao, vinalata sia devavai 'o sia deabi dae kauta 'eva mekau eva'olua mekauna dekoaia.

³ Vamauli 'eva dava namana, kanaua ekavasi'avanala koanai mekau be'asi mekauna kevanai ita a ekapode koma?

Vamauli kanania 'eva Lovia namana sibona 'ani e'ouia dae makava, inoku deika kauta deta'u devamomo'aia ita etai.

⁴ Dilava sibona vaka koa namata, vatabulovo vinalata, siavu vinalata edeata edeata eva la'asita, mai ia ena ula vitaitani Idume kabukabuna eveni ia sibota devamomo'aia.

*Iesu Be'ana'ia Vaita**Vamauli Laloanai.*

⁵ Dilava 'eva sia anelu edilata kanobata makamakana e'asi kanobatana kanaua be'ola vaia, kanobatana 'eva vali'u valina akakava kanania.

⁶ Puka kabukabuna laloanai 'abu ka kanania eleleia koma ediaka, "Dilava e, kau 'eva dava?

Inoku oni ia olalovai 'inia.

Kau nakuna 'eva dava?

Inoku oni ia o'imala kave'i.

⁷ Oni ota'u melala kava'inamo

ia ova'ovua anelu venutai,

beia mune'e oni ota'u nuavi

mai 'ola aku koana ova'olala.

⁸ Oni ota'u dava boutai

ia ena ikakao venunai

one'eta divo."

Sal 8.4-6

Dilava dava boutai ia ena ikakao venunai ene'etadivo 'eva ia betata'u dava boutai beika 'inita. Beia vali'u ita ka'ika 'eva dava boutai sia ia ena ikakao venunai boina.

⁹ Beia ita Iesu ekaikala, ia melala kava'inamo e'ovu anelu venutai, beia ba eanana vaia 'ounai Dilava eta'u nuavi mai 'ola aku koana 'olanai evadodoa. Ia ba aviavina eonovaia kau boutai daitai, ua 'eva Dilava ena iulaveni koana.

¹⁰ Dilava ena vinala 'eva ekomolo, ia 'eva dava boutai evavai mai eikata kao, nakuna doutamo ena nuavi laloanai bevada'ata dodo 'ounai eula Iesu beanana beva'olu kave'i, inoku nakuna doutamo be'asi ena nuavi laloanai bemimia. Iesu sibonamo be'ana'ia vaita vamauli laloanai.

¹¹ Kau eta si'avana edeini ovo kauna mai eta si'avana edeinita ovo kauta itana kamata 'eva ka'onamo. Kanaua 'ounai Iesu sia emalalai ia be'aeta bo'akalana.

¹² Ia eta'u Dilava e'ouia ediaka,

"Oni vamu ba'oua dae

bo'akala'u vailatai.

Eta do'u laloatai

oni vamu bavanama'inala."

Sal 22.22

¹³ Mune'e eluva ediaka,

"Lau 'eva Dilava abivenia."

Isa 8.17

Eluva 'udai ediaka,

“Lau kau'u nia mai
Dilava nakuna eveni'u kauta
'eva lau ita.”

Isa 8.18

Iesu Kau Ai Eao

Ita Beduluta.

¹⁴ Nakuna ekoma kauta kataua 'eva kau maividiota maivaka mailalata, Iesu sibona ia vitaitatai easi eta kauani maulinai emia, kanaua evavaia 'olana 'eva ena ba ai Diabolo ba e'ola vaia diabolona beva'ekoa,

¹⁵ maivaka da'ala deabi kauta eta mauli melalata boutai ba demakau vaia kauta beluvuta ovo.

¹⁶ Iesu easi 'eva sia anelu eduluta, ia easi 'eva Abela'amo 'ava'avana eduluta.

¹⁷ Kanaua 'ounai ia 'eva bo'akalana vitaitatai eao dala boutai laloatai, ia kabukabu kauna namanai be'ao mai ena vilalo mai ena vinaula komolo Dilava ena vinaula evavaia laloanai kau eta si'avana be'outa kao.

¹⁸ Ia sibona vikovo laloanai emia maivaka eanana 'ounai ia vikovo laloanai demimia kauta iduluta eikabasi.

3

Iesu 'Eva Mose Ekeinia

¹ Kanaua 'ounai bo'akala'u kabukabumui e, oi lai ita Dilava e'aeta ka'ona kaumui, Iesu oi bolalovaia kave'i, ia 'eva Dilava ena veauneke kauna maivaka kabukabu kauna namana eta abiveniai valina kakakava kauna.

² Mose Dilava ena luma laloanai evinaula kave'i vitaitana Iesu 'eva esinia Dilavana ena vinaula evavaia kave'i mainuana bounai.

³ Luma evavaia kauna 'olana deaku vaika vakaia luma kanaua, vitaitana Iesu 'eva nuavi namana beabia vakaia Mose.

⁴ Luma boutai mai ivavaita kauta, beia Dilava 'eva dava boutai evavaita.

⁵ Mose 'eva Dilava ena luma bounai laloanai da'alabi kaunai eao evinaula kave'i mainuana bounai, ia 'eva vilai Dilava dava be'oulai davata luvata eluva.

⁶ Beia Keliso 'eva Dilava Nakuna, ia Dilava ena luma e'ola vaia mainuana bounai. Ita melala bounai eka abiveni maikula'ilata eka nuabata venia mailalonamata koanai ita 'eva Dilava ena kau.

Dilava Ena Kau Eta Laani 'Abuna.

⁷ Kanaua 'ounai Idume Kabukabu kanania eluva koma,
“Vali'u melala kanania'i

Dilava lelana oi bo'ika koanai,

⁸ nuamui sia oi bovapisisita
itani melala kanaua kano'akunai
Dilava dekovoa laloanai
devakaunama boina.

⁹ Ua'i 'ava'avamui vikau vani navui
laloatai e'u vinaula deikata
beia dekovu'u mai devakovo'u.

¹⁰ Kanaua 'ounai ulu kanaua
abadu venia aluva adiaka,
'Nuata 'eva dau'ai vaika
'ounai e'u dala sia deikabasia.'

¹¹ Inoku abadu aluva'ana'i
pasisi adiaka,
'Ia 'eva e'u laani 'abunai

sia beda'adodo.' ”

Sal 95.7-11

¹²Bo'akala'u e, oi bo'imamui kave'i sia ka sibona nuana beabi si'ala sia ena abiveni ai beda'a ovo maui Dilavana beda'ala mulili.

¹³Puka kabukabuna eluvavaia ediaka 'vali'u melala kanania' 'eva ita eta melala, kanaua 'ounai melala boutai banomui ita nuamui oi bovakula'ilata, si'avana betata'u belebamui nuamui asi'i emavapasisita makauna.

¹⁴Eta abiveni kamakavala davana eka abi 'inia beda'amo to'onai 'eva ita Keliso itana kavinaula ka'ona kautai ekao.

¹⁵Puka kabukabuna kanania eluva koma,

“Vali'u melala kanania'i
Dilava lelana oi bo'ika koanai
nuamui sia oi bovapasisita
melala kanaua'i 'ava'avamui
devakaunama boina.”

Sal 95.7, 8

¹⁶Kau davata Dilava lelana de'ika beia devakaunama? Mose Aikupito ai evala'asita kauta kataua boutai.

¹⁷Dilava dai ebadu venita vikau vani navui laloatai? Kau kataua si'avana devavai kano'akunai de'eko deba palu kauta.

¹⁸Dai kevatai Dilava eluva 'ana'i pasisi venita ena laani 'abunai sia beda'adodo eko? Ua 'eva dai e'outa? Dilava lelana sia deda'avaia kauta kataua.

¹⁹Kanaua 'ounai ita 'ani kaikabasi ia eta abiveni asi'i 'ounai laani 'abunai sia deda'a dodo.

4

Ita Eka Kula'ila Laani

Abunai Ekada'adodo.

¹Dilava ena luva 'ana'i ai ita eta laani 'abunai eka da'adodo 'eva 'abunai mo, kanaua 'ounai ita eka'imata kave'i, sia ka be'eko laani 'abuna asi'i ema leala 'ounai.

²Ita vali nama'ina kaika, Isalaela kauta vaka luva 'ani deika. Beia kevatai luva de'ika luvana sia maiena nama'ina 'olana de'ika luvata sia deabiveni.

³Kanaua 'eva Dilava eluva vitaitana ediaka,

“Abadu aluva'ana'i pasisi adiaka,

'Ia 'eva e'u laani 'abunai

sia beda'adodo.' ”

Sal 95.11

Ia ita abiveni kauta 'eva ena laani 'abunai eka da'adodo. Vinaula kanania 'eva 'ani evaolea kanobata evavaia koanai.

⁴'Olana puka kabukabuna laloanai melala ivakalakoi kana luvana eluva ediaka, “Dilava ena vinaula boutai evaole vakaia melala ivakalakoi kanai lana eani.”

⁵Mune'e laani lovana eaku ediaka, “Ia 'eva e'u laani 'abunai sia beda'adodo.”

⁶Vali nama'ina deika makava kauta kataua eta lele ika asi'i 'ounai Dilava ena laani 'abunai sia deda'adodo. Beia vali'u vaidia 'eva ia ena laani 'abunai beda'adodo.

⁷Kanaua 'ounai melala vaidia 'ani deole mulitai Dilava eta'u melala ka eabia isi vana e'aeia “Vali'u melala kanania”, mune'e Davida nutunai melala kanaua valina ekava ediaka,

“Vali'u melala kanania,
Dilava lelana oi bo'ika koanai
nuamui sia oi bova pasisita.”

Sal 95.7, 8

⁸ Iosua laani 'abuna umauna bemavenita koanai Dilava 'eva muliai melala sia ka bema'oua.

⁹ Kanaua 'ounai kaikabasi Dilava ena kau lata be'ani melalana 'eva e'asi vitaitana melala ivakalakoi kana boina.

¹⁰ Dilava ena laani 'abunai 'ani deda'adodo kauta 'eva eta vinaulai lata de'ani vitaitana Dilava ena vinaula evaolea vakaia lana eani boina.

¹¹ Kanaua 'ounai ita 'eva ekakula'ila laani 'abuna kanaua'i eka da'adodo, Lele sia de'ika kauta kataua boitai sia ekao inoku kau ka laani 'abuna kanaua sia beleala.

¹² 'Olana Dilava ena luva 'eva emauli maivaka esiavu, e'ano vaika kualilepona makana aveke aveke de'ano lepona kanaua ekeinina, ia 'eva e'ano vaika beko sisita beda'amo nuata mai idumeta mai kulia ivataibouta mai kuliata, inoku kau eta lalovai lalovai mai eta ula boutai 'eva beva la'asita.

¹³ Kanobata davata ka Dilava vailanai sia bevuni kovo, dava boutai benoasi ia vailanai sia i'alavuta vakaia ita eta mauili boutai valita ekakava.

Iesu 'Eva Kabukabu Kauta

'Olatai Kauna Namana.

¹⁴ Ita 'eva mai eta kabukabu kauta 'olatai kauna namana ele'au eda'a vutuvutu, ia 'eva Iesu Dilava Nakuna. Kanaua 'ounai ita 'eva eta abiveni valina kakakava abivenina eka abi'inia.

¹⁵ Eta kabukabu kauna namana Iesu 'eva eta badebade 'abutai elalota, nia'i kanobatai emia koanai dekovioia dala edeata edeatai ita boita, beia ia kevanai 'eva sia si'avana ka.

¹⁶ Kanaua 'ounai maikula'ilata ekada'a iulaveni Dilavana ena mia'au abuna kevanai, kanaua'i vilalo namana ekabia mai iulaveni ekadavaliala, eta ula melalatai beduluta.

5

Iesu 'Eva Eta

Vamauli 'Olanai Eao.

¹ Kabukabu kauta namata boutai 'eva kau viloatai Dilava eabitaisi ena vinaula bevavaia kau daitai, ainama davata mai si'avana iabi ovota davata beveveni.

² Kabukabu kauna namana betata'u sia maieta ikabasi kauta mai va'eva devavai kauta belalota 'olana ia sibona vaka dala dounamoi ebade bade.

³ Ia sibona vaka ebade bade 'ounai, sia kau eta si'avana daitai mo, beia ia sibona ena si'avana iabi ovota davata vaka beveveni.

⁴ Kau ka sibona kabukabu kauna namana koana sia beabia beia Dilava betata'u be'aea kauna kabukabu koana beabia, vitaitana Alona e'aeia boina.

⁵ Dala vitaitanai Keliso vaka sibona kabukabu kauna namana koana sia eabia, beia ia evenia Dilavana e'ouia ediaka,

"Oni 'eva lau Naku'u.

Vali'u melala kanania

Lau 'eva Kamamuai 'a'ao."

Sal 2.7

⁶ Puka kabukabunai 'abu kai eluva ediaka,

"Oni 'eva kabukabu kaumu ai

bo'ao keinikeini

vitaitana Melikisedeki kabukabu

kauna namana boina."

Sal 110.4

7 Iesu kanobatai emia koanai ia ba ai bevamaulia Dilavana kevanai emeamea enoinoi e'ae'ae 'unu'unu ekani makana maiveina, inoku Dilava ia lelana eika 'olana sibona evakikia Dilava 'olana eaku vaika 'ounai.

8 Ia 'eva Dilava Nakuna, beia ena ana-ana Dilava lelana ikana eikabasia.

9 Kanaua'i eva'olu kave'i, ia lelana daitai dedadai kauta boutai eta vamauli keinikeini 'olanai eao.

10 Dilava eta'u Iesu kabukabu kauna namana ai evaaao Melikisedeki kabukabu vinalana evavaia kauna boina.

Sia Ekamiamo Melo Kikita Boita.

11 Melikisedeki ena vinala lovata lai ba'aku luvata 'eva dounamo, beia iluvata kave'i 'eva depasisi 'olana 'uluta oi bo'ika 'eva ovota sia 'ani oibovo.

12 Melala dau'adau'a oi oabiveni 'ani edaia, oi 'eva vaikabasi kaumui ai oi bo'ao, beia vali'u kau ka bemata'u Dilava ena luva umauna 'olana bemavaikabasimui 'udai. Oi 'eva itani bae de'inu do'o melota boita, iani pasisita ianitai asido'o oi okula'ila.

13 Kau ka bae e'inu do'o kauna 'eva melo kikina, 'olana ia 'eva komolo luvata sia eikabasita.

14 Iani pasisita 'eva kau namata eta, ia 'eva nuata dekomolo nama'ina mai si'avana koata 'ani deikabasita.

6

Dilava Enai Ekakula'ila Mai Ekavi'ima.

1 Kanaua 'ounai ita kakula'ila vaila kada'aia Keliso ena vaikabasi kula'ilana kabia, beia abiveni vaikabasita lava'ana'ita abivenita etai sia ekamiao. Katania 'eva ba vinalatai kalalo'udai inoku Dilava kabivenia,

2 vaidi'u kabukabu vaikabasina mai akatai ima deka'au, maivaka ba ai ko'isi 'udai vaikabasina mai mia keinikeini lavuaina, sia ekamue vaikabasi katania 'olatai.

3 Dilava be'ula koanai ita 'eva vaila ekada'ala vaikabasi kula'ilana enai.

4 Ia 'ana'inai Dilava nuata eva'aialata, vutuvutu ainamana deonovaia, Idume Kabukabuna ita devinaula ka'ona kauta kataua 'eva sia 'ani belalo'udai bedaia.

5 Dilava ena luva nama'ina deikabasia mai Dilava ena siavu vilai be'asi davana vaka deonovaia,

6 inoku Keliso enai de'eko detaule kauta belalo 'udai melala ivaluana bemakamaka 'eva sia bedaia, 'olana ia 'ani imatai Dilava Nakuna au ido'o valaukuna akanai dekoioia 'au 'udai kau vilatai devamalalaia.

7 Vitaitana itani kano kanaua akanai melala doutamo lamu eaku, iani nama'ita evapuluta devinaula kauta eta, kano kanaua 'eva Dilava ena vanama'ina beabia.

8 Beia kano kanaua akanai 'iniauma mai ava 'ini'inita dekubu koanai ia sia mai ena nama'ina ka, Dilava ia 'ani besivadala 'alovai beani palu.

9 E'u lalo'au kaumui e, kanaua lai aluva pasisi venimui koma, beia lai aikabasi dokadoka oi 'eva sia kanaua boina, vanama'ina nama'ina beda'a vaimui vamauli 'abunai.

10 Dilava 'eva sia kau ka enai e'au, emui vinala oi ovavai mai emui lalo'au ia vanai 'ani oi ovala'asi ena kabukabu kauta oi odoluta vali'u vaka oi odoluta kauta sia bebolabolata.

11 Lai aula vaika oi boumuiai vinala kanaua'i oi bokula'ila beda'amo to'onai dava oi onuabata venia davana oi boabia.

12 Oi sia bobalea, eta abiveni mai eta vapasisi daitai Dilava eluva'ana'ivai davata deabi kauta boitai oi bo'ao.

*Ekabiveni Dilava Ena**Luva'ana'i Dainai.*

¹³ Dilava eta'u Abela'amo kevanai eluva'ana'i koanai sia kau ka Dilava akanai ekeini 'ounai ia sibona vanai luva'ana'i pasisina evavaia,

¹⁴ ediaka, "Lau oni bavanama'inamu umauna, inoku ava'avamu bavad-outamota."

¹⁵ Inoku Abela'amo evi'ima maivapasisina eda'amo Dilava eluva'ana'i davana eabia.

¹⁶ Kau ka luva'ana'i pasisina bevavaia koanai, ia akanai kauna vanai luva'ana'i pasisina kanaua bevavaia inoku luva'ana'i pasisina kanaua betata'u ena luva bevamomo'aia ia eta viala bevapuala.

¹⁷ Vitaitanai, Dilava eula bevamomo'aia ena luva'ana'i 'eva bemomo'ai ena luva'ana'i davata be'abi kauta kataua kevatai, mai vaka eula kau kataua beikabasi ia ena lalovai vailai lalovaina sia beva edeanala, kanaua 'ounai ia luva'ana'i pasisina evavaia.

¹⁸ Dilava 'eva sia ededede 'ounai ena luva luana katania luva'ana'i mai ena luva'ana'i pasisina 'eva sia bevaedeanata, inoku ita da'a'au kauta kasi Dilava kevanai kauta 'eva vakula'ila namavaikanai ekalava 'ini vailatai e'asi davana ekanuabata vaia.

¹⁹ Nuabata kanania kabia nuabatana 'eva vitaitana do'o boina eta maui ai, ekula'ila evalava 'inita bevada'atadodo vutuvutu lo'e kabukabunai lalao ikekeavuna tubu'anai beva da'ata keini beda'amo ekabukabu vaika 'abuna laloanai.

²⁰ Ita daitai Iesu e'ana'ia eda'adodo ua'i kabukabu kauna namanai eao keinikeini, vitaitana Melikisedeki kabukabu vinaulana evavaia boina.

7*Melikisedeki Lovia 'Olana**Mai Kabukabu Kauna Namana.*

¹ Melikisedeki kanania 'eva Salema lovia 'olana mai vaka aka umau umauna Dilavana ena kabukabu kauna. Abela'amo ekuali vanua loviata eaku bata emue laloanai devidavali, Melikisedeki eta'u Abela'amo evanama'inala.

² Abela'amo eta'u kualo laloanai eabita davata boutai 'ouka laloatai ka ka Melikisedeki evenia. Melikisedeki vana anina 'eva 'vinaula komolo lovia 'olana', mune'e vana Salema lovia anina 'eva 'nu'elu lovia 'olana'.

³ Melikisedeki 'eva kamana asi'i sinana asi'i, ena iduvu asi'i, aida epulu aida eba sia kaikabasi, ia sisibana asi'i, ia 'eva vitaitana Dilava Nakuna boina, kabukabu kaunai emia keinikeini.

⁴ Melikisedeki kanaua oi bolalovaia, ia a e'aida 'aida koma! Ita 'ava'avata Abela'amo kualo ai dava nama'ita 'ouka eabi, 'ouka laloatai ka ka ia evenia.

⁵ Levi iduvuna kauta kataua 'eva kabukabu kauta namatai deao, 'ounai talavatu ai eluva ediaka, Abela'amo 'ava'avana Isalaela kauta eta dava boutai 'ouka, 'ouka laloatai ka ka boakalata Levi iduvuna bevenita.

⁶ Melikisedeki 'eva sia Levi iduvuna kauna, beia Abela'amo kevanai ena dava boutai 'ouka, 'ouka laloatai ka ka eabita inoku ia eta'u Abela'amo Dilava ena luva'ana'i eabia kauna kanaua evanama'inala.

⁷ Ita kaikabasi vanama'ina namavaikana eabia kauna betata'u vanama'ina kikina vaika eabia kauna bevanama'inala.

⁸ Kabukabu kauta 'eva kau eta dava 'ouka, 'ouka laloatai ka ka deabita, Melikisedeki vaka Abela'amo ena dava 'ouka, 'ouka laloatai ka ka eabita, kabukabu kauta 'eva bebaba, beia Melikisedeki 'eva emia keinikeini Puka kabukabunai eluva vitaitana.

⁹ Kania kamaluva koma, Levi kauta kau eta dava 'ouka, 'ouka laloatai ka ka deabita, ia Abela'amo ena dava 'ouka, 'ouka laloatai ka ka Melikisedeki evenia laloanai Levi ena iduvu kauta vaka eta dava 'ouka, 'ouka laloatai ka ka deveni boina.

¹⁰ 'Olana Melikisedeki Abela'amo ita devidavali koanai Levi 'eva asido'o epulu ia 'ava'avana Abela'amo kaunai emia.

Iesu Vitaitana Melikisedeki.

¹¹ Dilava Isalaela kauta talavatu evenita Levi iduvuna kauta kabukabu vinaulana bevavaia. Ia Levi iduvuna kabukabu vinaulana devavai kave'i beia vinaula kanaua 'eva kau sia devakomolota Dilava vailanai 'ounai kabukabu kauna edeana ka bela'asi bevinaula itani Melikisedeki boina, ia sia Alona boina.

¹² Kabukabu kauta eta vinaula bevadeanata 'eva talavatu vaka bedeana.

¹³ Kanaua lovana kakua kauna 'eva iduvu edeana kauna, sia Levi iduvuna kauna, iduvu kanaua laloanai 'eva kau ka vaka kabukabu vinaulana sia evavai kovo.

¹⁴ Inoku 'ani kaikabasi kave'i eta Lovia namana 'eva Iuda iduvunai epulu, beia Mose kabukabu kauta ka iduvu kanaua'i sia e'ouia.

¹⁵ Dava ka'oua davana 'ani kaikabasi kave'i 'olana kabukabu kauna ka 'ani evaila, ia 'eva Melikisedeki boina.

¹⁶ Ia kabukabu kaunai eao 'eva sia kau eta talavatu 'o eta dalai, ia maui siavunai emia to'ona asi'i.

¹⁷ Puka kabukabunai kanania eluva koma, "Oni 'eva kabukabu kaumuai omimia beda'amo bomia keinikeini, Melikisedeki kabukabu vinaulana evavaia boina."

Sal 110.4

¹⁸ Inoku talavatu 'ana'ina 'ani deabia ovo, 'olana ia 'eva ebadebade mai vaka ena vinaula asi'i.

¹⁹ Mose ena talavatu ai kau sia evakomolota Dilava vailanai. Kanaua 'ounai Dilava eta'u nuabata nama'ina ka ita evenita nuabatana kanaua 'eva talavatu ekeinina, kanaua'i ita kadada'a Dilava kevana.

²⁰ Mune'e Dilava mai ena luvana'ana'i pasisinai Iesu kabukabu kaunai evaoa. Levi iduvuna kauta kataua 'eva sia Dilava ena luvana'ana'i pasisinai kabukabu koutai deao.

²¹ Ia Iesu kabukabu kaunai eao 'eva Dilava ena luvana'ana'i pasisinai. Dilava kanania eluva koma, "Lovia namana 'eva ena luvana'ana'i pasisina evavaia ia ena luvana'ana'ia beva edeana, 'Oni 'eva kabukabu kaumuai omimia beda'amo bomia keinikeini.' "

Sal 110.4

²² Kania boina Iesu 'eva luvana'ana'i namana kanania ivamomo'aina kaunai eao, luvana'ana'i kanania 'eva luvana'ana'i namana 'ana'ina ekeinina.

²³ Kabukabu kauta 'eva doutamo 'olana ia deba eta vinaulai sia demia keinikeini.

²⁴ Ia Iesu 'eva bemia keinikeini, ena kabukabu vinaulana 'eva sia beda'a kau ka kevana.

²⁵ Ia emia keinikeini maivaka ita daitai ia Dilava enoia 'ounai, ia vanai Dilava kevana beda'ala kauta boutai bevamauli paluta.

²⁶ Iesu kanania 'eva kabukabu kauna namana eta lula boutai eikabasi. Ia 'eva ekabukabu, va'eva 'o si'avana ka ia kevanai asi'i, ia 'eva si'avana kauta etai iabina tau ia ele'au eda'amo vutuvutu akana umaunai.

²⁷ Ia 'eva sia kabukabu kauta kataua vitaitata, kabukabu kauta ka ka 'eva melala boutai sibota eta si'avana i'ou kaota vinaulata bevavai makava mulinai kau eta si'avana i'ou kaota vinaulata bevavai. Ia Iesu 'eva kanaua sia bekoma, 'olana ia sibona ena maui eveni si'avana iabi ovona davanai eao, ia melala ka'onamoai vinaula kanaua itoina evaolea.

²⁸ Mose ena talavatu eta'u kau eabita isi kabukabu kautai deao, beia debadebade, ia Dilava ena luva'ana'i pasisina talavatu mulinai e'asi luva 'ana'inana pasisina kanaua eta'u Dilava Nakuna eabia isi 'ani eva'olua kave'i kabukabu kauna namanai eao mai ia 'eva bemia keinikeini.

8

Iesu 'Eva Ita Eta Kabukabu Kauna Namana Vutuvutu Ai.

¹ Lau aluvavai luvata anita 'eva katania, ita maieta kabukabu kauna namana kanania boina kauna ka emimia. Ia vutuvutuai siavu Dilavana ena mia'au 'abuna idibana duasi i'olaku vaina 'abunai 'ani emia'au.

² Ia 'abu kabukabuna umaunai kabukabu kauna namana ena vinaula evavaia, lo'e umauna kanaua 'eva sia kau devalavala, Lovia namana Dilava eta'u evalavala.

³ Kabukabu kauta namata boutai deabita isi 'eva ainama davata mai veniveni davata beveneni Dilava kevanai, kanaua 'ounai eta kabukabu kauna namana kanania vaka dava ka beveneni.

⁴ Iesu kanobatai bemamia koanai ia kabukabu kaunai sia bemaio, 'olana kabukabu kauta demia ia deta'u ainama davata deveni Mose ena talavatu vitaitanai.

⁵ Kabukabu kauta eta vinaula 'eva vutuvutuai devavaia vinaulana vitaitana umauna va'ava'ana koana boina, vinaula kanaua 'eva vitaitana Dilava Mose e'ouia pasisi lo'e kabukabuna evalavala boina ediaka, "Bo'ika, loloai avaikamu davata boutai ikaikata vitaitata umaui bovavai."

⁶ Beia vali'u Iesu kabukabu vinaulana eabia 'eva kabukabu kauta eta vinaula ekeineta, 'olana ia luva'ana'i namana kanaua vaka'ona kaunai eao, luva'ana'i namana kanania 'eva kena enama'ina vakai luva'ana'i namana 'ana'ina, 'olana ua 'eva luva'ana'i nama'ita vaika akatai evalavala.

Luva'ana'i Namana Makamakana 'Eva 'Ana'ina Ekeineta.

⁷ Luva'ana'i namana lava'ana'ina itoinai bemanama'ina koanai, ivaluana sia kamaua venia.

⁸ Beia Dilava ena kau kevatai va'eva eikaia 'ounai e'outa ediaka, "Lau, Lovia namana Dilava, aluluva, Melala 'ani e'asi, luva'ana'i namana makamakana bavavaia Isalaela kauta kevatai maivaka Iuda iduvuna laloanai.

⁹ Lau, Lovia namana Dilava, aluluva, Luva'ana'i namana kanania 'eva sia ia 'ava'avata ita aluva'ana'i luvana boina, ia imatai abi Aikupito kanonai avala'asita koanai.

Ia e'u luva'ana'i namana sia deabivenia 'ounai lau vaka leleta sia aika."

¹⁰ Lau, Lovia namana Dilava, mune'e aluluva,

Kanaua mulinai luva'ana'i
 namana kanania 'eva Isalaela
 kauta kevatai bavavaia.
 Lau e'u talavatu ia nuatai
 bane'ea divo mai
 ia nuata 'otoitai baleleta.
 Lau 'eva ia eta Dilava ai ba'ao,
 ia 'eva lau e'u kau ai be'ao.
¹¹ Sia kau ka bo'akalana 'o
 kevanai kauna bevaikabasia
 bediaka,
 'Lovia namana boikabasia'.
 'Olana kikinai eda'amo
 namana koana boutai
 'ani beikabasi'u.
¹² Eta va'eva vinalata laloatai
 balalota inoku eta si'avana
 babolabolata."

Ier 31.31-34

¹³ Dilava luva'ana'i namana makamakana eluvavaia koanai, lava'ana'ina kanaua 'eva 'ana'inai evaoa, inoku dava e'ana'ia mai evuluvulu davana 'eva betaule.

9

Luva'ana'i Namana 'Ana'ina.

¹ Luva'ana'i namana lava'ana'ina 'eva maiena kukudivo talavatuta mai kukudivo 'abuna, 'abu kanaua 'eva nia'i kanobatai kau imatai devavaia.

² Aiole devalavala inoku dekekeia avu laloana lua, laloa makavana vana de'aeia Kabukabu 'abuna. Kabukabu 'abuna laloanai 'eva lamepa ivalavana 'abuna ka maivaka vakavaka kikina ka, akanai veniveni palaoana kabukabuna dene'eiadivo Dilava ena.

³ Ikekebili tubu'ana ivaluana laloana duasi 'eva de'ouia Ekabukabu vaika 'abuna.

⁴ 'Abu kanaua laloanai 'eva vaka kabukabuna ka koloai ivavaina akanai mulamula bonana nama'ina de'abua, maivaka luva'ana'i namana papa'ona ka kauanina itoinai koloai i'alavuna, papa'o laloanai 'eva kolo olakana ka laloanai mana deudaia manana mai 'Alona ena ikoko'a kanaua 'ana'inai uauana dedimu dela'asi davana mai bika'a palapalata lua akatai talavatu deleta bika'ata.

⁵ Papa'o i'alavuna akana 'eva de'ouia Si'avana i'ou kaona 'abuna, Dilava ena nuavi anelu vitaitata boita lua vata Kelubi, vanitai 'abu kanaua depaka bubua. Beia vali'u dava katania boutai sia ba'oulai kave'i.

⁶ Dava kataua kanaua deva'oluta koma, inoku melala boutai kabukabu kauta laloa makavana laloanai deda'adodo eta vinala devavaita.

⁷ Beia kabukabu kauna namana sibona mo vikau ka laloanai melala ka'onamo mo laloa ivaluana laloanai eda'adodo, sia imana 'avaeana eda'adodo, ia lala eabia edodo vaia ia sibona ena si'avana daitai maivaka kau sia deikabasi ia si'avana devavaia kauta 'ounai.

⁸ Dava kataua'i Idume Kabukabu 'ani evaikabasita kave'i, kabukabu 'abuna makavana elalava do'o laloanai beda'a ekabukabu vaika 'abuna dala dodona 'eva asido'o eluvu.

⁹ Dava katania 'eva vali'u melala kanania ivavitaitata boita. Dala kanaua'i ainana davata mai veniveni davata deveveni Dilava enai, beia dava kataua'i kukudivo kauta nuata 'otoita sia bevakomolo dokadoka.

¹⁰ Ua 'eva aniani davata ia inuinu davata mai idi'u koakoata, kauani ena talavatu 'avaeata, ia bevinaula beda'amo Dilava dala bevamakamakala 'udai melalanai.

Luva'ana'i Namana Makamakana.

¹¹ Beia vali'u Keliso 'ani easi depulu davata nama'ita eta kabukabu kauna namanai eao, Aiole kanaua enama vaika mai enama'ina vaika lo'ena laloanai eda'adodo, ua 'eva sia kau imatai devavaia maivaka sia kanobata ena.

¹² Keliso lo'e laloanai eda'adodo koanai, sia nani 'o bolomakau nakuta lalata eabi, ia sibona ena mauli eveni lalanai ekabukabu vaika 'abuna laloanai melala ka'onamo mo eda'adodo, ita daitai ua'i vamauli keinikeini vinalana evaolea.

¹³ Kau Dilava vailanai de'obu koanai, nani ia bolomakau lalata mai bolomakau nakuta 'alovai de'abutauku lavutai kau dekapolaita, inoku kauanita Dilava vailanai demakamaka mai dekabukabu.

¹⁴ Ua 'eva luva umauna beia Keliso lalana 'eva kataua ekeineta. Keliso 'eva sia mai ena si'avana 'o sia mai ena va'eva ka, ia mia keinikeini Idumena Kabukabuna ena viduluai sibona ena mauli veniveni davanai evaoa Dilava evenia. Keliso lalana kanaua 'eva ita nuata bevamakamakala, koa sia mai anita kataua kevatai ekalavatau ekada'a mauli Dilavana ena vinala ekavavaia.

Keliso Lalanai Luva'ana'i Namana Makamakana Evamomo'aia.

¹⁵ Kanaua 'ounai Keliso 'eva vaka'ona kaunai eao luva'ana'i namana makamakana bevakula'ilala. Ia kau eta si'avana luva'ana'i namana 'ana'ina laloanai demia si'avana devavaita kataua beluvuta 'ounai eba, inoku Dilava e'aeta kauta 'eva Dilava eluva'ana'i vaia avuta beabia keinikeini.

¹⁶ Bebaba kauna ena ula luva'ana'ina 'eva sia bevinaula beda'amo ena ba bevamomo'aia mulinai ula luva'ana'ina kanaua 'eva bevinaula vaia.

¹⁷ Ula luva'ana'ina 'eva eluva'ana'i vaia kauna bebaba vakaia luva'ana'i siavuna bevinaula, beia ia sia eba mauli do'o emimia laloanai luva'ana'i kanaua 'eva sia maisiavuna.

¹⁸ Kanaua 'ounai luva'ana'i namana lava'ana'ina vaka ba lalanai luva'ana'i siavuna evinaula.

¹⁹ Lava'ana'ina Mose eta'u kau boutai kevatai talavatu luvana evaikabasita, kanaua mulinai bolomakau nakuta lalata mai nani lalata vei ita eabi ka'ona, mamoe vuina 'aolana mai nopa uauana ita eabita eudauku, talavatu pukana mai kau boutai akatai esibulaita.

²⁰ Inoku ediaka, "kanania 'eva luva'ana'i namana lalana, Dilava e'oumui oi boabi'inia."

²¹ Dala vitaitanaimo Mose lo'e kabukabuna akanai maivaka kabukabu vinalana devavai davata boutai akatai vaka lalai esibulaita.

²² Mose ena talavatu vitaitanai 'eva lala betata'u dava doutamo bevamakamakata, inoku lala sia be'itabu'itabu koanai si'avana sia i'oukao be'ao.

²³ Lo'e laloanai davata katania 'eva vutuvutu davata ivavitaitata mai dala kanaua boinai bevamakamakata, beia vutuvutu davata umauta 'eva veniveni nama'ina umaunai bevamakamakata.

²⁴ Keliso 'eva sia kau imatai 'abu kabukabuna devavaia 'abuna laloanai eda'adodo, 'abu kanaua 'eva 'abu kabukabuna umauna ivavitaitana, ia ita

beduluta 'ounai 'abu kabukabuna umauna vutuvutu akanai 'abuna laloanai eda'adodo eda'a Dilava vailanai evailaasi.

²⁵ Vikau ka ka laloatai 'eva kabukabu kauta namata sisi lalata deabi deda'a ekabukabu vaika 'abunai deda'adodo. Beia Keliso 'eva sia melala doutamo vutuvutuai eda'adodo veniveni davanai eao sibona evenia 'udai 'udai.

²⁶ Kanaua bemako koanai, kanobata eabi lamala koanai easimo vali'u Keliso 'eva melala doutamo bemaanaana. Beia Keliso melala ka'onamo evailaasi melala katania to'otai, sibona veniveni davanai eao si'avana iabiovotai.

²⁷ Kau boutai 'eva melala ka'onamo mo bebaba, mulinai Dilava bevalu-vata.

²⁸ Dala vitaitanai Keliso 'eva melala ka'onamo mo veniveni davanai eao kau mato eta si'avana beabiovo. Ia melala ivaluana bevailaasi 'eva de'imala kauta bevamaulita 'ounai, ia sia si'avana iabiovota 'ounai be'asi.

10

Keliso Kauanina Melala Ka'onamo

Ita Boutai Daitai Eveni.

¹ Mose ena talavatu 'eva dava nama'ina vailai be'asi davana va'ava'ana, sia dava umauna. Talavatu dalanai kau eta si'avana iabiovota davata vikau ka ka vitaitata deveni, beia dava kataua 'eva Dilava kevanai de'asi bekukudivo kauta sia bevakomolota kave'i.

² Veniveni kanania bemata'u Dilava dekukudivo venia kauta eta si'avana melala ka'onamoai bemavamakamakata koanai, ia sibota bemaikabasi eta si'avana 'ani deole, inoku si'avana iabita ovo davata sia bemaveni 'udai.

³ Beia si'avana iabita ovo davata kataua deveni 'eva vikau ka ka laloatai ia eta si'avana delalovaita 'udai.

⁴ Olana bolomakau mai nani lalata 'eva si'avana sia beabita ovo.

⁵ Kanaua 'ounai Keliso easi kanobatai koanai ia Dilava e'ouia ediaka, "Veniveni davata maivaka kabukabuna davata sia oulda venita.

Ia kauani ka ova'olua lau e'u.

⁶ Oni veniveni davata 'alovai detouta venivenita mai si'avana iabita ovo davata sia olalonama vaita.

⁷ Inoku lau aluva adiaka, 'Dilava e, Lau kau'u nia, 'ani asi, talavatu pukanai vali'u deleleia vitaitanai oni emu ula vinalana bavavaia.' "

Sal 40.6-8

⁸ Keliso eluva makava ediaka, "Vakabukabu davata, ainama davata, veniveni davata 'alovai detouta davata, mai si'avana iabiovota davata oni sia oulda venita, sia olalonama venita." (Kataua 'eva Mose ena talavatu ena ula 'ounai deveni.)

⁹ Mulinai eluva ediaka, "Dilava e, Lau kau'u nia, 'ani asi, oni emu ula vinalana bavavaia." Ia 'eva vakabukabu dalana lava'ana'ina eabia tau ia ivaluana evalavala.

¹⁰ Iesu Keliso eta'u Dilava ena ula vinalana evavaia, ia sibona kauanina melala ka'onamoai ita boutai daitai evenia veniveni davanai eao, kanaua'i ita 'ani evakabukabuta.

11 Melala boutai kabukabu kauta boutai delalava inoku eta kabukabu vinaulata devavai, veniveni davata ka'oka'omo kataua deveni 'udai veni 'udai, ia veniveni davata kataua 'eva si'avana sia beabita ovo.

12 Beia Keliso eta'u melala ka'onamoai veniveni davanai eao si'avana iabitaovo 'ounai, veniveni kanaua 'eva evinaula beda'amo to'ona asi'i. Inoku ia Dilava idibana duasi 'olana iakuna 'abunai 'ani emia divo.

13 Kanauai ia evi'ima beda'amo Dilava betata'u 'ou kauta bevuata be'asi Keliso aena palapalana venunai.

14 Ia veniveni davana ka'onamoai eta si'avanai evakabukabuta kauta kataua bevakomolota kave'i beda'amo to'ona asi'i.

15 Idume Kabukabu vaka 'ani sibona vali kanania ita e'outa. Lava'ana'ina eluva ediaka,

16 "Lovia namana 'eva eluluva,
Melala kanaua mulinai
Lau e'u luva'ana'i namana
kevatai bavavaia 'eva kanania.
E'u talavatu ia nuatai bane'ea divo
mai ia nuatai balelea."

Ier 31.33

17 Mune'e ediaka,
"Lau ia eta si'avana mai
eta va'eva babolabolata."

Ier 31.34

18 Inoku si'avana mai va'eva kataua 'ani e'ou kao 'ounai si'avana iabita ovo davata venivenina 'eva anina asi'i.

Ita Ekaabiveni Umauna Dilava Kevanai Ekada'a.

19 Bo'akala'u e, kanaua 'ounai ita Iesu eba lalanai kula'ila ekaabia ekabukabu vaika 'abuna lalananai ekada'adodo.

20 Iesu kauanina eba 'eva iveli keini tubu'ana e'idia vakaia dala makamana mai mauli eluvuia ita 'outai.

21 Ita 'eva maieta kabukabu kauna namana ka Dilava ena kau e'ola vaita.

22 Nuatai ia lalana eito kapokapo 'ounai nuata umaunai si'avana kanaua 'ani eabia ovo, kauanita vaka vei anevanai 'ani edeinita kave'i, kanaua 'ounai vali'u ita Dilava kevana ekada'ala mainuata umaunai maivaka ma-iabivenita sia ekabaoa.

23 Dilava ena luva'ana'i 'eva bevamomo'aia 'ounai, ita eta nuabata ka'ouia nuabatana ekaabi'ina.

24 Banota ia ekalalovai lalovai ka'ona, ka ka ekavakula'ila viveni, eta lalo'au ekavaikata, mai nama'ina vinaulata ekavavai.

25 Vaida lo'e do'una vinaulata dekauba'oa kauta eta koakoai sia ekaao, beia banota ekavakula'ilata do'u vinaulana eka vanamala Lovia namana ena melala be'asi kevata kauna kaikala lalananai.

Dilava Nakuna Sia Ekada'ala Mulili.

26 Ita Keliso valina 'ani kaikabasia umauna mulinai eta ula ai si'avana ekavavai basibasi koanai, si'avana kataua iabita ovo veniveni davana edeana sia ka emimia.

27 Ia dava muliai bepupulu ekamakau vaia davana 'eva valuva namana mai 'alova si'avana Dilava devaiviivia kauta bevaoleta.

28 Kaikabasi kau ka Mose ena talavatu eukua sia eabia dae koanai i'ou daena kauta lua 'o koi devamomo'aia vakaia kau kanaua va'eva kaunai e'ao deaku bala sia delalaoa.

²⁹ Kau ka etata'u Dilava Nakuna aena venunai elavamudu lavamudua koanai, ia etata'u luvu'ana'i namana lalana ia evakabukabua kauna dava 'avaeanai evaaoa, mai Dilava ena vilalo koana evuata e'asi Idume Kabuk-abuna kevanai eluva si'asi'a venia kauna, kau kanaua ekalalovaia ena mekau bekoala 'eva a benama koma!

³⁰ Ita kaikabasi Dilava 'eva kanania eluva koma ediaka, "Tava veni 'eva e'u vinaula, lau batata'u tavana bavamuea." Mune'e ediaka, "Lovia namana betata'u ena kau bevaluvata."

³¹ Inoku ekada'a maui Dilavana imana laloanai ekaenouda 'eva dava si'avana umauna!

³² Melala makavana a oi okoma melalana oi bolalovaia. Dilava ena 'ailala oi odavalia mulinai anaana doutamo oi oabi beia oi 'eva oi ovakula'ila.

³³ Melala vaida kau vailatai devabo'omui mai devaiviivimui, maivaka melala vaida anaana kataua boita deabi kauta oi oduluta.

³⁴ Vabuto'o lumanai de'alavuta kauta oi oduluta, maivaka vaida deta'u emui lavo deabi koanai oi ovapasisi mailalonamamui, 'olana oi oikabasi emui lavo nama'ita umauta 'eva bemia keinikeini.

³⁵ Kanaua 'ounai emui lalovai kula'ilana sia oi bovikania. 'Olana kanaua'i tavana namana oi boabia.

³⁶ Oi 'eva bovapasisi 'olana Dilava ena ula vinaulana oi bovavaia mulinai eluva'ana'i vaia davana oi boabia.

³⁷ Puka kabukabunai Keliso lovana eakuia ediaka,

"Melala kava'inamo

ia sia bedau'a,

ia be'asi kauna 'eva be'asi,

ia sia bemaka'i.

³⁸ E'u vinaula komolo kauna

'eva abiveniai bemaui.

Ia beda'a'u mulili koanai

lau ia sia balalonama venia."

Hab 2.3, 4

³⁹ Ita 'eva sia deda'a mulili mai detaule kauta kataua boita, ita 'eva maiabivenita vamaui ekaabia.

11

Abiveni 'Eva Dava?

¹ Eta abiveni etata'u kanuabata davata evuata e'asi dava umautai de'ao, sia ka'ika davata dava umautai evaaota.

² Kau 'ana'ita vaka abiveni kanania 'ounai Dilava eta'u evamomo'aita.

³ Abiveniai ita kaikabasi vutuvutu mai kanobata davata boutai 'eva Dilava ena luvai depulu, inoku kaikabasi ka'ika davata 'eva sia kaikata davata kevatai deasi depulu.

Abela, Enoka Mai Noa

Eta Abiveni.

⁴ Abiveniai Abela 'eva veniveni davana nama'ina Dilava evenia Kaino ena veniveni davana ekeinai, inoku ena abiveni 'ounai Dilava eta'u Abela ena veniveni davana eabiadae maivaka vinaula komolo kaunai evaaoa. Ia eba, ia ena abiveniai ia 'eva eluluva do'o.

⁵ Abiveniai Enoka kanobatai Dilava eta'u eabia isi eda'a kevana, ia sia eba, kanaua 'ounai sia kau ka ia edavalia. 'Olana Dilava eta'u eabia tau. Puka kabukabunai evamomo'aia ediaka ia asido'o eabia isi laloanai ia 'eva Dilava nuana evanama'inala.

⁶ Sia maiena abiveni kauna 'eva Dilava nuana ivanama'inana sia eikabasia. Dilava kevana beda'ala kauta 'eva beabiveni umauna Dilava 'eva emauli maivaka dekavua kauta tavata nama'ita bevenita.

⁷ Abiveniai Noa 'eva Dilava dava vailai bepupulu davana eabivenia laloanai ia sia eika davata Dilava lelana eabidae maimakauna aunakoi ka evavaia inoku ena luma kauta ivamaulita davana be'ao abaka laloanai. Abiveni kanaua'i ia komolo kaunai eao Dilava vailanai vakaia kanobata kauta mekau namana dekoaia.

Abela'amo Mai Sala

Eta Abiveni.

⁸ Abela'amo 'eva Dilava eabivenia. Ia e'aeia koanai lelana eabiadae eda'a ovo ena kano evikania. Dilava eluva'ana'i kano ka bevenia, ia a beda'ala 'eva sia eikabasia laloanai ena kano umauna evikania.

⁹ Abiveniai Abela'amo eda'a luva'ana'i kanona, ua'i da'a'au kaunai eao, ia Isako mai Iakobo ita aiole laloatai demia, ia laluaana vaka luva'ana'i ka'onamo deabia Dilava kevanai.

¹⁰ 'Olana Abela'amo 'eva evi'ima Dilava betata'u vanua kanaua bevalava 'inia kave'i miakeinikeini vanuanai be'ao.

¹¹ Abela'amo adana Sala ita 'ani demotu vaika sia melo ka bemavapuluia, ia abiveni ai 'eva Abela'amo kama ai eao 'olana ia Dilava evamomo'aia ena luva'ana'i bevamomo'aia.

¹² Abela'amo 'eva emotu vaika vitaitana 'ani eba boina, kau motuna ka'onamo kanania iduvu namavaikana evapulua vitaitana vutuvutu visiuta boita 'o 'atu nabuana boina ekavakuta 'eva sia ekavaku paluta.

¹³ Kau katania boutai eta abiveni ai demia beia Dilava ena luva'ana'i davata asido'o deabi laloanai deba, beia vailai bepupulu davata deikabasita 'ounai delalonama vaita, vakaia mulinai ia sibota deluvasi ia 'eva da'a'au kauta mai 'abua ede kauta kanobata kanania akanai.

¹⁴ Kau kanaua deluva koma 'eva ita kaikabasi ia 'eva eta kano umauna dekavua.

¹⁵ Ia kano kanaua makavanai devikania kanona bemalalovaia koanai bemamue vaka bemadaia. Ia kanaua sia dekoma.

¹⁶ Vanua ia de'imala vanuana 'eva vanua nama'ina vaika vutuvutu vanuana. Inoku Dilava 'eva sia emalalai ia be'aea eta Dilava, 'olana ia vanua ka 'ani eva'olua ia eta.

¹⁷ Dilava Abela'amo ekovoia laloanai Abela'amo abiveni ai nakuna Isako veniveni davanai evaoa. Dilava Abela'amo kevanai eluva'ana'i 'ava'avana bedouta, beia Abela'amo nakuna ka'ou kukunamo veniveni davanai evaoa eveni.

¹⁸ Dilava Abela'amo e'ouia ediaka, "Isako kaunai oni 'ava'avamu aluva'ana'i vaita kauta bepupulu."

¹⁹ Abela'amo eabiveni Dilava 'eva mai siavuna kau ba ai bevako'isia 'udai. Inoku kamadiaka Abela'amo 'eva nakuna Isako ba ai eabia 'udai boina.

Isako, Iakobo Mai Iosepa

Eta Abiveni.

²⁰ Abiveniai Isako eta'u Iakobo mai 'Esau evanama'inata mai vailai bepupulu davata vaka e'outa.

²¹ Abiveniai Iakobo ena ba 'ani ekevai vaika laloanai ia Iosepa nakuna ka ka evanama'inata maivaka ena ikoko'a ai ekoma 'au Dilava ekukudivo venia.

²² Abiveniai Iosepa ena ba 'ani ekevai laloanai Isalaela iduvuna Aikupitoai bela'asi kanaua valina ekava maivaka e'outa kuliana Kanana kanonai bekoleta.

Mose Ena Abiveni.

²³ Abiveniai Mose kamana sinana ia epulu mulinai devunia vuia koi 'olana de'ikaia ia 'eva melo nama'ina, inoku 'Aikupito Loviana 'olana sia demakau venia ena talavatu sia deabia dae.

²⁴ Abiveniai Mose e'aida'aida koanai ia sia eula 'eva Aikupito loviana 'olana nakuna ateatena be'aea nakunai be'ao.

²⁵ Ia sibona eula Dilava ena kau ita beanana ka'ona, ia sia eula melala kava'ina mo si'avana vinaulata belalonama vaita.

²⁶ Mose elalovaia ia Keliso dainai beanana 'eva enama'ina vaika vakaia Aikupito lavota be'abi, 'olana vailai tava nama'ina tavana elalovaia.

²⁷ Abiveniai Mose 'eva Aikupito evikania, lovia 'olana ena badu makauna sia emakau. Ia evapasisi sia kaikala Dilavana 'ani eikaia boina.

²⁸ Abiveniai Mose eta'u La'au keini naduna eva'olua, e'outa lala ai nutuala akata deukuta, akauku aneluna Isalaela nakuta melota batanikauta asi'i emaakubata makauna.

Isalaela Kauta Dounamo

Dilava Deabivenia.

²⁹ Abiveniai Isalaela kauta 'eva Atu 'aolanai dekeini vitaitana kano ladanai dekeini boina, ia Aikupito kauta dekovokovo bekeini laloanai boutai 'atuai dedono ba.

³⁰ Abiveniai Isalaela kauta Ieliko vanuana alana namana deda'aia kaiu melala kalakoi ka 'eva epalu.

³¹ Abiveniai La'aba mo'a ateatena 'eva Isalaela eta 'idima'idima kauta lua eduluta kave'i 'ounai Ia 'eva Dilava sia deabia dae kauta ita sia deba ka'ona.

³² Inoku lau luva dava vaka baluvala? Kidioni, Balaka, Samusoni, Idepeta, Davida, Samuela mai enoela kauta valita bakakava melalana 'eva sia edaia.

³³ Ia eta abiveni ai dekuali kanobata doutamo devasi'avanata, komolo vinaulata devavai, Dilava ena luva'ana'i davata deabi, ia deta'u laioni nututa de'alavuta,

³⁴ 'alova namata devabo'ota, kuali lepota kevatai deveau ovo. Debade bade ia mune'e dekula'ila 'udai, kuali ai dekula'ila si'asia 'abu edea kauta 'itota delo'ota.

³⁵ 'Aate vaidia 'eva kadi'a'ata deba kauta deko'isi 'udai dedavalita, vaidia devavabuto'ota kauta sia deula beluvuta 'olana beaku bata laloanai ko'isi 'udai nama'inanai bemaui 'ounai.

³⁶ Vaida 'eva deikata demamai devabo'ota, de'odita, deliota vabuto'o lumanai de'alavuta.

³⁷ Bika'a ai deaku bata, deilipapata lua, kuali leptoi dekala bata. Mamoe mai nani avata delio deda'a to'ato'a, deulalu, devaiivivita mai devasi'avanata.

³⁸ Kanobata 'eva sia maiena nama'ina ka ia kevatai. Ia 'eva sia maieta kano kauta boitai deda'a to'ato'a, kano'akunai, lolo ai, bika'a 'iletai mai 'uliai demia.

³⁹ Kau katania boutai 'eva maieta abiveni dainai Dilava eta'u eva-momo'aita, beia Dilava ena luva'ana'i davata 'eva asido'o deabi.

⁴⁰ 'Olana Dilava 'eva ena lalovai nama'ina umauna eva'olua ita eta. Ena ula 'eva 'ana'inai deabiveni kauta mai ita 'eva melala ka'onama bevakomolota ka'ona.

12

Iesu Ekaikala

Mai Ekabivenia.

¹ Kanaua 'ounai abiveni maulinai demia kauta doutamo 'eva vialulu kauta boita delavata kaiu, ita dava kataua devamekauta mai si'avana deabi 'inita

si'avanata kataua boutai kamaabita ovo, vakaia vailatai e'asi veau vilo'onai kamaveau maivapasisita ita.

² Ita makata 'eva Iesu mo ekaikala, ia eta'u ita eta abiveni evapulua maka-vanai beda'amo to'onai, ia 'eva vailai emimia lalonamana 'ounai evapasisi sia emalalai au ido'o valaukuna anaanana vuvuana ekoiaia akanai eba, inoku ia vali'u 'eva uai Dilava ena mia'au 'abuna idibana duasi i'olakuna 'abunai 'ani emia divo.

*Dilava Mekau Bevenita
'Eva Ekakomolo.*

³ Oi ia oi bolalovaia kave'i, ia si'avana kauta devaiviivia si'asi'a laloanai evapasisi, kanaua 'ounai sia oi bobalea mai sia oi bomanomano.

⁴ Oi 'eva si'avana ita oi okuali, beia sia oi oviaku, oi asido'o lala oi oidi'ua.

⁵ Dilava eta'u nakunai evaomui vaidiba luvatai evakula'ilamui luvana 'ani oi obolabolala, 'una? Ediaka,

"Naku'u e, Lovia namana evaidibamui 'eva lelena oi bo'ika, mune'e e'ovenimui 'eva nuamui sia oi bovamanomano.

⁶ 'Olana Lovia namana elalo'au venita kauta evaidibata, maivaka nakunai evaota kauta 'eva e'odita."

Aon 3.11,12

⁷ Emui anaanai oi bovapasisi, ua 'eva kamamui ena vaidiba. 'Olana Dilava etatau nakunai evaomui. Kama davana nakuna sia evaidibala?

⁸ Kau boutai nakuta devaidibata. Oi sia bevaidibamui koanai oi 'eva sivabu tauasi melomui sia ia nakuna umaumui.

⁹ Ita boutai maikamata kanobata kanania akanai devaidibata inoku leleta kabidae. Ita idumeta Kamata vutuvutuai kauna lelena daitai ekadai kave'i 'eva ekamauli.

¹⁰ Ita kamata kanobatai nia'i kauta eta komolo ai melala kava'inamo devaidibata, ia Dilava evaidibata 'eva ita eta nama'ina 'ounai, kanaua'i ia ita ena kabukabu maulina laloanai ekamia ka'ona.

¹¹ Kama naku evaidibata koanai maianaanana ia sia mailalonamana, beia muliai beanana mai mekau bekoala kauta kataua 'eva vaka'ona vuavuaana nama'ina beabia inoku vinaula komolo kautai be'ao.

¹² Kanaua 'ounai imamui debavunu kaumui imamui oabita isi mai kuimui deba kaumui ovapasisi oko'isi.

¹³ Emui da'a dalata oi bovakomolota, inoku aeta desi'avana kauta dala kanaua'i aeta benama'ina.

¹⁴ Oi bokovokovo kau boutai ita nua'elu ai oi bomimia mai oi bokabukabu, 'olana sia bekabukabu kauna 'eva Lovia namana sia beikala.

¹⁵ Ka ka oi boimamui kave'i, kau ka Dilava ena iulaveni koanai asi'i ematabu makauna, 'o viloamuii kau ka au lamuna vamaina boina asi'i emakubu 'au mato asi'i emavabavunumui mai asi'i emava'obumui makauna.

¹⁶ Oi bo'imamui kave'i, viloamuii kau ka sia bekulakula, 'o idume vin-aulana 'olana sia de'aku kautai asi'i demao makauna vitaitana 'Esau boina, ia 'eva iani nau ka'onamo 'ounai ena pulu makava koana vanama'ina itoinai etavaia.

¹⁷ 'Ani oi oikabasi, muliai 'Esau 'eva kamana kevanai ena pulu makava koana vanama'inan iabina eula enoia maikanikanina, beia kamana ia eda'aia mulili, 'ounai 'Esau ena pulu makava koana nama'ina beabia 'udai dalana sia ka edavalia.

Ita 'Ani Kaele'au

Vutuvutu Ielusalemana.

¹⁸ Oi oasi 'abuna 'eva sia 'ana'inai Isalaela kauta deda'a Sinai lolona boina. Sinai lolona 'eva imatai ekabia kovo bedaia, 'alova e'ani, oli 'uma'umana mai vabuto'o e'alavua mai vaka levo e'unu,

¹⁹ bisii 'uluna mai lele ka deika. Inoku kau lele de'ika kauta kataua Mose denoia Dilava ia kevatai sia luva ka beluvala 'udai.

²⁰ 'Olana kau kataua Dilava e'outa luvana demakau vaia dokadoka, ia eluva ediaka, "Kau ka beda'a lolo kanania imanai beabia kovo 'eva bika ai beaku bala, bema sisi ka koanai vitaitanai kanaua mo bekomala."

²¹ Dekailao koa namata deikata koanai demakau si'asi'a, inoku Mose vaka e'ululu 'ululu ediaka, "Amakau vaika."

²² Beia oi oasi 'abu kanania 'eva Siona lolona, mauili Dilavana ena vanua, vutuvutu Ielusalemana. 'Abu kanaua laloanai anelu 'ito namavaikana mailalonamata demia.

²³ Oi oasi melo batani kauta eta do'u namana viloatai vamui vutuvutuai deleleta, kau boutai ivaluvata kauna Dilavana kevana mai vinaula komolo kauta kataua idumeta 'ani dekomolo kave'i kauta kevatai.

²⁴ Oi oasi Iesu luva'ana'i namana makamakana ivaka'onamona kauna kevana, mai ia lalana si'avana iabita ovo kauna kevana, lala ekapolai kauna kanaua 'eva Abela lalana tavana eulavaia lalana kanaua ekeinia.

Eka'imata Kave'i.

²⁵ Oi bo'imamui kave'i, e'oumui kauna sia oi bo'oualavu venia. Kau kanobatai kataua Dilava ena luva evenia kauna Mose de'oualavu venia kauta 'eva mekau dekoaia. Ita vutuvutuai evaidibata kauna ekavasi'avanala koanai mekau be'asi mekauna kevana a ekaveau ovo koma?

²⁶ Melala kanaua'i ia lelana eta'u kanobata eva'iuva'iuvaia, inoku vali'u 'ani eluva'ana'i ediaka, "Lau mune'e sia kanobata mo bava'iuva'iuvaia, ia vutuvutu vaka bava'iuva'iuvaia."

²⁷ Luva kanania "mune'e" anina 'eva evavaita davata kataua be'iuvai'iuvai 'eva davata boutai beabita ovo, ia sia be'iuvai'iuvai davata 'eva 'abutai bemimia.

²⁸ Dilava elovia vaia vanuana sia e'iuvai'iuvai vanuana evenita ita ekalovia vaia 'ounai vanama'ina luvana Dilava ekavenia, mai'olakuta ekakukudivo venia maivaka maimakauta ia ekavanama'inala.

²⁹ 'Olana ita eta Dilava 'eva 'alova namana umauna boina dava boutai e'abu paluta.

13

Banota Ekalalo'au Venita Basibasi.

¹ Oi sibomui ka ka oi bovilalo'au viveni basibasi bo'a ka'onamo boina Keliso laloanai.

² Sia oi bobolabola, da'a'au kauta 'eva emui lumai oi boabita dae, 'olana vaida deta'u eta lumai da'a'au kauta deabita dae koanai anelu deabita dae, beia ia sibota 'eva sia deikabasi.

³ Vabuto'o lumatai de'alavuta kauta oi bolalovaita vitaitana oi 'eva ia ita vabuto'o lumatai oi omimia boina. Deanana kauta oi bolalovaita vitaitana oi 'eva oi oanana boina.

⁴ Kau boutai kamoane 'oalana be'aku 'eva benama'ina. Momoluane mai 'a'ate adamui ita emui kamoane oi bo'imala kave'i 'eva benama'ina, 'olana Dilava betata'u mo'a kauta mai kamoane laloanai dekulakula kauta 'eva bealuvata.

⁵ Moni sia oi boula venita vaika ia dava kevamuia demimia davata mo oi bo'abi nuamui benama'ina, 'olana Dilava eluva ediaka,

“Lau 'eva sia kena
bavikanimui kovo maivaka
sia kena babolabolamui kovo,
asi'i vaika.”

Deu 31.6

⁶ Kanaua 'ounai maikula'ilata ekaluva Ekadiaka,
“Lovia namana 'eva
lau idulu'u kauna,
lau sia bamakau.
Kau dava bevavaia
lau keva'uai?”

Sal 118.6

⁷ 'Ana'inai de'anaia vaimui Dilava ena luva devaikabasimui kauta oi bolalovaita. Eta mauili oi bolalovaia a demia koma eda'amo deba, inoku eta abiveni koata vitaitata oi bokovota.

⁸ Iesu Keliso 'eva lavi, vali'u maivaka mala sia bedeana beda'amo bemia keinikeini.

⁹ Vaikabasi luvata edeata edeata sia betata dala medianai bevada'ata tau. Dilava ena iulaveni koana nama'inana betata'u nuamui bevakula'ilata, iani talavatuta sia oi bovanamata. 'Olana iani talavatuta deabita dae kauta kataua 'eva sia nama'ina ka dedavalia.

¹⁰ Ita 'eva maieta vaka kabukabuna, ua 'eva au ido'o valaukuna akanai Iesu eba vakana, kabukabu kauta kataua lo'e laloanai ia eta kabukabu vinalata devavai kauta be'asi ita eta vaka kabukabuna kanaua'i beaniani 'eva sia maieta komolo.

¹¹ 'Olana sisi lalata 'eva kabukabu kauna namana evuata eda'a ekabukabu vaika 'abuna laloanai evuata edodo si'avana iabiovota 'ounai, beia sisi kauanita 'eva evuata eda'a vanua alana mulinai etouta.

¹² Vitaitanai Iesu vaka sibona lalanai kau eta si'avana bevamamakata 'ounai vanua alana mulinai eanana eba.

¹³ Kanaua 'ounai ita vaka ekada'a ia kevana, vanua alana mulinai ia emalalai vaia malalaina ia ita ekamalalai ka'ona.

¹⁴ Kanobata kanania laloanai ita eta mia keinikeini vanuana ka asi'i, ita 'eva vanua kanaua vilai e'asi vanuana ka'imala.

¹⁵ Kanaua 'ounai ita melala boutai Iesu vanai Dilava vanama'ina ekavenia, ita ekata'u nututai ia vana ekaapavaia, ua 'eva ita eta veniveni davana Dilava ena.

¹⁶ Vinaula nama'ita maivaka banomui iduluta vinalata sia oi bobolabolata, 'olana vinaula kataua boita 'eva veniveni davata Dilava elalonama vaita.

¹⁷ De'ana'ia vaimui kauta leleta daitai oi bodadai mai deula veni vinalata oi bovavaita. 'Olana ia detata'u oi de'imamui Dilava vilanai maimakauta, melala boutai. Leleta daitai oi bodadai 'eva mailalonamata eta vinaula bevavai, beia mo leleta daitai sia oi bodadai koani mai lalovailalovaita bevinaula, inoku kanaua 'eva sia maividuluna kevamui.

¹⁸ Melala boutai oi bomeamea lai akamai ai. Lai nuamai umauta lalovaita 'eva bekomolo kave'i 'olana dava boutai laloatai lai a'ula vinaula komolota lai bavavai.

¹⁹ Lau anoimui oi bomeamea kula'ila Dilava besini'u bavasi kaokao kele'emui.

Vanama'ina Luvana To'ona.

²⁰ Nua'elu Dilavana eta'u Lovia namana Iesu ba kauta vilootai evako'isia, ia 'eva miakeinikeini luva'ana'ina namana lalana e'itabua siusiu inoku mamoe 'ima kauna namanai eao.

²¹ Lau ameamea, Dilava kanania betata'u dava nama'ita boutai bevenimui 'olana ena ula vinalana oi bovavaia 'ounai, Iesu Keliso vanai ia elalonama vaia vinalana nuatai bevavaia. Keliso kevanai nuavi bemia keinikeini. Amen.

²² Boakala'u e, malele kanania alele venimui luvata 'eva sia delaka'ina, ia e'u vakula'ila luvata katanania oi boabidae dokadoka.

²³ Avaikabasimui bo'akalata Timoteo vabuto'o lumanai 'ani devala'asia, ia bemaasi kaokao koanai laluna lai bamavasi lai bamaikamui.

²⁴ De'ana'ia vaimui kauta boutai mai Dilava ena kau boutai kevatai e'u vanama'ina luvana oi bo'outa. Ua'i Italia ai demia kauta eta vanama'ina luvana desinia kele'emui.

²⁵ Dilava ena iulaveni koana 'eva boumuiai kevamuiiai bemimia. Amen.

Malele **IAKOBO** Eleleia Kauna

Puka Laloana Ielena Luvana

Puka kanania laloanai luva nama'ita demimia. Iakobo puka kanania eleleia Dilava ena kau bevaikabasita dala nama'ita katania'i bedada'a. Luva ivavitaitata doutamo eleleta kau beduluta lalovailalovai mai vaidiba beabita mai ena luva beikabasia kave'i. Iakobo 'eva eluva kave'i, kau ka eabiveni kauna 'eva sia beabiveni 'avaea, ia 'eva koakoa nama'ita kau kevatai bevavai, 'olana koakoa kataua ia evamomo'aia ena abiveni 'eva ekula'ila mai enama'ina.

Puka Iduvuna Namata

- a. Lova aku. (1.1)
- b. Abiveni mai nuakomolo. (1.2 - 8)
- c. Ulalu kauna mai lavo kauna. (1.9 - 11)
- d. Vikovo laloanai. (1.12 - 18)
- e. Leleika mai vinaula vavai. (1.19 - 27)
- f. Abidae koana. (2.1 - 13)
- g. Abiveni mai vinaula. (2.14 - 26)
- h. Abiveni kauna mai malana. (3.1 - 18)
- i. Abiveni kauna mai kanobata. (4.1 - 5.6)
- j. Luva to'ota. (5.7 - 20)

Vanama'ina Luvana.

¹ Lau Iakobo, Dilava mai Lovia namana Iesu Keliso eta da'ala iabina kau'u, malele kanania alelea evavasi Dilava ena kau boumuiai iduvu 'oukaluana oi oda'asiusiu kanobata edeata edeatai oi omimia kaumui kele'emui, e'u vanama'ina luvana avenimui.

Abiveni Mai Vapasisi.

² Bo'akala'u e, adedua edeata edeata bele'au kele'emuiiai koanai boutai lalonama davatai oi bovaota.

³ 'Olana oi oikabasi, adedua betata'u emui abiveni bevakovoa, kanaua 'eva oi emui vapasisi bevanamala.

⁴ Emui vapasisi ena kula'ila bounai bevala'asia kave'i, kanaua'i oi bokomolo vaika, oi bonama'ina umauna mai sia dava ka enai oi botatabu.

⁵ Oi ka aonekai oi otabu koanai Dilava oi bonoia, ia 'eva sia 'ovede Dilavana kau boutai 'eva dava boutai evenita, ia betata'u aoneka bevenimu.

⁶ Beia Dilava bonoia koanai ia enai boabiveni ia sia bolalo to'ato'a. Kau ka belalo to'ato'a 'eva itani ka'uda ka'uda boita, lani etata'u edolia lao edolia mai.

⁷ Kau kanaua boina 'eva sia belalovaia ia dava ka Lovia namana kevanai beabia.

⁸ 'Olana nuana evaluala kauna ena vinaula boutai laloatai 'eva vinaula ka'onamoai sia belava 'ini.

Ulalu Kauna Mai Lovia Kauna.

⁹ Dilava betata'u bo'akalata ulaluna ka beabia isi akai koanai belalonama si'asi'a.

¹⁰ Ia Dilava betata'u bo'akalata elovia kauna beva'ovua koanai ia vaka belalonama, 'olana lovia kanaua 'eva betaule itani ava velavelana elamoda e'ekoasi boina.

¹¹ Melala edadae, ekakala siavuna etata'u ava evalamodala velavelana de'eko asi ena nuavi vaka e'ole. Vitaitanai lovia kauna ena lavo ekakavu laloanai kanaua beba koma.

Ivakovo.

¹² Adedua laloatai evapasisi kauna 'eva belalonama, 'olana adedua laloanai ekula'ila ekeini 'ounai mauli keinikeini kanaua Dilava eluva'ana'i vaia ia delalo'au venia kauta kevatai maulina beabia.

¹³ Ivakovo laloatai sia kau ka bediaka, "Dilava Ekovo'u." 'Olana si'avana Dilava bekovoa 'eva sia bedaia, maivaka Dilava 'eva sia kau ka ekovoa.

¹⁴ Ivakovo 'eva kau ka sibona ena ula si'avana vaika etata'u nuana eania inoku elebala 'ounai epupulu.

¹⁵ Ula si'avana vaika etata'u si'avana evapulua, si'avana ekukubu namana e'ao inoku vuavuaana epupulu 'eva ba.

¹⁶ Bo'akala'u ma'adi e, lalovai kanaua sia belebamui.

¹⁷ Ainama davata nama'ita boutai mai veniveni davata komolota vaika boutai 'eva akai de'asi, 'ailala davata evavaita Dilavana enai de'asi, ia 'eva sia edeana itani dava va'ava'ata boina e'iuvai'iuvai.

¹⁸ Sibona ena ula dainai ena luva umaunai evavaita, inoku dava boutai evavaita vilootai ita 'eva itani vuavua makavana boina.

Lele Ika Mai Vinaula Vavai.

¹⁹ Bo'akala'u ma'adi e, kanania oi boikabasia kave'i, kau boutai luva lelana ikanai demolau, ia iluvanai 'eva demaka'i mai baduai vaka demaka'i.

²⁰ 'Olana kau ka ena badu 'eva Dilava ena ula maulina komolona laloanai bemauli kauna sia bedulua.

²¹ Kanaua 'ounai koakoa 'obuta boutai mai koakoa si'avata vaika boutai nuamui ai demimia davata oito'au, ia Dilava ena luva kanaua nuamui ai evadoia oi bevamaulimui luvana oabia dae maimaunamui.

²² Dilava ena luva oi oika luvana vinaulana oi bovavaia, ia luvamo oi oika 'avaea vinaulana sia oi ovavaia 'eva sibomui oi olebamui.

²³ Kau ka Dilava ena luva 'uluna e'ika beia vinaulana sia evavaia kauna 'eva vitaitana ia sibona vailana oleole ai eikala boina.

²⁴ Sibona vailana eikala epupua inoku eda'aovo, sia edau'a 'ani ebolabolala ia ikana 'eva a boina.

²⁵ Beia kau ka Dilava ena talavatu komolona kanaua emalele vaia kave'i mai kau si'avanai eluvuta mai lele e'ika sia ebolabolata mai vinaulata evavai kauna 'eva ena vinaula laloanai Dilava ena vanama'ina bedavalia.

²⁶ Kau ka nuanai elalovaia ia 'eva Dilava eabivenia kave'i, beia malana sia e'imala kave'i koanai ia 'eva sibona elebala, inoku kau kanaua ena abiveni Dilava kevanai 'eva anina asi'i.

²⁷ Abiveni kauna ena vinaula nama'ina umauna mai komolona Kamata Dilava vailanai 'eva kanania, ta'ovala taukeke mai obu ekaduluta eta ananai, mai sibota eka'imata kave'i kanobata 'obuna asi'i emava'obuta.

2

Kau Boutai Kevatai Abidae Koakoana Vitaitanamo Ekavavaia.

¹ Bo'akala'u e, eta Lovia namana Iesu Keliso 'eva nuavi loviana, oi oabivenia koanai, kau koata daitai sia oi bodadai.

² Kau ka Dilava ena lo'e do'unai emada'adodo imana li'uli'unai evadodoo davana kolo ai ivavaina mai ena tubu'a nama'ita vaika emavadodo, ia ulalu kauna ka ena tubu'a 'obuta emavadodo emada'adodo,

³ inoku oni kau kanaua tubu'a nama'ita evadodo kauna oabia dae kave'i odiaka, "Emu mia'au nama'ina kanania'i mia'au," ia ulalu kauna o'oua, "Kanaua'i lavadivo 'o nia'i ae'u 'olanai miadivo," koanai,

⁴ oi 'eva 'ani ova'eva, 'olana sibomui vilomui oi ovaedeanala mai lalovai si'avata vaikai viloa oi ovavaia.

⁵ Bo'akala'u ma'adi e, lele'u oika, Dilava eta'u kanobatai ulalu kauta edilata abiveniai belovia, mai Dilava ena lovia vanuana 'ani eluva'ana'i vaia ia delalo'au venia kauta eta vanua kanaua ulalu kauta beabia.

⁶ Beia oi 'eva ulalu kauta 'olata sia oi o'aku. Lavo kauta 'eva emui maui de'ola vaita mai deliomui develimui deda'a lavuai 'abuna.

⁷ Ia kataua detata'u Iesu vana nama'ina Dilava evenimui vana de'oua si'asi'a.

⁸ Talavatu namana Puka kabukabunai talavatuna ediaka, "Kevamu kauna bolalo'au venia oni sibomu olalo'au venimu boina." Kanaua oi ovavai koma koanai oi 'eva 'ani vinaula komolo oi ovavaia.

⁹ Beia oi kau koata daitai oi odadai koanai oi 'eva 'ani si'avana oi ovavaia, inoku oi 'eva ova'eva Dilava ena talavatu oi ova'alamaia.

¹⁰ 'Olana kau 'eva talavatu boutai be'imata kave'i, ia ka'onamo eva'alamaia koanai ia 'ani eva'eva vitaitana talavatu bounai 'ani eva'alamaia.

¹¹ 'Olana Dilava ediaka, "Sia bokulakula," mai ediaka, "Sia Boakuaku," inoku bema sia okulakula, ia oakuaku koanai oni 'eva Dilava ena talavatu 'ani ova'alamaia.

¹² Dava boutai laloatai oi boluvaluva mai oi bovavai 'eva oi bolalovaia Keliso ena talavatu kanaua si'avanai eluvumui talavatuna betata'u bevalu-vamui.

¹³ 'Olana kau sia bolalota koanai, Dilava ena lavuai laloanai sia belalomu. Vilalo 'eva lavuai ekeinia.

Abiveni Mai Vinaulana.

¹⁴ Bo'akala'u e, kau ka ediaka ia 'eva mai ena abiveni ia vinaulana sia evavaia koanai, ena abiveni kanaua 'eva ena nama'ina dava? Ena nama'ina asi'i. Abiveni kanaua boina 'eva ia sia bevamaulia.

¹⁵ Bema abiveni kauta vilootai bo'akalamu ka 'o lovumu ka kevanai tubu'a 'o iani beania ianina asi'i,

¹⁶ oni ia boma'oua bodiaka, "Nuamu medianai da'a, kaumu besiavusiavu, mai boaniani kave'i," beia eula venita davata sia ka ovenia koanai, kanaua ena nama'ina 'eva dava? Ena nama'ina asi'i.

¹⁷ Dala vitaitanai abiveni sibona mo, ia vinaulana asi'i ua 'eva sia abiveni umauna, kanaua 'eva 'ani eba sia evinuala.

¹⁸ Beia kau ka bediaka, "Oni 'eva oabiveni, ia lau 'eva avinaula." Ia lau adiaka, "Emu abiveni kanaua vinaulana asi'i abivenina vaika'u, inoku lau e'u abiveni vinaulana bavaikamu."

¹⁹ Oni oabiveni Dilava 'eva ka'onamo. Kanaua 'eva enama'ina. Ka'uba si'avata vaika vaka kanaua deabiveni koma inoku demakau si'asi'a de'ululu 'ululu.

²⁰ Bo'o kaumui e, abiveni vinaulana asi'i abivenina 'eva ena nama'ina asi'i kanaua bavaikamui.

²¹ 'Ava'avata Abela'amo 'eva Dilava vailanai ekomolo 'olana ena abiveni vinaulana evavaia, nakuna Isako vala kabukabuna akanai ene'eia 'au Dilava eainama venia.

²² 'Ani oi oikabasi ena abiveni mai ena vinaula 'eva devinaula ka'ona, inoku ena koakoa kanaua eta'u ena abiveni evakomoloa.

²³ Inoku Puka kabukabunai deleleia luvana 'ani emomo'ai ediaka, "Abela'amo eta'u Dilava eabivenia, ena abiveni kanaua 'ounai Dilava ia eabia 'isi komolo kaunai evaoa." Inoku Abela'amo de'aeia Dilava ena kau.

²⁴ Kanaua 'ounai vali'u 'ani oi oikabasi kau 'eva ena koakoa dainai Dilava ia evamomo'aia komolo kauna, ia sia abiveni mo sibona.

²⁵ Dala vitaitanai mo, La'aba mo'a ateatena vaka ena vinaula kave'i 'ounai Dilava ia evamomo'aia komolo ateatena, 'olana ia eta'u Iuda eta 'idima'idima kauta eduluta, mai dala edeanai esinita demue.

²⁶ Vitaitana kauani sia mai idumena eva eba, kanaua 'ounai abiveni vaka sia maivinaulana 'eva eba.

3

Eta Luvaluva Eka'ima Kave'i.

¹ Bo'akala'u e, kaumui doutamo vaikabasi kaumuiai sia oi bo'ao, 'olana oi 'ani oi oikabasi, lai avaikabasi makava kaumai 'eva ivaluvamai 'eva 'ani bepasisi vaika vakaia kau vaida.

² Ita boutai 'eva melala doutamo koakoa va'evata kavavai, beia kau ka luva si'avana sia ka beluvala koanai ia 'eva bekomolo mai ia sibona kauanina itoina be'olavaia kave'i 'eva 'ani bedaia.

³ Osi nututa ido'ota 'aulitai nututa ekado'o avu koanai ia ita leleta be'ika, ita ekaula osi kauna itoinai ekava'iuvai'iuvaia mai eka'iloa 'eva bedaia.

⁴ Mai aunakoi namana ekaikala, ia 'eva namavaikana mai lani namana evivua beia, kali kikina etata'u ekalia, kali kauna ena ula 'abuna a'i 'eva beda'avaia mo ua'i.

⁵ Vitaitanai mo mala 'eva kikina vaika kauanitai emimia, beia ena apa vinaulata namatamo evavai.

'Alova vaka ekalalovaia, 'ita kikina vaika beia bevuvule koanai la'uka itoinai beani palu.

⁶ Mala 'eva itani 'alova, ia 'eva kauanitai emimia si'avanai evonu, eta mauili itoina evavaia si'asi'a, ia etata'u eta mauili itoinai 'alovai eva'alalau, ena 'alova 'eva ua'i 'alova eani keinikeini 'abunai eabia e'asi.

⁷ Kau betata'u mauili davata boutai, sisi, manumanu, delalau davata, mai 'atu laloanai demimia davata boutai bevamadanata 'eva bedaia, inoku ia detata'u dava kataua devamadanata.

⁸ Beia kau ka mala bevamadanala 'eva sia bedaia, mala 'eva si'avana eluvala basibasi, ba mulamulanai evonu.

⁹ Mala kanania'i eta Lovia namana mai Kamata kavanama'inala, mai mala kanania'i Dilava ikaikanai evavaita kauta kasivadata.

¹⁰ Nutu ka'onamoai vanama'ina mai sivada luvata dela'asi. Bo'akala'u e, kanaua sia kamavavaia 'eva bemanama'ina.

¹¹ 'Atu veina mai veimaka luana 'uli ka'onamoai sia debudi'au.

¹² Bo'akala'u e, tuava auna veivei vuana sia bevapulua, maivaka ivi'alu auna tuava vuana sia bevapulua. Mai 'atu veinai veimaka sia eka'adoa.

Aoneka Dilava Kevanai E'asi Davana.

¹³ Dai 'eva oi viloamuiai eaoneka dokadoka mai eikabasi kave'i? Ia betata'u ena mauili medianai mai ena vinaula kave'i ai kanaua bevaikamui maimanauna, kanaua 'eva ena aoneka koana.

¹⁴ Nuamuiai mama mai idono si'asi'a demimia koanai emui aoneka sia oi boapavaia, mai Dilava ena luva umauna sia oi bovunia.

¹⁵ 'Aoneka' kataua boita 'eva Dilava kevanai sia de'asi, ia 'eva kanobata ena, sia mai idumeta kauta mai diabololo kevanai de'asi.

¹⁶ 'Olana mama mai idono demimia 'abunai 'eva vavai 'avaea mai vinaula si'avata edeata edeata vaka ua'i.

¹⁷ Beia aoneka Dilava enai e'asi kanaua ikana makavana 'eva koakoa komolona, mulinai 'eva nua'elu, manau, madana, vilaloai evonu, koakoa nama'ita, si'avana dainai sia edadai, mai sia eaku leba.

¹⁸ Nua'elu devavaia kauta detata'u nua'elu keana devadoa ekukubu evu-vua vuavuanai inoku komolo anina de'uala.

4

Kanobata Ikadi'a'ana 'Eva

Dilava Ivaivivina.

¹ Viloamui ai viaku mai viala boutai 'eva a'ia'i de'asi? Eta asi 'abuna 'eva oni nuamu ena ula si'avata kataua nuamui deviaku basibasi.

² Oi oula dava oi bo'abi beia sia oi oabita, kanaua 'ounai oi ova'olu oi boakuaku, dava oi oula venita vaika beia sia oi oabita, kanaua 'ounai oi ovala mai oi oviaku. Dava oi oula venita davata sia oi oabita 'olana oi 'eva Dilava sia oi onoi.

³ Mai dava oi onoinoi vai davata sia oi odavalita 'olana nuamui lalovaita 'eva sia dekomolo, mai oi o'ula sibomui nuamui oi bovanama'inata davata mo oi onoinoi vaita.

⁴ Dilava lelenia sia oi o'ika kaumui e, oi 'eva itani kulakula si'asi'a 'a'ateta boita, kanobata ikadi'a'ana 'eva Dilava ivaivivina oi kanaua sia oi oikabasia, una? Kau davana kanobata ita bevikau 'eva ia sibona Dilava ena 'ou kaunai e'ao.

⁵ Puka kabukabunai eleleia ediaka, "Dilava eta'u Idume Kabukabuna ita nuatai ene'eiaidivo idumena etata'u evaasiasita mai eula vaika eka lalo'au venia." Oi olalovaia luva kanania 'eva anina asi'i, una?

⁶ Beia Dilava iulaveni koana evenita davana 'eva namavaika, Puka kabukabunai ediaka, "Dilava 'eva apa kauta evaivivita, ia manau kauta 'eva ena iulaveni evenita."

Aon 3.34

⁷ Kanaua 'ounai oi bomanau sibomui emui maui Dilava oi bovenia, enai oi bo'ao, ia diaboloi bovaivivia 'eva kevamui ai beveau ovo.

⁸ Omai Dilava kevana, ia vaka be'asi kevamui ai. Si'avana kaumui e, emui maui lalolanai si'avana demimia si'avanata odeinita ovo itani imamui oi odeinita boina, nuamui oi ovaluata kaumui e, nuamui ovavaita kave'i emui koakoa bekomolo.

⁹ Onua anana, okani, ovilalo si'asi'a, emui mamai 'eva kani ai eao, emui lalonama 'eva bavunui eao.

¹⁰ Lovia namana vailanai sibomui ovamanaumui, inoku ia betata'u beabimui isi.

Bo'akalata Sisibata

Sia Ekakao.

¹¹ Bo'akala'u e, sibomui viloamui sia oi bovadau'aia. Davana bo'akalana Keliso lalolanai kauna ka e'oua si'asi'a 'o mekau evenia kauna 'eva talavatu e'oua si'asi'a mai mekau evenia. Inoku oni talavatu mekau ovenia koanai oni 'eva talavatu sia oda'avaia kaumu ia talavatu mekau ovenia kaumu.

¹² Dilava sibona mo talavatu eveni mai bevaluvata ia mai ena siavu beva-maui mai bevaole. Kanaua 'ounai oni 'eva sia maiemu komolo kevamui kauna mekau bovenia.

Mala Melalana Enai

Sia Eka Apa.

¹³ Lele'u oika, oi kanania oi oluva koma kaumui oi odiaka, "Vali'u 'o mala 'eva ekada'a vanua kanaua'i vikau ka'onamo ekamia, moni vinalana ekavavaia mai moni doutamo vaika ekavavai."

¹⁴ Beia oi 'eva mala emui mauiaia dava bepupulu davana sia oi oikabasia. Emui mauia 'eva vitaitana 'abue'abi boina, melala kava'inamo bela'asi mune'e betaule 'udai.

¹⁵ Kanaua 'ounai oi 'eva kanania oi boluva koma, "Lovia namana be'ula koanai ita eka mauia mo vinaula kanania 'o kanaua ekavavaia."

¹⁶ Beia vali'u 'eva sibomui oi ovakaunama mai oi o'apa, vakaunama katania boita 'eva si'avana.

¹⁷ Kanaua 'ounai davana vinaula komolona ivavaina eikabasia beia sia evavaia 'eva si'avana evavaia.

5

Lovia Kauta Ivaikabasita Luvana.

¹ Lavo kele'emui ai doutamo kaumui e, lele'u oika, oi bokani si'asi'a 'olana adedua namavaikana be'asi kele'emui.

² Emui lavo 'ani devuluvulu maivaka koekoe emui tubu'a 'ani deala 'idita.

³ Emui kolo mai siliva 'ani de'eme'eme inoku 'eme'eme kanania betata'u bevamomo'aia oi 'eva ova'eva mai kauanimui 'alovai betaule. Melala to'ona e'asi beia oi emui lavo oi ovalalo do'o.

⁴ Kaiamui ovala, emui lobai devinaula kauta tavata sia oi ovenipalu kauta maivaka lobai de'ua'ua kauta kataua emui va'eva daitai dekani leleta 'ani dele'au deda'a siavu boutai Loviana namana kaianai dedodo 'ani eika.

⁵ Oi kanobata akanai emui mauia 'eva elovia vaika maivaka mailalona-mamui oi omimia, inoku sibomui oi ovananimui oi obabata vitaitana nadu bolomana boinai oi o'ao.

⁶ Oi ota'u kau sia maieta va'eva mai sia deva-adeduamui kovo kauta kataua vuvua oi ovakoata mai oi oaku bata.

Ekavapasisi Mai Ekameamea.

⁷ Kanaua 'ounai, bo'akala'u e, oi bovapasisi beda'amo Lovia namana bemumue be'asi. Oi bolaloavaia vinaula kauna ena vinaula anina nama'ina e'imala maivapasisina ita evi'ima eda'amo avala lamuna mai bua lamuna de'aku inoku ena loba anina epupulu.

⁸ Oi vaka nuamui oi bovapasisi mai oi bolava 'ini kave'i 'olana Lovia namana ena asi 'eva 'ani ekevai.

⁹ Bo'akala'u e, oi sibomui viloamuiiai sia oi bo'ou to'ato'a kanaua asi'i emada'avaimui Dilava emavaluvamui, lavuai kauna 'eva nutuala aunai elalava.

¹⁰ Bo'akala'u e, oi 'eva enolea kauta eta anana laloatai devapasisi vapasisina oi bolaloavaia mulitai oi bodada'a, ia 'eva Lovia namana ena luva deluvaia inoku deanana.

¹¹ Ita kadiaka vapasisi kauta 'eva denama'ina. Iobu ena vapasisi sisibana 'ani oi oikabasia. Lovia namana ena nama'ina ia enai 'eva aboina. Lovia namana 'eva vilalo mai koa nama'itai evonu.

¹² Bo'akala'u e, dava namana 'eva kanania luva namatai sia boluva'ana'i pasisi, vutuvutuai 'o kanobatai 'o dava ka vanai emu luva'ana'i sia bovamomo'aia. Beia bodiaka "o' koanai 'o mo boluvala, 'o bodiaka 'asi'i koanai asi'i mo boluvala, kanaua'i asi'i omava'eva vuvua omakoala 'ounai.

¹³ Viloamuiiai kau ka eanana koanai bemeamea, kau ka viloamuiiai elalonama koanai vanama'ina masita be'abi.

¹⁴ Viloamuiiai kau ka e'olele koanai Dilava ena lo'e kauta namata be'aeta Lovia namana vana siavunai akanai bemeamea mai deoloai kauna beda-davu.

¹⁵ Abiveni meameana betata'u 'olele kauna bevanama'inala Lovia namana betata'u bevako'isia mai maiena si'avana koanai be'ou kao.

¹⁶ Kanaua 'ounai banomui ita emui si'avana oi bo'ou dae maivaka sibomui ka ka banomui akatai oi bomeamea, inoku emui 'olele benama'ina. Komolo kauna ena meamea 'eva esiavu maivaka maianina.

¹⁷ Elia 'eva kau ita boita, beia emeamea kula'ila dokadoka lamu sia be'aku, inoku lamu kanoai sia eaku vikau koi vuia kalakoi.

¹⁸ Mune'e emeamea 'udai, inoku lamu vutuvutuai eaku kano evaveiveia, inoku vuavuana evapuluata 'udai.

¹⁹ Bo'akala'u e, oi ka Dilava ena luva umaunai beda'aovo inoku banomui ka betata'u bevuala 'udai be'asi koanai,

²⁰ si'avana kauna kanaua ena koa si'avata vaikai bedulua, inoku Dilava betata'u si'avana kauna idumena ba ai bevamaulia maivaka si'avana doutamo be'ou kao. Kanania oi bolalovaia kave'i.

Malele Lava'ana'ina PETELO (1) Eleleia Kauna

Puka Laloana Ilena Luvana

Malele kanania 'eva abiveni kauta doutamo adedua namavaikata dedavili kauta beduluta eta abiveni bevakula'ilata. Abiveni kauta e'outa ia 'eva Iesu Keliso valina nam'ina belalovai 'inia. Iesu kanaua 'eva eba maivaka eko'isi 'udai, mai ena luvana'ia ia bemumue be'asi. Ena luvana'ia belalovaia kula'ila maikula'ilata bevi'ima beda'amo be'asi. Abiveni kauta kataua boutai eta abiveni bekovota. Kanaua 'ounai ia 'eva eta abiveniai belava 'ini beda'amo Keliso bemumue be'asi. Inoku melala kanaua'ia ia 'eva tavata be'abi.

Puka Iduvuna Namata

- a. Lova aku. (1.1 - 2)
- b. Dilava ena maui devaikabasi. (1.3 - 12)
- c. Maui kabukabuna. (1.13 - 2.10)
- d. Abiveni kauta eta koakoa kau anaana laloatai. (2.11 - 4.19)
- e. 'Ana'ia'vavai kauta eta vinala. (5.1 - 11)
- f. Luvana to'ota. (5.12 - 14)

Vanama'ina Luvana.

¹ Lau Petelo Iesu Keliso ena veauneke kau'u, Dilava edilamui kaumi oi oda'asiusiu kano edeatai da'a'au kaumi boimui oi o'ao, ua'i Ponito ai, Kalatia ai, Kapadokia ai, Asia ai mai Bitunia ai oi omimia kaumi alele venimui.

² Dilava ita kamata ena ikabasi makava vitaitanai edilamui inoku Idume Kabukabuna 'eva oi 'ani evakabukabumui, inoku Iesu Keliso lenea daitai oi bodadai ia lalanai emui si'avana bedeinia. Ameamea Dilava ena iulaveni koana mai nua'elu 'eva emuai namana be'ao.

Dilava Ekavanama'inala

Nuabata Umauna Evenita.

³ Eta Lovia namana Iesu Keliso Kamana Dilava ekavanama'inala, ia ena vilalo nama vaikana 'ounai Iesu Keliso eba ena ko'isi 'udai maolina lalanai ita evapuluta 'udai, inoku nuabata umauna evenita.

⁴ Ita kanuabata avuta Dilava nakuna bevenita. Vanama'ina kanaua 'eva 'ani eva'olua vutuvutuai ua'i oi emui, sia besi'avana, sia be'obu, maivaka sia betaule.

⁵ Dilava ena siavu etata'u e'alavumui emui abiveni dainai beda'amo vamaui kanaua 'ani eva'olua bevala'asia melala to'onai vamaulina oi boabia.

⁶ Kanania 'ounai lalomui benanama oi bolalonama si'asi'a, beia vali'u melala kava'inamo nuamui debavunu 'olana vikovo edeata edeata devakovomui 'ounai.

⁷ Vikovo kanaua 'eva emui abiveni ena nama'ina bevamomo'aia. Ia abiveni ena nama'ina 'eva kolo kanaua 'alovai devanama'inala beia 'ani betaule kolona ena nama'ina ekeinina. Emui abiveni kanaua devakovoa devanama'inala abivenina 'eva Iesu Keliso bevaila melalanai ivanama'inamui, iabi daemui mai 'olamui be'aku davanai be'ao.

⁸ Iesu sia oi oikaia kovo beia oi olalo'au venia. Vali'u sia oi oikala ia oi oabivenia inoku oi olalonama vaia, lalonama namana mai nama'ina kanaua 'eva luvai i'ou kave'ina sia bedaia.

⁹ 'Olana emui abiveni vuavuaana oi oabia, kanaua 'eva idumemui iva-maulita davana.

¹⁰ Enolea kauta kataua Dilava ena vilalo koana oi kevamuiiai bela'asi davana ia deta'u vamauli kanaua deka'vuia kave'i maivaka demalele'vaia kave'i.

¹¹ Idume Kabukabuna Keliso eta'u esinia Idumena 'eva enolea kauta nuatai emia, Keliso ena ana-ana mai ena nuavi ana-anana mulina be'asi davana evaikabasita 'ounai ia 'eva devakovia beikabasi melala davanai maivaka koana a boina.

¹² Dilava enolea kauta kevatai evala'asia ia eta vinaula 'eva sia sibota eta nama'ina dainai ia oi emui nama'ina dainai, maivaka vali'u vali nama'ina kanania 'eva deilolo vaia kauta detata'u Idume Kabukabuna vutuvutuiai esinia 'ovu easi kauna ena viduluai devaikabasi. Dava kania 'eva anelu vaka deula beikata une.

Mauli Kabukabunai Ekamia.

¹³ Kanaua 'ounai nuamui oi bovavai kave'i, oi bova'olu emui nuabata itoina 'eva Iesu Keliso bela'asi koanai iulaveni koana bele'au emuiiai.

¹⁴ Vali'u leleika melomuiiai oi bo'ao, kauanimui eta ula koakoata si'avata vaika 'ana'inai sia oi oikabasi koanai oi ovavaita koakoata sia oi bovavaita.

¹⁵ Ia e'aemui Dilavana ekabukabu boina oi vaka bokabukabu emui koakoa boutai laloatai.

¹⁶ Puka kabukabunai 'ani ilelena
 "Lau 'eva akabukabu 'ounai
 oi 'eva bokabukabu."

Lev 11.44, 45

¹⁷ Oi o'aea Kama, ia 'eva kau evaluvata koanai ikana enama'ina kauna sia elalovaia ia ka ka ena vinaula ena vinaula daitai bevaluvata. Kanaua 'ounai emui mia nia'i kanobatai 'eva maimakaumui oi bomimia vitaitana kano edea kaumui boina.

¹⁸ Oi 'ani oikabasi, Dilava oi emui maui si'avana vaika kanaua 'ava'avamui devenimui maui laloanai evamaulimui 'eva kanobata davata 'ani betaule kataua siliva 'o kolo boitai sia etavamui,

¹⁹ ia Keliso lalana nama'ina vaika mamoe nakuna kaunai loi 'o sia si'avana ka mamoeina boina etavamui.

²⁰ Dilava 'eva 'ani siako vaika kanobata asido'o epulu laloanai ia edilaia, inoku melala to'ona kanania'i evala'asia oi daimuiiai.

²¹ Oi Keliso dainai Dilava oabivenia, ia 'eva Keliso bai evako'isia 'udai mai nuavi evenia. Kanaua 'ounai oi emui abiveni mai emui nuabata 'eva Dilava enai emimia.

²² Vali'u Dilava ena luva umauna iabidaenai idumemui 'ani oi odeinita kave'i, bo'akalamui oi bolalo'au venita dokadoka mai dalana 'ounai, banomui oi bolalo'au venita dokadoka mainuamui boutai.

²³ Oi opulu 'udai 'eva sia kea kanaua bepepeda davanai, ia sia bepepeda keana kanaua Dilava ena luva emauli mai emia keinikeini luvanai oi opulu 'udai.

²⁴ 'Olana Puka kabukabunai ilelena boina,
 "Kau boutai 'eva ava boina,
 maivaka eta nuavi 'eva
 ava velavelana boina.
 Ava elamoda
 velavelana e'eko asi e'ole.

²⁵ Beia Lovia namana
 ena luva 'eva bemimia
 beda'amo to'ona asi'i."

Isa 40.6-8

Vali nama'ina kanaua deilolo vaia kevamui'ai 'eva luvana kanania.

2

¹ Kanaua 'ounai oi sibomui si'avana vinalata boutai, dede, dibadiba, mama, sisiba kao boutai oi boito'au.

² Melo 'oma'omana epupulu bae eula venia boina, melala boutai idume ena vamalele nama'ina oi boula venia, inoku namamui oi bo'ao beda'amo vamauli oi boabia.

³ 'Olana oi 'eva Lovia namana ena vanama'ina 'ani oi onovaia kovo.

*Lovia Namana 'Eva Maui Bika'ana,
Oi 'Eva Dilava Ena Kau.*

⁴ Oi bo'asi Lovia namana Iesu kevana, ia 'eva maui bika'ana, kanobata kauta debo'okaia beia Dilava eta'u bika'a kanaua edilai'a, inoku eikaia 'eva enama'ina vaika ia kevanai.

⁵ Oi vaka maui bika'ata boita, Idume Kabukabu ena siavu'ai Dilava ena lo'e kabukabunai oi bo'ao, oi 'eva ia ena kabukabu kaumui emui maui oi bovenia idume ainama davanai be'ao Dilava betata'u mai lalonamana beabimui dae Iesu Keliso dainai.

⁶ Puka Kabukabunai kanania eleleia koma,

“Oi kaia, lau bika'a ka abia isi
ua 'eva diu bika'ana nama'ina
vaika Siona lolonai ane'ea divo,
dava boutai ia akanai
bevalavata 'au,
ia beabivenia kauna 'eva
sia bemalalai.”

Isa 28.16

⁷ Kanaua 'ounai oi oabivenia kaumui kevamui'ai 'eva enama'ina vaika, ia sia deabivenia kauta kevatai 'eva bika'a 'avaeana ilelena boina,

“luma ivalavana kauta
ulana sia de'ula bika'ana 'eva
'ani luma diuna bika'anai eao.”

Sal 118.22

⁸ Maivaka,

“Kau bika'a kanaua'i
detatai delavatabu
mai delavade'i de'eko.”

Isa 8.14

Dilava ena luva sia de'ika sia devamomo'aia 'ounai ia de'eko, ua 'eva ia avuta Dilava ena lalovai vitaitanai.

⁹ Beia oi 'eva Dilava edilamui kaumui, lovia 'olana ena kabukabu kaumui, kabukabu iduvuna, kaumui katana 'eva Dilava ena. Dilava eabimui 'eva ena koakoa nama'ita oi bo'outa dae 'ounai, inoku ia 'eva oi vabuto'o laloanai e'eamui la'asi ena 'ailala nama'ina umauna laloanai evada'amui dodo.

¹⁰ 'Ana'inai oi 'eva sia Dilava ena kau ia vali'u 'eva oi 'ani Dilava ena kau, 'ana'inai oi 'eva Dilava sia elalomui ia vali'u 'eva Dilava ena vilalo 'ani oi oabia.

Dilava Ena Da'alabi Kauta.

¹¹ E'u lalo'au kaumui e, oi 'eva kano edea mai da'a 'avaea 'avaea kaumui kanobata kanania laloanai, avasiasimui, kauanimui eta koakoa 'obuta sia oi bovavai, kataua detata'u idumemui dekuaita.

¹² Sia deabiveni kauta viloatai emui koakoa 'eva bekomolo, devasi'avanamui si'avana kaumui ai devaomui kauta emui koakoa nama'ita be'ika, inoku Dilava vana bevanama'inala ia ena mue'udai melalanai.

¹³ Kau eta siavu kauta boutai leleta oi boda'a vai, ua 'eva Lovia namana 'olana iakuna 'ounai, kanobata loviana 'olana lelena oi bo'ika ia 'eva 'ola kauna,

¹⁴ maivaka kavamani kauta leleta oi bo'ika, ia 'eva 'ola kauna esinita si'avana kauta bevananata, ia vavai kave'i kauta bevanama'inata.

¹⁵ 'Olana Dilava ena ula 'eva emui koakoa nama'itai vabo'obo'o kauta eta luva si'asi'a be'alavuta.

¹⁶ Talavatu kevanai oi bo'avaea, beia emui mia 'avaea kanaua si'avana iluvuna davanai sia be'ao, oi 'eva Dilava da'alana iabinai oi bo'ao.

¹⁷ Kau boutai 'olata oi bo'aku, banomui oi bolalo'au venita, Dilava oi bomakau vai, lovia 'olana 'olana oi bo'aku.

Keliso Eanana Vitaitanai Ekanana.

¹⁸ Da'alabi kaumui e, emui 'ola kauta leleta oi boda'avai maimakaumui, sia nama'ina 'o luva komolo kauta mo kevatai ia aivala kauta kevatai vaka.

¹⁹ Ena si'avana asi'i beia Dilava elalovaia 'ounai anana ekoala kauna kanaua 'eva Dilava ia bevanama'inala.

²⁰ Koakoa si'avata oi bovavai inoku beakumui laloanai oi bovapasisi koanai ena nama'ina 'eva dava? Ia vinala nama'ita oi bovavai oi boanana laloanai oi bovapasisi kanaua 'eva mai nama'inana Dilava vailanai.

²¹ Kanania 'ounai Dilava oi e'aemui. Keliso 'eva eanana oi daimui ai, evikanimui eda'a ivavitaitai oi ia mulinai aena 'abutai oi bodada'a.

²² "Keliso 'eva sia si'avana ka evavaia maivaka nutunai dede luvana sia ka dedavalia."

Isa 53.9

²³ De'ou si'ala beia eta luva sia ka evamuea, anana eonovaia beia sia evabavunuta, beia boutai 'eva komoloai evaluva Dilavana imanai euda.

²⁴ Keliso kauaninai eta si'avana evuata au ido'o valaukuna akanai eba 'eva si'avana enai ekaba ia komolo enai eka maui. Deakuia loitai oi 'ani evanama'inamui.

²⁵ 'Ana'inai oi 'eva da'a 'avaea'avaea mamoea boina, beia vali'u 'eva 'ani oi omue oi oasi idumemui i'imata mai ika'inita kauna kevana.

3

Kamoane Kauta Mai 'A'ateta.

¹ 'A'ate e, itani da'alabi kauta eta 'ola kauta leleta de'ika boita, adamui leleta oi bo'ika, Lovia namana ena luva sia deabia dae kauta kataua 'eva sia luvai beia oi emui koakoa nama'itai vamauli beabia,

² emui koakoa komolota mai 'ola aku vinalata be'ika daitai.

³ Oi velamui 'eva sia kauanimui akanai ivavelana 'ounai, sia vuumui velata 'o kiamui boita kolo 'o dava 'amale'amaleta 'o emui ivadodo tavata namata boita.

⁴ Beia nuamui umauta davata, lalovai nama'ina manauna ena nama'ina sia betaule davanai oi bovavelata inoku kanaua Dilava vailanai ena nama'ina namavaikana.

⁵ 'Olana 'ana'ina melalanai kabukabu 'a'ateta kataua eta nuabata Dilava kevanai 'a'ateta kanaua devanama koma, adata leleta daitai dedai kave'i.

⁶ Sala adana Abela'amo lelena eika mai e'aeia ena lovia. Oi vaka komolo vinalana oi bovavaia mai melala boutai sia oi bomakau 'eva nakuna 'a'atemui ai oi bo'ao.

⁷ Kau e, dala vitaitanai oi vaka adamui ita oi bomia ka'ona, kauani vinaulatai debadebade beia 'olata oi bo'aku mai oi bo'imata kave'i, Dilava ena maui umauna ainamana ita oi boabi ka'ona, 'olana emui meamea dalana asi'i ema'alavua 'ounai.

Vinaula Komolo 'Ounai Ekanana.

⁸ Luva to'ona kanania, boumuiai nuamui beka'onamo, oi bolalovai lalovai, oi bovilalo'au viveni bo'a ka'onamo boita, oi bovilalo viveni, maivaka oi bomanau.

⁹ Eta si'avana tavata sia oi bovamue mai koakoa si'avata sia oi bovavai, 'o eta luva si'asi'a tavata sia oi bovamue kevatai sia oi boluva si'asi'a, beia devasi'avanamui kauta 'eva oi bovanama'inata, 'olana kanaua 'ounai e'aemui Dilavana ena vanama'ina oi boabia.

¹⁰ 'Olana Puka kabukabunai 'ani deleleia,
 "Kau ka be'ula maui belalo'au venia mai melala nama'ina
 beikala 'eva
 malana be'imala kave'i
 nutunai si'avana luvana
 sia beluvala,
 nutuna bibi'anai dede luvana
 sia beluvala kovo.

¹¹ Si'avana bevikanai
 vinaula nama'ita bevavai,
 nua'elu bekavua mulinai
 bedada'a.

¹² 'Olana Lovia namana makana
 'eva vinaula komolo kauta eikata,
 kaiana 'eva eta noinoi 'uluta eika,
 beia Lovia namana vailana
 'eva si'avana kauta emulita."

Sal 34.12-16

¹³ Oi vinaula nama'ina ousa venia oi bovavaia koanai dai betata'u oi bevananamui?

¹⁴ Beia vinaula komolota oi bovavai oi anana koanai oi 'eva bonama'ina Dilava vailanai. "Eta vaivivi luvata sia oi bomakau vaita nuamui sia bebavunu."

¹⁵ Beia Keliso 'eva nuamuiai 'olana oi bo'aku emui Lovia namana kabukabuna. Inoku melala boutai oi bova'olu, emui nuabata nuamuiai emimia nuabatana anina belavuai lavuai vaia kauta eta lavuailavuai luvana oi bovamuea mai vaka'onamui maivaka mai 'ola akumui.

¹⁶ Melala boutai emui maui laloanai nuamui bekomolo Dilava vailanai. Inoku kau kataua emui vinaula nama'ita Keliso enai oi ovavai vinaulatai de'oumui si'asi'a kauta vinaula kataua betata'u bevamalalaita.

¹⁷ 'Olana Dilava ena ula melalanai vinaula medianai oi boanana 'eva enama'ina, emui si'avana 'ounai oi boanana 'eva sia enama'ina.

¹⁸ 'Olana Keliso melala ka'onamoai eba si'avana iabiovota vinaulata boutai daitai, ia maiena va'eva kauna eta'u va'eva kauta 'abutai eba 'olana bevuata beda'a Dilava kevana. Kauaniai eba, beia idume ai emauli 'udai.

¹⁹ Keliso 'eva idumeai eao eda'a devabuto'o idumeta kevatai eilolo.

²⁰ Idume kataua 'eva 'ana'ina umaunai Noa aunakoi evavaia koanai, kau kataua Dilava lenea daitai sia dedai beia nuana evapasisia evi'ima belalo 'udai kauta. Beia aunakoi kanaua laloanai 'eva sia douta, kauta kalavani mo vei kanaua laloanai evamaulita.

²¹ Vitaitana vei 'eva vaidi'u kabukabuna Iesu Keliso ena ko'isi 'udai-ai oi evamaulimui koana, sia kauanimui 'obuta oi bodeini 'ounai ia oi boluva'ana'i nuamui nama'itai Dilava vilanai.

²² Keliso 'eva 'ani vutuvutuai ele'au, vali'u Dilava idibana duasi 'ola aku 'abunai emimia, anelu, lovia idumeta mai siavu kauta boutai e'ola vaita.

4

Eta Mauli.

¹ Keliso kauanai eanana ounai, oi vaka lalovai kanaua vitaitanai nuamui oi bovakula'ilata, 'olana kauani beanana kauanina 'eva si'avana bevikanai.

² Kanaua 'ounai emui mauli melalata boutai laloatai kauani ena ula si'avata vaika sia oi bovavai, ia Dilava ena ula vinalata oi bovavai.

³ 'Ana'inai oi 'eva pulu edea kauta eta ula vitaitatai oi omia 'ani edaimui. Mo'a, ula si'avata vaika vinalata oi ovavai, oi oinu ba, oi oaivala, oi ovabo'obo'o, dilava dedeta oi okukudivo venita.

⁴ Vali'u kau kataua 'eva detabulovo de'ou si'amui, 'olana oi ia ita sia oi ovaka'onamo sia oi oaivala 'ounai.

⁵ Beia ia 'eva eta koakoa daitai 'ani eva'olu mauli mai ba kauta bevaluvata Dilavana vilanai belavadivo valita bekakava.

⁶ Kanaua 'ounai vali nama'ina ba kauta kevatai eilolo vaia, ia vaka kauanita 'eva lavuai deabia kauta boutai boina, ia idumeta 'eva bemaui Dilava ena ula vitaitanai.

Dilava Ena Vilalo Koata.

⁷ Dava boutai eta ole 'eva 'ani e'asi, kanaua 'ounai sibomui oi bolalovaimui kave'i nuamui oi bovakula'ilata inoku oi bomeamea.

⁸ Beia namana umauna 'eva banomui oi bolalo'au venita mainuamui boutai, 'olana lalo'au 'eva si'avana doutamo evaku bubuta.

⁹ Emui lumai banomui ka ka oi boabita dae ia sia oi bonunulaita.

¹⁰ Dilava oi ka ka ena vilalo koanai ainama evenimui, inoku ka ka oi bodulumui Dilava ena vilalo koata edeata edeata i'imata kaumui mediamui ai oi bo'ao.

¹¹ Kau ka beilolo koanai ia 'eva luva Dilava enai e'asi luvana vitaitanamo beilolo vaia, mai kau ka e'ula bevidulu, ia vaka 'eva Dilava kula'ila evenia kula'ilana vitaitanamo bevavaia. Dava kataua boutai laloatai Dilava vana ekavanama'inala Iesu Keliso dainai. Nuavi mai siavu ia ena beda'amo to'ona asi'i. Amen.

Keliso Ena Kauai Ekao 'Ounai

Eka Anaana.

¹² E'u lalo'au kaumui e, ivakovo ananana emuai bepupulu 'eva sia oi botabulovo sia oi bolalovaia dava edeana ka emuai epupulu. Asi'i.

¹³ Oi bolalonama, 'olana oi 'eva Keliso eanana boina oi oanana, Keliso ena nuavi bela'asi koanai oi bolalonama si'asi'a.

¹⁴ Oi Keliso ena kau 'ounai de'ou si'amui koanai, nama'ina 'eva oi emui 'olana Dilava Idumena Kabukabuna nuavina 'eva oi akamui ai.

¹⁵ Oi ka oanana koanai sia akuaku dainai 'o vinoa dainai 'o vinala si'avana dainai 'o va'eva vavai kauta kau edeata eta vinala laloatai dedodo dainai.

¹⁶ Ia oi ka Keliso ena kau 'ounai oanana, oni 'eva sia bomalalai ia Dilava bovanama'inala va kanaua oabia 'ounai.

¹⁷ 'Olana melalana 'ani ele'au Dilava ena kau bevaluvata makava. Ita beva'ana'iata koanai Dilava valina nama'ina sia deabia dae kauta kataua kevatai 'eva a beole koma?

¹⁸ Puka kabukabunai kanania deleleia koma,

“Vinaula komolo kauta
mauli iabinai beanana koanai
Dilava sia deabia dae kauta
mai si'avana kauta
a belava 'ini koma?”

Aon 11.31

¹⁹ Kanaua 'ounai Dilava ena ula dainai deanana kauta 'eva vinaula nama'ita mo bevavai, idumeta 'eva evavaita Dilavana leleta e'ika kauna imana laloanai beudata.

5

Dilava Ena Mamoe 'Itona

Oiboika 'Inita.

¹ Oi viloaumuiai Dilava ena lo'e ai 'aida'aidamui kaumui avasiasimui, lau vaka ana'ivai kau'u, Keliso eanana 'eva lau maka'uai aikaia, nuavina bevaila laloanai lau maiavu'u.

² Dilava ena mamoe 'itona viloaumuiai i'imata kaumuiai oi bo'ao oi boika 'inita kave'i Dilava ena ula vitaitanai. Sia o'uto'ato'ai oi bovavaia, ia mainuamui bounai oi bovavai. Moni dainai sia oi bovinaula beia nuamui mai lalonamanai oi boika 'inita.

³ Oi bo'imata kauta etai sia loviai oi bo'ao, ia kevatai vaikavaika nama'ita kaumuiai oi bo'ao.

⁴ Inoku mamoe 'ima 'olana kauna Keliso bela'asi koanai oi 'eva 'ola ivakuavuna 'amale'amalena nuavina sia betaule kovo davana oi boabia.

⁵ Kau 'alu'alumui e, dala vitaitanai 'aida'aidata kauta leleta oi bo'ika, boumuiai sibomui manuai oi bovidulu viveni, 'olana Puka kabukabunai ilelena ediaka,

“Dilava 'eva apa kauta
bemulita, ia manau kauta
'eva ulata be'ula.”

Aon 3.34

⁶ Kanaua 'ounai sibomui oi bovakikumui Dilava ena siavu venunai oi bo-manau, melala be'asi laloanai ia betata'u oi beabimui isi.

⁷ Nuamui bavunuta boutai Dilava enai oi bone'e divo, 'olana ia 'eva oi e'imamui.

⁸ Oi bolalovai kave'i mai oi bo'imamui kave'i. Emui 'ou kauna diabolo 'eva oi kevamuiai eda'a keinikeini eninini itani 'oveka namana vana laioni boina evikavu kau ka bema ana lalovaina elalovai.

⁹ Emui abiveniai oi bolava 'ini diabolo oi bo'alavua, 'olana oi oikabasi bo'akalamui boutai kanobata kanania laloanai 'eva anana vitaitanamo devuala.

¹⁰ Iulaveni boutai 'olata Dilavana Keliso enai e'aemui ena mia keinikein-inai nuavina laloanai bevada'amui dodo kauna boni kava'inamo oi anana vakaia, mulinai ia sibona betata'u bevakomolomui, bevapasisimui, bevakula'ilamui, bevalava 'inimui kave'i.

¹¹ Siavu boutai 'eva Dilava ena beda'amo to'ona asi'i. Amen.

Vanama'ina Luvana To'ona.

¹² Sila ena viduluai lau malele kikina to'oto'ona kanania alelea. Lau aikala ia 'eva bo'akalata umauna. Lau alele venimui 'eva nuamui bavakula'ilata mai ba'ou dae Keliso dainai eanana 'eva Dilava ena iulaveni koana umauna. Oi iulaveni koana kanania laloanai oi bolava 'ini.

¹³ Dilava ena lo'e kauta Babulonia ai demimia oi ita Dilava eabimui isi kauta detata'u eta vanama'ina luvata devenimui, Maleko naku'u abiveniai vaka ena vanama'ina luvana evenimui.

¹⁴ Lalo'au koana viba'uai ka ka emui vanama'ina oi boveveni.

Lau ameamea Keliso enai oi omimia kaumui boumuiai nua'elu laloanai oi bomimia.

Malele Ivaluana PETELO (2) Eleleia Kauna

Puka Laloana Ilena Luvana

Malele kanania deleleia 'olana 'eva abiveni kauta be'outa ia 'eva vaikabasi kauta dedeta vaida lovata sia be'aku kovo. Ia kauta 'eva 'ani kau ita devaka'onamo eta abiveni mai eta mia maulina mediana bevavaia si'asi'a. Puka kanania etata'u kau e'outa luva kataua makavanai veauneke kauta devenita davata beabi 'inita, 'olana luva kataua'i ia Dilava mai Lovia namana Iesu Keliso beikabasita kave'i. Veauneke kauta 'eva makatai Iesu deikaia mai kaiatai ena vaikabasi 'uluta deika. Kau vaida dediaka Iesu 'eva sia bemumue be'asi 'ounai, puka kanania ediaka Iesu 'eva bemumue beasi dokadoka, beiamo vali'u komolonai sia be'asi, kanaua anina 'eva nia. Dilava 'eva eula kau boutai belalo'udai, kanaua 'ounai ia 'eva evi'ima maikula'ilana (3.9).

Puka Iduvuna Namata

- a. Lova aku. (1.1 - 2)
- b. Dilava ena 'ae'ae. (1.3 - 21)
- c. Vaikabasi kauta dedeta. (2.1 - 22)
- d. Lovia namana ena asi 'udai. (3.1 - 18)

Vanama'ina Luvana.

¹ Lau, Simona Petelo, Iesu Keliso ena da'alabi mai veauneke kau'u, e'u malele alelea evavasi eta Dilava mai ivamaulita kauna Iesu Keliso eta komolo dainai abiveni nama'ina umauna oi oabia vitaitana lai banomai kaumui kele'emui.

² Ameamea emui aoneka Dilava mai eta Lovia namana Iesu kevatai namana be'ao, inoku iulaveni koana mai nua'elu emui'ai 'eva namana be'ao.

Dilava Ena 'Ae'ae

Mai Ena Abidae.

³ Keliso 'eva Dilava ena siavu'ai dava boutai ekaula venita davata evenita inoku kataua'i ita maui umauna laloanai ekamia mai Dilava ikukudivo veninai ekamia, kanaua 'eva ita e'aeta ena nama'ina mai nuavi evenita Dilavana kaikabasia 'ounai.

⁴ Dala kanania'i ia eta'u veniveni namata mai nama'ita vaika eluva 'ana'i vaita davata evenita, inoku veniveni katania betata'u kanobata ena lalovai si'avata vaika bevasi'avanata davata etai beabi tau inoku ita ekasi Dilava ikaikanai ekao ia ita ekamia ka'ona.

⁵ Veniveni katania daitai oi bokula'ila, emui abiveni akanai koakoa nama'ina oi bone'ea 'au, mai emui koakoa nama'ina akanai ikabasi oi bone'ea 'au,

⁶ emui ikabasi akanai vakula'ila oi bone'ea 'au, emui vakula'ila akanai vapasisi oi bone'ea 'au, emui vapasisi akanai Dilava 'olana iakuna vinalana oi bone'ea 'au,

⁷ emui vinala Dilava 'olana iakuna akanai bo'a ka'onamo koakoana oi bone'ea 'au, emui bo'a ka'onamo koakoana akanai lalo'au oi bone'ea 'au.

⁸ Koakoa nama'ita katania oi bovavaita kula'ila emui'ai be'ao koanai, emui ikabasi eta Lovia namana Iesu Keliso enai 'eva bekula'ila mai bemomo'aia.

⁹ Ia kau ka katania sia bevavai koanai ia 'eva makana de'ede, sia eikaika mai ena si'avana 'ana'ita Dilava e'outa kao si'avanata 'eva 'ani ebolabolata.

¹⁰ Kanaua 'ounai bo'akala'u e, Dilava e'aemui mai edilamui ena kauai oi oao 'eva oi bokula'ila mai oi bovamomo'aia. Inoku kanaua oi bovavaia koanai sia oi bo'eko.

¹¹ Dala kanania'i oi 'eva komolo itoina bevenimui eta Lovia namana mai vamauli kauna Iesu Keliso ena lovia vanuana emia keinikeini vanuana laloanai oi boda'a dodo.

¹² Kanaua 'ounai oi Dilava ena luva umauna 'ani oi oikabasia kave'i mai oi oabia luvana akanai 'ani oi olava 'ini, beia melala boutai 'eva dava katania boutai bavalalovaimui une.

¹³ Lau mauli'uai amimia do'o laloanai alalovaia dava katania nuamui ai bavalalovaimui une 'eva ekomolo.

¹⁴ 'Olana eta Lovia namana Iesu Keliso e'ou'u vitaitanai aikabasi kave'i kauani'u kanania 'eva 'ani bavikania 'ounai.

¹⁵ Bavakovo bakula'ila inoku emui dala ka bavavaia inoku e'u ba mulinai 'eva dava katania boutai oi bolalovai 'inita.

Keliso Ena Nuavi Makamaiai

Laiikaia Kaumai.

¹⁶ Eta Lovia namana Iesu Keliso ena siavu mai ena asi kanobatai luvata lai avaikabasimui laloanai 'eva kanobata ena idiba sisibana sia ka lai akaoia, beia lai 'eva makamai umaunai ena siavu lai aikaia.

¹⁷ Iesu 'ola aku koana mai nuavi Kamana Dilava kevanai eabia laloanai lele ka 'ailala nuavina umauna laloanai e'ovu easi ediaka, "Kania 'eva lau Naku'u, e'u lalo'au kauna, alalonama venia vaika."

¹⁸ Ua'i lolo kabukabunai Iesu ita lai amia koanai lai sibomai umaumai lele kanania vutuvutu ai easi 'uluna lai aika.

¹⁹ Kanaua 'ounai enolea kauta luva deluvaia luvana lai avamomo'aia. Oi vaka eta luva daitai oi bodadai 'eva benama'ina itani lamepa 'ailalana vabuto'o laloanai e'ani boina, beda'amo vutuvutu be'ailala inoku 'avu'ani visuna nuamui ai be'ailala.

²⁰ Dava boutai akatai kanania 'eva oi bolalovai 'inia, Puka kabukabuna luvata 'eva sia enolea kauna ka sibona ena lalovai luvata eluvavai.

²¹ 'Olana enolea luvana 'eva sia kau ka ena ulai easi, ia kau kataua Idume Kabukabuna ena siavu laloanai demimia kauta deta'u Dilava lalovai evenita lalovaita luvata deluvavai.

2

Enolea Dedeta Eta

Koakoa Si'avata Vaika.

¹ Ana'inai Isalaela kauta vilootai enolea kauta dedeta vaidia demia vitaitana vaikabasi kauta dedeta vaidia viloomui ai bevaila. Eta vaikabasi dedeta kataua'i emui abiveni bevasi'avanata davatai bevaikabasi, Lovia namana lalanai etavata kauna de'ouia avuavu, inoku ia sibota ivaoleta vinalana devavaia molaumolau.

² Kau doutamo ia daitai bedadai kulakula koata bevavai, inoku koakoa kataua 'outai kau 'eva Dilava ena luva umauna enai beluva si'asi'a.

³ Vaikabasi kauta eta idono 'ounai dede sisibatai nuamui be'ani, beia eta lavuai 'eva 'ani siako vaika e'olu emimia maivaka ivaoleta kauna 'eva eibi evi'ima.

⁴ 'Olana Dilava anelu deva'eva kauta sia eikata vadai, ia 'alova eani keinikeini 'abuna laloanai eitota dodo, ua'i 'uli vabulana laloanai demimia lavuai melalana de'imala.

⁵ Dilava ulu 'ana'ina sia eikaia vadai, ia abaka evala'asia Dilava 'olana sia deaku kauta evaoleta. Ia Noa komolo eilolo vaia kauna mai banona kalakoi ka ita evamaulita.

⁶ Dilava eta'u Sodoma mai Gomola vanuata si'avata vaika mekau evakoata inoku 'alovai etouta avu deda'amo lavuai deao, vitaitanamo vaka Dilava 'olana sia de'aku kauta kevatai bepupulu.

⁷ Dilava eta'u komolo kauna Lota evamaulia, ia 'eva kau kataua talavatu deukuta kauta eta koakoa si'avatai nuana ebavunu.

⁸ ('Olana komolo kauna Lota 'eva ua'i ia vilodatai emia mala mala eta si'avana eika mai 'uluta eika, inoku koakoa kataua deta'u ia nuana dev-abavunua.)

⁹ Kanaua 'ounai Lovia namana 'eva ia 'olana de'aku kauta vikovo laloatai a bevamaulita koma 'eva eikabasi mai si'avana kauta mekau bekoala 'abunai a bevamiata koma vaka eikabasia beda'amo lavuai melalanai.

¹⁰ Kataua akatai 'eva kauani ena lalovai vinalata si'avata vaika deda'avaita ia Dilava ena siavu 'olana sia de'aku kauta 'eva mekau namana umauna bekoala.

Vaikabasi kauta dedeta katania 'eva nuata deto'oto'o vaika mai de'apa, eta 'ola aku asi'i mai luva si'avata nuavi kauta vutuvutuai demimia kataua de'outa.

¹¹ Anelu kataua eta kula'ila mai eta siavu 'eva nama vaikata vakaia vaikabasi kauta dedeta katania, beia ia kauta 'eva Lovia namana vilanai vaikabasi dedeta ivasi'avanata luvata sia deluvaia.

¹² Ia kau katania 'eva dava ovota sia de'ovo kauta luva si'avata deluva mamakau, vitaitana sisi kataua eta lalovai asi'i eta ulai mo demimia sisita boita kau ia beabita beaku bata 'ounai depulu, ia vaka be'ole itani 'asi boita.

¹³ Eta si'avana devavai si'avanata tavata vitaitata be'abi. Ia umauta laniai kauani ena koakoa si'avata vaika ivavaitai 'eva delalonama, mai ita oi boaniani ka'ona laloanai vaka bevamalahimui mai vamu beavavai si'asi'a.

¹⁴ Makata 'eva kulakulamo dekakavu mai si'avana ivavaitai sia debavunu, 'a'ate nuata sia dekula'ila 'a'ateta devuata deda'a si'avana 'abunai, nuata deidono vaika mai ia 'eva Dilava ena sivada laloanai.

¹⁵ Vaikabasi kauta dedeta katania 'eva dala komolona 'ani debolabolala mai dealu 'avaea alu 'avaea Beola nakuna enolea kauna Bala'ama mulinai dedada'a, ia 'eva vinala si'avana tavana monia beabia davana elalo'au venia vaika.

¹⁶ Ena si'avana dainai sibona ena doniki lele sia eikabasi donikina eta'u kau leletai ia e'ovenia, inoku enolea kauna nuana e'ailala ena bo'o kanaua eda'a vaia davana evapuala.

¹⁷ Kau katania 'eva itani vei debubudi 'abuta delada boita eta luva anita asi'i 'o vaea kula'ilana boina oli evivua to'ato'a lamu sia evuala e'asi, inoku Dilava 'abu evabula vaika 'abuna 'ani eva'olua ia eta.

¹⁸ Eta apa mai bo'o luvata deluluva maivaka kulakula koakoata si'avata vaika devavai mai kau kataua vali'u mo va'eva 'abutai ia vilodatai dela'asi kauta bevuaata bemumue.

¹⁹ Ia deluva'ana'i kau 'eva si'avana da'alana sia be'abi, beia ia sibota 'eva si'avana devavaia si'avanana da'alana iabina kautai de'ao, 'olana dava ka kau ena mau'i e'ola vaia koanai ia 'eva kanaua da'alana iabina kaunai e'ao.

²⁰ Kau kanobata maulina 'obunai dela'asi deasi eta Lovia namana mai Vamauli kauna Iesu Keliso deikabasi mune'e demumue kanobata ena si'avana laloanai inoku e'ola vaita koanai, kau kataua 'eva kevatai besi'avana vaika vakaia 'ana'inai mauili demia vaia davana.

²¹ Kau kataua boita 'eva dala komolona sia bemaikabasia 'eva bema-nama'ina, ia deikabasia inoku talavatu kabukabuna devenita talavatuna enai deda'aovo 'eva sia enama'ina.

²² Aoneka luvana ia etai davana 'eva emomo'ai, "Oveka emumue sibona e'ula 'ulana e'ani, mai boloma eidi'u kave'i vaika beia mune'e emumue edada'a 'ika'ikai eto'ato'a."

3

Lovia Namana Ena Asi Luva'ana'ina.

¹ E'u kau ma'adi e, vali'u kanania 'eva e'u malele ivaluana alelea evavasi kele'emui, malele lava'ana'ina mai kanania aleleta 'eva dava katania avalalovaimui une inoku emui lalovai lalovai bekamolo kave'i.

² E'u ula 'eva luva 'ani siako vaika enolea kauta kabukabuta deluvavai luvata mai talavatu luvata kataua eta Lovia namana mai Vamauli kauna ena veauneke kauta deta'u deveni luvata oi bolalovai 'ini.

³ Lava'ana'ina oi boikabasi kave'i inoku melala to'ota laloatai vabo'obo'o kauta vaida bela'asi, ia eta mauli 'eva sibota kauanita ena ula e'ana'ia vaita kauta, oi bevabo'omui,

⁴ kanania beluva koma, "Iesu eluva 'ana'i be'asi, una? Inoku ia a'i? 'Ava'avata 'ani deba palu, beia dava boutai 'eva 'abutai mo kanobata epulu koanai easi mo vali'u."

⁵ Beia eta luva 'eva sia dekomolo luva umauna 'eva sia delalovai 'inia, 'ana'inai Dilava ena luvai vutuvutu mai kanobata depulu, inoku kanobata 'eva atubata laloanai ele'au epulu mai 'atu eta'u kanobata ekaiua.

⁶ Mune'e vei eta'u kanobata 'ana'ina abakai evaolea.

⁷ Dilava ena luva ka'onamo kanaua vali'u vutuvutu mai kanobatai demimia davata eabi 'inita 'alovai bevaoleta, beia beda'amo Dilava 'olana sia de'aku kauta eta lavuai mai eta ole melalanai.

⁸ E'u kau ma'adi e, dava ka'onamo kanania 'eva sia oi bobolabolala, Lovia namana vailanai melala ka'onamo 'eva itani vikau da ka'onamo (1,000) mai vikau da ka'onamo 'eva itani melala ka'onamo.

⁹ Lovia namana 'eva sia emaka'i ena luva'ana'i vinalata ivavaitai, sia vaida delalovaia boina, ia 'eva oi evakula'ilamui 'olana sia e'ula kau ka betaule, ia e'ula kau boutai eta si'avanai belalo 'udai.

¹⁰ Beia Lovia namana ena melala be'asi 'eva itani vinoa kauna boina, melala kanaua'i 'eva 'ulu nama vaikana bevuvua laloanai vutuvutu betaule, vutuvutu laloana davata boutai 'alovai be'ani, mai kanobata mai akanai davata boutai betaule.

¹¹ Dava boutai 'eva kanaua beole koma koanai, oi 'eva kau a boimui ai oi bo'ao? Emui mauli 'eva bekabukabu mai Dilava 'olana iakuna maulinai oi bomimia.

¹² Dilava ena asi melalana oi o'imala laloanai oi bovinaula kula'ila melala kanaua ena asi bemolau. Melala kanaua'i 'eva vutuvutu beani palu mai vutuvutu davata 'alova siavunai beveve palu.

¹³ Beia ita 'eva Dilava eluva'ana'i vaia luva'ana'ina ka'imala, ua 'eva vutuvutu mai kanobata makamakana vinala komolo kauta mo bemia vaia 'abuna.

¹⁴ Kanaua 'ounai, e'u kau ma'adi e, melala kanaua oi o'imala laloanai oi bovinaula kula'ila, si'avana sia oi bovavai mai sia oi bova'eva Dilava vailanai maivuka mainua'elumui ia ita oi bomimia.

¹⁵ Oi bolalovai 'inia eta Lovia namana ena vakula'ilai 'eva ita bevamaulita. Bo'akalata eta lalo'au kauna Paulo aoneka Dilava evenia aonekana kanaua'i luva vitaitanai mo elele venimui.

¹⁶ Ena malele boutai laloatai dava katania lovata e'aku, davata vaida 'eva depasisi mai ovota sia ekaovo, inoku kau eta ikabasi dekiki kauta mai nuata sia depasisi kauta detata'u luva anina deluvala va'eva vitaitana Puka

kabukabuna luvana vaidai devavaia boina. Kanaua devavaia 'eva ia sibota bevaoleta.

¹⁷ Kanaua 'ounai, bo'akala'u ma'adi e, kanania 'eva oi oikabasia 'ounai oi bo'imamui kave'i, asi'i talavatu deukua kauta eta va'evai oi omalava 'au, inoku oi oma'eko 'ounai.

¹⁸ Beia eta Lovia namana mai ivamaulita kauna Iesu Keliso ena iulaveni koana mai ia ikabasinai oi bokukubu. Ameamea nuavi 'eva ia enai vali'u beda'a mo to'ona asi'i. Amen.

Malele Lava'ana'ina IOANE (1) Eleleia Kauna

Puka Laloana Ielena luvana

Malele kanania 'olana 'eva lua. Ioane e'ula abiveni kauta beduluta, inoku ia mai Dilava ita Kamata, mai Nakuna Iesu Keliso ita nuata beka'onamo. Ivaluna 'eva ia sia e'ula dede kauta de'asi delebata eta abiveni Dilava kevanai davana beabia tau. Kau katania eta koakoa 'eva vabulai demimia inoku kanania deluva koma, "Kanobata kanania davata 'eva sia denama'ina. Iesu 'eva Dilava nakuna, kanaua 'ounai ia kauai sia be'asi, kanobata kanania davata ita sia bemia ka'ona, ita kau kavavaia boina 'eva sia bedaia." Maivaka dediaka, "Kau ka e'ula bemia kave'i Dilava kevanai koanai, ia 'eva kanobata kanania davata sia belalonama vaita, kataua daitai nuana sia belaloto'ato'a".

Malele kanania eleleia 'eva dede katania leleta de'ika kauta evavaita si'asi'a dokadoka. Ia ediaka Iesu 'eva easi ia 'eva kau umauna, inoku Iesu deabivenia kauta kataua 'eva Iesu beulavenia dokadoka mai kau vaka belalonama venita.

Puka Iduvuna Namata

- a. Lova aku. (1.1 - 4)
- b. 'Ailala mai vabula. (1.5 – 2.29)
- c. Dilava nakuna mai diabololo nakuna. (3.1 - 24)
- d. Luva umauna mai va'eva. (4.1 - 6)
- e. Lalo'au koana. (4.7 - 21)
- f. Abiveni ena siavu. (5.1 - 21)

Mauli Luvana.

¹ Lau vali'u vali kanania alele venimui 'eva kau makavana umaunai emia kauna kanaua valina, kau kanaua kaiamaiai lelana lai aika, makamaiai lai aikaia, makamai umaunai lai aikaia kave'i mai imamaiai lai abia kovo. Ia 'eva Mauli Luvana kauna kanaua 'eva Keliso mauli 'olana.

² Mauli kanania kanobatai evala'asia. Mauli keinikeini kauna kanania Keliso lai aikaia 'ounai valina lai akakava mai lai ailolo vaia kevamuiai. Ia 'eva Kamana ita demia inoku kevamaiai evala'asia.

³ Lai dava lai aikaia maivaka 'uluna lai aika davana lai ailolo vaia kevamuiai 'eva oi mai lai ita ekavaka'onamo. Eta vaka'onamo 'eva Kamana mai Nakuna Iesu Keliso 'ani ita ita.

⁴ Lai alele venimui 'olana 'eva ita ekalalonama ka'onamo.

Dilava 'Eva Ailala.

⁵ Vali Keliso enai lai aika valina vali'u lai ailolo vaia kevamuiai 'eva kanania. Dilava 'eva 'ailala, Ia enai 'eva vabuto'o asi'i vaika.

⁶ Ita kamadiaka Dilava ita kavaka'onamo beia vabuto'o laloanai kadada'a koanai ita 'eva kadedede mai Dilava ena luva umauna sia kada'avaia.

⁷ Beia Dilava 'ailala laloanai emimia boina ita 'ailalai kadada'a koanai ita 'eva banota ita ekavaka'onamo, Nakuna Iesu lalanai eta si'avana boutai edeini ovo.

⁸ Ita kamadiaka eta si'avana asi'i koanai ita sibota kalebata maivaka Dilava ena luva umauna 'eva nuatai asi'i.

⁹ Beia ita eta si'avana Dilava vilanai eka'outa dae koanai ia 'eva lele ivavua venita kauna mai komolo kauna inoku eta si'avana be'ou kao maivaka eta va'eva boutai bedeinita ovo.

¹⁰ Ita kamadiaka si'avana sia ka kavavaia koanai Dilava 'eva dede kaunai kavaoa, maivaka ena luva 'eva nuatai asi'i vaika.

2

Keliso 'Eva Ita Iduluta Kauna.

¹ Naku'u ma'adi e, lau kanania alelea evavasi kele'emui 'eva oi si'avana sia ka oi bovavaia 'ounai. Beia mo kau ka si'avana evavaia koanai ita iduluta kauna ka 'eva emimia Kamana be'oua ita daitai, ia 'eva komolo kauna Iesu Keliso.

² Ia sibona ena mauili eveni vaka'ona davanai eao eta si'avana i'ou kaota daitai, sia ita sibota mo daitai ia kau boutai eta si'avana daitai.

³ Ita Dilava e'outa talavatuta luvata kada'a vaita koanai eka ikabasi ita 'eva Dilava kaikabasia.

⁴ Kau ka bemadiaka, "Lau Dilava aikabasia," beia Dilava ena talavatu sia eda'avaita koanai, kau kanaua 'eva dede kauna, ia nuanai Dilava ena luva umauna 'eva sia emimia.

⁵ Kau ka Dilava ena luva eda'avaita kauna 'eva Dilava elalo'au venia umauna. Kanaua'i ekaikabasi kave'i ita 'eva Dilava nuanai.

⁶ Kau ka ediaka ia Dilava enai emimia kauna 'eva Iesu emauli vaia mauilina vitaitanai bemaui.

Talavatu Luvana Makamakana.

⁷ E'u kau ma'adi e, talavatu luvana kanania alelea evavasi 'eva sia makamakana, ia talavatu luvana 'ana'ina 'ani makavanai oi oabia laloanai oi oabivenia, talavatu luvana kanania 'eva 'ana'ina 'ani oi oika luvana.

⁸ Beia talavatu luvana kanania 'eva makamakana, anina umauna 'eva Keliso mai oi kevamui'ai 'ani ekaikala, 'olana vabuto'o 'eva 'ani etaule, ia 'ailala umauna 'ani ekakala.

⁹ Kau ka bediaka ia 'eva 'ailala laloanai emimia, beia bo'akalana ulana sia e'ula kauna ia 'eva vali'u vabuto'o laloanai emimia do'o.

¹⁰ Kau ka bo'akalana elalo'au venia 'eva 'ailala laloanai emimia, inoku kele'enai si'avana asi'i, sia kau ka bevava'evaia.

¹¹ Ia kau ka bo'akalana ulana sia e'ula kauna 'eva vabuto'o laloanai emimia mai vabuto'o laloanai edada'a. Vabuto'o eta'u ia makana 'ani e'alavuta 'ounai, a eda'ala 'eva sia eikabasi.

¹² Naku'u ma'adi e, alele venimui 'olana 'eva emui si'avana Keliso vanai 'ani i'ou kaota.

¹³ Kamamai kaumui e, alele venimui 'olana 'eva oi kau kanaua makavanai emia easi mo vali'u kauna 'ani oi oikabasia.

Kau 'alu'alumui e, alele venimui 'olana 'eva oi kau si'avana vaika 'ani oi ova'ekoa.

¹⁴ Naku'u e, alele venimui 'olana 'eva oi Kamata oi oikabasia. Kamamai kaumui e, alele venimui 'olana 'eva oi kau kanaua makavanai emia easi mo vali'u kauna

'ani oi oikabasia.
 Kau 'alu'alumui e,
 alele venimui 'olana 'eva
 oi okula'ila Dilava ena luva
 nuamuiiai emimia 'ounai
 kau si'avana vaika
 'ani oi ova'ekoa.

¹⁵ Kanobata mai laloanai demimia davata boutai sia oi bolalo'au venita, beia kau ka kanobata elalo'au venia koanai, ia 'eva Kamata ena lalo'au 'eva sia ia nuanai.

¹⁶ 'Olana kanobata laloana davata boutai 'eva kauani ena ula vaika davata bevavai, maka ena ula vaika davata be'ika, mai lovia davata beapavaita, kataua boita boutai 'eva Kamata kevanai sia de'asi ia kanobata enai de'asi.

¹⁷ Kanobata mai laloana iula venia davata boutai 'ani detaule palu, ia Dilava ena ula vinalana devavaia kauta 'eva bemauii keinikeini.

Keliso Ena 'Ou Kauna.

¹⁸ Naku'u e, kanobata bepupua melalana 'eva 'ani ele'au. Vali 'ani oi oika Keliso ena 'ou kauna e'asi, mai vali'u Keliso ena 'ou kauta doutamo 'eva 'ani devaila. Kanaua 'ounai ita kaikabasi melala to'ona 'eva 'ani ele'au.

¹⁹ Kau kataua kevatai dela'asi beia ia 'eva sia ita banota umauta. Bema ita banota koanai, ita ia ita kamamia ka'ona. Beia ia eta da'a ovoai evala'asia kave'i ia 'eva sia ita banota.

²⁰ Beia oi 'eva Kabukabu kauna Keliso eta'u Idume Kabukabuna eveni davana 'ani oi oabia nuamuiiai, kanaua 'ounai oi boumuiiai 'eva Dilava ena luva umauna oi oikabasia.

²¹ Lau oi sia alele venimui 'olana oi Dilava ena luva umauna sia oi oikabasia 'ounai, ia oi 'eva Dilava ena luva umauna 'ani oi oikabasia. Inoku oi 'ani oi oikabasi dede 'eva Dilava ena luva umauna enai sia e'asi.

²² Dede kauna 'eva dai? Ia ediaka Iesu 'eva sia Keliso. Kau kanaua boina 'eva Keliso ena 'ou kauna, ia 'eva Kamana mai Nakuna ita e'outa avuavu.

²³ Kau ka Kau Nakuna e'oua avuavu kauna ia enai 'eva Kamana asi'i. Kau ka Kau Nakuna evamomo'aia kauna 'eva Kamana vaka ia kevanai.

²⁴ Makavanai luva oi oika luvana 'eva nuamuiiai bemimia. Oi oika luvana kanaua oi boda'a vaia koanai, oi 'eva Nakuna laloanai mai Kamana laloanai oi bomimia.

²⁵ Kanania 'eva Keliso sibona eluva 'ana'i vaia ita eta, mauii keinikeini bevenita.

²⁶ Alele venimui eta ula belebamui kauta kataua luvata aluluva.

²⁷ Ia oi 'eva Keliso eta'u Idume Kabukabuna evenimui nuamuiiai emimia, kanaua 'ounai sia kau ka bevaikabasimui beia 'ani edaia. 'Olana Idume Kabukabuna 'eva dava boutai evaikabasimui, ena vaikabasi 'eva umauta, ia sia ededede. Idume Kabukabuna evaikabasimui vitaitanai melala boutai Keliso laloanai oi bomimia.

²⁸ Naku'u ma'adi e, vali'u Keliso laloanai oi bomimia, 'olana ia ena mue 'udai melalanai ita 'eva ekakula'ila maivaka sia ekamalalai ia vilanai.

²⁹ Oi oikabasi Keliso 'eva komolo kauna koanai, oi boikabasi kave'i kau kataua komolo vinalata devavai kauta boutai 'eva Dilava nakuna.

3

Dilava Nakunai Kao Kauta.

¹ Kalalovai kave'i, Kamata ena lalo'au kevatai namavaikana inoku e'aeta ita 'eva ia nakuna. Ita 'eva ia nakuna umauta. Kanobata kauta sia deikabasia 'olana 'eva ia Dilava sia deikabasia 'ounai.

² E'u kau ma'adi e, vali'u ita 'eva Dilava nakuna, ita kau aboita 'eva asido'o ela'asi kave'i, beia ita kaikabasi Keliso be'asi koanai ita 'eva ia boinai ekao, 'olana ia umauna ekaikala.

³ Kau boutai Keliso kevanai nuabata kanania'i demimia kauta 'eva sibota nuatai si'avana beasi'i vitaitana Keliso nuanai si'avana asi'i boina.

⁴ Kau ka si'avana evavaia 'eva Dilava ena talavatu evaivivia, 'olana si'avana 'eva talavatu evaivivia.

⁵ Beia oi 'ani oi oikabasi Keliso evaila 'eva si'avana beabi ovo, ia nuanai 'eva si'avana asi'i.

⁶ Kanaua 'ounai kau ka Keliso ita demia ka'ona kauna 'eva si'avana sia bevavai basibasi. Ia kau ka si'avana evavai basibasi kauna 'eva Keliso sia eikala une maivaka sia eikabasia.

⁷ Naku'u ma'adi e, sia kau ka bevuumui beda'a va'eva vavai 'abutai. Kau ka vinaula komolona evavaia kauna 'eva ekomolo, vitaitana Keliso ekomolo boina.

⁸ Si'avana evavai basibasi kauna 'eva Diabolo ena, 'olana Diabolo 'eva 'ani makavanai si'avana evavai easi mo vali'u. Dilava nakuna easi 'olana 'eva kanania, Diabolo ena vinaula bevaolea.

⁹ Kau ka Dilava nakunai epupulu kauna 'eva si'avana sia bevavai basibasi, 'olana maui makamakana Dilava enai e'asi maulina ia nuanai emimia. Ia Dilava enai epulu 'ounai si'avana sia bevavai basibasi.

¹⁰ Inoku Dilava nakuna mai Diabolo nakuna viloota 'eva ekaikabasi kave'i. Kau ka vinaula komolona sia evavaia 'o bo'akalana sia elalo'au venia kauna 'eva sia Dilava nakuna.

Ita Ka Ka Ekavilalo'au Viveni.

¹¹ 'Ana'inai oi oabiveni laloanai vali oi oika valina kanania: Ita ka ka ekavilalo'au viveni.

¹² Kaino boinai sia oi bo'ao, ia 'eva Diabolo ena kau, sibona kadina Abela eaku bala. Dava 'ounai Kaino Abela eaku bala? 'Olana ia ena koakoa 'eva desi'avana, beia kadina ena koakoa 'eva dekomolo.

¹³ Bo'akala'u e, kanobata kauta ulamui sia be'ula koanai, sia oi botabulovo.

¹⁴ Ita bo'akalata kalalo'au venita 'ounai kaikabasi ita 'eva ba laloanai 'ani kala'asi maui makamakana laloanai kadodo. Ia kau ka ena lalo'au asi'i kauna 'eva ba laloanai emimia do'o.

¹⁵ Bo'akalana ulana sia e'ula kauna 'eva akuaku kauna, oi oikabasi akuaku kauna nuanai 'eva maui keinikeini asi'i.

¹⁶ Keliso ena maui eveni ita daitai. Kanaua'i ita kaikabasi lalo'au umauna 'eva dava. Kanaua 'ounai ita vaka eta maui ekaveni bo'akalata daitai.

¹⁷ Kevanai dava doutamo kauna bo'akalana eulalu kauna eikala beia sia edulua koanai, kaikabasi Dilava ena lalo'au 'eva ia nuanai sia emimia.

¹⁸ Naku'u ma'adi e, eta lalo'au 'eva luvai mo mai nututai mo sia ekaluvala 'avaea, ia eta lalo'au 'eva eta koakoa umaulai ekavaika vaikavaia.

Ekakula'ila Dilava Vailanai.

¹⁹ Dala kanania'i ekaikabasi ita 'eva Dilava ena luva umaunai kamimia, maivaka nuata bekula'ila Dilava vailanai.

²⁰ Bema nuata bevalalovaita si'asi'a koanai, ita ekaikabasi Dilava 'eva enama vaika vakaia ita nuata mai kaikabasi davata boutai, maivaka ia 'eva dava boutai eikabasita.

²¹ E'u kau ma'adi e, ita nuata sia bevalalovaita si'asi'a koanai ita maikula'ilata Dilava vailanai 'ani ekalavadio.

²² Inoku kevanai dava boutai ekanoinoi vai davata bevenita, 'olana ena talavatu luvana kada'avaia mai ivanama'inana vinaulana kavavaia.

²³ Dilava ena talavatu luvana 'eva kanania, ita Ia Nakuna Iesu Keliso vana ekabivenia mai e'outa vitaitana ka ka ekavilalo'au viveni.

²⁴ Dilava ena talavatu luvana eda'avaia kauna 'eva Dilava nuanai emimia, Dilava vaka ia nuanai emimia. Dilava Idume Kabukabuna evenita 'ounai, ita kaikabasi Dilava 'eva ita nuatai.

4

Dilava Idumena Mai Ka'uba Si'avana.

¹ E'u kau ma'adi e, Idume Kabukabuna deabia dekoma kauta boutai eta luva sia oi bovamomo'aita, ia oi bokovota makava oi boikabasi idume kanaua 'eva Dilava enai e'asi 'o asi'i. 'Olana enolea kauta dedeta doutamo kanobatai 'ani dela'asi 'abu bounai ai.

² Dala kanania'i ekaikabasi ia 'eva Dilava Idumena deabia: Kau ka be'ou dae Iesu Keliso 'eva kauaniai easi kanobatai koanai, idume kanaua ia eabia idumena 'eva Dilava enai e'asi.

³ Beia idume ka Iesu e'oua avuavu 'eva Dilava enai sia e'asi. Idume kanaua 'eva Keliso ena 'ou kauna Diabolo enai e'asi. Valina oi oika be'asi 'eva ia 'ani easi vali'u kanobata kanania laloanai.

⁴ Naku'u ma'adi e, oi 'eva Dilava ena, enolea kauta dedeta oi ova'ekotasi, 'olana Dilava Idumena nuamui ai emimia 'eva ekula'ila vaika vakaia diabolo kanobata kauta kevatai kanaua.

⁵ Ia enolea dedeta 'eva kanobata ena, kanaua 'ounai kanobata luvata mo deluva vaita kanobata kauta ia leleta de'ika.

⁶ Beia ita 'eva Dilava ena, kau ka Dilava eikabasia kauna 'eva leleta be'ika, ia kau ka sia Dilava ena kauna 'eva leleta sia be'ika. Kanania boinai luva umauna idumena mai dede idumena 'eva 'ani ekaikabasi.

Dilava 'Eva Lalo'au.

⁷ E'u kau ma'adi e, ka ka kamalalo'au viveni, 'olana lalo'au 'eva Dilava kevanai e'asi. Evilalo'au viveni kauna 'eva Dilava enai epupulu, maivaka Dilava eikabasia.

⁸ Ia sia evilalo'au kauna 'eva Dilava sia eikabasia, 'olana Dilava 'eva lalo'au.

⁹ Dilava 'eva ena lalo'au kanania evaikata koma, Nakuna ka'oukukunamo esinia easi kanobatai, inoku ia dainai ita ekamauli.

¹⁰ Lalo'au umauna 'eva kanania: Ita Dilava sia kalalo'au venia, beia Dilava ita elalo'au venita 'ounai Nakuna esinia easi ita eta si'avana i'oukaota veniveni davanai eao.

¹¹ E'u kau ma'adi e, Dilava 'eva kanania elalo'au venita koma 'ounai, ita vaka banota ka ka kanaua ekalalo'au venita koma.

¹² Sia kau ka Dilava eikaia kovo, beia ita banota ka ka kalalo'au venita koanai, Dilava 'eva ita nuatai emimia, ena lalo'au 'eva enama'ina vaika ita nuatai.

¹³ Dilava Idume Kabukabuna evenita 'ounai, kaikabasi ita 'eva Dilava nuanai kamimia mai ia vaka ita nuatai emimia.

¹⁴ Dilava Nakuna esinia easi kanobatai kau ivamaulita kaunai eao, inoku lai 'ani aikaia mai lai a'ouia dae.

¹⁵ Kau ka ena luvai bevamomo'aia Iesu 'eva Dilava Nakuna koanai, Dilava 'eva ia nuanai emimia, ia vaka Dilava nuanai emimia.

¹⁶ Elalo'au venita Dilavana kaikabasia mai kabivenia.

Luva umauna Dilava 'eva lalo'au. Kau ka kau elalo'au venita kauna 'eva Dilava ia nuanai emimia, ia vaka Dilava nuanai emimia.

¹⁷ Dala kanania'i lalo'au nuatai 'eva enama'ina vaika, inoku ita 'eva sia ekamakau Dilava ena lavuai melalana laloanai, 'olana kanobata kanania laloanai eta mau'i 'eva Keliso ena mau'i vitaitana.

¹⁸ Dilava ena lalo'au laloanai 'eva sia ekamakau, Dilava ena lalo'au kula'ilanai 'eva makau boutai elo'ota asi, 'olana makau laloanai mekau

lalovaina emimia. Kanaua 'ounai kau ka emakau 'eva ia nuanai lalo'au asido'o ekula'ila kave'i.

¹⁹ Ita ka ka banota kalalo'au venita 'olana Dilava ita elalo'au venita makava 'ounai.

²⁰ Kau ka ediaka ia Dilava elalo'au venia beia bo'akalana ulana sia e'ula koanai, ia 'eva dede kauna. Kau ka bo'akalana kaikala kauna sia elalo'au venia 'eva Dilava sia kaikala kauna sia belalo'au venia bedaia.

²¹ Keliso talavatu luvana evenita talavatuna kanania: Dilava elalo'au venia kauna 'eva bo'akalana vaka belalo'au venia.

5

Abiveni Kauta Kanobata Ena Koakoa Ulata Sia De'ula.

¹ Kau ka Iesu eabivenia ia 'eva Keliso kauna kanaua 'eva Dilava nakuna, Kamana elalo'au venia kauna 'eva ia enai epulu melona vaka elalo'au venita.

² Dilava kalalo'au venia mai ena talavatu luvata kadada'a vaita koanai, ekaikabasi komolo ita 'eva Dilava nakuna kalalo'au venita.

³ Ita Dilava kalalo'au venia 'eva ena talavatu luvata ekada'a vaita. Maivaka ena talavatu luvata 'eva sia depasisi ita kevatai.

⁴ 'Olana Dilava nakuna boutai 'eva kanobata siavuna deva'ekoasia. Ita Dilava kabivenia, koakoa kanania'i kanobata ena siavu kava'ekoasia.

⁵ Kanaua 'ounai kanobata siavuna deva'ekoasia kauta kataua mo sibota deabiveni Iesu 'eva Dilava Nakuna.

Dilava Eta'u Nakuna Valina Ekava.

⁶ Iesu Keliso 'eva veiai mai lalai easi, veiai eidi'u kabukabu mai au ido'o valaukuna akanai eba. Ia 'eva sia veiai mo easi, ia veiai mai lalai easi. Idume Kabukabuna vaka eluva asi, 'olana Idume Kabukabuna 'eva Dilava ena luva umauna.

⁷ Kanaua 'ounai kakoina 'eva Iesu devamomo'ia:

⁸ Idume Kabukabuna, vei, mai lala, kakoina eta luva 'eva ka'onamo, Iesu 'eva Dilava Nakuna.

⁹ Ita kau deluva asi luvata eka abitadae, beia Dilava eluva asi luvana 'eva namavaikana 'olana ia 'eva Dilava, eluva asi vaia luvana 'eva ia Nakuna valina.

¹⁰ Kau ka Dilava Nakuna eabivenia kauna 'eva eluva asi vaia luvana kanania ia nuanai emimia. Dilava sia eabivenia kauna 'eva Dilava dede kaunai evaoo, 'olana kau kanaua 'eva Dilava Nakuna enai eluvaia luvana kanaua sia eabivenia.

¹¹ Dilava eluva asi vaia luvana 'eva kanania: Dilava 'eva maui keinikeini evenita, inoku maui kanania 'eva ia Nakuna enai emimia.

¹² Dilava Nakuna eabia dae kauna 'eva maui 'ani eabia, ia Dilava Nakuna sia eabia dae kauna 'eva maui sia eabia.

Mauli Keinikeini.

¹³ Dilava Nakuna vana oi oabivenia kaumui malele kanania alele venimui, 'olana oi boikabasi maui keinikeini 'eva 'ani oi oabia.

¹⁴ Ita 'eva vakula'ila kanania kabia Dilava vailanai, ita ia ena ula vitaitanai dava ka ekanoia koanai leleta e'ika.

¹⁵ Ita ekaikabasi Dilava enai dava dava kanoinoi vaita 'eva leleta e'ika koanai, ekaikabasi komolo kanoinoi vai davata 'eva 'ani eka abita.

¹⁶ Kau ka bo'akalana enai si'avana kanaua sia eba davana eikala koanai akanai bemeamea, inoku Dilava betata'u bo'akalana kanaua maui bevenia. Lau kau kataua eta si'avana sia bevuata beda'a ba 'abuna kauta luvata aluluva. Beia kau vaida si'avana ka devavaia kanaua betata'u bevuata

beda'a ba 'abuna. Lau si'avana kanaua akanai bameamea davana lovana sia akua.

¹⁷ Va'eva vavai boutai 'eva si'avana, beia si'avana vaidia 'eva sia devuata deda'a ba keinikeini 'abuna.

¹⁸ Ita kaikabasi Dilava nakunai de'ao kauta 'eva si'avana sia devavai basibasi. Dilava Nakuna e'imata kave'i, kau si'avana vaika ia sia beabita kovo.

¹⁹ Kaikabasi ita 'eva Dilava nakuna, ia kanobata itoina 'eva kau si'avana vaika ena siavu laloanai.

²⁰ Maiyaka ita kaikabasi Dilava Nakuna easi 'eva nuata eva'ailalala, kanaua'i ita Dilava umauna ekaikabasia, mai ita 'eva Dilava umauna nuanai mai Nakuna Iesu Keliso nuanai kamimia. Iesu Keliso 'eva Dilava umauna maiyaka ia 'eva mauili keinikeini Dilavana.

²¹ Naku'u ma'adi e, dede dilavata kevatai oi bo'imamui kave'i mai kevatai oi boda'a tau.

Malele Ivaluana IOANE (2) Eleleia Kauna

Puka Laloana Ilelena Luvana

Malele kanania 'eva 'kau namana' eleleia eda'a 'ateate ka mai nakuna' ita kevata. Ateate kanania ivavitaitana 'eva abiveni kauta. Malele eleleia ena ula 'eva ia ka ka belalo'au venita, maivaka dede kauta dedeta kataua melala boutai Dilava ena luva devaivaia kauta kele'etai be'imata kave'i.

Puka Iduvuna Namata

- a. Lova aku. (1-3)
- b. Ekalalo'au. (4-6)
- c. Dede kauta dedeta. (7-11)
- d. Luva to'ona. (12-13)

Vanama'ina Luvana.

¹ Lau, Ioane Dilava ena lo'e i'ana'iavaina kau'u, Dilava edilamu ateatemu nakumu ita alelevenimui, oi alalo'au venimui umauna, sia laumo sibo'u, ia Dilava ena luva umauna deikabasia kauta boutai vaka oi delalo'au venimui.

² 'Olana Dilava ena luva umauna 'eva ita nuatai emimia, mai ita kevatai bemimia beda'amo to'ona asi'i.

³ Lalo'auai mai luva umaunai kamimia 'eva Dilava ita Kamata mai Nakuna Iesu Keliso betata'u iulaveni, vilalo koana mai nua'elu bevenita.

Ka Ka Banota Ekalalo'au Venita.

⁴ Lalo'u denama vaika 'olana vali aika nakumu vaidia 'eva Kamata e'outa vinaulana ekavavaia vitaitanai Dilava ena luva umaunai demimia.

⁵ Kanaua ounai, ateate ma'adi e, vali'u lau oi alele venimui 'eva sia talavatu luvana makamakana, ia talavatu luvana 'ani 'ana'inai kabivenia lalanai kaika talavatuna, inoku lau oni anoimu, ita boutai 'eva ka ka banota ekalalo'au venita.

⁶ Banota ekalalo'au venita 'eva vitaitana ita Dilava ena talavatu luvata ekavinaula vaita boina. Ena talavatu luvana kanania 'eva 'ani siako 'uluna oi oika, oi boumuiai 'eva lalo'au lalanai oi bomimia.

Keliso Ena 'Ou Kauta.

⁷ Dede kauta doutamo 'ani dela'asi kanobata itoinai. Kau kataua 'eva Iesu Keliso kauaniai easi kauna sia devamomo'aia. Kau kataua boita 'eva dede kauta mai Keliso ena 'ou kauta.

⁸ Sibomui oi bo'imamui kave'i, inoku dava kataua daitai kavinaula vunu davata boutai sia oi bovataule, inoku tavamui itoitai oi bo'abi.

⁹ Kau ka Keliso ena vaikabasi sia eda'avaia mai akanai vaikabasi edeana ene'ea 'au kauna 'eva kevanai Dilava asi'i. Ia kau ka Keliso ena vaikabasi eda'avaia kauna 'eva kevanai Kamana mai Nakuna demimia.

¹⁰ Kanaua 'ounai, kau ka be'asi kevamui, vaikabasi kanania sia beabia be'asi koanai, sia oi boabia dae emui luma laloatai, mai vanama'ina luvana sia ka oi boluvala ia kevanai.

¹¹ 'Olana kau ka kau kanaua eabia dae kauna 'eva kau kanaua ita ena vinaula si'avana devavaia ka'ona.

Vanama'ina Luvana To'ona.

¹² Ba'oumu luvata 'eva doutamo, Beia malele ka'onamoai balelele 'eva sia a'ula. E'u nuabata 'eva bavasi baikamu inoku laluvana ekavivaila ekaluvalva, inoku eta luva ekavaoleta kave'i mailalonamata.

¹³ Bo'akalamu Dilava edilaia ateatena nakuna eta vanama'ina luvana desinia kevamuai.

Malele Ivakoina IOANE (3) Eleleia Kauna

Puka Laloana Ilena Luvana

Malele kanania 'eva 'kau namana' eleleia eda'a kau ka vana Kaio kanaua kevana. Ia 'eva Kaio evanama'inala 'olana Kaio melala boutai abiveni kauta eduluta. Ia Kaio e'ouia kau ka ua'i, vana Diotelepe, ia 'eva apa kauna kanaua kele'enai be'imala kave'i.

Puka Iduvuna Namata

- a. Lova aku. (1-4)
- b. Kaio evanama'inala. (5-8)
- c. Diotelepe beikala. (9-10)
- d. Demetelio belalovaia. (11-12)
- e. Luva to'ona. (13-15)

Vanama'ina Luvana.

¹ Lau, Ioane Dilava ena lo'e i'ana'iavaina kau'u, malele alelea evavasi e'u kau Kaio ma'adi kevamu, lau 'eva alalo'au venimu umauna.

² E'u kau ma'adi e, lau aikabasi idumemu ena mau'i 'eva enama'ina, inoku ameamea dava boutai 'eva benama'ina oni kevamuai mai maikula'ilamu bomia kave'i vitaitana idumeai okula'ila boina.

³ Bo'akalata vaidas deasi oni Dilava ena luva umauna oabia dae mai dalana'i oda' valina de'ou'u koanai alalonama si'asi'a.

⁴ Lau naku'u Dilava ena luva umauna dalana'i dedada'a valita a'ika 'eva e'u lalonama enama vaika mai lalonama kanaua 'eva e'u lalonama bounai ekeinia.

Kaio Koakoa Nama'ina Evavaia.

⁵ E'u kau ma'adi e, bo'akalata kataua sia oikabasita kave'i kauta vaidas oduluta 'eva enama'ina, kanaua 'eva emu abiveniai vinaula nama'ina ovavaia.

⁶ Koakoa nama'ina ovavaia 'ounai, ia deta'u emu lalo'au valina dekava Dilava ena lo'e kauta nia'i katania kevatai. Dilava nuana ivanama'inana dalana'i boduluta kave'i eta kalima beda'ala laloanai.

⁷ 'Olana kau kataua 'eva Keliso ena vinaula dainai eta kalima demakavala dedada'a, beia sia deabiveni kauta kevatai 'eva sia dava ka dedavalia.

⁸ Kanaua 'ounai ita vaka ia ekaduluta, kanaua ekavavaia laloanai, ita 'eva Dilava ena luva umauna vinaulana 'ani ia ita kavavaia.

Diotelepe Koakoa Si'avana

Vaika Evavaia.

⁹ Lau vinaula kanania'i luva vaidas malele ka ai aleleta devasi Dilava ena lo'e kauta kataua kevata, beia Diotelepe, ia 'eva eula vaika Dilava ena lo'e kauta eta 'ana'iavai kaunai be'ao, lai lelemai sia eabia dae.

¹⁰ Kanaua 'ounai lau bavavasi koanai, Diotelepe kanana'i dava evavaia davana lovana bakua, kevamaiai eluva si'asi'a mai ededede. Beia sia kanaua mo ia etata'u bo'akalata devavasi 'eva sia eabita dae, maivaka deula bo'akalata kataua beabita dae 'eva e'outa kao mai Dilava ena lo'eai evala'asita.

Demetelio Vinaula Nama'ina Evavaia.

¹¹ E'u kau ma'adi e, koakoa si'avata vaika kataua boita sia bovavai, ia koakoa nama'ita bovavai. Koakoa nama'ita evavai kauna 'eva Dilava ena. Ia koakoa si'avata vaika evavai kauna kanaua 'eva Dilava sia eikabasia kovo.

¹² Kau boutai Demetelio ena koakoa nama'ita luvata deluva mai Dilava ena luva umauna etata'u ia ena koakoa nama'ita kataua evamomo'aita. Lai vaka ia ena koakoa nama'ita valita lai akakava, oni oikabasi lai emai luva 'eva momo'aita.

Vanama'ina Luvana To'ona.

¹³ Ba'oumu luvata 'eva doutamo, beia malele ka'onamoai balelele 'eva sia a'ula.

¹⁴ E'u nuabata 'eva melala sia bedau'a 'eva bavasi baikamu inoku laluaana ekavivaila ekaluvaluva.

¹⁵ Ameamea nua'elu akamuai bemimia. Eta kau nia'i kauta eta vanama'ina luvata desisini kevamu. Eta kau na'i kauta emai vanama'ina luvata ka ka bovenita.

Malele IUDA Eleleia Kauna

Puka Laloana Ielena Luvana

Malele kanania 'olana 'eva abiveni kauta bevakula'ilata bevinaula kula'ila eta abiveni kanaua Dilava betata'u ena kau evenita davana be'imala kave'i (3). Ia be'imata kave'i 'olana kau dedeta vaidia ia vilootai dediaka ia 'eva abiveni kauta.

Puka Iduvuna Namata

- a. Lova aku. (1-2)
- b. Dede kauta dedeta. (3-16)
- c. Abiveni dalana. (17-23)
- d. Vanama'ina luvana. (24-25)

Vanama'ina Luvana.

¹ Lau Iuda, Iesu Keliso da'alana iabina kau'u mai Iakobo kadina, malele kanania alelea evavasi oi Dilava e'aemui kaumui boumuiai kele'emui, oi 'eva Dilava Kamata elalo'au venimui mai Iesu Keliso ena ikakao laloanai oi omimia.

² Ameamea Dilava ena vilalo, nua'elu mai lalo'au itoina kevamuiai namana be'ao.

Malele Eleleia 'Olana.

³ E'u kau ma'adi e, lau aula vaika Dilava ena vamauli kadavalia vamaulina valina e'u maleleai balelea bevasi kele'emui, beia vali'u alalovaia malele balelea bevavasi 'eva bavakula'ilamui Dilava abiveni kanaua melala ka'onamoai eveni ena kabukabu kauta boutai eta abivenina kualii laloanai oi bo'imala kave'i.

⁴ 'Olana kau vaidia 'ani vunivuniai deda'adodo oi viloamuiai demimia. Ia 'eva eta Dilava devaivivia ena iulaveni koana valina deabia 'udai ia sibota eta kulakula koakoata si'avata vaika davatai devaota mai Iesu Keliso eta Lovia namana sibona mo e'ola vaita kauna devasi'avanala. Kau katania eta mekau beko'ala valina 'eva 'ani siako Puka kabukabunai eluva 'ana'ivaia.

Vaikabasi Kauta Dedeta.

⁵ Lova kanania 'ani oi oikabasi beia lau a'ula bavalalovaimui une 'udai. Lovia namana eta'u Isalaela kauta Aikupito kanonai evamaulita beia muliai sia deabiveni kauta kataua boutai evaoleta.

⁶ Maivaka anelu vaidia eta komolo deabia siavuna vitaitanai mo sia demia ia sibota eta mia 'abuna devikania, ia 'eva 'ani seini kanaua sia bemoku keinikeini seininai deliota vabuto'o laloanai demimia, ua'i Dilava ene'eta divo bemimia beda'amo lavuai namana melalanai mekau bekoala.

⁷ Sia oi bobolabola, Sodoma mai Gomola mai vanua kevatai kauta kulakula vinalata mai koakoa si'avata vaika devavaita 'eva 'alova eani keinikeini mekauna dekoaia, inoku ikaika kanaua 'eva ita boutai ivalalovaita une mekau asi'i kamakoala 'ounai.

⁸ Vitaitanaimo, kau katania viloamuiai dedodo kauta vaka vaikabasi kauta dedeta eta niviai koakoa 'obuta devavai sibota kauanita devasi'avanata, Dilava ena siavu devasi'avanala mai luva si'avata vutuvutu aneluta nuavita de'outa.

⁹ Mikaela anelu 'olatai kauna 'eva koakoa kanaua boina sia evavaia kovo. Diabolo ita Mose eba kauanina deviala vaia koanai luva mekautai diabolo sia e'ouia pasisi, ia e'ouia ediaka, "Lovia namana betata'u oni be'ovenimu."

¹⁰ Beia kau katania 'eva dava sia deikabasi davata akatai deluva si'asi'a, mai eta ikabasi 'eva vitaitana sisi 'asita sia maieta lalovai sisisa boita kauanita daita dedadai, eta koakoa katania detata'u ia sibota devaoleta.

¹¹ Ia kevatai 'eva besi'avana vaika. 'Olana Kaino koakoa evavaia davana dalanai dedada'a. Moni dainai sibota devaivivita inoku va'eva kanaua Balama evavaia va'evana laloanai dedodo. Kola e'oualavu boina, ia vaka Dilava de'oualavu venia, kanaua 'ounai dala vitaitanaimo ia vaka be'ole.

¹² Oi emui lalo'au miado'uta anianita laloatai kau katania dedododo 'obu koakoata devavai, eta malalai asi'i sibota mo delalovaita. Vitaitana itani lani etata'u oli evivuta dedada'a ia sia lamu ka e'aku olita boita, mai itani au eta vua melalata uma'utai beia anita sia devuvua, auta kataua 'eva mailamuta 'ani siako ibulutaisi mai 'ani deba vaika.

¹³ Ia 'eva itani 'atuai ka'uda epoua 'au budobudona dela'asi boina sibota eta malalai koakoata devala'asi, maivaka itani visiu dealu 'avaea visiuta boita. Kau kataua 'eva vabuto'o keinikeini laloanai bebobo'o.

¹⁴ Enoka 'eva Adamu ena pulu ivakalakoina ka laloanai kauna ena enolea luvana laloanai kau katania lovata kanaua eaku koma, "Lovia namana 'eva ena anelu kabukabuta doutamo vaika ita be'asi.

¹⁵ Kau boutai bevaluvata, Dilava 'olana sia de'aku kauta si'avana mekauta bevakoata, mai luva si'avata Dilava enai deluva kauta boutai va'evai bene'eta divo."

¹⁶ Kau katania 'eva devabo'obo'o basibasi kau vaidava vuvua devakoata, sibota eta ula si'avata vaika daitai dedadai, sibota deapa vaita, mai kau vaidava deva'ameta kevatai dava nama'ita bema abi 'ounai.

Dilava Ena Lalo'auai Dibomimia.

¹⁷ E'u kau ma'adi e, eta Lovia namana Iesu Keliso ena veauneka kauta dava vailai bepupulu davana de'oumui luvata oi bolalovai 'inita.

¹⁸ Kaiamui'ai de'oumui dediaka, "Melala to'ota be'asi koanai Dilava 'olana sia de'aku kauta vaidava bevaila vabo'obo'o luvata kevamui'ai beluluva mai sibota eta ula si'avata vaika daitai bedadai."

¹⁹ Kau katania lovata de'aku kauta 'eva oi Dilava ena lo'e kaumui viloa-mui'ai vaivivi devapuluta, kanobata kauta eta ula daitai dedadai, Idume Kabukabuna nuatai sia emimia.

²⁰ Beia, e'u kau ma'adi e, sibomui emui abiveni kabukabuna akanai emui maui oi bovalava 'au mai Idume Kabukabuna ena viduluai oi bomeamea.

²¹ Eta Lovia namana Iesu Keliso oi o'imala ena vilaloai bevuamui beda'a maui keinikeini laloanai, sibomui Dilava ena lalo'auai oi bomimia.

²² Maieta lalo to'ato'a kauta kataua kevatai vilalo koana oi bovala'asia.

²³ Vaida maui pasisina itani 'alova boina laloanai demimia kauta maikula'ilamui oi boduluta bela'asi bemaui, maivaka vaidava kauani ena si'avana eta maui de'obu kauta kevatai vilalo koana oi bovala'asia mai makaumui, eta si'avana laloanai asi'i demavelimui dodo, eta kulakula koakoata si'avata vaika kataua sia oi boula venita itani tubu'a 'obuta ulata sia oi o'ula boita.

Vanama'ina Luvana To'ona.

²⁴ Dilava 'eva maikula'ilana bedulumui sia oi bo'eko, mai bevuamui beasi kave'i ena nuavi laloanai bevada'amui dodo, inoku emui va'eva beasi'i ia vailanai mai emui lalonama 'eva namana be'ao.

²⁵ Ia 'eva Dilava ka'onamo mo, ia sibona ita ivamaulita kauna. Iesu Keliso eta Lovia namana dainai Dilava kevanai nuavi, 'ola aku koana, kula'ila mai siavu bemimia, makavana uluna koanai easi vali'u, beda'amo to'ona asi'i. Amen.

Keliso Ena Luva IVALA'ASINA Ioane Kevanai

Puka Laloana Ilenia Luvana

Puka kanania 'eva melala kanaua'i abiveni kauta Lovia namana Iesu Keliso deabivenia dianai devaana-ana sia'ata laloanai eleleia. Puka kanania 'olana 'eva ana-ana kanaua laloanai ia bevakula'ilata inoku eta abiveni sia bevikanita. Puka kanania laloanai luva ivavitaitata doutamo, dava muliai bepupulu 'o 'ani depulu davata luvata eluva. Ivavitaitata kataua eta vinaula umauta 'eva katania. Iesu Keliso 'eva Lovia namana, inoku ia imanai Dilava betata'u ena 'ou kauta boutai bekaokaita, mai Satani vaka kanaua bekaokaia koma. Inoku Iesu vinaula katania boutai bevaoleta 'eva Dilava betata'u delava 'ini kauta kataua mai eta abiveni sia deva'ekoasi kauta akatai nama'ita bevenita. Ia 'eva Dilava ita bemimia, mekau mai ana-ana 'eva beasi'i, 'olana Dilava 'eva dava boutai bevaedeanata bemakamaka.

Puka Iduvuna Namata

- a. Lova aku. (1.1 - 8)
- b. Enolea iluvuna mai lo'e kabukabuta 7 eta malele. (1.9 – 3.22)
- c. Puka i'ouna mai i'alavuna 7. (4.1 – 8.1)
- d. Bisi 7. (8.2 – 11.19)
- e. Dragona mai aivala sisita lua. (12.1 – 13.18)
- f. Ikata edeata edeata. (14.1 – 15.8)
- g. Dilava ena badu voduta 7. (16.1 - 21)
- h. Babulonia e'eko. (17.1 – 20.10)
- i. Lavuai namana to'ona. (20.11 - 15)
- j. Vutuvutu, kanobata, mai Ielusalema makamakana. (21.1 – 22.5)
- k. Luva to'ota. (22.6 - 21)

Puka Valina Ikavana Luvana.

¹ Kanania 'eva Iesu Keliso evala'asia luvana, kanaua 'ounai ena da'alaabi kauta bevaikata davata 'eva alimo bepupulu. Iesu ena anelu esinia eda'a ena da'alaabi kauna Ioane evaikabasia,

² Ioane eta'u Dilava ena luva mai Iesu Keliso enai depulu davata boutai eikata kataua 'eva e'outa dae.

³ Enolea luvata katania bevakuta kauna 'eva benama'ina, maivaka lenea de'ika kauta mai dava ilelana 'eva deabia nuatai de'ule kauta kataua 'eva denama'ina, 'olana melalana 'ani ekevai.

Ioane Malele Eleleia Eda'a

Dilava Ena Lo'e Kabukabuta

Kalakoika Kevatai.

⁴ Lau Ioane, Dilava ena lo'e kabukabuta kalakoika 'Asia kanonai alele venimui. Ia enai oi iulaveni mai nua'elu 'ani bevenimui Dilavana 'eva vali'u emimia, mai 'ana'inai emia, mai ia vaka 'eva 'ani beasi, mai ena mia'au 'abuna vailanai idume kalakoika etai,

⁵ mai Iesu Keliso enai, ia 'eva abiveni ivamomo'aina kauna, ba kauta vilodatai ia makava ba ai eko'isi 'udai, mai kanobata loviata 'olata eta lovia 'olana.

Elalo'au venita inoku ia lalana ai ita eta si'avana ai 'ani eva'avaeata,

⁶ mai ita 'ani lovia vanuana mai kabukabu kautai evaaota ena Dilava mai Kamana da'alata eka abi. Iesu Keliso kevanai nuavi mai siavu bemia keini keini! Amen.

7 Oikaia, Iesu 'eva oli ita e'asi,
 mai kau boutai makata
 'eva ia beikala,
 duluna dekoaia kauta vaka
 ia beikala, mai ia dainai kanobata
 kauta boutai 'eva bekakani.
 Momo'ai dokadoka kanania
 'eva bepupulu, Amen.

8 Lovia namana Dilava eluluva ediaka,
 "Lau 'eva 'Alepa mai 'Omeka,
 Makavana mai To'ona.
 Lau 'eva vali'u amimia,
 makavanai vaka amia
 maivaka vailai ba'asi,
 siavu boutai Dilavana."

Ioane Keliso Eikaia.

9 Lau Ioane, oi bo'akalamui mai banomui anaana laloanai mai lovia vanuana laloanai mai manau ai vapasisi kanaua 'eva ita eta Iesu dainai, Dilava ena luva mai Iesu valina avala'asia 'ounai Patamo motumotunai de'ule'u amimia.

10 Lovia namana ena melala ai lau 'eva Idume ai akukudivo, inoku lele ka namana muli'uai aika itani bisi ka 'uluna boina,

11 ia ediaka, "Oikata davata 'eva puka ai leleta inoku bosinita beda'a Dilava ena lo'e kabukabuta kalakoika vanuata katania kevata, Epeso, Semulana, Pelekamo, Tuatila, Sadi, Piladelepia, mai Laodikea."

12 A'ilo'u 'udai lele eluva veni'u kanaua baikala akoma. Inoku a'ilo koanai kolo lamepata ivalavata'au davatai kalakoika aikata,

13 inoku lamepa ivalava'auta davata viloatai 'eva kau ka "itani Kau nakuna boina," tubu'a lakavaikana evadodoo e'ovu eda'a aena palapalata edavalita inoku kolo 'apana ai pedena edo'oa keini.

14 'Olana mai vuina 'eva dedeva'i ovo itani dapulu boina, vitaitana oli deva'ina boina, mai makana 'eva itani 'alova evuvule boina.

15 Aena 'eva itani kopa 'alova laloanai e'ita e'amale 'amale boina, mai lelana 'eva itani ka'uda namata depouta'au 'uluta boina.

16 Imana idibanai visiu kalakoika eabita, kualilepona makana aveke aveke de'ano lepona nutunai ela'asi. Ia vailana 'eva itani ado'alavuni melala ekakala 'ailalana boina.

17 Ia aikaia koanai, a'eko aena 'olanai apakadivo itani aba boina. Inoku ia imana idibana kau'uai ekao'au inoku eluva ediaka, "Sia bomakau, lau 'eva makavana mai to'ona.

18 Lau 'eva mauili kau'u, lau 'eva aba, beia vali'u lau 'eva bamauli keini keini! Inoku lau 'eva ba mai mitava kita abita.

19 Kanaua 'ounai, dava 'ani oikata 'eva leleta 'au, vali'u depupulu davata mai muliai bepupulu davata.

20 Visiu kalakoika ima'u idibanai mai kolo lamepata ivalava'auta davata kalakoika oikata. Katania 'eva luva vunita inoku anita 'eva kanania boina. Visiu kalakoika 'eva Dilava ena lo'e kabukabuta kalakoika aneluta, mai kolo lamepata ivalava'auta davata kalakoika 'eva Dilava ena lo'e kabukabuta kalakoika."

2

¹ Inoku ia e'ou'u ediaka, "Dilava ena lo'e kabukabuna aneluna Epeso vanuanai kanania bolele venia koma. Kau kanaua visiu kalakoika imana idibana ai eabita mai kolo lamepata kalakoika vilootai eda'a keini keini kauna ena luva 'eva kanania.

² Lau oni emu koakoa, emu bavunu vinaulata mai emu vapasisi 'eva aikabasita. Lau aikabasi oni 'eva si'avana kauta sia oikata vadai, veauneke kautai devaaota kauta kataua okovota beia ia 'eva sia veauneke kauta umauta, inoku odavalita ia 'eva dede kauta.

³ Oni 'eva ovapasisi mai lau va'u dainai oanana vaika, mai sia okauba'oa.

⁴ Beia lau 'e'u luva 'eva kanaia oni keva muai, emu lalo'au lava'ana'ina lau keva'uai lalo'auna 'ani ovikania.

⁵ Kanaua 'ounai 'abu kanaua'i o'eko 'abuna lalovaia, bolalo'udai inoku ovavai makava davata bovavai. Bema sia bolalo'udai koanai, lau 'eva bavavasi oni kevamu inoku emu lamepa ivalava'auna 'abunai babia ovo.

⁶ Beia emu nama'ina ka'onamo 'eva kanania. Nikolaita kauta eta koakoa ovaiivi, vitaitana lau vaka eta koakoa avaiivi.

⁷ Mai kaiana kauna betata'u Idume Kabukabuna ena luva Dilava ena lo'e kabukabuna kauta e'outa luvana lenea be'ika. Ena abiveni bekula'ila si'avana laloatai bekeini kauna 'eva komolo bavenia mauili eveveni auna vuavuana beania, au kanaua 'eva Dilava ena lobai ekukubu."

Malele Beda'a Dilava Ena Lo'e Kabukabuna Semulana Ai.

⁸ Inoku ia eluva 'udai ediaka, "Dilava ena lo'e kabukabuna aneluna Semulana vanuanai kanania bolele venia koma. Kau kanaua 'eva Makavana mai To'ona, eba mai emauli 'udai kauna ena luva 'eva kanania.

⁹ Emu kau anaana mai emu ulalu 'eva aikabasita. Beia oni 'eva lavo kaumu. Kau kataua Iuda kautai devaaota kauta ivasi'avanamu luvata deluva 'eva aikabasi, ia 'eva sia Iuda kauta umauta, beia Satani ena lo'e kauta.

¹⁰ Boanana vaia davana 'eva sia bomakau vaia. A'oumu, Diabolo betata'u oi vaid a bekovomui vabuto'o lumanai bene'emui, inoku melala 'ouka 'eva oi boanana. Beia oni emu abiveni lau keva'uai 'eva boabi'inia beda'amo ama'i ba ai, inoku lau oni mauili keini keini bavenimu vitaitana lovia i'olana davana boina.

¹¹ Mai kaiana kauna betata'u Idume Kabukabuna ena luva Dilava ena lo'e kabukabuna kauta e'outa luvana lenea be'ika. Ena abiveni bekula'ila si'avana laloatai bekeini kauna 'eva ba ivaluanai sia beanana kovo."

Malele Beda'a Dilava Ena Lo'e Kabukabuna Pelekamo Ai.

¹² Inoku ia eluva 'udai ediaka, "Dilava ena lo'e kabukabuna aneluna Pelekamo vanuanai kanania bolele venia koma. Kau kanaua mai ena kualilepona makana aveke aveke de'ano kauna ena luva 'eva kanania.

¹³ Lau aikabasi Satani 'ani ena mia'au abuna kanaua 'eva oni omiala 'abuna. Beia oni ota'u lau va'u oabi 'inia, inoku vali'u ekava kauna Anitipa, e'u abiveni kauna, Satani emiala 'abuna kanaua'i deaku bala melalanai koanai, emu abiveni lau e'uai 'eva sia o'ouia avuavu.

¹⁴ Beia emu si'avana vaid a 'eva katania. Kau vaid a oi viloumuiai 'eva Balama ena vaikabasi luvata deabi 'ini, kau kanaua eta'u Balaki evaikala a boina Isalaela kauta si'avanai bene'eta, inoku ia deta'u dilava dedeta ivakabukabuta ianita deani mai kulakula koakoata si'avata vaika devavai.

¹⁵ Dala vitaitanai kau vaid a viloumuiai 'eva Nikolaita kauta eta vaikabasi luvata deabi 'ini.

16 Kanaua 'ounai olalo'udai. Bema sia bolalo'udai koanai, lau 'ani alimo bavasi kevamu, inoku kuali lepona nutu'uai ela'asi kanaua'i baviaku venita.

17 Mai kaiana kauna betata'u Idume Kabukabuna ena luva Dilava ena lo'e Kabukabuna kauta e'outa luvana lelana be'ika. Ena abiveni bekula'ila si'avana laloatai bekeini kauna 'eva iani vana mana vuniatia vaida bavenia, maivaka bika'a deva'ina ka akanai va makamakana ka ilelana'au bika'ana ia bavenia, bika'a iabina kauna mo va kanaua beikabasia."

*Malele Beda'a Dilava Ena
Lo'e Kabukabuna Tuatila Ai.*

18 Inoku ia eluva 'udai ediaka, "Dilava ena lo'e kabukabuna aneluna Tuatila vanuanai 'eva kanania bolele venia koma. Dilava Nakuna, kanaua makana 'eva itani 'alova evuvule boina mai aena palapalata 'eva itani kopa e'amale 'amale boina kauna ena luva 'eva kanania.

19 Lau oni emu koakoa, emu lalo'au, emu abiveni, emu vidulu vinaulata, mai emu vapasisi 'eva aikabasita. Mune'e vali'u ovavai katania 'eva ovavai 'ana'i dekeinita.

20 Beia emu si'avana 'eva kanania, oni ateate vana 'Isabele sibona enolea ateatenai evaaoa ateatena kanaua 'eva oikaia vadai. Ia ena vaikabasi ai e'u da'ala abi kauta e'ana'ia vaita va'eva kulakula koakoata si'avata vaika ivavaitai mai dilava dedeta ivakabukabuta ianita deani.

21 Lau 'eva ia melala 'ani avenia ena kulakula koakoatai belalo'udai. Beia ia 'eva sia e'ula.

22 Kanaua 'ounai lau batata'u 'olele 'etanai bakapoa 'au, bema ia sia belalo'udai eta si'avana koakoatai koanai ia ita dekulakula kauta kataua itana bavaanaanata vaika.

23 Ia nakuna vaka baku bata. Inoku Dilava ena lo'e kabukabuta kauta boutai beikabasi, lau 'eva kau nuata mai eta lalovai lalovai adavalita kau'u, mai lau batata'u oi ka ka emui koakoa vitaitatai tavamui bavamue.

24 Beia oi kalina boumuiai Tuatila ai, ateate kanana ena vaikabasi luvata sia oi oabi'ini mai Satani ena vunivuni davata kanania deko davata 'eva sia oi oikabasi kaumui, lau a'oumui adiaka sia mekau ka akamuiai bane'ea.

25 Beiamo oi dava 'ani oi oabia davanamo oi boabi'inia beda'amo lau bavavasi.

26 Ena abiveni bekula'ila si'avana laloatai bekeini kauna mai e'u vinaula bevavaia beda'amo to'onai kauna 'eva lau batata'u siavu bavenia kanobata kauta beloviata.

27 'Ia 'auli ikoko'anai be'ola vaita, beakuta mukamuka itani olaka boina.' Vitaitana lau Kama'u kevanai siavu abia boina.

28 Lau vaka ia koi visiu bavenia.

29 Mai kaiana kauna betata'u Idume Kabukabuna ena luva Dilava ena lo'e kabukabuna kauta e'outa luvana lelana be'ika."

3

*Malele Beda'a Dilava Ena
Lo'e Kabukabuna Sadi Ai.*

1 Inoku ia eluva 'udai ediaka, "Dilava ena lo'e kabukabuna aneluna Sadi vanuanai 'eva kanania bolele venia koma. Dilava ena Idume kalakoika mai visiu kalakoika eabita kauna ena luva 'eva kanania, Lau emu koakoa 'eva aikabasita, lovamou deakuia dediaka, 'Dilava ena lo'e kabukabuna kanania 'eva emauli,' beia oni 'eva 'ani oba.

2 Ibi ko'isi, kevamuai demimia davata 'ani bebaba davata vakula'ilata, 'olana e'u Dilava vailanai 'eva emu koakoa sia ka komolona adavalia.

³ Dava devaikamu mai leleta o'ika davata lalovaita, leleta daitai bodadai, mai bolalo'udai. Beia bema sia boko'isi koanai lau 'eva vinoa kauna boinai bavavasi, inoku oni 'eva sia boikabasi lau 'eva melalana davanai bavavasi.

⁴ Beia kau vitalua na'i Sadi ai 'eva eta tubu'a sia deva'obuta. Ia 'eva tubu'a deva'ita bevadodota, lau ita lai badada'a, 'olana ia 'eva mai eta komolo kanania bevavaia.

⁵ Ena abiveni bekula'ila si'avana laloatai bekeini kauna 'eva, ia boita, tubu'a deva'ina bevadodoa. Ia vana 'eva Dilava ena mauhi pukanai lau sia 'ani basiu, beia Kama'u mai ena anelu vailatai ia vana 'eva baluva vaia.

⁶ Mai kaiana kauna betata'u Idume Kabukabuna ena luva Dilava ena lo'e kabukabuna kauta e'outa luvana lenea be'ika."

Malele Beda'a Dilava Ena

Lo'e Kabukabuna Piladelepia Ai.

⁷ Inoku ia eluva 'udai ediaka, "Dilava ena lo'e kabukabuna aneluna Piladelepia vanuanai 'eva kanania bolele venia koma. Ekabukabu mai momo'ai kauna, Davida ena ki eabia kauna. Ia dava eluvua 'eva sia kau ka be'alavua, mai ia dava e'alavua 'eva sia kau ka beluvua kauna ena luva 'eva kanania.

⁸ Lau oni emu koakoa 'eva aikabasi. Ikala, lau nutuala ka oni vailamuai 'ani aluvua kanaua 'eva sia kau ka be'alavua. Aikabasi emu kula'ila 'eva kicina, beia lele'u daitai odadai mai va'u sia o'oua avuavu.

⁹ Ikala, lau batata'u Satani ena do'u 'abuna kauta kataua, sibota Iuda kautai deva'ota beia ia 'eva sia Iuda kauta, beia ia 'eva dededede, bavuata ba'asi inoku oni aemu 'olanai bekuidula, kanaua'i beikabasi lau 'eva oni alalo'au venimu.

¹⁰ 'Olana oni e'u luva pasisi leleta daitai odai ovapasisi 'ounai lau batata'u anaana namavaikana kanaua melala be'asi kanobatai kau boutai bavakovota kanaua'i 'eva oni bataumuavu.

¹¹ Lau 'eva kevaimo 'ani bavasi, 'ounai dava oabia 'eva boabi'inia, inoku sia kau ka 'eva emu lovia i'olana davana beabia.

¹² Ena abiveni bekula'ila si'avana laloatai bekeini kauna 'eva e'u Dilava ena luma kabukabuna divoavuna bavavao, inoku ia 'eva 'abu kanaua sia bevikanania. Lau ia akanai e'u Dilava vana mai e'u Dilava ena vanua vana balelea, Ielusalema makamakana, davana 'eva e'u Dilava enai vutuvutuai be'ovu be'asi, mai lau vaka ia akanai va'u makamakana balelea.

¹³ Mai kaiana kauna betata'u Idume Kabukabuna ena luva Dilava ena lo'e kabukabuna kauta e'outa luvana lenea be'ika."

Malele Beda'a Dilava Ena

Lo'e Kabukabuna Laodikea Ai.

¹⁴ Inoku ia eluva 'udai ediaka, "Dilava ena lo'e kabukabuna aneluna Laodikea vanuanai 'eva kanania bolele venia koma. De'aea Amen kauna, abiveni kauna mai momo'ai dokadoka makanai depulu eikata kauna, Dilava evavaita davata boutai eloviata kauna ena luva 'eva kanania.

¹⁵ Lau oni emu koakoa aikabasi, oni 'eva sia o'elu mai sia osiavu. Lau e'u ula oni 'eva bosiavu 'o bo'elu.

¹⁶ 'Olana oni 'eva sia osiavu dokadoka mai sia o'elu dokadoka, beia osiavu siavu, 'ounai lau nutu'uai bapulaumu asi.

¹⁷ Oni odiaka, 'Lau 'eva lavo kau'u, e'u dava doutamo, sia dava ka atabu.' Beia oni sia oikabasi oni 'eva osi'avana vaika, belalomu vaika, oulalu, o'ede maivaka mai'okomu.

¹⁸ Lau oni avaidibamu, 'alovai kolo devamakamakala davana keva'uai botavala, kanaua'i lavo kaumuai bo'ao. Bovadodoa tubu'ana deva'ina vaka keva'uai botavala, inoku kaumu 'avaeata malalaina bepupua, mai 'ede mulamulana botavala makamuai bolaia inoku boikaika kave'i.

¹⁹ Lau alalo'au venita kauta 'eva a'ovenita mai a'odita, kanaua 'ounai mailalovaimu bovinaula kula'ila, mai bolalo'udai.

²⁰ Ikala, lau nutuala aunai alalava inoku akuaku. Bema kau ka lele'u e'ika inoku nutuala eluvua, lau badododo ba'asi inoku ia ita baniani, mai ia lau ita lai baniani.

²¹ Ena abiveni bekula'ila si'avana laloatai bekeini kauna 'eva komolo bavenia lau ita e'u lovia imia'auna 'abuna akanai lai bamia'au, vitaitana lau akula'ila si'avana laloatai akeini inoku Kama'u ita ena lovia imia'auna 'abuna akanai lai amia'au boina.

²² Mai kaiana kauna betata'u Idume Kabukabuna ena luva Dilava ena lo'e kabukabuna kauta e'outa luvana lenea be'ika."

4

Dilava Vutuvutuai Dekukudivo Venia.

¹ Dava katania mulitai, akailao vutuvutuai 'eva nutuala ka iluvuna elava vaila'uai aikaia. Inoku lele 'ani eluva veni'u makava kanaua lenea aika 'eva itani bisi ka 'uluna boina eluva ediaka, "Ele'au mai nia'i, inoku katania mulitai 'eva dava 'ani beplu davata bavaikamu."

² Komolonai Idume Kabukabuna evada'a'u, inoku ua'i vaila'uai 'eva lovia imia'auna 'abuna ka vutuvutuai aikaia mai kau ka 'eva akanai emia.

³ Inoku ua'i emia'au kauna 'eva ikana e'ailala vaika itani bika'a nama'ita vaika vata daiamoni e'ailala mai lubi e'aola boina. Boualo lovia imia'auna 'abuna kanaua enoiakaiu, ikana 'eva e'ailala vaika itani bika'a nama'ina vaika vana 'emeladi boina.

⁴ Lovia imia'auna 'abuna kanaua 'eva lovia imia'auta 'abuta luanavui vani vaka demiaia kaiukaiu, inoku kau 'aida'aidata luanavui vani lovia imia'auta 'abuta kataua akatai demia'au, tubu'a deva'ita devadodo mai 'olatai 'eva lovia i'olata davata kolo ai ivavaita devadodota.

⁵ Lovia imia'auna 'abunai e'amalea, e'uluia mai aika eaku kao easi. Lovia imia'auna 'abuna vailanai 'eva lampa kalakoika deani maivulevuleta. Katania 'eva Dilava idumena kalakoika.

⁶ Maivaka lovia imia'auna 'abuna vailanai ua'i 'eva dava ka ikana itani 'atu eanevaovo kalasi boina, eaneva vaika itani bika'a nama'ina vaika vana kilisitala boina.

Bo'adai 'eva mauli davata vani lovia imia'auna 'abuna delavaia kaiukaiu, inoku ia vailata ai mai mulita ai 'eva maka ai ekaiutaavu.

⁷ Mauli davana makavana 'eva itani laioni boina, ivaluana 'eva itani bolomakau boina, ivakoina 'eva maivailana itani kau vailata boina, ivavanina 'eva itani bo'ibata elolovo boina.

⁸ Mauli davata vani kataua 'eva ka ka vanita kalakoi inoku vanita kataua laloata mai mulita 'eva maka ai ekaiutaavu. Boni mai lani ia lata sia de'ani, ia dediaka,

"Kabukabu, kabukabu,
kabukabu 'eva Lovia namana
Siavu bounai Dilavana,
Ia 'eva emia, emimia,
mai be'asi kauna."

⁹ Mauli davata katania detata'u lovia imia'auna 'abuna akanai emia'au kauna mai emia keini keini kauna kevanai nuavi, 'olaaku mai vanama'ina luvata deveveni koanai,

¹⁰ 'aida'aidata kauta luanavui vani detata'u lovia imia'auna 'abuna akanai emia'au kauna vailanai dekuuidula, inoku emia keini keini Dilavana dekukudivo venia. Eta lovia i'olata davata dekapota lao lovia imia'auna 'abuna vailanai, inoku dediaka,

¹¹ “Emai Lovia namana mai emai Dilava e, oni 'eva maiemu komolo, nuavi, 'olaaku mai siavu boabita, oni dava boutai ovavaita dainai, mai emu ula ai dava boutai depulu inoku demauli.”

5

Ioane Puka Ilo'una Ka

Mai I'alavu Davana Eikaia.

¹ Inoku lovia imia'auna 'abunai emia'au kauna imana idibanai 'eva puka ilo'una ka aveke avekenai ilelena mai i'alavu davata kalakoi ka ai i'alavu 'inita eabia aikaia.

² Inoku anelu kula'ilana ka aikaia evaoi 'unu'unu ediaka, “Dai 'eva mai ena komolo i'alavu davata beva'alamata inoku puka ilo'una beluvua?”

³ Beia sia kau ka vutuvutuai 'o kanobatai 'o kanobata venunai puka ilo'una beluvua bedaia 'o laloanai bekaidodo.

⁴ Inoku lau akani si'asi'a 'olana sia kau ka dedavalia eva mai ena ekomolo puka ilo'una beluvua 'o laloanai bekaidodo.

⁵ Inoku 'aida'aidata kauna ka e'ou'u ediaka, “Sia bokakani! Ikala, Iuda iduvuna ena Laioni, Davida lamuna kauna, 'ou kauta ekaokaita kauna, ia betata'u puka ilo'una mai i'alavuna davata kalakoi ka beluvuta bedaia.”

Ioane Mamoe Nakuna Eikaia.

⁶ Inoku Mamoe nakuna ka lovia imia'auna 'abuna bo'adanai elava aikaia, ikana itani 'ana'inai deaku bala boina, mauili davata vani mai 'aida'aidata kauta ua'i delavaia kaiukaiu. Ia bobolona 'eva kalakoika mai makana vaka kalakoika, kataua 'eva Dilava idumena kalakoika kanobata bounai laloanai esinita la'asi.

⁷ Mamoe nakuna eda'a inoku lovia imia'auna 'abunai emia'au kauna imana idibana ai puka ilo'una eabia.

⁸ Inoku ia puka ilo'una 'ani eabia koanai, mauili davata vani mai 'aida'aidata kauta luanavui vani 'eva Mamoe nakuna vailanai dekuuidula. Ia ka ka 'eva mai eta kita vana hap maivaka kolo voduta laloatai 'eva mulamula bonata mediatai devavonuta deabi, kataua 'eva Dilava ena kabukabu kauta eta meamea.

⁹ Inoku masi makamakana ka deabia,

“Lovia namana oni 'eva maiemu komolo puka ilo'una boabia mai i'alavuna davata boluvuta, 'olana oni 'eva deaku bamu, inoku Dilava dainai 'eva iduvu boutai, lele boutai, kau boutai mai kanobata bounai kauta lalamu ai otavata.

¹⁰ Oni ota'u lovia vanuanai mai kabukabu kautai ovaoota eta Dilava da'alana be'abi, inoku ia 'eva kanobatai belovia.”

*Boutai Dilava Mai Mamoe Nakuna
Dekukudivo Venita.*

¹¹ Inoku akailao 'eva anelu doutamo vaika leleta aika, sinavu boutai sinavu 'ouka dekeinia, ia deta'u lovia imia'auna 'abunai mai mauli davata vani mai 'aida'aidata kauta delavata kaiu.

¹² Inoku demasi 'unu'unu dediaka,
“Mamoe nakuna 'ana'inai
deaku bala mamoe 'eva
mai ena komolo, siavu, lavo,
nuakomolo mai kula'ila
maivaka 'olaaku, nuavi
mai akuabalai beabita.”

¹³ Inoku mauli davata boutai vutuvutuai, kanobatai, kanobata venuna mai 'atu ai mai 'atu laloanai demimia davata boutai demasi leleta aika dediaka,
“Lovia imia'auna 'abuna
akanai emia'au Dilavana
mai Mamoe nakuna kevatai
akuabalai, 'olaaku, nuavi mai
siavu bemia keini keini!”

¹⁴ Inoku mauli davata vani deluva dediaka, “Amen!” Inoku 'aida'aidata kauta dekuvidula inoku dekuvidivo venia.

6

Mamoe Nakuna Puka Ilo'una I'alavuna Davata Kalakoi Eabita Ovo.

¹ Mamoe nakuna puka ilo'una i'alavuna davata makavana eva'alamaia aikaia. Inoku mauli davata vani banota ka eluva 'unu'unu lelana aika itani e'uluia boina, ediaka, “Mai!”

² Akailao 'eva vaila'uai osi deva'ina ka aikaia, inoku emia'au kauna 'eva peva ka eabia, mai lovia i'olana davana ka 'eva devenia, inoku osiai eveau asi, ikana itani ia 'ani eta'u 'ou kauta eva'ekota, maivaka mai siavuna edada'a doutamo beva'ekota.

³ Mamoe nakuna i'alavu davana ivaluana eva'alamaia koanai, mauli davana ivaluana eluva lelana aika ediaka, “Mai!”

⁴ Inoku osi kavaka ela'asi osina 'eva e'aola. Emia'au kauna 'eva siavu evenia kanobatai nua'elu beabia tau mai kau bevaviakuta, beviaku ba. Ia 'eva kualilepona namavaika ka devenia.

⁵ Mamoe nakuna i'alavu davana ivakoina eva'alamaia koanai, mauli davana ivakoina eluva lelana aika ediaka, “Mai!” Inoku akailao 'eva vaila'uai osi 'umabobokona ka aikaia. Emia'au kauna imanai 'eva mekau bevakovota davana ka eabia.

⁶ Inoku lele ka boina mauli davata vani vilotaia eluva lelana aika ediaka, “Melala itoina vinalana tavana 'eva witi 'ou ka'onamo, mai melala ka'onamo vinalana tavana 'eva iani vana bali 'ou koi, beia 'olive auta mai vine kulata 'eva sia bovasi'avanata.”

⁷ Mamoe nakuna i'alavu davana ivavanina eva'alamaia koanai, mauli davana ivavanina eluva lelana aika ediaka, “Mai!”

⁸ Akailao 'eva vaila'uai osi laolina ka aikaia. Emia'au kauna vana 'eva Ba, inoku ba kauta eta 'abu 'eva ia mulinai denanadia. Ia 'eva siavu devenita kanobata ikolena aveke vani laloanai avekena ka kauta 'eva kualilepona kualilepona beaku bata, doe laloanai vikolo ai bebababa, 'olele laloanai 'oleleai bebababa mai kanobata sisita aivalata beaku bata.

⁹ Mamoe nakuna i'alavu davana ivaimana eva'alamaia koanai, akailao vala kabukabuna venunai Dilava ena luva dainai mai ena luva i'ou daena dainai 'ani deaku bata kauta boutai idumeta aikata.

¹⁰ Ia deva'oi 'unu'unu dediaka, "Siavu Loviana namana e, oni 'eva okabukabu mai momo'ai, melala davanai 'eva kanobata kauta bovaluvata inoku lalamai daitai mekau bovenita?"

¹¹ Inoku ia ka ka 'eva tubu'a laka'ita deva'ita devenita, inoku e'outa melala kikinamo bevi'ima kovo beda'amo banota da'alaabi kauta mai bo'akalata 'eva beaku bata inoku iakubata vakuvakuna bevaolea kave'i vitaitana ia deaku bata boina.

¹² Mamoe nakuna i'alavu davana ivakalakoina eva'alamaia aikaia, kanokau namavaikana epulu. Melala evabula tubu'a 'umabobokona boina, vuia itoinai e'aola lala boina eao,

¹³ mai visiu vutuvutuai de'ekoasi deda'a kanobatai itani lani eunu si'asi'a vevei evautea inoku vuana maikata eva'ekoasita boina.

¹⁴ Vutuvutu etaule itani puka ilo'una boina, delo'uia, inoku lolo mai motumotu boutai 'eva 'abutai devailutaasi.

¹⁵ Inoku kanobata loviata 'olata, lovia kauta, kuali 'olata kauta, lavo kauta, siavu kauta mai kau boutai, da'alaabi kauta mai sia da'alaabi kauta boutai 'eva va'ala mai lolo bika'ata vilotaia depode.

¹⁶ Ia deta'u lolo mai bika'a namata de'aeta dediaka, "O'eko akamai ai inoku lovia imia'auna 'abunai emia'au kauna vailanai mai Mamoe nakuna ena badu kevatai ovatauavu mai.

¹⁷ 'Olana ia eta badu melalana namana 'ani easi, inoku dai 'ani belavadivo?"

7

Dilava Ena Da'alaabi Kauta Sinavu Boutai Sinavu Ka Vaninavui Vani (144,000) Ba'utai Loi Deabi.

¹ Kanaua mulinai anelu vani kanobata 'unipuata vani delavata avu aikata, kanobata ena lani vani deabita kao, sia lani ka kanoai 'o 'atuai be'unu 'o au ka bevivua.

² Inoku anelu edeana ka vaka dae duasi ele'au easi aikaia, mauli Dilavana ena koa i'ulena davana eabia. E'ae lao 'unu'unu anelu vani kataua Dilava eta'u siavu evenita kanobata mai 'atu bevasi'avanata aneluta e'outa ediaka,

³ "Oi kanobata 'o 'atu 'o au sia oi bovasi'avanata beda'amo eta Dilava ena da'alaabi kauta ba'utai koa i'ulena davana lai bane'ea."

⁴ Inoku koa i'uleta davata deabi kauta devakuta leleta aika 'eva da boutai sinavu ka sinavu vaninavui vani (144,000), ia boutai 'eva Isalaela iduvuna 'ouka lua etai deasi.

⁵ Iuda iduvuna kauta kataua koa i'uleta davata deabita kauta 'eva da boutai 'ouka lua (12,000),

Lubena iduvunai 'eva da boutai 'ouka lua (12,000),

Kado iduvunai 'eva da boutai 'ouka lua (12,000),

⁶ Asele iduvunai 'eva da boutai 'ouka lua (12,000),

Napatali iduvunai 'eva da boutai 'ouka lua (12,000),

Manase iduvunai 'eva da boutai 'ouka lua (12,000),

⁷ Simeona iduvunai 'eva da boutai 'ouka lua (12,000),

Levi iduvunai 'eva
 da boutai 'ouka lua (12,000),
 Isakala iduvunai 'eva
 da boutai 'ouka lua (12,000),
⁸ Sebuluna iduvunai 'eva
 da boutai 'ouka lua (12,000),
 Iosepa iduvunai 'eva
 da boutai 'ouka lua (12,000),
 mai Beniamina iduvunai 'eva
 da boutai 'ouka lua (12,000).

Kau Mato Namavaikana Tubu'ata Deva'ita Devadodo Dilava Dekukudivo Venia.

⁹ Dava katania mulitai akailao 'eva kau mato namavaikana sia kau ka bemavakuta bemadaia, kanobata ka ka ai, iduvu ka ka ai, kau edeata edeata mai lele edeata edeata, lovia imia'auna 'abuna vailanai mai Mamoe nakuna vailanai delava aikata. Ia 'eva tubu'a deva'ita lakavaikata devadodo mai imatai 'eva vakolo uauata deabi.

¹⁰ Inoku devaoi 'unu'unu dediaka,
 “Vamauli 'eva eta Dilava,
 lovia imia'auna 'abunai
 emia'au kauna,
 mai Mamoe nakuna
 etai e'asi.”

¹¹ Anelu boutai 'eva lovia imia'auna 'abuna, 'aida'aidata kauta mai mauli davata vani delavata kaiu. Mai Lovia imia'auna 'abuna vailanai dekuidula vailata kua eda'aia inoku Dilava dekuudivo venia,

¹² dediaka,
 “Amen!
 Akuabalai, nuavi, nuakomolo,
 vanama'ina luvata, 'olaaku,
 siavu mai kula'ila 'eva
 eta Dilava enai bemia keini keini.
 Amen.”

¹³ Inoku 'aida'aidata kauna ka elavuai'u ediaka, “Tubu'a laka'ita deva'ita devadodota kauta katania 'eva kau davata? Maivaka a'ia'i de'asi?”

¹⁴ Lau ena luva avamuea adiaka, “Loviamu e, oni oikabasi.” Inoku e'ou'u ediaka, “Kau katania 'eva anaana namavaikana laloanai dela'asi deasi kauta, ia eta tubu'a laka'ita 'eva Mamoe nakuna lalanai 'ani dedeinita inoku devadeva'ita.

¹⁵ Kanaua dainai,
 ia 'eva Dilava ena lovia imia'auna 'abuna vailanai delalava,
 inoku ena luma kabukabuna laloanai boni mai lani
 ia da'alana de'abi.

Inoku lovia imia'auna 'abuna akanai emia'au Dilavana 'eva ena airole ai bevaota akatai beva'auta.

¹⁶ Ia 'eva sia bevikolo kovo,
 sia vei bata beba kovo.
 Melala siavuna sia bekalata 'o
 sia siavu davata ka bevalo'olo'ota.

¹⁷ Olana Mamoe nakuna lovia imia'auna 'abuna bo'adanai emimia 'eva ia beikata kao itani mamoe i'imata kauna boina,

ia betata'u be'ana'ia vaita
 bedada'a mauli veina
 ebubudi kevanai,
 inoku Dilava betata'u ilulu
 makata boutai makatai
 beukuta ovo.”

8

Puka Ilo'una I'alavuna Davana Ivakalakoi Eluvuia, Anelu Ka Mai Kolo Olakana.

¹ Mamoe nakuna Puka ilo'una i'alavuna davana ivakalakoikana eva'alamaia koanai, melala koana avekena boina ua'i vutuvutuai 'eva 'ulu asi'i vaika.

² Inoku anelu kalakoi ka Dilava vailanai delava aikata, inoku bisi kalakoi ka 'eva devenita.

³ Anelu edeana ka vaka kolo voduna ka eabia easi inoku vala kabukabuna vailanai elavadivo. Ia 'eva mulamula bonana mediana doutamo devenia inoku Dilava ena kabukabu kauta boutai eta meamea itana 'eva lovia imia'auna vailanai kolo valana kabukabuna akanai beveveni.

⁴ Inoku anelu imanai mulamula bonana mediana eani 'adumena 'eva Dilava ena kabukabu kauta eta meamea ita evaka'onamo dele'au deda'a Dilava vailanai.

⁵ Inoku anelu vodu eabia vala kabukabuna 'alovanai evavonua, inoku eitokia asi kanobatai 'eva vutuvutu e'uluia, 'ulu namata devua mai kanokau epulu.

Anelu Vani Eta Bisi Deuvani.

⁶ Inoku anelu kalakoika kataua deva'olu eta bisi beuvanita.

⁷ Anelu makavana ena bisi euvania, inoku lamu bika'a boita mai 'alova lala ita devaka'onamo de'ekoasi kanobatai. Kanobata ikolena koi laloanai avekena ka 'eva eani palu, au ikoleta koi laloanai au avekena ka eani palu, mai vadovado davata ikoleta koi laloanai vadovado davata avekena ka eani palu.

⁸ Anel ivaluana ena bisi euvania, inoku dava ka itani lolo namavaikana ka mai 'alovana boina 'eva 'atuai dekapoia uku. 'Atu ikolena avekena koi laloanai avekena ka 'eva lalai eao,

⁹ 'atuai demauli davata ikoleta koi laloanai avekena ka 'eva deba, mai aunakoi ikoleta koi laloanai avekena ka desi'avana.

¹⁰ Anelu ivakoina ena bisi euvania, inoku visiu namavaikana ka e'ailala itani au 'ala'auna ka e'ani 'alovana evuvule boina, vutuvutuai e'ekoasi, inoku lava boutai ikoleta aveke koi laloanai aveke ka akatai eno'au mai vei debubudi 'abutai eno'au.

¹¹ Visiu vana 'eva 'Vamai'. Vei boutai ikoleta aveke koi laloanai aveke ka 'eva evamai. Kau doutamo vei kanaua deiniuia 'eva deba, 'olana vei evamai vaika.

¹² Anelu ivavanina ena bisi euvania, inoku melala ikolena aveke koi laloanai avekena ka 'eva 'ailalana eakuia, vuia ikolena aveke koi laloanai avekena ka 'ailalana eakuia, mai visiu boutai ikoleta aveketa koi laloanai aveketa ka 'eva 'ailalata eakuta, kanaua 'ounai aveketa ka 'eva devabula. Lani ikolena aveke koi laloanai avekena ka 'eva 'ailala asi'i, maivaka boni ikolena aveke koi laloanai avekena ka 'eva vitaitanamo.

¹³ Inoku akailao 'eva bo'ibata ka vutuvutuai elovo aikaia 'eva eluva 'unu'unu lлена aika ediaka, “Besi'avana! Besi'avana! Kanobatai demimia

kauta boutai kevatai 'eva besi'avana vaika, 'olana anelu koina kataua eta bisi 'ani beuvanita 'ulutai 'eva dava bepupulu.”

9

Anelu Ivaimana

Ena Bisi Euvania.

¹ Anelu ivaimana ena bisi euvania, inoku vutuvutuai visiu ka e'ekoasi eda'a kanobatai aikaia. Visiu kanaua 'eva 'uli e'ovu vaika sia bepupua 'ulina iluvuna kina devenia.

² Ia 'uli e'ovu vaika kanaua eluvuia koanai, vaitabu 'uliai ele'au itani 'alova namavaikana e'ani vaitabuna ele'au boina. Melala mai vutuvutu 'eva 'uli e'ovu vaika vaitabunai evavabulata.

³ Inoku 'oasi'o vaitabu laloanai dela'asi deasi kanobatai, ia 'eva siavu evenita vitaitana itani 'a'ava ealata anaana boina.

⁴ 'Oasi'o de'outa sia kanobata avana 'o vadovado davana ka 'o au ka bevasi'avanala, beia Dilava ena koa ba'utai asi'i kauta kataua mo bevaanaanata.

⁵ Ia 'eva e'outa vuia ima mo laloanai kau bevaanaanata, ia sia beaku bata. Inoku anaana betata'u bevaanaanata 'eva itani 'a'ava kau ealala anaana boina.

⁶ Melala kataua laloatai kau 'eva ba bekavua, beia sia bedavalia, beula vaika bemaba, beia ba 'eva ia etai beveau tau.

⁷ 'Oasi'o kataua ikata 'eva itani kualii beda'ala osita deva'oluta boita, 'olatai 'eva dava ka itani lovia i'olana davana kolo ai devavaia boina de'olaia, mai vailata 'eva itani kau vailata boita.

⁸ Vuita 'eva itani 'a'ate vuita laka'ita boita, mai niketa 'eva itani odola sisi vana laioni niketa boina.

⁹ Pedetai 'eva 'auli palapalanai de'alavuta, ia vanita 'uluta 'eva itani osi doutamo vaika mailava'au davata vata kaliota ositai deliota develita kualii deda'ala 'uluta boita.

¹⁰ Iuta 'eva mai'inita itani 'a'ava iuta boita, mai iutai 'eva mai eta siavu kau vuia ima bevaanaanata.

¹¹ Ia 'eva mai eta lovia 'olana ka, 'uli e'ovu vaika kanaua eikala kao aneluna, 'Ebelu leletai ia vana 'eva Abadoni, mai 'Elene leletai vana 'eva Apoliona, anina 'eva Vasi'avana kauna.

¹² Si'avana namavaikana makavana 'ani eole, kanania mulinai si'avana namavaikata lua 'ani be'asi.

Anelu Ivakalakoina

Ena Bisi Euvania.

¹³ Anelu ivakalakoina ena bisi euvania, inoku lele ka 'eva Dilava vilanai vala kabukabuna kolo ai devavaia kanaua bobolona vani etai 'uluna easi aika.

¹⁴ Lele kanaua eta'u anelu ivakalakoina bisi eabia aneluna e'ouia ediaka, “Eupalate lavana namana aba'abanai anelu vani 'ani deliota aneluta kataua boluvuta.”

¹⁵ Inoku anelu vani kataua 'ani deva'olu vikau kanaua vuia kanaua melala kanaua mai melala koana kanaua'i 'eva beluvuta kanobata kauta ikoleta aveke koi laloanai avekena ka beaku bata.

¹⁶ Anelu vani kataua eta kualii kauta mai osita eta numela aika 'eva kelepu boutai sinavu lua (200,000,000).

¹⁷ Inoku e'u makakeini ai osi mai ivaveauta kauta osi akatai demia'au aikata, ia pedeta i'alavuta 'aulita 'eva de'aola itani 'alova boina, de'uma'uma, mai delaoli. Osi 'olata 'eva itani odola sisi vana laioni 'olata boita, maivaka nututai 'alova, vaitabu mai bika'a vata salpa mai 'alovata dela'asi.

18 Dava si'avata vaika koi kataua osi nututai dela'asi davata deta'u kanobata kauta ikoleta aveke koi laloanai avekena ka deaku bata, dava kataua 'eva 'alova, vaitabu, mai bika'a vata salpa.

19 Osi eta siavu 'eva nututai mai iutai demimia, iuta 'eva itani kau'asi mai 'olata boita inoku kanaua'i kau devaanaanata.

20 Kau kalina dava si'avata vaika koi katania'i sia deaku bata kauta 'eva imatai devavai davatai sia delalo'udai, ia ka'uba si'avata vaika, mai kolo, siliva, kopa, bika'a, mai au ai devavaita dilavata dedeta, sia deikaika 'o lele sia de'ika 'o sia dedada'a dilavata dedeta kataua ikukudivo venita sia devapuala.

21 Eta akuaku koakoatai, eta oada koakoatai, eta mo'a koakoata si'avata vaikai, 'o eta vinoa koakoatai sia delalo 'udai kovo.

10

Anelu Ka Mai Puka Ilo'una Kikina Ka.

1 Inoku anelu kula'ilana ka vutuvutuai e'ovu easi aikaia. Ia 'eva oli ekaiuia avu, 'olana akanai 'eva boualo, ia vailana e'ailala itani melala boina, mai ia aena ikata 'eva itani 'alova evule si'asi'a boita.

2 Ia 'eva puka ilo'una kikina ka 'ani iluvuna imanai eabia. Aena idibana 'eva 'atu akanai elava'au mai aena e'alina 'eva kanobata akanai elava'au.

3 Anelu kanaua evaoi 'unu'unu itani odola sisi vana laioni enini boina. Inoku evaoi koanai, e'uluia 'eva 'uluu kalakoi-ka, ka ka luva ka ka deluva.

4 Inoku 'uluu kalakoi-ka deluva koanai, lau 'eva leleta balele kao akoma. Beia lele ka vutuvutuai easi aika ediaka, "Uluu kalakoi-ka deluluva luvata bovunita, sia boleleta 'au."

5 Inoku anelu 'atu akanai mai kanobata akanai elava'au aneluna kanaua aikaia imana idibana eisia 'au vutuvutu eda'aia.

6 Inoku anelu kanaua eta'u mia keinikeini Dilavana, vutuvutu mai laloana davata boutai mai kanobata mai laloana davata boutai mai 'atubata mai laloana davata boutai evavaita Dilavana vanai eluva'ana'i ediaka, "Vi'ima melala 'ani eole, Dilava 'eva sia bevi'ima dau'a.

7 Beia anelu ivakalakoi-kana ena bisi beuvania melalanai koanai, Dilava ena lalovai vuniana 'eva beavoale, Vali nama'ina kanania 'eva ena enolea kauta ia da'alana de'abi kauta evaikabasita vitaitanai bepupulu."

Ioane Puka Ilo'una Kikina Eania.

8 Inoku vutuvutuai lele kanaua eluva veni'u 'udai lлена aika ediaka, "Da'a inoku anelu 'atuai mai kanobatai elalava aneluna imanai puka ilo'una iluvuna kanaua boabia."

9 Kanaua 'ounai ada'a anelu kanaua kevana inoku anoia puka ilo'una kikina kanaua beveni'u. Ia lau e'ou'u ediaka, "Abia ania. Nutumuai 'eva bedia'adia'a itani metunu veina boina, beia bo'amuai 'eva be'uli."

10 Inoku anelu imanai puka ilo'una kikina kanaua abia inoku ani palua, mamina nutu'uai 'eva edia'adia'a itani metunu veina boina, beia ani palua mulinai bo'a'uai 'eva euli.

11 Inoku e'ou'u ediaka, "Oni 'eva kau edeata edeata, kanobata edeata edeata, mala edeata edeata, maivaka lovia 'olata edeata edeata kauta boutai kevatai enolea luvata boluva vai 'udai."

11

Vali Kava Kauta Lua.

¹ Lau 'eva silibo ka itani dava ivakovota ikoko'ana boina eveni'u inoku e'ou'u ediaka, “Da'a, Dilava ena lo'e kabukabuna mai vala kabukabuna bovakovota, maivaka ua'i dekuकुदिवो kauta bovakuta.

² Beia lo'e kabukabuna alana mulimulina kua bo'adana 'eva sia bovakova, 'olana pulu edea kauta 'ani evenita, ia vanua kabukabuna vuia vaninavui lua 'eva beda'ala 'ika'ika 'au.

³ Lau vali'u ikavana kauta lua siavu bavenita inoku pute tubu'ata be- vadodota kataua 'eva vilalo koana devala'asia, inoku melala boutai da ka sinavu lua kalakoi navui (1,260) kataua laloatai enolea luvana beilolo vaia.”

⁴ Vali kava kauta luana katania 'eva olive auta lua mai lamepa ivalavata davata lua katania 'eva kanobata eloviala Loviana namana vailanai delalava.

⁵ Bema kau ka be'ula lalua bevaanaanata, lalua nututai 'alova bela'asi inoku eta 'ou kauta bevasi'avanata, inoku kau davana be'ula bevaanaanata kauna 'eva kanania boinai beaku bata.

⁶ Kau katania 'eva mai siavuta vutuvutu be'alavua inoku enolea luvana beilolo vaia melalata laloatai 'eva lamu sia be'aku. Maivaka mai siavuta vei lalai bevaa, mai ia eta ula vitaitanai si'avana ivapuluta vinalata edeata edeata ai kanobatai bevapulu.

⁷ Ia eta vali kava kanau bevaolea bepupua mulinai, aivala sisina 'eva 'uli to'ona asi'i laloanai bele'au be'asi 'eva beviaku venita inoku beakuta 'eva beaku bata.

⁸ Ia kauanita 'eva Ielusalema vanua namana dalana bo'adanai be'eno. Ua 'eva ia eta Lovia namana au ido'o valaukuna akanai eba 'abuna, vanua namana kanau luva ivavitaitanai vana de'ouia, Sodomo 'o Aikupito.

⁹ Melala koi mai kalina ka laloanai kau edeata edeata, iduvu edeata edeata, lele edeata edeata, mai kanobata edeata edeata kauta be'asi ba kauanita luana kataua beikata, beia be'outa sia bekoleta.

¹⁰ Kanobata kauta 'eva kau luana eta ba dainai belalonama si'asi'a, maivaka kau ka ka ainama beveni vidaveni, 'olana enolea kauta luana kataua deta'u kanobata kauta devaanaanata vaika.

¹¹ Beia melala koi mai kalina ka de'ole mulitai, Dilava enai maui lavivina easi nuatai edodo, inoku deko'isi delavadivo. Deikata kauta boutai 'eva demakau si'asi'a.

¹² Inoku vutuvutuai lele namavaikana ka deika, ediaka, “Oele'au omai nia'.” Inoku ia oli ka laloanai dele'au deda'a vutuvutu laloanai 'eva eta 'ou kauta devialulu.

¹³ Melala koana kanau'i 'eva kanokau namavaikana epulu inoku vanua namana ikolena aveke 'ouka laloanai aveke ka 'eva itoina evasi'avanala, maivaka kanokau eta'u kau da boutai kalakoika (7,000) evabata. Kau kalina demauli kauta kataua 'eva demakau si'asi'a inoku vutuvutu Dilavana devanama'inala.

¹⁴ Si'avana namavaikana ivaluana 'ani eole. Oteko, si'avana ivakoina 'eva kevaimo be'asi.

Anelu Ivalakakoi Kana

Ena Bisi Euvania.

¹⁵ Inoku anelu ivakalakoikana ena bisi euvania. Inoku vutuvutuai lele deluva 'unu'unu dediaka,

“Kanobata vanua 'eva 'ani easi eta Lovia namana mai ia ena Keliso etai eao. Inoku Dilava beloviala keini keini.”

¹⁶ Inoku 'aida'aidata kauta luanavui vani Dilava vailanai eta lovia imia'autai demia'au kauta, vailata kano eda'aia depaka divo Dilava dekuकुदिवो venia,

17 dediaka,
 "Lovia namana Siavu boutai
 Dilavana e, oni omimia mai
 'ana'inai omia.
 Lai vanama'ina luvata lai avenimu,
 'olana emu siavu namavaikana
 'ani oabia
 inoku 'ani bomakava
 kanobata itoina boloviala.
 18 Pulu edea kauta 'eva
 debadu si'asi'a,
 beia 'olana oni emu badu
 melalana 'ani easi,
 ba kauta boutai ivaluvata
 melalana 'ani easi.
 Emu da'alaabi kauta
 enolea kauta kataua,
 mai emu kabukabuta kauta,
 mai oni vamu 'olana de'aku kauta
 kataua, kikitai eda'amo namata,
 boutai tavata nama'ita
 bovenita melalana 'ani easi.
 Maivaka kanobata devasi'avanala
 kauta kataua bovasi'avanata
 melalana 'ani easi."

19 Inoku Dilava ena lo'e kabukabuna vutuvutuai 'eva eviluvu, inoku ena talavatu mauana 'eva ua'i lo'e kabukabuna laloanai ua'i aikaia. Inoku e'amalea, 'ulu namavaikata devua, e'uluia, kanokau eko'isi, mai lamu bika'a boita eaku.

12

Ateate Ka Mai Sisi Ka Vana Dragon.

1 Inoku koa namana ka vutuvutuai evailaasi. Ateate ka tubu'ana 'eva melala, mai vuia 'eva ia aena palapalata venutai, mai lovia i'olana davanai 'eva visiu 'ouka lua e'olaia.

2 Ia 'eva maibo'ana inoku maiananana ekani vilavila vitaitana 'eva 'ani bemaui.

3 Inoku koa ka vaka edeana vutuvutuai evaila. Dragon ka 'aolana nama vaikana 'olana kalakoi ka ita mai bobolona 'ouka mai lovia 'olata davata kikita kalakoi ka 'eva ia 'olana ka ka akatai.

4 Ia iunai visiu ikolete koi laloani aveke ka vutuvutuai edalota asi de'ovu kanobatai.

Dragon ateate 'ani bemaui eko ateatena vilanai elava, inoku ateate melo bevapulua koanai beaniamo.

5 Inoku ateate melo evapulua, melo 'eva moluanena, melo kanaua 'eva kanobata boutai 'aui ikoko'anai be'ola vaita, inoku melo 'eva deabia molau dele'au deda'a Dilava kevana inoku eda'a ena lovia imia'aunai.

6 Ateate 'eva eveau ovo eda'a kano'akunai Dilava 'abu ka 'ani eva'olua ia ena 'abu, ua'i ia be'imala beda'a melala boutai da ka sinavu lua kalakoinavui (1,260).

7 Inoku vutuvutuai 'eva kualu epulu, Mikaelo mai ena anelu ita dragon deviauku venia, dragon mai ena anelu ita vaka Mikaelo deviauku venia.

⁸ Beia dragon ena kula'ila 'eva sia edaia, inoku ia mai ena anelu ita 'eva vutuvutuai eta 'abu devatauleia.

⁹ Dragon namana kanaua 'eva vutuvutuai deitoia asi. Ia 'eva kau'asi 'ana'ina vana Diabolo 'o Satani, kanobata itoina elebaia kauna. Ia mai ena anelu ita 'eva deitota asi de'ovu kanobatai.

¹⁰ Inoku lele ka namavaikana vutuvutuai aika ediaka,

“Vali'u eta Dilava ena vamauli,
ena siavu, mai ena lovia vanuana,
mai Keliso ena siavu 'eva
'ani easi,

'olana bo'akalata va'evai
e'uleta kauna,
boni mai lani Dilava vailanai
va'evai e'uleta kauna 'eva
'ani itona asi.

¹¹ Ita bo'akalata mamoe nakuna
lalanai mai Dilava ena luva
iluvanai diabolo deakuia.
Ia eta mauli 'eva sia delalo'au
venia ia deula bebaba.

¹² Kanaua 'ounai oi vutuvutu mai
ua'i oi omimia kaumui boumuiai,
olalonama.

Beia kanobata mai 'atu 'eva
besi'avana vaika,
'olana Diabolo 'eva 'ani
e'ovu evasi kele'emui,
ia 'eva ebadu vaika,
'olana eikabasi ena melala
'eva 'ani eto'oto'o.”

¹³ Dragon eikabasi ia 'eva 'ani deitoia asi e'ovu kanobatai koanai ia ateate melo evapulua ateatena ulana sia eula beaku bala eko mulinai eda'a.

¹⁴ Beia ateate 'eva bo'ibata namana vanina lua devenia, inoku belolovo beda'a kano'akunai ena 'abu iva'oluna kanauai, ua'i be'imala vikau koi mai kalina ka, kau'asi ia sia bedavalia.

¹⁵ Inoku kau'asi kanaua nutunai vei e'ulaia asi itani abaka boina inoku ateate mulinai eda'a bealuaovo.

¹⁶ Beia kanobata ateate edulua nutuna eluvuia inoku vei kanaua dlaron nutunai e'ulaia asi veina edonoia.

¹⁷ Dragon 'eva ateate ebadu venia si'asi'a, 'ounai eda'a ateate nakuna mai kekena bekuai venita. Kau kataua 'eva Dilava ena luva deabi 'ini mai Iesu luva umauna evala'asia enai deabiveni kauta.

¹⁸ Inoku dragon 'eva 'atuai nabuai elava.

13

Aivala Sisita Lua Dele'au.

¹ Inoku akailao 'eva aivala sisina namavaikana ka 'atuai ele'au aikaia. Ia 'eva bobolona 'ouka mai 'olana kalakoi ka, bobolonai 'eva mai eta lovia 'olata davata 'ouka, 'olana ka ka akatai 'eva Dilava ivasi'avanana luvata ileleta.

² Aivala sisina namavaikana kanaua aikaia ikana 'eva itani pusi asina namavaikana boina aena ikata 'eva itani sisi vana bea aena boita, mai nutuna 'eva itani sisi vana laioni nutuna boina. Dragon eko'isi ena kula'ila, mai ena lovia imia'auna, mai siavu namana aivala sisina namavaikana kanaua evenia.

³ Aivala sisina namavaikana kanaua aikaia 'olana ka 'eva duana loina bema vabaia boina beia dua kanaua 'eva enama'ina, inoku kanobata itoinai etabulovo si'asi'a aivala sisina namavaikana kanaua mulinai eda'a.

⁴ Kau dragon kanaua dekudivo venia 'olana ia 'ani siavu aivala sisina namavaikana evenia, inoku aivala sisina namavaikana vaka dekudivo venia delavuai dediaka, "Dai 'eva aivala sisina namavaikana kanania boina? Dai maikula'ilana ia bekuai venia?"

⁵ Aivala sisina 'eva komolo evenia apa luvata, mai Dilava ivasi'avanana luvata beluluva, siavu evenia vuia vaninavui lua laloatai ia belovia.

⁶ Nutuna eluvuia Dilava ivasi'avanana luvata eluva, mai luva dedetai ia vana, mai Dilava ena mia 'abuna mai vutuvutuai demimia kauta boutai vaka etai.

⁷ Ia 'ani siavu devenia Dilava ena kau bekuaita beakubata. Mai komolo evenia iduvu boutai, kau boutai, lele boutai mai kanobata boutai be'olavaita.

⁸ Kanobata ivavainai vata sia ileleta mamoe nakuna deakubala ena mauai pukanai kauta boutai kanobatai demimia kauta ia bekudivo venia.

⁹ Maikaiana kauna, lele be'ika.

¹⁰ Dilava be'ula kau ka beabia bevavabuto'oa koanai, kau kanaua 'eva beabia bevavabuto'oa.

Mai be'ula kau ka kuali leponai
bekala bala koanai, kau kanaua
'eva kuali leponai bekala bala.

Kanania evavaia 'eva ia ena
kabukabu kauta 'eva vakula'ilai
mai abiveniai bemimia.

¹¹ Inoku aivala sisina namavaikana edeana ka vaka kano laloanai ele'au aikaia, ia bobolona 'eva lua itani mamoe nakuna bobolona boita, beia eluvaluva lenea 'eva itani dragon boina.

¹² Ia 'eva aivala sisina namavaikana makavana ena siavuai mai vanai evinaula, siavu kanania'i kanobata mai kanobatai demimia kauta boutai evaasiasita aivala sisina namavaikana makavana kanaua dekudivo venia, dua bema vabaia beia enama'ina vaia sisina namavaikana kanaua.

¹³ Aivala sisina namavaikana ivaluana vatabulovo vinaulata namata evavai, ka 'eva kau boutai makatai 'alova vutuvutuai eva'ovua easi kanobatai.

¹⁴ 'Olana siavu evenia vatabulovo vinaulata kataua aivala sisina namavaikana makavana vanai evavai. Vatabulovo vinaulata kataua'i kanobatai demimia kauta boutai elebata. E'outa aivala sisina namavaikana makavana kuali leponai dekalalaia bemaba beia emauli 'udai kanaua ikaikana va'ava'ana ka bevavaia ia vana beabiasai mai beakuaabalai.

¹⁵ Siavu evenia aivala sisina namavaikana makavana ikaikana va'ava'ana mauai lavivina bevenia bevamaulia, inoku ia vaka beluvaluva mai kau boutai be'outa dai koakoana va'ava'ana sia bekudivo venia kauta kataua boutai 'eva beakubata.

¹⁶ Maivaka aivala sisina namavaikana kau boutai evaasiasita, kikita mai namata, lovia kauta mai ta'ovala kauta, sia da'ala de'abi kauta mai da'ala de'abi kauta, boutai 'eva koa ka imata idibatai 'o ba'utai beabia.

¹⁷ Dai koa kanaua sia eabia kauna 'eva sia dava ka betavala mai sia dava ka betavatava vaia kovo, koa kanaua 'eva aivala sisina namavaikana kanaua vana 'o ia vana numelana.

¹⁸ Maiaonekamau kaumu 'eva vakuvaku kanania anina 'ani boikabasia bedaia, 'olana vakuvaku kanania 'eva kau vana, numelana 'eva sinavu kalakoi kalakoinavui kalakoi (666).

14

Mamoe Nakuna Ena Kau Masi Makamakana Deabia.

¹ Inoku akailao 'eva mamoe nakuna vaila'uai aikaia, Siona lolona akanai elava, mai kau boutai da sinavu ka vaninavui vani (144,000) 'eva ia ita mai kau kataua ba'utai 'eva mamoe nakuna vana mai kamana vana ileleta.

² Inoku 'ulu ka vutuvutuai aika itani abaka ealu 'uluna mai vutuvutu e'uluia 'uluna namana boina. 'Ulu kanaua aika 'eva itani kita aku kauta eta kita vata 'apa demone vai boita.

³ Inoku kau kataua masi makamakana ka lovia imia'auna vailanai mai maui davata vanina vailatai mai kau 'aida'aidata vailatai deabia. Sia kauka masi kanaua 'ani beikabasia ia kau da 144,000 kanobatai lalanai etavata kautamo sibota.

⁴ Kau kataua 'eva 'a'ate ita sia denoka'ona kauta, eta maui laloatai sia va'eva ka devavaia. Mamoe nakuna a eda'ala 'eva mulinaimo dedada'a kauta. Kanobata kauta viloatai ia 'eva etavata mai Dilava mai Mamoe Nakuna etai 'eva veniveni davata makavatai deao.

⁵ Dede luvana ka nututai sia deluvaia, ia kevatai 'eva va'eva asi'i.

Anelu Koi Valuva Melalana Valina Dekava.

⁶ Inoku anelu edeana ka vutuvutu mai kanobata bo'adatai elovo aikaia, ia 'eva Vali nama'ina mia keinikeini valina eabia, inoku kanobatai demimia kauta kevatai beilolo vaia, kanobata boutai, iduvu boutai, mala edeata edeata, mai kau boutai kevatai.

⁷ Ia eluva 'unu'unu ediaka, "Dilava makauna omakau mai vana oabiaisii, 'olana lavuai melalana 'ani edaia. Vutuvutu, kanobata, atu mai kanoai vei ebubudi ivavaita kauna okukudivo venia."

⁸ Inoku anelu ivaluana anelu makavana mulinai elovo ediaka, "Ani e'eko asi! Babulonia vanua namana, 'ani e'eko asi, ena mo'a anaanana mulamulanai kanobata boutai eva inubata."

⁹ Inoku anelu edeana ivakoina anelu luana mulitai elovo eluva 'unu'unu ediaka: "Kau ka aivala sisina namavaikana mai ia ikaikana va'ava'ana ekukudivo venia mai ia ba'unai 'o imanai sisi namavaikana loina beabia koanai,

¹⁰ ia vaka Dilava ena badu mulamulana pasisina beinua, ena badu 'ounai elaianda sia maiveina. Kauna kanaua 'eva anelu kabukabuta mai Mamoe nakuna vailatai 'alova maibika'ana vana salpai belo'olo'o beanana si'asi'a.

¹¹ Deanana vaia 'alovana kanaua vaitabuna 'eva bele'au to'ona asi'i. Aivala sisina namavaikana mai ikaikana va'ava'ana dekukudivo venia 'o vana loina deabia kauta 'eva boniai mai laniai eta laani asi'i, 'o vana numelana deabia kauta 'eva beananamo."

¹² Kanaua 'ounai Dilava ena kabukabu kauta mai ena luva 'olata de'aku mai Iesu enai deabiveni 'ini kauta 'eva manuai bemimia.

¹³ Inoku lele ka vutuvutuai aika ediaka, "Luva kanania lelea. Vanama'ina 'eva vali'u beda'a vailai Lovia namana enai deabidadama mai debaba kauta etai." Idume Kabkabuna vaka ediaka, "'O momo'ai, eta vinaula mekauai lata be'ani, eta vinaula nama'ita betata'u ia bebanota."

Kanobata Ena Ukuuku Melalana Edaia.

¹⁴ Inoku akailao, 'eva oli ka deva'ina vaila'uai aikaia, oli kanaua akanai kau ka emia'au ikana 'eva itani Kau nakuna boina, 'olanai 'eva lovia 'olana davana kolo ai devavaia, mai imanai 'eva ukuuku lepona 'anona ka eabia.

¹⁵ Inoku anelu edeana ka lo'e kabukabunai ela'asi oli akanai emia'au kauna e'aeia 'unu'unu ediaka, "Emu ukuuku lepona abia ukuuku vaia, 'olana ukuuku melalana 'eva 'ani eabia, kanobatai ukuuku davata 'eva 'ani de'aiva."

¹⁶ Kanaua 'ounai oli akanai emia'au kauna ena ukuuku lepona kanobata akanai etaveia, inoku kanobatai de'aiva davata boutai eukuta.

¹⁷ Inoku anelu edeana ka vutuvutuai lo'e kabukabunai ela'asi, ia vaka imanai ukuuku lepona ka 'anona eabia.

¹⁸ Mune'e anelu edeana ka vaka, 'alova e'ola vaia aneluna, vala kabukabunai ela'asi inoku anelu imanai ukuuku lepona 'anona eabia kanaua e'aeia 'unu'unu ediaka, "Emu ukuuku lepona 'anona abia kanobata ena vine kulanai vine vuavuata ukuta, 'olana kanobata vinena vuavuata 'eva 'ani de'aiva."

¹⁹ Inoku anelu kanaua ena ukuuku lepona kanobata akanai etaveia, kanobata vinena vuavuata edouta bou inoku Dilava ena badu 'abuna vine vuavuata imuduta mukamuka 'abunai ekapota dodo.

²⁰ Inoku ia 'eva vanua mulinai vine vuavuata imuduta mukamuka 'abunai demuduta mukamuka, inoku imuduta mukamuka 'abunai lala ealu asi, ele'au eda'a akai itani osi bemalavadivo nutunai boina, ia ena laka'ina 'eva kilomita sinavu koi boina.

15

Anelu Kalakoi Ka Vasi'avana Davata Oleta Kalakoi Ka Deabita.

¹ Akailao 'eva koa ka namavaikana mai nama'ina vaika vutuvutuai aikaia. Anelu kalakoi ka imatai 'eva anaana si'avata vaika davata oleta umauta kalakoi ka deabita, 'olana katania'i 'eva Dilava ena badu bevaolea.

² Inoku akailao dava ka itani 'atu 'eva kalasi boina mai'alovana aikaia. Kau ua'i 'atu 'aba'abanai delava kauta 'eva aivala sisina namavaikana mai ikaikana va'ava'ana mai vana numelana deakuta kauta. Dilava kita vana apa kanaua evenita deabi.

³ Inoku Mose Dilava ena da'alabi kauna masina mai Mamoe nakuna masina deabita,

"Emu vinaula 'eva namavaikata
mai mediata vaika,

Lovia namana siavu boutai
Dilavana e.

Emu dala 'eva
komolota mai umauta,
Kanobata boutai eta Lovia.

⁴ Lovia namana e,
dai 'eva makaumu sia bemakau,
mai vamu sia beabia isi?

'Olana oni sibomu 'eva
okabukabu.
Kanobata boutai be'asi
oni vailamuai bekukudivo venimu,
'Olana oni emu koakoa komolota
'eva 'ani deika."

⁵ Katania mulitai akailao vutuvutuai lo'e kabukabuna iluvuna aikaia, ua 'eva Dilava ena talavatu aiolena.

⁶ Inoku anelu kalakoi ka anaana si'avata vaika davata kalakoi ka imatai deabi ua'i dela'asi deasi, tubu'a nama'ita vaika vata linen, mai'amale 'amaleta devadodota, mai pedetai 'eva kolo 'apata.

⁷ Inoku mauili davata vanina ka kolo voduta kalakoi ka mia keinikeini Dilavana ena baduai devonu, eabita anelu kalakoi ka kataua evenita.

⁸ Inoku Dilava ena nuavi mai ena siavu vaitabuna 'eva lo'e kabukabuna laloana evavoua, inoku sia kau ka bema da'adodo bemada'amo anelu kalakoi ka kataua anaana si'avata vaika davata kataua bemavaoleta.

16

Dilava Ena Badu Voduta Kalakoi Ka De'itabuta Siusiu.

¹ Inoku lele ka lo'e kabukabunai aika anelu kalakoi ka e'outa 'unu'unu ediaka, "Oda'a, Dilava ena badu voduta kalakoi ka kanobata akanai oi bopovuta asi."

² Kanaua 'ounai anelu makavana eda'a ena vodu kano akanai e'itabua asi, inoku dua ikana sia mediana mai eanana vaika kau aivala sisina ena numelana deabia mai ikaikana va'ava'ana dekudivo venia kauta akatai epulu.

³ Anelu ivaluana ena vodu 'atu akanai e'itabua asi, inoku 'atu lalai eao itani ba kauna lalana boina, inoku dava ua'i 'atu laloanai demauli davata boutai deba.

⁴ Anelu ivakoina ena vodu nutuai mai vei kanoai debubudi akatai e'itabua asi, inoku lala ai deao.

⁵ Inoku vei e'ola vaita aneluna lelenu aika ediaka, "Oni 'eva kabukabu Dilavana, oni 'eva vali'u omimia mai 'ana'inai omia Dilavamu, emu valuva katanai'i si'avana kauta mekau ovakoata 'eva okomolo vaika.

⁶ 'Olana ia deta'u emu kabukabu kauta mai enolea kauta deaku bata lalata de'itabu asi, inoku ia eta koakoai deula lala be'inu 'ounai lala ovenita be'inu."

⁷ Inoku lele ka vala kabukabunai easi aika ediaka, "O, luva umauna, Lovia namana siavu boutai Dilavana e, oni emu valuva ai si'avana kauta mekau ovakoata 'eva umauta mai dekomolo."

⁸ Anelu ivavanina ena vodu melala akanai e'itabua asi, inoku melala siavu evenia 'alova siavunai kau bevalo'olo'ota.

⁹ Siavu nama vaikana eta'u kau evalo'olo'ota inoku Dilava vana desivadala, anaana si'avata vaika e'olavaita kauna, beia sia deula belalo'udai inoku Dilava vana beakuabalai.

¹⁰ Anelu ivaimana ena vodu aivala sisina ena lovia imia'auna akanai e'itabua asi, inoku vabuto'o aivala sisina ena lovia vanuana itoina e'alavua, inoku kau deanana vaika 'ounai malata dealata,

¹¹ mai eta anana mai duata daitai Dilava vutuvutuai emimia Dilavana desivadaia, beia eta vavai si'asi'a ai belalo'udai 'eva sia deula.

¹² Anelu ivakalokoina ena vodu Eupalate nutuna namana akanai e'itabua asi, inoku nutu veina 'eva elada mai melala daena duasi lovia 'olata be'asi eta dala eva'olua.

¹³ Inoku ka'uba si'avata vaika koi aikata ikata itani 'alabeto boita, ia 'eva dragon nutunai, mai aivala sisina nutunai mai enolea kauna dedena nutunai dela'asi.

¹⁴ Ia 'eva diablo ka'ubata si'avata vaika koa mai vatabulovo vinaulata devavai, mai dela'asi deda'a kanobata itoina ena lovia 'olata kevata, bevalalota Siavu Boutai Dilavana ena melala namanai bekuai.

¹⁵ "Inoku lele ka aika ediaka, kaiamui ovaala, lau 'eva vinao kauna boina bavavasi. Kau ka makana de'ata emimia mai ena tubu'a evadodoa kauna 'eva enama'ina, ia sia mai'okona beda'a keinikeini inoku mato vailatai bemalalai."

¹⁶ Inoku ka'uba si'avata vaika koina lovia 'olata devalalota deda'a 'abu ka 'Ebelu malatai vana de'aea Alamakedono ai.

¹⁷ Anelu ivakalakai kana ena vodu lavivi laloanai e'itabua asi, inoku Dilava ena luma kabukabuna laloanai lovia imia'auna akanai lele ka easi eluva 'unu'unu ediaka, "Ani eole."

¹⁸ Inoku vutuvutu e'amalea, aika eaku e'uluia, 'ulu namata devua, mai kanokau si'avana vaika eko'isi, kanobatai kau epulu laloanai kanokau kanau boina sia ka eko'isi, kanokau kanania 'eva si'avana vaika vaika.

¹⁹ Inoku Babulonia vanuana namana 'eva e'alama aveke koi, mai kanobata boutai vanuata namata 'eva de'alama demukamuka. Dilava 'eva Babulonia vanua namana ena si'avana elalovai 'ini inoku ena badu si'avana vaika mulamulana pasisina 'ouna vonuna Babulonia evenia einuia.

²⁰ Inoku motumotu boutai detaule, mai lolo 'eva sia idavalita.

²¹ Lamu vutuvutuai e'ovu itani bika'a namata boita, eta mekau 'eva kilogram imanavui boita de'ekoasi kau akatai, inoku lamu bika'a boina kanau dainai kau Dilava vana desivadala, 'olana anaana kanania 'eva esi'avana vaika.

17

Mo'a Ateatena Namana

Mai Aivala Sisina.

¹ Anelu kalakai ka kataua vodu kalakai ka deabita aneluta ka easi inoku e'ou'u ediaka, "Mai, mo'ai ekula'ila vaika ateatena namana ena anaana bavaikamu, ia 'eva vei doutamo akatai emimia.

² Ia 'eva kanobata lovia 'olata kauta ita dekulakula mai kanobata kauta vaka itana dekulakula itani mulamula pasisinai deinuba."

³ Inoku anelu kanaua Idume Kabukabunai evua'u eda'a kano'akunai, ua'i ateate ka aikaia aivala sisina ka 'aolana 'olana kalakai ka bobolona 'ouka kauaninai 'eva Dilava ivasi'avanana vata ileleta kanaua akanai emia'au.

⁴ Ateate kanaua 'eva tubu'a pepolona mai 'aolana maikolota de'amale'amale evadodota, mai bika'a koevata vaika mai kutukutu 'amale'amaletai evanama, imanai 'eva kolo 'ouna ka eabia, laloanai 'eva ena vinaula si'avata vaika evavai mai ena kulakula koakoata 'obuta evonu.

⁵ Ia ba'una akanai 'eva va vunina ka ilelena,

'BABULONIA NAMANA,
KANOBATAI MO'A 'AATETA BOUTAI
MAI DAVA SI'AVATA VAIKA SINATA.'

⁶ Inoku ateate kanaua aikaia 'eva Dilava ena kabukabu kauta mai Iesu valina dekava kauta kataua deaku bata lalatai einu ba. Aikaia koanai atabulovo si'asi'a.

⁷ Inoku anelu kanaua e'ou'u ediaka, "Dava 'ounai otabulovo? Lau ateate kanana mai aivala sisina 'olana kalakai ka bobolona 'ouka akanai emia'au kanaua luvata vuniata ba'oumu.

⁸ Inoku aivala sisina, oikaia kanaua 'eva 'ana'inai emia, ia vali'u sia emimia, ia 'eva 'uli 'oulana to'ona asi'i kanaua'i bele'au be'asi, inoku beda'a beole vaika. Dilava kanobata evavaia koanai kanobata kauta vata mauli pukana laloanai sia ileleta kauta, aivala sisina kanaua beikala 'eva betabulo, 'olana ia 'eva 'ana'inai emia, vali'u sia emimia, maivaka beasi 'udai.

⁹ “Kanania 'eva kau maiaonekana kauna 'eva anina 'ani beikabasia, aivala sisina 'olana kalakoi ka 'eva lolo kalakoi ka kataua akatai ateate emia'au.

¹⁰ Kataua vaka 'eva lovia 'olata kalakoi ka, ima 'eva 'ani de'ekoasi, ka 'eva vali'u emimia, ka 'eva asido'o easi; beia ia be'asi koanai 'ani bemimia kava'inamo.

¹¹ Aivala sisina kanaua 'ana'inai emia, beia vali'u 'eva sia emimia, ia 'eva lovia 'olana ivakalavanina, ia 'eva lovia 'olata kalakoi ka banota ka beia ia vaka bevaolea.

¹² “Bobolo 'ouka oikata kataua 'eva lovia 'olata 'ouka asido'o ka ena lovia vanuana ka eabia, beia ia aivala sisina ita siavu beabia belovia melala koana ka'onamo laloanai.

¹³ Ia boutai eta lalovai 'eva ka'onamo, inoku eta kula'ila mai eta siavu 'eva aivala sisina bevenia.

¹⁴ Inoku ia 'eva Mamoe nakuna bekuali venia, beia Mamoe nakuna betata'u beakuta 'olana ia 'eva lovia namata boutai eta Lovia namana mai lovia 'olata boutai eta Lovia 'olana, e'aeta, mai edilata mai deabi venia mulinai dedada'a kauta 'eva ia ita.”

¹⁵ Inoku anelu e'ou'u ediaka, “Vei kataua oikata akatai mo'a ateatena emia'au 'eva, kau edeata edeata, pulu edeata edeata, kanobata edeata edeata, mai mala edeata edeata kauta.

¹⁶ Aivala sisina mai bobolo 'ouka oikata kataua 'eva mo'a ateatena kanaua ulana sia be'ula, ena dava boutai beabiovo inoku mai'okona bevikania, vidiona beania inoku 'alova ai betoua.

¹⁷ Dilava ena ula bevaolea lalovaina 'eva ia nuatai ene'eiadivo inoku nuata bevaka'onamo eta siavu 'eva aivala sisina bevenia belovia vaia, beda'amo Dilava ena luva bemomo'ai.

¹⁸ Ateate kanaua oikaia 'eva vanua namana inoku kanobatai lovia 'olata boutai e'ola vaita.”

18

Babulonia Vanua Namana

Ani E'ekoasi.

¹ Katania mulitai anelu edeana ka vutuvutuai e'ovu easi aikaia. Ia ena siavu 'eva nama vaikana mai ena nuaviai kanobata itoina eva'aialalala.

² Lelena evakula'ilala evaoi 'unu'unu ediaka,

“Ani e'ekoasi! Babulonia
vanuana namana 'ani e'ekoasi!
Ia 'eva diablo mai ka'uba si'avata
boutai eta mia 'abunai e'ao,
manumanu si'avata mai
ulata sia de'ula davata
eta mia 'abunai e'ao.

³ 'Olana kanobata kauta boutai
ita kulakula koakoata si'avata
vaika devavai
itani ena mulamula pasisinai
deinu ba boina.
Kanobatai lovia 'olata kauta vaka
ia ita deno ka'ona,

mai kanobatai tavatava kauta
'eva ena dava mediata tavata
namatai delovia.”

⁴Inoku lele edeana ka vutuvutuai aika ediaka,
“E'u kau e, vanua kanana
laloanai ola'asi omai.

Inoku ia ita si'avana
sia oi bovavai ka'ona.

Mai ena anaana si'avata vaika
sia ka oi boabia.

⁵Olana ena si'avana 'eva
'ani edouia eda'amo vutuvutuai,
mai Dilava 'eva ia ena vavai
si'asi'a boutai elalovai 'ini.

⁶Ena veniveni vitaitanaimo
oi bovenia 'udai.

Evavaia davana 'eva
melala lua tavana oi boveveni.
Mulamula pasisina evenimui
davana 'eva melala lua
ena 'ouai oi bolaiauda
bekula'ila inoku beinua.

⁷Anaana namavaikana mai
vilalo namavaikana oi bovenia
itani nuavi mai dava tavata
namata sibona evenia boina.
Sibona nuanai eapa ediaka,
'Lau 'eva lovia 'olana ateate'u
amimia, lau 'eva sia obu,
mai lau 'eva sia bakani kovo.'

⁸Kanaua 'ounai melala ka'onamo
laloanai ia bana davata boutai
bedavalita,
ba, kani mai doe.

Ia 'eva 'alova laloanai beani palu.
'Olana Lovia namana Dilava
ia ilavuaina Dilavana 'eva
ekula'ila vaika.

⁹“Kanobatai lovia 'olata ia ita deno ka'ona mai ena lavo delalonama
vaia ka'ona kauta 'eva 'alova kanaua vaitabuna beikala koanai belaloo mai
bekanidiala.

¹⁰Ena anaana bevamakauta, inoku ia 'eva dau'ai vaika belalava bekakani
beluluva,

'Esi'avana vaika!

Kula'ila vanuana namana e,

esi'avana vaika!

Babulonia e,

siavu vanuana namana!

Melala koana ka'onamo laloanai
Dilava evaanaanamu vaika.'

¹¹“Kanobatai tavatava kauta vaka belaloo mai bekanidiala 'olana eta
tavatava davata 'eva sia kau ka 'ani betava 'udai.

¹²Tavatava davata kataua 'eva kolo mai siliva, bika'a koevata mai
kutukutu 'amale'amaleta, tubu'a koevata vaika, tubu'a pepolota, tubu'a
kevekeveta nama'ita, tubu'a a'olata, au bonata nama'itai devavai davata

edeata edeata, sisi vana elepant kusivanai devavai davata boutai, au tavata namata auta, kopa, 'auli mai bika'a pasisina medianai devavaita davata,

¹³ Iani bonata ivanama'inata mulumulata vata sinemoni mai spaissi, mulamula bonata nama'ita vata inisenese mai mila, mai mulamula kula'ilana kauani beuku mulamulana, mulamula pasisina mai olive deolona, palaoa nama'ita, witi, bolomakau mai mamoe, ōsi, mai kaliota, da'alabi kauta, mai kau eta maui.

¹⁴ Dava detavatava vai kauta be'oua bediaka,

'Babulonia e,
dava nama'ita oula venita davata
mai emu lovia davata mai emu
nuavi davata boutai 'eva
'ani detaule,
inoku sia 'ani bodavalita 'udai.'

¹⁵ "Tavatava kauta dava ia kevanai detavatava vaita inoku monitai delovia kauta 'eva dau'ai vaika belalava, 'olana ena anaana bevamakauta. Belalao mai bekanidiala

¹⁶ Bekakani bediaka,
'Esi'avana vaika!
Esi'avana vaika, Vanua namana e'
Tubu'a koevana vaika vana linen,
pepolona, mai 'aolana oवादodota,
kolo 'amale'amaletai,
bika'a koevata vaika mai
kutukutu nama'itai ovanama.

¹⁷ Melala koana ka'onamo
laloanai emu lovia davata
katania boutai 'eva 'ani deole.'

"Aunakoi kapena kauta boutai, mai dele'au dekalima kauta boutai, aunakoi devinaula kauta boutai, mai 'atuai deda'a to'ato'a eta dava detavatava vai kauta boutai dau'ai belalava.

¹⁸ Ia be'ani vaitabuna bele'au beikala koanai, bevaoui bediaka,
'Vanua davana 'eva vanua namana kanania boina?'

¹⁹ Apulolo 'olata akatai bene'e'au mai belalao mai bekakani 'unu'unu bediaka,

'Esi'avana vaika!
Esi'avana vaika, Vanua namana e,
maieta aunakoi 'atuai deveau
kauta boutai ena lovia davatai
lavo kautai de'ao,
melala koana ka'onamo laloanai
ia 'eva 'ani eole.

²⁰ Vutuvutu e. Lalonama!
Olalonama,
Dilava ena kabukabu kaumui,
mai veauneke kaumui,
mai enolea kaumui!
Evavaimui si'asi'a 'ounai
Dilava ia mekau evakoala.' "

²¹ Inoku anelu kula'ilana ka eta'u bika'a 'otoina nama vaikana ka eabia isi 'atu laloanai ekapoa uku inoku ediaka,

"Kania boina vitaitanai
Babulonia vanua namana
'atu laloanai bekapoa uku,
inoku sia bedavalia 'udai.

²² Oni emuai 'eva,
 Kita vana 'apa demonevai kauta
 mai masi kauta, sia
 mai bisi uvani kauta 'uluta
 sia 'ani ika 'udai beao.
 Vinaula edeata edeata kauta
 sia ka 'ani idavali 'udai beao.
 Iani ivakali mukamukata
 'uluta sia ka vaka
 'ani ika 'udai beao.

²³ Lamepa 'ailalana sia ka emuai
 'ani beani 'udai.
 Kamoane makamaka kauna
 mai ateatena leleta
 emuai sia 'ani beika 'udai.
 Dava katania bepupulu
 'olana emu tavatava kauta 'eva
 kanobatai kau namata deao,
 mai emu menai 'eva
 kanobatai boutai olebata.

²⁴ Babulonia vanua namana
 anaana eabia 'olana 'eva
 ia laloanai 'eva enolea kauta
 mai Dilava ena kabukabu kauta
 lalata dedavalita,
 mai kanobatai deaku bata kauta
 boutai lalata vaka.”

19

*Vutuvutuai Devaoi Dediaka,
 'Aleluia!*

¹ Kanania mulinai, 'ulu ka aika itani kau do'utamo vaika vutuvutuai
 devaoi dediaka,
 “'Aleluia! Kavanama'inala.
 Vamauli mai nuavi mai siavu
 'eva eta Dilava ena.

² Dilava ena valuva 'eva
 umauta mai dekomolo.
 Ia eta'u mo'a ateatena namana mekau evakoala,
 'olana ena mo'a koakoatai
 kanobatai evavaia si'asi'a 'ounai.
 Dilava ena da'alabi kauta deaku
 bata lalata tavata 'ani evamuea.”

³ Inoku devaoi 'udai dediaka,
 “'Aleluia! Kavanama'inala.
 Vanua namana e'ani vaitabuna
 ele'au sia bepupua beda'amo
 to'ona asi'i.”

⁴ Inoku 'aida'aidata kauta luanavui vani mai mauili davata vani dekuvidula
 lovia imia'auna akanai emia'au Dilavana dekuvidivo venia. Inoku devaoi
 dediaka,
 “Amen, 'Aleluia!”

*Mamoe Nakuna Ena
 Kamoane Naduna.*

⁵ Inoku ua'i lovia imia'aunai lele ka easi ediaka,
 “Dilava ena da'alaabi kaumui
 boumuiai mai makauna oi omakau
 kaumui kikinai eda'amo namana
 boumuiai e,
 eta Dilava kavanama'inala.”

⁶ Inoku 'ulu ka aika, 'uluna 'eva itani kau doutamo vaika 'o ka'uda namata
 deaku 'au 'o vutuvutu e'uluia 'uluna namana boina devaoi dediaka,
 “Aleluia!

'Olana eta Lovia namana
 siavu boutai Dilavana 'eva
 ita e'ola vaita.

⁷ Ekalalonama mai Lalota
 benanama, nuavi ekavenia!
 'Olana Mamoe nakuna ena
 kamoane melalana 'ani ele'au,
 mai beadavala ateatena vaka
 'ani sibona eva'olua.

⁸ Tubu'a nama'ina vana linen,
 deva'ina mai e'amale'amale
 mai sia mai'obuna,
 devenia bevadodoa.”

(Tubu'a nama'ina kanaua anina 'eva Dilava ena kabukabu kauta vinaula
 komolota devavai kauta.)

⁹ Inoku anelu e'ou'u ediaka, “Luva kanania lelea. Deveauveau venita
 Mamoe nakuna ena kamoane naduna laloanai deasi kauta kataua 'eva
 denama'ina.” Maivaka ediaka, “Katania 'eva Dilava nutuna luvata umauta.”

¹⁰ Inoku anelu kanaua aena 'olanai akuidula bakukudivo venia ako. Beia
 ia lau e'ou'u ediaka, “Kanana sia bovavaia! Lau 'eva da'alabi kau'u 'avaea'u
 oni ita mai bo'akalamu Iesu valina dekakava kauta ita. Dilava sibonamo
 ekakukudivo venia! 'Olana Iesu i'ou daena 'eva enolea siavunai.”

Osi Deva'ina Akanai Emia'au Kauna.

¹¹ Inoku akailao vutuvutu eluvu aikaia 'eva osi deva'ina ka ua'i elava,
 akanai emia'au kauna vana 'eva 'ABIVENI' mai 'MOMO'AI'. Ia 'eva komoloai
 evaluva mai ekuali.

¹² Makana ikata 'eva itani 'alova evuvule boina, 'olanai 'eva lovia 'olata
 davata doutamo, ia kaunai 'eva va ka ilelena beia sia kau ka va kanaua
 eikabasia, ia sibonamo eikabasia.

¹³ Ena tubu'a laka'ina evadodoa 'eva lalai iudaukuna, inoku ia vana 'eva
 'DILAVA ENA LUVA'.

¹⁴ Vutuvutu ena kualii kauta ia mulinai deda'a, osi deva'itai demia'au,
 tubu'a nama'ita vata linen devadodota, deva'ita mai siade'obu.

¹⁵ Nutunai 'eva kualii lepona 'anona ela'asi, ena vinaula 'eva kanobata
 edeata edeata boutai beakuta mukamuka, inoku ia 'eva 'auli ikoko'anai
 be'ola vaita. Siavu boutai Dilavana ena badu si'avana vaika bevamomo'aia
 'abuna vine vuavuana ivakali mukamukana 'abunai bevakalita mukamuka.

¹⁶ Vabatanai ena tubu'a laka'ina akanai 'eva va kanania eleleia, 'Lovia
 'olata boutai eta Lovia 'olana mai Lovia namata boutai eta Lovia namana.’

¹⁷ Inoku anelu ka melala laloanai elava aikaia, kanobata mai vutuvutu
 vilootai delovo manumanuta boutai e'aeta 'unu'unu ediaka, “Omai, Dilava
 ena nadu namanai ovaka'onamo.

¹⁸ Inoku oi 'eva lovia 'olata kauta, kualii 'olata kauta, mai kula'ila kauta
 vidiota oi bo'ani, osi mai osiai demia'au kauta vidiota oi bo'ani, mai kau

boutai, da'alaabi kauta mai sia da'ala de'abi kauta, kikita mai namata boutai vidiota oi bo'ani."

¹⁹ Inoku aivala sisina kanaua mai kanobata ena lovia 'olata kauta mai eta kuali kauta ita deakubou osi deva'inai emia'au kauna mai ena kuali kauta ita bekuai deko aikata.

²⁰ Beia aivala sisina deakuia de'abia maui, ena enolea kauna dedena ia vanai vatabulovo koakoata evavai kauna ita. Koakoa kataua'i aivala sisina vana numelana deabia mai koakoana va'ava'ana dekukudivo venia kauta elebata. Ia lalua'ana 'eva maulitai bika'a mai'alovana vana salpa eani keinikeini 'ovu'ovunai deitota dodo.

²¹ Inoku ia eta kau kalina osi deva'ina akanai emia'au kauna nutunai kuali lepona ela'asi kanaua'i eakubata, inoku manumanu boutai vidiotai deani vunu.

20

Keliso Itana Belovia Vikau

Da Ka (1,000).

¹ Inoku vaka anelu ka vutuvutuai e'ovu easi aikaia, imanai 'eva 'uli to'ona asi'i kina mai seini namana ka eabita.

² Sisi vana dragon, kau'asi 'ana'ina, ia 'eva Diabolo, 'o Satani, eabi 'inia inoku seiniai edo'o 'inia vikau boutai da ka (1,000) bemia vaia.

³ Anelu sisi kanaua 'uli to'ona asi'i laloanai eitoia uda, inoku e'alavu 'inia mai akanai talavatu koana ene'eia divo, kanobata kauta asi'i emalebata 'ounai ua'i bemimia beda'amo vikau boutai da ka (1,000) be'ole. Kanaua mulinai 'eva beluvua inoku bela'asi bemimia melala kava'inamo.

⁴ Inoku akailao 'eva lovia imia'auta akatai demia'au kauta aikata 'eva siavu deabi bevaluva mai Iesu valina dekava mai Dilava ena luva deluva vai daitai 'atota detauuku kauta idumeta aikata. Ia 'eva aivala sisina kanaua 'o koakoana va'ava'ana sia dekukudivo venia mai vana numelana ba'utai 'o imatai sia deabi kauta. Ia 'eva demauli 'udai inoku Keliso ita delovia vikau boutai da ka (1,000).

⁵ (Ba kauta kalina boutai 'eva sia demauli 'udai eda'amo vikau boutai da ka (1,000) deole.) Kanania 'eva ba ai ko'isi 'udai lava'ana'ina.

⁶ Kau kataua ko'isi 'udai lava'ana'ina laloanai demimia kauta 'eva de-nama'ina mai dekabukabu. Ba ivaluana 'eva sia maiena siavu kevatai, beia ia 'eva Dilava mai Keliso eta kabukabu vinalata ivavaita kautai be'ao mai ia ita belovia ka'ona beda'amo vikau boutai da ka (1,000).

Satani 'Alova 'Ovu'ovunai

Deitoia Uda.

⁷ Inoku vikau boutai da ka be'ole mulinai Satani 'eva ena vabuto'o 'abunai beluvua.

⁸ Satani bela'asi beda'a kanobata itoinai kanobata kauta belebata, ua 'eva Gog mai Magog bevado'uta kuali bedada'a. Eta mato 'eva itani 'atu nabuana boina.

⁹ Kanobata itoinai dekeini deda'a Dilava ena kau demimia 'abuna mai ena lalo'au vanuana delavaia kaiukaiu. Beia 'alova vutuvutuai e'ovu easi kuali kauta kataua boutai e'abu paluta.

¹⁰ Inoku diabolo kanaua ia eleba si'ata diabolona 'eva ua'i bika'a mai'alovana vana salpa e'ani 'ovu'ovuna laloanai dekapoia dodo, aivala sisina mai enolea kauna dedena dekapota dodo 'abunai. Ua'i kakoina laniai mai boniai beanana beda'amo to'ona asi'i.

Lovia Imia'auna Namana Deva'inai

Emia'au Kauna Ena Valuva.

¹¹ Inoku lovia imia'auna namana deva'ina ka mai akanai emia'au kauna aikaia. Kanobata mai vutuvutu 'eva vailanai deveau ovo inoku sia 'abu ka dedavalua 'udai.

¹² Inoku ba kauta namata mai kikita Dilava ena lovia imia'auna vailanai delava aikaia, inoku anelu puka deluvuta, vilootai puka edeana ka deluvuia kanaua 'eva mauili pukana. Ba kauta eta koakoa puka laloatai ileleta vitaitatai evaluvata.

¹³ 'Atu laloanai deba kauta 'atu eta'u evaeleta 'au, mai ba mai mitava deta'u eta ba kauta devaeleta 'au. Inoku kau boutai 'eva ka ka eta koakoa vitaitataimo evaluvata.

¹⁴ Mulina'i ba mai mitava vaka 'alova 'ovu'ovuna laloanai deitota dodo. 'Alova 'ovu'ovuna kanaua 'eva ba ivaluana.

¹⁵ Kau kataua vata ua'i mauili pukana laloanai sia ileleta kauta boutai 'eva 'alova 'ovu'ovuna laloanai deitota dodo.

21

Vutuvutu Makamakana Mai Kanobata Makamakana.

¹ Inoku akailao vutuvutu makamakana mai kanobata makamakana aikata, 'olana vutuvutu makavana mai kanobata makavana 'eva 'ani detaule, 'atubata vaka ioina asi'i.

² Inoku vanua kabukabuna aikaia, Ielusalema makamakana, Dilava kevanai vutuvutuai ela'asi e'ovu easi. Aikaia ikana 'eva itani kamoane makamaka ateatena evanama kave'i kave'i mai eva'olu adana ita bevidavali boina.

³ Inoku lele ka lovia imia'aunai easi aika eluva unu'unu ediaka, "Vali'u Dilava ena mia 'abuna 'eva kau kevatai, Dilava 'eva ia ita bemimia, mai ia 'eva Dilava ena kauai be'ao, Dilava sibona 'eva ia kevatai bemimia mai eta Dilava ai be'ao.

⁴ Ia betata'u makata veita boutai beuku ovo, inoku kau sia beba 'udai, sia bevilalo 'udai, sia bekani 'udai, mai sia beanana 'udai, 'olana dava 'ana'ita kataua 'eva 'ani detaule vaika."

⁵ Inoku lovia imia'auna akanai emia'au Dilavana ediaka, "Kaiamui ovala, Lau dava boutai 'ani avamakamakata!" Mai e'ou'u ediaka, "Luva kanania 'eva lelea 'olana luva katanania 'eva umauta mai ivamomo'aia."

⁶ Inoku mune'e e'ou'u ediaka, "Dava boutai 'ani avavai palu. Lau 'eva Alepa mai Omega, Lava'ana'ina mai Mulikaina. Kau ka 'atona elada kauna lau batata'u mauili veina ebubudi tavana asi'i davana bavenia beinua.

⁷ Ena abiveniai si'avana laloatai ekula'ila ekeini kauna 'eva avuna katanania boutai be'abi, inoku lau 'eva ia ena Dilava ba'ao, ia 'eva lau naku'uai beao.

⁸ Beia makau kauta, sia deabiveni kauta, desi'avana vaika kauta, akuaku kauta, kulakula kauta, oada kauta, dilava dedeta dekudivo venita kauta, mai dede kauta boutai 'abuta 'eva bika'a mai'alovana vana salpa eani keinikeini 'ovu'ovuna laloana. Kanania 'eva ba ivaluana."

Ielusalema Makamakana.

⁹ Anelu kalakoi ka kataua banota ka easi keva'u, ia 'eva anaana si'avata vaika kalakoi ka oleta vodu kalakoi ka devonu eabita, inoku e'ou'u ediaka, "Mai! Lau kamoane makamaka ateatena bavaikamu, ia 'eva Mamoe nakuna adana."

¹⁰ Inoku Idume Kabukabuna nua'u evavonua inoku anelu evua'u eda'a lolo ka laka'ina vaika akanai, inoku vanua namana kabukabuna, Ielusalema, vutuvutuai Dilava kevanai e'ovu easi kanaua evaika'u.

¹¹ Dilava ena nuavi 'eva vanua kanania eva'ailalala ovo, e'amale 'amale itani bika'a koevana vaika vana daiamoni boina, e'ailala si'asi'a itani kalasi boina.

¹² Vanua kanania makuna 'eva nama vaikana mai eakai vaika, nutualana 'eva 'ouka lua, anelu boutai 'ouka lua 'eva nutuala ka ka ai delalava. Nutuala ka ka ai 'eva Isalaela iduvuna 'ouka lua vata ileleta.

¹³ Nutuala koi 'eva dae duasi, koi 'eva dodo duasi, koi 'eva 'atu duasi, koi 'eva divo duasi.

¹⁴ Vanua namana makuna ena lava'au bika'ata 'eva 'ouka lua, akatai 'eva Mamoe nakuna ena veauneke kauta 'ouka lua vata ileleta.

¹⁵ Anelu e'ou'u aneluna imanai 'eva ikoko'a ka koloai devavaia ikoko'ana eabia, inoku vanua namana, mai nutualana, mai makuna bevakovota.

¹⁶ Vanua evalavala 'uni'unina vani vilota 'eva devitaita, ena laka'ina mai ena palapala vaka vitaita, ikoko'ai vanua ekovoia inoku ena laka'ina edavalua 'eva kilomita da lua sinavu lua (2,200), ena aka mai palapala vaka vitaitamo.

¹⁷ Anelu eta'u maku ena imusi evakovoa 'eva mita kalakoinavui kalakoi (66), anelu 'eva kau eta vakovo vitaitanai kanaua evakovota koma.

¹⁸ Maku 'eva bika'a nama'ina vaika vana daiamoni ai devavaia, mai vanua namana 'eva kolo umaunai devavaia inoku e'ailala vaika itani kalasi boina.

¹⁹ Vanua evalavala makuna ena lava'au bika'ata 'eva bika'a nama'ita vaika edeata edeata boutai 'ouka lua, bika'a nama'ita vaika vata 'eva kania, lava'ana'ina 'eva daiamoni, e'ailala, ivaluana 'eva sapaia, e'uma'uma, ivakoina 'eva kalakedo, ava 'ibuna boina, ivavanina 'eva emelalde, e'uma'uma,

²⁰ ivaimana 'eva sadonu, e'aola'aola, ivakalakoina 'eva lubi, e'aola, ivakalakoi kana 'eva kulusolito, laolina, ivakalavanina 'eva belulio, e'uma'uma, ivakalavani kana 'eva topasio, e'ailala, iva'oukana 'eva kulusopalaso, kauna e'uma'uma, iva'ouka kana 'eva iakinto, e'uma'uma, mai iva'ouka luana 'eva ametuso, pepolona.

²¹ Maku nutualana 'ouka luana 'eva kutukutu deva'ita namata 'amale 'amaleta ouka lua, ka ka 'eva kutukutu ka ka ai devavaita. Vanua laloana dalata boutai 'eva kolo umauna, de'ailala vaika itani kalasi boita.

²² Lau vanua kanaua laloanai sia Luma Kabukabuna ka aikaia, 'olana Lovia namana siavu boutai Dilavana mai Mamoe nakuna 'eva vanua ena Luma Kabukabuna.

²³ Vanua namana kanaua 'eva melala 'o vuia 'ailalata sia eula venita, ia beva'ailalala, 'olana Dilava ena nuavi 'eva vanua eva'ailalala mai Mamoe nakuna 'eva vanua ena lamepa.

²⁴ Kanobata kauta vanua 'ailalanai bedada'a, mai kanobatai lovia 'olana kauta 'eva eta nuavi davata edeata edeata be'abi beda'a ua'i.

²⁵ Melala boutai laloatai nutualana 'eva sia be'alavuta kovo, 'olana ua'i 'eva boni asi'i.

²⁶ Kanobata kauta boutai eta nuavi davata mai eta lovia davata 'eva be'abi vanua namana kanaua laloanai bedododo.

²⁷ Beia 'obu davana sia ka ua'i bedododo mai koakoa si'avata vaika devavai kauta 'o dede kauta sia ka vaka ua'i bedododo, mamoe nakuna ena maui pukana laloanai vata ileleta kautamo ua'i vanua kanaua'i beda'adodo.

22

Mauli Veina Nutuna.

¹ Inoku anelu kanaua eta'u maui veina nutuna evaika'u, eaneva vaika itani kalasi boina. Nutu kanaua 'eva Dilava mai Mamoe nakuna eta lovia imia'autai ealu e'ovu easi,

² mai ealu e'ovu eda'a vanua namana dalana namana bo'adanai. Nutu avekena avekenai 'eva maui deveveni auta delava, vikau ka'onamo 'eva vuata edeata edeata vuia ka ka laloatai devuvua. Ia uauata 'eva kanobata kauta boutai eta 'olele ivanama'inata davata.

³ Vanua kanaua laloanai 'eva Dilava sia kau ka beva sivadaia. 'Olana Dilava mai Mamoe nakuna eta lovia imia'auta 'eva vanua kanaua laloanai bemimia, inoku ena da'alabi kauta 'eva ia bekukudivo venia,

⁴ inoku ia vailana beikala, mai Dilava vana 'eva ia ba'utai belelea 'au.

⁵ Ua'i 'eva boni asi'i, kau 'eva lamepa 'o melala 'ailalata sia beula venita, 'olana Lovia namana Dilava betata'u 'ailala bevenita. Mai ia 'eva lovia 'olatai be'ao belovia keini keini beda'amo to'ona asi'i.

Iesu 'Ani Be'asi.

⁶ Inoku anelu kanaua e'ou'u ediaka, "Luva katania 'eva umauta mai ivamomo'aita. Lovia namana Dilava, enolea kauta idumeta evakula'ilata ia valina dekava Dilavana ena anelu esinia dava 'ani bepupulu davata ena da'alabi kauta bevaikata."

⁷ Iesu ediaka, "Kaiamui ovala, Lau 'eva 'ani kevaimo bavavasi, enolea luvata puka kanania laloanai 'olata delalovai 'ini kauta 'eva denama'ina."

⁸ Lau Ioane, dava katania aikata mai 'uluta aika kau'u. Inoku 'uluta aika mai aikata mulinai, evaika'u aneluna aena 'olanai akuidula bakukudivo venia akoma.

⁹ Beia ia eta'u lau e'ou'u ediaka, "Sia bokukudivo veni'u. Lau 'eva da'alabi kau'u oni boimu mai bo'akalamu enolea kauta boita mai puka kanania luvana 'olana de'aku mai deabi 'ini kauta boutai boita. Oni 'eva Dilava sibona mo bokukudivo venia."

¹⁰ Mai vaka e'ou'u ediaka, "Puka kanania'i enolea luvata sia bo'alavuta, 'olana katania boutai bepupulu melalana 'eva 'ani ekevai.

¹¹ Kau si'avana vinaulata devavai kauta 'eva si'avana vinaulata bevavai, koakoa 'obuta devavai kauta 'eva koakoa 'obuta bevavai, komolo vinaulata devavai kauta kataua 'eva komolo vinaulata bevavai, dekabukabu kauta 'eva bekabukabumo."

¹² Iesu ediaka, "Kaiamui ovala. Lau 'eva 'ani kevaimo bavavasi. Lau bavavasi koanai tavamui ba'abi bavavasi inoku boumuiai dava oi vavai vitaitaitaimo tavamui bavenimui.

¹³ Lau 'eva Alepa mai Omega, Lava'ana'ina mai Mulikaina, dava boutai iabilamata mai ivapuata kau'u."

¹⁴ Eta tubu'a dedeinita kauta 'eva denama'ina, inoku ia 'eva maieta komolo maui eveveni auna vuavuvana beania, mai vanua namana Ielusalema makamakana nutualanai beda'adodo.

¹⁵ Beia vanua namana kanaua mulinai kau 'eva 'oveka boita, oada kauta, kulakula koakoata si'avata vaika devavai kauta, akuaku kauta, dilava dedeta dekuku divo venita kauta, mai kau dede ulana deula vaika dedemo luvata deluluva mai vinaulata devavai.

¹⁶ "Lau, Iesu, e'u anelu asinia evasi oi Dilava ena lo'e kaumui emuiai luva umauta katania bevenimui. Lau 'eva Davida lovia 'olana Lamuna mai kekena. Lau 'eva 'avu'avuni visiuna 'ailalana."

¹⁷ Idume Kabukabuna mai kamoane makamaka ateatena lalua dedi-aka,

"Mai!"

Dai lele kanania e'ika kauna vaka bediaka,

"Mai!"

Dai 'atona elada kauna 'eva be'asi. Maivaka davana e'ula kauna 'eva be'asi maui veina tavana asi'i davana beinua.

¹⁸ Puka kanania'i enolea luvata de'ika kauta boutai a'outa kao. Kau ka luva katarania akatai luva edeana ka bene'ea 'au koanai, Dilava betata'u puka kanania laloanai anaana kataua ia enai bene'e'au.

¹⁹ Bema kau ka enolea pukana kanania laloanai luva ka beabia ovo koanai, Dilava betata'u ia avuna mauili eveveni aunai mai vanua kabukabuna laloanai beabia ovo, kanania 'eva enolea pukanai iluvavaina.

²⁰ Iesu, dava katarania luvata e'ou dae kauna ediaka,

“Luva umauna,

lau 'eva 'ani kevaimo bavasi.”

Amen. Lovia namana Iesu e,

Mai.

²¹ Ameamea, Lovia namana Iesu ena iulaveni 'eva Dilava ena kau boumuiai akamuiai bemimia. Amen.

Luva Anita

ABELA

'eva Kaino kadina.

ABELA'AMO

'eva Isalaela kanobatana kamata lava'ana'ina. Makavana umaunai Dilava eta'u Abela'amo e'ouia, ia betata'u kano makamakana ka Abela'amo bevenia ua'i bemimia. Abela'amo ia sibona ena kano umauna bevikania beda'a kano kanaua bekvua. Abela'amo Dilava lelana eda'avai. Inoku ekalima, eda'a dau'ai vaika, vikau doutamo vaika ekalima, eda'amo kano kanaua edavalia. Inoku kanaua'i 'eva kano kanaua vali'u vana de'aea Isalaela.

Dilava ena luva'ana'i namana lava'ana'ina 'eva Abela'amo kevanai evavaia. Dilava Abela'amo e'ouia ena kau ita la dainai bedadai koanai ia 'eva Dilava ena ikakao kauta umaulai be'ao.

Abela'amo 'eva ateate vana Sala eadavala. Melo siaka devapulua eda'amo laluaana demotu dokadoka. Epuia Dilava koa ka evavaia kanaua'i Sala melo ka evapulua. Melo de'aeia Isako.

Isako e'aida'aida 'eva ateate vana Lebeke edadavala. Lebeke melo lua evapuluta, inoku melo laluaana 'eva vi'apala, vata 'eva Esau mai Iakobo. Iakobo vana ivaluana 'eva Isalaela. Iuda kauta eta va 'eva Iakobo kevanai easi inoku dediaka, 'Isalaela kauta'.

Iakobo 'eva a'a kadi lua eadavata, vata 'eva Lea mai La'ela, mai da'ala abi 'a'ateta lua eadavata. Ia eta'u melo bouta 'ouka lua evapuluta, inoku ia 'eva Isalaela iduvuna 'ouka lua vitaitata. Vata 'eva Ivala'asina 7.4 - 8 ai ua'i ilele'auta.

Melo 'ouka luana kataua deta'u melo doutamo devapuluta, inoku ia nakuta melota deta'u melo doutamo devapuluta, kanauamo boina eda'amo Isalaela kauta demato si'asi'a. Inoku ia boutai 'eva Abela'amo kubuna 'ava'avana kauta.

ADAMU

1. Adamu eva kau lava'ana'ina, Dilava eta'u ia evavaia kanobatai. Dilava eta'u pekoai Adamu evavaia.

2. Makavana umaunai 'eva Adamu adana Eva ita Dilava lelana sia deda'avai inoku devavai si'asi'a, melala kanaua'i easi vali'u 'eva kau boutai devavai si'asi'a do'o.

3. 1 Kolinto 15.45 laloanai Iesu Keliso 'eva ka'aea Adamu mulinai, 'olana ia eta'u eta si'avanai evamaulita. Adamu evavai si'asi'a 'eva kau evuata eda'a devavai si'asia. 'A Iesu eta'u kau eta si'avanai evamaulita maivaka maui makamakana evenita.

AIKUPITO

'eva kanobata ka Isalaela kanobatana kevanai, 'ana'inai 'eva Isalaela kauta 'eva Aikupito ai da'ala deabi vikau boutai vani navui (400). Veauneke 7.34 - 38.

AIOLE KABUKABUNA

Makavana umaunai Isalaela kauta kano'akunai deda'a to'ato'a laloanai, Dilava Mose e'ouia airole kabukabuna ka bevavaia. A bevavaia koma 'eva dalana bounai evaikabasia. Kanaua 'eva tubu'a mediana umaunai mai sisi avatai, airole kabukabuna kanaua laloanai 'eva talavatu mauana ua'i laloai de'uleia. Maua laloanai 'eva bika'a kikitua kataua akanai 'eva Dilava ena talavatu 'ouka eleleta 'au davata, maivaka dava kabukabuta voida.

'Talavatu mauana' boikala.

Iuda kauta ua'i airole kabukabuna laloanai Dilava dekudivo venia, maivaka kanau'imo eta veniveni sisita de'abuta Dilava devanama'inala, eda'amo Solomona Lo'e Kabukabuna makamakana evavaia.

Airole kabukabuna naduna

'Nadu' 'abuna boikala.

'ALELUIA

Iuda kauta deula Dilava bevanama'inala 'eva de'ae'ae dediaka, 'Aleluia'. Luva kanania anina 'eva, 'Yawe ivanama'inana' kanaua 'eva dediaka, 'Dilava ivanama'inana'.

ALEOPAKO

'eva lolo kikina ka vana, ua'i Atene vanuanai. Vanua namana kau namata lolo kanaua akanai demia. Inoku kau kataua eta miado'u vana de'aeia Aleopako.

ALEPA

'eva lelelele lava'ana'ina 'Elene kauta malatai ivakuna laloanai, vitaitana itani A 'eva lelelele lava'ana'ina bilitani malatai ABC ivakuna laloanai. Kanaua 'ounai' ani deleleia vitaitanai, 'Lovia namana Iesu Keliso 'eva Alepa,' kanaua anina 'eva ia 'eva lava'ana'ina, dava boutai iabilamata kauna. 'Elene kauta malatai ivakuna laloanai lelele to'ona umaunai 'eva vana Omeka. Iesu 'eva dava boutai iabilamata kauna, vitaitanamo, ia 'eva dava boutai 'olatai emimia kauna, dava boutai 'eva ia enai bepupua.

ALONA

'eva Levi 'ava'avana ka inoku Levi 'eva Iakobo nakuna 'ouka lua banota ka. Ia 'eva kau lava'ana'ina deabia isi kabukabu vinalata bevavai. Inoku Isalaela kauta 'o Iuda kauta vilodatai 'eva Dilava eta'u Alona kubuna kauta edilata kabukabu vinalata bevavai.

Melala ka Isalaela kauta vaidata deta'u Mose mai Alona ita leleta sia deika koanai, Dilava eta'u evala'asia kave'i ia lalua 'eva 'ana'ia'vai kauta Ia eta'u edilata. Dilava e'outa Isalaela iduvuna 'ouka lua de'ana'ia vaita kauta ka ka eta ikoko'a deabita Dilava ena lo'e kabukabuna laloanai de'uleta. Elani 'avu'avuni Alona ena ikokoa ekubu maivaka evelavela mai evua. Dilava edia-aka, melala kanaua beda'a vaia 'eva Alona ena ikoko'a 'eva talavatu mauana laloanai bemimia ua'i Dilava ena luma kabukabuna laloanai vitaitana koa ka boina. Numela 17.1 - 10, 'Ebelu 9.4, boikata, maivaka Levi mai Mose vaka boikata.

AMEN

'Ebelu leletai 'Amen' anina 'eva, 'Kanaua ekoma', 'Kanaua epulu koma', 'o 'Luva umauna'. Kau emeamea koanai banona boutai nuata edaia bediaka 'Amen'.

ANELU

'eva Dilava ena veauneke kauta ua'i vutuvutu ai ia vilanai demimia. Veauneke katanai 'eva sia kau, 'a ia 'eva idume. Ia 'eva sia eka ikata bedaia, 'a ia sibota bevala'asita 'eva eka ikata.

Dilava ena anelu esinita ena vinala devavaia. Ia eta vinala 'eva Dilava ena kau beikata kao (Veauneke 12.6 - 11, 27.23, 'Ebelu 1.14). Melala vaidata 'eva Dilava esinita dedada'a ena kau kevatai ena luva devenita.

Anelu eta lovia 'eva vana Mikaela (Iuda 9). Maivaka anelu namana ka 'eva vana Kabiela (Luka 1.19, 26)

ATEMI

'eva dilava ateatena ka. Kau doutamo ua'i Asia kanonai 'eva dilava kanaua dekudivo venia.

'ATU 'AOLANA

'eva Isalaela mai Aikupito vilodatai emimia. 'Mose' 'abuna boikala.

AU IDO'O VALAUKUNA

Loma eta koakoa laloanai kau vinaula si'avana ka evavaia, itani eaku aku 'o vinoa vinaulana si'avana vaika evavaia kauna ena mekau bekoala 'eva au ido'o valaukana akanai bevabala.

Au lua deabita dedo'ota valauku inoku vavai si'asi'a kauna 'eva ua'i au ido'o valaukana akanai dekokoa 'au, 'o valoai dedo'oa 'au. Epupua 'eva au ido'o valaukana devalavala inoku kau kanaua 'eva ua'i au ido'o valaukana akanai devikania emimia edada'amo ebaba. Kau au ido'o valaukana akanai kanania dekokoa 'au koma 'eva eanana vaika inoku ebaba. Koa kanania boina 'eva malalai koana umauna.

BAALA

'eva kaivakuku ka. 'Ana'ina umaunai Isalaela kauta ua'i Isalaela kanonai asido devanua laloanai, kau 'abu kanaua'i demia kauta 'eva Baala dekukudivo venia. Melala vaidia Isalaela kauta vaka Dilava ikukudivo venina devikania ia Baala dekukudivo venia, kanaua 'ounai Dilava ebadu venita si'asi'a.

BABULONIA

'eva vanua namavaikana ka vana. 'Ana'ina umaunai vanua kanaua kauta Isalaela kauta ita dekuali inoku deva'ekota. Isalaela kauta doutamo deabita da'ala abi kautai devaaota, devuata deda'a Babulonia kanonai ua'i vikau kalokoi ka navui demia. (Mataio 1.11, 12, 17. Veaneke 7.43)

Ivala'asina pukana laloanai (14.8, 17.5, 18. bounai) 'eva vanua namana vana Babulonia lovana e'aku. Kanaua 'eva ivavitaitana ai ediaka ia 'eva Loma e'oua. 1 Petelo 5.13 laloanai vaka Babulonia 'eva Loma e'oua.

BALAK

'eva Isalaela kauta eta 'ana'ivai kauna namana ka. Ia eta'u Isalaela kauta e'ana'ia vaita deda'a kualii laloanai dedodo inoku eta 'ou kauta deakuta. (Judges 4 - 5)

BALAM

'eva Dilava ena enolea kauka ka. Melala ka 'eva Isalaela eta 'ou kauta vaidia, ia 'eva 'abu vana Boaba kauta. Eta lovia 'olana kauna vana 'eva Balak. Inoku Balak 'eva eula Balam betata'u Isalaela kauta besivadata, kanaua'i Balak eula Isalaela beakuta. Makavana 'eva Balam sia eula, beiamo nuana evavaia kave'i Balak kevana eda'aia laloanai, anelu ka eta'u ia dalana elavaia avu. 'A doniki Balam akanai emia'au davana makana eda'a anelu dala elavaia avu eikaia 'eva evuakao, sia eula beda'a ilulao, 'a Balam 'eva ena doniki eakuia 'udai'udai. Inoku doniki ekai'udai Balam e'ouia pasisi.

Balam Isalaela kauta besivadata 'eva sia edaia 'olana eikabasi Dilava ena vanama'ina 'eva ia akatai emimia 'ounai. Luva'ana'i namana makamakana pukana laloanai ilelena Balam luvana deluva 'eva, ia eta'u moni elalao'au venia 'ounai eula Balak ita bevinuala ka'ona, beiamo Balak 'eva Balam ena kau eta 'ou kauna. (Numela 22 - 24)

BALI

'eva witi boina. Kau bali keana deabia palaoa devavaia, beiamo palaoa witi devavaia davana 'eva enama'ina vaika vakaia palaoa bali ai devavaia davana.

BEA

'eva sisi namana ka, kano vaidia eta la'uka laloatai demimia. Eta kanobata (PNG) laloanai bea sia ka emimia.

BELESEBULO

'eva ka'uba si'avana vaika ka vana, iduvu vaidia Isalaela kauta kele'etai 'eva ka'uba kanaua dekukudivo venia. Vana umauna 'eva Baal-sebulo. Ia vaka Satani deko ka'ubana, ka'uba si'avata eta lovia ka.

BENIAMINA

'eva Iakobo nakuna 'ouka lua banota ka, ia 'eva Iuda iduvuna 'ouka lua kubuta 'ava'avata ka. 'Abela'amo' boikala.

BIKA'A NAMATTA VAIKA

Ivala'asina 21: laloanai 'eva Ioane vanua kabukabuna makamakana eikaia davana lovana eakuia. Vanua kanaua i'alavuna 'eva bika'a nama'ita vaika boutai 'ouka lua ai ena lava'ini 'abuna devavaia. Bika'a katania edeata edeata boutai 'ouka lua 'eva bika'a nama'ita vaika, de'amale'amale ikata edeata edeata.

Bika'a edeata edeata boutai 'ouka lua vata katania.

1. Daiamond

kauna e'ailala.

2. Sapaia

kauna egreen.

3. Kalakedo

kauna e'apulolo.

4. Emelalde

kauna e'uma'uma.

5. Sadonu

kauna e'aola'aola.

6. Rubi

kauna e'aola.

7. Krusolito

kauna ilelena.

8. Berulio

kauna e'uma'uma.

9. Topasio

kauna e'ailala.

10. Krusoparaso

kauna sia e'uma'uma dokadoka.

11. Huakinto

kauna egreen.

12. Ametuso

kauna epepol.

DAVIDA

'eva Isalaela kauta eta lovia 'olana kauta 'olatai kauna. Kamana vana 'eva Iese inoku Davida 'eva Iese nakuna, mulikaiana umauna. Lovia 'olana koana sia eabia laloanai, ia 'eva kamana ena mamoe eikata kao. Davida ena puluai e'ovu easi eda'avaia 'eva Iesu epulu. (Loma 1.3, Ivala'asina 22.16) 'Ana'ina umaunai 'eva dediaka, Keliso vamauli kauna kanaua Dilava besinia kauna 'eva Davida kubuna 'ava'avana e'ovu easi kauta kele'etai be'asi.

DILAVA ENA MAMOE NAKUNA

Ioane 1.29, 36 laloanai 'eva Ioane vaidi'u kabukabu kauna eta'u Iesu vana e'aeia, 'Dilava ena Mamoe Nakuna'. Iuda kauta eta koakoa 'eva mamoe nakuna deaku bala inoku ainama davanai devaaoo de'abua Dilava kevana, kanaua'i Dilava eta si'avana e'ou kao 'ounai. Mamoe nakuna lalana etata'u ia evakabukabuta mai evamakamakata Dilava vilanai.

Iesu 'eva Dilava ena Mamoe Nakuna, 'olana sibona ena mauli eveni veniveni davanai evaaoo, au ido'o valaukuna akanai deaku bala, kanaua'i Dilava eta'u ita eta si'avana boutai e'ou kao 'ounai.

DRAGONA

'eva sisi si'avana vaika ka. Ivala'asina 12.3- 13.4 laloanaia 'eva sisi kanania lovana eakua. Kau vaidi dediaka sisi vana dragona davana 'eva itani kau'asi boina, mai imana mai aena vaka mai'ailalata. Ena kula'ila 'eva namavaikana. Dragona 'eva Satani luvana eluluva, ia 'eva ka'uba si'avata vaika eta lovia.

'EBELU

'eva Iuda, luva anina 'eva 'Iuda' 'abuna boikala. Kau kataua de'aeta 'Ebelu kauta 'eva Abela'amo kubuna 'ava'avanai e'ovu kauta. Isalaela kauta 'eva 'Ebelu kauta. Va kanania, "Ebelu" 'eva kubuta 'ava'avata ka vana 'Ebel' kauna kevanai easi. Iuda kauta leletai 'eva vana 'Ebelu.

'ELEME

'eva dilava ka vana, ia 'eva 'Elene kauta dekukudivo venia dilavana ka. 'Elene kauta dediaka ia 'eva dilava vaidia eta veauneke kauna.

'ELENE

'eva kano vana. Vali'u 'eva de'aea Kilisi. 'Elene kanonai vanua namana vana 'eva Atene, maivaka Kolinto vanuana vaka kano kanaua laloanai emimia.

'Elene kauta 'eva malele kave'i kauta, inoku eta lalovai komolo 'ounai kau ia 'olata deaku. Kau doutamo 'eva 'Elene kauta malata deikabasi, mai Iesu kanobatai emia laloanai, malele kave'i kauta bouta 'eva 'Elene kauta malatai deluvaluva. Makavana umauai vali nama'ina pukana kanania deleleia 'eva 'Elene kauta malatai deleleia.

ELIA

'eva Dilava ena enolea kauna ka. Ia sisibana ka 'eva Iakobo 5.17 laloanai bovakua.

ELISA

'Namana' 'abuna boikala.

'ELODA

Vali nama'ina pukana kanania laloanai 'eva kau vani vata 'eva 'Eloda.

1. Lava'ana'ina 'eva 'Eloda lovia 'olana. Ia 'eva Iuda eta lovia 'olana kauna melala kanaua Iesu kanobatai epulu melalanai. Ia mo kanania eula Iesu beakubala Iesu melonai laloanai. (Mataio 2.2 - 22, Luka 1.5)

2. Ivaluana 'eva 'Eloda Antipa. Ia 'eva 'Elene kauta eta lovia kauna, melala kataua'i 'eva Iesu eilolo mai vatabulovo koata evavai. 'Eloda mo kanania 'Elodia eadavala inoku Ioane inoku Ioane vaidi'u kabukabu kauna 'atona etaui uku. Melala kanaua'i Iesu devakovoa 'eva devuaia deda'a 'Eloda vilanai deluvala.

3. Ivakoina 'eva lovia 'olana kauna vana 'Eloda Akilipa namana. Ia 'eva Dilava ena lo'e lava'ana'ina laloanai kau Iesu Keliso deabivenia kauta kataua evaivivita. Ia eta'u Ioane bo'akalana Iakobo eakubala. (Veauneke 12.1 - 23)

4. Ivavanina vaka lovia 'olana kauna vana 'Eloda Akilipa kikina. Ia 'eva Paulo evaluvala inoku esinia eda'a Loma, ua'i Kaisa vilanai belavuai.

ENOLEA KAUNA

'eva kau kanaua Dilava kevanai luva eabia inoku eluvala odaoda Dilava ena kau kevatai kauna. Ia 'eva Dilava vanai kau e'outa. 'Ana'inai Dilava enolea kauta doutamo esinita, itani Samuela, Isaia mai Ielemia, Dilava eta'u dava vaila umaunai bepupulu davata enolea kauta kele'etai evala'asita.

Vikau doutamo vaika, Iesu kanobatai asido'o epulu laloanai, enolea kauta deta'u Iesu ena asi lovana deakuia maivaka dava bevavai davata mai kevanai bepupulu davata devala'asita.

Maivaka kanobata ena melala to'otai dava bepupulu davata lovata deaku. Kanaua 'eva Iesu asido'o bemumue kanobatai bevaluva laloanai.

EPIKULO

kauta 'eva vata 'stoiko'. Ia 'eva malele kave'i kauta, eta lalovai namana 'eva ikabasi mai luva umauna delalovaita. Melala doutamo dava katania delova aku vaita.

ESAU

Isako nakuna 'eva melo vi'apala lua. Vata 'eva Esau mai Iakobo. Esau 'eva 'aida'aidana, beiamo melala vikolo eaku si'ala 'eva sibona 'aida'aida komolona kadina Iakobo kevanai etavatava vaia. Ia nuana edaia Iakobo

betata'u 'aida'aida komolona vanama'inana itoinai beabia 'abunai ianimo be'ani elalovaia.

EVA

'eva Adamu adana, Dilava kanobata evavaia koanai Adamu evavaia makava, epua Adamu duluna kuliana ka eabia Eva evavaia. Beiamo Eva eta'u kau'asi kanaua Satani lelana eabia dae, inoku au vuana kanaua Dilava etalavatuava davana eabia eania. Ia vaka au vuana kena Adamu evenia eania. Ia laluaana 'eva kau lava'ana'ita Dilava lelana deda'avai, inoku melala kanaua'i easi vali'u 'eva kau boutai si'avana devavai. Adamu mai Eva melo ko'i devapuluta, vata 'eva Kaino, Abela mai Seta.

GIDEON

'eva Isalaela kau eta 'ana'ia vai kauna namana ka. Ia ena abiveni Dilava kevanai 'eva namavaikana. Ia Dilava eabivenia ia be'imala kave'i. Ia 'eva Isalaela momoluaneta e'ana'ia vaita deda'a dekuali, inoku Dilava ena kula'ilai 'ou kauta deakuta, 'a ia kauta 'eva sia douta, kauta vidamo.

GOMOLA

'Sodom' boikala.

HAGALA

'eva da'ala abi ateatena ka Sala ena lumai emia. Sala 'eva Abela'amo adana. Sala melala kanaua'i sia melo ka evapulua 'ounai Hagala e'ouia Abela'amo ita be'eno. Inoku Abela'amo eta'u Hagala melo evenia vana de'aeia Ismaela. Dilava eluva'ana'i Abela'amo melo ka bevenia nakunai be'ao, beiamo Ismaela 'eva sia luva'ana'i melona, maivaka Dilava dava kanaua eluva'ana'i vaia Abela'amo kubuna 'ava'avanai e'ovu kauta etai kauta Ismaela kubuna 'ava'avanai e'ovu kauta 'eva luva'ana'i kanaua sia deabia. Muliai Sala eta'u melo ka evapulua vana de'aeia Isako. Isako 'eva Dilava ena luva'ana'i melona Abela'amo mai Sala etai.

Sala Isako evapulua mulinai, Hagala ebadu venia 'ounai elo'ouia asi. Hagala lolo vana Sinai kevanai emia. Vikau doutamo vaika deole mulinai, Dilava ena talavatu lolo kanaua akanai Mose evenia. Kanaua 'ounai Kalatia 4: laloanai ediaka, Hagala da'ala abi ateatena 'eva kau Dilava ena talavatu da'alana de'abi kauta kataua ikaikata.

Ia 'eva da'ala abi kauta 'olana eta abiveni 'eva 'Kau ka Dilava ena talavatu beabita kave'i 'eva Dilava ia bevamomo'aia komolo kauna.'

'A Dilava ena luva 'eva sia deabivenia, Dilava ediaka, kau Iesu Keliso enai deabiveni kauta kataua boutai 'eva eabitadae komolo kauta.

IAKOBO

ia vana ka 'eva Isalaela. Ia nakuna boutai 'ouka lua, inoku ia 'eva Isalaela iduvuna 'ouka lua kauta kubuta 'ava'avata.

'Abela'amo' 'abuna boikala.

IBANONA KAUTA

Iesu ibanona kauta 'eva kau boutai kataua Iesu devamomo'aia mai lelana de'ika maivaka lelana deda'avai. Veaukeke eta vinaula pukana laloanai Iesu ibanona kauta vaka vata vaida de'aeta, vitaitana itani, 'Iesu deabivenia kauta' mai 'bo'akalata'.

Mataio, Maleko, Luka mai Ioane laloatai 'eva Iesu ibanona kauta vaka lovata deaku, Katania 'eva Iesu ibanona kauta 'ouka lua ia ita eabitadae kauta ia ita demia. Vaka ena veaukeke kautai evaaota esinita ena vinaula devavai, vitaitana itani Mataio 10.1-4 laloanai boina.

IDI'U KABUKABU

Puka kabukabuna laloanai deleleia 'eva Ioane eta'u kau doutamo Iolidana nutunai evaidi'uta kabukabu. E'outa eta si'avanai belalo'udai inoku beidi'u kabukabu, inoku kau boutai beikabasi ia 'eva 'ani delalo'udai.

Kau Iesu Keliso deabivenia kauta vilootai, idi'u kabukabu 'eva ikaika kanaua kau bevaikata, idi'u kabukabu eabia kauna 'eva Keliso ena kau.

Vaidi'u kabukabu anina 'eva kanania boina;

1. Kau kanaua idi'u kabukabu eabia kauna 'eva sibona ena si'avanai 'ani elalo 'udai.

2. Ia 'eva Iesu Keliso eabivenia, Iesu 'eva kau Ia deabivenia kauta kataua eta si'avana e'oukao kauna, kanaua eluva 'ana'i koma.

3. Kau kanaua idi'u kabukabu eabia kauna 'eva e'ula Iesu Keliso mulinai bedada'a mai lenea beda'avai.

IDUME KABUKABUNA

'eva Dilava Idumena, ia kau Iesu Keliso deabivenia kauta kataua nuatai emimia. Ia ena vinaula 'eva katanania boita;

1. Ia etata'u kau Dilava ena evaikabasita. (Ioane 16.13, 1 Kolinto 2.10-13).

2. Kau Iesu Keliso deabivenia kauta kataua daitai emeamea Dilava kele'enai. (Loma 8.26)

3. Kau e'ana'ia vaita Dilava beikabasia. (Veauneke 13.2, 16.6, 7)

4. Kau siavu evenita Dilava ena luva beluvala mai ena vinaula bevavaia. (1 Kolinto 2.4, 5)

5. Ia etata'u kau ka ka siavu evenita, inoku ia detata'u Dilava ena lo'e ivakula'ilana vinaulata devavai. (1 Kolinto 12., 14.)

IELEMIA

'eva Dilava ena enolea kauna ka. Ia eta'u Keliso Vamauli kauna Dilava eluva 'ana'i besinia be'asi kauna kanaua, ena melala ai dava dava bepupulu davata lovata eaku makava vakaia muliai depulu.

IESE

'eva Davida lovia namana kamana, ia 'eva Iesu Keliso kubuna 'ava'avana ka. Makavana umauna enolea kauna vana Isaia ena lelelele ai Keliso lovana eakua 'eva ediaka 'Keliso 'eva Iese mai Davida kubuta 'ava'avata.'

IESU

anina 'eva 'Vamauli kauna,' o 'Dilava 'eva ita ivamaulita kauna.' Iesu vana vaida katanania; Iesu Keliso, Dilava Nakuna, Kau Nakuna, Davida Nakuna.

INSENSE

'eva mulamula ka vana, bonana 'eva ekula'ila vaika. Ia 'eva au ka ukonai deabia maivaka uauanai mai lamunai vaka deabia. Lo'e kabukabuna laloanai kau Dilava dekudivo venia laloanai mulamula kanania de'abua bonana mediana ele'au.

IONA

'eva Dilava ena enolea kauna ka. Melala ka Dilava ia esinia eda'a vanua namana ka vana Nineva, Dilava ena luva ua'i beluva vaia. 'A Iona aunakoi ka akanai ele'au beda'a 'abu edeana ka ekoma inoku aunakoi kanaua'i deveau laloanai Dilava eta'u lani namana ka esinia eunu. Aunakoi kauta deikabasi, ua 'eva Iona dainai lani namana laloanai dedodo, kanaua 'ounai Iona 'atu ai dekapoia uku. Sisi namana ka Iona edonoia, inoku ua'i sisi kanaua bo'anai boni koi emia, inoku sisi namana eda'a nabua akanai Iona e'ulaia asi. Kanaua mulinai Iona eta'u Dilava lenea eda'a vai eda'a Nineva ua'i Dilava ena luva eilolo vaia.

IOSEPA

Vali nama'ina laloanai kau vata Iosepa 'eva keta douta.

1. Iosepa ka 'eva Iakobo nakuna 'ouka lua banota ka.

Ia 'eva Isalaela kauta kubuta 'ava'avata ka. Iosepa kanania 'eva Beniamina a'ana. (Veauneke 7.9-14, Ioane 4.5, 'Ebelu 11.21, 22, Ivala'asina 7.8)

2. Iosepa ka 'eva Malia adana.

3. Iosepa ka 'eva Iesu kadina ka vana. (Mataio 13.55, Maleko 6.3)

4. Iosepa ka 'eva Iakobo a'ana. (Mataio 27.56, Maleko 15.40, 47)

5. Alimatea kauna ka vana Iosepa 'eva lavo kauna.

Ia 'eva Iuda kauta eta talavatu de'ana'ia vaia kauta banota ka. Ia 'eva kau nama'ina ka, vaka Iesu mulinai eda'a. (Mataio 27.57-60, Maleko 15.42-46, Luka 23.50-53, Ioane 19.38-42)

6. Iosepa Basaba (Veauneke 1.23)

'eva Iesu ibanona kauna ka mai kevanai emia. Melala ka veauneke kauta deula Iesu ibanona kauta ka beabia isi Iuda (Iesu venina eveni kouna ekou kauna) 'abuna beabia, inoku Iosepa kanania mai Matia viloatai punipuni ai 'eva Matia deabia isi.

7. Balaba

Vaka de'aeia Iosepa. (Veauneke 4.36)

IOSUA

Mose eba mulina 'eva Iosua eta'u Isalaela kauta e'ana'ia vaita. Deda'a Kanana kanonai deda'adodo, kanaua 'eva Dilava eluva 'ana'i Isalaela kauta bevenita kanona. Kau ua'i demia kauta deakuta. Inoku Iosua eta'u kano kanaua ekoleia epua e'ana'ia vaita iduvuta ka ka eta, 'a Levi iduvuna 'eva kano sia ka evenita, Ia 'eva kabukabu kauta. Iosua 'eva 'ana'ia vai kauna namana ka mai ia eta'u kau e'outa Dilava mulinai bedada'a. Eluva ediaka, "Lau mai e'u luma kauta ita 'eva Dilava mulinai lai badada'a."

ISAIA

'eva Dilava ena enolea kauna namana ka. Makavana umaunai Iesu asido'o kanobatai emia laloanai 'eva Isaia dava doutamo Iesu kele'enai bepupulu davata lovata eaku.

ISAKO

'eva Sala mai Abela'amo nakuta. Va kanania Isako anina 'eva 'mamai'. 'Abela'amo' 'abuna boikala.

ISALAEALA

Dilava eta'u Iakobo vana e'aeia Isalaela. Iakobo 'eva Isako adana Lebeka ita nakuta, ia 'eva Esau ita depulu. Iakobo kubuna 'ava'avanai e'ovu easi 'eva vata de'aeta Isalaela kauta, mulinai de'aeta Iuda kauta, epua de'aeta 'Ebelu kauta. 'Iuda' 'abuna boikala. eta kano demiavaia 'eva vana Isalaela. 'Ana'inai vana 'eva Kanana, Vali'u vaka de'aea Palestine kanona.

IUDA

'eva Iakobo nakuna ka. Ia 'eva Isalaela iduvuna vana Iuda kubuta 'ava'avata. Kano kanaua ia kubuna 'ava'avanai e'ovu easi kauta demia vaia kanona vana Iudea, kano kanaua'i Ielusalem emimia. Iesu 'eva Iuda iduvunai epulu.

IUDA KAUTA

kau kataua de'aeta Iuda kauta 'eva Abela'amo kubuna 'ava'avana. 'Abela'amo' 'abuna boikala.

Va kanania 'Iuda kauta' 'eva 'Kau Iuda kanonai demia kauta kataua.' Kanaua 'eva Iuda iduvuna kauta, iduvu kanania 'eva Isalaela iduvuna 'ouka lua banota ka. Beiamo muliai va kanaua'i Isalaela kauta de'aeta. 'Isalaela' 'abuna boikala.

Ioane vali nama'ina eleleia laloanai Iuda kauta eleleia 'eva Iuda eta 'ana'ia vai kauta e'outa.

IUDA KAUTA ETA LO'E

vanua boutai Iuda kauta eta kanoai 'eva maieta lo'e. Kanania 'eva ia eta mia do'u 'abuna, melala doutamo 'o Melala kabukabutai 'eva 'abu kanania'i demia bou. Lo'e kanania laloanai 'eva Puka kabukabuna devakua, Dilava ena luva mai devaikabasi vai, maivaka demeamea, mai Dilava devanama'inala. Melala vaid a vaka nia'i devaluva.

IVA

Iuda kauta eta koakoai 'eva nakuta melo kikita boutai depupulu bonita kalavani 'eva deivata. Dilava Abela'amo e'ouia kanaua bevavai koma. (Genese 17.9-14)

Iva koana anina 'eva, melo iva eabia 'eva Iuda melona. Kau iva deabia kauta 'eva de'aeta Iuda kauta. Melala kanaua'i kau vali nama'ina deilolo vaia melalanai Iuda kauta vaida dediaka, kau kanaua 'eva sia Iuda kauna, 'a e'ula Keliso ena kauai be'ao koanai, ia iva beabia makava. Koa kanania'i 'eva ia 'ani Iuda kaunai eao, inoku kanaua mulinai Keliso ena kauai be'ao. 'A Paulo 'eva luva kanania sia eulavenia, inoku ena malele eleleia eda'a Kalatia kauta kevata mai kano edeata kauta kevata koanai kanania lovana eaku. Ediaka, kau be'ula mauli beabia koanai dava ka'onamo mo bevavaia, kanaua 'eva Iesu Keliso mo beabivenia.

KABUKABU KAUTA

'eva kau kataua Dilava eabita isi kabukabu vinaulata bevaai. Ia 'eva Isalaela kauta vatai ainama davata vala kabukabuna akanai de'abuta Dilava devanama'inala, Iesu ena melala ai 'eva eta vinaula katania Lo'e kabukabuna laloanai devavaita, Ielusalemai. Kabukabu kauta 'eva Alona kubuna 'ava'avanai e'ovu vaia easi kauta, maivaka Levi iduvuna kauta. 'Alona' mai 'Levi' 'abuta bo'ika.

Kabukabu kauta 'olata kauna

'eva kau namana umauna kabukabu kauta boutai viloatai. Kabukabu kauna ka deabia isi kabukabu kauta 'olatai e'ao vikau ka'onamo laloanai. Lo'e kabukabuna laloanai ikekebili kanaua vana 'Abu kabukabuna umauna' laloanai 'eva kabukabu kauta 'olatai kauna sibonamo edododo. Vikau ka'onamo laloanai 'eva melala ka'onamo mo edododo edada'a ainama vinaulata evavai Dilava kevana, kanaua 'eva Dilava etata'u ia mai Isalaela kauta boutai si'avana devavai kauta eta si'avana be'oukao 'ounai.

KAINO

'eva Adamu mai Eva nakuta melona 'aida'aidana. Ia 'eva kadina melona kikina vana Abela emama venia, 'olana Dilava eta'u Abela mamoe e'abuia veniveni davanai evaaota davana eabiadae, beiamo Kaino vadovado davata vuata veniveni davatai evaaota Dilava enai davata Dilava eta'u evasi'avanata 'ounai. Kanaua 'ounai Kaino eta'u Abela eakubala. Kanania 'ounai Dilava ediaka, Kaino 'eva kanobata akanai bealu 'avaea alu 'avaea mai kau boutai 'eva ia bevasi'avanala.

KAISA

'eva Loma kauta eta lovia 'olana kauta e'ana'ia vaita kauna. Loma kauta 'eva kano doutamo eta kualii kauta deakuta inoku Kaisa 'eva bouta eta lovia kauna. Loma kauta eta lovia namata kataua boita 'eva de'aeta Kaisa.

KAMELA

'eva sisi namana ka kau detata'u akanai dele'au kanaua. Ia 'eva mekau namavaikana evuala. Melala vaida Kamela vuina debia tubu'a mulina pasisina devavaia. Kamela va'ava'ana ka 'eva puka kanania laloanai bo-davalia.

KANANA

'eva kano kanaua Dilava eluva'ana'i ena kau Isalaela kauta bevanita eta kanoai be'ao. Melala katania'i kano kanaua de'aea Isalaela, 'a melala vaida de'aea Palestine.

KA'UBA SI'AVATA VAIKA

'eva Satani mulinai dedada'a ka'ubata. Ia eta vinaula namana 'eva kau bevavaita si'asi'a mai kau bevada'ata ovo Dilava lelana be'uku ia Satani lelana beda'avai. Melala vaida kau nuatai dedododo, Kau kataua Satani ena vinaula si'avata vaika devavai kauta.

KAU NAKUNA

'ana'ina umaunai kau ka vana Daniela eta'u Dilava ena Vamauli kauna ka besinia be'asi kauna lovana eakuia laloanai ediaka, Vamauli kauna 'eva 'Kau Nakuna'. Luva kanania anina 'eva itani Keliso boina. 'Keliso' 'abuna boikala.

Iesu vaka sibona lovana eakuia 'eva va kanania vaka e'ouia, Iesu sibona vana e'aeia, 'Kau Nakuna', 'eva ediaka Dilava 'eva Ia esinia mai Dilava kevanai siavu eabia. Ia 'eva kau, ia maivaka Dilava.

KELISO

Bilitani malatai Keliso vaka de'aea Mesia. Luva kanaua Keliso 'eva 'Elene malatai 'a Mesia 'eva 'Ebelu malatai, inoku luva anina 'eva; 'kau 'olana deolo ai desisia kauna.' Kanania 'olana 'eva, Makavanai Dilava kau ka eabi isi Iuda kauta eta lovia 'olanai be'ao kauna kau kanaua 'olana deoloai desisia inoku koakoa kanaua 'eva ia 'ani deabia isi Lovia 'olana kaunai be'ao.

Dilava vaka eluva'ana'i, Vamauli kauna ka besinia be'asi, inoku ia betata'u ena kau bevamaulita mai bevuata beda'a ena iakao venunai bemimia. Kau kanania vana 'eva 'Keliso', 'olana Dilava eta'u ia eabia isi mai esinia kauna.

KELISO ENA KAU

'eva bilitani malatai 'Christian', 'a ita malatai 'eva Keliso ena kau, inoku anina 'eva 'Kau kanaua Iesu Keliso mulinai edada'a kauna.'

KOLA

'eva kau vaidia e'ana'ia vaita Mose mai Alona devaivi ivita. Dilava ebadu si'asi'a kano eva'alamaia Kola mai mulinai deda'a kauta boutai de'ekouda kano e'alavuta.

LA'ABA

'ana'ina umaunai Isalaela kauta devakovo kano kanaua Dilava eluva 'ana'i bevenita laloanai beda'adodo dekomena 'eva eta sinisini kauta deda'a kano kanaua laloana deikaia. Inoku eta 'ou kauta kano kanaua'i a beakuta koma dalata deva'olu. La'aba 'eva vavai 'avaea ateatena ka kano kanaua'i emia. Isalaela eta sinisini kauta ua'i dela'asi koanai eduluta mai evapodeta, 'olana 'eva eikabasi dokadoka Dilava ena ula 'eva ena kau Isalaela kauta betata'u kano kanaua beabia. Kanaua 'ounai Isalaela kauta deta'u vanua kanaua kauta boutai deaku bata, beiamo vavai 'avaea ateatena kanaua 'eva sia deakuia. Ia 'eva ateate mo kanaua vana puka kabukabuna laloanai deleleia, Mataio 1.5. Iesu kubuna 'ava'avana ka.

LABI

'eva va kanaua, Iuda kauta deta'u viloatai vaikabasi kauna namana 'o 'ana'iavai kauna namana 'eva vana de'aea 'labi'. Kau namata 'o nuakomolo kauta 'eva de'aeta 'labi'. Va kanania 'labi' 'eva itani 'laboni' boina. Luva anita 'eva ka'onamo.

LA'ELA

'eva Iakobo adana ka vana. Iakobo 'eva adana kanania elalo'au venia vaika. La'ela 'eva Iosepa mai Beniamina sinata. Ia 'eva Iuda kauta boutai sinatai devaaoa.

LALO 'UDAI

anina umauna 'eva;

1. Kau eikabasi ia 'eva si'avana kauna Dilava vailanai.
2. Inoku nuana itoinai ediaka ena koa si'avata maulina bevikanania, inoku Dilava ena ula maulinai bemaui.

3. Maivaka Dilava enoia ena si'avana boutai be'oukao.

LEBEKA

'eva Isako adana, Isako 'eva Abela'amo nakuna. Lebeka 'eva Esau mai Iakobo sinata. Ia lalua 'eva vi'apala depulu, Esau 'eva epulu makava, beiamo Dilava Iakobo eabia isi be'ana'ia, inoku ia kaunai Iuda kauta depulu. 'Esau' mai 'Iakobo' 'abuta bo'ika.

LEVI

'eva Iakobo natuna 'ouka lua banota ka. Iakobo nakuna 'ouka lua kataua Isalaela iduvuna 'ouka lua kubuta 'ava'avata kauta. Levi kubuna 'ava'avanai e'ovu vaia easi 'eva Dilava eta'u e'ana'ia vaita Lo'e kabukabuna laloanai

Dilava ena kabukabu vinalata mo bevavai. Levi iduvuna 'eva kabukabu kauta deabita isi, ia 'eva Alona ena luma kauta. 'Alona' 'abuna boikala.

Iesu ibanona kauta 'ouka lua banota ka 'eva vana Levi. Ia vana vaka Mataio. (Mataio 9.9-13, Maleko 2.14, Luka 5.27-29)

LO'E KABUKABUNA

'eva Isalaela laloanai vanua namana vana Ielusalemai ua'i emimia. Iuda kauta deda'a ua'i 'abu kanaua'i nadu namata delalona vaika mai eta ainama sisita de'abuta maivaka eta veniveni Dilava kevanai davata devuata deda'a ua'i.

Sia Iuda kauta kataua 'eva ikekebili muliai davana laloanai dedododo. Lo'e laloana umaunai 'eva Dilava ena dava kabukabuta de'uleta, kabukabu kauta 'olati kaunamo sibona edododo 'abu kanaua laloanai, vikau ka'onamo laloanai 'eva melala ka'onamo mo edododo. Ikekebili tubu'ana imusina namana ka 'eva Ekabukabu Vaika 'Abuna kanaua da'adodona 'abuna e'alavua. Iesu eba 'eva ikekebili tubu'anamo kanaanu kukuanai e'idi, akaiai e'idia eda'amo venuai epua. (Mataio 27.51, Maleko 15.38, Luka 23.45). Koakoa kanania epulu 'eva melala kanaua'i Dilava eta'u dala ka 'ani eluvuia. Kanaua'i kau Iesu Keliso deabivenia kauta beda'a Ia kevana.

Lo'e kabukabuna ivakabukabuna naduna

'Nadu' 'abuna boikala.

LOMA

'eva kanobata vana Italia ena vanua namana. Iesu kanobatai emia laloanai, Loma kauta deta'u kano doutamo kauta deakuta mai de'olavaita, Isalaela vaka de'olavaia. Kanania 'ounai Isalaela kauta 'eva Loma kauta ulata sia deula, deula eta kanoai belo'ota asi. Loma eta lovia 'olana kauna de'aea Kaisa 'eva lovia 'olana kauna namana kanobata laloanai melala kanaua'i.

LOTA

'eva 'Alana nakuna. 'Alana 'eva Abela'amo kadina. 'Abela'amo' 'abuna boikala. Dilava eluva 'ana'i, kano makamakana ka Abela'amo bevenia, inoku Abela'amo kano kanaua ikavuna eda'a 'eva Lota vaka ia ita deda'a. Kano kanaua'i dea'a dodo mulinai, melala ka 'eva Lota eda'a Sodoma vanuana namanai emia. Vanua kanaua kauta 'eva koakoa si'avata vaika doutamo devavai. Kanania 'ounai Dilava ediaka vanua kanaua besiuu.

Lota ena luma kauta ita vanua kanaua devikania, mulinai Dilava eta'u vanua kanaua esiuia. Dilava ena anelu Lota e'ouia vanua kanaua bevikania laloanai sia beka'i'udai. Beiamo Lota adana ekai'udai 'eva komolonai kauanina epasisi pasisi, damena kaivakukunai eao.

LUVA 'ANA'I NAMANA

'eva kau lua vilotai nuata devaka'onamo 'eva luva'ana'i namana devavaia. Kau luva'ana'i namana evavaia koanai eluva 'ana'i vitaitana kevanai dava mediana ka bevavaia, inoku ivamuenai 'eva banona kanaua vaka ia kevanai dava mediana ka bevavaia.

Vali'u Dilava ena luva'ana'i namana 'eva Dilava eta'u evapulua, inoku eluve 'ana'i ena kau ia mulinai bedada'a koanai ia 'eva ena kau Kamata mai eta Lovia namanai be'ao.

Luva'ana'i namata Dilava evavaita 'eva luamo. Lava'ana'ina 'eva Dilava Mose kevanai evavaia, inoku ediaka, kau ia ena talavatu luvata beda'avai kave'i 'eva Ia sibona ena kau umautai bevaaota, kanaua 'ounai luva'ana'i namana lava'ana'ina laloanai 'eva kau ka Dilava vailanai sia edaia.

Luva'ana'i namana ivaluana laloanai 'eva Dilava eluva ediaka, Kau ka Iesu Keliso enai beabiveni kauna 'eva Dilava ia bevamomo'aia komolo kauna, vitaitana itani ia 'eva sia evavai si'asi'a kovo 'o Dilava ena talavatu sia ka deukuia kova boina.

MAMOE

'eva sisi ka vana. Iuda kauta 'eva melala kataua'i mamoe devananita easimo vali'u mamoe devanani do'o. Puka kanania laloanai mamoe va'ava'ata boikata. Iuda kauta eta mamoe 'ima koata 'eva katanania boita;

1. Melala kataua'i kau ka'onamo 'eva mamoe doutamo vaika evananita. Mamoe vanuaimo sia de'imata, devuata deda'a 'abu davatai duvu dedoutamo 'eva ua'i de'imata duvu deani.

2. Mamoe 'ima kauta 'eva kano kataua'i eta mamoe de'imata. Ia 'eva mamoe deikabasita kave'i kauta, eta mamoe deikabasita mai mamoe vaka ia leleta deikabasi.

3. Mamoe 'ima kauna etata'u mamoe alana ka evavaia, inoku boni laloatai 'eva mamoe e'imata elani. Maivaka ala nutualanai e'eno. Melala vaida vinao kauna ka asi'i ala kukuanai emalovo keini, mamoe ka emavinao 'ounai.

4. Iuda kauta 'eva mamoe deabita, veniveni davatai devaaota, de'abuta Dilava devanama'inala. 'Dilava ena Mamoe Nakuna' boikala.

MANA

'ana'ina umaunai Isalaela kauta Aikupitoai dela'asi 'eva vikau vani navui (40) kano'akunai dealu'avaea alu'avaea. Melala kanaua'i 'eva Dilava eta'u iani evenita. Iani kanaua vana 'eva 'mana'. Iani kanania 'eva melala boutai 'eva vutuvutuai e'ekoasi easi kano, beiamo eta kukudivo melala ka'onamo Melala kabukabuna 'eva iani sia de'ekoasi. Kau deda'a eta iani debita. Iani kanania 'eva Esodo 16.13-36 laloanai lovana eakuia.

MELALA KABUKABUNA

'eva Palaide melalana mai Masi melalana vilolatai melala kanaua de'aea Satade. Kenese pukana laloanai deleleia 'eva Dilava melala boutai kalakoi 'eva kanobata evavaia, epua melala ivakalakoi kana 'eva lana eani 'olana ena vinaula 'eva eole 'ounai. Dilava ediaka kau boutai 'eva masi ka ena melala lava'ana'ita kalakoi 'eva eta vinaula bevavai, beiamo melala ivakalakoi kana 'eva lata be'ani mai Dilava bekukudivo venia.

Iuda kauta eta Melala kabukabuna talavatusa 'eva doutamo. Dediaka melala kanaua'i 'eva sia kau ka vinaula ka bevavaia kovo, inoku kau talavatu kanaua deukua 'eva debadu si'asi'a. Kanaua 'ounai Iesu eta'u 'olele kauna ka Melala kabukabunai evanama'inala, mai Iesu ibanona kauta Melala kabukabunai witi debukuta be'ani 'eva Iuda kauta debudu si'asi'a. Dediaka kataua 'eva vinaula.

MELIKISEDEKI

'eva sia kaikabasia kave'i, 'a 'Ebelu elena 5 eda'a 7 laloanai 'eva ia lovana kena deakuia. Maivaka puka 'ana'inai Kenese 14.17-20 laloanai deleleia. Melala ka 'ou kauta deasi Abela'amo uana Lota mai ena luma kauta ita deabita. Ena dava boutai vaka deabita. Inoku Abela'amo eda'a 'ou kauta katanania ekualita inoku eakuta. Epua Lota mai ena luma kauta ita evamulita, eta dava boutai vaka eabita 'udai. Abela'amo emue laloanai, dala kukuanai Melikisedeki ita devidavali. Melikisedeki eta'u Abela'amo palaoa mai waini evenia inoku evanama'inala, akanai emeamea inoku Dilava betata'u ia bevanama'inala. Inoku Abela'amo eta'u dava kataua kualiai eabita davata ekoleta 'ouka 'ouka laloatai ka ka eabita isi Melikisedeki evenia. Inoku kanaua mulinai evuaia easi Isalaela kauta deta'u eta dava dekoleta 'ouka 'ouka laloata ka ka deabita isi eta kabukabu kauta devenita. Kanaua 'ounai 'Ebelu kauta dediaka Melikisedeki 'eva kabukabu kauna ka. Beiamo Dilava ediaka kabukabu kauta 'eva Levi iduvunai beabita isi. 'A melala kanaua'i Abela'amo Melikisedeki ita devidavali laloanai Abela'amo kubuna Levi 'eva asido'o epulu. Kanaua 'ounai 'Ebelu pukana laloanai dediaka Abela'amo eta'u ena dava ekoleta 'ouka 'ouka laloatai ka ka eabita isi Melikisedeki evenia, inoku kanaua ikakikana 'eva itani Levi iduvuna kauta vaka eta dava deveni, 'olana ia 'eva muliai Abela'amo enai depulu davata.

MILA

'eva mulamula ka vana, inoku eka tavatava vaia eva tavana namavaikana, bonana vaka ekula'ila vaika. Ia 'eva au ka ukonai deabia. Iuda kauta 'eva mulamulai devaaoo, kanaua'i kau devamuina tabua, asi'i ema anaana si'asi'a 'ounai. Vaka mulamula kanania deabia kau 'ani deba kauta kauanita deukuta inoku dekoleta.

MOSE

'eva Isalaela kauta eta 'ana'ia vai kauna namana ka. Melala kanaua'i Isalaela kauta Aikupitoai da'ala deabi laloanai Dilava eta'u Mose eabi isi Isalaela kauta be'ana'ia vaita Aikupito ai bela'asi bemumue beda'a kano kanaua Dilava eluva 'ana'i bevenita davanai bemimia. Dilava 'eva koakoa namana ka evala'asia, Mose ita deidaivali. Mose makana eda'a au ka mai 'alovana eikaia, beiamo au kanaua 'eva sia ebo'o. Inoku Mose eikabasi Dilava 'eva 'ani ua'i. Dilava kanaua'i Mose evaikabasia ia 'eva 'ani eabia isi beda'a ena kau Aikupito kanonai be'ana'ia vaita bemumue beda'a eta kano umaunai.

Dilava eta'u Mose imanai dava edeata edeata evala'asita. Melala ka Aikupito kauta deta'u Isalaela kauta de'ana'ia vaita, deda'a nutu namana ka vana 'Atu 'Aolana'. Dilava eta'u nutu kanaua aluna eva'olua, vei eva 'alamaia lua inoku Isalaela kauta eta dala eva'olua, kano ladanai dekeini, dekeini mulinai 'eva Aikupito kauta devakovo bekeini, beiamo vei mune'e ealu 'udai boutai evadono bata.

Dilava ena talavatu Isalaela kauta etai 'eva Mose kele'enai evavaia. Melala ka kano 'akunai demia laloanai Mose eta'u lolo ka vana Sinai akanai ele'au eda'a ua'i kena bemimia mai bemeamea Dilava kevanai ua'i Dilava sibona Mose kevanai evala'asia inoku ena talavatu Mose evenia, maivaka Dilava ena talavatu namata boutai 'ouka 'eva bika'a palapalata lua akatai eleleta 'au. Bika'a kania 'eva Lo'e Kabukabuna laloanai kabukabu 'abunai ua'i de'uleta. Dilava ena talavatu kataua Mose evenia 'eva puka kabukabuna laloanai. Puka 'ana'ina laloanai puka makavata ima (5) 'eva vata Mose ena puka. Pukata 'eva, Kenese, Esodo, Levitika, Numela, Diutelonomi. Maivaka puka vana Talavatu vaka.

NADO

melala ka ateate ka eta'u deolo ka eabia easi Iesu aena beukuta. Deolo kanania 'eva dava ka vana nado ai devavaia, inoku ia 'eva au vana sipikenedo ukonai deabia.

NADU

Iuda kauta 'eva vikau ka'onamo laloanai nadu namata vaid devavai nadu katania devavaita melalatai 'eva Dilava ena vanama'ina mai dava vaid 'ani siako ia kevatai evavaita davata delalovaita. Nadu vaid vata 'eva katania;

Lo'e kabukabuna ivakabukabuna naduna. (Ioane 10.22)

Nadu kanania 'eva Iuda kauta ka vana Iuda Makabi delalovaia. Ia 'eva 'ani siako vaika umaunai Dilava ena Lo'e kabukabuna evavaia kave'i, eva'olua inoku kau Dilava bekukudivo venia 'ounai. vinaula kanaua evavaia 'olana eta 'ou kauta mai vaila makamakata lo'e laloanai dedododo Lo'e kabukabuna devavaia si'asi'a 'ounai. Iuda kauta vaka nadu kanania de'aea 'Ailala naduna'. Kanaua 'ounai Iesu eluva ediaka, "Lau 'eva kanobata ena 'ailala." (Ioane 9.5)

La'aukeini naduna

'eva Iuda kauta eta nadu namana umauna ka. Nadu kanania laloanai 'eva Iuda kauta makavana umaunai Aikupitoai da'ala deabi inoku aboina dela'asi kanaua delalovaia. Melala kanaua'i 'eva Dilava ena anelu esinia eda'a Aikupito kauta eta luma ka ka laloatai edodo nakuta pulu makavata boutai eaku ba paluta. Ia Dilava Iuda kauta e'outa eta luma ka ka laloatai mamoe nakuta deaku bata inoku lalata deabita eta nutuala kovolotai

deukuta. Inoku lala eika koanai luma akatai ekeini, inoku melo kataua sia eaku bata.

Kanaua 'ounai la'aukeini naduna laloanai luma ka ka laloatai mamoe nakuta deaku bata deaniani ka'ona.

Palaoa sia ivakubuna naduna

'eva la'aukeini naduna ita melala ka'onamo devavaia. 'Olana 'ana'ina umaunai Iuda kauta demolau Aikupito ai dela'asi laloanai palaoa be'imala bekukubu inoku be'abua 'eva melala asi'i. Kanaua 'ounai nadu kanania laloanai 'eva Iuda kauta detata'u palaoa sia ivakubuna davana deania.

Aiole naduna

'eva Iuda kauta delalonama 'olana 'ua'ua mai 'ali'ali melalata 'eva 'ani deole 'ounai. Nadu kanaua laloanai 'eva aiole devavai inoku ua'i venutai demimia vuia ka, kanaua devavai koma 'eva kubuta 'ava'avata makavana umaunai kano'akunai dealu 'avaea alu 'avaea vikau vani navui (40) mulinai 'eva Dilava eluva 'ana'i kanona bevenita davana laloanai deda'adodo davana delalovaia.

Pentikose naduna

'eva Iuda kauta eta nadu namana ka. Va kanaua 'Pentikose' anina 'imanavui (50). Iuda kauta eta nadu kanania 'eva La'aukeini mulinai melala imanavui de'ole 'eva denanadu.

Pentikose naduna laloanai 'eva Iuda kauta witi i'alina delalonama vaia. Vaka makavana umaunai Dilava ena talavatu Sinai lolona akanai Mose evenia Iuda kauta eta davana vaka delalonama vaia. Melala katania'i Pentikose melalanai 'eva Keliso ena kau deta'u melala kanaua'i Idume Kabukabuna e'ovu kau Keliso deabivenia kauta kataua akatai davana delalovaia.

NAMANA

'eva kualo kauta e'ana'ia vaita kauna ka. Ia 'eva Silia kauna. Ia 'eva sia Iuda kauna. Ia kualo 'ola kauna namana ka, beiamo kauaninai 'olele vana loki eabia. Melala ka eda'a enolea kauna vana Elisa kevana, inoku enoia ena 'olele bevanama'inala. Beiamo Elisa ia e'ouia beda'a Iolidane nutunai melala boutai kalakoi ka beidi'u. Namana eda'a kanaua ekoma 'eva kauanina itoinai enama'ina.

NINEVA

'eva vanua namana ka kanaua Dilava eta'u Iona esinia beda'a ena luva beilolo vaia vanuana. 'Iona' 'abuna boikala.

Dilava ediaka Nineva vanuana bevaolea 'olana koakoa si'avata vaika devavai 'ounai. Nineva kauta vali kanania deika koanai dekani mai delalo'udai. Kanania devavai koma 'ounai Dilava eta si'avana e'oukalo mai sia evaoleta.

NOA

'eva 'ani makavana umaunai emia kauna. Adamu kau makavana kubuna 'ava'avanai e'ovu easi ivakalakoi kanai 'eva Noa epulu.

Noa ena melalai 'eva kanobata kauta boutai koakoa si'avata vaika doutamo devavai. Kanaua 'ounai Dilava ediaka abaka namavaikana besinia, kanobata be'alavua, kau mai kanobata davata boutai bevaoleta. Beiamo Noa 'eva kau nama'ina mai Dilava lelana eda'avai kauna. Kanaua 'ounai Dilava Noa e'ouia aunakoi namavaikana umauna ka bevavaia, vaka Dilava eta'u Noa evaikabasia dala davai aunakoi bevavaia. Epua Dilava Noa e'ouia adana mai nakuna momoluaneta koi adata ita aunakoi ai bele'au maivaka sisi edeata edeata viloatai moluane ka mai ateate ka bevaeleta'au, 'a sisi viloatai vaida 'eva moluane kalakoi ka mai ateate kalakoi ka beudata'au. Noa Dilava ena luva eabivenia 'ounai dava boutai Dilava e'outa vinaulata umaota evavai. Noa ena kau ita aunakoi ai deda'adodo mulinai, Dilava eta'u lamu mekauna umauna eva akua, abaka namavaikana ela'asi, lolo vaka ekavunita. Kanobata kauta boutai dedono deba palu, ia Noa mo

ena luma kauta ita 'eva demauli. Vuia dounamo deole mulitai abaka e'ovu, vei e'oba. Kanobata elada 'udai. Noa ena luma kauta ita aunakoi ai dela'asi. Inoku Noa ainama ka evavaia Dilava ena 'olana evamaulita 'ounai. Dilava eluva 'ana'i abaka kanaua boina sia ka bevala'asia 'udai kanobata akanai, maivaka ediaka boualo 'eva ia ena luva'ana'i koana, melala kanaua beda'a vaia 'eva boni mai lani bemimia, 'elu namana mai siavu namana, maivaka avala melalana mai kano be'a'olo melalana, vaka 'ua'ua mai 'ali'ali melalana.

OAPAEA

Nao malatai 'eva de'aea 'hisop'. Kabukabu kauta detata'u kanania deabia lala 'o vei ai dekaoa uku inoku kau 'o eta dava vaidā akatai desibulia, veiveina e'ovu, kanaua devavai koma 'eva Dilava vailanai kabukabu vinulana devavaia.

OLIVE

'eva au ka vana. Au kanania 'eva maivuana. Ikana 'eva itani tuava auna boina beiamo uauana 'eva kikita komolota. Puka kanania laloanai olive auna va'ava'ana boikala.

Iuda kauta olive vuana deabia deolo devavaia. Deolo kanaua deabia denadunadu vaia maivaka vinala doutamo edeata edeata devavai. Iuda eta mauili laloanai, olive deolona 'eva dava namana. Olive lolona 'eva Ielusalema kevanai lolo ka vana. Lolo kanaua akanai 'eva olive auta dekukubu.

OMEKA

'Alepa' 'abuna boikala.

OSANA

'eva vanama'ina luvana, kau eta 'ola aku koana kau ka kevanai 'eva luva kanania kau kanaua devenia. Luva anina 'eva, 'Dilava ia bevamaulia,' 'o 'iabidaena'.

PALADAISO

anina 'eva 'loba nama'ina vaika'. Kau eta nama'ina vaika kanaua Edene laloanai 'eva vana de'aea Paladaiso. Kanobata asido'o epulu 'eva Dilava Adamu mai Eva ita ua'i e'uleta. Vali nama'ina kanania laloanai 'eva Paladaiso lovana eakua 'eva itani vutuvutu vanuana boina. 'A vutuvutu vanuana 'eva 'abu nama'ina vaika, kau Iesu Keliso deabi venia kauta kataua kanobata kanania'i bebaba mulinai 'eva beda'a 'abu kanaua.

PALAO

'eva Aikupito eta lovia 'olana kauta e'olavaita kauna. Aikupito eta lovia 'olana kauta de'olavaita kauta boutai 'eva de'aeta Palao.

Palaoa sia ivakubuna naduna

'Nadu' 'abuna boikala.

PALISEA

kauta 'eva kau namata vaidā Iuda kauta viloatai. Ia 'eva talavatu 'olavai kauta ita devinala ka'ona. Talavatu 'olavai kauta 'eva talavatu devaik-abasivai kauta. Inoku talavatu kataua Dilava eta'u Mose evenia davata deikabasita kave'i, beiamo Dilava ena talavatu akatai sibota eta koakoa mai talavatu vaidā dene'eta 'au. Melala doutamo de'apa sibota delalovaia ia 'eva denama'ina vaika vakaia kau vaidā. Ia eta koakoa devavai itani kau nama'ita. Beiamo eta lalovalalovai 'eva desi'avana. Mataio elena 23 laloanai Iesu Palisea kauta lovata eaku maivaka e'aeta 'apa kauta'. Palisea kauta 'eva Iesu devaiiiva maivaka dala dekavu beaku bala dekoma.

Pentikose naduna

'Nadu' 'abuna boikala.

PULU EDEA KAUTA

'eva sia Iuda kauta. 'Elene kauta malatai luva kanania deluvala anina 'eva 'kano boutai' inoku kano kanaua anina 'eva kano boutai kanobata akanai, beiamo Iuda kauta 'eva asi'i. Iuda kauta 'eva deapa vaika 'olana Dilava 'eva

ia edilata ena kau umautai be'ao, inoku ia 'eva kano edeata kauta ulata sia de'ula.

SADUKEA

kauta 'eva Iuda kauta viloatai kau namata matota vaidā. Ia 'eva kau devamaleleta Dilava ena talavatu kataua Mose evenia davata beda'avai, mai Iuda etakoakoa vaka beda'avai kave'i. Ia 'eva vitaitana Palisea kauta boita. 'Palisea' 'abuna boikala. Beiamo melala doutamo Sadukea kauta 'eva Palisea kauta ita deluva vai'ade, 'olana Palisea kauta eta abiveni 'eva kau ka bebaba mulinai 'eva maui makamakanai bemaui 'udai, ia Sadukea kauta 'eva luva kanaua sia devamomo'aia.

SALA

'eva Abela'amo adana. Vikau doutamo vaika 'eva sia melo ka evapulua, beiamo 'ani emotu laloanai Isako evapulua. 'Abela'amo' 'abuna boikala.

SALAMO

pukana 'eva Dilava ivanama'inana pukana. Davida mai banona vaidā eta lalo'au Dilava kevanai masita mai Dilava ivanama'inana masita deleleta.

SALPA

'eva bika'a laolina ka. E'ani koanai esiavu si'asi'a, e'ailala vaika bonana epasisi vaika.

SAMALIA

'eva 'abu ka vana. Samalia kauta 'eva sia Iuda kauta umauta 'olana 'ana'ina umaunai 'eva pulu edea 'a'ateta deadavata. Iuda kauta 'eva ia ulata sia de'ula.

SAMUELA

'eva enolea kauna namana ka. Ia eta'u Davida 'olana deolo ai esisia evakabukabua lovia 'olana kaunai be'ao. Ia 'eva kau eta 'ana'iavai kauna namana ka.

SAMUSONI

'eva Iuda kauta eta 'ana'iavai kauna 'ani siako vaika. Dilava eta'u kula'ila namavaikana evenia. Samusoni kauaniai 'eva ekula'ila si'asi'a.

SATANI

'eva ka'uba si'avata vaika e'ana'ia vaita kauna. Ia 'eva Dilava evaiviivia, kanaua 'ounai kau elebata, ena ula 'eva koakoa si'avata bemavavai. Ia etata'u kau Iesu deabivenia kauta melala boutai eta si'avana evalalota, kanania evavai koma 'olana ena ula 'eva deabiveni kauta belalovaia Dilava eta si'avana sia be'oukao. Satani vana vaka 'diabolo', kanobata kanania lovia.

SI'AVANA

kau ka Dilava ena luva'ana'i evavaia si'asi'a eva si'avana evavaia. Kau vailatai koakoa kanaua boina 'eva dava namana 'o kikina beia, Dilava vilanai ia 'eva si'avana kauna.

SINAI

'eva lolo ka vana. Lolo mo kanania tolinai Dilava ena talavatu Mose evenia Isalaela kauta eta. 'Mose' 'abuna boikala.

SINAPI

'eva au ka vana, nao malatai 'eva 'mustard', ia keana 'eva kikita vaika, 'a ekukubu koanai 'eva au namavaikana itani au boina. Ikana 'eva itanai tuava boina.

SINEMONI

'eva au ka ai devavaia. Bonana ekula'ila vaika mai detavatava vaia 'eva tavana namavaikana melala kanaua'i. Kau sinemoni deabia deolo ita devaka'onamoa, deolo bonana bevakula'ilala 'ounai, inoku deolo kanaua deabia kau 'olatai desisia, iabisina koana, mai melala vaidā 'eva ba 'abutai devavaia.

SIONA

lolo kanaua akanai Ielusalema emimia 'eva vana Siona. Lo'e kabukabuna 'eva lolo kanaua akanai emimia, maivaka Ielusalema vanuana laloanai 'abu kanaua 'eva ekabukabu vaika. Melala vaidia Ielusalema vaka de'aea Siona.

Melala vaidia 'eva Ielusalema vutuvutu ai emimia davana vaka vana de'aea Siona, kanaua 'eva vutuvutu vanuana de'oua. Inoku kanaua anina 'eva Dilava ena mia 'abuna. ('Ebelu 12.22, Ivala'asina 14.1)

SODOMA

'eva vanua namana ka vana. Lota 'eva ua'i emia. 'Lota' 'abuna boikala. Vanua namana ka ua'i Sodoma kevanai 'eva vana Komola.

Sodoma mai Komola kauta 'eva koakoa si'avata vaika devavai, kanaua 'ounai Dilava eta'u 'alovai vanua katania luana evaoleta.

SOLOMONA

'eva Davida nakuna. Ia 'eva Isalaela kauta eta lovia 'olana kauna namana ka.

Melala ka Solomona ena nivi ai Dilava easi ia kevanai inoku e'ouia ena ula ainamana 'eva dava Dilava ia bevenia. Inoku Solomona Dilava enoina lalovai komolo bavenia, kanaua'i ena kau be'ana'ia vaita kave'i. Inoku Dilava eta'u Solomona lalovai komolo namana evenia. Ia lovia 'olana kauta boutai eta lalovai komolo 'olana kaunai eao. Dilava vaka Solomona lavo namana evenia Solomona 'eva lavo ai elovia si'asi'a.

Solomona eta'u Lo'e kabukabuna makavana evalavala. 'Ana'inai Iuda kauta 'eva Aiolo kabukabuna devavaia, kanaua'i Dilava dekukudivo venia. Lo'e kabukabuna kanania 'eva ikana mediana vaika umauna.

SUKE

'eva au ka vana, nao malatai 'eva 'fig', vuana 'eva edia'a vaika.

TALAVATU

Dilava ena talavatu 'eva puka 'ana'ina laloanai puka lava'ana'ita ima. Katania 'eva Dilava ena talavatu Mose kevanai evala'asita ena kau eta.

TALAVATU MAUANA

maua kanania 'eva au ai devavaia inoku kolo ai kauanina itoinai demataia kai. Laloanai 'eva bika'a namata palapalata lua kataua akatai Dilava ena talavatu 'ouka eleleta'au davata. ('Ebelu 9.4, 5) Isalaela kauta kano'akunai dekalima laloanai maua kanania devuaia deda'avaia, mai Dilava ena luma kabukabuna laloanai de'uleia, maua kanania laloana davata 'eva dekabukabu vaika 'olana kataua 'eva Dilava ena luva 'ana'i talavatuna ivavitaitana.

TALAVATU 'OLA KAUTA

'eva kau kataua 'eva Dilava ena talavatu kataua Mose evenia Iuda kauta eta davata kau devaikabasi vaita. Ia detata'u dava kataua Mose ena puka ima laloatai eleleta davata devaikabasivai. 'Talavatu' mai 'Mose' 'abuta bo'ika.

VAMAULI KAUNA

Iesu 'eva 'Vamauli kauna' 'olana Ia eta'u dala ka eluvuia, kanaua'i kanobata kauta eta vavai si'asi'a mekauta asi'i demakoa 'ounai bemaui. 'Olana Iesu eba 'eva kau boutai eta mekau ekoiaia, kanaua 'ounai Dilava etata'u kau Iesu deabivenia kauta kataua eta si'avana e'oukao, eabitadae, evamomo'aita, komolo kautai evaaoa ia vailanai mai Iesu dainai.

VEAUNEKE KAUTA

Iesu eta'u mulinai deda'a kauta 'ouka lua eabita isi ia bebanoa ena veauneke kautai be'ao. (Mataio 10.1 - 4, Maleko 3.13 - 19, Luka 6.12 - 16)

Kau kataua 'eva Ia kevanai demia mai Ia eta'u evaikabasita. Iesu eba inoku eko'isi 'udai 'eva ia sibota makata umaunai deikaia. Ia 'eva kau Iesu deabivenia kauta kataua de'ana'ia vaita.

Veauneke eta vinaula pukana laloanai 'eva, Paulo, Banaba mai kau vaidia vaka de'aeta veauneke kauta. Ia vaka Iesu e'aeta esinita ena vinaula bevavaia kauta.

La'au keini naduna
'Nadu' 'abuna boikala.

VINE

'eva au vuana ka. Au vuana kanania va'ava'ana 'eva puka laloanai bo-davalia. Au kanaua vuana kanania boina evapulua davana 'eva vana vine. Vine 'eva deabita waini devavai. Iuda kauta 'eva eta vinaula kanotai vine autā doutamo devadota inoku de'imata kave'i namata de'ao 'eva kataua'i ia betata'u nadu bevavaia.

Luva Anita Ekakavu 'Abuta Dilava 'Eva Kanania Boina:

1. Dilava Kamata 'eva kanania boina.

Mk 10.27	Mk 12.29-30	Lk 1.37	Lk 6.35-36
Io 4.23-24	Vn 14.14-17	Vn 17.22-31	Lm 11.33-36
1Kl 8.4-6	2Kl 1.3	1Tm 1.17	1Tm 6.15-16
Eb 4.13	Eb 10.30-31	1Pt 1.14-17	1Io 1.5
1Io 4.7-12, 16	Id 24-25	Iv 4.8-11	Iv 15.3-4.

2. Dilava Nakuna, Iesu Keliso, 'eva kanania boina.

Iesu Keliso 'eva Dilava Nakuna.

Mt 11.27-30	Mt 16.13-17	Lk 1.35	Io 1.1-18
Io 5.19-29	Io 6.35-40	Io 8.58	Io 11.25-27
Io 14.5-11	Io 17.1-5	Io 20.26-31	Vn 3.13-16
Vn 4.10-12	Lm 1.3-4	1Kl 3.11	2Kl 4.4-6
2Kl 5.21	Kt 4.4-5	Pp 2.5-11	Kt 1.15-20
Kt 2.9-10	Eb 1.1-14	Eb 7.26-28	1Io 2.1-2
1Io 5.20	Iv 1.12-18	Iv 19.11-16	

Dilava Nakuna 'eva kauai easi epulu.

Io 1.14	Lk 1.26-38	Mt 1.18-25	Lk 2.1-20
Mt 2.1-23	Kt 4.4-5	Pp 2.6-7	Eb 2.14-18

Iesu kau evaikabasita mai de'olele kauta evanama'inata.

Mt 4.23-25	Mt 7.28-29	Mt 9.35-36	Mt 11.1-6
Lk 4.14-44	Vn 10.36-38	Io 20.30-31	

Iesu vatabulovo koata doutamo evavai.

Mt 8.1-15, 23-33	Mt 9.1-7, 18-33	Mt 12.9-14, 22	Mt 14.15-32
Mt 15.22-28, 32-38	Mt 17.14-18	Mt 20.29-34	Mt 21.18-22
Mk 1.21-28	Mk 7.32-37	Mk 8.22-25	Lk 5.4-8
Lk 7.11-15	Lk 13.10-13	Lk 14.1-4	Lk 17.12-14
Lk 22.50-51	Io 2.1-11	Io 4.46-54	Io 5.5-9
Io 9.1-7	Io 11.11-44	Io 21.4-6	Vn 2.22

'Ana'ia vai kauta Iesu deabia mai de'ouia asi bebaba.

Mt 26.47-68	Mt 27.1-2, 11-31	Mk 14.43-65	Mk 15.1-20
Lk 22.47-53	Lk 22.63 - 23.25	Io 18.1-14, 19-24	Io 18.28 - 19.16

Iesu au ido'o valaukuna akanai dekokoa'au.

Mt 27.32-56	Mk 15.21-41	Lk 23.26-49	Io 19.17-37
-------------	-------------	-------------	-------------

Iesu dekoleia.

Mt 27.57-66	Mk 15.42-47	Lk 23.50-56	Io 19.38-42
-------------	-------------	-------------	-------------

Iesu ba ai eko'isi 'udai mai kau vaidia ia deikaia.

Mt 28.1-20	Mk 16.1-8	Lk 24.1-49	Io 20.1 - 21.14
Vn 1.3-8	Vn 2.24-32	Vn 3.15	Vn 4.10, 33
Vn 10.39-43	Vn 13.29-39	Vn 17.2-3, 30-31	Lm 1.4
Lm 4.24-25	1Kl 15.3-8, 12-21	Iv 1.18	

Iesu emue eda'a vutuvutu.

Lk 24.50-51	Vn 1.9-11	Vn 2.32-36	Vn 5.30-31
Lm 8.34	Ep 1.20-23	Pp 2.9-11	Eb 1.3-11
Eb 2.9	Eb 4.14-16	Eb 7.25-26	Eb 10.12-14
1Pt 3.22.			

3. Idume Kabukabuna 'eva kanania boina.

Mt 28.19	Mk 1.9-11	Mk 3.28-30	Lk 1.35
Lk 3.16	Lk 4.1	Lk 11.13	Lk 12.12
Io 1.32-34	Io 3.5-8	Io 7.37-39	Io 14.15-17, 26
Io 15.26	Io 16.7-15	Io 20.19-23	Vn 1.4-5, 8
Vn 2.1-18, 38-39	Vn 4.31	Vn 5.3-5	Vn 8.14-17
Vn 10.44-48	Vn 13.2-4	Vn 15.28	Vn 16.7-10
Vn 19.1-7	Lm 5.5	Lm 7.6	Lm 8.9-16, 26-27
1Kl 2.4, 9-16	1Kl 3.16	1Kl 6.11, 19	1Kl 12.1-13
2Kl 1.21-22	2Kl 5.5	2Kl 13.14	Kt 3.2-5
Kt 4.6	Kt 5.16-18, 22-25	Ep 1.13-14, 17	Ep 3.16
Ep 4.3-4, 30	Ep 5.18-20	Ep 6.17-18	1Ts 1.5-6
1Ts 5.19	2Ts 2.13	Tt 3.5-6	Eb 2.4
Eb 9.14	1Pt 1.2, 11	2Pt 1.20-21	1Io 2.20
1Io 3.24	1Io 4.13	1Io 5.6-8.	

4. Dilava dava boutai evavaita.

Mt 19.4	Io 1.3	Vn 14.15	Vn 17.24-26
1Kl 8.6	Kt 1.15-16	Eb 1.2	Eb 11.3
Iv 4.11.			

5. Dilava dava boutai eika kao.

Mt 6.25-34	Mt 10.29-31	Vn 14.15-17	Lm 8.28
Lm 11.36	Kt 1.17	Eb 1.3	Ik 4.13-16.

Kau 'Eva Katania Boita:

6. Kau boutai 'eva devavai si'asi'a.

Io 8.7-9	Lm 3.9-20, 23	Lm 5.12	Kt 3.22
1Io 1.8-10.			

7. *Kau si'avana devavai konai, ia 'eva kanania boitai demia.*

Lm 1.18-32	Lm 8.5-8	Kt 5.19-21	Ep 2.1-3
Ep 5.3-5	Kt 3.5-10	Ik 4.17	1Pt 4.3
1Io 3.4-5.			

8. *Kau eta si'avana mekauna bemakoala 'abunai bemauli.*

Mt 10.28	Mt 13.41-42	Io 3.18-20, 36	Vn 17.30-31
Lm 1.18-19	Lm 6.23	Kt 6.7-8	Ko 3.5-6
2Ts 1.7-9	Eb 9.27	Eb 10.26-31	1Pt 1.17
1Pt 4.3-5	Id 7	Iv 20.11-15.	

Dilava Kau Eta Si'avanai Kanania Bevamaulita Koma:

9. *Dilava kau boutai elalo'au venita mai e'ula bevamaulita.*

Io 3.16	Lm 5.8	1Tm 2.3-6	2Pt 3.9
1Io 4.9-10.			

10. *Dilava Nakuna, Iesu Keliso, eba 'eva ita bevamaulita.*

Mk 10.45	Io 3.16	Lm 4.25	Lm 5.8
1Kl 15.3-4	2Kl 5.19-21	Kt 3.13	1Tm 2.5-6
Eb 2.9	Eb 9.28	1Pt 1.18-20	1Pt 2.24-25
1Pt 3.18	1Io 2.2	Iv 5.8-10.	

11. *Iesu ena lalana eta'u eta si'avana mekauna eabia tau.*

Mt 26.26-29	Lm 3.25	Lm 5.9-10	Ep 1.7
Eb 9.11-14	1Io 1.6-7	Iv 7.14-17.	

12. *Dilava eta si'avana e'oukao.*

Vn 5.31	Vn 10.43	Vn 26.18	Ep 1.7
Ep 4.32	Kt 1.13-14	Kt 2.13-14	Eb 10.17-18
1Io 1.8-10.			

13. *Dilava ita komolo kautai evaaota ia vailanai.*

Vn 13.38-39	Lm 1.16-17	Lm 3.21-26	Lm 5.1, 18-19
Kt 2.16	Kt 3.6-9	Tt 3.7.	

14. *Dilava ita mauili makamakana evenita.*

Io 3.1-16	Io 5.19-29	Io 10.10	Io 11.25-26
Io 14.6	Io 17.2-3	Io 20.31	Lm 5.21
Lm 6.5-14	Lm 8.10-17	2Kl 5.17	Kt 2.20
Ep 2.1-6	Kt 2.13	Kt 3.1-4	2Tm 1.10
Tt 3.4-7	1Pt 1.23	1Io 5.11-13.	

15. Dilava ita ia nakunai evaaota.

Io 1.12-13	Lm 8.14-17	Kt 4.6-7	Eb 12.5-11
1Io 3.1-3.			

Vali'u Kaikabasi Dilava E'ula Ita Bevamaulita Koanai, Ita Dava Ekavavaia:

16. Ekaikabasi ita 'ani kavavai si'asi'a inoku vavai si'asi'a ekavapuuaia.

Mt 4.17	Mk 6.12	Lk 13.1-5	Lk 15.1-31
Lk 24.45-47	Vn 2.37-40	Vn 3.19-20	Vn 17.29-31
Vn 20.21	Vn 26.19-20	2Kl 7.8-11	2Pt 3.9
Iv 9.20-21.			

17. Iesu eka abivenia ita bevamaulita.

Io 1.12	Io 3.15-18, 36	Io 6.47	Io 14.6
Io 20.31	Vn 4.12	Vn 16.30-31	Lm 3.20-22
Lm 10.9-10	Kt 2.16	Ep 2.8-9.	

18. Puka Kabukabuna eka vakuia 'eva Dilava ekaikabasia, mai dava e'ula eka vavaia davana eka ikabasia kave'i.

Mt 4.1-4	Mt 5.17-20	Mt 22.29	Io 8.31-32
Io 20.31	Vn 20.32	Lm 15.4	Lm 16.26
Kt 3.16	1Ts 2.13	1Tm 4.13	2Tm 3.14-17
Eb 4.12	1Pt 1.22-25	2Pt 1.19-21	2Io 9-10
Iv 1.3.			

19. Ita 'eva eka idi'u kabukabu.

Mt 28.28-20	Io 3.22	Io 4.1-2	Vn 2.37-42
Vn 8.12, 36-38	Vn 10.44-48	Vn 16.14-15, 31-33	Vn 19.1-7
Vn 22.12-16	Lm 6.1-4	Kt 3.26-27	Kt 2.12
1Pt 3.20-22.			

20. Abiveni kauta ita eka miabou.

Mt 18.19-20	Vn 2.41-47	Lm 12.4-8	Ep 1.22-23
Ep 4.11-16	Kt 3.15-17	1Tm 4.13	Eb 10.24-25.

21. Abiveni kauta ita eka vaka'onamo inoku Lovia namana ena anibou eka ania.

Mt 26.26-30	Mk 14.22-26	Lk 22.14-20	1Kl 10.14-22
1Kl 11.17-34.			

Ita Iesu Keliso Kabivenia Kauta 'Eva Kanania Eka Mauli Koma:

22. *Ita 'eva Dilava Kamata mai eta Lovia namana Iesu Keliso leleta eka da'avai.*

Io 14.15, 21, 23-24	Io 15.10-17	Lm 13.8-10	1Pt 1.14-16
1Io 2.3-8	1Io 3.22-24	2Io 5-6.	

23. *Dilava mai kau eka lalo'auvenita.*

Mt 22.34-40	Mk 12.28-34	Lk 10.25-37	Io 14.21
1Io 5.3	Mt 5.43-48	Io 13.34-35	Io 15.12-17
Lm 12.9-10	Lm 13.8-10	1Kl 13.1-3	1Kl 16.14
Kt 5.13-15	1Ts 4.9-10	1Pt 1.8	1Pt 4.8
1Io 2.9-11	1Io 3.11-18	1Io 4.7-21.	

24. *Eka vavai itanai Keliso evavai boina.*

Io 13.34-35	Io 14.27	Lm 12.9-13	Kt 5.22-26
Kt 3.12-17	1Ts 5.16-18.		

25. *Ekameamea:*

Aboina ekameamea?

Mt 6.5-13	Mt 7.7-11	Mt 18.19-20	Mk 11.24-25
Lk 11.1-13	Lk 18.1-8	Lk 21.36	Io 14.13-14
Io 15.7	Io 16.23-26	Lm 8.26-27	Lm 12.12
Ep 2.18	Ep 6.18	Pp 4.6-7	Kt 4.2
1Ts 5.17	1Tm 2.1-4, 8	1Tm 4.4-5	Eb 4.16
Eb 10.19-22	Ik 1.5-8	Ik 4.2-3	Ik 5.13-18
1Pt 4.7	1Io 3.21-22	1Io 5.14-15	

Katania 'eva kau ademeamea koma ivavitaitata.

Mt 11.25-26	Mt 14.23	Mt 19.13-15	Mk 1.35
Lk 5.16	Lk 6.12	Lk 22.32, 39-46	Io 11.41-42
Io 17.1-26	Vn 4.24-31	Vn 16.25	Vn 20.36
Vn 21.5	Lm 1.9-10	Lm 10.1-2	Lm 15.30-33
2Kl 12.7-10	Ep 1.15-20	Ep 3.14-21	Ep 6.19-20
Pp 1.3-5, 9-11	Kt 1.9-12	Kt 4.3-4	1Ts 3.9-13
2Ts 1.11-12	2Ts 3.1-5	Eb 5.7	Eb 7.25.

26. *Dilava vanama'ina eka venia dokadoka.*

Lk 17.11-19	Io 6.11	Lm 1.21	Ep 5.20
Pp 4.4-7	Kt 2.7	Kt 3.17	Kt 4.2
1Ts 5.18	1Tm 2.1	1Tm 4.4-5.	

27. *Banota ekaduluta.*

Mt 6.1-4	Mt 7.12	Mt 25.31-46	Lk 3.10-11
Lk 6.38	Vn 11.27-30	1Kl 10.24	2Kl 8.1-15
2Kl 9.1-15	Kt 6.9-10	Pp 4.14-19	Eb 10.24
Eb 13.1-3, 16	Ik 1.27	Ik 2.15-16	1Io 3.16-18.

28. *Ita 'uluta asi'i.*

Mt 5.3-12	Mt 18.1-5	Lk 14.7-11	Lk 18.9-14
Ep 4.2	Pp 2.3-11	Kt 3.12-13	Ik 4.5-10
1Pt 5.5-7.			

29. *Moni mai lavo kanania eka ikata koma.*

Mt 6.19-21, 24-34	Lk 12.13-21, 32-34	Vn 20.35	1Tm 6.6-10, 17-19
Eb 13.5-6	Ik 2.1-9	Ik 5.1-6.	

30. *Bedaita koanai lavuai laloatai sia eka dodo.*

Mt 5.25-26, 38-42	Mt 18.15-17	Lm 12.14-21	1Kl 6.1-8.
-------------------	-------------	-------------	------------

31. *De'ana'ia vaita kauta 'olata eka aku.*

Mt 22.15-22	Vn 5.27-29	Lm 13.1-7	1Tm 2.1-4
Tt 3.1	1Pt 2.13-17.		

32. *Kaivakuku sia eka kukudivo venita.*

Mt 4.10	Vn 17.22-31	1Kl 5.11	1Kl 6.9-11
1Kl 8.1-13	1Kl 10.1-22	2Kl 6.14-18	Kt 5.19-21
1Ts 1.9-10	1Io 5.21	Iv 21.8	Iv 22.15.

33. *Oada vinaulata sia eka kovota.*

Vn 13.4-12	Vn 19.11-20	Kt 5.19-21	Iv 21.8
Iv 22.15.			

34. *Sisi sia eka 'abuta veniveni davatai sia eka vaaota Dilava vilanai.*

Mt 9.13	Mk 12.33	Lm 12.1	Eb 9.6–10.18.
---------	----------	---------	---------------

35. *Maka si'a mai kulakula vinaulata si'ava vaikata sia ekavavai.*

Mt 5.27-30	Io 8.2-11	Lm 13.8-10	1Kl 5.9-11
1Kl 6.9-20	Kt 5.19	Ep 5.3	Kt 3.5-6
1Ts 4.1-8	Eb 13.4	Id 7.	

36. *Sia eka inu ba.*

Lm 13.13	1Kl 5.11	1Kl 6.9-11	Kt 5.19-21
Ep 5.18	1Tm 3.1-3	Tt 1.7	1Pt 4.3-5.

Dilava Ena Lo'e 'Eva Kanania Boina:

37. *Dilava ena lo'e kauta 'eva kania boita.*

Mt 16.13-20	Vn 2.41-42	Lm 12.4-8	1Kl 12.12-30
Ep 1.22-23	Ep 2.19-22	Ep 4.1-16	Kt 1.18
Eb 10.24-25	1Pt 2.4-10	Iv 19.5-10.	

38. *Dilava ena lo'e i'ana'ivaina kauta kabita isi kauta 'eva kanania bekoma.*

Vn 6.1-6	Vn 14.23	1Tm 3.1-3	Tt 1.5-9.
----------	----------	-----------	-----------

39. *Dilava ena lo'e i'ana'ivaina kauta 'eva kanania bemaui koma.*

Mt 28.18-20	Lk 22.24-27	Vn 20.17-35	1Ts 2.1-12
1Tm 4.1-16	2Tm 2.1-26	2Tm 3.10-4.5	Tt 2.7-8
1Pt 5.1-4.			

40. *Ita eta lo'e de'ana'iaivaia kauta 'olata eka aku.*

1Kl 9.14	Kt 6.6	1Ts 5.12-13	1Tm 5.17-22
Eb 13.7, 17.			

Luma Kauta 'Eva Kanania Boita:

41. *Kamoane kauta adata ita kanania bemaui koma.*

Mt 19.4-6	1Kl 7.1-16	Ep 5.21-33	Kt 3.18-19
Tt 2.3-5	Eb 13.4	1Pt 3.1-7.	

42. *Melo mai vavato 'eva kanania bemaui koma.*

Mt 15.3-6	Lk 2.51	Ep 6.1-3	Kt 3.20
1Tm 5.4-8	Eb 12.7-11.		

43. *Kama sina 'eva kanania bemaui koma.*

Ep 6.4	Kt 3.21	1Tm 3.4-5.
--------	---------	------------

44. *Obuobu 'eva kanania bemaui koma.*

Vn 6.1	Lm 7.2-3	1Kl 7.39-40	1Tm 5.3-16
Ik 1.27.			

45. *Adata kauna 'o ateatena 'eva sia eka vala'asia.*

Mt 5.31-32	Mt 19.3-9	Lk 16.18	Lm 7.2-3
1Kl 7.10-16.			

Keliso Ena Kau 'Eva Melala Doutamo Adedua Laloatai Bedododo:

46. Beanana 'ounai beva'olu.

Lm 8.18-25, 28	2Kl 1.4	2Kl 4.16-18	Ik 1.2-4
1Pt 1.6-9	1Pt 2.19-21	1Pt 5.8-10.	

47. Kau ia be'outa keinikeini 'ounai beva'olu.

Mt 5.10-12	Mk 13.9-13	Lk 12.4-9	Io 15.18-21
Io 16.1-4	Vn 5.41	Lm 8.35-37	Lm 12.12-14, 17-21
1Kl 4.11-13	2Kl 4.8-11	2Kl 12.10	Pp 1.28-29
2Ts 1.4-8	2Ts 3.2-4	2Tm 3.10-13	Eb 10.32-39
Eb 12.3-4	1Pt 3.13-17	1Pt 4.12-19	Iv 2.10.

48. Ba sia bemakau vaia.

Io 6.39-40	Io 11.17-27	Io 14.1-4	Lm 8.10-11, 38-39
Lm 14.7-9	1Kl 15.12-58	2Kl 5.1-10	Pp 1.20-24
1Ts 4.13-18	Eb 2.14-15	Iv 14.13	Iv 21.1-4
Iv 22.1-5.			

49. Dilava 'eva ia kevatai mai eduluta.

Mt 18.19-20	Mt 28.19-20	Io 14.16-23	Lm 8.35-39
2Kl 6.16-18	Ep 3.17-19	Pp 4.13	Kt 2.6-7
2Ts 3.16	Eb 13.5-6.		

50. Satani 'eva dala ekakavu beva anaanata.

Mt 13.19	Lk 4.1-13	Lk 22.3-4	Io 8.42-44
2Kl 2.10-11	2Kl 4.4	2Kl 11.13-15	Ep 2.2
1Ts 2.18	2Ts 2.9-12	1Pt 5.8-9	1Io 3.8-10
Iv 12.7-12	Iv 20.1-3, 10.		

51. Dilava ia siavu evenita Satani beakua tau mai adedua laloatai bekeini kave'i.

Mt 4.1-11	Mt 6.13	Lk 22.31-32	Io 17.14-19
Lm 8.31-39	Lm 12.12	Lm 16.19-20	1Kl 10.12-13
1Kl 16.13	2Kl 12.7-10	Ep 3.20-21	Ep 6.10-18
Pp 4.13	1Ts 3.5-8	2Ts 3.3	2Tm 1.7-8
Eb 2.18	Eb 4.14-16	Eb 12.1-2	Ik 4.7
1Pt 1.5	1Pt 5.8-11	1Io 4.4	1Io 5.3-5
Iv 12.7-12.			

52. Dilava 'eva kau eta 'olelei evamaulita.

Mt 4.23-25	Mt 9.35	Mt 11.2-5	Vn 3.1-6
Vn 8.4-8	Vn 19.11-16	Vn 28.8-9	1Kl 12.9, 29-30
2Kl 12.7-10	1Tm 5.23	2Tm 4.20	Ik 5.14-15.

Dava Vailai Bepupulu:

53. Iesu bemumue be'asi kanobatai.

Mt 24.29-44	Io 14.1-3	Vn 1.10-11	Vn 3.19-21
Pp 3.20-21	Kt 3.4	1Ts 1.9-10	1Ts 3.13
1Ts 4.13 - 5.11	2Ts 1.6-10	2Ts 2.1-4	1Tm 6.13-15
2Tm 4.8	Eb 9.28	2Pt 3.1-18	1Io 3.1-3
Iv 1.7	Iv 22.12-13.		

54. Dilava betata'u kau boutai Iesu vani bevaluvata.

Mt 7.21-23	Mt 16.24-27	Mt 25.31-46	Io 3.18-21
Io 5.24-29	Vn 17.30-31	Lm 2.1-11	Lm 14.10-12
1Kl 3.10-15	1Kl 4.5	2Kl 5.9-10	2Ts 1.5-10
Eb 9.27-28	Eb 10.26-31	1Pt 1.17	1Pt 4.3-5
Iv 20.11-15.			

55. Bemauli kauta kataua boutai 'eva vutuvutu vanuana laloanai bemimia.

Lk 12.32-34	Io 14.1-3	2Kl 5.1-8	Pp 1.23
1Pt 1.4-5	Iv 4.1-11	Iv 21.1-4	Iv 21.22 - 22.5
Iv 22.14-15.			

56. Sia bemauli kauta kataua 'eva 'alova laloanai bemimia.

Mt 10.28	Mt 13.41-42, 47-50	Mt 25.41	Lk 16.23-26
2Ts 1.9	Iv 20.10-15	Iv 21.8.	